

Alkitab
Bahasa Batak Simalungun
2007

Perjanjian Lama
(Mazmur - Maleakhi)

Psalmen

Hatuahon ni Halak Parpintor ampa Hamagouan ni Halak Parjahat

- 1** ¹ Martuah ma halak na so ra mangihutkon riah ni halak parjahat, na so ra jongjong bani dalan ni pardousa, anjaha na so ra hundul bani tumpuan ni halak siparrisai.
- ² Tapi titah ni Jahowa do harosuh ni uhurni, sai titah-Ni ai do ipingkiri arian pakon borngin.
- ³ Songon hayu do ia na sinuan i topi ni bah mardalan, na marbuah bani musimni, bulungni pe seng ra melus, anjaha sagala hinorjahonni manjadi do.
- ⁴ Seng sonai anggo halak parjahat, tapi songon lapa-lapa hinabangkon ni logou do sidea.
- ⁵ Halani ai seng tahan halak parjahat i lobei ni paruhuman, sonai homa pardousa ibagas humpulan ni halak parpintor.
- ⁶ Ai itanda Jahowa do dalan ni halak parpintor, tapi sai maseda do dalan ni halak parjahat.

**Panrajaion ni Naibata ampa
Mesias Siparmonang in**

- 2** ¹ Mase sai oga-oga bangsa sipajuh begu-
begu, anjaha na so marnidok ipingkiri
bangsa-bangsa?
- ² Jongjong do raja-raja ni tanoh on, anjaha
manriah do na sangap-sangap, laho
mangimbang Jahowa pakon na mininakan-
Ni.
- ³ “Rutuskon hita ma gari ni sidea, anjaha
ambukkon hita ma tali ni sidea hun banta.”
- ⁴ Ipartatawai na marhotak i nagori atas ai do
sidea, anjaha mapas do Tuhan bani sidea.
- ⁵ Lanjar marsahap ma la dampak sidea ibagas
ringis-Ni, anjaha isonggoti sidea ibagas
gila-Ni.
- ⁶ “Ahu do pabangkit rajang-Ku i Sion, dolog-Ku na
ma pansing in.”
- ⁷ Patugahonku ma na dob tinotapkon ni Jahowa:
Domma ihatahon Jahowa bangku, “Anak-Ku
do ho, sadari on do ho Hutubuhkon!
- ⁸ Pindo ma hun Bangku, ase Hubere sagala
bangsa gabe tean-teanan bam, anjaha ujung
ni tanoh on, ho simadasi.
- ⁹ Ropukan-Mu do sidea marhitei simambu bosi,
anjaha rosakkononmu do songon hudon
tanoh.”

- ¹⁰ Ai pe, nasiam sagala raja, paruhurhon nasiam ma ai, sai ra ma nasiam paingaton, nasiam sagala panguhum ni tanoh on.
- ¹¹ Balosi nasiam ma Jahowa marhasoman biar, anjaha summah nasiam ma nahei-Ni marhasoman hitir,
- ¹² ase ulang roh ringis-Ni gabe magou nasiam i tongah dalan, ai urah do gajag ringis-Ni. Martuah do sagala na marhatengeran Bani.

Nalom ni Uhur bani Jahowa Ibagas Parmaraan

- 3** ¹ Psalm ni si Daud, sanggah maporus ia humbani anak ni si Absalom. (3-2) Ham Jahowa, bueini in imbangku, buei ni in na puho manlawan ahu.
- ² (3-3) Buei do na mangkatahon pasal ahu, “Seng dong be pangurupion bani humbani Naibata.”
- ³ (3-4) Tapi Ham do Jahowa gantar bangku inggot, hatunggungonku do Ham, sipadirgak ulungku.
- ⁴ (3-5) Hupagogoh do sorangku mandilo Jahowa, gabe itangihon do ahu hun dolog-Ni na ma pansing in. Sela.
- ⁵ (3-6) Hupatibal diringku lanjar tarpodom, tarpuho use, ai Jahowa do manatang ahu.
- ⁶ (3-7) Seng mabiar ahu mangidah marribu-ribu halak, na roh manlawan ahu inggot.

- ⁷ (3-8) Jongjong ma Ham Jahowa, urupi ma ahu, Ham Naibatanku. Ai domma irosakkon Ham osang-osang ni imbangku, anjaha iropangi Ham ipon ni parjahat.
- ⁸ (3-9) Bani Jahowa do haluahon, sai sogop ma pasu-pasu-Mu bani bangsa-Mu. Sela.

Mardamei Ibagas Jahowa

- 4** ¹ Bani pambobai koor. Marhasoman husapi. Psalm ni si Daud. (4-2) Anggo dilo-dilo ahu, balosi Ham ma ahu, Ham Naibata, Sipintori ahu. Domma ipalumbang Ham ahu ibagas hasosakanku, sai maidop ma uhur-Mu bangku anjaha tangihon Ham ma tonggongku.
- ² (4-3) Nasiam dalahi, sadiha dokah nari mapas uhur nasiam pasambor samborhon hasangaponku, sadiha dokah nari haholongan nasiam na so marguna anjaha pindahan nasiam ladung? Sela.
- ³ (4-4) Botoh nasiam ma, domma ipilih Jahowa sada haholongan-Ni Bani. Itangihon Jahowa do anggo hudilo la.
- ⁴ (4-5) Boi do manggila, tapi ulang mardousa. Marpingkir-pingkir ma nasiam ibagas uhur bani podoman nasiam, tapi sipsip ma nasiam. Sela.

- ⁵ (4-6) Galangkon ma galangan na sintong, anjaha ajamkon ma Jahowa.
- ⁶ (4-7) Buei do na mangkatahon, “Ise ma na manumpakkon na madear banta?” Sondangkon Ham ma sinalsal ni bohi-Mu bennami, Ham Jahowa.
- ⁷ (4-8) Bueinan do malas ni uhur ibere Ham hubagas uhurhu, marimbang malas ni uhur ni sidea sanggah pariama omei pakon pariama anggur na junah.
- ⁸ (4-9) Ibagas damei hupatibal diringku lanjar sinok, ai Ham do hansa Jahowa na mambahen sonang ahu marianan.

Tonggo Sogod

- 5** ¹ Bani pambobai koor. Marhasoman tulila. Psalm ni si Daud. (5-2) Sai tangihon Ham ma hatangku, Ham Jahowa, anjaha pardiateihon Ham ma hoih-hoih ni uhurhu.
- ² (5-3) Tangihon Ham ma dilo-dilongku Ham Rajangku anjaha Naibatangku, ai hu Bamu do ahu martonggo.
- ³ (5-4) Ham Jahowa, girah sogod do itangihon Ham sorangku, girah sogod do ahu marugas marayak Ham anjaha manatap-natap.
- ⁴ (5-5) Ai sedo Naibata na mangkarosuhkon hagedukon ia Ham, seng boi tondok paruhur na geduk i lambung-Mu.

- ⁵ (5-6) Seng tahan sigijang uhur i lobei ni panonggor-Mu, sogam do uhur-Mu bani sagala sihorjahon hajahaton.
- ⁶ (5-7) Iparseda Ham do sagala halak sisahapkon ladung, ihagigihon Ham do siduruskon daroh pakon panipu.
- ⁷ (5-8) Tapi anggo ahu, halani bangga ni idop ni uhur-Mu, sai masukanku do rumah-Mu, manrogop do ahu dampak rumah-Mu na pansing in, marhasoman biar Bamu.
- ⁸ (5-9) Ham Jahowa, togu Ham ma ahu ibagas hapintoron-Mu, halani imbang-imbangku, pahornop Ham ma dalan-Mu i lobeihu.
- ⁹ (5-10) Ai seng dong na sintong ibagas pamangan ni sidea, na ilat do pingkiranni ibagas, songon tanoman na tanggak do tolonan ni sidea, ipalandit-landit do dilahni.
- ¹⁰ (5-11) Salahkon Ham ma sidea, Ham Naibata, sai madabuh ma sidea halani tahi-tahi ni sidea, ambukkon Ham ma sidea halani buei ni panlanggaronni, ai dampak Ham do sidea manlawan.
- ¹¹ (5-12) Tapi sai na marmegah-megah do sagala na marlingod Bamu, marolob-olob do sidea sadokah ni dokahni, halani Ham do parlingodan bani sidea. Sai marolob-olob do ibagas Ham na mangkaholongi goran-Mu.

¹² (5-13) Ai Ham do Jahowa na mamasu-masu na pintor maruhur; iliotkon Ham do idop ni uhur-Mu hubani sidea songon gantar.

Tonggo bani Panorang Hasosakan

- 6** ¹ Bani pambobai koor. Marhasoman husapi. Domu hubani na pauluhkon. Psalm ni si Daud. (6-2) Ham Jahowa, ulang uhum Ham ahu ibagas ringis-Mu, ulang bogbog Ham ahu ibagas gila-Mu.
- ² (6-3) Maidop ma uhur-Mu bangku, Ham Jahowa, halani hagalekonku; pamalum Ham ma ahu Jahowa, ai hitir-hitir do holi-holingku.
- ³ (6-4) Rusak tumang do tonduyhu ibagas, tapi Ham Jahowa, sadiha dokah nari do?
- ⁴ (6-5) Marulak-ulakan ma uhur-Mu, Ham Jahowa, paluah Ham ma tonduyhu, sai paluah Ham ma ahu, halani idop ni uhur-Mu.
- ⁵ (6-6) Halani bani hamatean seng dong halak na mardingat Ham, i nagori toruh, ise ma na mamuji Ham?
- ⁶ (6-7) Loja do huahap ibahen hoih-hoihku, siap borngin do bonsot podomanku hubahen, marhitei iluhku marbah do tilamku hubahen.

- ⁷ (6-8) Solong do matangku halani pusok ni uhurhu, roh galekni do ai halani halak na manosak ahu.
- ⁸ (6-9) Surut ma nasiam humbangku, sagala sihorjahon hajahaton, ai itangihon Jahowa do sora ni tangis-tangisku.
- ⁹ (6-10) Domma itangihon Jahowa hoihku; ijalo Jahowa do tonggongku.
- ¹⁰ (6-11) Sai tarbador anjaha tarsonggot tumang do sagala munsuhku; tarolos do sidea surut, tarmela sompong.

Mangindo Pamintorion ni Naibata

- 7** ¹ Doding adu-adu ni si Daud, nidodingkonni bani Jahowa, halani hata ni si Kus, marga Benjamin. (7-2) Ham Jahowa Naibatangku, hu Bamu do ahu marlingod, sai paluah Ham ma ahu humbani ganup na mangayak-ayak ahu, anjaha bansah ma bahen Ham ahu;
- ² (7-3) ase ulang iparsirak ahu songon pambahenan ni singa, anjaha isarad seng dong na paluahkon.
- ³ (7-4) Ham Jahowa Naibatangku, anggo hubahen on, anjaha ihorjahon tanganku na so sintong,
- ⁴ (7-5) anggo hubahen na jahat hubani halak na mardamei-damei manggoluh rap pakon

- ahu, anjaha huodoh-odoh na manosak ahu
seng marhala,
- ⁵ (7-6) sai ipardakdak munsuhku ma ahu ronsi
dapot, irojati goluhku hu tanoh, anjaha
igijigkon bani orbuk hasangaponku. Sela.
- ⁶ (7-7) Jongjong ma Ham, Jahowa, ibagas
ringis-Mu, jongjong ma Ham mangimbang
gila ni na manosak ahu, puho ma Ham
mangurupi ahu, ai Ham do siparentahkon
uhum.
- ⁷ (7-8) Sai iinggoti hulanan ni bangsa ma Ham,
anjaha marparatas ma Ham i babou, i atas
ni sidea.
- ⁸ (7-9) Jahowa do na manguhum sagala
bangsa-bangsa. Luluhon Ham ma ahu Ham
Jahowa, romban hubani hapintoronku,
romban hubani habujuron na jumpah
bangku.
- ⁹ (7-10) Sai mangadi ma hajahaton ni parjahat;
tapi sai pargogohi Ham ma halak parpintor!
Ai Ham do siuji uhur pakon piah-piah, Ham
Naibata parpintor.
- ¹⁰ (7-11) Naibata do gantar bangku, sipaluah na
pintor uhur.
- ¹¹ (7-12) Panguhum na pintor do Naibata, anjaha
Naibata na manggila ganup ari.

- ¹² (7-13) Anggo seng ipaubah halak uhurni, asahonni ma podangni, pasangonni ma siorni laho manembak.
- ¹³ (7-14) Dompakkononni ma hubani sinjata pamunuh, nahit ma panahni ibahen.
- ¹⁴ (7-15) Tonggor ma, solat ma bani hagedukon, boratan rumah ma ia bani hamagouan, anjaha itubuhkan ladung.
- ¹⁵ (7-16) Ihurak do godung anjaha bagas ibahen, tapi ia sandiri do madabuh hubagas godung na binahenni ai.
- ¹⁶ (7-17) Hajahaton na binahenni mulak dabuh bani uluni, anjaha odoh-odohni mulak manipa tangkurakni.
- ¹⁷ (7-18) Pujionku do Jahowa halani hapintoron-Ni, anjaha dodingkononku do goran-Ni Jahowa Sitimbulan in.

Jolma na Galek in Gabe Tinompa Sisurungan

- 8** ¹ Bani pambobai koor. Domu hubani Gitit. Psalm ni si Daud. (8-2) Ham Jahowa, Tuhannami, sangapni in goran-Mu bani sab tanoh on, Ham do na mannahkon hamuliaon-Mu bani langit.
- ² (8-3) Humbani pamangan ni dakdanak pakon na inuman iadongkon Ham do hagogohon halani munsuh-Mu, laho pasipkon imbang-Mu ampa sipambalas.

- ³ (8-4) Anggo hukawahkon langit-Mu pakon horja ni jari-jari-Mu, bulan pakon sagala bintang na pinauli-Mu,
- ⁴ (8-5) mintor aha ma nani jolma in ase pala ingaton-Mu ia, ampa anak ni manisia in ase ihargahon Ham ia?
- ⁵ (8-6) Ijadihon Ham do ia otik toruhan humbani Naibata, anjaha isortalihon Ham do hubani hamuliaon pakon hatunggungan.
- ⁶ (8-7) Ipabangkit Ham do ia mamarentah jadi-jadian ni tangan-Mu, ipatunduk Ham do haganup hu toruh ni naheini:
- ⁷ (8-8) biribiri pakon lembu haganup, ampa binatang harangan;
- ⁸ (8-9) manuk-manuk na i awang-awang pakon dengke na i laut, haganup tene na manjuluk i longkit-longkit ni laut.
- ⁹ (8-10) Ham Jahowa Tuhannami, sangapni in goran-Mu bani sab tanoh on.

Panguhum pakon Sipaluah do Jahowa

- 9** ¹ Bani pambobai koor. Inggouni: Almut Laben. Psalm ni si Daud. (9-2) Sai pujionku do Ham Jahowa humbani gok ni uhurhu, sai baritahononku do sagala halongangan na binahen-Mu in.

- ² (9-3) Marmalas ni uhur anjaha marolob-olob do ahu Bamu, dodingkononku do goran-Mu, Ham Sitimbulan in;
- ³ (9-4) halani ai manginsurut do munsuhku, mangkajurgang anjaha bois i lobei-Mu.
- ⁴ (9-5) Tongon, Ham do sipatorsa uhum ampa paharangku, hundul bani hotak-Mu do Ham manguhumi, Ham panguhum na pintor.
- ⁵ (9-6) Hona hata do ibahen Ham sipajuh begu-begu, iagouhon Ham parjahat, anjaha isasap Ham do goran ni sidea sadokah ni dokahni.
- ⁶ (9-7) Bois do munsuh in, marongrong lalab, maseda do sagala huta ibahen Ham, magou pardingat bani sidea.
- ⁷ (9-8) Tapi, ia Jahowa totap do marparatas ronsi sadokah ni dokahni; ipajongjong do hotak-Ni laho manguhumi.
- ⁸ (9-9) Ia do manguhum dunia on ibagas hapintoron, anjaha ipapintor uhum bani sagala bangsa sintong-sintong.
- ⁹ (9-10) Ase Jahowa do batar-batar bani na hona dorun, anjaha batar-batar bani panorang hasosakan.
- ¹⁰ (9-11) Halani ai martenger ni uhur Bamu do sagala na mananda goran-Mu, ai seng onggaitadingkon Ham sagala na mangindahi Ham, ale Jahowa.

- ¹¹ (9-12) Dodingkon ma Jahowa, na marparatas i Sion, ambilankon ma pambahenan-Ni bani sagala bangsa;
- ¹² (9-13) ai la do siluluhon daroh, anjaha seng lupa la bani dilo-dilo ni halak na madoyuk.
- ¹³ (9-14) Maidop ma uhur-Mu bangku, Ham Jahowa, kawahkon Ham ma hadoyukonku halani na mandomdomi ahu; Ham do na mandokdok ahu hambani horbangan ni hamatean,
- ¹⁴ (9-15) ase hubaritahon sagala puji-pujian Bamu bani horbangan ni boru Sion, anjaha marolob-olob ahu halani parpaluah-Mu.
- ¹⁵ (9-16) Tarrobung do sipajuh begu-begu bani godung na binahenni, anjaha sangkut naheini bani siding na tinaonni ponop.
- ¹⁶ (9-17) Ipatandahon Jahowa do diri-Ni, idalankon do uhum, marhitei pambahenan ni tangan-Ni tarsangkut parjahat. Higajon. Sela.
- ¹⁷ (9-18) Sai turun do hu nagori toruh halak parjahat, haganup sipajuh begu-begu na mangkalupahon Naibata.
- ¹⁸ (9-19) Seng anjai lalab hona lupahon halak na masombuh, anjaha seng lalab magou pangarapan ni halak na hona dorun.

¹⁹ (9-20) Jongjong ma Ham Jahowa, ase ulang sai mangenjeng jolma in, sai hona uhum ma sipajuh begu-begu i lobei-Mu.

²⁰ (9-21) Pasogop Ham ma songgot-songgot bani sidea, Ham Jahowa, ase iahapkon sipajuh begu-begu jolma do sidea. Sela!

Jahowa do Sipaluah Halak na Masombuh

10 ¹ Mase mandaoh-daoh Ham jongjong, ale Jahowa, marponop Ham bani panorang hasosakanku?

² Halani enjeng ni parjahat, pusok do iahap na masombuh. Sai tardapot ma sidea bani hajahaton na niranggini ai.

³ Ai ihamogahkon parjahat do sura-sura ni uhurni, ipuji-ipuji untungni, anjaha iapasi Jahowa.

⁴ Nini parjahat do marhasoman pangunsong ni igungni, “Seng anjai marlulu la, seng dong Naibata,” sonai do pingkiranni.

⁵ Manjadi do sagala langkahni tongtong; magijangtu do humbani uhuman-Mu; iunsongkon igungni dompak imbangni.

⁶ Nini ibagas uhurni, “Seng anjai morot ahu, seng anjai mangonai bangku hasunsahan marsundut-sundut.”

⁷ Gok do bura-bura pakon sipaoto-oto ampa panokohon pamanganni; hagedukon pakon hajahaton do i toruh ni dilahni.

- ⁸ Sai manggompangi do ia bani huta-huta;
bani ianan na ponop ibunuhi halak na so
marpipot, matani mangkahapi halak na
galek.
- ⁹ Marponop do ia manggompangi songon singa
ibagas naporon, manggompangi ia laho
manangkap halak na masombuh. Itangkap
do halak na masombuh laho pamasukkonsi
hubagas sidingni.
- ¹⁰ Ipaunduk do dirini mardalan, jadi dapot
sisilonni na gogoh ai ma halak na galek.
- ¹¹ Nini ibagas uhurni, “Ihalupahon Naibata do ai,
iponopkon bohi-Ni, seng anjai idahon-Ni ai
ronsi sadokah ni dokahni.”
- ¹² Jongjong ma Ham Jahowa, ale Naibatanku,
surdukkon Ham ma tangan-Mu, ulang ma
lupa Ham bani halak na masombuh!
- ¹³ Mase ma mapas parjahat bani Naibata, anjaha
nini ibagas uhurni, “Seng anjai luluhonon-Ni
ai?”
- ¹⁴ ididah Ham do ai tene, itatap Ham do halojaon
pakon hasunsahan laho manangani ai.
Bamu do marondos halak na galek, Ham do
panolong bani halak na tading maetek.
- ¹⁵ Ponggolhon Ham ma botohon ni halak parjahat
pakon halak na jungkat, balaskon Ham ma
hajahatonni, ase ulang adong be ia.

- ¹⁶ Jahowa do raja sadokah ni dokahni; magou do sipajuh begu-begu humbani tanoh-Ni.
- ¹⁷ Domma itangihon Ham Jahowa pangindoan ni uhur ni halak na masombuh, ipatotap Ham do uhur ni sidea, anjaha ipatiur Ham do pinggol-Mu,
- ¹⁸ laho pasintong uhum bani halak na tading maetek pakon na nidorun, ase ulang inunut jolma na i tanoh on mambibiari.

Jahowa do Parlingodan bani Halak Parpintor

- 11** ¹ Bani pambobai koor. Humbani si Daud. Marlingod bani Jahowa do ahu, mase ma ihatahon nasiam hu bangku, “Habang ma ho hu dolog songon manuk-manuk!”
- ² Ai tonggor ma, domma isintak parjahat siorni, ipasang panahni bani talini, laho manembak ibagas na golap halak sipintor uhur.
- ³ Anggo maseda palas, aha ma boi ibahen halak parpintor?
- ⁴ Marianan do Jahowa ibagas rumah-Ni na pansing ai, i nagori atas do paratas ni Jahowa; manatap do panonggor-Ni, sai ipareksa pangkirdop ni mata-Ni do anak ni jolma in.
- ⁵ Jahowa do siuji halak parpintor pakon parjahat; idomdomi do halak na mangkarosuhkon odoh-odoh.

⁶ Iudan-udan halak parjahat marhitei apuy pakon hirtah, logou na milas do parbagianan bani panginumanni.

⁷ Ai pintor do Jahowa anjaha ihaholongi do hapintoron; idahon ni halak parpintor do bohi-Ni.

Tonggo Mangindo Pangurupion Marimbang Halak Parjahat

12 ¹ Bani pambobai koor. Domu hubani na paualuhkon. Psalm ni si Daud. (12-2) Urupi Ham ma, ale Jahowa, ai seng dong be halak na daulat; lambin otik do halak na bujur uhur i tongah-tongah ni anak ni jolma.

² (12-3) Sai ladung do isahapkon samah sidea, marbibir na landit anjaha mardua uhur do sidea marsahap.

³ (12-4) Sai ijabir Jahowa ma sagala bibir na landit, pakon haganup dilah na toal marsahap,

⁴ (12-5) na mangkatahon, “Monang do hanami ibahen dilahnami, bibirnami do mangkasomani hanami, ise ma nani tuannami?”

⁵ (12-6) Mangidah hasosakan ni halak na madoyuk pakon hoih ni halak na masombuh, ai do ase jongjong Ahu sonari, nini Jahowa, “Berehonon-Ku ma haluahon bani halak na mangarapkonsi.”

⁶ (12-7) Sagala hata ni Jahowa hata na sintong do ai, usih songon pirak na nilala ibagas balanga, anjaha ipapitah pitu hali.

⁷ (12-8) Ham Jahowa, sai parorot Ham ma sidea, sai ondingi Ham ma hanami marimbang bangsa on ronsi sadokah ni dokahni.

⁸ (12-9) Inggot marhujai-hujon do halak parjahat, sanggah manomboh hajahaton i tongah-tongah ni anak ni jolma.

Uhur na Kawah-kawah bani Pangurupion ni Jahowa

13 ¹ Bani pambobai koor. Psalm ni si Daud.
(13-2) Sadiha dokah nari, Ham Jahowa, halupahonon-Mu ahu lalab? Sadiha dokahnari ponopkonon-Mu bohi-Mu humbangku?

² (13-3) Sadiha dokah nari sai tong marpingkir uhurhu, sai sunsah uhurhu ibagas layur-layur ari? Sadiha dokah nari sai pagijang diri munsuhku dompak ahu?

³ (13-4) Sai mangkawah ma Ham, balosi Ham ma ahu, Ham Jahowa, Naibatangku! Palihar Ham ma matangku, ase ulang lanjar matei modom ahu;

⁴ (13-5) ase ulang ihatahon munsuhku, “Domma hupatunduk ho,” ase ulang gabe marsurak munsuhku, anggo rebad-rebad ahu.

⁵ (13-6a) Ia ahu, bani idop ni uhur-Mu do ahu marhatengeran, marolob-olob do uhurhu, mangidah haluahon na hun Bamu.

⁶ (13-6b) Mandoding ma ahu bani Jahowa halani pambahenan-Ni na madear bangku.

Haotoon ni Jolma na Marnalangkong Naibata

(Pausih: Psalm 53)

- 14** ¹ Bani pambobai koor. Humbani si Daud. Nini halak na oto do ibagas uhurni, “Seng dong Naibata.” Bajan anjaha sambor do pambahenan ni sidea, sahalak pe lang sibahen na madear.
- ² Manatap-natap do Jahowa hun nagori atas, paidah-idah anak ni jolma laho mangidah atap dong do na maruhur, sipindahi Naibata.
- ³ Haganup do sidea kahou, haganupan seng margagan, sahalak pe lang sibahen na madear, sahalak pe lang dong.
- ⁴ Seng marpambotoh nani sagala halak sihorjahon na jahat, na mangankon bangsang-Ku songon na mangan ruti, anjaha na so onggamardilo Jahowa?
- ⁵ Tapi maningon tarsonggot do sidea use, ai ihasomani Jahowa do ginompar ni halak parpintor.
- ⁶ Iparseda nasiam pe sura-sura ni halak na madoyuk, tapi Jahowa do parlingodanni.

⁷ Ah, sai roh ma haluahon bani Israel hun Sion!
Anggo suang ma ibahen Jahowa bangsa-Ni,
marolob-olob ma Jakob anjaha marmalas ni
uhur Israel.

Ise do na Boi Dohor bani Naibata?

15 ¹ Psalm ni si Daud. Ham Jahowa, ise do na
boi tondok bani lampolampo-Mu? Ise do na
malo marianan bani dolog-Mu na panging
in?

² Ai ma halak na so panurakon bani parlahouni,
sidalankon hapintoron, halak siluarhon na
pintor ibagas uhorni;

³ na so manrisai marhitei dilahni, na so
mangkorjahon na jahat dampak hasomanni,
anjaha na so parohkon habadoron bani
sinkutani;

⁴ na mangkagigihon halak na pinabali, tapi na
pasanggapkon halak na mangkabiari Jahowa,
na so mosei ia humbani bijani age rugi ia
marhitei ai;

⁵ na so ra paanakkon duitni laho mangonsop,
na so ra manjalo sisip laho mangimbang
na so marsalah. Halak na mangkorjahon na
sonai ai, seng anjai targompang sadokah ni
dokahni.

Hatuahon ni Halak na Daulat

- 16** ¹ Miktam. Humbani si Daud. Parorot Ham ma ahu Naibata, ai marlingod hu Bamu do ahu.
- ² Ningku do dampak Jahowa, “Ham do Tuhanku, seng dong na pasonangkon ahu sobali Ham.”
- ³ Halak na ma pansing na i nagori on, marmulia do sidea, marosuh uhur hubani sidea.
- ⁴ Buei do sitaronon ni halak sisombah na legan, tapi seng ra ahu dihut manggalangkon galangan daroh ni sidea ai, nai ma, gari goran ni sidea seng sobuton ni bibirhu.
- ⁵ Jahowa do parbagianan bangku ampa panginumanku; Ham do sitotapkon parbagiananku.
- ⁶ Tongon do tali sibar-sibar mangonai bangku bani ianan na madear, nai ma, dear tumang do parbagiananku.
- ⁷ Pujionku do Jahowa, na mamodahi ahu, age borngin iajari piah-piahku do ahu.
- ⁸ Tongtong do hubahen Jahowa i lobei ni matangku; anggo i siamunku la, seng anjai jurgang ahu.
- ⁹ Halani ai malas do uhurhu anjaha marolob-olob tonduyhu, pamatangku pe marianan do bani na sonang.

- ¹⁰ Ai seng anjai ondoskonon-Mu tonduyhu
 hu nagori toruh, anjaha seng paturuton-
 Mu halak na daulat Bamu mangidah
 hamarsikon.
- ¹¹ Sai patugahon-Mu do bangku dalam hagoluhan;
 gok do malas ni uhur i lobei ni bohi-Mu,
 anjaha hatuahon do i siamun-Mu sadokah
 ni dokahni.

**Tonggo ni Halak na Pinarburu
 na So Inkat Marsalah**

- 17** ¹ Tonggo ni si Daud. Tangihon Ham ma,
 alo Jahowa, hapintoronku. Tangihon Ham
 ma elek-elekku! Parimbagaskon Ham ma
 tonggongku, na luar humbani bibir na so
 manipu.
- ² Humbani bohi-Mu roh pamintorion bangku,
 panonggor-Mu do mangidah na sintong.
- ³ Anggo ipapangkei Ham uhurhu, ipareksa Ham
 borngin, anggo iuji Ham ahu, seng anjai
 jumpah Ham hajahaton bangku; seng onggga
 tarlopus parsahapku.
- ⁴ Ia pasal parlahou ni jolma, domu hubani hata
 na luar hun pamangan-Mu, hujagai do
 diringku dampak pambahenan ni halak
 sipangodoh-odoh.
- ⁵ Bokas-Mu do iirikkon langkah-langkahku, seng
 onggga jiris naheihu.

- ⁶ Sai Ham do hudilo, ai ibalosi Ham do ahu,
ale Naibata. Paeleng Ham ma pinggol-Mu
bangku, tangihon Ham ma hatangkon.
- ⁷ Patuduhkon Ham ma idop ni uhur-Mu na gok
halongangan in, Ham, alo Sipaluah halak na
marlingod bani tangan-Mu siamun dompak
imbang ni sidea.
- ⁸ Ramotkon Ham ma ahu songon anak ni mata;
ponopkon Ham ma ahu i toruh ni linggom ni
habong-Mu,
- ⁹ dompak halak parjahat na sihol mangagou ahu,
dompak munsuhku na manloulou ahu,
- ¹⁰ Itutup sidea do uurni, marhitei pamanganni
isahapkon hagijangon;
- ¹¹ igompangi sidea do ahu, tarloulou do ahu
nuan, sai ipardiateihon mata ni sidea do ahu
laho mangompaskon ahu hu tanoh.
- ¹² Usih do ia hubani singa na laho manoroh,
songon anak ni singa na monggop bani
ianan na ponop.
- ¹³ Jongjong ma Ham Jahowa, dompakkon Ham
anjaha ompaskon Ham ma ia, paluah Ham
ma goluhku humbani parjahat marhitei
podang-Mu,
- ¹⁴ marhitei tangan-Mu, Ham Jahowa, humbani
jolma, ai ma halak paruhur dunia sadokah
ia manggoluh, na dob ginokan-Mu
boltokni marhitei arta-Mu, na riris homa

marniombah, na boi martading-tadingan
bani na i pudini.

¹⁵ Tapi anggo ahu marhitei hapintoron idahonku
do bohi-Mu, hubosuri diringku sanggah na
puho ahu bani rupa-Mu.

Doding Tarima Kasih ni Raja Daud halani Hamonanganni

18 ¹ Bani pambobai koor. Humbani juakjuak ni
Jahowa, ai ma si Daud, na manluarhon hata
ni doding on bani Jahowa, bani panorang
ipaluah Jahowa ia humbani tangan ni
munsuhni pakon humbani tangan ni si Saul,
(18-2) nini, “Holong tumang do uhurhu
bamu Jahowa, hagogohonku.

² (18-3) Jahowa, dolog batu bangku, batar-
batarhu, na paluahkan ahu, Naibatangku,
batu gingging anjaha parlingodanku,
gantarhu, tanduk haluahkanku pakon
benteng bangku.

³ (18-4) “Pinuji ma Jahowa!” ningku mandilohon,
ai ipaluah do ahu humbani munsuhku.

⁴ (18-5) linggoti gilumbang ni hamatean do ahu,
anjaha bah hamatean manonggoti ahu;

⁵ (18-6) isangkut tali ni nagori toruh do ahu,
siding ni hamatean tagang dompak ahu.

⁶ (18-7) Ibagas hasosakankai hudilo ma Jahowa,
dilo-dilo ma ahu bani Naibatangku. Gabe

itangihon do sorangku humbani rumah-Ni,
anjaha das do doruhkai hu pinggol-Ni.

⁷ (18-8) Munjei anjaha dugur ma tanoh on,
onjolan ni dolog pe murdug ma, munjei
halani ringis-Ni.

⁸ (18-9) Maripul do timus humbani igung-Ni,
haluar apuy na mangankon humbani
pamangan-Ni, narnar na gara marjimbur
hun Bani.

⁹ (18-10) londun ma langit, turun ma la, lotir do i
toruh ni nahei-Ni.

¹⁰ (18-11) Mangajak herub do la, anjaha habang
mayap-ayap bani habong ni logou.

¹¹ (18-12) Na golap do ibahen manrungkub-Si,
lampolampo-Ni inggot ni bah na mamirong
ampa hambun na hapal.

¹² (18-13) Humbani sinalsal na i lobei-Ni luar do
hambun-Ni, ambolas pakon gara ni apuy.

¹³ (18-14) Marhata ma longgur ibahen Jahowa i
langit, ipamaling Na Timbul in ma sora-Ni.

¹⁴ (18-15) Isiorhon ma panah-Ni laho pamerap
sidea, ibahen do mardejep-dejep hilap laho
mardakdak sidea.

¹⁵ (18-16) Jadi taridah ma holbung ni bah, mulgap
ma onjolan ni dunia on, halani pangasupimu
Jahowa, halani pangombus ni hosah ni
igung-Mu.

- ¹⁶ (18-17) Idurdurhon do tangan-Ni hun babou manangkap ahu, idokdok do ahu humbani bah banggal.
- ¹⁷ (18-18) Ipaluah do ahu humbani munsuhku na gogoh, humbani halak na mandondoni ahu, sigogohan humbangku.
- ¹⁸ (18-19) Idorab sidea do ahu bani ari hasunsahanku, tapi Jahowa do hatundalanku.
- ¹⁹ (18-20) Itogu do ahu bani ianan na lumbang, ipaluah do ahu, ai marosuh do la bangku.
- ²⁰ (18-21) Ibahen Jahowa do hu bangku romban hubani hapintoronku, romban hubani haborsihon ni tanganku ipasuang hu bangku,
- ²¹ (18-22) ai huihutkon do dalan ni Jahowa, seng dong manjahati ahu, marbalik humbani Naibatangku.
- ²² (18-23) Sai tong do i lobei ni matangku sagala aturan-Ni, anjaha seng hupadaoh titah-Ni humbangku.
- ²³ (18-24) Seng dong sihataon bangku i lobei-Ni, hujaga do diringku dompak hajahaton.
- ²⁴ (18-25) Halani ai ibalos Jahowa do hu bangku romban hubani hapintoronku, romban hubani haborsihon ni tanganku i lobei-Ni.
- ²⁵ (18-26) Hubani na bujur uhur, bujur do Ham, hubani halak parpintor, pintor do Ham.

- ²⁶ (18-27) Bani halak paruhur na pansing ipatidak Ham do hapansingon-Mu, tapi marah do uhur-Mu dompak halak pargeduk.
- ²⁷ (18-28) Ipaluah Ham do bangsa na madoyuk, tapi ipatoruh Ham do mata na toal.
- ²⁸ (18-29) Ai Ham do, alo Jahowa, mambahen palitangku marsinalsal; Jahowa Naibatangku do palihar hagolapanku.
- ²⁹ (18-30) Marhasoman Ham tardorab ahu do hulanan ni bala, mangunsagahkon Naibatangku tarlumpat ahu do tembok.
- ³⁰ (18-31) Gokan dear do dalan ni Naibata, pitah do hata ni Naibata, la do gantar ni ganup halak, na marlingod hu Bani.
- ³¹ (18-32) Ai ise ma Naibata sobali Jahowa, ise batar-batarta sobali Naibatanta?
- ³² (18-33) Naibata do na manggonditkon hagogohon bangku, anjaha ipatorsa do dalanku.
- ³³ (18-34) la do mambahen naheihu songon nahei ni ursa boru-boru, anjaha ipajongjong do ahu i atas buntu-buntu.
- ³⁴ (18-35) la do mangajari tanganku marmunsuh, gabe pandei tanganku manintak sior tombaga.
- ³⁵ (18-36) Ibere Ham do bangku gantar ni hatuahon-Mu, itungkoli tangan siamun-Mu

do ahu, anjaha halayakon-Mu pabanggal ahu.

- ³⁶ (18-37) Ipalumbang Ham do ianan panlangkahanku, anjaha seng tarsimpok mata ni ari ni naheihu.
- ³⁷ (18-38) Hupardakdak do munsuhku ronsi dapot sidea, seng mulak ahu paima rasei sidea.
- ³⁸ (18-39) Huropuki do sidea, gabe seng tarbahensi be jongjong, radag do sidea i toruh ni naheihu.
- ³⁹ (18-40) Igonditkon Ham do bangku hagogohon laho marporang, ipatunduk Ham do imbangku hu toruhku.
- ⁴⁰ (18-41) Ipaundur Ham do munsuhku i lobeihu, anjaha siap do hubahen sagala na mandomdomi ahu.
- ⁴¹ (18-42) Dilo-dilo sidea, tapi seng dong na paluahkon, hubani Jahowa homa, tapi seng itangihon sidea.
- ⁴² (18-43) Jadi hulumati ma sidea songon orbuk sihabangkonon ni logou, hulotloti ma sidea songon hubang i tongah dalan.
- ⁴³ (18-44) Ipaluah Ham do ahu humbani paringoran ni bangsa-bangsa, anjaha ipabangkit Ham do ahu gabe kopala ni bangsa-bangsa, bangsa na so hutanda pe marsombah do hu bangku;

- ⁴⁴ (18-45) ibogehonsi pasal ahu, mintor itangihon do ahu, halak silegan pe tunduk do sidea papuji-puji ahu.
- ⁴⁵ (18-46) Mandatei do halak silegan, hitir-hitir do sidea luar humbani bentengni.
- ⁴⁶ (18-47) Manggoluh do Jahowa, sai tarpuji ma batar-batarhin, sai timbul ma Naibata ni hatuahonku,
- ⁴⁷ (18-48) Naibata sibere pambalason hu bangku, anjaha na patundukkon bangsa-bangsa bangku.
- ⁴⁸ (18-49) Na paluahkon ahu humbani munsuhku, nai ma, na pagijangkon ahu mangimbang sagala na manlawan ahu, na paluahkon ahu humbani halak sipangodoh-odoh.
- ⁴⁹ (18-50) Halani ai pujionku do Ham Jahowa i tongah-tongah ni sagala bangsa, anjaha dodingkononku do goran-Mu.
- ⁵⁰ (18-51) Ia do sibere hatuahon bangga bani raja-Ni, anjaha sibere idop ni uhur bani na mininakan-Ni, ai ma hubani si Daud ampa hubani ginomparni ronsi sadokah ni dokahni.”

**Hamuliaon ni Naibata, na Pinatalar
ni Panompaon-Ni pakon Titah-Ni**

19 ¹ Bani pambobai koor. Psalm ni si Daud.
(19-2) Haganup do langit mambaritahon

- hamuliaon ni Naibata, anjaha hajangkajang mangambilankon pambahenan ni tangan-Ni.
- ² (19-3) Ari na sada patugahkon ai bani ari na sada nari, borngin na sada padaskon ai bani borngin na sada nari;
- ³ (19-4) seng marhasoman hata, seng marhasoman sahap, anjaha seng tarbogei sorani,
- ⁴ (19-5) age sonai torus do sorani bani sab tanoh on anjaha sahapni das hu ujung ni dunia on. Ijai ipauli do lampolampo bani mata ni ari,
- ⁵ (19-6) na mandarat humbani kamarni songon siparunjuk, anjaha na marolob-olob songon puanglima marayak sidalananni.
- ⁶ (19-7) Poltak do ia humbani ujung ni langit na sada, anjaha mardalan das bani ujung ni na sada nari, aha pe lang na ponop humbani milasni.
- ⁷ (19-8) Gokan dear do titah ni Jahowa, boi pahinsah uhur; sintong do hasaksian ni Jahowa; iparuhuri do na bulus uhur.
- ⁸ (19-9) Pintor do titah ni Jahowa, boi pamalas uhur; pitah do titah ni Jahowa, ipalihar do pangidah.
- ⁹ (19-10) Biar dompak Jahowa ai do na pansing, anjaha tetap ronsi sadokah ni dokahni; aturan ni Jahowa ai do na sintong, anjaha pintor do haganupan.

- ¹⁰ (19-11) Harganan do ai ase omas, ase buei omas na pinapitah, tobunan do ai ase manisan ni lobah, humbani tobu-tobu ni huraamah.
- ¹¹ (19-12) Juakjuak-Mu pe dapotan sipasingat do marhitei ai; dapotan upah banggal do halak na mangkorjahon ai.
- ¹² (19-13) Hakahouon -- ise ma na mangartihon ai? Paluah Ham ma ahu humbani salah na ponop!
- ¹³ (19-14) Ramotkon Ham ma juakjuak-Mu humbani gijang ni uhur, ase ulang irajai ahu, jadi seng be dong sihataon bangku, gabe borsih ma ahu humbani panlanggaron na banggal.
- ¹⁴ (19-15) Sai harosuhkon Ham ma hata ni pamanganku ampa pamingkir-mingkirion ni uhurhu, Ham Jahowa, batat-batarhu ampa sipaluah ahu.

Tonggo Mangapiti Raja

- 20** ¹ Bani pambobai koor. Psalm ni si Daud.
 (20-2) Sai ibalosi Jahowa ma ham bani panorang hasosakan, goran ni Naibata ni si Jakob ma manramotkon ham!
- ² (20-3) Sai itongos ma bamu pangurupion humbani ianan na ma pansing in, janah sai itungkol ma ham hun Sion.

- ³ (20-4) Sai mardingat ma la bani galanganmu, anjaha sai iharosuhkon ma galangan situtungonmu. Sela.
- ⁴ (20-5) Sai ibere ma hu bamu harusuh ni uhurmu, anjaha ipasaud ma sura-suramu,
- ⁵ (20-6) ase marsurak-surak hanami halani hamonanganmu, anjaha manaikkon mandera mangunsagakon goran ni Naibatanta; sai ipasaud Tuhan ma sagala pangindoanmu.
- ⁶ (20-7) Sonari pe hubotoh, paboa sai ipamonang Jahowa do na mininakan-Ni, sai ibalosi do ia humbani surga-Ni na pansing in, marhitei haluahon, na binahen ni tangan siamun-Ni na gogoh in.
- ⁷ (20-8) Ia sidea garetta pakon huda do iunsagakon, tapi anggo hita goran ni Jahowa Naibatanta do pangajamanta.
- ⁸ (20-9) Rebad do sidea anjaha mangkatompas, tapi anggo hita puho do use anjaha jongjong totap.
- ⁹ (20-10) Ham Jahowa, urupi Ham ma raja in, balosi Ham ma hanami, sadihari dilo-dilo hanami Bamu.

Doding Tarima Kasih halani Hamonangan ni Raja

21 ¹ Bani pambobai koor. Psalm ni si Daud.
 (21-2) Ham Jahowa, marmalas ni uhur

do raja in halani hagogohon-Mu, anjaha marolob-olob tumang do ia mangidah haluahon na hun Bamu.

² (21-3) Ibere Ham do hubani pinindo ni uhurni, anjaha seng itulak Ham pangindoan ni bibirni. Sela.

³ (21-4) Ai ialo-alo Ham do ia marhasoman pasu-pasu na banggal, igotongkon Ham do bani sortali omas.

⁴ (21-5) Ipindo do hagoluhan hun Bamu; ibere Ham do hu bani umur na ganjang ronsi sadokah ni dokahni.

⁵ (21-6) Timbul do hasangaponni halani pangurupion na hun Bamu, hatunggungan pakon hahormaton ibere Ham do hu bani.

⁶ (21-7) Ibahen Ham do ia gabe pasu-pasu torus, ipasabou Ham do ia marhitei malas ni uhur ni bohi-Mu.

⁷ (21-8) Ai martenger ni uhur bani Jahowa do raja in, anjaha halani idop ni uhur ni Tang Sitimbulan in, seng anjai rebeh ia.

⁸ (21-9) Sai na jumpah tangan-Mu do munsuh-Mu; anjaha sai na jumpah tangan siamun-Mu do na mandomdomi Ham.

⁹ (21-10) Doskon pamurunan do sidea bahenon-Mu bani panorang parah-Mu, Ham Jahowa, bani parringis-Mu bonduton-Mu do sidea, anjaha panganon ni apuy do sidea.

- ¹⁰ (21-11) Boiskonon-Mu do niombah ni sidea hun tanoh on, ginomparni hun tongah-tongah ni jolma manisia.
- ¹¹ (21-12) Anggo ipingkiri sidea na jahat dompak Ham, anggo iranggihon tahi-tahi seng anjai saud ai.
- ¹² (21-13) Sai na maporus do sidea bahenon-Mu; tembakon-Mu do bohi ni sidea marhitei sior-Mu.
- ¹³ (21-14) Jongjong ma Ham, ale Jahowa, ibagas hagogohon-Mu, ase ipuji anjaha idodingkon hanami kuasa-Mu.

Ham Naibatanku, Mase Itadingkon Ham Ahu?

- 22** ¹ Bani pambobai koor. Inggouni: Balua manlele siang. Psalm ni si Daud. (22-2) Ham Naibatanku, mase ma itadingkon Ham ahu, mandaoh Ham humbani elek-elekku pakon humbani sora ni doruh-doruhku?
- ² (22-3) Ham Naibatanku, dilo-dilo do ahu arian, tapi seng ibalosi Ham, borngin pe, tapi seng jumpah ahu hasonangan.
- ³ (22-4) Tapi Ham do Na Pansing in, na marhotak i atas ni sipujion ni Israel.
- ⁴ (22-5) Ham do ihatengerhon ompungnami, tenger do uhur ni sidea Bamu, gabe ipaluah Ham do sidea.

- ⁵ (22-6) Hu Bamu do sidea dilo-dilo, gabe maluah do sidea; porsaya do sidea Bamu, jadi seng tarbador sidea;
- ⁶ (22-7) tapi anggo ahu goya mando, seng bejolma, siapason ni halak, sidorunon ni halak na mabuei.
- ⁷ (22-8) Haganup na mangidah ahu pahiri-hiri ahu, ipambebeoti do ahu anjaha iupir-upirhon uluni,
- ⁸ (22-9) “Bani Jahowa ma ia marondos, ase ipaluah ia, anggo na marosuh do tongon la bani!”
- ⁹ (22-10) Ham do na manogu ahu humbani partapaan, Ham do patenger uhurhu mangonsop bagod ni inang;
- ¹⁰ (22-11) humbani partubuhku nari Ham do parondosanku, humbani partapaan nari Ham do Naibatanku.
- ¹¹ (22-12) Sai ulang ma mandaoh-daoh Ham humbangku, ai dohor do hasosakan, seng dong sipangurupi.
- ¹² (22-13) Buei do lombu jonggi manlioti ahu, anjaha horbou ni Basan mangurup ahu.
- ¹³ (22-14) Ipangangang bei do babahni dompak ahu, songon singa na manoroh anjaha maraum.

- ¹⁴ (22-15) Durus do ahu songon bah,
mangkasirang holi-holingku, uhurhu pe
songon lilin do, malala ibagas diringku.
- ¹⁵ (22-16) Horah do tolonanku songon sanga-
sanga, anjaha dilahku longkot do bani
langit-langitku; bani orbuk ni hamatean do
iparagei Ham ahu.
- ¹⁶ (22-17) Ai ilioti baliang do ahu, anjaha hulanan
ni parjahat manginggoti ahu, itobaki do
tanganku pakon naheihu.
- ¹⁷ (22-18) Boi do hubilangi haganup holi-holingku,
pasombuhkon do sidea mangidah ahu.
- ¹⁸ (22-19) Ibagi sidea do hiouhu, manjomput na
sinurat do sidea pasal baju-bajungku.
- ¹⁹ (22-20) Tapi Ham Jahowa, ulang ma Ham
mandaoh-daoh; Ham hagogohonku, oloskon
Ham ma mangurupi ahu!
- ²⁰ (22-21) Sai paluah Ham ma hosahku humbani
podang, tonduyhu na lungunan on humbani
sisilon ni baliang.
- ²¹ (22-22) Sai paluah Ham ma ahu humbani
babah ni singa, anjaha bansah bahen Ham
humbani tanduk ni horbou jalang.
- ²² (22-23) Ambilankononku ma goran-Mu
bani saninangku, pujionku ma Ham i
tongah-tongah ni kuria in.
- ²³ (22-24) Nasiam na mangkabiari Jahowa, puji
nasiam ma la; haganup ginompar ni si Jakob,

pasangap ma la, mabiar ma nasiam Bani,
nasiam ginompar ni Israel.

- ²⁴ (22-25) Ai seng onggga ipahiri anjaha magigi la
bani hadoyukon ni na madoyuk, anjaha seng
ongga iponopkon bohi-Ni hu bani, itangihon
do sanggah dilo-dilo Bani.
- ²⁵ (22-26) Hun Bamu do harohan ni puji-pujianku
i tongah-tongah ni kuria na banggal in,
galaronku ma bagah-bagahku i lobei ni
sagala na mangkabiari-Si.
- ²⁶ (22-27) Sai na mangan anjaha maningon bosur
do halak na masombuh; maningon mamuji-
muji Jahowa do halak na mangindahi-Si. Sai
hinsah do uhur ni sidea sadokah ni dokahni.
- ²⁷ (22-28) Dingaton ni sagala ujung ni tanoh on
ma ai anjaha mulak bani Jahowa; sagala
bangsa sipajuh begu-begu maningon
manrogop do i lobei-Ni.
- ²⁸ (22-29) Ai Jahowa do simada harajaon, anjaha
la do na mamarentah sagala bangsa.
- ²⁹ (22-30) Nai ma, maningon marsombah do hu
Bani sagala na sangap-sangap ni tanoh on,
anjaha maningon do manrogop hu lobei-Ni
sagala na dob tuad hubagas orbuk ampa
halak na so manggoluh be tonduyni.
- ³⁰ (22-31) Sai balosan ni ginompar ni na i pudi do
la, baritahononkon do pasal Jahowa bani
sundut na roh.

³¹ (22-32) Ambilankonon do hapintoron-Ni bani sagala bangsa na laho tubuh ope, paboa la do na pasaudkonsi.

Jahowa Siparmahan Ahu

23 ¹ Psalm ni si Daud. Jahowa do siparmahan ahu, seng anjai hurangan ahu.

² Ipatudu do ahu bani sampalan na mombur, anjaha itogu-togu do ahu hu bah parsaranan.

³ Ipahisar do tonduyhu, itogu do ahu bani dalan hapintoron halani goran-Ni in.

⁴ Age pe mardalan ahu bani lombang bagas ni hagolapan, seng mabiar ahu, ai Ham do mangkasomani ahu; tungkot-Mu pakon simambu-Mu do na mangapohi ahu.

⁵ Ham do na mangidangi ahu i lobei ni munsuhku, iminaki Ham do ulungku anjaha sirnib do panginumanku.

⁶ Dear layak ampa idop ni uhur do mangirik-irik ahu sadokah goluhku; janah sihol do marianan ahu i rumah ni Jahowa sadokah ni dokahni.

Parmasuk ni Raja ni Hamuliaon

24 ¹ Humbani si Daud. Sada Psalm. Jahowa do simada tanoh on pakon haganup isini, dunia on pakon sagala na mangiankonsi.

- ² Ai la do pajonamkonsi i atas ni laut, anjaha ipatotap do i atas ni bah mardalan.
- ³ Ise do na boi tangkog hu dolog ni Jahowa? Ise do na boi jongjong bani ianan-Ni na pansing in?
- ⁴ Partangan na borsih ampa paruhur na pitah, halak na so mandompakkon tonduyni bani na so margagan, ampa halak na so ra marbija laho manipu.
- ⁵ Ia ma na manjalo pasu-pasu humbani Jahowa pakon hapintoron humbani Naibata na paluahkonsi.
- ⁶ Ai ma sundut na sungkun-sungkun pasal Jahowa, na mangindahi bohi-Mu, Ham Naibata ni Jakob. Sela.
- ⁷ Pagijang ma ulunima, ale sagala horbangan, tarangkat ma hanima, ale labah na basaia, ase masuk raja ni hamuliaon.
- ⁸ Ise ma nani Raja ni hamuliaon in? In ma Jahowa, na Gogoh anjaha Puanglima, Jahowa Puanglima i parporangan.
- ⁹ Ipagijang ma ulunima, ale sagala horbangan, tarangkat ma hanima, ale labah nabasaia, ase masuk raja ni hamuliaon in.
- ¹⁰ Ise ma nani raja ni hamuliaon in? In ma Jahowa Zebaot, Ia do Raja ni hamuliaon. Sela.

**Pangindoan Pasal Hasasapan ni
Dousa ampa Panramotion**

- 25** ¹ Humbani si Daud. Hu Bamu do Jahowa, hudompakkon tonduyhu.
- ² Ham Naibatanku, hu Bamu do ahu martenger ni uhur, ulang ma lопас Ham ahu tarbador, ulang ma marsurak-surak munsuhku mangidah ahu.
- ³ Tongon, seng anjai tarbador sagala na marnalom ni uhur Bamu; tapi maningon tarbador do halak pangeluk na so ingkat marhala.
- ⁴ Ham Jahowa, pabotohkon Ham ma hu bangku dalan Mu, ajarhon Ham ma hu bangku lapang-Mu.
- ⁵ Sai togu Ham ma ahu ibagas hasintongan-Mu, ajari Ham ma ahu; ai Ham do Naibata ni hatuahonku, Ham do hupanalom ganup ari.
- ⁶ Sai ingat Ham ma, ale Jahowa, sagala dear ni layak-Mu pakon idop ni uhur-Mu, ai humbani nabasaia nari do in.
- ⁷ Sai ulang ma padingat-dingat Ham dousa haposoonku pakon panlanggaronku, sai ingat Ham ma ahu romban hubani idop ni uhur-Mu, halani dear ni layak-Mu, Ham Jahowa.
- ⁸ Layak anjaha bonar do Jahowa, halani ai ipatuduh do dalan na pintor bani pardousa.

- ⁹ Itogu-togu do halak na madoyuk mardalan
ibagas hasintongan, anjaha iajarhon do
dalan-Ni bani halak na masombuh.
- ¹⁰ Sagala dalan ni Jahowa idop ni uhur do ai ampa
hasintongan, bani halak na manramotkon
padan-Ni pakon hasaksian-Ni.
- ¹¹ Halani goran-Mu, Ham Jahowa, sasap Ham ma
dousangku, ai bangga do in.
- ¹² Ise do halak na mangkabiari Jahowa? Hubani
do ajarhonon-Ni dalan sipilihon-Ni.
- ¹³ Tonduy-Ni marianan do bani hasonangan,
anjaha ginomparni do manean tanoh on.
- ¹⁴ Udung do uhur ni Jahowa bani na mangkabiari-
Si, ipabotohkon do padan-Ni bani
sidea.
- ¹⁵ Sai mangkawah do matangku dompak Jahowa,
ai la do paluahkon naheihu hambani siding.
- ¹⁶ Dompakkon Ham ma ahu, maidop ma uhur-Mu
bangku, ai lungunan anjaha madoyuk do
ahu.
- ¹⁷ Palumbang Ham ma ahu hambani hasosakan
ni uhurhu, paluah Ham ma ahu hambani
hasunsahanku.
- ¹⁸ Kawahkon Ham ma hadoyukonku pakon
hangalutonku, sasap Ham ma haganup
dousangku.
- ¹⁹ Tonggor Ham ma, buei do munsuhku, anjaha
parah do pandomdomini sidea bangku.

- ²⁰ Ramotkon Ham ma tonduyhu anjaha paluah
Ham ma ahu, ulang tarbador ahu, ai Bamu
do ahu marlingod.
- ²¹ Sai hapansingon ampa hapintoron ma
manramotkon ahu, ai Bamu do ahu
marhatengeran.
- ²² Ham Naibata, sai paluah Ham ma Israel,
humbani haganup hasosakanni.

Tonggo ni Halak na Daulat Ibagas Hasosakan

- 26** ¹ Humbani si Daud. Luluhon Ham ma ahu,
Ham Jahowa, ai ibagas hadaulaton do
ahu marparlahou; bani Jahowa do ahu
marhatengeran, seng molei-olei ahu.
- ² Uji Ham ma ahu, ale Jahowa, anjaha suba
ma, pareksa Ham ma piah-piahku pakon
pusu-pusungku.
- ³ Ai tongtong do i lobeihu idop ni uhur-Mu,
anjaha romban hubani hasintongan-Mu do
ahu marparlahou.
- ⁴ Seng onggah hundul ahu pakon siparladung,
anjaha seng marsaor ahu pakon
sipakulah-kulah.
- ⁵ Sogam do uhuru mangidah humpulan ni halak
parjahat, anjaha seng ra ahu sahundulan
pakon sibahen na jahat.

- ⁶ Huburihi do tanganku tanda lang marsalah,
anjaha huinggoti do anjapanjap-Mu, Ham
Jahowa,
- ⁷ laho pabogei hon sora puji-pujian, laho
mambaritahon haganup halongangan na
binahen-Mu.
- ⁸ Ham Jahowa, huhaholongi do hajongjongan
ni rumah-Mu, ianan hasogopan ni
hamuliaon-Mu.
- ⁹ Ulang ma masabkon Ham tonduyhu rap
pakon pardousa, atap goluhku rap pakon
siduruskon daroh,
- ¹⁰ ai ma halak na buei longkot hajahaton bani
tangan ni sidea, anjaha gok sisip tanganni
siamun.
- ¹¹ Tapi anggo ahu, ibagas hadaulaton do
marparlahou, paluah Ham ma ahu, maidop
ma uhur-Mu bangku.
- ¹² Jongjong bani dalan hanopan do naheihu,
sai pujionku do Jahowa ibagas sagala
parhumpulan.

Sonang Ibagas Pandingdingi ni Naibata

27 ¹ Humbani si Daud. Jahowa do panondang
pakon haluahon bangku, mintor bani ise
ma mabiar ahu? Jahowa do batar-batar ni
goluhku, bani ise ma ahu gobir?

- ² Sanggah roh parjahat mandorab ahu laho mangankon dagingku, ai ma imbangku pakon munsuhku, jadi mangkatompas anjaha marrageian ma sidea.
- ³ Anggo roh bala mamorang ahu, seng mabiar uhurhu, age roh porang dampak ahu, sai tenger do uhurhu.
- ⁴ Sada do hupindo humbani Jahowa, ai do na hupindahi, ase boi ahu marianan i rumah ni Jahowa sadokah manggoluh ahu, laho paidah-idah hinajenges ni Jahowa, laho marsombah i rumah-Ni.
- ⁵ Ai iondingi do ahu ibagas lampolampo-Ni bani ari hamagouan; bani parponopan ibagas lampolampo-Ni ai, ipagijang do ahu hu atas dolog batu,
- ⁶ gabe mandirgak ma ulungku nuan i atas ni munsuhku na manginggoti ahu; halani ai galangkononku ma galangan ibagas lampolampo-Ni, ai ma galangan puji-pujian, mandoding anjaha mamuji-muji ma ahu bani Jahowa.
- ⁷ Tangihon Ham ma, ale Jahowa, sorangku na hudilohon on, maidop ma uhur-Mu bangku, anjaha balosi Ham ma ahu.
- ⁸ Ihusipkon uhurhu, sonon do Nimu, “Pindahi hanima ma bohing-Ku!” Bohi-Mu ma tongon na hupindahi, alo Jahowa.

- ⁹ Ulang ma ponopkon Ham bohi-Mu dampak ahu, ulang ma tulak Ham juakjuak-Mu ibagas ringis-Mu; Ham do pangurupingku, ulang ma pabali Ham ahu, anjaha ulang ma tadingkon Ham ahu, Ham Naibata ni hatuahonku.
- ¹⁰ Domma itadingkon bapa pakon inang ahu, tapi itampin Jahowa do ahu.
- ¹¹ Ajarhon Ham ma bangku dalan-Mu, ale Jahowa, togu Ham ma ahu bani dalan hanopan halani imbang-imbangu.
- ¹² Ulang ma ondoskon Ham ahu hubagas ringis ni munsuhku, ai jongjong do mangimbang ahu saksi parladung, sisompulhon hajahaton.
- ¹³ Totap do hubotoh, sai idahonku do hinadear ni Jahowa, i tanoh ni halak na manggoluh.
- ¹⁴ Parhanalom ma Jahowa, pagomos anjaha patoguh ma uhurmu. Nai ma, parhanalom ma Jahowa.

Naibata do Gantar Bangku

28 ¹ Humbani si Daud. Hu Bamu do ahu dilo-dilo, ale Jahowa, dolog batungku; ulang sai sip Ham dampak ahu, ase ulang ahu doskon na manuruk tanoman, anggo sai sip Ham dampak ahu.

² Tangihon Ham ma sora ni elek-elekku, anggo dilo-dilo ahu Bamu, anggo hupaherbang

tanganku hubani ianan-Mu na pansing sahalian in.

- ³ Ulang ma sarad Ham ahu rap pakon halak parjahat ampa sihorjahon hagedukon, na basar marsahap dompak hasomanni, hape hajahaton do ibagas uhurni.
- ⁴ Balaskon Ham ma hubani sidea romban bani pambahenan ni sidea pakon domu hubani jahat ni ulahni; balaskon Ham ma romban hubani horja ni tangan ni sidea; paulak Ham ma bani sidea na hinorjahon ni sidea.
- ⁵ Ai seng parduli sidea bani pambahenan ni Jahowa, sonai homa horja ni tangan-Ni; parsedaon-Ni ma sidea anjaha seng be paulion-Ni.
- ⁶ Na puji ma Jahowa, ai domma itangihon sora ni elek-elekku.
- ⁷ Jahowa do gogohku pakon gantarhu; hu Bani do mangarap uhurhu gabe iurupi do ahu. Halani ai marolob-olob do uhurhu, anjaha hupuji ma la marhitei dodingku.
- ⁸ Jahowa do pargogoh bani bangsa-Ni, anjaha batar-batar hatuahon do la bani na mininakan-Ni.
- ⁹ Paluah Ham ma bangsa-Mu anjaha pasu-pasu ma pusaka-Mu; sai parmahani anjaha ombah Ham ma sidea ronsi sadokah ni dokahni.

Hamuliaon ni Jahowa Ibagas Longgur

- 29** ¹ Psalm ni si Daud. Bere nasiam ma bani Jahowa, nasiam parnagori atas, bere nasiam ma bani Jahowa hamuliaon pakon hagogohon.
- ² Bere nasiam ma bani Jahowa hamuliaon ni goran-Ni; manrogop ma nasiam i lobei ni Jahowa marpakeian na ma pansing.
- ³ Sora ni Jahowa do i atas ni sagala bah, Naibata ni hamuliaon do parohkon longgur. Jahowa do i atas ni bah na bolag.
- ⁴ Gok hagogohon do sora ni Jahowa; gok do hajombuton bani sora ni Jahowa.
- ⁵ Sora ni Jahowa do mamonggolhon hayu ares; nai ma, Jahowa do na mamonggolhon hayu ares i Libanon.
- ⁶ Ibahen do sidea manlumpat-lumpat songon anak ni lembu, Libanon ampa Sirion songon anak ni horbou jalang.
- ⁷ Sora ni Jahowa do manjimburhon apuy.
- ⁸ Sora ni Jahowa do mambahen dugur halimisan, idugur Jahowa do halimisan Kades.
- ⁹ Sora ni Jahowa do mambahen mangarou balua, anjaha leseng do ibahen tombak. Anjaha i rumah ni Jahowa haganup do mangkatahon, "Hamuliaon!"

- ¹⁰ Marhotak do Jahowa i atas ni bah marbanggal, marhotak do Jahowa songon Raja sadokah ni dokahni.
- ¹¹ Jahowa do mambere gogoh bani bangsa-Ni, Jahowa do mamasu-masu bangsa-Ni ibagas damei.

Doding Tarima Kasih halani Maluah

- 30** ¹ Psalm. Doding pamongkoton ni Rumah Panumbahan. Humbani si Daud. (30-2) Sihol do patimbulonku Ham Jahowa, ai Ham do na mandokdok ahu humbani ianan na bagas, anjaha seng ipalopas Ham marmegah-megah munsuhku mangidah ahu.
- ² (30-3) Ham Jahowa, Naibatangku, hu Bamu do ahu dilo-dilo, jadi ipamalum Ham do ahu.
- ³ (30-4) Ham Jahowa, domma ipanaik Ham tonduyhu hun nagori toruh, domma ipagoluh Ham use ahu, maluah humbani na manuruk tanoman.
- ⁴ (30-5) Dodingkon nasiam ma Jahowa, nasiam hinaholongan-Ni, puji ma goran-Ni na pansing in!
- ⁵ (30-6) Ai tongkin do panomboh ni ringis-Ni, sadokah manggoluh do anggo idop ni uhur-Ni, bodari sogop partangison, patarni masa parolob-oloban.

- ⁶ (30-7) Tapi anggo ahu sanggah sonang onggahuhatahon, “Seng anjai targompang ahu.”
- ⁷ (30-8) Ham Jahowa, marhitei dear layak-Mu ipatotap Ham do ahu i atas ni dolog na toguh; hape ijin iponopkon Ham bohi-Mu mintor tarsonggot ahu.
- ⁸ (30-9) Hu Bamu do ahu dilo-dilo, Ham Jahowa, hubani Naibatanku do ahu mangelek-elek.
- ⁹ (30-10) Aha ma laba-Mu marhitei darohku, anggo tuad ahu hu tanoman? Boi ma pujion ni orbuk Ham atap patugahonni habujuron-Mu?
- ¹⁰ (30-11) Tangihon Ham ma Jahowa, maidop ma Ham bangku, Ham Jahowa, sai Ham ma pangurupi bangku!
- ¹¹ (30-12) Domma ipaubah Ham tangisku gabe tortor bangku. Domma itanggali Ham pusok ni uhurhu, anjaha igonditkon Ham do bangku malas ni uhur,
- ¹² (30-13) ase mandoding-doding tonduyhu Bamu anjaha lang masip. Ham Jahowa, Naibatanku, sadokah ni dokahni do Ham pujionku.

Tonggo Ibagas Hasosakan

31 ¹ Bani pambobai koor. Psalm ni si Daud.
 (31-2) Hu Bamu do ahu, alo Jahowa, marhatengeran, ulang ma lopas Ham ahu

lalab bador; paluah Ham ma ahu marhitei
hapintoron-Mu!

- ² (31-3) Paeleng Ham ma pinggol-Mu hu bangku,
tarolos ma Ham paluahkon ahu. Ham ma
bangku dolog-batu paronding-ondingan,
gabe benteng na toguh laho paluahkon ahu;
- ³ (31-4) ai Ham do tongon dolog batungku pakon
bentengku, halani goran-Mu iring-iring
anjaha togu Ham ma ahu.
- ⁴ (31-5) Sai paluah Ham ma ahu humbani siding,
na ponop itaon halak laho manangkap ahu,
ai Ham do haporusanku.
- ⁵ (31-6) Hubagas tangan-Mu do huondoskon
tonduyhu, ai domma itobus Ham ahu, ale
Jahowa, Ham Naibata hatengeran ni uhur.
- ⁶ (31-7) Ihagigihon Ham do na manambah
sisombahon na so margagan, tapi anggo
ahu tenger do uhur hubani Jahowa.
- ⁷ (31-8) Marolob-olob anjaha marmalas ni uhur
do ahu bani idop ni uhur-Mu, ai ikawahkon
Ham do hadoyukonku, anjaha ibotoh Ham
do hasosakan ni tonduyhu.
- ⁸ (31-9) Seng iondoskon Ham ahu hubagas tangan
ni munsuh, ipajongjong Ham do nahei
hubani na lubang.
- ⁹ (31-10) Maidop ma uhurmu bangku, ale
Jahowa, ai tarsosak do ahu; halani pusok ni

uhur holok do matangku, galek do tonduyhu pakon pamatangku.

- ¹⁰ (31-11) Bois do gogohku ibahen horu ni uhur, ampa ari-ari ni goluhku ibahen holsohku; surut do gogohku ibahen panlanggaronku, seng margolle be holi-holingku.
- ¹¹ (31-12) Parbileian do ahu i lobei ni na manosak ahu, ampa bani halak romban rumahku; tarsonggot do na mananda ahu, manambil bei do na mangidah ahu i dalan.
- ¹² (31-13) Ihalupahon ahu songon halak na matei, marosak do ahu songon sanga-sanga.
- ¹³ (31-14) Hubogei do husip-husip ni buei halak, "Habiaran inggot!" Rap manriah do sidea manguhurhon ahu, mambahen ranggian do sidea laho mambuat goluhku.
- ¹⁴ (31-15) Tapi anggo ahu, Bamu do ahu martenger ni uhur, ale Jahowa, ningku do, "Ham do Naibatangku.
- ¹⁵ (31-16) Marguru Bamu do goluhku, paluah Ham ma ahu humbani tangan ni munsuhku pakon humbani na mangayak-ayak ahu.
- ¹⁶ (31-17) Sondangkon Ham ma bohi-Mu bani juakjuak-Mu, paluah Ham ma ahu marhitei idop ni uhur-Mu.
- ¹⁷ (31-18) Ham Jahowa, ulang lопас Ham ahu bador, hu Bamu do ahu dilo-dilo; tarbador

ma namin halak parjahat, anjaha masip
tuad hu nagori toruh.

- ¹⁸ (31-19) Sai sip ma sagala bibir parladung, na
jungkat marsahap dampak halak parpintor,
gok hatotalon ampa pangapasion.
- ¹⁹ (31-20) Banggalni in dear ni layak-Mu, na
pinasirsir bani halak na mangkabiari Ham,
na binahen-Mu bani halak na martenger ni
uhur Bamu, i lobei ni anak ni jolma.
- ²⁰ (31-21) Iondingi Ham do sidea marhitei
pangondingion ni bohi-Mu dampak tahi-tahi
ni jolma, iponopkon Ham do sidea bani
lampolampo dampak sorgang-sorgang ni
dilah.
- ²¹ (31-22) Napuji ma Jahowa, ai tarlobih do idop
ni uhur-Ni bangku bani panorang hasosakan.
- ²² (31-23) Tapi anggo ahu, hupingkir hinan
do ibagas biarhu: Domma tarbuang ahu
humbani panonggor-Mu. Hape itangihon
Ham do elek-elekku, sanggah dilo-dilo ahu
Bamu.
- ²³ (31-24) Sai haholongi nasiam ma Jahowa,
nasiam sagala na hinaholongan-Ni! Jahowa
do manramotkon sagala halak na bujur,
tapi mardapot-dapot do ibalaskon dampak
sigijang uhur.

²⁴ (31-25) Sai margogoh anjaha totap ma uhur nasiam, sagala na marpangarapan bani Jahowa.”

Hatuahon ni Halak na dob Sinasap Dousani

32 ¹ Humbani si Daud. Doding podah. Martuah ma halak na dob sinasap panlanggaronni, na dob nirungkub dousani.

² Martuah ma halak anggo seng ihira Jahowa bani hajahaton, anjaha seng dong sipakulah-kulah ibagas tonduyni.

³ Ai sadokah huhasipkon dousangku, reong do holi-holingku ibahen tangisku ganup ari.

⁴ Ai sai idondoni tangan-Mu do ahu arian pakon borngin, jadi horah ma darohku songon pambahen ni milas ni logou ni ari. Sela.

⁵ Hupabotohkon ma Bamu dousangku, anjaha seng huponopkon hajahatonku, ningku do, “Sopotkononku ma panlanggaronku hubani Jahowa, jadi isasap Ham do utang ni dousangku.”

⁶ Halani ai martonggo ma hu Bamu sagala na daulat maruhur, sanggah adong ope panorang boi marjumpah; roh pe sompong bah marraja, seng anjai das ai hu bani.

⁷ Ham do parlingodanku, iramotkon Ham do ahu hambani hasosakan, haluahon do iinggotkon Ham bangku. Sela.

- ⁸ Huajari anjaha hupodahi pe ho pasal dalam sidalananmu, huparmaloi anjaha iiring-iring pangkawahku pe ho.
- ⁹ Ulang ma nasiam songon huda atap halode na so maruhur, na so ra dohor bam anggo lang pinaksa ni tali pakon kokang.
- ¹⁰ Buei do siandungon ni parjahat, tapi barang ise na martenger ni uhur bani Jahowa, inggotkonon-Ni do bani idop ni uhur.
- ¹¹ Marmalas ni uhur anjaha marolob-olob ma sagala parpintor ibagas Jahowa; marmegah-megah ma ganup paruhur na pintor.

**Puji-pujian ampa Pambalosion bani
Jahowa Sipanompa ampa Sipanrajai in**

- 33** ¹ Marolob-olob ma nasiam halak parpintor ibagas Jahowa, patut do mamuji-muji paruhur na bujur.
- ² Puji ma Jahowa marhasoman husapi, dodingkon nasiam ma la marhitei husapi sisapuluh tali.
- ³ Dodingkon nasiam ma Bani doding na baru, giut nasiam ma tali husapi marhasoman tarompit.
- ⁴ Ai pintor do hata ni Jahowa, anjaha sintong do sagala pambahenan-Ni.

- ⁵ Holong do uhur-Ni bani hapintoron ampa uhum. Idop ni uhur ni Jahowa do manggoki tanoh on.
- ⁶ Marhitei hata ni Jahowa do ijadihon langit, anjaha marhitei hosah ni pamangan-Ni sagala bala-Ni.
- ⁷ Ipatumpu do bah ni laut songon bongbongan, ibahen do laut bolag ai markamar-kamar.
- ⁸ Sai marhabiaran bani Jahowa ma ganup tanoh on, anjaha gobir ma i lobei-Ni ganup sindunia on.
- ⁹ Ai marsahap la gabe jadi ma, ai mamarentah la gabe adong ma.
- ¹⁰ Jahowa do mansedahon riah ni bangsa parbegu, seng asi ibahen pingkiran ni bangsa-bangsa.
- ¹¹ Tapi ranggian ni Jahowa totap do sadokah ni dokahni, pingkiran ni uhur-Ni pe marsundut-sundut do.
- ¹² Martuah ma bangsa na mambahen Jahowa Naibatani, ai ma bangsa pinilih-Ni gabe parbagianan Bani.
- ¹³ Manatap-natap do Jahowa hun nagori atas, ikawahkon ganup anak ni jolma in.
- ¹⁴ Humbani ianan-Ni marparatas tonggor do la bani haganup na mangiankon tanoh on.
- ¹⁵ Ia do na manjadihon uhur ni sidea, la mardiateihon sagala horja ni sidea.

- ¹⁶ Seng monang raja marhitei buei ni bala, seng maluah puanglima marhitei surung ni gogoh.
- ¹⁷ Taroto do halak na mangajamkon gogoh ni huda, ai marhitei gogohni na buei ai seng boi ia paluahkon.
- ¹⁸ Tonggor ma, dampak na mangkabiari-Si do mata ni Jahowa, dampak halak na marpangarapan bani idop ni uhur-Ni,
- ¹⁹ laho paluahkon tonduy ni sidea humbani hamatean, anjaha laho pagoluhkon sidea bani musim lohei.
- ²⁰ Marhatengeran bani Jahowa do tonduynami, la do pangurupi pakon gantar bennami.
- ²¹ Ai marhiteihon-Si do malas uhurnami; ai bani goran-Ni na pansing in do hanami marhatengeran.
- ²² Sai sorap ma, Ham Jahowa, idop ni uhur-Mu bennami, songon na niarapkonnamini hun Bamu.

Iramotkon Tuhan do Siminik-Ni

34 ¹ Humbani si Daud, Sanggah Ipapodou-podou Dirini i lobei ni si Abimelek, gabe lusir la Lanjar Laho. (34-2) Sai pujionku do Jahowa bani sagala panorang, tongtong do puji-pujian-Ni ibagas pamanganku.

- ² (34-3) Marhitei Jahowa do marmegah-megah tonduyhu, ibogei halak na madoyuk ma ai gabe malas ma uhurni.
- ³ (34-4) Hasomani nasiam ma ahu pabanggalhon Jahowa, sai rap ma hita patimbulhon goran-Ni in.
- ⁴ (34-5) Hupindahi do Jahowa, anjaha ibalosi do ahu; ipaluah do ahu humbani sagala habiaranku.
- ⁵ (34-6) Mangkawah ma nasiam hu Bani, ase minar nasiam, gabe lang tarmela bohi nasiam.
- ⁶ (34-7) Dilo-dilo do halak na masombuh on, itangihon Jahowa do ia, anjaha ipaluah do ia humbani haganup hasosakanni.
- ⁷ (34-8) Marjaga do malekat ni Jahowa inggot bani na mangkabiari-Si, anjaha ipaluah do sidea.
- ⁸ (34-9) Dai anjaha tonggor nasiam ma dear ni layak ni Jahowa, martuah ma halak na martenger ni uhur Bani.
- ⁹ (34-10) Habiari nasiam ma Jahowa, nasiam sagala na pansing, ai seng anjai marhahurangan sagala na mangkabiari-Si.
- ¹⁰ (34-11) Anak ni singa hurangan do anjaha loheian, tapi seng anjai hurangan bani sagala na madear halak na mangindahi Jahowa.

- ¹¹ (34-12) Roh ma, nasiam anak, tangihon nasiam ma hatangku, ase huajarhon bani nasiam biar dompak Jahowa.
- ¹² (34-13) Ise halak na sihol mangkaholongi goluh on, na mangkarosuhkon mangidah ari na madear?
- ¹³ (34-14) Jaga ma dilahmu dompak hajahaton, ampa bibirmu humbani hata tipu.
- ¹⁴ (34-15) Surut ma ho humbani na masambor, horjahon na madear, pindahhi damei anjaha parayak ma ai.
- ¹⁵ (34-16) Dompok halak parpintor do mata ni Jahowa, anjaha pinggol-Ni dompak dilo-dilo ni sidea.
- ¹⁶ (34-17) Ilawan bohi ni Jahowa do sihorjahon na jahat, laho mamboiskon hun tanoh on pardingat ni sidea.
- ¹⁷ (34-18) Anggo dilo-dilo halak parpintor, sai itangihon Jahowa do, anjaha ipaluah do sidea humbani haganup hasosakanni.
- ¹⁸ (34-19) Dohor do Jahowa bani halak paruhur na marosak, anjaha ipaluah partonduy na maropuk.
- ¹⁹ (34-20) Buei pe sitaronon ni halak parpintor, tapi ipaluah Jahowa do ia humbani haganupan ai.
- ²⁰ (34-21) Ia do manramotkon ganup holi-holini, ase ulang maponggol age sada.

- ²¹ (34-22) Sai hamatehonon ni parjahat do hajahaton, anjaha maningon marutang do na mandomdomi halak parpintor.
- ²² (34-23) Jahowa do sitobus tonduy ni juakjuak-Ni, anjaha seng anjai marutang sagala na martenger ni uhur Bani.

Tonggo Mangindo Pangurupion humbani Munsuh

- 35** ¹ Humbani si Daud. Ham Tuhan, imbang Ham ma na mangimbang ahu, porang Ham ma na mamorang ahu.
- ² Jolom Ham ma gantar etek pakon gantar bolon, jongjong ma Ham mangurupi ahu.
- ³ Ondamkon Ham ma tanja pakon tangkei dampak na mangayak ahu, hatahon Ham ma bani tonduyhu, “Ahu do sipaluah ho.”
- ⁴ Bahen Ham ma maila anjaha tarbador na manguhurhon hosahku, bahen Ham ma surut anjaha maila na manranggihon hamagouan dampak ahu.
- ⁵ Paturut Ham ma sidea songon lapa-lapa niombus ni logou, anjaha malekat ni Jahowa ma mardakdak sidea.
- ⁶ Sai golap ma dalan ni sidea anjaha landit, anjaha malekat ni Jahowa ma marburu sidea.
- ⁷ Ponop anjaha seng marhala itaon sidea siding ni sidea bangku, anjaha seng marhala ihurak sidea do godung mambuat hosahku.

- ⁸ Sai sogop ma bani hasedaon na so ingkat binotohni, siding na tinaonni na ponop ai ma manangkapsi, sai majomba ma ia hubagas godungni ai.
- ⁹ Tapi marolob-olob do tonduyhu ibagas Jahowa, anjaha marmegah-megah halani pangurupi-Ni.
- ¹⁰ Haganup holi-holingku mangkatahon, “Ham Jahowa, ise ma na songon Ham, na paluahkon halak na madoyuk humbani halak sigogohkonni, halak na musil ampa na madorun humbani panrampok?”
- ¹¹ Marrohan do saksi na jahat-jahat, isungkuni do ahu pasal na so hubotoh.
- ¹² Na jahat do ibahen bangku balos ni na madear, tarpunjung do ahu halani ai.
- ¹³ Tapi anggo ahu, sanggah boritan sidea hinan, hupakei do pakeian pusok ni uhur, huarsik do diringku marhitei puasa, anjaha unduk do ahu martonggo,
- ¹⁴ songon dompak huan-kuanku ampa saninangku sonai do hubahen pangabangku, marpakeian pusok ni uhur, unduk songon na mateian inang, sonai do unduk ahu.
- ¹⁵ Hape dob targompang ahu, megah ma sidea, anjaha martumpu-tumpu laho mangimbang ahu; halak na so hutanda mandorab

ahu, anjaha seng marnamangadi sidea mangapasi ahu.

¹⁶ Seng maralang-alang sidea pahirihon ahu, ipangesnges do iponni dampak ahu.

¹⁷ Ham Jahowa, piga dokah on do sai paidah-idahon-Mu sonin? Paluah Ham ma tonduyhu humbani siparaum, sonai homa hosaku humbani anak ni singa.

¹⁸ Sai pujionku do Ham i tongah-tongah ni Kuria na bangga, anjaha pasangaponku do Ham i tongah-tongah ni jolma na mabuei.

¹⁹ Sai ulang ma lопас Ham marmalas ni uhur imbangku, siparladung, mangidah ahu, na mangkasogamkon ahu na so ingkat marhala, na pahirdop-hirdop matani.

²⁰ Ai seng dong damei isahapkon sidea, iranggi do panipuon dampak halak parsip i nagori in.

²¹ Ipangangang sidea do babahni dampak ahu, anjaha nini, “E, e, e, domma ididah matanami.”

²² Domma ididah Ham ai, Ham Tuhan, sai ulang ma Ham sip, sai ulang ma Ham mandaoh-daoh humbangku, ale Jahowa.

²³ Jongjong ma Ham anjaha roh ma Ham mambela pakarangku, Ham Naibatangku anjaha Tuhanku!

²⁴ Pintori Ham ma ahu romban hubani hapintoron-Mu, Ham Jahowa Naibatangku,

ase ulang marmogah-mogah sidea
mangidah ahu,

²⁵ ase ulang ihatahon sidea ibagas uhurni, “E,
e, domma das sura-suranku!” ase ulang
ihatahon sidea, “Domma ibondut hanami
ia!”

²⁶ Sai maila anjaha tarbador ma sagala na
mangkamalaskon hamagouanku. Sai
marhiou hailaon ampa habadoron ma halak
na pajuntul-juntulhon dirini dampak ahu.

²⁷ Sai marolob-olob anjaha marmalas ni uhur ma
halak na mangkasiholi hapintoronku, sai
tongtong ma ihatahon sidea, “Timbul do
Jahowa, na mangkarosuhkon haluahon ni
juakjuak-Ni.”

²⁸ Sai patugah-tugahon ni dilahku do hapintoron-
Mu, anjaha puji-pujian ma Bamu ganup
ari.

Hapitungon ni Halak Pardousa ampa Hatuahon ni Parpintor

36 ¹ Bani pambobai koor. Humbani si Daud,
juakjuak ni Naibata. (36-2) Marhusipi do
dousa ibagas uhur ni parjahat; seng dong
biar dampak Naibata bani parjahat.

² (36-3) Ai iipuk-ipuk do dirini ibagas uhurni,
paboa seng anjai tardapot hajahatonni atap
hagigihononkon ia.

- ³ (36-4) Guak pakon ladung do hata-hata ni pamanganni; domma mangadi ia mandalankon horja hasintongan ampa na madear.
- ⁴ (36-5) Na jahat do hansa ipingkiri i podomanni, idompakkon do dalan na masambor; seng ihagigihon hajahaton.
- ⁵ (36-6) Ham Jahowa, sundol do ronsi langit idop ni uhur-Mu, anjaha hasintongan-Mu das do bani hambun.
- ⁶ (36-7) Songon dolog ni Naibata do toguh ni hapintoron-Mu, anjaha songon bah ni laut na so tarsibar do panguhum-Mu. Ham do sipaluah jolma pakon pinahan, ale Jahowa.
- ⁷ (36-8) Mantin ni in idop ni uhur-Mu Ham Naibata, i linggom ni habong-Mu do marlingod anak ni jolma;
- ⁸ (36-9) ibosuri sidea do dirini bani taboh-taboh ni rumah-Mu, ipainum Ham do sidea hambani bah harosuh-Mu,
- ⁹ (36-10) ai i lambung-Mu do bah tubuh hagoluhan, ibagas haliharon-Mu ididah hanami haliharon.
- ¹⁰ (36-11) Torus ma patuduhkon Ham idop ni uhur-Mu bani na mananda Ham, ampa hasintongan-Mu bani sibujur uhur.

- ¹¹ (36-12) Sai ulang ma mangonai bangku tunjang-tunjang ni sigijang uhur, sai ulang ma iusir tangan ni halak parjahat ahu.
- ¹² (36-13) Gobir anjaha mangkatompas do sihorjahon hajahaton, ijombahon do sidea, anjaha seng tarbahensi be jongjong.

Lang Totap Hasonangan ni Parjahat

- 37** ¹ Humbani si Daud. Ulang ma ho marah dompak halak parjahat, anjaha ulang ma sogam uhurmu bani na mangkorjahon hagedukon;
- ² ai doras do sidea melus songon poyon-poyon, anjaha hurleh songon tulmok na maratah.
- ³ Martenger ni uhur bani Jahowa ma ho anjaha horjahon ma na madear. lankon ma tanoh in, anjaha ramotkon habujuron.
- ⁴ Hamalaskon ma Jahowa, jadi bereon-Ni ma hubam harosuh ni uhurmu.
- ⁵ Ondoskon ma dalanmu bani Jahowa anjaha hatengerhon la, ase la patorsahon.
- ⁶ Jadi papoltakon-Ni ma hapintononmu songon na lihar, anjaha habonaronmu songon tongah arian.
- ⁷ Sip ma ho i lobei ni Jahowa, anjaha pahamot la; ulang ma sogam uhurmu mangidah halak na mardohar dalanni, mangidah halak sihorjahon panipuon.

- ⁸ Ampogi ma ringis, tadingkon gila, ulang marsogam ni uhur, ai mambobai huhajahaton do hansa in.
- ⁹ Ai maningon masab do sihorjahon hajahaton, tapi halak na martenger ni uhur bani Jahowa do sitean tanoh on.
- ¹⁰ Tongkin nari gelah seng dong be parjahat in, anggo ipardiatei ho iananni, seng jumpah be ia;
- ¹¹ tapi na lamlam maruhur do sitean tanoh in, anjaha hamalaskonon ni uhur ni sidea do hadameion na gok.
- ¹² Sai martahi-tahi do parjahat dompak halak parpintor, anjaha ngesnges iponni ibahen dompaksi.
- ¹³ Tartawa do Jahowa mangidahsi, ai domma ididah paroh ni ajalni.
- ¹⁴ Isintak halak parjahat do podang anjaha ipasang siorni, laho manjombahon halak na madoyuk pakon na masombuh, laho manayat halak na bujur maruhur.
- ¹⁵ Hape podangni manobak pusu-pusuni sandiri, anjaha siorni mangkaponggol.
- ¹⁶ Rahanan do na otik, na dong bani halak parpintor, ase na marsulei-sulei bani halak parjahat,
- ¹⁷ ai ripukkononkon do botohon ni halak parjahat, tapi itungkol Jahowa do halak parpintor.

- 18 Ibotoh Jahowa do ari ni halak na daulat, anjaha totap do sadokah ni dokahni siteanon ni sidea.
- 19 Seng anjai tarbador sidea sanggah roh hasosakan, anjaha bosuran do sidea bani musim lohei.
- 20 Tongon do, maningon magou do halak parjahat, anjaha songon hajagaron ni ladang do munsuh ni Jahowa, masab do sidea songon timus.
- 21 Manraih do parjahat, tapi seng ipaulak; tapi paridop ni uhur anjaha pardear layak do halak parpintor.
- 22 Tongon do, halak na pinasu-pasu-Ni do manean tanoh in, tapi halak na binuraan-Ni maningon magou do.
- 23 Jahowa do sibobai langkah ni dalahi, anjaha itumpak do dalan ni na hinarosuhkon-Ni.
- 24 Targompang pe ia, seng lanjar gayap, ai Jahowa do na manungkol tanganni.
- 25 Danak do ahu sapari, domma matua sonari, tapi seng onggah huida tartading halak parpintor, anjaha mangindo-indo sipanganon ginomparni.
- 26 Sai maridop ni uhur do ia bani ganup panorang anjaha paraihkon; parhiteian ni pasu-pasu do ginompar-Ni.

- 27 Surut ma ho humbani na jahat, horjahon na madear, ase totap ho ronsi sadokah ni dokahni.
- 28 Ai holong do atei ni Jahowa bani uhum, anjaha seng itadingkon halak niidopan-Ni. Ramotkonon-Ni do sidea sadokah ni dokahni, tapi ginompar ni halak parjahat maningon bois do.
- 29 Teanon ni halak parpintor do tanoh in, anjaha tongtong do sidea marianan ijin.
- 30 Mamodahkon hauhuron do pamangan ni halak parpintor, anjaha dilahni mangkatahon na sintong.
- 31 Iparimbagaskon do titah ni Naibatani ibagas uhurni, anjaha seng anjai tarlandit langkahni.
- 32 Sai igompangi halak parjahat do halak parpintor, sihol do bunuhonni ia.
- 33 Tapi seng anjai bereon ni Jahowa ia hubagas tanganni, anjaha seng paturutonna ia hona uhum sanggah i paruhuman ia.
- 34 Ajamkon ma Jahowa anjaha ramotkon dalam-Ni, jadi patimbulon-Ni ma ho manean tanoh in, anjaha idahonmu ma parbois ni halak parjahat.
- 35 Ongga do huidah sada halak parjahat na tarlobih, na podas marbanggal songon hayu ares;

- ³⁶ dob mamontas ahu use, hape seng dong be,
hupindahi, hape seng dapot be.
- ³⁷ Sai pardiatei ma habujuron anjaha horjahon na
pintor, sai hadameion do dobni bani halak
sisonai.
- ³⁸ Tapi boiskonon-Ni do haganup halak
sipangosei, anjaha siapkonon-Ni do
ginompar ni halak parjahat.
- ³⁹ Tapi humbani Jahowa do haluahon ni halak
parpintor, la do parlingodan ni sidea
sanggah hasosakan.
- ⁴⁰ Jahowa do sipangurupi pakon na paluahkon
sidea, la do na paluahkon sidea humbani
tangan ni halak parjahat, ipabansah do
sidea halani marlingod sidea Bani.

Tonggo Ibagas Naborit na Parah

(Pausih: Psalm 6)

- 38** ¹ Psalm ni si Daud. Bahen pardingatan.
(38-2) Ham Jahowa, ulang ma pinsang Ham
ahu ibagas ringis-Mu, ulang ma ajar Ham
ahu ibagas gila-Mu!
- ² (38-3) ai mangkapantik do hu bangku
panah-Mu, anjaha idondoni tangan-Mu do
ahu.
- ³ (38-4) Seng be dong na jorgit bani angkulangku
halani ringis-Mu, seng marhasonangan be
holi-holingku halani dousangku.

- ⁴ (38-5) Ai isalpui dousangku do ulungku, anjaha songon pangodoh ni siboanon na borat do ai bangku.
- ⁵ (38-6) Bau masik anjaha marnanah do ugahku, halani haotoonku.
- ⁶ (38-7) Gundung mando ahu anjaha unduk mardalan, martudung-tudung do ahu mardalan ari-ari.
- ⁷ (38-8) Ai milas do sab binongeihi, seng be dong na jorgit bani dagingku.
- ⁸ (38-9) Mandatei anjaha marosak do huahap, morong-orong do ahu halani parborit ni pusu-pusungku.
- ⁹ (38-10) Ham Jahowa, talar do i lobei-Mu sagala pangindoanku, anjaha hoih-hoihku pe seng ponop ai hun Bamu.
- ¹⁰ (38-11) Sai mulbag-ulbag do pusu-pusungku, anjaha moru gogohku; haliharon ni mata pe seng dong be bangku.
- ¹¹ (38-12) Huan-huan pakon diha-dihangku padaoh diri humbangku, anjaha sindohorhu mandaoh-daoh jongjong.
- ¹² (38-13) Na manguhurhon hosahku, manaon jarot bangku, anjaha halak na mangindahi hamagouanku mansahapkon hasedaon bangku, layur-layur ari do sidea manranggihon tipu.

- ¹³ (38-14) Tapi anggo ahu nengel mando, seng marpambogei, songon halak na longah do ahu, na so pabuha pamanganni.
- ¹⁴ (38-15) Tongon, songon halak na so marpambogei mando ahu, na so dong balos ibagas pamanganni.
- ¹⁵ (38-16) Ibagas ai Ham do hupanalom, ale Jahowa; Ham ma na marbalos, ale Jahowa Naibatanku.
- ¹⁶ (38-17) Nini uhurhu, “Gendo ulang marmalas ni uhur sidea mangidah ahu, ulang mangenjeng sidea halani na tarlandit ai naheihu.”
- ¹⁷ (38-18) Ai narus do ahu sihol targompang, anjaha sitarononku jonjon do i lobeihu.
- ¹⁸ (38-19) Tongon, husopotkon do salahku, anjaha huhoruhon do dousanku.
- ¹⁹ (38-20) Tapi margogoh do na mamunsuhi ahu, anjaha buei do sidea na mandomdomi ahu seng marhala.
- ²⁰ (38-21) Ibalaskon sidea do na jahat balas ni na madear, anjaha ilawan ahu halani huporluhon na madear.
- ²¹ (38-22) Ulang ma tadingkon Ham ahu, Ham Jahowa, ulang ma mandaoh-daoh Ham humbangku, Ham Naibatanku!
- ²² (38-23) Papodas Ham ma mangurupi ahu, Ham Tuhan, haluahonku!

Tonggo Ibagas Paruntolon

- 39** ¹ Bani pambobai koor. Bani si Jedutun. Psalm ni si Daud. (39-2) Nini uhurhu, “Jagaonku ma parlahouhu, ase ulang mardousa ahu marhitei dilahku; bahenonku do huntam bani pamanganku, sadokah jongjong halak parjahat i lobeihu.
- ² (39-3) Hupalongah do diringku, seng marsahap, sip do ahu age pasal na madear tapi lambin gunsang do pangahapanku;
- ³ (39-4) lambin milas pusu-pusungku ibagas, lambin gara do huahap sanggah na marpingkir-pingkir ahu; jadi ningku ma marhitei dilahku,
- ⁴ (39-5) ‘Patugah Ham ma, ale Jahowa, ajalhu bangku, pakon sibar-sibar ni ari-aringku, ase hubotoh na galek do ahu.’
- ⁵ (39-6) Tongon do, domma itotapkon Ham ari-aringku piga-piga totap tumang, dokah ni umurhu hira na lang do i lobei-Mu; doskon sangombus hosah do hansa jolma in, age pe totap jongjong. Sela.
- ⁶ (39-7) Songon halinoh do hansa jolma in mardalani, iparsurai na so marguna; sai patumpuhon do ia, hape seng ibotoh, atap ise mambuat ai use.

- ⁷ (39-8) Sonari aha do sipaimaonku, Ham Tuhan?
Hu Bamu do ahu martenger ni uhur.
- ⁸ (39-9) Paluah Ham ma ahu humbani ganup
panlanggaronku, ulang ma paturut Ham ahu
ipahiri-hiri halak na oto.
- ⁹ (39-10) Longah mando ahu, seng hubuha
pamanganku, ai Ham do siaturhon ai.
- ¹⁰ (39-11) Padaoh Ham ma lonsing-lonsing
humbangku, madamor do ahu ibahen
pangodoh ni tangan-Mu.
- ¹¹ (39-12) Anggo iajar Ham jolma in marhitei
pinsang-pinsang halani hasalahanni, gabe
iparseda Ham do hinajengesni songon
ginagat ni ngitngit; doskon sangombus
hosah do hansa jolma in. Sela.
- ¹² (39-13) Sai tangihon Ham ma tonggongku,
ale Jahowa, paeleng Ham ma pinggol-Mu
bani doruh-doruhku, ulang ma sip Ham
mangidah iluhku, ai partoloh do ahu i
lambung-Mu, anjaha panginsolat songon na
lobeihu ganup.
- ¹³ (39-14) Padaoh Ham ma pangkawah-Mu
humbangku, ase suang ahu marmalas ni
uhur, paima misir ahu, anjaha lang dong be.”

Tonggo Tarima Kasih ampa Pangindoan

40 ¹ Bani pambobai koor. Humbani si Daud.
Sada Psalm. (40-2) Marpangarapan tumang

do uhur hubani Jahowa; jadi ipaeleng do diri-Ni hu bangku, anjaha itangihon do dilo-dilongku.

² (40-3) Idokdok do ahu humbani godung hamagouan, humbani hubang na malhot; ipajongjong do naheihu hu atas ni dolog batu, ipatotap do langkahku.

³ (40-4) Ibere do doding na bayu hubagas pamanganku, doding puji-pujian bani Naibatanta. Idahon ni buei halak ma ai, gabe mabiar anjaha martenger ni uhur bani Jahowa.

⁴ (40-5) Martuah ma halak na mambahen Jahowa hatengeran ni uhurni, na so ra marbalik mangirikkon sigijang uhur, atap hubani sihorjahon ladung.

⁵ (40-6) Buei do halongangan ampa ranggian-Mu, na dob binahen-Mu bennami, Ham Jahowa Naibatanku; seng adong na songon Ham. Porini sihol ambilankononku atap baritahononku ai, seng targorani ibahen bueini.

⁶ (40-7) Seng marosuh uhur-Mu bani galangan sisayaton ampa bani galangan sipanganon, tapi domma ibere Ham bangku pinggol na buha. Galangan situtungon pakon galangan pardousaon seng ipindo uhur-Mu.

- ⁷ (40-8) Jadi ningku ma, “Tongon, roh ma ahu, bani buku na ginulung in do tarsurat pasal sibahenonku.”
- ⁸ (40-9) Mangkorjahon rosuh-Mu ai do na huharosuhkon, Ham Naibatangku, anjaha ibagas uhurhu do titah-Mu.
- ⁹ (40-10) Domma huambilankon hapintoron-Mu bani humpulan banggal, tongon, seng tutup bibirhu, Ham Jahowa, ibotoh Ham do ai.
- ¹⁰ (40-11) Seng huponopkon hapintoron-Mu ibagas uhurhu, hupatugah-tugah do habujuron-Mu pakon pangurupion-Mu, seng huporsou idop ni uhur-Mu pakon hasintongan-Mu bani humpulan banggal.
- ¹¹ (40-12) Ham Jahowa, sai ulang ma buat Ham parontou ni uhur-Mu humbangku, dear layak-Mu pakon hasintongan-Mu ma manramotkon ahu tongtong.
- ¹² (40-13) Ai hasunsahan do na manlioti ahu, seng tarbilang bueini; domma idorab salahku ahu, gabe seng boi ahu marpangidah, bueinan do ai ase jambulan ni ulungku, gabe jut ma uhurhu.
- ¹³ (40-14) Sai ra ma Ham Jahowa, paluahkon ahu, oloskon Ham ma, Jahowa, mangurupi ahu.
- ¹⁴ (40-15) Sai maila anjaha tarbador ma bahen Ham, sidea na manguhurhon hosahku, sai

surut ma hu pudi anjaha tarbador, sidea na mangkarosuhkon hamagouanku.

¹⁵ (40-16) Sai hirjat-hirjaton ma sidea anjaha tarbador, sagala na manggorahon bangku, “Eee, eee!”

¹⁶ (40-17) Sai marolob-olob anjaha marmegah-megah ma ibagas Ham, sagala na mangindahi Ham; sai tongtong ma ihatahon sagala na mangkasiholi pangurupion-Mu, “Banggal do Jahowa!”

¹⁷ (40-18) Madoyuk anjaha masombuh do ahu, tapi idingat Tuhan do ahu. Ham do pangurupi ampa sipaluah bangku; Ham Naibatangku, ulang ma padokah-dokah Ham.

Tonggo Mangindo Hajorgiton

- 41** ¹ Bani pambobai koor. Psalm ni si Daud.
 (41-2) Martuah ma halak na marpanatap bani halak na galek; bani panorang hasosakan, sai paluahon ni Jahowa do ia.
- ² (41-3) Jahowa do na manramotkon ampa na pagoluhkonsi, anjaha martuah do ia bahenon-Ni i tanoh on; seng anjai ondoskonon-Ni ia hu tangan ni munsuhni.
- ³ (41-4) Jahowa do na manatangsi bani podomanni sanggah boritan, mubah do ibahen haganup pangandunganni.

- ⁴ (41-5) Ningku do, “Ham Jahowa, maidop ma uhur-Mu bangku, pamalum Ham ma ahu, ai dompak Ham do ahu mardousa.”
- ⁵ (41-6) Isahapkon imbangku do na jahat dompak ahu: Sadihari do ia matei, ase magou goranni?
- ⁶ (41-7) Anggo dong halak na manorih ahu, ladung do isahapkon; na sambor do ipatumpu-tumpu uhurni, anjaha i darat isahap-sahapkon ma ai.
- ⁷ (41-8) Ganup na marsogam ni uhur bangku marhusip-husip pasal ahu, na jahat do ipingkir-pingkiri sidea dompak ahu.
- ⁸ (41-9) Domma mangonai bani naborit na parah, anjaha ia, na tibal-tibal ai, seng anjai hehe be.
- ⁹ (41-10) Gari huan-kuanku, hatengeran ni uhurhu, na rap mangan pakon ahu, iangkat do naheini laho mantadahkon ahu.
- ¹⁰ (41-11) Tapi Ham Jahowa, sai idop ma uhur-Mu bangku, pajongjong Ham ma ahu, ase mambalas ahu bani sidea.
- ¹¹ (41-12) Marhitei on botohonku ma, paboa na marosuh do Ham bangku, anggo seng be marsurak-surak imbangku dompak ahu.
- ¹² (41-13) Anjaha ahu, ibagas hasintongankai, itatang Ham do ahu, anjaha ipajongjong Ham do ahu hu lobei-Mu tongtong.

¹³ (41-14) Napuji ma Jahowa, Naibata ni Israel, humbani na basaia ronsi sadokah ni dokahni. Amen, amen.

(Buku Paduahon: Psalm 42-72)

**Sihol ni Uhur bani Naibata ampa
bani Rumah-Ni na Pansing ai**

- 42** ¹ Bani pambobai koor. Doding podah humbani ginompar ni si Korah. (42-2) Songon pangkasiholi ni ursa bani bah mardalan, sonai do pangkasiholi ni tonduyhu Bamu, Ham Naibata.
- ² (42-3) Horahan do tonduyhu bani Naibata, bani Naibata na manggoluh in; antigian pe das ahu, ase huidah bohi ni Naibata?
- ³ (42-4) Iluhku do sipanganon bangku arian pakon borngin, halani manipat ari do ipangkatahon halak bangku, “Ija do Naibatamu?”
- ⁴ (42-5) Ai ma na sihol ingatonku anjaha huuseihon uhurhu ibagas, ai ma na rap ai ahu pakon halak na mabuei marayak rumah ni Naibata, marhasoman sora olob-olob ampa puji-pujian pakon halak na laho marpesta.
- ⁵ (42-6) Mase sai unduk ho tonduyhu anjaha rusak ibagas diringku? Arapkon ma Naibata,

ai sai na pujionku ope Ia, Sipaluah bangku anjaha Naibatanku!

⁶ (42-7) Unduk do tonduyhu ibagas diringku, halani ai, sai huingat do Ham hun tanoh Jordan pakon hun pardologan Hermon, humbani Dolog Misar.

⁷ (42-8) Marsiarahan do bah mardalan na manjadihon pardosong ni sampuran-Mu; ganup ombak pakon gilumbang-Mu manangkobi ahu.

⁸ (42-9) Arian itongos Jahowa idop ni uhur-Ni, anjaha bornginni mandoding ma ahu Bani, sada tonggo bani Naibata ni hagoluhanku.

⁹ (42-10) Ningku ma dompak Naibata, batu ginggingku, “Mase ma lupa Ham bangku? Mase ma maningon martujung-tujung ahu mardalan halani odoh-odoh ni munsuhku?”

¹⁰ (42-11) Songon na hona tikam do holi-holingku, ibahen na ipahiri-hiri imbangku ahu, ai manipat ari do ihatahon sidea bangku, “Ija do Naibatamu?”

¹¹ (42-12) Mase sai unduk ho tonduyhu anjaha rusak ibagas diringku? Arapkon ma Naibata, ai sai na pujionku ope Ia, Sipaluah bangku anjaha Naibatanku.

Sambat ni Psalm 42

- 43** ¹ Pintori Ham ma ahu, ale Naibata, patorsa Ham ma parkarangku marimbang bangsa na so daulat; paluah Ham ma ahu humbani halak panipu pakon pargeduk.
- ² Ai Ham do Naibata parlingodanku, mase ma itulak Ham ahu? Mase ma maningon martujung-tujung ahu mardalan halani odoh-odoh ni munsuhku?
- ³ Tongos Ham ma haliharon-Mu ampa hasintongan-Mu; ase itogu anjaha ibobai ahu bani dolog-Mu na pansing in ampa hubani ianan-Mu;
- ⁴ gabe boi das ahu hu anjapanjap ni Naibata, hubani Naibata ni hamegahonku, ase marolob-olob ahu anjaha hupuji Ham marhitei husapi, Ham Jahowa Naibatanku!
- ⁵ Mase ma sai unduk ho tonduyhu anjaha rusak ibagas diringku? Arapkon ma Naibata, ai sai na pujionku ope la, Sipaluah bangku, anjaha Naibatanku.

Doding Tangis-tangis ni Bangsa na Hona Dorun

- 44** ¹ Bani pambobai koor. Doding podah humbani ginompar ni si Korah. (44-2) Ham Naibata, domma ibogei pinggolnami sandiri ibaritahon ompungnami bennami, pasal

pambahenan na binahen-Mu bani goluh ni sidea, bani panorang na basaia.

² (44-3) Marhitei tangan-Mu iusir Ham do bangsa sipajuh begu-begu, tapi isuankon Ham do ia sidea; iboiskon Ham do bangsa-bangsa, tapi ipararat Ham do ia sidea.

³ (44-4) Ai sedo marhitei podang ni sidea dapot sidea tanoh in, sedo botohonni mambahen monang sidea; tapi tangan siamun-Mu pakon botohon-Mu ampa haliharon ni bohi-Mu do tene, ai iharosuhkon Ham do sidea.

⁴ (44-5) Ham do Rajangku, ampa Naibatangku, na manongos haluahon bani Jakob.

⁵ (44-6) Marhitei Ham ijuar hanami munsuhnami, marhitei goran-Mu ilotloti hanami do imbangnami.

⁶ (44-7) Ai sedo bani siorhu ahu marpangajaman, anjaha sedo podangku pamonang ahu.

⁷ (44-8) Ham do paluah hanami humbani sagala imbangnami, Ham do mambahen tarbador na mandomdomi hanami.

⁸ (44-9) Ibagas Naibata do marmogah-mogah hanami ari-ari, anjaha pujionnami do goran-Mu sadokah ni dokahni. Sela.

⁹ (44-10) Hape sonari itulak Ham do hanami, anjaha ipaturut Ham hanami bador; seng bingkat Ham mangkasomani balanami.

- ¹⁰ (44-11) Ibaheh Ham do hanami manginsurut humbani munsuhnami, gabe irampas na mandomdomi hanami do hanami.
- ¹¹ (44-12) Iondoskon Ham do hanami songon biribiri sisayaton, ierap Ham do hanami i tongah-tongah ni bangsa sipajuh begu-begu.
- ¹² (44-13) Ijual Ham do bangsa-Mu seng pala marboli, anjaha seng maruntung Ham humbani harga ni sidea.
- ¹³ (44-14) Ibaheh Ham do hanami sipahiri-hirion ni simbalognami, parbileian pakon siapason ni halak na marianan inggot hanami.
- ¹⁴ (44-15) Ibaheh Ham do hanami gabe umpama i tongah-tongah ni sipajuh begu-begu, siupirhonon ni ulu i tongah-tongah ni bangsa-bangsa.
- ¹⁵ (44-16) Jongjong do i lobeihu habadoronku ari-ari, anjaha hailaon do manrungkub bohingku,
- ¹⁶ (44-17) halani sora ni na mangapasi pakon na manrisai, halani pangkawah ni munsuh pakon na mandomdomi ahu.
- ¹⁷ (44-18) Ganupan ai domma mangonai bennami, tapi seng lupa hanami Bamu, anjaha seng mangeluk hanami humbani padan-Mu.

- ¹⁸ (44-19) Seng marbalik uhurnami, anjaha seng manlembang langkahnami humbani dalam-Mu;
- ¹⁹ (44-20) age sonai iropuki Ham do hanami banianan ni sorigala, anjaha irungkubkon Ham do hagolapan bennami.
- ²⁰ (44-21) Porini ihalupahon hanami goran ni Naibata, anjaha ipaherbang hanami tangannami bani Naibata silegan,
- ²¹ (44-22) mintor lang ma pareksaon ni Naibata ai? ai la do na mananda rusia ni uhur.
- ²² (44-23) Tongon, halani Ham do ibunuhi hanami manipat ari, doskon biribiri sisayaton do hanami ihira sidea.
- ²³ (44-24) Puho ma Ham, mase sai modom Ham Tuhan? Puho ma Ham anjaha ulang ma tulak Ham hanami sadokah ni dokahni.
- ²⁴ (44-25) Mase ma iponopkon Ham bohi-Mu, lupa Ham bani hasombuhon ampa hasosakannami?
- ²⁵ (44-26) Ai unduk do tonduynami das bani orbuk, longkot bani tanoh do boltoknami.
- ²⁶ (44-27) Marugas ma Ham mangurupi hanami, anjaha paluah Ham ma hanami halani idop ni uhur-Mu.

Doding bani Parunjukon ni Raja

- 45** ¹ Bani pambobai koor. Inggouni: Bunga silundat. Humbani ginompar ni si Korah. Doding podah. Doding marsihaholongan. (45-2) Marsual-sual do humbagas uhurhu hata na madear, pajojoronku ma dodingku bani raja in; Songon mata pena do dilahku ibagas tangan ni halak na pandei manurat.
- ² (45-3) Ham do sijengesan i tongah-tongah ni anak ni jolma, hajengeson do inahkon bani bibirmu, tongon, Naibata do mamasu-masu ham tongtong.
- ³ (45-4) Solotkon ham ma podangmu bani binongeimu, ham puanglima, hamuliaonmu pakon jumbalangmu!
- ⁴ (45-5) Ibagas jumbalangmu, maju ma ham marhamonangan mangkopkop hasintongan ampa hapintoron. Ajaran ni tangan siamunmu ma ham mandalankonambahenan na marhajombuton.
- ⁵ (45-6) Marot-marot ma panahmu, tunduk ma bangsa-bangsa i lobeimu, anjaha madatei ma uhur ni munsuh ni raja in.
- ⁶ (45-7) Hotakmu, tuannami, tetap do ronsi sadokah ni dokahni, tungkot hapintoron do tungkot harajaonmu.

- ⁷ (45-8) Holong do uhurmu bani hapintoron,
magigi do ham bani hajahaton, halani ai
do, tuannami, ase iminakkon Naibatamu
minak malas ni uhur bamu, marhasurungan
humbani hasomanmu.
- ⁸ (45-9) Mir, aloe pakon kassia do mammorumi
hioumu ganupan; malas do uhurmu ibahen
parugas sigiuton na hun rumah bolon
gading;
- ⁹ (45-10) boru ni raja do deba hambani
siparugasmu; i siamunmu do jongjong
puangbolon marpakeian omas na hun opir.
- ¹⁰ (45-11) Tangihon ham ma, ale boru ni raja
in, tonggor ham ma, paeleng ham ma
pinggolmu, halupahon ham ma bangsamu
pakon rumah ni bapamu!
- ¹¹ (45-12) Sai iharosuhkon raja in ma
hinajengesmu, ai ia do tuanmu, tunduk ma
ham manambah hu bani.
- ¹² (45-13) Roh do boru Tirus mamboan siluahni,
anjaha na sangap-sangap hambani bangsa
ai marsombah mambuat uhurmu.
- ¹³ (45-14) Marpakeian jenges do boru ni raja in,
na binuat bani omas do pakeianni.
- ¹⁴ (45-15) Marpakeian na hinarawang do
ia ibobahon bani raja in, anak boru
mangirikkon, huan-kuanni mangkasomanisi;

- ¹⁵ (45-16) marhasoman malas ni uhur ampa olob-olob ibobahon ma ia, masuk hu rumah bolon ni raja in.
- ¹⁶ (45-17) Sai anakmu ma na manggantih na lobeimu, ham ma na pabangkit sidea gabe panrajai bani sab nagori on.
- ¹⁷ (45-18) Baritahononku ma goranmu bani halak marsundut-sundut, halani ai pujion ni sagala bangsa ma ham sadokah ni dokahni.

Naibata do Batar-batar Banta

- 46** ¹ Bani pambobai koor. Humbani ginompar ni si Korah. Inggouni: Alamot. Sada doding. (46-2) Naibata do haporusan ampa hagogohon banta, pangurupi banggal tongon bani panorang hasosakan.
- ² (46-3) Halani ai seng anjai mabiar hita, age pe mosor tanoh on, anjaha munjom dolog hu tongah-tongah ni laut,
- ³ (46-4) age pe marhasak anjaha marguboh bahni, anjaha dugur dolog ibahen gunsangni. Sela!
- ⁴ (46-5) Adong sada bah bolon, bahni pamegahkon huta ni Naibata, ianan tang na pansing bani Sitimbulan in.
- ⁵ (46-6) Naibata do i tongah-tongahni, seng anjai doyuk huta in, manlele siang ope domma iurupi Naibata ia.

- ⁶ (46-7) Geor pe sagala bangsa anjaha dugur sagala harajaon, tapi marsora honsi la malala ma tanoh on.
- ⁷ (46-8) Jahowa Zebaot do hasomanta, Naibata ni si Jakob do batar-batar banta. Sela.
- ⁸ (46-9) Eta, roh ma nasiam mangidah horja ni Jahowa, na parohkon songgot-songgot i atas tanoh on,
- ⁹ (46-10) na pasohkon parmunsuhan das hu ujung ni tanoh on, na mambahen marpongolan sior, maropuk tanja, na manutungi gareta porang ibagas apuy.
- ¹⁰ (46-11) Parontihon hanima ma, anjaha tanda ma, paboa Ahu do Naibata, na timbul i tongah-tongah ni bangsa-bangsa, timbul i tanoh on.
- ¹¹ (46-12) Jahowa Zebaot do hasomanta, anjaha Naibata ni si Jakob do batar-batar. Sela.

Naibata do Raja ni Ganup Tanoh on

47 ¹ Bani pambobai koor. Humbani ginompar ni si Korah. Sada Psalm. (47-2) Nasiam sagala bangsa, martopap-topap ma nasiam; puji nasiam ma Naibata marhitei doding olob-olob.

- ² (47-3) Ia Jahowa, na timbul na majombut in, la do Raja Bolon bani sab dunia on.

- ³ (47-4) Ipatunduk do bangsa-bangsa hubagas kuasanta, ampa suku ni bangsa hutoruh ni naheita.
- ⁴ (47-5) Ipilih do banta na gabe siteanonta, hatimbulon bani si Jakob, na hinaholongan-Ni in. Sela.
- ⁵ (47-6) Domma naik Naibata marhasoman olob-olob, Jahowa marhasoman sora ni tarompit.
- ⁶ (47-7) Dodingkon nasiam ma Naibata, dodingkon ma; dodingkon nasiam ma Rajanta in, dodingkon ma!
- ⁷ (47-8) Ai Naibata do Raja ni sab tanoh on, dodingkon nasiam ma doding puji-pujian.
- ⁸ (47-9) Raja do Naibata bani bangsa-bangsa, hundul do Naibata i atas paratas-Ni na pansing in.
- ⁹ (47-10) Martumpu do na sangap-sangap ni sagala bangsa songon bangsa ni Naibata ni si Abraham, Naibata do simada gantar ni tanoh on, timbul tumang do la.

Naibata do Batar-batar bani Huta Sion

48 ¹ Sada doding. Psalm humbani ginompar ni si Korah. (48-2) Banggal do Jahowa anjaha sipujion botul ibagas huta ni Naibatanta, dolog-Ni na pansing in.

- ² (48-3) Na jenges manjurjur hubabou, ai ma malas ni uhur ni sab tanoh on, Dolog Sion in, daoh hampit utara, ai ma huta ni sada raja na bolon.
- ³ (48-4) Naibata ibagas rumah-Ni patandahon diri-Ni songon batar-batar.
- ⁴ (48-5) Tonggor ma, martumpu do raja-raja, marsada ni uhur laho mandorab.
- ⁵ (48-6) Ijin ididah sidea longang ma sidea, anjaha bajoraon lanjar maporus.
- ⁶ (48-7) Godor-godor ma sidea ijai, mangarou songon naboru na laho tubuhan tuah.
- ⁷ (48-8) Marhitei logou na hun hapoltakan, irosaki Ham do kapal na hun Tarsis.
- ⁸ (48-9) Songon na dob binogeinami, sonai do ididah hanami bani huta ni Jahowa Zebaot, ibagas huta ni Naibatanta, na patotapkon ai ronsi sadokah ni dokahni. Sela.
- ⁹ (48-10) Idingat hanami do idop ni uhur-Mu, Ham Naibata, ibagas rumah-Mu.
- ¹⁰ (48-11) Songon goran-Mu, Ham Naibata, sonai do hamuliaon-Mu das hu ujung ni tanoh on, gok hapintoron do tangan-Mu siamun.
- ¹¹ (48-12) Marmalas ni uhur do Dolog Sion, marolob-olob do boru Juda halani panguhumion-Mu.
- ¹² (48-13) Inggoti nasiam ma Sion anjaha lioti nasiam ma, bilangi nasiam ma manarani.

¹³ (48-14) Papangkei nasiam ma tembokni,
bontas nasiam ma benteng-bentengni, ase
boi ituri-turihon nasiam bani sundut na
mangihut.

¹⁴ (48-15) Tongon, Naibata on do Naibata ronsi
sadokah ni dokahni, la do na manogu-nogu
hita.

Hamagouan do Ujung ni Halak na Mangunsagah bani Habayakon

- 49** ¹ Bani pambobai koor. Humbani ginompar
ni si Korah. Sada Psalm. (49-2) Tangihon
ma on, ale sagala bangsa, pardiathon ma,
nasiam ganup isi ni dunia on,
- ² (49-3) age na sombuh, sonai na sangap, age na
bayak sonai na musil haganup,
- ³ (49-4) sihol hatahonon ni pamanganku do
hauhuron, anjaha hapentaran do pingkiran
ni uhurhu.
- ⁴ (49-5) Tarehononku do pinggolhu dompak
umpama, anjaha patalaronku ma rusiangku
marhitei husapi.
- ⁵ (49-6) Mase ma pala mabiar ahu bani ari
hasunsahan, sanggah hajahaton ni halak na
mardakdak ahu manginggoti ahu.
- ⁶ (49-7) ai ma na martenger ni uhur bani na dong
bani, anjaha na mangenjengkon habayakon
ni sidea?

- ⁷ (49-8) Tongon, ise pe lang na boi manobus dirini, barang targalarisi partobusni bani Naibata,
- ⁸ (49-9) ai hargatu do partobus ni tonduyni ai, anjaha seng targoki sadokah ni dokahni,
- ⁹ (49-10) ase boi ia tongtong manggoluh, anjaha seng mangidah tanoman.
- ¹⁰ (49-11) Nai ma, idahonni do, matei do age halak na maruhur, na lontong pakon na jijing pe maseda do rombang, anjaha na dong bani sidea tading bani na legan.
- ¹¹ (49-12) Tanoman do rumah ni sidea lalab, ianan ni sidea marsundut-sundut, age pe marpanggorani hubani sidea tanoh in.
- ¹² (49-13) Ia jolma in, ibagas hasangaponni, seng totap, usih songon pinahan do sidea iboiskon.
- ¹³ (49-14) Ai ma na mangonai bani halak na mangunsagah bani dirini, ai ma ujung ni halak na marosuh bani buei ni sahapni sandiri. Sela.
- ¹⁴ (49-15) Songon biribiri do sidea ipaharang hu nagori toruh, hamatean do na marmahan sidea; torus do sidea turun hu tanoman, malantur angkula ni sidea; nagori toruh do gabe ianan bani sidea.

- ¹⁵ (49-16) Tapi Naibata do na manobus tonduyhu
humbani kuasa ni nagori toruh. Tongon, la
do na mandokdok ahu. Sela.
- ¹⁶ (49-17) Ulang rusak ho anggo lambin bayak
sada halak, anggo lambin martambah
hamuliaon ibagas rumahni,
- ¹⁷ (49-18) ai bani parmateini holi seng boanonni
ai, anjaha hamuliaonni seng tuad
mangirikkonsi.
- ¹⁸ (49-19) Age pe nini uhurni, sanggah goluhni
sanggap ia, age dapotan puji-pujian sada
halak halani mardohar ia,
- ¹⁹ (49-20) maningon parayakonni do ompung-
ompungni, na so mangidah haliharon be
sadokah ni dokahni.
- ²⁰ (49-21) Jolma ibagas hasangaponni, tapi
lang maruhur, usih do ia songon pinahan
siraseihononkon.

Parsombahan na Sintong

- 50** ¹ Psalm ni si Asap. Naibata, Naibata Jahowa
marsahap anjaha mardilo bani tanoh on,
humbani hapoltakan das hu hasundutan.
- ² Hun Sion, pakpak ni hajengeson, marsinalsal
Naibata.
- ³ Na roh ma Naibatanta anjaha seng sip la, apuy
na margajag-gajag do i lobei-Ni, anjaha
haba-haba na gogoh manlioti-Si.

- ⁴ Idilo do langit na i babou, sonai tanoh laho manguhumi bangsa-Ni,
- ⁵ “Pahumpul ma Bangku halak na Huhaholongi, na mambahen parpadanan Bangku marhitei galangan.”
- ⁶ Langit mambaritahon hapintoron-Ni, ai Naibata sandiri do panguhum.
- ⁷ Tangihon ma, ale bangsang-Ku, ase marsahap Ahu; ale Israel, sihol saksihonon-Ku do bannima, “Naibata, Naibatamu do Ahu.”
- ⁸ Sedo halani galangan sisayatonmu ase Hupinsang ho; galangan situtungonmu tongtong do i lobei-Hu.
- ⁹ Seng porlu buaton-Ku lombu hun rumahmu atap hambing tunggal humbani harang ni pinahanmu,
- ¹⁰ ai Ahu do simada binatang na i harangan, pinahan na marribu-ribu na adong i atas dolog.
- ¹¹ Hutanda do sagala manuk-manuk na i awang-awang, anjaha saguru Bangku do sagala na manggulmit i talun.
- ¹² Porini pe loheian Ahu, seng pala hatahonon-Ku bam, ai gok Bangku do dunia on ampa sagala isini.
- ¹³ Mintor panganon-Ku ma nani daging ni lombu jonggi, atap inumon-Ku ma daroh ni hambing tunggal?

- 14 Galangkon ma bangga ni uhur bani Naibata,
anjaha galari ma bagah-bagahmu bani
Sitimbulan in;
- 15 anjaha dilo ma Ahu bani ari hasosakan, ase
Hupaluah ho anjaha ipuji ho Ahu.
- 16 Tapi bani parjahat ihatahon Naibata do,
“Aha do hakmu pajojorhon titah-Ku,
anjaha manobut-nobut padan-Ku marhitei
babahmu?
- 17 Hape ho do mangkagigihon sipaingat, anjaha
ho do manundali hatang-Ku!
- 18 Anggo ididah ho panangko, marosuh do ho
mangkasomanisi, anjaha sapanriah do ho
rap pakon parbangkis.
- 19 Ipalopas ho do pamanganmu mansahapkon
hajahaton, ampa dilahmu mandandan
panipuon.
- 20 Sai hundul-hundul do ho mangkatai saninamu,
sai ipahiri ho do anak ni inangmu.
- 21 Sonai do ibahen ho, tapi sai sip do Ahu; jadi
iagan ho doskon ho Ahu. Ahu do manguhum
ho anjaha patidakon-Ku ma ai i lobei ni
matamu.
- 22 Parimbagaskon ma ai, ale sihalupahon Naibata,
ase ulang roh Ahu manoroh, gabe ise pe
lang boi paluahkon.
- 23 Ise na manggalangkon bangga ni uhur, ai do na
pasangapkon Ahu, anjaha ise na mardalan

ibagas hapintoron, hubani do patalaron-Ku hatuahon-Ku.”

Tonggo Mansopotkon Dousa ampa Pangindoan Pasal Habayuon ni Uhur

- 51** ¹ Bani pambobai koor. Psalm humbani si Daud. (51-2) Sanggah na roh Nabi Natan mangayakisi, dob idohori si Batseba. (51-3) Maidop ma uhur-Mu bangku, Ham Naibata, romban hubani dear ni layak-Mu, sasap Ham ma panlanggaronku romban hubani buei ni idop ni uhur-Mu.
- ² (51-4) Burihi Ham ma ahu pansing tumang humbani hajahatonku, anjaha paborsih Ham ma ahu humbani dousangku.
- ³ (51-5) Ai mangahap do ahu bani panlanggaronku, anjaha tongtong do sonson i lobeihu dousangku.
- ⁴ (51-6) Bamu, Bamu tumang do ahu mardousa, anjaha na jahat bani panonggor-Mu do huhorjahon, ase taridah pintor do Ham bani parsahap-Mu, anjaha pitah Ham bani panguhumion-Mu.
- ⁵ (51-7) Tongon, ibagas hagedukon do ahu tubuh, anjaha ibagas dousa ijalo inang ahu.
- ⁶ (51-8) Tongon, hasintongan na ibagas uhur do iharosuhkon Ham, anjaha ibagas na ponop ipabotohkon Ham hauhuron bangku.

- ⁷ (51-9) Uras Ham ma ahu humbani dousangku marhitei hisop, ase borsih ahu, burihi Ham ma ahu, ase lopakkan ahu marimbang salju.
- ⁸ (51-10) Sai pabogeihon Ham ma hu bangku malas ni uhur pakon hamegahon, ase marolob-olob holi-holi na dob nirosakan-Mu.
- ⁹ (51-11) Ponopkon Ham ma bohi-Mu humbani dousangku, anjaha sasap Ham ma ganup hajahatonku.
- ¹⁰ (51-12) Tompa Ham ma uhur na borsih ibagas diringku, Ham Naibata, anjaha bere Ham ma bangku tonduy na baru anjaha na totap.
- ¹¹ (51-13) Ulang ma pabali Ham ahu hun lobei-Mu, anjaha ulang ma buat Ham Tonduy-Mu Na Pansing in humbangku.
- ¹² (51-14) Pasuang Ham ma bangku malas ni uhur halani pangurupion-Mu, anjaha tungkoli Ham ma ahu marhitei tonduy pambalosion.
- ¹³ (51-15) Ase huajarhon dalan-Mu bani sipanlanggar, ase mulak halak pardousa hu Bamu.
- ¹⁴ (51-16) Sai paluah Ham ma ahu humbani sapata ni daroh, Ham Naibata, Naibata ni hatuahonku, ase ipuji dilahku hapintoron-Mu.
- ¹⁵ (51-17) Buha Ham ma bibirhu, Ham Tuhan, ase iambilankon pamanganku puji-pujian-Mu.

- ¹⁶ (51-18) Ai seng iharosuhkon Ham galangan sisayaton, anjaha porini huboban galangan situtungon, seng anjai hadearhonon-Mu ai.
- ¹⁷ (51-19) Galangan na hinarosuhkon ni Naibata, ai ma tonduy na marosak; uhur na maropuk anjaha na marosak seng itulak uhur-Mu, Ham Naibata.
- ¹⁸ (51-20) Bahen Ham ma na madear hu Sion romban hubani idop ni uhur-Mu, pauli Ham ma tembok ni Jerusalem.
- ¹⁹ (51-21) Jadi ijai ma harusuhkonon-Mu galangan na sintong, galangan situtungon ampa galangan sirasogon; ijai ma galangonkon lombu jonggi i atas anjapanjap-Mu.

Uhum bani Halak Parjahat

- 52** ¹ Bani pambobai koor. Doding podah humbani si Daud, (52-2) sanggah roh si Doeg, halak Edom ai patugahkon bani si Saul, nini hu bani, “Domma das si Daud hu rumah ni si Ahimelek.” (52-3) Mase marmegah-megah ho ibagas hajahaton, ale puanglima, parkuasa na mabisang, manlawan halak na daulat ganup ari?
- ² (52-4) Hamagouan do iuhurhon ho, songon pisou parsuhur do marot ni dilahmu, ho ale sihorjahon pangoto-otoion.

- ³ (52-5) Holongan do uhumu bani na jahat ase
bani na madesar, bani hata ladung ase hata
hasintongan. Sela.
- ⁴ (52-6) Sai iharosuhkon ho do bagei ni hata
hasedaon, sonai age dilah panipuon.
- ⁵ (52-7) Tapi reongkonon ni Naibata do ho
sadokah ni dokahni, tangkapon-Ni anjaha
saradon-Ni do ho humbani lampolampomu,
dokdokon-Ni do hun tanoh ni halak na
manggoluh. Sela.
- ⁶ (52-8) Idahon ni halak parpintor ma ai lanjar
mabiar, tatawaan ni sidea ma ia, nini,
- ⁷ (52-9) “Tonggor ma halak an, na so mambahen
Naibata batar-batarni, na martenger ni
uhur bani buei ni habayakonni, anjaha na
mangenjeng ibagas hajahatonni.”
- ⁸ (52-10) Tapi anggo ahu songon hayu jetun na
ratah do i rumah ni Naibata; martenger ni
uhur do ahu bani idop ni uhur ni Naibata
ronsi sadokah ni dokahni.
- ⁹ (52-11) Sai pujionku do Ham, ai Ham do sibahen
ai, ronsi sadokah ni dokahni, halani ipasaud
Ham ai; sai baritahononku do goran-Mu
halani hadearonni, i lobei ni halak na
niidopan-Mu.

Haotoon ni Jolma na Marnalangkon Naibata

(Pausih: Psalm 14)

- 53** ¹ Bani pambobai koor. Loguni: Mahalat. Doding podah humbani si Daud. (53-2) Nini halak na oto do ibagas uhurni, “Seng dong Naibata.” Bajan anjaha sambor do pambahen ni sidea, sahalak pe lang sibahen na madear.
- ² (53-3) Manatap-natap do Jahowa hun nagori atas dompak anak ni jolma, mangidah atap dong do na maruhur, sipindahi Naibata.
- ³ (53-4) Haganup do sidea kahou, haganupan seng margagan, sahalak pe lang sibahen na madear, sahalak pe lang dong.
- ⁴ (53-5) Seng marpambotoh nani sagala halak sihorjahon hajahaton, na mangankon bangsang-Ku songon na mangan ruti, anjaha na so onggamardilo Jahowa?
- ⁵ (53-6) Tapi maningon tarsonggot do sidea use, age pe seng dong na manonggoti, ai Naibata do na mangerap holi-holi ni halak na mangkubu ho, sai na tarbador do sidea, ai domma iambukkon Naibata sidea.
- ⁶ (53-7) Ah, sai roh ma haluahon ni Israel, hun Sion! Anggo suang ma ibahen Naibata bangsa-Ni, marolob-olob ma Jakob anjaha marmalasin uhur Israel.

Tonggo Mangindo
Partolongan Marimbang Munsuh

- 54** ¹ Bani pambobai koor. Marhasoman husapi. Doding podah humbani si Daud, (54-2) sanggah roh halak Sipi hubani si Saul mangkatahon, “Ai lang i lambungnami do marponop si Daud?” (54-3) Ham Naibata, paluah Ham ma ahu, halani goran-Mu, pintori Ham ma ahu marhitei hagogohon-Mu.
- ² (54-4) Tangihon Ham ma tonggongku, Ham Naibata! Paeleng Ham ma pinggol-Mu manangihon sahap ni pamanganku!
- ³ (54-5) Ai hehe do halak na jungkat mangimbang ahu, anjaha sihorjahon paksa mangindahi hosahku; seng mardingat sidea bani Naibata. Sela.
- ⁴ (54-6) Tonggor ma, Naibata do pangurupi bangku, Tuhan do siramotkon hosahku.
- ⁵ (54-7) Balaskon Ham ma hajahaton in bani imbang-imbangku, siapkon Ham ma sidea halani hasintongan-Mu.
- ⁶ (54-8) Marhasoman malas ni uhur boanonku ma galangan hu Bamu, pujionku ma goran-Mu, Ham Jahowa, ai dear do in,

⁷ (54-9) ai ipaluah do ahu humbani sagala hasosakan, anjaha sombuh matanguku mangidah sagala munsuhku.

Tonggo Mangindo

Pangurupion Marimbang Munsuh

55 ¹ Bani pambobai koor. Doding podah humbani si Daud marhasoman husapi.

(55-2) Tangihon Ham ma tonggongku, Ham Naibata, anjaha ulang ma tulak Ham elek-elekku.

² (55-3) Ingat Ham ma ahu anjaha balosi Ham ma; mawat-awat do ahu ibagas doruh-doruhku.

³ (55-4) Bulinsah do ahu halani parsurak ni munsuh, halani panosak ni parjahat; ai sai manggulang hamagouan do sidea bangku, anjaha ibagas gila do sidea mammunsihu ahu.

⁴ (55-5) Mangirput do uhuru ibagas, anjaha songgot-songgot ni hamatean mandorab ahu.

⁵ (55-6) Biar pakon hagobiron do manrohi ahu, anjaha hasonggoton manrungkub ahu,

⁶ (55-7) pala huhatahon, “Ah, ambit marhabong ma ahu songon asas, habang ma ahu mayap-ayap mangindahi parsaranan.”

⁷ (55-8) Tongon, daoh ma ahu maporus, marborngin i halimisan. Sela.

- ⁸ (55-9) Tarolos ma ahu mangindahi ianan parlingodan, dampak logou sibungkar hasowor ampa haba-haba.
- ⁹ (55-10) Geori Ham ma sidea Tuhan, bolah Ham ma riah ni sidea. Ai huidah do paksa pakon parsalisihan ibagas huta ai.
- ¹⁰ (55-11) Arian pakon borngin manrunda sidea i atas tembokni; hajahaton ampa hasunsahan masa ibagas ai.
- ¹¹ (55-12) Hasamboron do i tengah-tengahni, anjaha seng misir humbani alamanni panokohon pakon panipuon.
- ¹² (55-13) Sedo munsuh na pahiri ahu, ambit ai hutaron namin; sedo halak pardomdom na roh mangimbang ahu, ambit ai marponop ahu hun lobeini.
- ¹³ (55-14) Tapi ho do, jolma na doskon ahu, huan-kuanku, hatengeran ni uhurhu;
- ¹⁴ (55-15) ho, hasomanku saparsaoran, ho, hasomanku saodoran hu rumah ni Naibata.
- ¹⁵ (55-16) Sai hamatean ma mandorab sidea, manggoluh ma sidea susur hu nagori toruh; ai hajahaton do manggoki rumah ampa paruhuron ni sidea.
- ¹⁶ (55-17) Tapi anggo ahu, bani Naibata do ahu dilo-dilo. Jadi Jahowa ma na paluahkon ahu.

- ¹⁷ (55-18) Bodari, sogod ampa tongah arian dilo-dilo do ahu, doruh-doruh, anjaha itangihon do sorangku.
- ¹⁸ (55-19) Paluahon-Ni do tonduyhu mardamei-damei humbani halak na mandorab ahu, ai buei tumang do sidea na manlawan ahu.
- ¹⁹ (55-20) Sai tangaron ni Naibata do anjaha patoruhon-Ni do sidea; la na marparatas humbani nabasaia. Sela. Halani seng ra sidea paubahkon uhurni, anjaha seng marhabiaran sidea bani Naibata.
- ²⁰ (55-21) Ilaluhon do tanganni laho mangimbang hasomanni, mangeluk do ia humbani parpadanan.
- ²¹ (55-22) Landitan do pamanganni humbani mantega, tapi hamunsuhon do ibagas uhurni; lamlaman do hatani ase minak, tapi songon podang na sinintak do sidea.
- ²² (55-23) Ompaskon ma bani Jahowa holsoh ni uhurmu, jadi la ma na mansarihon ho; seng anjai paturuton-Ni halak parpintor marhasunsahan lalab.
- ²³ (55-24) Tapi anggo Ham, ale Naibata, sai patuadon-Mu do sidea hubagas godung hamagouan; halak sionsop daroh pakon panipu seng anjai das ronsi partongahan ni umurni. Tapi anggo ahu hu Bamu do marhatengeran.

Tenger ni Uhur bani Naibata Ibagas Hasosakan

- 56** ¹ Bani pambobai koor. Inggouni: Asas bani hayu Teberinta na madaoh. Humbani si Daud, sanggah itangkap halak Palistim ia i huta Gat. (56-2) Maidop ma uhur-Mu bangku, Ham Naibata, ai sihol atahon ni jolma do ahu, ganup ari iporang anjaha isosak sidea do ahu.
- ² (56-3) Sihol atahon ni imbangku do ahu ganup ari, buei do sidea na mangimbang ahu.
- ³ (56-4) Sanggah mabiar ahu, sai hu Bamu do ahu martenger ni uhur.
- ⁴ (56-5) Mangunsagakon Naibata sai pujionku do hata-Ni, Naibata do huajamkon, seng mabiar ahu, mintor kahuaon ni jolma ma ahu?
- ⁵ (56-6) Ari-ari do ipabalik sidea hatangku; sagala pingkiran ni sidea dompak ahu sihol pasamborhon do.
- ⁶ (56-7) Martumpu-tumpu do sidea manggompangi, ipardiatei do langkah-langkahku laho manguhurhon hosahku.
- ⁷ (56-8) Seng anjai maluah sidea halani hajahatonni na buei in. Sampakkon Ham ma bangsa-bangsa in ibagas ringis-Mu, Ham Naibata!

- ⁸ (56-9) Domma isuratkon Ham parawat-awatanku, domma ipatumpu Ham iluhku hubagas tatabu-Mu; ai lang domma ibukuhon Ham ai?
- ⁹ (56-10) Maningon surut do hu pudi sagala munsuhku anggo dilo-dilo ahu; tangkas do hubotoh paboa Naibata do mangkasomani ahu.
- ¹⁰ (56-11) Mangunsagahkon Naibata, pujionku do hata-Ni, mangunsagahkon Jahowa pujionku do hata-Ni.
- ¹¹ (56-12) Marhatengeran bani Naibata do ahu, seng mabiar ahu, mintor kahuanon ni jolma ma ahu?
- ¹² (56-13) Ham Naibata, marutang bagah-bagah do ahu Bamu, sai galaronku do galangan bangga ni uhurhu hu Bamu,
- ¹³ (56-14) ai domma ipaluah Ham hosahku humbani hamatean, sonai homa naheihu pe humbani partolsuan, gabe boi mardalan ahu i lobei ni Naibata, ibagas sondang hagoluhan.

Nalom ni Uhur bani Naibata Age Ibagas Parmaraan

57 ¹ Bani pambobai koor. Inggouni: Ulang parseda. Doding podah humbani si Daud. Sanggah lintun ia humbani si Saul, hubagas liang. (57-2) Maidop ma uhur-Mu bangku,

Ham Naibata, maidop ma uhur-Mu bangku:
ai Bamu do marlingod tonduyhu, anjaha
bani linggom ni habong-Mu do ahu
marlingod, paima salpu parmaraan.

² (57-3) Dilo-dilo do ahu bani Naibata na timbul
in, hubani Naibata siluluhon ahu.

³ (57-4) Marsuruhan do la hun nagori atas anjaha
paluahon-Ni do ahu; pabadoron-Ni do
halak na sihol mangatah ahu. Sela. Sai
tongoson ni Naibata do idop ni uhur-Ni
ampa hasintongan-Ni.

⁴ (57-5) Tibal do ahu i tongah-tongah ni singa, na
sihol mangatah anak ni jolma; iponni doskon
tanja ampa panah, anjaha dilahni songon
podang na niasah.

⁵ (57-6) Pagijang Ham ma diri-Mu, Ham Naibata,
hu atas ni sagala langit, anjaha hu sab tanoh
on hamuliaon-Mu.

⁶ (57-7) Itaon sidea do jarot bani langkah-
langkahku, anjaha tonduyhu domma unduk;
ihurak sidea sada godung i lobeihu, tapi
sidea sandiri do madabuh hubagas. Sela.

⁷ (57-8) Sonang do uhurhu, Ham Naibata, sonang
do uhurhu; sihol do ahu mandoding, sihol
do ahu mamuji-muji.

⁸ (57-9) Puho ma ale tonduyhu, puho ma arbab
pakon husapi; sihol do puhoanku buha
siang.

- ⁹ (57-10) Pujionku ma Ham i tongah-tongah ni sagala bangsa, ale Tuhan, dodingkononku ma Ham i tongah-tongah ni sagala marga,
- ¹⁰ (57-11) ai sundol do hu langit idop ni uhur-Mu, anjaha hasintongan-Mu das hu awang-awang.
- ¹¹ (57-12) Pagijang Ham ma diri-Mu, Ham Naibata, hu atas ni sagala langit; hu sab tanoh on hamuliaon-Mu.

Lumba-lumba dompak Siparkuasa na So Sintong

- 58** ¹ Bani pambobai koor. Inggouni: Ulang parseda. Doding podah humbani si Daud. (58-2) Tongon do nani domu hubani uhum hanima marsahap, ale siparkuasa, anjaha sintong-sintong do iuhumi hanima anak ni jolma in?
- ² (58-3) Lang, hajahaton do idalankon hanima ibagas uhurnima, anjaha igoki hanima tanoh in bani paksa.
- ³ (58-4) Domma manlembang halak parjahat humbani partubuhni nari, domma kahou humbani partapaan nari halak sihatahon ladung.
- ⁴ (58-5) Bisa na dong bani sidea, doskon bisa ni ulog, anjaha usih do sidea songon ulog darih na nengel, na mamitut pinggolni,

- ⁵ (58-6) na so manangihon sora ni sipanubut, sora ni sipanabas na pandei.
- ⁶ (58-7) Ham Naibata, ropangi Ham ma ipon ni sidea ibagas babahni, rosaki Ham ma ngadol ni anak ni singa, Ham Jahowa.
- ⁷ (58-8) Sai salpu ma sidea songon bah na laho horah; sai melus ma sidea songon poyon na i topi dalan.
- ⁸ (58-9) Sai mahansur ma sidea songon langkitang na manjuluk, songon rudang na masabur bani sada naboru seng sompat mangidah mata ni ari.
- ⁹ (58-10) Lape milas hudon ni sidea ibahen apuy ni duri-duri, na matah atap na masak, domma ipurpurhon Naibata sidea.
- ¹⁰ (58-11) Marmalas ni uhur ma halak parpintor, mangidah pambalason ai; burihanni ma naheini ibagas daroh ni parjahat.
- ¹¹ (58-12) Jadi hatahonon ni jolma ma, “Dapotan upah do tongon parpintor, tongon, dong do Naibata na manguhum i atas tanoh on.”

Tonggo Mangindo

Pangurupion Marimbang Munsuh

59 ¹ Bani pambobai koor. Inggouni: Ulang parseda. Doding podah humbani si Daud, sanggah isuruh si Saul ia manjaga rumahni laho mamunuhsi. (59-2) Paluah Ham ma ahu

- humbani munsuhku, Ham Naibata; ondingi Ham ma ahu marimbang sagala imbangku.
- ² (59-3) Paluah Ham ma ahu humbani sihorjahon hajahaton, anjaha paluah Ham ma ahu humbani siduruskon daroh.
- ³ (59-4) Ai tonggor ma, iuhurhon sidea do goluhku; halak siparkuasa mandorab ahu, age pe seng dong panlanggaronku, seng dong dousangku, Ham Jahowa.
- ⁴ (59-5) Age pe seng marsalah ahu, roh do sidea mandorab domma sirsir bei. Hehe ma Ham manjumpahkon ahu anjaha kawah ma Ham!
- ⁵ (59-6) Ham Jahowa, Naibata Zebaot, Naibata ni Israel! Hehe ma Ham marlulu bani bangsa parbegu! Ulang ma maidop Ham dompak halak partahi-tahi na jahat in. Sela.
- ⁶ (59-7) Mulak do sidea ganup bodari, mangorongi songon baliang, iinggoti sidea do huta in.
- ⁷ (59-8) Tonggor ma, buei do sahap-sahap ni babahni; podang do longkot bani dilahni, ise ma na patangi-tangi ai!
- ⁸ (59-9) Tapi Ham Jahowa, tartawa do Ham mangidah sidea, mapas do Ham mangidah sipajuh begu-begu ganup.
- ⁹ (59-10) Ham Pargogohku, hu Bamu do ahu mangkawah, ai Ham do Naibata, batar-batar bangku.

- ¹⁰ (59-11) Naibatangku paridop ni uhur, in do na mangalo-alo ahu; Naibata do mambahen marmalas ni uhur ahu mangidah imbang-imbangu.
- ¹¹ (59-12) Ulang ma mintor bunuh Ham sidea, Ase ulang lupa bangsangu; pamerap Ham ma sidea marhitei hagogohon-Mu, dob ai tompaskon Ham ma sidea, Ham Tuhannami, gantarnami.
- ¹² (59-13) Halani dousa ni pamanganni, sahap-sahap ni bibirni, bahen Ham ma sidea tardapot ibagas hatonaloni, halani pamuraion pakon ladung, na hinatahonni.
- ¹³ (59-14) Boiskon Ham ma sidea ibagas ringis-Mu, boiskon Ham ma sidea, ronsi lang dong be sidea, ase ibotoh halak, Naibata do hape na manggomgom Jakob, das hu ujung ni tanoh on. Sela.
- ¹⁴ (59-15) Mulak do sidea ganup bodari, mangorongi songon baliang, iinggoti sidea do huta in.
- ¹⁵ (59-16) Maor-aor do sidea mangindahi sipanganon, marmungut-mungut, anggo lang bosur sidea.
- ¹⁶ (59-17) Tapi anggo ahu sai dodingkononku do hagogohon-Mu, janah olobkononku do sogod idop ni uhur-Mu; ai Ham do

batar-batar anjaha haporusanku sanggah tarsosak.

- ¹⁷ (59-18) Ham pargogohku, Ham do dodingkononku, Ham do Naibata batar-batar bangku, Naibatanku na maridop ni uhur bangku.

Tonggo Mangindo Pangurupion Ibagas Hataluon

60 ¹ Bani pambobai koor. Inggouni: Silundat. Hasaksian. Doding podah humbani si Daud, (60-2) sanggah na marmunsuh ia dompak halak Aram na hun Mesopotamia pakon halak Aram na hun Soba, sanggah na mulak si Joab anjaha italuhon halak Edom i pamah pargaraman, sapuluh dua ribu halak bueini. (60-3) Ham Naibata, domma itulakkon Ham hanami anjaha ilontas Ham partahanannami. Domma igilai Ham hanami, sai suang ma use bahen Ham hanami.

- ² (60-4) Domma dugur ibahen Ham tanoh in anjaha mabolah, padear Ham ma bolah-bolahni in, ai domma mambal-ambal in.

- ³ (60-5) Domma ipaidahkon Ham na majangin bani bangsa-Mu, domma ipainumkon Ham bennami anggur na pamabukkon.

- ⁴ (60-6) Domma ibere Ham bani sidea,
na marhabiaran Bamu, sada tanda,
parbansahan bani sidea dompak sior. Sela.
- ⁵ (60-7) Ase boi maluah na hinaholongan-
Mu, paluah Ham ma marhitei tangan
siamun-Mu, anjaha balosi Ham ma hanami.
- ⁶ (60-8) Domma marsahap Naibata ibagas
rumah-Ni na ma pansing! Marhasoman
surak-surak sihol do bagion-Ku Sikem anjaha
sibaron-Ku pamah Sukot.
- ⁷ (60-9) Ahu do simada Gilead, Manase pe Ahu do
simadasi; Efraim ai ma tudung ni ulung-Ku,
anjaha Juda tungkot ni harajaon-Ku;
- ⁸ (60-10) Moab do mangkuk parburihan Bangku,
anjaha hu Edom Husampakkon sipatung-Ku;
marsurak hamonangan do Ahu pasal
Palistim.
- ⁹ (60-11) Ise ma nani na mamboan Ahu hu huta
na toguh ai, ise ma na manogu Ahu das hu
Edom?
- ¹⁰ (60-12) Ai lang domma itulak Ham hanami, ale
Naibata, anjaha seng ra Ham, ale Naibata,
mangkasomani balanami?
- ¹¹ (60-13) Sai bere Ham ma partolongan bennami
dompak imbangnami, ai sisoya-soya do
partolongan ni jolma.

¹² (60-14) Marhasoman Naibata tardalankon hita do horja habanggalon, anjaha la sandiri do na manrojati imbangta.

Tonggo ni Halak na Tarbuang Mangkompok Raja

61 ¹ Bani pambobai koor. Marhasoman husapi. Humbani si Daud. (61-2) Tangihon Ham ma, ale Naibata, elek-elekku; parimbagaskon Ham ma tonggongku.

² (61-3) Humbani ujung ni tanoh on do dilo-dilo ahu Bamu ibagas uhurhu; togu Ham ma ahu hu dolog batu, na magijangtu bangku.

³ (61-4) Ai Ham do parlingodan bangku, batar-batar na toguh dompak munsuh.

⁴ (61-5) Sihol do ahu marianan bani lampolampo-Mu sadokah ni dokahni, sihol do ahu marlingod i toruh ni linggom ni habong-Mu. Sela.

⁵ (61-6) Tongon, Ham Naibata, itangar Ham do bagah-bagahku, domma ibere Ham hu bangku parbagianan ni sihabiari goran-Mu.

⁶ (61-7) Tambahi Ham ma ganjang ni ari-ari hubani goluh ni raja in, sai marsundut-sundut ma tahun ni goluhni.

⁷ (61-8) Sai marhotak ma ia i lobei ni Naibata sadokah ni dokahni, idop ni uhur ampa hasintongan ma bahen Ham manramotkonsi.

⁸ (61-9) Ase hudodingkon ma goran-Mu tongtong, anjaha hugalari bagah-bagahku ganup ari.

Sonang i Lambung ni Naibata

62 ¹ Bani pambobai koor. Hubani si Jedutun. Psalm humbani si Daud. (62-2) Pitah

mangkawah bani Naibata tumang do mambahen marhasonangan tonduyhu, humbani do roh haluahonku.

² (62-3) Pitah la do dolog batu pakon hatuahon bangku, la do batar-batar bangku, seng anjai tompas ahu.

³ (62-4) Piga dokah nari do sai dorab-dorab hanima bani sada halak, sihol manrumbakkonsi, ee hanima haganup, songon bani dingding na sihol jomba, bani tembok na sihol tompas?

⁴ (62-5) Manriahi do sidea laho manjulakkonsi humbani hagijangonni, rosuh do sidea bani ladung; marhitei pamanganni mamasu-masu sidea, hape mamapai do sidea ibagas uhurni. Sela.

⁵ (62-6) Pitah bani Naibata do ho marhasonangan, ale tonduyhu, ai hun Bani do roh pangarapanku.

⁶ (62-7) Pitah la do dolog batu pakon hatuahon bangku, la do batar-batarhu, seng anjai tompas ahu.

- ⁷ (62-8) Bani Naibata do maronjolan hatuahonku pakon hamuliaonku, batu gingging hagogohon bangku, ianan parlingodanku, ai ma Naibata.
- ⁸ (62-9) Sai hu Bani ma nasiam martenger ni uhur, ale jolma, lungkari ma uhur nasiam i lobei-Ni, Naibata do haporusan banta. Sela.
- ⁹ (62-10) Hosah tumang do anak ni jolma, sipaoto-oto anak ni manisia, ibagas timbangan mintor do sidea bonggal hu atas, hampungan do sidea humbani hosah tene.
- ¹⁰ (62-11) Ulang ma nasiam marpangajaman bani kuasa, ulang homa mangenjeng bani barang rampasan! Martambah-tambah pe habayakon, ulang ma dompak jai uhurmu!
- ¹¹ (62-12) Sahali marhata Naibata, dua pahara na tartangar ahu: Gok bani Naibata do hagogohon,
- ¹² (62-13) anjaha gok Bamu do Tuhan, idop ni uhur: Ham do mambalaskon bani pambahenanni.

Sihol ni Uhur bani Naibata

63 ¹ Psalm ni si Daud sanggah i halimisan Juda ia. (63-2) Ale Naibata, Ham do Naibatanku, na hupindahi, horahan do tonduyhu Bamu, siholan do dagingku Bamu songon tanoh na dorging anjaha na horah, na so marbah.

- ² (63-3) Sonai do i rumah-Mu na pansing in mangkawah ahu Bamu, sihol mangidah hagogohon-Mu ampa hamuliaon-Mu.
- ³ (63-4) Ai idop ni uhur-Mu dearan do ai ase hagoluhan; sai pujion ni bibirhu do Ham.
- ⁴ (63-5) Sonai ma, sihol do pujionku Ham sadokah ahu manggoluh, marhitei goran-Mu hupaherbang do tanganku dompak datas.
- ⁵ (63-6) Bosur do tonduyhu songon pambahen ni taboh-taboh ampa utok-utok ni holi-holi, marhitei bibir na marolob-olob mamuji-muji pamanganku.
- ⁶ (63-7) Sanggah hudingat Ham bani podomanku, marpingkir-pingkir pasal Ham sadokah runda borngin,
- ⁷ (63-8) Ham do pangurupi bangku ijai, anjaha tarbahen ahu marolob-olob ibagas linggom ni habong-Mu.
- ⁸ (63-9) Sai longkot do uhurhu Bamu, tangan-Mu siamun do na manjolom ahu.
- ⁹ (63-10) Tapi anggo sidea na manguhurhon hosahku, sai turun do sidea hu nagori toruh.
- ¹⁰ (63-11) Ondoskonon do sidea bani mata ni podang, gabe panganon ni sorigala do sidea.
- ¹¹ (63-12) Tapi raja in marmalas ni uhur do ibagas Naibata; Marolob-olob do sagala na marbulawan hu Bani, ai sipasipon do babah ni halak sihatahon ladung.

Uhum ni Naibata bani Munsuh Sipartahi-tahi

- 64** ¹ Bani pambobai koor. Psalm ni si Daud. (64-2) Tangihon Ham ma, alo Naibata, sorangku marhitei tangis-tangisku, ramotkon Ham ma goluhku humbani songgot-songgot ni munsuh!
- ² (64-3) Sai dingdingi Ham ma ahu dampak riah ni parjahat, dampak hageoron, na binahen ni halak na jungkat,
- ³ (64-4) na pamarot dilahni songon podang, na papinsur hatani na marbisa songon panah,
- ⁴ (64-5) laho manembak halak na so marsalah humbani parponopan; sompong do sidea manembak seng maralang-alang.
- ⁵ (64-6) Putus do uhur ni sidea mangkorjahon hajahaton, manriah do sidea manaon siding ponop-ponop, nini sidea, "Ise ma mangidah ai?"
- ⁶ (64-7) Hajahaton do ipingkiri sidea, ponop ibahen sidea ranggian ni sidea. Ah, ise ma na boi mandadap parbagas ampa uhur ni sidea jolma?
- ⁷ (64-8) Tapi itembak Naibata do sidea marhitei panah; na so panagaman do sidea ihonai.
- ⁸ (64-9) Majomba do sidea ibahen halani sahap-sahap ni sidea, mupir-upir do sagala na mangidah sidea.

- ⁹ (64-10) Jadi mabiar ma haganup halak; baritahonon ni sidea ma pambahenan ni Naibata, anjaha mangahap sidea bani na binahen-Ni.
- ¹⁰ (64-11) Marmalas ni uhur ma halak parpintor ibagas Jahowa, anjaha hu Bani ma ia marlingod, sai marmegah-megah ma haganup sipintor uhur.

**Doding Banggal ni Uhur halani
Pasu-pasu ni Naibata**

- 65** ¹ Bani pambobai koor. Psalm ni si Daud. Sada doding. (65-2) Ham do na patut sipujion, ale Naibata, i Sion, anjaha Bamu do sigalaron bagah-bagah.
- ² (65-3) Ham sitangihon tonggo, Bamu do roh sagala na manggoluh.
- ³ (65-4) Hasalahan do na manrungkub ahu; panlangaronnami Ham do na manasap in.
- ⁴ (65-5) Martuah ma halak na pinilih-Mu, na pinalopas-Mu roh dohor marianan i alaman-Mu. Sai bosur ma hanami ibahen hinadear ni rumah-Mu, rumah-Mu na pansing in.
- ⁵ (65-6) Marhatunggungan, domu hubani hapintoron, ibalosi Ham do hanami, ale Naibata ni hatuahonnami, hatengeran ni

sagala ujung ni tanoh on pakon laut na madaoh,

- ⁶ (65-7) na pajonamkon sagala dolog marhitei hagogohonni, na margonditkon hagogohon,
- ⁷ (65-8) na mambahen laut minop ampa parhasak ni gilumbangni, sonai homa halutuon ni bangsa-bangsa.
- ⁸ (65-9) Jadi mabiar ma halak na i ujung ni tanoh on mangidah halongangan-Mu, anjaha hapoltakan ampa hasundutan marolob-olob do ibahen Ham.
- ⁹ (65-10) Itohu Ham do tanoh in, anjaha marbah ibahen Ham, Ham do na mambahen bayak nornor in. Gok bah do bah tubuh ni Naibata, Ham do na pasirsir omei bani sidea. Tongon, sonon ma ibahen Ham pasirsirhonsi:
- ¹⁰ (65-11) Ham do na mangarbahi paninggalaanni, Ham do na manlumati olbakni. Ham do pagaburhon ai marhitei bah udan, anjaha Ham do na mamasu-masu suan-suananni.
- ¹¹ (65-12) Ham do na mansortalii partahunan marhitei dear layak-Mu, manektekkon minak do sagala bokas-Mu;
- ¹² (65-13) mombur do sampalan na i pamah, anjaha raboyon margonditkon olob-olob;
- ¹³ (65-14) marpakeian hulanan ni biribiri do sompalan, habungan-habungan

marhiouhon omei; marsurak-surak do sidea,
mandoding-doding tene.

**Doding Puji-pujian bani
Naibata na Paluahkon Israel**

- 66** ¹ Bani pambobai koor. Sada Psalm. Sada doding. Marolob-olob ma bani Naibata, nasiam haganup tanoh on.
- ² Dodingkon nasiam ma hamuliaon ni goran-Ni; sombahkon nasiam ma Bani puji-pujian na marmulia.
- ³ Hatahon nasiam ma bani Naibata, “Banggalni in sagala horja-Mu! Pangkorhon ni timbul ni hagogohon-Mu, ningon do marsombah hu Bamu sagala munsuh-Mu.
- ⁴ Ganup tanoh on marsombah do hu Bamu, sai dodingkononni do Ham, dodingkononni do goran-Mu. Sela.”
- ⁵ Roh anjaha tonggor nasiam ma pambahenan ni Naibata; gok kuasa do pambahenan-Ni dompak anak ni jolma.
- ⁶ Ipaubah do laut gabe na horah, mardalan nahei sidea mandipari bah mardalan; ijai marmalas ni uhur do hita marhiteihon-Si,
- ⁷ na manrajai tongtong marhitei hagogohon-Ni, na mangkawahkon sagala bangsa marhitei panonggor-Ni, ase ulang mangenjeng halak panggeori. Sela.

- ⁸ Puji ma, ale sagala bangsa, Naibatanami,
pabogeihon nasiam ma puji-pujian Bani!
- ⁹ Ia na mambahen hosahnami manggoluh, anjaha
seng ilopas naheinami tartolsu.
- ¹⁰ Tongon, domma iuji Ham hanami, alo Naibata,
domma ilobur Ham hanami songon na
manlobur pirak.
- ¹¹ Domma itogu Ham hanami hubagas jaring,
parrahut na poltik inahkon Ham bani
binongeinami.
- ¹² Ipaturut Ham do jolma margareta i atas
ulunami, domma masuk hanami hubagas
apuy pakon bah; tapi ipadarat Ham do
hanami bani na lumbang.
- ¹³ Masukanku ma rumah-Mu mamboan
galangan situtungon, galaronku ma Bamu
bagah-bagahku,
- ¹⁴ ai ma na niluarhon ni bibirhu, anjaha
pinarbagah ni pamanganku sanggah
tarsosak ahu.
- ¹⁵ Galangan situtungon na pinamombur
padasonku do Bamu, marhasoman misbou
ni galangan biribiri tunggal; sai pasirsironku
do Bamu lombu pakon hambing tunggal.
Sela.
- ¹⁶ Roh ma, tangar ma, nasiam haganup na
mangkabiari Naibata, ase hubaritahon
pambahen ni Naibata bani tonduyhu.

- 17 Hu Bani do dilo-dilo ahu marhitei pamanganku,
anjaha puji-pujian domma sirsir i atas
dilahku.
- 18 Ambit adong hajahaton hukawahkon ibagas
uhurhu, tontu seng tangihonon ni Tuhan
ahu.
- 19 Tongon, domma itangihon Naibata ahu,
domma iparuhurhon sora ni tonggongku.
- 20 Napuji ma Naibata, na so manulak tonggongku,
sonai homa idop ni uhur-Ni hu bangku.

Maningon Sagala Bangsa do Mamuji Naibata

- 67** ¹ Bani pambobai koor. Marhasoman
husapi. Sada Psalm, sada doding. (67-2)
Naibata ma na mangidopi hanami anjaha
na mamasu-masu hanami, la ma na
manondangkon bohi-Ni hu bennami,
- ² (67-3) ase ibotoh halak na i tanoh on dalan-Mu,
anjaha ibotoh sagala bangsa hatuahon-Mu.
- ³ (67-4) Sai pujion ni sagala bangsa do Ham, ale
Naibata, sai pujion ni sagala bangsa do Ham.
- ⁴ (67-5) Sai marmalas ni uhur anjaha marolob-
olob do sagala bangsa, halani Ham do
na manguhum bangsa-bangsa ibagas
hapintoron, anjaha Ham do na manogu-
nogu sagala bangsa i atas tanoh on.
Sela.

- ⁵ (67-6) Sai pujion ni sagala bangsa do Ham, ale Naibata, sai pujion ni sagala bangsa do Ham.
- ⁶ (67-7) Domma ibere tanoh gogohni, ipasu-pasu Jahowa, Naibatanta do hita.
- ⁷ (67-8) Ipasu-pasu Jahowa do hita, jadi mabiar ma ganup ujung ni tanoh on mangidah-Si.

Doding Puji-pujian Pasal Hamonangan ni Naibata

- 68** ¹ Bani pambobai koor. Psalm ni si Daud. Sada doding. (68-2) Jongjong do Naibata, mambur merap ma munsuh-Ni, anjaha maporus na mandomdomi-Si hun lobei-Ni.
- ² (68-3) Songon timus na niombuskon, sonai do iombuskon sidea; songon lilin malala bani apuy, sonai do bois sagala parjahat i lobei ni Naibata.
- ³ (68-4) Tapi parpintor marmalas ni uhur anjaha marolob-olob do i lobei ni Naibata, anjaha marsurak-surak do sidea ibagas malas ni uhur.
- ⁴ (68-5) Dodingkon nasiam ma Naibata, puji nasiam ma goran-Ni. Bahen nasiam ma dalan Bani na margareta i halimisan. Jahowa do goran-Ni, marolob-olob ma nasiam i lobei-Ni.
- ⁵ (68-6) Ia do Bapa ni na tading maetek, anjaha Panguhum bani na mabalu. Ia do Naibata i rumah-Ni na pansing in.

- ⁶ (68-7) Naibata do na pajabuhon halak na tarpunjung, na padaratkon halak na tartutup hu hadoharon, tapi sipanlawan tading do bani tanoh dorging-dorging.
- ⁷ (68-8) Ham Jahowa, sanggah na luar Ham i lobei ni bangsa-Mu, sanggah langkah-langkah Ham i halimisan. Sela.
- ⁸ (68-9) Dugur do tanoh on, langit manguseihon udan i lobei ni Naibata; age Dolog Sinai duyug do i lobei ni Naibata, Naibata ni Israel.
- ⁹ (68-10) Layak do Ham mambere udan, Ham Naibata, anjaha ipahisar Ham do tanoh parbagianan-Mu sanggah loja.
- ¹⁰ (68-11) Marianan do ijai siminik-Mu, iparmudu Ham do, ale Naibata, halak na madoyuk marhitei dear layak-Mu.
- ¹¹ (68-12) Tuhan manluarhon hata-Ni; doskon bala na buei do naboru siparambilan na mader.
- ¹² (68-13) Raja-raja ni sagala bala, maporus do sidea. Inang i rumah marbagi taban-taban.
- ¹³ (68-14) Sai sohsoh nasiam i holangkolang ni harang-harang? Habong ni asas domma ilampis bani pirak, ambuluni maromas na gorsing.
- ¹⁴ (68-15) Sanggah ipaerap Pargogoh Na So Tarimbang in sagala raja ijai, turun ma salju i atas ni Dolog Salmon.

- ¹⁵ (68-16) Dolog ni naibata-naibata, ai ma Dolog Basan, dolog sibuei pakpak do Dolog Basan ai.
- ¹⁶ (68-17) Mase ma serleng matanima, hanima ale dolog sibuei pakpak, mangidah dolog na pinilih ni Jahowa gabe ianan-Ni? Tongon, Jahowa do mangiankon ai sadokah ni dokahni.
- ¹⁷ (68-18) Gareta ni Naibata marlaksa-laksa anjaha marhagogohon; Tuhan roh hun Sinai masuk hu rumah-Ni na ma pansing.
- ¹⁸ (68-19) Domma tangkog Ham hu atas, mamboan taban-taban; domma ijalo Ham parsombahon marrupa jolma, gari halak sipanlawan tunduk do Bamu, Ham Naibata Jahowa.
- ¹⁹ (68-20) Napuji ma Tuhan in ganup ari! Ia do na mangusung hita, Naibata do hatuahonta. Sela.
- ²⁰ (68-21) Naibata banta, ai ma Naibata parbansahan, gok bani Jahowa Naibata do haluahon humbani hamatean.
- ²¹ (68-22) Tongon, sai rosakan ni Naibata do ulu ni munsuh-Ni, tangkurak ni halak sihorjahon hajahaton.
- ²² (68-23) Domma ihatahon Tuhan, "Hun Basan do sidea paulakon-Ku, boanon-Ku do sidea mulak hun laut na bagas,

- ²³ (68-24) ase marburih naheimu ibagas daroh,
anjaha dilah ni baliangmu marrupe
humbani munsuh.”
- ²⁴ (68-25) Domma ididah halak odoran-Mu, Ham
Naibata, parmasuk ni Naibatanku ampa
Rajangku hubagas ianan na ma pansing in.
- ²⁵ (68-26) I lobei mardalan pandoding, i pudi ni
parhusapi, i tongah-tongah anak boru na
manggual tambur.
- ²⁶ (68-27) Marhitei koor ipuji sidea Naibata,
Tuhan in, sidea na humbani bah tubuh ni
Israel.
- ²⁷ (68-28) Ijai do si Benjamin, sianggian,
panrajai ni sidea, pangintuai ni Juda
rapkon hulananni, pangintuai ni Sebulon,
pangintuai ni Naptali.
- ²⁸ (68-29) Tongos Ham ma hagogohon-Mu, ale
Jahowa; patuduhkon Ham ma gogoh-Mu,
Ham Naibata, Ham na dob mangkopkop
hanami.
- ²⁹ (68-30) Halani rumah-Mu, na i Jerusalem,
marrohan do raja-raja na manaruhkon
sibere-bere hu Bamu.
- ³⁰ (68-31) Sorgangi Ham ma binatang na bani
arung-arung ai, hulanan ni lembu jonggi
ampa anak ni lembu ni bangsa-bangsa;
rojati Ham ma na impolan bani pirak,

paerap Ham ma bangsa na mangkarosuhkon porang.

³¹ (68-32) Roh ma parkuasa hun Masir, halak Etiopia pe manurdukkon tanganni hubani Naibata.

³² (68-33) Nasiam sagala harajaon na i tanoh on, dodingkon nasiam ma Naibata, puji nasiam ma Tuhan! Sela.

³³ (68-34) Ia na margareta i langit, langit na basaia; Tonggor ma, pagomohon-Ni ma sora-Ni, sora-Ni na maling in.

³⁴ (68-35) Tanda ma hagogohon ni Naibata! Hamuliaon-Ni do manggomgom Israel, anjaha kuasa-Ni mangatasi hambun.

³⁵ (68-36) Marhajombuton do Naibata manrajai hambani ianan-Ni na ma pansing in; Naibata ni Israel do ia, ia do sibere kuasa ampa hagogohon hubani bangsa-Ni. Napuji ma Naibata!

Tonggo ni Halak na Mamponkutkon Harosuh ni Naibata

69 ¹ Bani pambobai koor. Inggouni: Bunga silundat. Humbani si Daud. (69-2) Paluah Ham ma ahu, alo Naibata, ai domma das ronsi bibirhu bah.

- ² (69-3) Mogap do ahu hubagas hubang na bagas, seng dong hajongjongan; tinob do hu toruh hubagas bah, anjaha iayubkon arus do ahu.
- ³ (69-4) Loja do ahu halani doruh-doruhku, marsohal tolonanku; marholok do matangku halani paima-imahon bani Naibatanku.
- ⁴ (69-5) Bueinan do humbani jambulanku sidea, na mardomdom bangku seng marhala; na gogoh-gogoh do sidea na sihol mansedahon ahu, na manlawan marhitei ladung; age na so hurampas ipaksa do ahu paulakkon.
- ⁵ (69-6) Ham Naibata, ibotoh Ham do haotoonku, anjaha salah na hubahen seng ponop hum Bamu.
- ⁶ (69-7) Sai ulang ma bador halani ahu sagala na marpangarapan Bamu, Ham Naibata Zebaot. Sai ulang ma maila halani ahu, sagala na mangindahi Ham, alo Naibata ni Israel.
- ⁷ (69-8) Ai halani Ham do ahu bilei; anjaha hailaon do manrungkub bohingku.
- ⁸ (69-9) Jadi halak na legan do ahu bani saninanku, halak na so tinanda bani anak ni inang.
- ⁹ (69-10) Ai pongkut ni uhur bani rumah-Mu do mangankon ahu, anjaha ompas hu bangku risa-risa ni na manrisai Ham.

- ¹⁰ (69-11) Huarsik do tonduyhu marhitei na marpuasa, hape gabe habileion do ai bangku.
- ¹¹ (69-12) Husorongkon do bangku pusok ni uhur, tapi gabe umpama do ahu ibahen sidea.
- ¹² (69-13) Gabe sihata-hataon ni halak na hundul i horbangan do ahu, sisalig-saligan bani halak parmabuk.
- ¹³ (69-14) Tapi anggo ahu, hu Bamu do ahu martonggo, Ham Jahowa, bani panorang na dearhonsi, Ham Naibata, sai tangihon Ham ma ahu romban hubani idop ni uhur-Mu na bangga in, ampa pangurupimu na totap in.
- ¹⁴ (69-15) Sai paluah Ham ma ahu humbagas hubang, ase ulang mogap ahu; sai paluah Ham ma ahu humbani na mandomdomi ahu, humbagas laut na bagas.
- ¹⁵ (69-16) Sai ulang ma mayub ahu ibahen bah bangga, ulang ma ibondut luhung ahu, barang itutup parigi babahni i babouhu.
- ¹⁶ (69-17) Sai tangihon Ham ma ahu, ale Jahowa, domu hubani bangga ni idop ni uhur-Mu, dompakkon Ham ma ahu romban hubani bangga ni holong ni atei-Mu.
- ¹⁷ (69-18) Ulang ma ponopkon Ham bohi-Mu dompak juakjuak-Mu; ai rusak do ahu, oloskon Ham ma mangurupi ahu.

- ¹⁸ (69-19) Roh ma Ham hundohor bani tonduyhu, paluah Ham ma in; sai paluah Ham ma ahu halani munsuhku.
- ¹⁹ (69-20) Itanda Ham do hahirionku, habileian pakon habadoronku; ilobei ni panonggor-Mu do ganup imbangku.
- ²⁰ (69-21) Habadoron ai do mambahen rosak uhurhu, anjaha mandolei do ahu. Tarpaima-ima do ahu bani halak parholong atei, hape seng dong, sonai age bani sipangapohi, hape seng jumpah.
- ²¹ (69-22) Rasun do ibere sidea panganonku, anjaha sanggah na horahan ahu, na migar do ipainumkon bangku.
- ²² (69-23) Sai gabe jarot ma meja ni sidea i lobeini, anjaha horja-horja ni sidea gabe tirangkap.
- ²³ (69-24) Sai solong ma mata ni sidea, ulang marpangidah; hitir-hitir ma binongei ni sidea bahen Ham lalab.
- ²⁴ (69-25) Useihon Ham ma bani sidea ringis-Mu, anjaha gajag ni gila-Mu ma manoroh sidea.
- ²⁵ (69-26) Sai halong ma bahen Ham huta ni sidea, anjaha ulang be marisi lampolampo ni sidea.
- ²⁶ (69-27) Ai iayak-ayak sidea do halak na niajar-Mu, anjaha ipabanggal sidea do naborit ni halak na niugahan-Mu.

- ²⁷ (69-28) Tambahkon Ham ma na salah bani salah ni sidea, ulang ma dapotan hapintoron sidea hun Bamu.
- ²⁸ (69-29) Sai sasap ma goran ni sidea humbani buku hagoluhan, ulang ma tarsurat sidea rap pakon halak parpintor.
- ²⁹ (69-30) Tapi anggo ahu, madoyuk do anjaha marsik do; haluahon na hun Bamu ma, alo Naibata, na mandingdingi ahu.
- ³⁰ (69-31) Pujionku ma goran ni Naibata marhitei doding, anjaha pasangaponku ma la marhitei doding puji-pujian;
- ³¹ (69-32) ai do harusuh ni Jahowa lobih humbani anak ni lombu, lobih humbani lombu jonggi na martanduk anjaha na martambirik.
- ³² (69-33) Tonggor ma, nasiam ganup na masombuh, malas ma uhur nasiam; nasiam sipindahi Naibata, sai mulak ma hinsah uhur nasiam.
- ³³ (69-34) Ai itangihon Jahowa do na masombuh, anjaha seng mapas la bani na tarbuang.
- ³⁴ (69-35) Sai ipuji langit pakon tanoh ma la, sonai age laut pakon sagala na manjulur ibagas.
- ³⁵ (69-36) Ai Naibata do sihol paluahkon Sion, anjaha pajongjongon-Ni do sagala huta ni Juda; marianan ma sidea ijai anjaha sidea simadasi;

³⁶ (69-37) ginompar ni juakjuak-Ni maneansi use, anjaha na mangkaholongi goran-Ni mangiankon ai.

Tonggo Mangindo Partolongan

(Pausih: Ps. 40:14-18)

- 70** ¹ Bani pambobai koor. Humbani si Daud. Sanggah na mamboan galangan dahupa. (70-2) Ham Naibata, tarolos ma Ham paluahkon ahu, Ham Jahowa, podas Ham ma mangurupi ahu.
- ² (70-3) Sai tarbador anjaha maila ma siuhurhon hosahku. Sai surut ma hu pudi anjaha tarbador ma sagala na mangkamalaskon hamagouanku.
- ³ (70-4) Sai manginsurut ma sidea halani tarbador, sidea na mangkatahon, “Eeh, mahua do, mahua do!”
- ⁴ (70-5) Sai marolob-olob anjaha marmalas ni uhur ma ibagas Ham sagala na mangindahi Ham, sai tongtong ma hatahonon ni na mangkasiholi hatuahon-Mu, “Banggal do Jahowa!”
- ⁵ (70-6) Tapi madoyuk do ahu anjaha masombuh; Ham Naibata, papodas Ham ma roh hu bangku! Ham do pangurupi anjaha sipaluah bangku; Ham Jahowa, ulang ma padokah-dokah Ham.

**Tonggo Mangindo Pangapition
bani Panorang Matua**

- 71** ¹ Bamu do, Ham Jahowa ahu marlingod,
ulang lopas Ham ahu bador lalab.
- ² Pabansah Ham ma ahu halani hapintoron-Mu,
anjaha paluah Ham ma ahu; paeleng Ham
ma pinggol-Mu bangku, anjaha urupi Ham
ma ahu.
- ³ Ham ma gabe dolog batu parlingodan bangku,
benteng na toguh bahen haluahonku;
tongon, Ham do dolog batu ampa
batar-batar bangku.
- ⁴ Ham Naibatanku, sai paluah Ham ma ahu
humbani tangan ni parjahat, humbani
tangan ni pargeduk pakon sibahen paksa.
- ⁵ Ham do pangarapanku Tuhan; Ham
Jahowa, hatengeran ni uhurhu humbani
sietek-etekonku nari.
- ⁶ Ham do pangunsandeianku humbani partapaan
nari, humbani boltok ni inang nari Ham
do pangurupi bangku, Ham do tongtong
sipujionku.
- ⁷ Gabe halongangan do ahu bani buei halak,
halani Ham do haporusanku na toguh.
- ⁸ Sai gok do pamanganku bani puji-pujian Bamu,
gok hahormaton Bamu manipat ari.

- ⁹ Ulang ma ambukkon Ham ahu dob matua;
bani na lambin bois gogohku, ulang ma
tadingkon Ham ahu.
- ¹⁰ Ai ipahata-hata munsuhku do ahu, halak na
manguhurhon hosahku manriahi,
- ¹¹ nini sidea, “Domma itadingkon Naibata ia,
ayak-ayak anjaha tangkap ma ia, seng dong
be na paluahkonsi.”
- ¹² Ham Naibata, sai ulang ma ganggang Ham
humbangu, Ham Naibatangu, papodas
Ham ma mangurupi ahu.
- ¹³ Sai maila anjaha magou ma sidea na
mamunsi ahu; sai tarbador anjaha
masese ma sidea na mangindahi
hamagouanku.
- ¹⁴ Tapi anggo ahu, tongtong do marpangarapan,
anjaha papuji-pujionku do Ham.
- ¹⁵ Sai baritahononkon ni pamanganku do
hapintoron-Mu, sonai haluahon na hun
Bamu ari-ari, ai seng tarbilangi ahu ai.
- ¹⁶ Roh do ahu, mangunsagahkon hagogohon
ni Jahowa, mambaritahon hapintoron,
hapintoron-Mu tumang.
- ¹⁷ Ham Naibata, Ham do mangajari ahu
humbani sietek-etekon nari, ronsi sonari
sai huambilankon do halongangan na
binahen-Mu.

- 18 Age ronsi matua ahu anjaha lopak ubanku,
Ham Naibatanku, ulang ma tadingkon
Ham ahu; ase huambilankon pambahenan
ni tangan-Mu bani sundut on, sonai
hagogohon-Mu bani ginompar na sihol roh.
- 19 Age hapintoron-Mu, na das ronsi langit ai, Ham
Naibata, Ham sibahen halongangan banggal,
ise ma na songon Ham, ale Naibata?
- 20 Ham, na dob padageihon bennami hasosakan
pakon parmaraan, sai pagoluhon-Mu do
hanami use, sai panaikon-Mu do hanami
use humbagas luhung-luhung ni tanoh on.
- 21 Sai tambahan-Mu do habanggalonku, anjaha
sai apohon-Mu do ahu.
- 22 Jadi ahu pe, sai pujionku do Ham marhitei
arbap, halani hasintongan-Mu, ale Naibata;
sai dodingkononku do Ham marhitei husapi,
Ham na ma pansing ni Israel.
- 23 Marolob-olob do bibir hubani na mandoding-
doding ahu Bamu, age tonduyhu na dob
pinaluah-Mu.
- 24 Dihut do dilahku, mansahap-sahapkon
hapintoron-Mu ari-ari, ai domma maila
anjaha tarbador na manguhurhon
hamagouanku.

Tonggo Mangkopkop Raja

- 72** ¹ Humbani si Salomo. Ham Naibata, sai bere
Ham ma panguhumion-Mu bani raja, pakon
hapintoron-Mu bani anak ni raja,
² ase ibotoh manguhum bangsa-Mu ibagas
hapintoron, ampa halak na madoyuk domu
hubani uhum.
³ Sai mamboan hadameion ma sagala dolog bani
bangsa in, anjaha buntu-buntu mamboan
hapintoron.
⁴ Sai ipintori ma halak na madoyuk i tongah-
tongah ni bangsa in. Sai ipaluah ma
sagala halak na masombuh, anjaha iropuki
sipangodoh-odoh.
⁵ Sai songon mata ni ari ma dokah ni umurni,
anjaha songon bulan ma ia layur
marsundut-sundut.
⁶ Songon udan na madabuh bani poyon-poyon
ma ia, songon udan neinei na mangarbahi
tanoh.
⁷ Sai martumbor ma hapintoron bani panorangni,
anjaha gok hadameion, ronsi seng dong be
bulan.
⁸ Manggomgomi ma ia hun laut das hu laut,
humbani Bah Eprat das hu tampilan ni
tanoh on.

- ⁹ Marsombah ma hubani imbang-imbangni,
anjaha sagala munsuhni mandilat tanoh.
- ¹⁰ Raja ni Tarsis pakon sagala pulou mamboan
sibere-bere bani, raja Seba pakon Etiopia
mambere sohei.
- ¹¹ Manrogop ma sagala raja manombahsi, anjaha
ganup bangsa mangidangisi.
- ¹² Tongon, sai paluahonni do halak na masombuh,
na mangindo pangurupion ni halak na
madoyuk ampa halak na so dong pangurupi
bani.
- ¹³ Maidop do uhurni bani halak na malumat
pakon na musil, anjaha paluahonni do
tonduy ni halak na masombuh.
- ¹⁴ Paluahonni do hosah ni sidea humbani
panokohon pakon pangkilangon, harga
tumang do daroh ni sidea bani panonggorni.
- ¹⁵ Sai manggoluh ma ia, anjaha ibere ma hubani
omas na hun Seba; anjaha sitonggoonkon do
ia tongtong, ganup panorang sipasu-pasuon
do ia.
- ¹⁶ Sai junah ma omei i tanoh in, das bani pakpak
ni dolog; martumbor ma buahni songon
Libanon, anjaha manggargar ma buyurni
songon poyon na i talun.
- ¹⁷ Sai totap ma goranni lanjar, sadokah dong
mata ni ari sai tarbarita ma goranni; sai
dapotan pasu-pasu ma marhiteihonsi sagala

- bangsa, anjaha parhatuahon ni sidea ma ia.
 Napuji ma Jahowa Naibata ni Israel,
¹⁸ sahalak-Si do sibahen halongangan.
¹⁹ Anjaha na puji ma goran-Ni na marmulia in
 sadokah ni dokahni, gok hamuliaon-Ni ma
 sab tanoh on. Amen, alo Amen.
²⁰ Marpunsa ma tonggo ni si Daud, anak ni si Isai.

**Uhur na Sungkun-sungkun
 Pasal Hadoharon ni Halak Parjahat**

(Pausih: Ps. 37; 49; Buku Job)

- 73** ¹ Psalm ni si Asap. Tongon, mardear layak
 do Naibata bani Israel, bani halak na borsih
 maruhur.
² Tapi anggo ahu, narus do jiris naheihu, narus do
 ahu targompang.
³ Ai simburu do uhur hubani sigijang uhur,
 mangidah marhasonangan halak parjahat.
⁴ Seng borit-boritan sidea, jorgit anjaha tambos
 do angkula ni sidea.
⁵ Seng mangonai bani sidea sunsah ni hajolmaon,
 anjaha seng ihonai na marsik sidea songon
 halak na legan.
⁶ Halani ai marsinongkok gijang ni uhur do sidea,
 anjaha marhiouhon panipuon.
⁷ Halani hamomburonni marsual-sual do
 hajahaton humbani sidea, linir do na
 masambor humbani uhur ni sidea.

- ⁸ Manrisai do sidea, anjaha mansahap-sahapkon hajahaton, marhasoman pangenjengon idalankon ondam-ondam.
- ⁹ Ipatanggak sidea do babahni das hu langit, anjaha maor-aor do dilahni i tanoh on.
- ¹⁰ Halani ai marbalik do bangsa in mangirikkon sidea, anjaha isobur hata ni sidea ai songon bah.
- ¹¹ Sai ihatahon sidea do, “Sonaha ma pambotoh ni Naibata? Ai dong habotohon ni Na Timbul in?”
- ¹² Tonggor ma, sonai do halak parjahat, marsonang-sonang lalab, lambin junjun habayakonni.
- ¹³ Jadi soya-soya do hape hupaborsih uhurhu, huburihi tanganku tanda lang marpipot.
- ¹⁴ Ai marsitaronon do ahu ari-ari, anjaha hona pinsang ahu siap sogod.
- ¹⁵ Porini ningku, “Songon sidea ma parsahapku, tonggor ma, ginompar ni anakmu do na hutahihon ijai.”
- ¹⁶ Tapi sanggah marpingkir-pingkir ahu, laho mangarusi ai, gabe naborit do ai bani panonggorhu,
- ¹⁷ paima masuk ahu hubani ianan ni Naibata na pansing in, laho manangkas-nangkasi ujung ni sidea.

- 18 Tongon, bani ianan na landit do ipajongjong
Ham sidea, ipaturut Ham do sidea madabuh
hubagas hakahouon.
- 19 Ibagas sangkidop mata do sidea magou, bois
anjaha masab do sidea, majangin tumang.
- 20 Masab do sidea songon nipi sanggah puho,
anjaha lupa do halak bani rupani.
- 21 Sanggah marmongot-mongot uhurhu, anjaha
songon na itobak-tobak piah-piahku,
- 22 maoto do ahu anjaha seng marpangarusion,
songon na so maruhur do ahu i lobei-Mu.
- 23 Tapi sai tongtong do ahu rapat pakon Ham,
ijolom Ham do tanganku siamun.
- 24 Itogu Ham do ahu marhitei sura-sura-Mu,
anjaha jaloon-Mu do ahu hu hasangapon.
- 25 Ise ma hasomanku i nagori atas? Sobali Ham
seng dong iharosuhkon uhurhu i tanoh.
- 26 Age pe lambin melus badanku pakon uhurhu,
batar-batar bani uhurhu ampa rupeihi, ai
ma Naibata sadokah ni dokahni.
- 27 Tongon, sai na magou do na paganggang dirini
hun Bamu, sai boiskonon-Mu do sagala na
marbalik hun Bamu.
- 28 Tapi anggo ahu, hatuahon do bangku na
dohor ai bani Naibata; Jahowa do hubahen
hatengeran ni uhurhu, sai baritahononku do
pambahenan-Ni ganup.

**Tonggo Tangis-tangis Pasal
Parseda ni Rumah Panumbahan**

- 74** ¹ Doding podah hambani si Asap. Mase ma, Ham Naibata, itulak Ham hanami lalab, gajag ringis-Mu dompak biribiri na pinarmahan-Mu?
- ² Sai ingat Ham ma kuria-Mu, na binangkuhon-Mu hambani sapari nari, na tinobus-Mu gabe bangsa parbagianan-Mu; Dolog Sion on, na niianan-Mu.
- ³ Tujuhon Ham ma langkah-Mu dompak na dob dokah maseda in, haganup do iparseda munsuh i rumah na pansing in.
- ⁴ Marsurak do imbang-Mu bani ianan partumpuan, ipajongjong sidea do mandera bahen partinandaan.
- ⁵ Songon halak na mangalbangkon hapakni i harangan laho manrimbas hayu anak, sonai do sidea idahon;
- ⁶ hapak pakon martil do ipangantukkon sidea bani uhir-uhiran-Mu, ase mangkaseda;
- ⁷ isurbuy sidea do rumah-Mu na pansing in, ibutaki sidea ianan ni goran-Mu das ronsi onjolanni.
- ⁸ Nini sidea do ibagas uhurni, “Boiskon hita ma haganup.” Domma isurbuy sidea haganup rumah panumbahan i nagori on.

- ⁹ Partanda bennami seng dong ididah hanami
be, seng dong be nabi, anjaha seng ibotoh
hanami atap piga dokah on.
- ¹⁰ Piga dokah nari, Ham Naibata, sai mapas
munsuh in? Maningon pahirion ni munsuh
mando goran-Mu lanjar?
- ¹¹ Mase ma itarik Ham tangan-Mu? Mase ma
marlompit tangan Ham?
- ¹² Tapi Rajangku do Naibata humbani nabasaia,
la do mambahen haluahon i tanoh on.
- ¹³ Ham do mambolah laut marhitei gogoh-Mu,
irosaki Ham do ulu ni naga ibagas bah.
- ¹⁴ Ham do manrosaki ulu ni naga, ibere Ham do
ai panganon ni binatang na i halimisan.
- ¹⁵ Ham do parohkon bah tubuh pakon bah
banggal, Ham do pahorah bah banggal na so
ongga horah.
- ¹⁶ Ham do simada arian pakon borngin; Ham do
pajonamkon na lihar pakon mata ni ari.
- ¹⁷ Ham do manotapkon parbalogan ni tanoh;
Ham do mangadongkon musim logou ni ari
pakon musim udan.
- ¹⁸ Ingat Ham ma: Munsuh do na pahirihon
in, Ham Jahowa, ampa bangsa na oto
mangapasi goran-Mu.
- ¹⁹ Ulang ma padas Ham hosah ni kuhuy-Mu bani
binatang; ulang ma lalab lupa Ham bani
goluh ni siminik-Mu na marsik in.

- ²⁰ Dingat Ham ma padan in; ai gok pangkilangon do longkit-longkit ni nagori on.
- ²¹ Ulang ma paturut Ham bador halak na niodoh-odoh; lопас Ham ma halak na masombuh pakon na madoyuk mamuji goran-Mu.
- ²² Jongjongkon Ham ma, ale Naibata, dalankon Ham ma kuasa-Mu! Ingat Ham ma parpahiri ni na oto in Bamu.
- ²³ Ulang ma lupa Ham bani parsurak ni munsuh-Mu, bani oga-oga ni imbang-Mu na tongtong martimburak in.

Naibata, Panguhum na Pintor

- 75** ¹ Bani pambobai koor. Inggouni: Ulang parseda. Psalm humbani si Asap. Sada doding. (75-2) Ipuji hanami do Ham, ale Naibata, ipuji hanami do Ham, anjaha sidilo goran-Mu do mambaritahon halongangan na binahen-Mu.
- ² (75-3) Tongon, bani panorang na hutotapkon, dalankononku do uhum ibagas hasintongan.
- ³ (75-4) Dugur pe tanoh on ampa na mangiankansi, tapi anggo Ahu domma totap hubahen onjolanni. Sela.
- ⁴ (75-5) Ningku do dompak sigijang uhur, “Ulang gijang uhurmu!” anjaha dompak halak

parjahat, “Ulang pagijang tandukmu! Ulang pagijang tandukmu,

⁵ (75-6) ulang hatahon hajungkaton dompak Batu Gingging in.”

⁶ (75-7) Ai sedo hun hapoltakan atap hun hasundutan, sedo hun halimisan roh ni hatimbulon;

⁷ (75-8) ai Naibata do panguhum, la do patoruh na sada, la patimbul na sada nari.

⁸ (75-9) Tongon, i tangan ni Jahowa do panginuman, marisi anggur na gurgur, na niraruan; painumkonon-Ni ma in, ningon inumon ni sidea ronsi paradni, maningon minum ganup halak parjahat i tanoh on.

⁹ (75-10) Tapi anggo ahu marolob-olob do sadokah ni dokahni, dodingkononku do Naibata ni si Jakob.

¹⁰ (75-11) Upokkonon-Ni do ganup tanduk ni halak parjahat, tapi pagijangon do ia tanduk ni halak parpintor.

Naibata Panguhum ni Tanoh on

76 ¹ Bani pambobai koor. Marhasoman husapi. Psalm humbani si Asap. Sada doding. (76-2) Tarbarita do Naibata i Juda, timbul do goran-Ni i Israel.

² (76-3) Adong do i Salem lampolampo-Ni, anjaha i Sion ianan-Ni.

- ³ (76-4) Ijai do iponggolhon panah na marapuy.
Sonai gantar, podang pakon parugas
marmunsuh. Sela.
- ⁴ (76-5) Marhidoratan anjaha marmuliaan do
Ham, humbani dolog sisadokah ni dokahni.
- ⁵ (76-6) Hona taban do halak na barani
marmunsuh, renges do sidea modom,
anjaha sagala puanglima lenduk tanganni.
- ⁶ (76-7) Halani asup-asup-Mu, alo Naibata ni si
Jakob, renges do modom pargareta sonai ge
hudani.
- ⁷ (76-8) Jombut tumang do Ham, mintor ise ma
na pag jongjong i lobei-Mu bani panomboh
ni ringis-Mu?
- ⁸ (76-9) Hun nagori atas do ipabogei hon Ham
uhur-Mu, gabe mabiar ma tanoh on anjaha
jonong,
- ⁹ (76-10) bani panorang ni Naibata jongjong
mandabuh uhum, laho paluahkon na
madoyuk i tanoh on. Sela.
- ¹⁰ (76-11) Tongon, ringis ni jolma pe gabe
puji-pujian do Bamu, anjaha igonditkon
Ham do Bamu teba-teba ni ringis ni sidea.
- ¹¹ (76-12) Bahen ma bagah-bagahmu anjaha
galari ma ai bani Jahowa Naibatamu. Nasiam
sagala na manginggotisi, padas nasiam ma
sombah-sombah Bani Na Majombut in.

¹² (76-13) Ia do na paunduk paruhuron ni na sangap-sangap, marjumbalang do la bani parkuasa ni tanoh on.

Apoh-apoh halani Taringat bani Pambahen ni Naibata

77 ¹ Bani pambobai koor. Bani si Jedutun. Psalm humbani si Asap. (77-2) Bani Naibata do laho sorangku, dilo-dilo do ahu hu Bani, bani Naibata do laho sorangku, ase itangihon ahu.

² (77-3) Bani ari hasosakanku hupindahi do Tuhan; sai herbang do tanganku borngin seng marnamangadi; seng ra tarapoh tonduyhu.

³ (77-4) Taringat do ahu bani Naibata, gabe morong ma ahu; marpingkir-pingkir, gabe hurleh ma tonduyhu. Sela.

⁴ (77-5) Ipaturut Ham do bodak matangku, gabe bulinsah ma ahu, seng boi marsahap.

⁵ (77-6) Sai hupinghiri do panorang na basaia, taringat do ahu bani tahun na dob dokah salpu.

⁶ (77-7) Marsahap-sahap do ahu ibagas uhurhu borngin, marpingkir-pingkir do ahu anjaha manulimati tonduyhu.

- ⁷ (77-8) Mintor sadokah ni dokahni ma nani mangambukkon Tuhan, seng ulakan-Ni be nani maridop ni uhur?
- ⁸ (77-9) Sadokah ni dokahni ma nani rotap idop ni uhur-Ni, anjaha mintor masab ma bagah-bagah-Ni lanjar?
- ⁹ (77-10) Mintor lupa ma nani Naibata marontou ni uhur, atap na dob tarkunsi ma nani holong ni atei-Ni halani ringis-Ni? Sela.
- ¹⁰ (77-11) Jadi ningku do, "On do na papusok uhurhu, na mubah ai pambahenan ni Na Tang Sitimbulan in."
- ¹¹ (77-12) Sai dingatonku do pambahenan ni Jahowa; sai dingatonku do halongangan, na binahen-Mu humbani na basaia.
- ¹² (77-13) Sai sahap-sahapkononku do sagala lahoan-Mu, anjaha sai hupingkir-pingkiri do pambahenan-Mu.
- ¹³ (77-14) Ham Naibata, pansing do dalan-Mu; ise ma sisombahon, na marhabanggalon songon Naibata?
- ¹⁴ (77-15) Ham do Naibata sihorjahon halongangan, domma ipataridahkon Ham gogoh-Mu bani bangsa-bangsa.
- ¹⁵ (77-16) Domma ipaluah Ham bangsa-Mu marhitei tangan-Mu, anak ni si Jakob pakon si Josep. Sela.

- ¹⁶ (77-17) Domma ididah sagala bah Ham, ale Naibata, domma ididah bah Ham, gabe godor, anjaha luhung pe hitir-hitir.
- ¹⁷ (77-18) Manguseihon bah do sagala hombun, mardobur longgur i awang-awang, anjaha panah-Mu mardejeb-dejeb.
- ¹⁸ (77-19) Marnunut do maraloling longgur-Mu, hilap-Mu pasiang dunia on, dugur anjaha duyug do tanoh on.
- ¹⁹ (77-20) Mardalan do Ham hun laut, bah bangga pasar-Mu, tapi ise pe lang manandai bokas-Mu.
- ²⁰ (77-21) Ham do na manogu bangsa-Mu songon hulanan ni biribiri, marhitei tangan ni si Musa pakon si Aron.

Podah humbani na dob Masa

- 78** ¹ Doding podah humbani si Asap. Tangihon nasiam ma, ale bangsangku, podahku, tarehon ma pinggol nasiam hubani hata ni pamanganku.
- ² Sihol do buhaonku pamanganku mangkatahon umpama, sihol do patalaronku rusia humbani panorang na basaia.
- ³ Na dob binogeinami ampa binotohnami, na tinuri-turihon ni na lobeita hu bennami.
- ⁴ Seng bulih ponopkononnami ai bani niombah ni sidea, tapi maningon baritahononkon

do bani sundut na mangihut; ai ma pambahenan sipasangap Jahowa, pakon hagogohon-Ni, ampa halongangan na binahen-Ni ai.

⁵ Domma ipajongjong sada hasaksian bani Jakob, ibere sada titah bani Israel, itonahkon do bani ompungta pasal ai, ase ipabotohkon ai bani niombah ni sidea,

⁶ ase ibotoh sundut na mangihut ai, ase ginompar na sihol tubuh ai jongjong mambaritahon ai bani niombahni,

⁷ ase ibahen sidea Naibata hatengeran ni uhur ni sidea. Anjaha ulang ihalupahon pambahenan ni Naibata, na banggal ai, tapi ihorjahon ma titah-Ni,

⁸ ase ulang sidea gabe doskon ompung ni sidea, ai ma sundut siparbalik anjaha sipanggeori, sundut na so totap uhurni, anjaha tonduyni seng totap bujur dampak Naibata.

⁹ Anak ni si Efraim, marsinjatahon sior, manginsurut do bani parporangan.

¹⁰ Seng iramotkon sidea parpadanan binahen ni Naibata, anjaha mangengkar do sidea mardalan domu hubani titah-Ni.

¹¹ Lupa do sidea bani pambahenan-Ni na banggal ai, pakon bani tanda halongangan, na dob pinatuduhkon-Ni bani sidea.

- 12 I lobei ni mata ni ompung ni sidea ibahen do halongangan, i tanoh Masir, bani talun Soan.
- 13 Ibolah do laut, laho padiparhon sidea, ibongbong do bah songon bongbongan.
- 14 Ibobahon do sidea marhitei hambun arian, marhitei sondang ni apuy borngin.
- 15 Ibolah do dolog batu i halimisan, ibere do sidea sombuh minum songon humbani bah bangga;
- 16 Iparoh do bah humbani dolog batu, anjaha ibahen do bah mabaor songon bah mardalan.
- 17 Tapi sai inunut sidea do mardousa dampak-Si, iimbang do la Na Tang Sitimbulan in i halimisan.
- 18 Sai ilajou sidea do Naibata ibagas uhurni, itunggu sidea do sipanganon pasombuh hisapni.
- 19 Marungut-ungut do sidea dampak Naibata, nini, "Mintor mangasup ma Naibata pasirsirhon sipanganon i halimisan?"
- 20 Tongon, ibogbog do dolog batu gabe mabaor bah, marbanggal binanga, tapi mintor tarbahen-Si ma mambere ruti atap pasirsirhon gulei bani bangsa-Ni?
- 21 Halani ai, dob ibogei Jahowa ai, manggila ma la, gajag ma apuy mandorab Jakob, marjimbur gila dampak Israel,

- 22 halani seng porsaya sidea bani Naibata, anjaha
seng tenger uhurni bani pangurupi-Ni.
- 23 Jadi ibere ma parentah bani hambun na i atas,
anjaha ibuha labah ni langit.
- 24 Ipaturun ma bani sidea udan manna, anjaha
ibere ma bani sidea gandum nagori atas.
- 25 Ruti ni malekat do ipangan ganup sidea, bohal
do itongos bani sidea laho pabosurhon.
- 26 Ibahen do logou hapoltakan marombus i langit,
anjaha iparroh logou dangsina marhitei
gogoh-Ni.
- 27 Ipaturun do bani sidea gulei songon orbuk
bueini, anjaha manuk-manuk na marhabong
songon horsik na i topi ni laut.
- 28 Ipandabuhkon hu tongah-tongah ni parsaranan
ni sidea, inggot bani ianan ni sidea.
- 29 Mangan do sidea anjaha bosuran, na pinindo
ni uhur ni sidea ibere do bani sidea.
- 30 Lape sombuh ope sidea mansuhuni
hisap-hisapni, ongom ope sidea bani
sipanganon,
- 31 jadi gajag ma ringis ni Naibata mandorab sidea,
ibunuh ma buei na sangap-sangap ni sidea,
anjaha rasei na maposo ni Israel.
- 32 Age pe sonai ganup na masa ai, inunut sidea
do mardousa, anjaha seng ihaporsayai
halongangan na binahen-Ni.

- 33 Jadi iboiskon ma ari-ari ni sidea gabe na lang
ampa tahun ni sidea gabe hasonggotan.
- 34 Anggo roh la mambunuh sidea, ipindahi sidea
ma la, mulak ma sidea pindah-pindah bani
Naibata.
- 35 Idingat sidea ma, Naibata do hape dolog
batu bani sidea, anjaha Naibata, Na Tang
Sitimbulan in do sipaluah bani sidea.
- 36 Tapi ipalemes-lemes do parsahap ni Bani,
anjaha iladungi la marhitei dilahni.
- 37 Seng totap uhur ni sidea Bani, anjaha seng
totap sidea bani padan-Ni.
- 38 Tapi la, siparontou ni uhur, isasap do dousa ni
sidea, seng iboiskon sidea. Gati do iampogi
ringis-Ni, anjaha seng ganup ringis-Ni
ipadalan.
- 39 Ai idingat, daging do sidea, logou na
mangombus anjaha seng mulak be.
- 40 Gatini in sidea mamuhoi ringis-Ni i
halimisan, anjaha manunsahi-Si bani tanoh
dorging-dorging ai!
- 41 Iulak-ulak sidea do manlajou Naibata, anjaha
ipusoki uhur ni Na Pansing ni Israel.
- 42 Seng mardingat be sidea bani hagogohon-Ni,
bani ari na pinaluah-Ni sidea humbani
imbangni;
- 43 sanggah binahen-Ni tanda i Masir, ampa
halongangan-Ni bani talun Soan.

- 44 Ipaubah do bahni gabe daroh, ampa binangani,
gabe lang tarinum.
- 45 Itongos do bani sidea rongit laho
mamboiskonsi, ampa tiktikan laho
mannedahon.
- 46 Bani tamponok do ibere suan-suanan ni sidea,
anjaha hinorjahonni bani balang.
- 47 Matei do anggur ni sidea ibahen sira-sira, ampa
hayu ara ni sidea ibahen namur na borgoh.
- 48 Rasei do pinahan ni sidea ibahen bunrung,
anjaha marmateian hulanan ni biribirini
ibahen sampar.
- 49 Itongos do bani sidea apuy ni ringis-Ni,
gila, marah ampa hasosakan, malekat
sipangagou na marhulan-hulan.
- 50 Ipaturut do mardalan ringis-Ni, seng iramotkon
tonduy ni sidea humbani hamatean, tapi
iondoskon do goluh ni sidea hubani sampar.
- 51 Ibogbog do ganup bunga tubuh ni Masir, ai ma
limbuah ni gogoh ni sidea, bani lampolampo
ni si Ham.
- 52 Ipaingkat do bangsa-Ni songon biribiri, anjaha
ibobai sidea songon hulanan i halimisan.
- 53 Sonang do sidea iiring-iring, seng pala
marhabiaran, tapi anggo munsuhni rungkub
do ibahen laut.

- 54 Ibobahon do sidea hu tanoh-Ni na pansing in,
hubani dolog na binangkuhon-Ni marhitei
tangan-Ni siamun.
- 55 Iusir do hun lobei ni sidea bangsa sipajuh
begu-begu, ibagihon do tanoh pusaka bani
sidea, anjaha sagala marga ni Israel ibahen
do marianan bani lampolampo ni sidea.
- 56 Tapi ilajou sidea do use Naibata, anjaha
iimbang Na Tang Sitimbulan in, anjaha seng
iramotkon hasaksian-Ni.
- 57 Marbalik do sidea, mosei songon ompung ni
sidea, mubah do sidea songon sior panipu.
- 58 Iparoh sidea do ringis-Ni marhitei buntu-buntu
panombahan ni sidea, ipatubuh do
simburu-Ni marhitei gana-gana ni sidea.
- 59 Ibogei Naibata ma ai, gabe marah ma la,
iambukkon ma ganup Israel.
- 60 Ipahalong ma rumah-Ni i Silo, ai ma ianan-Ni i
tengah-tengah ni jolma.
- 61 Ilopas do hagogohon-Ni tartaban, anjaha
iondoskon hajagaron-Ni bani tangan ni
imbang-Ni.
- 62 Iondoskon do bangsa-Ni bani podang, anjaha
marah do la bani bangsa niain-Ni.
- 63 Anak garama ni sidea bois ipangan apuy, seng
dong be na mandoding-doding bani boru ni
sidea.

- 64 Rasei do malim ni sidea ibahen podang, anjaha na mangkabaluhon sidea seng tangis be.
- 65 Jadi puho ma Tuhan songon humbani na modom, songon puanglima na tarjolma humbani na minum anggur.
- 66 Manginsurut do imbang-Ni ibogbog, anjaha bador sidea ibahen sadokah ni dokahni.
- 67 Iambukkon do lampolampo ni si Josep, anjaha seng ipilih marga Efraim.
- 68 Tapi marga Juda do ipilih, Dolog Sion na hinaholongan-Ni ai,
- 69 Ipajongjong do ianan-Ni na pansing in songon gijang ni langit, songon tanoh, na pinajonam-Ni sadokah ni dokahni.
- 70 Ipilih do si Daud, juakjuak-Ni ai, ibuat do ia humbani na marmahan biribiri.
- 71 Humbani na mangala-alai biribiri na inuman ialop ia, laho marmahan Jakob bangsa-Ni in, pakon Israel parbagianan-Ni.
- 72 Jadi iparmahan ma sidea humbani pintor ni uhurni, anjaha ibobahon sidea marhitei hapentaran ni tanganni.

Tangis-tangis ni Bangsa na Tarpisat

(Pausih: Ps. 74)

79 ¹ Psalm humbani si Asap. Ham Naibata, domma imasuki sipajuh begu-begu tanoh pusaka-Mu domma ibutaki sidea rumah

panumbahan-Mu na pansing in, domma marumbak Jerusalem ibahen.

- ² Ipamberehon sidea do bangkei ni juakjuak-Mu panganon ni manuk-manuk na i awang-awang, anjaha daging ni hinaholongan-Mu bani binatang harangan.
- ³ Ipanduruskon do daroh ni sidea songon bah inggot Jerusalem, anjaha sahalak pe lang dong na mananomsi.
- ⁴ Gabe habadoron do hanami bani bangsa simbalognami, gabe hahirion pakon siapason bani halak na manginggoti hanami.
- ⁵ Sadiha dokah nari, Ham Jahowa, manggila Ham lalab, anjaha marjimbur-jimbur gila-Mu songon apuy?
- ⁶ Useihon Ham ma ringis-Mu bani sipajuh begu-begu, na so mananda Ham ampa harajaon na so mandilo goran-Mu!
- ⁷ Ai domma itolon sidea si Jakob, anjaha iparseda iananni.
- ⁸ Ulang ma hira Ham bennami hajahaton ni na lobeinami! Podas ma idop ni uhur-Mu tongoskon Ham manjumpahkon hanami, ai mandatei tumang do hanami.
- ⁹ Sai urupi Ham ma hanami, Ham Naibata ni haluahonnami, halani hamuliaon ni goran-Mu! Paluah Ham ma hanami, sasap Ham ma dousanami halani goran-Mu!

- ¹⁰ Mase ma hatahonon ni sipajuh begu-begu, “Ija do Naibata ni sidea?” Pabotohkon Ham ma bani sipajuh begu-begu i lobei ni matanami pambalason bani daroh ni juakjuak-Mu, na niduruskon in.
- ¹¹ Sai das ma hu lobei-Mu doruh-doruh ni na tartaban, romban hubani hagogohon ni tangan-Mu paturut Ham ma manggoluh na sahira bunuhon hinan.
- ¹² Balas Ham ma hubani bangsa simbalognami, pitu hali lompit bani abingan ni sidea, apas-apas na niapaskon ni sidea Bamu, Ham Tuhan.
- ¹³ Tapi anggo hanami, bangsa-Mu ampa biribiri na pinarmahan-Mu, sai Ham do pujionnami sadokah ni dokahni, anjaha baritahononnami do puji-pujian Bamu, marsundut-sundut.

Tonggo Mangindohon ase Suang Israel

80 ¹ Bani pambobai koor. Inggouni: Silundat. Hasaksian humbani si Asap. Sada Psalm. (80-2) Ham Siparmahan Israel, tangar, tangar Ham ma; Ham, na mambobahon Josep songon biribiri, Ham na marhotak bani herubim, roh ma Ham marsinondang.

- ² (80-3) i lobei ni Efraim, Benjamin pakon Manase! Puhoi Ham ma gogoh-Mu anjaha roh ma paluahkon hanami.
- ³ (80-4) Ham Naibata Zebaot, pasuang Ham ma hanami, sondangkon Ham ma bohi-Mu, ase maluah hanami.
- ⁴ (80-5) Ham Jahowa Naibata Zebaot, piga dokah nari manringis Ham dampak tonggo ni bangsa-Mu?
- ⁵ (80-6) Ipapangankon Ham do bani sidea ruti iluh, anjaha ipainumkon Ham do bani sidea iluh marlobih-lobih.
- ⁶ (80-7) Ibahen Ham do hanami gabe mula ni partinggilan bani simbalognami, anjaha sai iapasi munsuhnami do hanami.
- ⁷ (80-8) Ham Naibata Zebaot, pasuang Ham ma hanami, sondangkon Ham ma bohi-Mu, ase maluah hanami.
- ⁸ (80-9) Iorbat Ham do sada hayu anggur hun Masir, iusir Ham do bangsa-bangsa, laho manuankon ai hujai.
- ⁹ (80-10) Ham do pajorei tanoh in i lobei ni, jadi marurat ma ia anjaha igoki tanoh in.
- ¹⁰ (80-11) Rungkub do dolog ibahen halinohni, hayu ares ni Naibata ibahen ranting-rantingni.
- ¹¹ (80-12) Iherbangkon do dangkahni das hu laut, anjaha tumborni das hu Bah Eprat.

- ¹² (80-13) Mase ma iparseda Ham hondorni, gabe uhur-uhur ni pamontas mambuatisi?
- ¹³ (80-14) Iguyang aili na hun harangan do ia, anjaha igagati binatang na i talun.
- ¹⁴ (80-15) Ham Naibata Zebaot, marpangulaki ma uhur-Mu, manatap ma Ham hun nagori atas; pardiatei Ham ma hayu anggur-Mu on,
- ¹⁵ (80-16) anjaha pajongjong Ham ma in, na sinuan ni tangan-Mu siamun in.
- ¹⁶ (80-17) Domma itutung sidea in bani apuy, domma iroboh; sai magou ma sidea marhitei pangondam ni panonggor-Mu.
- ¹⁷ (80-18) Tangan-Mu ma na manramotkon halak parsiamun-Mu, anak ni jolma na pinabanggal-banggal-Mu.
- ¹⁸ (80-19) Seng anjai manginsurut hanami hun Bamu; pagoluh Ham ma hanami ase goran-Mu idilo hanami.
- ¹⁹ (80-20) Ham Jahowa Naibata Zebaot, pasuang Ham ma hanami, sondangkon Ham ma bohi-Mu, ase maluah hanami.

**Puji-pujian ampa Ojur-ujur
Pambalosion bani Naibata**

81 ¹ Bani pambobai kor. Marhasoman Gitit. Humbani si Asap. (81-2) Olobkon ma Naibata, hagogohonta in, marsurak ma bani Naibata ni si Jakob.

- ² (81-3) Mandoding ma, pahata tambur, giut ma husapi na laingan ampa arbap.
- ³ (81-4) Sompul ma tanduk bani poltak ni bulan, bani bulan tula, ari pestanta in.
- ⁴ (81-5) Ai aturan do in bani Israel, parentah ni Naibata bani si Jakob.
- ⁵ (81-6) Sada paraturan do in ibahen bani si Josep, sanggah na bingkat la mandorab Masir. Hubogei do sora na so hutanda hinan:
- ⁶ (81-7) Hubuat do siporsanon humbani abaramu, anjaha maluah do tanganmu humbani karanjang.
- ⁷ (81-8) Dilo-dilo do ho sanggah hasosakan gabe Hupaluah; marbalos do Ahu bam humbani hambun na marlonggur; Hulajou do ho ilambung ni Bah Meriba. Sela.
- ⁸ (81-9) Tangar ma, ale bangsang-Ku, sihol do paingaton-Ku ho; ale Israel, sai ra ma ho manangihon!
- ⁹ (81-10) Lang malo dong naibata na legan i tongah-tongahmu, ulang sombah naibata ni bangsa na legan.
- ¹⁰ (81-11) Ahu do Jahowa Naibatamu, na patangkog ho hun Masir; patanggak ma pamanganmu ase Hugoki!
- ¹¹ (81-12) Tapi seng itangihon bangsang-Ku sorang-Ku, anjaha seng ibalosi Israel Ahu.

- ¹² (81-13) Jadi Hupaturut ma ia bani hengken ni uhurni, gabe iihut-ihut ma rosuh ni uhurni.
- ¹³ (81-14) Ambit Ahu itangihon bangsang-Ku, anjaha Israel mardalan bani dalan-Ku:
- ¹⁴ (81-15) Podas ma patundukon-Ku munshuni, anjaha dompakkonon-Ku tangan-Ku bani imbangni.
- ¹⁵ (81-16) Halak na mandomdomisi maningon marsombah do hu bani, anjaha panorangni ronsi sadokah ni dokahni.
- ¹⁶ (81-17) Bahenon-Ku do sidea mangan gandum sijengesan, anjaha pabosuron-Ku sidea bani manisan na hun dolog batu.

Naibata do Panguhum bani Sagala Panguhum

- 82** ¹ Psalm humbani si Asap. Jongjong do Naibata bani humpulan ni naibata-naibata, mandabuh uhum do la bani naibata-naibata.
- ² Piga dokah nari pagedukonnima uhum, anjaha apitannima parjahat? Sela.
- ³ Papintor hanima ma uhum bani halak na malumat ampa na tading maetek, ondingi hanima ma halak na madoyuk ampa na musil.
- ⁴ Paluah ma halak na malumat pakon na masombuh. paluah hanima ma sidea humbani tangan ni parjahat.

- ⁵ Seng dong na binotoh ampa pangartian ni sidea, bani na golap do sidea mardalan, dugur ma onjolan ni tanoh on.
- ⁶ Domma namin Huhatahon, “Naibata-naibata do hanima, anak ni Na Tang Sitimbulan in do hanima ganup.”
- ⁷ Age pe sonai maningon do matei hanima songon jolma, anjaha targompang songon sada halak na sangap.
- ⁸ Jongjong ma Ham, ale Naibata, uhum Ham ma tanoh on, ai Ham do simada sagala bangsa.

Tonggo Mangindo Pangurupion Mangimbang Munsuh

- 83** ¹ Sada doding. Psalm humbani si Asap.
(83-2) Ham, Naibata, ulang ma sai sip Ham, ulang ma ipanengel-nengel Ham, ulang ma sai soh Ham, ale Naibata!
- ² (83-3) Ai tonggor ma, sai manggeori do munsuh-Mu, na mandomdomi Ham, sai ipadorgak do uluni.
- ³ (83-4) Sai mambahen ranggi-ranggian do sidea mangimbang munsuh-Mu, anjaha manriahi sidea manlawan halak na niondingan-Mu.
- ⁴ (83-5) Nini sidea, “Eta, boiskon hita ma sidea songon sada bangsa, ase ulang be dong na mardingat Israel.”

- ⁵ (83-6) Tongon, marsada ni uhur do sidea manriah, anjaha marpadan do sidea manlawan Ham:
- ⁶ (83-7) Lampolampo ni Edom pakon Moab, halak Ismael pakon halak Hagar;
- ⁷ (83-8) Gebal pakon Amon ampa Amalek, halak Palistim pakon par Tirus;
- ⁸ (83-9) dihut do Assur hasoman ni sidea, gabe panungkoli bani ginompar ni si Lot. Sela.
- ⁹ (83-10) Bahen Ham ma bani sidea songon na bani halak Midian, songon na bani si Sisera, ampa si Jabin i lambung ni Bah Kison,
- ¹⁰ (83-11) ai ma na bois dohorhon Endor, gabe napu ni juma ni sidea.
- ¹¹ (83-12) Bahen Ham ma dompak na sangap ni sidea songon na bani si Oreb pakon si Zeb, anjaha ganup raja ni sidea songon si Zeba pakon si Salmuna,
- ¹² (83-13) na mangkatahon ai, "Buat hita ma sagala ianan ni Naibata banta!"
- ¹³ (83-14) Ham Naibata, bahen Ham ma sidea songon tompoh-tompoh, songon lapa-lapa i lobei ni logou.
- ¹⁴ (83-15) Songon apuy, na manutung harangan, songon gara ni apuy, na mamonsongkon dolog,

- ¹⁵ (83-16) sonai ma usir Ham sidea marhitei halisung-sung-Mu, anjaha songgoti Ham sidea marhitei haba-haba-Mu.
- ¹⁶ (83-17) Gok ma bohi ni sidea bahen Ham bani habadoron, ase pindah-pindah sidea bani goran-Mu, Ham Jahowa.
- ¹⁷ (83-18) Sai bador anjaha tarsonggot ma sidea sadokah ni dokahni, maila anjaha magou ma sidea,
- ¹⁸ (83-19) ase andohar ibotoh sidea, pitah Ham do na margoran Jahowa, Na Tang Sitimbulan i sab tanoh on.

Hatuahon ni Halak na Marianan i rumah ni Naibata

- 84** ¹ Bani pambobai koor. Marhasoman Gitit. Humbani ginompar ni si Korah. Sada Psalm. (84-2) Jenges ni in rumah ianan-Mu, Ham Jahowa Zebaot!
- ² (84-3) Masihol anjaha ayak do tonduyhu bani alaman ni Jahowa. Marolob-olob do uhurhu pakon dagingku manjumpahkon Naibata na manggoluh in.
- ³ (84-4) Dingis pe jumpahan jabu do, sonai layang-layang dapotan asar do, bahen ianan ni anakni ilambung ni anjapanjap-Mu. Ham Jahowa Zebaot, Rajangku anjaha Naibatanku.

- ⁴ (84-5) Martuah do halak na marianan i rumah-Mu, sai Ham do pujion ni sidea. Sela.
- ⁵ (84-6) Martuah do halak, na marhagogohon ibagas Ham, na marugas laho hu rumah-Mu.
- ⁶ (84-7) Anggo ibolus sidea lombang Baka, gabe ianan bah tubuh do ai bani sidea; tongon, udan mula-mula do na mangarbahisi.
- ⁷ (84-8) Lambin ganda do gogoh ni sidea, paima das sidea hu lobei ni Naibata i Sion.
- ⁸ (84-9) Ham Jahowa Zebaot, tangihon Ham ma tonggongku, paeleng Ham na pinggol-Mu, Ham Naibata ni si Jakob. Sela.
- ⁹ (84-10) Kawahkon Ham ma gantarnami, ale Naibata, anjaha tatap Ham ma bohi ni na mininakan-Mu!
- ¹⁰ (84-11) Tongon, dearan do sadari i alaman-Mu ase saribu ari bani ianan na legan; rahanan do sijaga labah ahu i rumah ni Naibatangku ase marianan i lampolampo ni parjahat.
- ¹¹ (84-12) Ai mata ni ari ampa gantar do Naibata Jahowa; la do sibere idop ni uhur ampa hasangapon; seng iampogi na madear bani halak na bujur marparlahou.
- ¹² (84-13) Ham Jahowa Zebaot, martuah do jolma na marhatengeran Bamu.

Tonggo Mangindohon ase Mulak Suang Israel

- 85** ¹ Bani pambobai koor. Humbani ginompar ni si Korah. Sada Psalm. (85-2) Ham Jahowa, idop do uhur-Mu ijia bani tanoh-Mu, ipasuang Ham do use si Jakob.
- ² (85-3) Isasap Ham do hajahaton ni bangsa-Mu, irungkub Ham do dousa ni sidea haganupan. Sela.
- ³ (85-4) Ipahombun Ham do ringis-Mu, anjaha iampogi Ham do gajag ni gila-Mu.
- ⁴ (85-5) Sai pasuang Ham ma hanami, Ham Naibata ni haluahonnami, parontihon Ham ma ringis-Mu dampak hanami.
- ⁵ (85-6) Lanjar do Ham manringis dampak hanami, anjaha toruskonon-Mu do ringis-Mu marsundut-sundut?
- ⁶ (85-7) Ai lang be ulakan-Mu pagoluh hanami, ase marmalas ni uhur bangsa-Mu ibagas Ham?
- ⁷ (85-8) Patidak Ham ma hu bennami, Ham Jahowa, idop ni uhur-Mu, anjaha useihon Ham ma bennami pangurupion-Mu.
- ⁸ (85-9) Sai tangihononku do atap aha na hinatahon ni Naibata Jahowa, ai hadameion do hata-Ni dampak bangsa-Ni pakon bani na hinaholongan-Ni, asal ma ulang mulak sidea bani haotoon.

- ⁹ (85-10) Tongon, donok do pangurupi-Ni bani na mangkabiari-Si, tongon, marianan do hamuliaon-Ni bani tanohnami.
- ¹⁰ (85-11) Idop ni uhur pakon hasintongan sai pajumpah do, anjaha hapintoron pakon hadameion marsisummahan.
- ¹¹ (85-12) Hasintongan martumbor hun tanoh, anjaha hapintoron manatap hun atas langit.
- ¹² (85-13) Tongon, Jahowa sandiri do mambere na madear, anjaha tanohnami mambere gogohni.
- ¹³ (85-14) Hapintoron do mardalan i lobei-Ni, anjaha hadameion mangirikkon langkah-langkah-Ni.

Tonggo bani Panorang Hasosakan

- 86** ¹ Tonggo ni si Daud. Paeleng Ham ma pinggol-Mu, Ham Jahowa, balosi Ham ma ahu, ai doyuk janah sombuh do ahu.
- ² Ramotkon Ham ma tonduyhu, ai na daulat do ahu. Sai paluah Ham ma juakjuak-Mu na martenger ni uhur hu Bamu!
- ³ Ham do Naibatanku idop ma uhur-Mu bangku, ai hu Bamu do ahu dilo-dilo ganup ari.
- ⁴ Sai pamalas Ham ma uhur ni juakjuak-Mu, ai hu Bamu do Tuhan, hudompakkon tonduyhu.

- ⁵ Ai pardear layak do Ham, Tuhan, anjaha marpangulaki do uhur-Mu, buei do idop ni uhur-Mu bani haganup na mandilo Ham.
- ⁶ Tangihon Ham ma, ale Jahowa, tonggongku, anjaha pardiateihon Ham ma elek-elekku.
- ⁷ Bani panorang hasosakanku, sai Ham do hudilo, ai ibalosi Ham do ahu.
- ⁸ Seng dong na doskon Ham i tongah-tongah ni naibata-naibata, Ham Tuhan, anjaha seng dong na doskon pambahenan-Mu.
- ⁹ Sai roh do sagala bangsa, na jinadihon-Mu; marsombah do sidea hu lobei-Mu, Ham Tuhan, anjaha pasangapon ni sidea do goran-Mu.
- ¹⁰ Ai timbul do Ham, sibahen halongangan, pitah Ham do Naibata hansa.
- ¹¹ Sai ajarhon Ham ma dalan-Mu hu bangku, Ham Jahowa, ase mardalan ahu ibagas hasintongan-Mu; sai pabulat Ham ma uhurhu laho mangkabiari goran-Mu.
- ¹² Ham Tuhan Naibatangku, sihol do pujionku Ham humbani gok ni uhurhu, anjaha pasangaponku goran-Mu sadokah ni dokahni.
- ¹³ Ai bangga do idop ni uhur-Mu bangku, ipaluah Ham do ahu humbani nagori toruh.

- ¹⁴ Ham Naibata, roh do na jungkat maruhur
 mangimbang ahu, hulanan ni parjahat sihol
 mamunuh ahu, seng parduli sidea Bamu.
- ¹⁵ Tapi Ham do Tuhan, Naibata paridop ni uhur
 janah parholong, Ham, na lambat manringis,
 parontou ni uhur bangga janah parsintong.
- ¹⁶ Dompakkon Ham ma ahu anjaha maidop
 uhur-Mu bangku. Bere Ham ma gogoh-Mu
 bani juakjuak-Mu, anjaha paluah Ham ma
 anak ni jabolon-Mu naboru.
- ¹⁷ Bahen Ham ma bangku tanda hadearon, ase
 maila halak sidomdomi ahu, mangidah na
 dob iurupi anjaha iapohi Ham ahu, Ham
 Jahowa.

Sion, Huta ni Naibata

- 87** ¹ Humbani ginompar ni si Korah. Sada
 Psalm. Sada doding. I atas ni dolog na ma
 pansing do ipajonam in.
- ² Holongan do uhur ni Jahowa mangidah
 horbangan ni Sion humbani sagala ianan ni
 Jakob.
- ³ Na mulia-mulia do ibaritahon pasal Ham ale
 huta ni Naibata. Sela.
- ⁴ Hutarsingati do Masir pakon Babel hubani na
 mananda Ahu; sonai Palistim, Tirus ampa
 Etiopia: sagala on do itubuhkon ijai.

⁵ Tapi pasal Sion hatahononkon do, “Haganup do tubuh ijai, anjaha Ia, Na Tang Sitimbulan in do patotapkonsi.”

⁶ Hiraon ni Jahowa do sanggah mantingkihon bangsa-bangsa: On do itubuhkan ijai. Sela.

⁷ Anjaha dodingkonon ni sidea do marhasoman tortor: Ibagas Ham do bah tubuhku ganup.

Tonggo Sanggah Marsitaranon Banggal

88 ¹ Sada doding. Psalm humbani ginompar ni si Korah. Bani pambobai koor. Inggouni: Almahalat. Doding podah humbani si Heman, halak Esrahi. (88-2) Ham Jahowa, Naibata ni hatuahonku, dilo-dilo do ahu arian, anjaha hu lobei-Mu do ahu roh borngin.

² (88-3) Sai das ma tonggongku hu lobei-Mu, sai paeleng Ham ma pinggol-Mu bani doruh-doruhku.

³ (88-4) Domma sampur uhur hubani sitaronon, domma darngos goluhku bani nagori toruh.

⁴ (88-5) Doskon halak na manuruk tanoman mando ahu, songon paramangon na so margolle.

⁵ (88-6) Doskon na dob matei do ahu ihira, songon halak na dob tarbunuh ragei ibagas tanoman, ai ma halak na so nidingat-Mu be, na dob sirang humbani kuasa-Mu.

- ⁶ (88-7) Domma ipatibal Ham ahu hubagas godung sibagasan, hubagas hagolapan, hubagas luhung tene.
- ⁷ (88-8) Sai idondoni ringis-Mu do ahu, anjaha sagala gilumbang-Mu mangodohkon ahu. Sela.
- ⁸ (88-9) Domma ipaganggang Ham humbangku sagala huanku, domma ibahen Ham hagigi ahu bani sidea, tarhurung do ahu anjaha seng boi mandarat.
- ⁹ (88-10) Domma marholok matangku halani hadoyukon, Ham do Jahowa hupadilo-dilo ganup ari, hupaherbang do tanganku hu Bamu.
- ¹⁰ (88-11) Ai mambahen halongangan do Ham bani na dob matei? Ai puho do halinoh mamuji Ham? Sela.
- ¹¹ (88-12) Ai ambilankononkon do idop ni uhur-Mu ibagas tanoman atap hasintongan-Mu i nagori toruh?
- ¹² (88-13) Ai botohon ni halak ope halongangan-Mu bani ianan na golap, atap hapintoron-Mu bani ianan parlupaan?
- ¹³ (88-14) Tapi ahu, hu Bamu do ahu dilo-dilo, Ham Jahowa, anjaha sogod-sogod do tonggongku roh manjumpahkon Ham.

- ¹⁴ (88-15) Mase ma itulak Ham ahu, ale Jahowa, anjaha iponopkon Ham bohi-Mu humbangku?
- ¹⁵ (88-16) Madoyuk do ahu anjaha narus-narus matei humbani hadakdanakonku, manaron do ahu bani songgot-songgot-Mu, mandolei ahu ibahen.
- ¹⁶ (88-17) Ibontas milas ni ringis-Mu do ahu, bois do ahu ibahen panonggoti-Mu.
- ¹⁷ (88-18) linggoti sidea do ahu songon bah ganup ari, idorab ahu inggot.
- ¹⁸ (88-19) Ipaganggang Ham do humbangku huan pakon hasomanku, sagala halak na hutanda ibagas hagolapan do.

**Tonggo ase Ipatotap Jahowa
Bagah-bagah-Ni bani si Daud**

- 89** ¹ Doding podah humbani si Etan, halak Esrahi. (89-2) Sai dodingkononku do idop ni uhur ni Jahowa sadokah ni dokahni, pabotohkononku do hasintongan-Mu marhitei pamanganku, marsundut-sundut.
- ² (89-3) Ai nimu do, “Totap do idop ni uhur-Hu sadokah ni dokahni, anjaha songon jonam ni langit do hasintongan-Ku.”
- ³ (89-4) Domma Hubahen padan bani na pinilih-Ku, domma Hubijahon bani juakjuak-Ku si Daud.

- ⁴ (89-5) Patotapon-Ku do ginomparmu sadokah ni dokahni, anjaha hotakmu pajongjongon-Ku marsundut-sundut. Sela.
- ⁵ (89-6) Jadi pujion ni langit ma halongangan-Mu, Ham Jahowa, sonai hasintongan-Mu bani tumpuan ni halak na ma pansing.
- ⁶ (89-7) Ai ise ma i langit na doskon Jahowa, ise ma parnagori atas na songon Jahowa?
- ⁷ (89-8) Sihabiaran do Naibata i tongah-tongah ni malekat na ma pansing, anjaha jombut bani sagala ma manlioti-Si.
- ⁸ (89-9) Ham Jahowa, Naibata Zebaot, ise ma na songon Ham? Markuasa do Ham, ale Jahowa, anjaha hasintongan-Mu manginggoti Ham.
- ⁹ (89-10) Ham do na manggomgom gunsang ni laut, anggo naik gilumbangni Ham do na paminopkon.
- ¹⁰ (89-11) Ham do na manropuki Rahab songon halak na tinampul, ipaerap Ham do munsuh-Mu marhitei tangan-Mu na gogoh in.
- ¹¹ (89-12) Gok Bamu do nagori atas, gok Bamu do homa tanoh on; dunia on pakon sagala isini, Ham do na pajonamkon.
- ¹² (89-13) Utara pakon dangsina Ham do na manompasi; Tabor pakon Hermon marolob-olob halani goran-Mu.

- ¹³ (89-14) Marbotokon na gogoh do Ham, gogoh do tangan-Mu anjaha timbul siamun-Mu.
- ¹⁴ (89-15) hapintoron pakon uhum do onjolan ni hotak-Mu, idop ni uhur pakon hasintongan do jongjong i lobei-Mu.
- ¹⁵ (89-16) Martuah ma bangsa na mambotoh marolob-olob, na mardalan ibagas sondang ni bohi-Mu, Ham Jahowa.
- ¹⁶ (89-17) Marhitei goran-Mu do marolob-olob sidea ganup ari, anjaha marhitei hapintoron-Mu timbul sidea.
- ¹⁷ (89-18) Ai Ham do hamuliaon ni gogoh ni sidea. anjaha marhitei rosuh-Mu gijang tanduknami.
- ¹⁸ (89-19) Ai Jahowa do simada gantarnami, humbani na pansing ni Israel do rajanami.
- ¹⁹ (89-20) Na ijia marsahap do Ham marhitei panonggoran hubani hinaholongan-Mu, Nimu, "Domma Huondoskon sortali bani sada puanglima, domma Hupabangkit sada na pinilih humbani bangsa in."
- ²⁰ (89-21) Domma jumpah Ahu juakjuak-Ku si Daud, domma Huminaki ia marihitei minak-Ku na ma pansing;
- ²¹ (89-22) tungkolon ni tangan-Ku do ia, tongon, pargogohan ni botokon-Ku do ia.

- ²² (89-23) Seng anjai dorabon ni munsuh ia,
anjaha seng anjai odoh-odohon ni parjahat
ia.
- ²³ (89-24) Tapi rosakan-Ku do munsuhni i
lobei ni, anjaha raseihonon-Ku do na
mandomdomisi.
- ²⁴ (89-25) Hasintongan ampa idop ni uhur-Hu do
mangkasomanisi, anjaha marhitei goran-Ku
pagijangon do tandukni.
- ²⁵ (89-26) Bahenon-Ku do tanganni manguasai
laut, tanganni siamun manguasai bah
mardalan.
- ²⁶ (89-27) Dilohononni do hu Bangku, “Bapangku
do Ham, Naibatanku ampa batu gingging
ni hatuahonku!”
- ²⁷ (89-28) Tongon, bahenon-Ku do ia anak
sikahanan, timbulan humbani raja-raja na i
tanoh on.
- ²⁸ (89-29) Ronsi sadokah ni dokahni do
patotapon-Ku idop ni uhur-Hu bani, anjaha
totap do padan-Ku bani.
- ²⁹ (89-30) Patongtongon-Ku do ginomparni ronsi
sadokah ni dokahni, anjaha hotakni sadokah
dong langit.
- ³⁰ (89-31) Anggo itadingkon anak-anakni titah-Ku,
anjaha seng marpangabak sidea bani
aturan-Ku,

- ³¹ (89-32) anggo ibutaki sidea tanoh-Ku, anjaha parentah-Ku seng idalankon,
- ³² (89-33) jadi luluhonon-Ku do panlanggaron ni sidea ai marhitei lonsing-lonsing, ampa hajahaton ni sidea ai marhitei libas-libas,
- ³³ (89-34) tapi anggo idop ni uhur-Hu seng anjai osoron-Ku hun bani, anjaha hasintongan-Ku seng anjai oseion-Ku.
- ³⁴ (89-35) Seng elukkonon-Ku padan-Ku, anjaha na luar humbani pamangan-Ku seng anjai ubahon-Ku.
- ³⁵ (89-36) Domma onggam marbulawan ahu marhitei hapansingon-Ku, seng anjai marladung Ahu bani si Daud.
- ³⁶ (89-37) Totap do sadokah ni dokahni ginomparni, anjaha songon mata ni ari hotakni i lobei-Hu;
- ³⁷ (89-38) manongtong do ia songon bulan, jonam sadokah dong langit. Sela.
- ³⁸ (89-39) Hape sonari itulak anjaha iambukkon Ham do, manringis do Ham dompak na mininakan-Mu.
- ³⁹ (89-40) Iparnalang Ham do padan na dompak juakjuak-Mu, hiri do das hu tanoh ibahen Ham sortalini.
- ⁴⁰ (89-41) Iruntas Ham do sagala tembokni, marumbak ibahen Ham batar-batarni.

- ⁴¹ (89-42) Isamun halak pamontas do ia, gabe siapason bani bangsa simbalogni.
- ⁴² (89-43) Ipagijang Ham do tangan siamun ni imbangni, marmalas ni uhur do ganup munsuhni ibahen Ham.
- ⁴³ (89-44) Marbalik do ibahen Ham mata ni podangni, seng tahan ia jongjong bani parmunsuhan.
- ⁴⁴ (89-45) lilohton Ham do sinalsalni, anjaha hotakni itunggalingkon Ham hu tanoh.
- ⁴⁵ (89-46) Ipapondok Ham do ari-ari ni haposoonni, anjaha irungkub Ham ia bani habadoron. Sela.
- ⁴⁶ (89-47) Sadiha dokah nari, Ham Jahowa, ponopkonon-Mu lalab diri-Mu, anjaha gajag lalab songon apuy ringis-Mu?
- ⁴⁷ (89-48) Ingat Ham ma, tongkin ni in goluh on, sonaha podasni salpu jolma tinompa-Mu in?
- ⁴⁸ (89-49) Ija ma dong jolma manggoluh na so idahonni hamatean, anjaha na boi paluahkon tonduyni hun tangan ni nagori toruh? Sela.
- ⁴⁹ (89-50) Ija do nuan, Tuhan, hinalayak-Mu ondi, na dob binijahon-Mu bani si Daud marhitei hasintongan-Mu?

- ⁵⁰ (89-51) Ingat Ham ma, Tuhan, habadoron ni juakjuak-Mu; hupausung-usung do bani tontonku apas-apas ni bangsa-bangsa,
- ⁵¹ (89-52) ai ma niapaskon ni sidea, Ham Jahowa; ipahiri sidea do bokas ni na mininakan-Mu.
- ⁵² (89-53) Napuji ma Jahowa sadokah ni dokahni! Amen! nai ma amen!

**Elek-elek ni Jolma na Laho Salpu in i
Lobei ni Naibata na Manongtong in**

- 90** ¹ Tonggo ni si Musa, juakjuak ni Naibata. Ale Tuhan, Ham do haporusannami marsundut-sundut.
- ² Paima tubuh dolog-dolog, paima iadongkon tanoh pakon dunia on, domma adong hinan Ham, ale Naibata, humbani sadokah ni dokahni ronsi sadokah ni dokahni.
- ³ Suang do jolma in gabe orbuk ibahen Ham, Nimu, “Mulak ma hanima, ale anak ni jolma!”
- ⁴ Ai saribu tahun bani pangidah-Mu doskon ari nantuari na dob salpu do ai, songon sada horin borngin-borngin.
- ⁵ layub Ham do sidea, salpu songon nipi do sidea. Songon poyon-poyon na maratah do sidea:
- ⁶ sogod martumbor anjaha marbunga, hape bodari melus anjaha maloslos.

- ⁷ Tongon, bois do hanami halani ringis-Mu,
anjaha binahen ni gila-Mu magou do
hanami.
- ⁸ Ipatalar Ham do hajahatonnami i lobei-Mu,
anjaha dousanami na ponop bani haliharon
ni bohi-Mu.
- ⁹ Tongon, salpu do ganup ari-arinami ibahen
ringis-Mu, anjaha tahun-tahun ni goluhnami
masab songon sada hoih.
- ¹⁰ Tahun ni goluhnami sibar pitu puluh do,
anggo margogoh das ualuh puluh tahun;
bueinan do ai marhangaluton anjaha
marhasunsahan, ai podas tumang do ai
salpu, songon na habang do hanami.
- ¹¹ Ise ma na mananda bangga ni ringis-Mu,
anjaha ise ma na marhabiaran Bamu domu
hubani gajag ni gila-Mu?
- ¹² Ajari Ham ma hanami mamilangi ari-arinami,
ase dapotan uhur na pentar hanami.
- ¹³ Marpangulaki ma uhur-Mu, Ham Jahowa!
Sadiha dokah nari? Maidop ma uhur-Mu
bani juakjuak-Mu.
- ¹⁴ Pabosur Ham ma hanami sogod-sogod bani
idop ni uhur-Mu, ase boi marolob-olob
anjaha marmalas ni uhur hanami bani ganup
ari-ari ni goluhnami.

- ¹⁵ Pamalas Ham ma uhurnami nansa dokah ni ari niarsik-Mu hanami, nansa dokah ni tahun hamagouan na nidageinami.
- ¹⁶ Patarlar Ham ma sagala horja-Mu bani juakjuak-Mu, ampa hamuliaon-Mu bani ginomparni.
- ¹⁷ Sai sogop ma hu banta habasaron ni Tuhan Naibatanta, anjaha ipatotap ma horja ni tanganta, tongon, sai ipatotap ma horja ni tanganta.

Sonang Ibagas Pangondingion ni Naibata

- 91** ¹ Barang ise na hundul ibagas pangondingion ni Na Timbul in, anjaha marianan bani linggom ni Pargogoh Na So Tarimbang in,
- ² ia do na boi marsahap bani Jahowa:
Haporusanku anjaha batar-batarhu,
Naibatanku, anjaha hatengeran ni uhurhu.
- ³ Tongon, ai la do na paluahkon ho humbani sambil ni parsambil pakon humbani pangagou ni sampar.
- ⁴ Ia do na manrungkub ho bani ambulu-Ni, anjaha i toruh ni habong-Ni jumpah ho haporusanmu; hasintongan-Ni do gantar parlingodan.
- ⁵ Seng pala habiaranmu songgot-songgot borngin, barang sior na habang arian;

- ⁶ barang sampar na mawat-awat bani na golap,
ampa naborit na mangagou tongah ari.
- ⁷ Age radag saribu halak i lambungmu anjaha
salaksa i siamunmu, seng tumaram
mangonai anggo hubam.
- ⁸ Asal mangkawah matamu, gabe idahonmu ma
pambalason dompak parjahat.
- ⁹ Ai ibahen ho do Jahowa haporusanmu, anjaha
Na Timbul in gabe batar-batarmu.
- ¹⁰ Seng anjai mangonai be bam hasamboron,
barang hamagouan seng be roh mandohori
lampolampomu.
- ¹¹ Ai suruhon-Ni do malekat-Ni halani ho, ase
iramotkon ho bani sagala dalanmu;
- ¹² sai tatang-tatangon ni sidea do ho, ase ulang
antuk naheimu bani batu.
- ¹³ Dogeionmu do singa pakon ulog na marbisa,
rojatanmu do anak ni singa ampa naga.
- ¹⁴ Halani marpangunsandeian ia Bangku, jadi
paluahon-Ku ma ia, patimbulon-Ku ma ia
halani na tinandani goran-Ku.
- ¹⁵ Diloonni do Ahu jadi balosan-Ku ma ia;
paluahon-Ku do ia anjaha marmulia
bahenon-Ku.
- ¹⁶ Sai pabosuron-Ku do ia sayur matua, anjaha
pataridahkonon-Ku hatuahon-Ku bani.

Puji-pujian bani Jahowa halani hapintoron-Ni

- 92** ¹ Sada Psalm. Doding bani Ari Sabat.
(92-2) Na madear do mamuji Jahowa
ampa mandodingkon goran-Mu, Ham ale
Sitimbulan,
- ² (92-3) mangambilankon idop ni uhur-Mu sogod
ampa hasintongan-Mu borngin,
- ³ (92-4) marhasoman parugas sisapuluh tali
pakon arbap, iirikkon sora ni husapi.
- ⁴ (92-5) Ai ipamalas Ham do uhurhu, Ham Jahowa
marhitei pambahenan-Mu, marolob-olob
do ahu mangidah jadi-jadian ni tangan-Mu.
- ⁵ (92-6) Banggal ni in pambahenan-Mu, Ham
Jahowa, bagas tumang do pingkiran-Mu.
- ⁶ (92-7) Jolma na bodoh seng iarusi anjaha jolma
na lontong seng iartihon ai.
- ⁷ (92-8) Age pe martumbor parjahat songon
poyon-poyon, anjaha marbunga sagala
sihorjahon na masambor, sisedahonon do
sidea sadokah ni dokahni.
- ⁸ (92-9) Tapi anggo Ham, ale Jahowa, timbul do
ronsi sadokah ni dokahni.
- ⁹ (92-10) Tongon, munsuh-Mu, Ham Jahowa,
tongon, munsuh-Mu magou do; mambur
merap do sagala sihorjahon hajahaton.

- ¹⁰ (92-11) Tapi ipagijang Ham do tandukku songon tanduk ni ursa, iminaki Ham do ahu bani minak na bayu;
- ¹¹ (92-12) sombuh do matangku mangidah pardabuh ni munsuhku, anjaha megah pinggolhu manangar parmagou ni siimbang ahu.
- ¹² (92-13) Halak parpintor martumbor do songon kurma, anjaha martunas songon hayu ares i Libanon.
- ¹³ (92-14) Sidea na sinuan i rumah ni Jahowa, sai marbunga do sidea bani alaman ni Naibatanta;
- ¹⁴ (92-15) marbuah do sidea age dob matua, tongtong tabun anjaha maratah,
- ¹⁵ (92-16) laho mangambilankon, “Pintor do Jahowa, Batu Ginggingku, anjaha seng dong hagedukon Bani.”

Jahowa, Raja Siparkuasa

93 ¹ Jahowa do Raja, marpakeian hamuliaon do Ia. Marpakeian anjaha margonditkon hagogohon do Jahowa. Tongon, ipajonam do dunia on, seng anjai dugur.

² Totap do paratas-Mu humbani nabasaia, humbani mula ni mulani domma dong Ham.

- ³ Marbanggal do bah, Ham Jahowa, maling do pardosong ni bah, doras tumang do parhasakni.
- ⁴ Gogohan marimbang parhasak ni bah marbanggal. gogohan marimbang pargilumbang ni laut, lobih markuasaan do Jahowa i nagori atas.
- ⁵ Hasaksian-Mu, tongon do tarhatengerhon, hapansingon do na patut bani rumah-Mu, Ham Jahowa ronsi sadokah ni dokahni.

Naibata do Sipambalas na Bonar

- 94** ¹ Ham Naibata Jahowa sipambalas, Ham Naibata, sipambalas, roh ma Ham ibagas sondang-Mu!
- ² Jongjong ma Ham, ale Sipanguhum tanoh on, balaskon Ham ma pambahenan ni sigijang uhur.
- ³ Piga dokah on parjahat in, Ham Jahowa, piga dokah on, sai marsurak-surak parjahat in?
- ⁴ Sai hata hajungkaton do isahapkon sidea, sai toal do parsahap ni ganup sihorjahon hajahaton.
- ⁵ Sai irojati sidea do bangsa-Mu, Ham Jahowa, sai iodoh-odoh do parbagianan-Mu.
- ⁶ Ibunuhi sidea do na mabalu pakon halak panginsolat, anjaha isongkiki halak na tading maetek,

- ⁷ nini, “Seng ididah Jahowa in, anjaha seng sai ipabotoh-botoh Naibata ni si Jakob.”
- ⁸ Botoh ma, ale halak na oto i tongah-tongah ni bangsa in, anjaha hanima halak na lontong, antigan pe maruhur hanima?
- ⁹ Ia, sisuan pinggol, mintor ma lang marpanangar? Ia, sijadihon mata, mintor ma lang marpangidah?
- ¹⁰ Ia, siajar bangsa-bangsa, mintor ma lang manguhum? Ia, sipangajari jolma, mintor ma lang marpambotoh?
- ¹¹ Jahowa do sitanda pingkiran ni jolma; tongon, haganupan ai logou do.
- ¹² Martuah do halak ni niajar-Mu, Ham Jahowa, anjaha na pinodahan-Mu marhitei titah-Mu.
- ¹³ laho pasonangkonsi bani ari na jahat, ronsi siap ihurak tanoman bani parjahat.
- ¹⁴ Halani, seng anjai tulakon ni Jahowa bangsa-Ni, anjaha seng tadingkonon-Ni parbagianan-Ni.
- ¹⁵ Tongon, sai mulak hu hapintoron do uhun, anjaha ihutkonon ni sagala na pintor uhur do in.
- ¹⁶ Ise ma nani hasomanku laho mangimbang parjahat? Ise ma nani sipangurupi bangku manlawan sihorjahon hajahaton?

- ¹⁷ Ambit lang Jahowa sipangurupi bangku, narus ma marianan tonduyhu bani ianan na malungun.
- ¹⁸ Anggo hupingkir, “Jiris ma naheihu, jadi itungkol parontou ni uhur-Mu do ahu, Ham Jahowa.”
- ¹⁹ Sanggah lutu pingkiranku ibagas, jadi apoh-apoh-Mu do pasonang uhurhu.
- ²⁰ Mintor sapanriah ma Ham pakon halak sihunduli hotak hamagouan, na mamingkiri hamagouan marsipakulah-kulahkon habonaron?
- ²¹ Iparburu sidea do hosah ni parpintor, anjaha idabuh uhum bani daroh na so marpipot.
- ²² Tapi Jahowa do batar-batar bangku, anjaha Naibatanku dolog batu, haporusan bangku.
- ²³ Ia do mambalaskon bani sidea hajahaton ni sidea ai; boiskonon-Ni do sidea halani hajahaton ni sidea. Tongon, boiskonon ni Jahowa Naibatanta do sidea.

Ojur-ojur Pasangap Jahowa ampa Mambalosi-Si

- 95** ¹ Eta, dodingkon hita ma Jahowa, olobkon hita ma dolog batu, hatuahonta in.
- ² Roh ma hita hu lobei-Ni marhasoman puji-pujian, olobkon hita ma Ia marhitei doding.

- ³ Ai Naibata na bangga do Jahowa, Raja Na Bolon, siatasi sagala naibata-naibata.
- ⁴ Ibagas kuasa-Ni do luhung ni tanoh, anjaha gok Bani do pakpak ni dolog.
- ⁵ Ia do simada laut anjaha Ia do na manompa ai, anjaha tanoh darat, tangan-Ni do na manjadihon ai.
- ⁶ Masuk ma hita, manrogop anjaha marsombah; manrogop ma hita i lobei ni Jahowa, Sitompa hita.
- ⁷ Ai Ia do Naibatanta, anjaha hita bangsa pinarmahan-Ni, biribiri tinogu-togu ni tangan-Ni. Ah, sadari on ma namin itangihon hanima sora-Ni!
- ⁸ Ulang ma pahengkeng hanima uhurnima, songon na i Meriba, songon bani ari na i Massa, i halimisan,
- ⁹ sanggah ni lajou ni ompungnima Ahu, niuji ni sidea ai Ahu, age pe dob ididah pambahenan-Ku.
- ¹⁰ Ompat puluh tahun dokahni sai sogam do uhur-Hu bani bangsa on, jadi ningku ma, "Bangsa paruhur na kahou do sidea, seng itandai sidea dalan-Ku."
- ¹¹ Halani ai marbija do Ahu ibagas ringis-Ku: Seng malo masuk sidea bani parsaranan-Ku.

Puji-pujian bani Jahowa, Raja Siuhum Tanoh on

- 96** ¹ Dodingkon nasiam ma sada doding na bayu bani Jahowa, dodingkon nasiam ma Jahowa, ale ganup tanoh on!
- ² Dodingkon nasiam ma Jahowa, puji ma goran-Ni; ambilankon nasiam ma hatuahon-Ni, ganup ari!
- ³ Baritahon nasiam ma i tongah-tongah ni sipajuh begu-begu hamuliaon-Ni, i tongah-tongah ni bangsa-bangsa halongangan binahen-Ni ai.
- ⁴ Ai bangga do Jahowa, talup tumang sipujion, marjumbalang do Ia i atas ni sagala naibata.
- ⁵ Ai na lang do naibata ni bangsa-bangsa, tapi Jahowa do sijadihon langit.
- ⁶ Hasangapon ampa hamuliaon do i lobei-Ni, hagogohon pakon hatunggungan do bani ianan-Ni na ma pansing in.
- ⁷ Bere nasiam ma bani Jahowa, ale bangsa-bangsa, bere nasiam ma bani Jahowa hamuliaon pakon hagogohon.
- ⁸ Bere nasiam ma bani Jahowa hamuliaon ni goran-Ni, boan nasiam ma galangan, masuk ma nasiam bani alaman-Ni!
- ⁹ Manrogop ma nasiam i lobei ni Jahowa marpakeian na ma pansing, hitir-hitir ma i lobei-Ni, ale ganup tanoh on!

- ¹⁰ Hatahon ma i tongah ni bangsa parbegu,
 “Jahowa do Raja; la do na pajonamkon
 dunia on, seng anjai dugur; uhumon-Ni do
 sagala bangsa ibagas hapintoron.”
- ¹¹ Marmalas ni uhur ma langit anjaha marolob-
 olob ma tanoh on, marhasak ma laut pakon
 pangisini.
- ¹² Marmalas ni uhur ma ladang ampa ganup
 na ijai, age sagala hayu na i harangan
 marolob-olob ma,
- ¹³ i lobei ni Jahowa, ai tongon roh ma la
 manguhum tanoh on. Uhumon-Ni ma dunia
 on ibagas hapintoron ampa bangsa-bangsa
 ibagas hasintongan-Ni.

Raja na Marjumbalang do Jahowa

- 97** ¹ Jahowa do Raja. Marsurak-surak ma tanoh
 on, marmalas ni uhur ma sagala pulou!
- ² Hombun ampa na golap marimpot-impot do
 manginggoti-Si, hapintoron pakon uhum do
 onjolan ni hotak-Ni.
- ³ Mardalan do apuy i lobei-Ni, laho mamboiskon
 imbang-Ni inggot.
- ⁴ Hilap-Ni do manondangi dunia on, ididah tanoh
 ma ai gabe dugur.
- ⁵ Dolog-dolog malala songon lilin i lobei ni
 Jahowa, i lobei ni Tuhan ni sab tanoh on.

- ⁶ Langit mangambilankon hapintoron-Ni, anjaha sagala bangsa mangidah hamuliaon-Ni.
- ⁷ Maila do sagala sisombah gana-gana, halak na marmogah-mogah bani sisombahonni; ningon marsombah Bani do sagala naibata-naibata.
- ⁸ Mambogei ai marmalas ni uhur ma Sion, marolob-olob boru Juda, halani panguhum-Mu, ale Jahowa.
- ⁹ Ai Ham do, ale Jahowa, Sitimbulan i atas ni sab tanoh on. Gijang tumang do Ham i atas ni sagala naibata.
- ¹⁰ Ihaholongi Jahowa do na mangkagigihon na masambor. Ia do na manramotkon tonduy ni na hinaholongan-Ni, anjaha ipaluah do sidea humbani tangan ni parjahat.
- ¹¹ Marsinalsal do na liarh bani halak parpintor, anjaha malas ni uhur bani sibujur uhur.
- ¹² Marmalas ni uhur na nasiam, ale parpintor, ibagas Jahowa, anjaha puji nasiam ma goran-Ni na pansing in.

Ojur-ujur Mangolobkon Jahowa, Sipaluah in

98 ¹ Sada Psalm. Dodingkon nasiam ma sada doding na bayu bani Jahowa, ai ia do sibahen halongangan; tangan siamun-Ni do na mangurupi-Si, sonai age botohon-Ni na pansing in.

- ² Domma ipabotohkon Jahowa hatuahon-Ni,
i lobei ni bangsa-bangsa ipatalar do
hapintoron-Ni.
- ³ Idingat do idop ni uhur-Ni ampa hasintongan-Ni
bani ginompar ni Israel. Ganup ujung ni
tanoh on mangidah haluahon na humbani
Naibatanta.
- ⁴ Olobkon ma Jahowa, ale sab tanoh on,
marmogah-mogah ma, marsurak anjaha
mandoding ma nasiam!
- ⁵ Puji ma Jahowa marhasoman husapi,
marhasoman husapi ampa doding na
gomos,
- ⁶ marhasoman tarompit pakon sora ni tanduk,
marsurak ma i lobei ni Raja Jahowa.
- ⁷ Mardorom ma laut pakon sagala isini, sonai
dunia on ampa na mangiankonsi.
- ⁸ Martopap-topap ma bah mardalan,
marolob-olob ma rap-rap sagala dolog,
- ⁹ i lobei ni Jahowa, ai roh do la laho manguhum
tanoh on. Uhumon-Ni ma dunia on marhitei
hapintoron ampa sagala bangsa marhitei
hasintongan.

Jahowa, Raja Na Pansing anjaha Na Pintor

99 ¹ Jahowa do Raja, hitir ma sagala bangsa;
marhotak do la bani herubim, dugur ma
tanoh on.

- ² Banggal do Jahowa i Sion, anjaha timbul do la i atas ni sagala bangsa.
- ³ Ipuji sidea ma goran-Mu na timbul anjaha matunggung in! Pansing do la!
- ⁴ Ham Raja siparkuasa, sihaholongi uhum, Ham do patotapkon uhum; Ham do na pamasa hapintoron pakon uhum bani Jakob.
- ⁵ Pagijang nasiam ma Jahowa Naibatanta in, manrogop ma nasiam bani sidogeian ni nahei-Ni! Pansing do la.
- ⁶ Si Musa pakon si Aron, na i tongah-tongah ni malim-Ni, ampa si Samuel na i tongah-tongah ni na mandilo goran-Ni, dilo-dilo do sidea bani Jahowa, jadi ibalosi do sidea.
- ⁷ Humbagas hambun na jongjong do la marsahap bani sidea; idalankon sidea do hasaksian-Ni, ampa titah na binerehon-Ni bani sidea.
- ⁸ Ham Jahowa Naibatanami, ibalosi Ham do sidea, Naibata parontou ni uhur do Ham bani sidea, age pe Siparlulu Ham bani salah ni sidea.
- ⁹ Pagijang nasiam ma Jahowa Naibatanta, manrogop ma nasiam bani dolog-Ni na pansing in! Tongon, pansing do Jahowa Naibatanta.

Ojur-ojur Mamuji Jahowa, Paridop Uhur in

- 100** ¹ Psalm bani galangan hatarimakasihon. Puji ma Jahowa, ale sab tanoh on!
- ² Balosi nasiam ma Tuhan in ibagas malas ni uhur, roh ma nasiam hu lobei-Ni marhasoman olob-olob.
- ³ Botoh nasiam ma, Jahowa, la do Naibata. la do na manompa hita, la do simada hita, bangsa-Ni anjaha biribiri na pinarmahan-Ni.
- ⁴ Masuki nasiam ma horbangan-Ni marhitei hatarimakasihon, sonai alaman-Ni marhitei puji-pujian. Martarima kasih ma nasiam Bani, puji nasiam ma goran-Ni!
- ⁵ Ai pardear layak do Jahowa, ronsi sadokah ni dokahni do idop ni uhur-Ni, anjaha marsundut-sundut do hasintongan-Ni.

Panrajaion ni Raja na Pintor

- 101** ¹ Humbani si Daud. Sada Psalm. Sihol do dodingkononku pasal habujuron ampa uhum; Bamu, ale Jahowa, sihol do ahu mamuji-muji.

² Sihol paruhurhononku do parlahou na sintong. Antigian do Ham roh marayak ahu? Sihol do marparlahou na sintong ahu i tongah ni jabungku.

- ³ Seng ra ahu mannahkon na masambor i lobei ni matangku; magigi do ahu bani horja panlanggaron, seng dais sisonai bangku.
- ⁴ Daoh do humbangku uhur hagedukon, na masambor seng hutanda.
- ⁵ Halak na marhata tundal bani hasomanni, hupasip do, halak parmata na epes ampa sigijang uhur, seng huharosuhkon.
- ⁶ Sai mangkawah do matangku dompak sibujur uhur ni nagori in, ase marianan sidea rapkon ahu; halak na mardalan bani hadaulaton, ai do siparugas bangku.
- ⁷ Seng bulih marianan i rumahku sihorjahon panipuon; halak sihatahon ladung, seng boi jongjong i lobei ni panonggorhu.
- ⁸ Siap sogod do husiapkon parjahat na i nagori in, laho mamboiskon hun huta ni Jahowa sagala sihorjahon hajahaton.

Tonggo Mangkopkop Sion

102 ¹ Tonggo ni sada halak na madoyuk ibagas hagelokkonni, anjaha iuseihon tangisni ai i lobei ni Jahowa. (102-2) Ham Jahowa, tangihon ham ma tonggongku, sai das ma Bamu dilo-dilongku.

- ² (102-3) Ulang lingodkon Ham bohi-Mu humbangku sanggah hasosakanku. Paeleng

Ham ma pinggol-Mu hu bangku; sanggah
hudilo Ham, balosi Ham ma ahu podas.

³ (102-4) Ai magou do ari-ari ni goluhku songon
timus, anjaha gara do holi-holingku songon
parapuyan.

⁴ (102-5) Mosog do pusu-pusungku anjaha
melus songon poyon-poyon, gabe lupa ahu
mangan sipanganonku.

⁵ (102-6) Halani gogoh ni pangorongku, longkot
do holi-holingku bani hulingkulingku.

⁶ (102-7) Songon onggang na i halimisan ahu,
songon langkupa i tongah-tongah ni na
mareong.

⁷ (102-8) Seng ra tarpodom ahu, songon
manuk-manuk na punjung bani tayub do
ahu.

⁸ (102-9) Manipat ari do ahu irisai munsuhku,
halak na manggila dampak ahu, mamapai
marhitei goranku.

⁹ (102-10) Hupangan do abuan songon
ruti, anjaha husaorhon do iluhku bani
siinumonku.

¹⁰ (102-11) halani ringis-Mu pakon gila-Mu;
iangkat Ham do ahu, dob ai iambalhon Ham.

¹¹ (102-12) Songon halinoh na manabad do
goluhku, anjaha melus do ahu songon
poyon-poyon.

- ¹² (102-13) Tapi anggo Ham Jahowa, sadokah ni dokahni do marparatas, anjaha goran-Mu tardingat do marsundut-sundut.
- ¹³ (102-14) Jongjongkon Ham ma, maidop ma uhur-Mu bani Sion, ai domma jumpah panorangni mangkaholongisi, tongon, domma das panorang na binuhul hinan.
- ¹⁴ (102-15) Ai holong do uhur ni juakjuak-Mu bani batuni, anjaha pusok uurni mangidah parreongni.
- ¹⁵ (102-16) Jadi habiaran ni bangsa parbegu ma use goran ni Jahowa, ampa raja-raja na i tanoh on hamuliaon-Mu,
- ¹⁶ (102-17) anggo ipajongjong Jahowa ma use Sion, ipataridahkon diri-Ni ibagas hamuliaon-Ni;
- ¹⁷ (102-18) idompakkon diri-Ni bani tonggo ni halak na so mardiha-diha, anjaha seng mapas uhur-Ni bani elek-elek ni sidea.
- ¹⁸ (102-19) Suratkon ma ai bani sundut na roh, anjaha bangsa na sihol jadi ope, pujion ni ma Jahowa,
- ¹⁹ (102-20) halani marpanatap do la dompak toruh humbani ianan na ma pansing na gijang ai, marpanatap Jahowa hun nagori atas hu tanoh on,

- ²⁰ (102-21) laho manangihon hoih-hoih na tartutup, laho paluahkon halak na dob ondos hu hamatean,
- ²¹ (102-22) ase ibaritahon halak goran ni Jahowa i Sion ampa puji-pujian-Ni i Jerusalem,
- ²² (102-23) bani na martumpu ijai bangsa-bangsa ampa harajaon laho mambalosi Jahowa.
- ²³ (102-24) Ia do na mamonggolhon gogohku i tengah dalan, anjaha ipapondok do ari-aringku.
- ²⁴ (102-25) Ningku, “Ham Naibatangku, ulang alop Ham ahu bani partongahan ni goluhku, Ham pargoluh na marsundut-sundut.
- ²⁵ (102-26) Sapari Ham do na pajonamkon tanohon, anjaha jadi-jadian ni tangan-Mu do sagala langit.
- ²⁶ (102-27) Haganupan ai laho salpu do, tapi totap do anggo Ham; laho buruk do ai haganup songon hiou, songon sakei-sakei igantih Ham sidea, jadi masab ma sidea.
- ²⁷ (102-28) Tapi anggo Ham totap do, seng marpunsa tahun-Mu.
- ²⁸ (102-29) Sai sonang do marianan ginompar ni juakjuak-Mu, anjaha totap do i lobei-Mu ginompar ni sidea.”

Puji-pujian bani Jahowa, Paridop Uhur in

- 103** ¹ Humbani si Daud. Puji ma Jahowa,
ale tonduyhu, anjaha humbani gok ni
uhurhu mamuji goran-Ni na pansing in!
- ² Puji ma Jahowa, ale tonduyhu, anjaha ulang ma
halupahon ganup dear layak-Ni!
- ³ Ia do na manasap sagala dousamu, anjaha na
pamalumkon sagala naboritmu;
- ⁴ na paluahkon goluhmu humbani hamagouan,
na mansortalihon bam dear layak ampa
idop ni uhur,
- ⁵ na pabosurhon sura-suramu marhitei na
madedar, ase mulak bayu haposoonmu
songon manuk-manuk nanggordaha.
- ⁶ Jahowa, na mambahen hapintoron, anjaha na
pasintongkon uhum bani halak na hona
dorun,
- ⁷ Ia do na pabotohkon dalan-Ni bani si Musa,
hubani anak ni Israel pambahenan-Ni.
- ⁸ Paridop ni uhur anjaha pardear layak do
Jahowa, nanget manringis anjaha paridop ni
uhur banggal.
- ⁹ Seng torus la manggila, anjaha seng marah la
ronsi sadokah ni dokahni.
- ¹⁰ Seng ibahen hu banta romban hubani
dousanta, anjaha seng ibalaskon banta
romban hubani hajahatonta.

- ¹¹ Tapi songon gijang ni langit hun tanoh on,
sonai do bangga ni idop ni uhur-Ni bani
sagala na mangkabiari-Si.
- ¹² Songon daoh ni hapoltakan humbani
hasundutan, sonai do ipadaoh
panlanggaronta hun banta.
- ¹³ Songon idop ni uhur ni bapa bani niombahni,
sonai do idop ni uhur ni Jahowa bani sagala
na mangkabiari-Si.
- ¹⁴ Ai ibotoh do sonaha tompanta, idingat do,
orbuk do anggo hita.
- ¹⁵ Ia jolma in, songon poyon-poyon do, marbunga
do ia songon bunga na i talun;
- ¹⁶ montas honsi logou seng dong be ia, anjaha
seng natandai be iananni.
- ¹⁷ Tapi anggo idop ni uhur ni Jahowa totap do
ronsi sadokah ni dokahni bani sagala na
mangkabiari-Si, anjaha hasintongan-Ni
marnini marnono,
- ¹⁸ bani na manramotkon padan binahen-Ni,
pakon na mardingat parentah-Ni laho
mandalankon ai.
- ¹⁹ Domma ipajonam Jahowa paratas-Ni i surga,
anjaha panggomgomion-Ni manrajai
haganup.
- ²⁰ Puji ma Jahowa, nasiam sagala malekat-Ni,
nasiam, sagala puanglima na margogoh,
sipasaud hata-Ni!

- ²¹ Puji ma Jahowa, nasiam sagala bala-Ni, nasiam sagala siparugas Bani, sipasaud harosuh ni uhur-Ni!
- ²² Puji ma Jahowa, ale jadi-jadian-Ni, bani ganup ianan ni harajaon-Ni! Puji ma Jahowa, ale tonduyhu!

**Puji-pujian Mardingat Panompaon
ampa Pambahenan ni Jahowa**

104 ¹ Puji ma Jahowa, ale tonduyhu! Ham Jahowa Naibatangku, bangga tumang do Ham, hasangapon pakon hamuliaon do pakeian Bamu.

² Haliharon do isabingkon Ham Bamu songon salimut, ipaherbang Ham do langit songon tenda.

³ Ibahen Ham do loteng-Mu i babou ni bah, hambun do ibahen Ham gareta-Mu, anjaha mardalan-dalan do Ham i atas ni habong ni logou.

⁴ Ibahen Ham do logou gabe suruhan-Mu, apuy na marjilam-jilam gabe siparugas-Mu.

⁵ Domma ipajonam Ham tanoh on bani palasni, seng anjai dugur be sadokah nidokahni.

⁶ Bah bagas na hampar do manrungkubsi, tinob do sagala dolog ibahen bah.

⁷ Maporus do ai ibahen pangasupi-Mu, tarolos do sidea lintun ibahen sora ni longgur-Mu;

- ⁸ gabe timbul ma dolog, matornoh lombang bani ianan na dob tinotapkon-Mu bani sidea.
- ⁹ Domma itotapkon Ham parbolatan bani bah na so malo lopusanni, seng anjai rungkubonni be tanoh.
- ¹⁰ Ham do na patubuh bah tubuh i lombang-lombang, na mambahen mabaor bahni i holankolang ni dolog-dolog,
- ¹¹ na mambere minum sagala binatang na i talun, anjaha halode jalang sombuh horahni ijai;
- ¹² marasari do i topi ni manuk-manuk na i awang-awang, na patangarhon dodingni hun ranting-ranting.
- ¹³ Ham do na painum dolog humbani loteng-Mu, anjaha bosur do tanoh on marhitei hambun-Mu.
- ¹⁴ Ham do patubuhkon poyon-poyon bani pinahan, ampa suan-suanan sihorjahonon ni jolma, mambahen mandarat ruti humbagas tanoh,
- ¹⁵ ampa anggur laho pamalas uhur ni jolma, pakon minak na mambahen marminak bohi pakon ruti na pagogohkon uhur ni jolma.
- ¹⁶ Bosur do ganup hayu ni Jahowa, hayu ares na i Libanon, na sinuan-Ni ai;
- ¹⁷ ijai do marasari manuk-manuk, tanda ulog marjabu bani tusam.

- 18 Dolog na gijang do ianan bani bedar, anjaha
dolog batu haporusan bani sorigala.
- 19 Ham do mambahen bulan laho manotapkon
panorang, mata ni ari ibotoh do ianan
hasundutanni.
- 20 Ia dongkon Ham do na golap jadi tubuh ma
borngin, ai ma panorang mandarat sagala
binatang harangan.
- 21 Singa ajar-ajar maraum mangindahi sisorohon,
ipangindo sipanganonni humbani Naibata.
- 22 Anggo poltak ma mata ni ari, mulak bei ma
sidea, manggompang ibagas liangni.
- 23 Kaluar ma jolma manohu horjani, mandalankon
lahoanni ronsi bod ari.
- 24 Buei tumang do jadi-jadian-Mu, Ham
Jahowa, haganupan in ipauli Ham marhitei
hapentaran, gok do tanoh on bani na
tinompa-Mu.
- 25 Tonggor ma, laut na ampar bolag tumang,
ijai do gumayom, seng habilangan,
binatang-binatang na etek age na bangga.
- 26 Ijai do manjuluri binatang laut na majombut,
sonai age Leviatan na jinadihon-Mu,
marguro-guro do ijai.
- 27 Haganup, Bamu do marpangarapan, ase ibere
Ham sipanganonni bei bani panorangni.

- 28 Anggo ibere Ham bani sidea, boi ma sidea patumpuhon; anggo ibuha Ham tangan-Mu, bosur ma sidea bani na madear.
- 29 Anggo iponopkon Ham bohi-Mu, tarsonggot ma sidea; anggo ibuat Ham hosahni, matei ma sidea, mulak bani orbukni hinan.
- 30 Anggo itongos Ham Tonduy-Mu, tartompa ma sidea, anjaha bayu ma rupa ni tanoh on ibahen Ham.
- 31 Ronsi sadokah ni dokahni do hamuliaon ni Jahowa, malas do uhur ni Jahowa mangidah jadi-jadian-Ni.
- 32 Mangkawah la bani tanoh on gabe dugur ma, ijamah dolog gabe martimus ma.
- 33 Sai dodingkononku do Jahowa sadokah goluhku, sai dodingkononku do Naibatangku sadokah dong ahu.
- 34 Sai marosuh ma la bani dodingku, marmalas ni uhur do anggo ahu ibagas Jahowa.
- 35 Sai bois ma sagala pardousa hun tanoh on, anjaha ulang be dong halak parjahat. Puji ma, Jahowa ale tonduyhu! Haleluya!

**Puji-pujian halani Panogu-noguo
ni Jahowa bani Bangsa-Ni**

105 ¹ Puji nasiam ma Jahowa, dilo ma goran-Ni, pabotohkon nasiam ma

pambahenan-Ni i tongah-tongah ni
bangsa-bangsa!

² Dodingkon nasiam ma la, dodingkon ma
puji-pujian Bani, sahapkan nasiam ma
ganup horja halongangan-Ni in.

³ Marmogah-mogah ma nasiam ibagas goran-Ni
na pansing in; marmalas ni uhur ma sagala
sipindahi Jahowa.

⁴ Pindahi nasiam ma Jahowa pakon hagogohon-
Ni, pindahi nasiam ma tongtong bohi-Ni.

⁵ Paingat-ingat nasiam ma sagala halongangan na
binahen-Ni, tanda halongangan-Ni pakon
uhum niluarhon ni pamangan-Ni,

⁶ nasiam, ale ginompar ni si Abraham, juakjuak-Ni
in, nasiam, ale anak ni si Jakob, na pinilih-Ni
in!

⁷ la Jahowa, la do Naibatanta, sab do bani dunia
on uhum-Ni.

⁸ Idingat do tongtong padan na binahen-Ni,
hata na niluarhon-Ni hubani marribu-ribu
sundut,

⁹ ai ma padan binahen-Ni bani si Abraham ampa
bulawan-Ni bani si Isak.

¹⁰ Ipajongjong do ai bani si Jakob gabe aturan,
bani Israel gabe padan sadokah ni dokahni;

¹¹ nini, "Hu bam do berehonon-Ku tanoh Kanaan;
gabe tean-teanan tanoh parbagiananmu."

- ¹² Sanggah seng sadiha ope bilangan ni sidea,
otik hansa anjaha panginsolat ijai;
- ¹³ marbungkas-bungkas humbani bangsa hu
bangsa, humbani sada harajaon hu harajaon
na legan,
- ¹⁴ seng ibere age sahalak mangarsik sidea, ipapai
do tene raja-raja marhalanohon ni sidea:
- ¹⁵ Nini, "Ulang kahua hanima halak na niminakan-
Ku, ulang bahen hanima na jahat bani
nabing-Ku."
- ¹⁶ Sanggah na ipamasa lohei bani tanoh in,
anjaha na binolahkon-Ni sagala parbohalan
ni sipanganon.
- ¹⁷ Isuruh ma sada halak parlobei ni sidea, ai ma si
Josep na tarjual songon jabolon.
- ¹⁸ Naheini igari bosi janah borgokni irantai bosi
- ¹⁹ paima das nidok ni hata-Ni, gabe saud hata ni
Jahowa.
- ²⁰ Isuruh raja ma na paluahkonsi, sirajai
bangsa-bangsa mangkatahon paluahon ia;
- ²¹ ipabangkit ma ia gabe tuan i rumahni, ampa
panggomgom bani sagala artani,
- ²² laho mangajari gamot-gamotni mangihutkon
rosuhni, ampa mamodahkon hauhuron bani
pangintuai-pangintuai.
- ²³ Dob ai roh ma Israel hu Masir, manginsolat ma
si Jakob i tanoh ni si Ham.

- 24 Ibaheh ma bangsa-Ni ai manggargar tumang,
gogohan humbani imbangni.
- 25 Ipagoling ma uhur ni sidea laho mandomdomi
bangsa-Ni, mambahen akal-akal bani
juakjuak-Ni.
- 26 Dob ai isuruh ma si Musa, juakjuak-Ni ai, pakon
si Aron, na pinilih-Ni ai.
- 27 Ipamasa sidea ma partanda ni Jahowa i tanoh
Masir ampa halongangan i tanoh ni si Ham.
- 28 Iparoh ma na golap gabe lotir ma, tapi seng
iparuhurhon sidea hata-Ni.
- 29 Ipaubah do bah ni sidea gabe daroh, gabe
matei ma sagala dengke ni sidea.
- 30 Gumayom ma tiktikan i tanoh ni sidea, pala das
hu kamar ni raja-raja ni sidea.
- 31 Marsahap ma la, jadi marrohan ma siranggang,
rongit bani sab nagori ni sidea.
- 32 Itongos do bani sidea udan sira-sira, gok jirlam
ni apuy do tanoh ni sidea.
- 33 Iparseda ma pohon anggur pakon hayu ara
ni sidea, marpongolan do hayu bani sab
nagori ni sidea.
- 34 Marsahap ma la, marrohan ma balang ampa
tamponok na so habilangan,
35 jadi ipampangani ma sagala suan-suanan i
tanoh ni sidea, iboiskon ma gogoh ni juma
ni sidea.

- ³⁶ Ibogbog ma sagala bunga-tubuh i nagori ni sidea, pamungkah ni gogoh ni sidea ganupan.
- ³⁷ Dob ai iboan ma sidea mandarat marnah omas pakon pirak, seng dong humbani marga ni sidea na targompang.
- ³⁸ Malas ma uhur ni Masir dob haluar sidea, ai sogop do bani sidea biar mangidah Israel.
- ³⁹ Ipaherbang ma hambun manrongkob bani sidea, sonai apuy laho paliharhon borngin.
- ⁴⁰ Mangindo sidea, gabe iparoh ma leto, anjaha ipabosur ma sidea mangan ruti na hun nagori atas.
- ⁴¹ Ibuha ma dolog batu, jadi marbaoran ma bah, mardalan i halimisan songon binanga,
- ⁴² halani idingat do hata-Ni na pansing in, ai ma na hubani si Abraham, juakjuak-Ni in.
- ⁴³ Ipadarat do bangsa-Ni ai ibagas malas ni uhur, na pinilih-Ni ai marhasoman olob-olob.
- ⁴⁴ Ibere ma bani sidea tanoh ni sipajuh begu-begu
- ⁴⁵ ase iramotkon sidea aturan-Ni, anjaha iparlahouhon titah-Ni. Haleluya!

**Totap ni Idop ni Uhur ni Naibata
hansi pe sai Mangosei Israel**

106 ¹ Haleluya! Puji ma Jahowa, ai pardear layak do la, anjaha ronsi sadokah ni dokahni do idop ni uhur-Ni.

- ² Ise do na boi mambaritahon sagala pambahenan ni Jahowa, anjaha pabogeihon puji-pujian-Ni?
- ³ Martuah ma halak na manramotkon uhum, na mandalankon hapintoron tongtong.
- ⁴ Ingat Ham ma ahu, ale Jahowa, domu hubani pangkaholongi-Mu bani bangsa-Mu, tohu Ham ma ahu rap pakon haluahon na hun Bamu;
- ⁵ ase hupaidah-idah hadearon ni na pinilih-Mu, ase marolob-olob ibagas olob-olob ni bangsa-Mu, anjaha mamuji-muji rap pakon pusaka-Mu.
- ⁶ Domma mardousa hanami songon ompungnami, domma marsalah anjaha domma manjahati hanami.
- ⁷ Ompungnami i Masir seng iartihon halongangan na binahen-Mu, seng idingat sidea buei ni hinalayak-Mu, tapi manlawan do sidea dompak Sitimbulan in i lambung ni laut arung-arung.
- ⁸ Tapi ipaluah do sidea halani goran-Ni, laho pabotohkon hagogohon-Ni.
- ⁹ Iporjat do laut arung-arung, gabe horah ma, ipadalan ma sidea humbani luhung ni bah songon na bani halimisan.

- 10 Ipaluah do sidea humbani tangan ni halak pardomdom, anjaha itobus sidea humbani tangan ni munsuh.
- 11 Irungkub bah do imbang ni sidea, sahalak pe lang na tading.
- 12 Jadi porsaya ma sidea bani hata-Ni, anjaha idodingkon puji-pujian Bani.
- 13 Tapi podas-podas do sidea lupa bani pambehanan-Ni, seng ra sidea marguru bani rosuh-Ni.
- 14 Isuhun-suhuni sidea do hisap-hisapni i halimisan, anjaha ilajou do Naibata i tanoh dorging.
- 15 Ibere do bani sidea na hinarosuhkon ni sidea, tapi ibahen do sobalan tonduy ni sidea.
- 16 Simburu do sidea bani si Musa i parlampolampoan ai, sonai homa bani si Aron na pinapansing bani Jahowa,
- 17 Jadi ipangangang tanoh ma babahni mamondut si Datan, anjaha irungkub humpulan ni si Abiram.
- 18 Apuy pe gara ma bani hulanan ni sidea, anjaha jirlam ni ai mangankon parjahat ai.
- 19 Ipauli sidea do sada anak ni lombu i Horeb anjaha isombah sidea ma gana-gana na tinuang ai.

- ²⁰ Igantihkon sidea do hasangapon ni Naibata,
bani gana-gana ni lembu sipangan
poyon-poyon.
- ²¹ Lupa do sidea bani Naibata na paluahkon
sidea, na mambahen habanggalon i tanoh
Masir,
- ²² halongangan na i tanoh ni si Ham ai ampa
pambahenan na majangin i lambung ni laut
arung-arung.
- ²³ Jadi ihatahon Jahowa ma boiskonon sidea,
ambit ulang si Musa, pinilih-Ni ai, jongjong
mangapiti sidea, pahombun ringis-Ni, ase
ulang iboiskon sidea.
- ²⁴ Itulak uhur ni sidea do tanoh harusuh ai, seng
porsaya sidea bani hata-Ni.
- ²⁵ Marmungut-mungut do sidea ibagas
lampolampo ni sidea, seng itangihon sidea
sora ni Jahowa.
- ²⁶ Jadi ipatoltol ma tangan-Ni dampak sidea, laho
manraseihon sidea i halimisan.
- ²⁷ laho mangamburhon ginompar ni sidea, i
tengah-tengah ni sipajuh begu-begu, anjaha
mangerap sidea bani nagori-nagori.
- ²⁸ Ipadohor sidea do dirini bani Baal-Pear, anjaha
ipangan sidea do galangan bani na matei.
- ²⁹ Ipuhoi sidea do ringis ni Jahowa marhitei
pambahenanni, jadi sogop ma sampar i
tengah-tengah ni sidea.

- ³⁰ Jadi jongjong ma si Pinehas, idalankon ma
uhum, gabe sonto ma sampar ai,
³¹ anjaha ihira ma ai gabe hapintonni,
marsundut-sundut ronsi sadokah ni
dokahni.
- ³² Dob ai ipuhoi sidea do ringis-Ni bani Bah
Meriba, gabe mangonai hasedaon bani si
Musa halani sidea;
³³ ai sai igitiki sidea do uhurni, gabe tarlopus
bibirni marsahap.
- ³⁴ Seng iboiskon sidea sagala bangsa, songon na
dob hinatahon ni Jahowa hubani sidea.
- ³⁵ tapi ipasaor-saor sidea do dirini bani
sipajuh begu-begu, anjaha iguruhon do
pambahenan ni sidea.
- ³⁶ Ibalosi sidea do sisombahon ni sidea, ai ma
gabe siding bani sidea.
- ³⁷ Igalangkon sidea do anak ni sidea pakon boru
ni sidea, bani setan-setan.
- ³⁸ Iduruskon sidea do daroh na so marpipot,
ai ma daroh ni anak pakon boru ni sidea,
ginalangkon ni sidea bani sisombahon
ni halak Kanaan, gabe mabutak tanoh in
ibahen sapata ni daroh.
- ³⁹ Ipabutak sidea do dirini marhitei parlahouni,
gabe marbangkis sidea marhitei horjani.
- ⁴⁰ Jadi gara ma ringis ni Jahowa dompak
bangsa-Ni, gabe magigi la bani pusaka-Ni.

- 41 Iondoskon ma sidea hu tangan ni sipajuh
begu-begu, gabe halak na mandomdomi
sidea ma manggomgomi sidea.
- 42 Iodoh-odoh munsuh ni sidea ma sidea, gabe
tunduk ma sidea hu toruh ni tanganni.
- 43 Gati tumang do ipaluah sidea, tapi sai ilawan
sidea do rosuh-Ni, gabe mogap halani
hajahatonni.
- 44 Tapi itatap Jahowa do hasosakan ni sidea,
sanggah na itangar doruh-doruh ni sidea.
- 45 Idingat ma padan-Ni na bani sidea, anjaha
isolsoli uhur-Ni domu hubani banggal ni
idop ni uhur-Ni.
- 46 Jadi dapotan idop ni uhur ma sidea ibahen,
humbani halak na manaban sidea.
- 47 Paluah Ham ma hanami, ale Jahowa,
Naibatanami, pahumpul Ham ma hanami
humbani sipajuh begu-begu, ase martarima
kasih hanami bani goran-Mu na pansing in,
anjaha marmegah-megah hanami mamuji
Ham.
- 48 Na puji ma Jahowa, Naibata ni Israel, humbani
sadokah ni dokahni ronsi sadokah ni
dokahni, anjaha haganup ma bangsa
mangkatahon, "Amen! Haleluya!"

Doding Puji-pujian ni Halak na Pinaluah ni Jahowa

107 ¹ Puji ma Jahowa, ai pardear layak do la; tongon ronsi sadokah ni dokahni do idop ni uhur-Ni.

² Sonai ma sihatahononkon ni halak na pinaluah ni Jahowa, na pinaluah-Ni humbani odoh-odoh ni hasosakan,

³ na pinahumpul-Ni humbani sagala nagori, hun hapoltakan pakon hun hasundutan, hun utara pakon hun dangsina.

⁴ Sidea na mawat-awat i halimisan, bani ianan na lungun, na seng dapotan dalam hu huta siiankonon,

⁵ na horahan loheian, pala madotei uhurni ibagas,

⁶ tapi na dilo-dilo bani Jahowa ibagas hasosakanni, gabe ipaluah sidea humbani harusakan ni sidea,

⁷ ibobahon sidea bani dalam na pintor, ase das sidea bani huta siianonkon.

⁸ Ningon pujion ni sidea do Jahowa, halani idop ni uhur-Ni ampa halongangan na binahen-Ni bani anak ni jolma,

⁹ halani ipasombuh do tonduy na horahan, anjaha ipabosur tonduy na loheian bani na madear.

- 10 Sidea na hundul bani na golap ampa na
golap marimpot-impot, na hona gari bani
hamarsikon ampa bosu,
- 11 halani ilanggar sidea hata ni Naibata, anjaha
mapas bani podah ni Sitimbulan in,
- 12 gabe ipatoruh uhur ni sidea marhitei halojaon,
mangkatargompang sidea seng dong na
mangurupi,
- 13 tapi na dilo-dilo bani Jahowa ibagas
hasosakanni, gabe ipaluah sidea humbani
harusakon ni sidea,
- 14 ipadarat sidea humbani na golap marimpot-
impot, anjaha irotapi gari ni sidea.
- 15 Ningon pujion ni sidea do Jahowa, halani idop
ni uhur-Ni ampa halongangan na binahen-Ni
bani anak ni jolma,
- 16 halani na dob pinarseda-Ni ai horbangan
tombaga anjaha irosaki oruk-oruk bosu.
- 17 Sidea na marsik halani parlahouni na
masambor, anjaha hona bogbogan halani
hajahatonni,
- 18 na mangkagigihon sagala sipanganon, pala
domma das bani horbangan ni hamatean,
- 19 tapi na dilo-dilo bani Jahowa ibagas
hasosakanni, gabe ipaluah sidea humbani
harusakon ni sidea.
- 20 itongos hata-Ni anjaha ipamalun sidea, ipaluah
sidea humbani tanoman.

- 21 Ningon pujion ni sidea do Jahowa, halani idop
ni uhur-Ni ampa halongangan na binahen-Ni
bani anak ni jolma,
- 22 ningon galangkonon ni sidea do galangan
puji-pujian, anjaha baritahononni
pambahenan-Ni ai marhitei olob-olob.
- 23 Sidea na markapal i laut, na marboniaga
mandipari bah bolag,
- 24 na mangidah jadi-jadian ni Jahowa, ampa
halongangan na binahen-Ni ibagas laut,
- 25 marsahap ma la, gabe roh ma logou haba-haba,
marbanggal gilumbang;
- 26 naik sidea songon na hu langit, turun use hu
toruh, hu na bagas, magou uhurni halani
hasosakan,
- 27 mirdong sidea anjaha rebad-rebad songon
halak na mabuk, magou haganup
hapandeian ni sidea,
- 28 tapi na dilo-dilo bani Jahowa ibagas
hasosakanni, gabe ipaluah sidea humbani
harusakon ni sidea,
- 29 ipasoh ma haba-haba ai gabe sonang, minop
homa pakon gilumbang.
- 30 gabe marmalas ni uhur sidea halani na minop
ai, anjaha iboban sidea das bani labuhan na
sinintani.

- 31 Ningon pujion ni sidea do Jahowa, halani idop
ni uhur-Ni ampa halongangan na binahen-Ni
bani anak ni jolma,
- 32 ningon patimbulon ni sidea la i tongah-
tongah ni tumpuan ni bangsa in, anjaha
maningon pujion do la bani harungguan ni
pangintuai-pangintuai.
- 33 la do na paubahkon bah mardalan gabe
halimisan, pakon tanoh na gokan bah gabe
tanoh dorging;
- 34 tanoh na lambutan gabe tanoh garam, halani
hajahaton ni halak na marianan ijai.
- 35 la do na paubahkon halimisan gabe tao, tanoh
dorging gabe hatubuhan ni bah.
- 36 Ibahen do ijai marianan halak na loheian,
anjaha ijai ma itombei sidea huta siiankonon
ni sidea.
- 37 Isuani sidea ma juma anjaha ipungkah pohon
anggur, na mambere ganup tahun gogohni.
- 38 Ipasu-pasu do sidea manggargar, anjaha
pinahanni seng hurang ibahen.
- 39 Tapi lambin moru ma sidea anjaha roh toruhni,
halani pandorunon, sitaronon pakon
hasombuhon.
- 40 la na parohkon hahirion bani halak na
sangap-sangap, la do pakahou sidea bani
halimisan na so dong dalan.

- ⁴¹ Tapi halak na sombuh ipagijang do humbani hadoyukon, anjaha ipabuei do ginompar ni sidea marhulan-hulan.
- ⁴² ididah halak parpintor ma ai gabe marmalas ni uhur, tapi sagala sihorjahon hajahaton itutup bei ma babahni.
- ⁴³ Barang ise na pantas maruhur, iparimbagaskon ma ai, anjaha iparuhurhon ma pangidopi ni Jahowa.

Doding Puji-pujian ampa Tonggo Elek-elek

(ay. 2-6: pausih Ps. 57:8-12)

- 108** ¹ Sada doding. Psalm humbani si Daud. (108-2) Sirsir do uhuru, Ham Naibata, sihol do ahu mandoding, Sihol do ahu mamuji-muji. Puho ma ale tonduyhu,
- ² (108-3) puho ma ale arbap pakon husapi, sihol puhoanku do buha siang ari.
- ³ (108-4) Sihol pujionku do Ham, ale Jahowa, i tongah-tongah ni bangsa-bangsa, sihol dodingkononku do Ham i tongah-tongah ni marga-marga.
- ⁴ (108-5) Ai gijangan do marimbang langit idop ni uhur-Mu, anjaha hasintongan-Mu das do ronsi hambun.
- ⁵ (108-6) Patimbul Ham ma diri-Mu mangatasi langit, Ham Naibata, anjaha hu sab tanoh on hamuliaon-Mu,

- ⁶ (108-7) ase maluah halak na hinaholongan-Mu.
Paluah Ham ma marhitei tangan siamun-Mu,
anjaha balosi Ham ma ahu.
- ⁷ (108-8) Domma marsahap Naibata ibagas
rumah-Ni na ma pansing: Sihol do Ahu
marsurak-surak, sihol do bagion-Ku Sikem,
anjaha pamah Sukot sibaron-Ku.
- ⁸ (108-9) Ahu do simada Gilead, Ahu do
simada Manase; Efraim ai ma tangkuluk
bani ulung-Ku, anjaha Juda tungkot ni
harajaon-Ku.
- ⁹ (108-10) Moab ai ma mangkuk parburihan-Ku,
hu Edom husampakkon sipatung-Ku,
marsurak hamonangan do Ahu pasal
Palistim.
- ¹⁰ (108-11) Ise do nani mambobai ahu hu huta na
toguh ai? Ise do manaruhkon ahu das hu
Edom?
- ¹¹ (108-12) Ai lang Ham do, ale Naibata, na dob
manulak hanami, anjaha lang ra Ham luar,
ale Naibata, mangkasomani hanami?
- ¹² (108-13) Bere Ham ma pangurupion bennami,
dompok imbangnami, ai soya-soya do
pangurupi ni jolma.
- ¹³ (108-14) Marhasoman Naibata tardalankon
hita do horja habanggalon, anjaha la sandiri
do manrojati imbangta.

Tonggo bani Sada Halak na Pinarburu

- 109** ¹ Bani pambobai koor. Humbani si Daud.
Sada Psalm. Ham Naibata, sipujionku,
ulang ma sip Ham!
- ² Ai ngangang do dampak ahu babah ni parjahat
pakon panipu, marsahap do sidea dampak
ahu marhasoman dilah siparladung.
- ³ Marhitei hata domdom iinggoti sidea ahu,
anjaha iporangi sidea do ahu seng marhala.
- ⁴ Balos ni holong ni uhurhu iaduhon sidea do
ahu, tapi anggo ahu sai martonggo do.
- ⁵ Ihonahon sidea do bangku hajahaton balos
ni na madear, anjaha domdom balos ni
pangkaholongingku.
- ⁶ Pahehe Ham ma parjahat dampaksi, anjaha
halak sipanukas jongjong i siamunni.
- ⁷ Bani na iuhumi ia, sai luar ma ia songon
parjahat, anjaha tonggoni sai gabe dousa
ma.
- ⁸ Sai roh otikni ma umurni, anjaha halak na legan
ma mambuat pangkatni.
- ⁹ Sai tading maetek ma niombahni, anjaha
mabalu ma jolmani.
- ¹⁰ Sai mambur merap ma niombahni gabe
sipangindo-indo, daoh sirang humbani
rumahni na dob pinarreong.

- 11 Sai ihabus sipabungahon duit ma sagala na dong bani, anjaha halak na legan mangayob na hinalojahonni.
- 12 Sai ulang ma dong na marholong ni atei bani, sai ulang ma dong na maridop ni uhur bani niombahni na tading maetek.
- 13 Sai ripas ma ginomparni, anjaha sai sasap ma goranni bani sundut na mangihut.
- 14 Sai taringat ma dousa ni na lobeini bani Jahowa, anjaha ulang ma hona sasap dousa ni inangni.
- 15 Tongtong ma ai i lobei ni panonggor ni Jahowa, anjaha masab ma hun tanoh on pardingatan pasalsi,
- 16 halani lang idingat mambahen idop ni uhur, tapi ipardakdak do halak na madoyuk pakon na masombuh, sonai age paruhur na madotei sihol mambunuh sidea.
- 17 Holong do uhurni bani bura-bura, sai mangonai ma ai hu bani; seng marosuh ia mamasu-masu, sai daoh ma ai hun bani.
- 18 Marpakeian bura-bura do ia, sai itorusi ma ia songon bah, anjaha songon minak hubagas holi-holini;
- 19 sai songon sabling na sinabingkon ma ai bani, anjaha songon gondit na tongtong longkot bani binongeini.

- 20 Ai ma namin upah hambani Jahowa hubani sagala na manlawan ahu, pakon hambani parsahap na masambor dompak ahu.
- 21 Tapi anggo Ham, ale Jahowa, Tuhanku, apiti Ham ma ahu halani goran-Mu! Paluah Ham ma ahu, romban hubani idop ni uhur-Mu.
- 22 Ai doyuk anjaha masombuh do ahu, anjaha uhurhu maborit do ibagas.
- 23 Magou do ahu songon halinoh bani panorangni marganjang, anjaha ipirpirhon do ahu songon balang.
- 24 Reod-reod do towodku halani marpuasa, merung do dagingku seng martaboh.
- 25 Siapas-apason mando ahu bani sidea, mangidah ahu, iupir-upirhon do uluni.
- 26 Urupi Ham ma ahu, Ham Jahowa Naibatanku, paluah Ham ma ahu romban hubani idop ni uhur-Mu,
- 27 ase ibotoh sidea tangan-Mu do in, Ham, Jahowa, do sibahen in.
- 28 Mamurai do sidea, tapi Ham do na mamasu-masu. Sai bador ma sidea na manlawan ahu, tapi marmalas ni uhur ma anggo juakjuak-Mu on.
- 29 Sai marpakeian hahirion ma sagala na manukas-nukasi ahu, anjaha habadoron ma manrungkub sidea songon salimut.

- ³⁰ Sai sihol do pujionku Jahowa marhitei pamanganku, anjaha pujionku ma la i tongah-tongah ni halak na mabuei.
- ³¹ Ai la do na jongjong i siamun ni halak na masombuh, laho paluahkansi humbani halak na manguhum hosahni.

Raja Malim na Pinabangkit ni Jahowa

- 110** ¹ Humbani si Daud. Sada Psalm. Nini Jahowa do hubani tuanku; Hundul ma ho husiamun-Kon, paima Hubahen munsummu gabe sidogeian ni naheimu.
- ² Tungkot kuasamu surdukkonon ni Jahowa do hun Sion: Mamarentah ma ham i tongah-tongah ni munsummu!
- ³ Marurup ma bangsamu roh humbani megah ni uhurni bani ari parporanganmu, marpakeian na ma pansing songon namur hubani abingan ni buha siang ari, roh balamu na maposo hu bamu.
- ⁴ Domma marbija Jahowa anjaha seng anjai solsolan-Ni diri-Ni: Malim do ho ronsi sadokah ni dokahni domu songon si Melkisedek.
- ⁵ Tuhan do i siamunmu, irosaki do raja-raja bani arini manringis.

- ⁶ Manguhum do la itongah-tongah ni bangsa-bangsa, gabe radag ma bangkei; irosaki do ulu bani sampalan bolag.
- ⁷ Humbani bah na i topi dalan do la minum, marhitei ai gabe dirgak ma uluni.

Puji-pujian bani Jahowa halani Pambahenan-Ni

- 111** ¹ Haleluya! Pujionku do Jahowa humbani gok ni uhurhu, i lolouan ni halak parpintor ampa bani partumpuan.
- ² Banggal do pambahenan ni Jahowa, patut sidingaton ni sagala na mangkarosuhkon-Si.
- ³ Hamuliaon pakon hasangapon do pambahenan-Ni, anjaha hapintoron-Ni totap do ronsi sadokah ni dokahni.
- ⁴ Ipajongjong do pardingatan bani halongangan-Ni; paridop ni uhur anjaha pardear layak do Jahowa.
- ⁵ Ibere do sipanganon bani na mangkabiari-Si, idingat do padan na binahen-Ni ronsi sadokah ni dokahni.
- ⁶ Hagogohan ni pambahenan-Ni ipatugah do bani bangsa-Ni, marhitei na mambere bani sidea pusaka ni sipajuh begu-begu.
- ⁷ Hasintongan pakon hapintoron do pambahenan ni tangan-Ni, tarhatengerhon do sagala titah-Ni;

- ⁸ totap do ai ronsi sadokah ni dokahni,
sidalankonon ibagas hasintongan ampa
hapintoron.
- ⁹ Domma itongos haluahon bani bangsa-Ni,
ipatotap do padan-Ni ronsi sadokah ni
dokahni, na pansing janah majombut do
goran-Ni.
- ¹⁰ Biar mangidah Jahowa do parmulaan ni
hauhuron, dapotan pangarusion na madear
do sagala na mandalankonsi; totap do
barita-Ni ronsi sadokah ni dokahni.

Hatuahon ni Halak Parpintor

112 ¹ Haleluya! Martuah ma halak na
marhabiaran bani Jahowa, na marosuh
tumang bani titah-Ni.

- ² Markuasa do ginomparni i tanoh on, dapotan
pasu-pasu do sundut ni halak parpintor.
- ³ Hadoharon ampa habayakon do manggoki
rumahni, anjaha hapintoroni totap do
ronsi sadokah ni dokahni.
- ⁴ Marsinalsal do na lihar ibagas na golap bani
halak parpintor; sidear layak, parholong atei
do halak parpintor.
- ⁵ Martuah do halak paridop ni uhur ampa na
ra papinjamkon, anjaha na mandalankon
horjani domu hubani aturan.

- ⁶ Seng anjai dugur ia lalab, gabe sitarsingatan do halak parpintor sadokah ni dokahni.
- ⁷ Seng mabiar ia bani barita na masambor, totap do uhurni marhatengeran bani Jahowa.
- ⁸ Totap do uhurni, seng mabiar ia, ronsi malum uhurni mangidah munsuhni.
- ⁹ Layak do ia marsibere-bere bani halak na masombuh; hapintoronni manongtong do anjaha tandukni timbul do ibagas hamuliaon.
- ¹⁰ ididah parjahat ma ai, gabe marborit ni uhur; patungosngoson do iponni ibahen, hape magou, gabe na lang do sura-sura ni halak parjahat.

**Puji-pujian bani Jahowa Sihopkop
Halak na Masombuh**

113 ¹ Haleluya! Puji nasiam ma, ale juakjuak ni Jahowa, puji nasiam ma goran ni Jahowa!

- ² Na puji ma goran ni Jahowa, humbani sonari ronsi sadokah ni dokahni.
- ³ Humbani hapoltakan ni mata ni ari das hu hasundutan, sai tarpuji ma goran ni Jahowa.
- ⁴ Timbul do Jahowa i atas ni sagala bangsa, i atas ni sagala langit do hamuliaon-Ni.
- ⁵ Ise ma doskon Jahowa, Naibatanta, i nagori atas atap i tanoh on,

- ⁶ na marparatas i babou, anjaha na manatap-natap dompak toruh?
- ⁷ Na pajongjong halak na madorun humbani orbuk, anjaha na pagijangkon halak na masombuh humbani hubang,
- ⁸ laho pahundulhonsi rap pakon halak na sangap, rap pakon halak na sangap ni bangsa-Ni.
- ⁹ Ia do mambahen boratan rumah parinangon na lambang, gabe inang sibuei anak, gok malas ni uhur.

Kuasa ni Jahowa Parandang Dalan bani Bangsa-Ni

- 114** ¹ Sanggah mandarat Israel hun Masir, ginompar ni si Jakob humbani bangsa na legan.
- ² ibahen ma Juda gabe ianan-Ni na ma pansing, anjaha Israel gabe gomgomman-Ni.
- ³ ididah laut ma ai gabe maporus, anjaha Jordan surut hu pudi.
- ⁴ Dolog-dolog manlumpat-lumpat songon biribiri tunggal, buntu-buntu songon anak ni biribiri.
- ⁵ Aha do na masa bam, ale laut, ase maporus ho, anjaha ho, ale Jordan, ase surut ho hu pudi?
- ⁶ Hanima ale dolog-dolog, ase manlumpat-lumpat hanima songon biribiri tunggal, anjaha hanima buntu-buntu songon anak ni biribiri?

- ⁷ Hitir ma, ale tanoh, i lobei ni Tuhan, i lobei ni bohi ni Naibata ni si Jakob,
⁸ na paubahkon dolog batu gabe bah mardalan ampa batu gingging gabe bah tubuh.

Naibata do hansa Sipasangapon

- 115** ¹ Seng bennami, ale Jahowa, seng bennami, tapi bani goran-Mu ma bere Ham hasangapon, halani idop ni uhur-Mu, halani hasintongan-Mu.
² Mase ma hatahonon ni sipajuh begu-begu, “Ija do Naibata ni sidea?”
³ Ia Naibata i nagori atas do, ipasaud do sagala rosuh ni uhur-Ni.
⁴ Sisombah-sombahon ni sidea, ai pirak pakon omas, na pinauli ni tangan ni jolma.
⁵ Dong do babahni, tapi seng boi marsahap; dong do matani, tapi seng marpangidah.
⁶ Dong do pinggolni, tapi seng marpanangar; dong do igungni, tapi seng marpanganggoh.
⁷ Dong do tanganni, tapi seng boi manjamah; dong do naheini, tapi seng boi mardalan; seng luar sora humbani tolonanni.
⁸ Sai songon sidea ma halak na paulihonsi, sagala halak na martenger ni uhur hujai.
⁹ Ale Israel, porsaya ma bani Jahowa! Ia do pangurupi bani sidea pakon gantar bani sidea.

- ¹⁰ Ale ginompar ni si Aron, porsaya ma bani Jahowa! Ia do pangurupi bani sidea pakon gantar bani sidea.
- ¹¹ Nasiam sihabiari Jahowa, porsaya ma bani Jahowa! Ia do pangurupi bani sidea pakon gantar bani sidea.
- ¹² Idingat Jahowa do hita, pasu-pasuon-Ni, pasu-pasuon-Ni do ginompar ni Israel, pasu-pasuon-Ni do ginompar ni si Aron.
- ¹³ Pasu-pasuon-Ni do na mangkabiari Jahowa, dakdanak rap pakon na magodang.
- ¹⁴ Sai martambah ma nasiam ibahen Jahowa, nasiam pakon anak nasiam.
- ¹⁵ Sai pinasu-pasu ma nasiam humbani Jahowa, sitompa langit pakon tanoh on.
- ¹⁶ Nagori atas Jahowa do simadasi, tapi tanoh on ibere do bani jolma manisia.
- ¹⁷ Sedo na dob matei mamuji Jahowa, sedo halak na dob tuad hu nagori toruh.
- ¹⁸ Tapi hita, hita do na mamuji Jahowa, humbani sonari ronsi sadokah ni dokahni. Haleluya!

Doding Puji-pujian ni Sada Halak na Pinaluah humbani Mara ni Hamatean

116 ¹ Holong do uhur hubani Jahowa, halani itangihon do sorangku ampa elek-elekku.

- ² Halani ipaeleng do pinggol-Ni dompak ahu,
sai padilo-diloonku do la sadokah ahu
manggoluh.
- ³ Ililiti rantei ni hamatean do ahu, anjaha biar
nagori toruh do mandorab ahu; mandagei
hasunsahan ampa sitaronon do ahu.
- ⁴ Tapi hudilo ma goran ni Jahowa: Ham Jahowa,
paluah Ham ma tonduyhu!
- ⁵ Paridop ni uhur do Jahowa anjaha parpintor,
parholong do Naibata.
- ⁶ Jahowa do siramotkon halak paruhur sisaluju;
galek hinan do ahu, tapi ipaluah do ahu.
- ⁷ Mulak ma ho sonang, ale tonduyhu, ai domma
ibahen Jahowa na madear bam!
- ⁸ Tongon, domma ipaluah Ham ahu hambani
hamatean, matangku hambani iluh ampa
naheihu hambani partolsuan.
- ⁹ Boi ma ahu mardalan i lobei ni Jahowa, bani
tanoh ni halak na manggoluh.
- ¹⁰ Totap do ahu porsaya, age pe huhatahon,
“Tarpisat tumang do ahu.”
- ¹¹ Bani na tarsosak ahu, ningku do, “Haganup do
jolma sipangkiran-kirani.”
- ¹² Naha ma pambalasku bani Jahowa, halani
haganup pambahenan-Ni bangku?
- ¹³ Panginuman haluahon ma huangkat, anjaha
goran ni Jahowa ma hudilo.

- ¹⁴ Bagah-bagahku bani Jahowa, hugalar ma,
hugalar i lobei ni haganup bangsa-Ni.
- ¹⁵ Harga do bani panonggor ni Jahowa, hamatean
ni halak na hinaholongan-Ni.
- ¹⁶ Tongon, Ham Jahowa, juakjuak-Mu do ahu,
juakjuak-Mu tene, anak ni jabolon-Mu
naboru, domma itanggali Ham garingku.
- ¹⁷ Bamu ma galangknonku galangan puji-pujian,
anjaha goran ni Jahowa ma padilo-diloonku.
- ¹⁸ Bagah-bagahku bani Jahowa, hugalari ma,
hugalari ma i lobei ni haganup bangsa-Ni,
- ¹⁹ i alaman ni rumah ni Jahowa, i tongah-
tongahmu, ale Jerusalem. Haleluya.

Talup do Pujion ni Sagala Bangsa Jahowa

117 ¹ Puji ma Jahowa, nasiam sagala sipajuh
begu-begu, pasangap ma la, nasiam
sagala bangsa!

² Ai bangga do idop ni uhur-Ni banta, anjaha
hasintongan-Ni ronsi sadokah ni dokahni.
Haleluya.

Doding Puji-pujian halani Pangurupion ampa Haluahon na humbani Jahowa

118 ¹ Puji ma Jahowa, ai pardear layak do la,
tongon ronsi sadokah ni dokahni do idop
ni uhur-Ni!

- ² Sai ihatahon Israel ma, “Tongon, ronsi sadokah ni dokahni do idop ni uhur-Ni.”
- ³ Sai ihatahon ginompar ni si Aron ma, “Tongon, ronsi sadokah ni dokahni do idop ni uhur-Ni.”
- ⁴ Sai ihatahon sihabiari Jahowa ma, “Tongon, ronsi sadokah ni dokahni do idop ni uhur-Ni.”
- ⁵ Humbani hasosakanku do ahu dilo-dilo bani Jahowa; itangihon Jahowa do ahu anjaha ipalumbang.
- ⁶ Jahowa do mangkasomani ahu, seng mabiar ahu Tor aha ma bahenon ni jolma bangku?
- ⁷ Jahowa do hasomanku, Sipangurupi bangku, ai do ase boi ahu mangkawah bani na mandomdomi ahu.
- ⁸ Dearan do marhaporusan bani Jahowa, ase martenger ni uhur bani jolma.
- ⁹ Dearan do marhaporusan bani Jahowa, ase martenger ni uhur bani halak na sangap-sangap.
- ¹⁰ Sagala parbegu manginggoti ahu; mangunsagakon goran ni Jahowa, siap do sidea hubahen.
- ¹¹ linggoti sidea do ahu, tongon iinggoti sidea do ahu; mangunsagakon goran ni Jahowa; siap do sidea hubahen.

- ¹² linggoti sidea do ahu songon huramah; gajag do sidea songon apuy bani duri-duri; mangunsagahkon goran ni Jahowa siap do sidea hubahen.
- ¹³ Ijullakkon, ijullakkon sidea do ahu ase targompang, tapi Jahowa do na mangurupi ahu.
- ¹⁴ Gogohku pakon dodingku ai ma Jahowa; la do na paluahkon ahu.
- ¹⁵ Sora olob-olob pakon hatuahon do maraloling bani lampolampo ni halak parpintor. Siamun ni Jahowa do sibahen hamonangan.
- ¹⁶ Siamun ni Jahowa do na timbul, siamun ni Jahowa do sibahen hamonangan.
- ¹⁷ Seng anjai matei ahu, tapi manggoluh do, ase hubaritahon pambahenan ni Jahowa.
- ¹⁸ Iajar, iajar Jahowa do ahu tongon, tapi seng iondoskon bani hamatean.
- ¹⁹ Ungkab nasiam ma bangku labah ni hapintoron, sihol masukanku do ai, sihol do pujionku Jahowa,
- ²⁰ On do horbangan marayak Jahowa, halak parpintor do na masuk hujai.
- ²¹ Hupuji ma Ham halani ibalosi Ham do ahu, anjaha Ham do gabe haluahon bangku.
- ²² Batu na niambukkon ni tuhang, ai do gabe palas parsuhi.

- ²³ Marhitei Jahowa do masa ai, halongangan do ai bani matanta.
- ²⁴ Ari on do na jinadihon ni Jahowa. marolob-olob anjaha marmalas ni uhur ma hita halani ai.
- ²⁵ Ham Jahowa, urupi Ham ma! Ham Jahowa, sai manumpak ma Ham!
- ²⁶ Pinasu-pasu ma na roh marhitei goran ni Jahowa. Ipasu-pasu hanami ma nasiam hun rumah ni Jahowa.
- ²⁷ Jahowa do Naibata, la do na manondangi hita. Atur nasiam ma galangan pesta das hu tanduk ni anjapanjap!
- ²⁸ Naibatanku do Ham, Ham do sipujionku. Ham Naibatanku, Ham do sipatimbulonku.
- ²⁹ Puji ma Jahowa, ai pardear layak do la, tongon ronsi sadokah ni dokahni do idop ni uhur-Ni.

Kuasa ni Hata ni Naibata

Alep = A

- 119** ¹ Martuah ma halak na daulat marparlahou, na mardalan bani titah ni Jahowa.
- ² Martuah ma halak na manramotkon hasaksian-Ni, na mangindahi la humbani gok ni uhurni.
- ³ na so mangkorjahon hajahaton, tapi na mardalan bani dalan-Ni.

- ⁴ Domma itonahkon Ham parentah-Mu, ase dalankononkon ai pongkut.
- ⁵ Sai totap ma namin langkahku, laho mandalankon aturan-Mu.
- ⁶ Tongon, seng anjai tarbador ahu, anggo hupardimata ganup aturan-Mu.
- ⁷ Sai pujionku do Ham humbani putih ni uhurhu, anggo huguruhon titah-Mu na pintor in.
- ⁸ Sai dalankononku do uhum-Mu, sai ulang ma tadingkon Ham ahu.

Bet = B

- ⁹ Marhitei aha do boi borsih langkah ni sada garama? Marhitei na iramotkon hata-Mu.
- ¹⁰ Humbani gok ni uhurhu do Ham hupindahi, ulang ma paturut Ham ahu kahou humbani parentah-Mu.
- ¹¹ Ibagas uhurhu do husimpan hata-Mu, ase ulang mardousa ahu Bamu.
- ¹² Sai tarpuji ma Ham Jahowa, ajarhon Ham ma bangku aturan-Mu!
- ¹³ Marhitei bibirhu do hubaritahon sagala titah-Mu, na luar humbani pamangan-Mu.
- ¹⁴ Marmalas ni uhur do ahu bani dalam ni hasaksian-Mu, lobih humbani sagala habayakon.
- ¹⁵ Sai hupingkir-pingkiri do aturan-Mu, anjaha pardimatahononku dalam-Mu.

¹⁶ Aturan-Mu do na huhamalaskon, seng lupa
ahu bani hata-Mu.

Gimel = G

¹⁷ Bahen Ham ma na madear bani juakjuak-Mu,
ase manggoluh ahu, anjaha hudalankon
hata-Mu.

¹⁸ Sai buha Ham ma matangku, ase huidah
halongangan ni undang-undang-Mu.

¹⁹ Panginsolat do ahu i tanoh on, sai ulang ma
ponopkon Ham parentah-Mu hu bangku.

²⁰ Madotei do uhurhu, halani siholan bani
titah-Mu bani ganup panorang.

²¹ Ipalumba Ham do halak na jungkat, sai
hona papa do na manambil humbani
parentah-Mu.

²² Buat Ham ma humbangku habadoron pakon
hahirion, ai hudalankon do hasaksian-Mu.

²³ Age pe hundul na sangap-sangap manriah
mangimbang ahu, sai uhum-Mu do ipingkiri
juakjuak-Mu,

²⁴ Tongon hasaksian-Mu do malas ni uhurhu,
gabe panuturi bangku.

Dalet = D

²⁵ Longkot do tonduyhu bani orbuk pagoluh Ham
ma ahu romban hubani hata-Mu.

- ²⁶ Domma hubaritahon dalanku anjaha itangihon do ahu, podahkon Ham ma bangku sagala aturan-Mu.
- ²⁷ Paruhuri Ham ma ahu pasal pardalan ni aturan-Mu, ase hupingkir-pinghiri halongangan-halongangan-Mu.
- ²⁸ Maseda do uhurhu halani marhoru, pajongjong Ham ma ahu romban hubani hata-Mu.
- ²⁹ Dalam ladung padaoh Ham humbangku, anjaha marhitei titah-Mu idopi Ham ma ahu.
- ³⁰ Dalam hasintongan do hupilih, titah-Mu do huhasiholi.
- ³¹ Longkot do ahu bai hasaksian-Mu, Ham Jahowa, ulang ma paila Ham ahu.
- ³² Dalam ni parentah-Mu do dalanku, ai ipalumbang Ham do uhurhu.

He = H

- ³³ Patuduh Ham ma bangku, ale Jahowa, pardalan ni uhum-Mu, ase hudalankon ai ronsi ujungni.
- ³⁴ Paruhuri Ham ma ahu ase hura motkon undang-undang-Mu, anjaha hudalankon ai humbani gok ni uhur.
- ³⁵ Sai togu Ham ma ahu bani dalam ni parentah-Mu, ai ai do na huarosuhkon.
- ³⁶ Sai pasurdung Ham ma uhurhu dompak hasaksian-Mu, ulang dompak paruntungan

- 37 Palembang Ham ma matangku hambani na mangkawahkon na so margagan, sai pagoluh Ham ma ahu marhitei hata-Mu.
- 38 Patotap Ham ma bani juakjuak-Mu bagah-bagah-Mu. ai ma bani halak sihabiari Ham.
- 39 Sai padaoh Ham ma hahirion na huhabiari, ai na madear do titah-Mu.
- 40 Tonggor ma, ihasiholi uhurhu do aturan-Mu, sai pagoluh Ham ma ahu halani hapintoron-Mu.

Vau = H

- 41 Sai sogop ma bangku idop ni uhur-Mu, ale Jahowa, sonai hatuahon-Mu romban hubani bagah-bagah-Mu,
- 42 ase boi balosanku halak na pahiri ahu, ai tenger do uhur hubani hata-Mu.
- 43 Ulang ma buat Ham hata hasintongan in hambani pamanganku, ai titah-Mu do na huarapkon.
- 44 Sai ramotkononku do undang-undang-Mu tongtong, tongon, ronsi sadokah ni dokahni.
- 45 Sai mardalani bani na lubang ma ahu, ai parentah-Mu do na hupindahi.
- 46 Sai sahapkononku do hasaksian-Mu i lobei ni raja-raja, anjaha seng maila ahu.
- 47 Sai marmalas ni uhur do ahu bani parentah-Mu, huhaholongi do botul.

48 Hupaherbang do tanganku bani parentah-Mu
na huhaholongi, anjaha hupingkir-pingkiri
do aturan-Mu.

Sain = S

49 Sai ingat Ham ma hata na bani juakjuak-Mu, na
binahen-Mu gabe pangarapanku.

50 On do na pasabou uhurhu ibagas hadoyukonku:
bagah-bagah-Mu do na pagoluhkon ahu.

51 Sai iapas-apasi halak na jungkat do ahu,
tapi seng manlembang ahu humbani
undang-undang-Mu.

52 Idingat uhurhu do titah-Mu na humbani na
basaia, ale Jahowa, jadi sabou ma uhurhu.

53 Parah do gilangku mangidah halak parjahat,
sitadingkon undang-undang-Mu.

54 Doding do bangku ganup aturan-Mu, ibagas
rumah panginsolatanku.

55 Sai hudingat do borngin goran-Mu, ale Jahowa,
anjaha hudalankon do undang-undang-Mu.

56 On do na dob ondos bangku, ai ma
manramotkon aturan-Mu.

Chet = Ch

57 Rupeiuhu do Ham, ale Jahowa, domma
hupadankon marimbagaskon hata-Mu.

- 58 Humbani gok ni uhurhu do hupindahi bohi-Mu,
ma idop ma uhur-Mu bangku romban
hubani bagah-bagah-Mu.
- 59 Hupingkir-pinghiri do dalanku, gabe hupaulak
do langkahku hubani hasaksian-Mu.
- 60 Tarolos do ahu anjaha seng hupadokah-dokah,
laho mandalankon parentah-Mu.
- 61 Siding ni halak parjahat manlioti ahu, tapi seng
lupa ahu bani undang-undang-Mu.
- 62 Tongah borngin puho do ahu laho mamuji
Ham, halani titah-Mu na pintor in.
- 63 Hasoman do ahu bani sagala na mangkabiari
Ham, sonai age bani sagala sidalankon
aturan-Mu.
- 64 Idop ni uhur do manggoki tanoh on,
Ham Jahowa, ajarhon Ham ma bangku
aturan-Mu.
- 65 Na madear do ibahen Ham bani juakjuak-Mu,
ale Jahowa, romban hubani hata-Mu.
- 66 Hauhuron pakon habotohon ma ajarhon Ham
bangku, parentah-Mu do na huhatengerhon.
- 67 Paima lape marsitaronon ahu kahou do ahu,
tapi sonari hata-Mu do na huirikkon.
- 68 Dear do Ham anjaha sibahen na madear,
ajarhon Ham ma hu bangku uhum-Mu.
- 69 Ipatubuh-tubuh halak na jungkat do ladung
dompok ahu, tapi hupardiatei do aturan-Mu
humbani gok ni uhur.

- 70 Seng marpangahap uhur ni sidea songon taboh-taboh, tapi malas do uhur hubani undang-undang-Mu.
- 71 Hadearon na bangku na marsitaranon ai ahu, ase uhum-Mu huguruhon.
- 72 Rahanan do bangku titah ni pamangan-Mu, humbani omas atap pirak na marribu-ribu.

Jod = J

- 73 Tangan-Mu do manjadihon pakon na paulihon ahu; paruhuri Ham ma ahu ase huguruhon parentah-Mu.
- 74 Halak na mangkabiari Ham mangidah ahu gabe malas ma uhurni, ai hata-Mu do na huarapkon.
- 75 Hubotoh do, ale Jahowa, pintor do titah-Mu, anjaha ibagas hasintongan-Mu do ipatunduk Ham ahu.
- 76 Sai idop ni uhur-Mu ma na mangapoh ahu, romban hubani bagah-bagah-Mu na bani juakjuak-Mu.
- 77 Sai sogop ma hu bangku holong ni uhur-Mu, ase manggoluh ahu, ai titah-Mu do malas ni uhuru.
- 78 Sai maila ma halak na jungkat, ai iodoh-odoh sidea do ahu seng marhala; tapi anggo ahu aturan-Mu do na hupingkir-pingiri.

- 79 Sai mulak ma hu bangku halak na mangkabiari Ham, Pakon na mambotoh hasaksian-Mu.
- 80 Sai pitah ma uhur hubani uhum-Mu, ase ulang tarbador ahu.

Kat = K

- 81 Horahan do tonduyhu bani hatuahon-Mu, hata-Mu do na huarapkon.
- 82 Kawah do matangku mangkasiholi bagah-bagah-Mu, nini, "Antigan pe apohon-Mu ahu?"
- 83 Tongon, songon gusi hulingkuling na hona timus do ahu; tapi seng lupa bani uhum-Mu.
- 84 Sadia dokah nari ma ari-ari ni juakjuak-Mu? Antigan pe dabuhon-Mu uhum bani na marburu ahu?
- 85 Ihurak halak na jungkat do godung bangku, ai ma halak na so domu bani titah-Mu marparlahou.
- 86 Sagala parentah-Mu sintong do; ipardakdak sidea do ahu seng marhala, urupi Ham ma ahu.
- 87 Narus-narus ma bois ahu ibahen sidea i nagori on; tapi anggo ahu seng hutadingkon aturan-Mu.
- 88 Domu hubani idop ni uhur-Mu sai pagoluh Ham ma ahu, ase huramotkon hasaksian ni pamangan-Mu.

Lamed = L

- 89 Ronsi sadokah ni dokahni do, ale Jahowa,
hata-Mu; totap do in i nagori atas.
- 90 Marsundut-sundut do hasintongan-Mu; Ham
do na pajonam ai i tanoh on, jadi totap ma.
- 91 Domu hubani aturan-Mu totap do ai ronsi
sadari on, ai ganupan ai juakjuak-Mu do.
- 92 Ambit lang titah-Mu na pahinsah uhurhu,
domma magou ahu halani hadoyukonku.
- 93 Ronsi sadokah ni dokahni seng lupa ahu bani
aturan-Mu, ai marhitei ai do ahu ipagoluh
Ham.
- 94 Bamu do ahu, paluah Ham ma ahu, ai
aturan-Mu do na hupindahi.
- 95 Sai igompangi halak parjahat do ahu
laho masedahon ahu; tapi anggo ahu
hasaksian-Mu do huparimbagaskon.
- 96 Bani haganup, age naha dearni dong do
ujungni huidah; tapi anggo titah-Mu seng
marpunsa.

Mem = M

- 97 Holong tumang do uhur hubani titah-Mu;
manipat ari do hupingkiri ai.
- 98 Pentaran do ahu maruhur hambani munsuhku
ibahen parentah-Mu, ai tongtong do ai
mangkasomani ahu:

- 99 Pandeian do ahu humbani sagala gurungku, ai
hasaksian-Mu do hupingkir-pingkiri.
- 100 Maruhuran do ahu humbani partua-partua, ai
aturan-Mu do huparuhurhon.
- 101 Humbani sagala dalam na masambor sai
huambang do naheihu, ase tarbalosi ahu
hata-Mu.
- 102 Seng manlembang ahu humbani titah-Mu, ai
Ham do na mamodahi ahu.
- 103 Tobuni in hata-Mu bani langit-langitku,
tobunan humbani manisan bani
pamanganku.
- 104 Halani aturan-Mu do mambahen maruhur
ahu, halani ai magigi do ahu bani sagala
dalam ladung.

Nun = N

- 105 Hata-Mu do rigapan bani naheihu, anjaha
panondang bani dalanku.
- 106 Domma marbija ahu anjaha pasaudonku do
ai, sai dalankononku do titah-Mu na pintor
in.
- 107 Marsitaronon tumang do ahu, ale Jahowa,
pagoluh Ham ma ahu domu hubani
hata-Mu.
- 108 Harosuhkon Ham ma, ale Jahowa, galangan
na humbani pamanganku; ajarhon Ham ma
bangku titah-Mu.

- 109 Tongtong do ibagas parmaraan tonduyhu, tapi seng huhalupahon undang-undang-Mu.
- 110 Sai itaon halak parjahat do siding bangku, tapi seng manlembang ahu humbani aturan-Mu.
- 111 Hasaksian-Mu do hubahen pusakangku sadokah ni dokahni, halani malas ni uhurhu do ai.
- 112 Huungkab do uhurhu laho mangkorjahon aturan-Mu, tongtong ronsi sadokah ni dokahni.

Samech = S

- 113 Magigi do uhur hubani halak simolei-olei, tapi holong do uhur hubani titah-Mu.
- 114 Parlingodan ampa gantarhu do Ham, hata-Mu do na huarapkon.
- 115 Surut ma humbangku, ale halak parjahat; sihol dalankononku do parentah ni Naibatangku.
- 116 Tungkoli Ham ma ahu romban hubani bagah-bagah-Mu ase manggoluh ahu; anjaha ulang ma paila Ham ahu ibagas pangarapanku.
- 117 Jolom Ham ma ahu, ase maluah ahu, gabe aturan-Mu ma tongtong hukawahkon.
- 118 Itulak Ham do ganup halak na manirpang humbani uhum-Mu, ai ladung do na piningkiran ni sidea.

- 119 Songon tasik ni bosu do ihira Ham sagala parjahat na i tanoh on, halani ai do ase huhaholongi hasaksian-Mu.
- 120 Manorgi do ambulungku halani biarni mangidah Ham, gobir do uhuru mardingat paruhuman-Mu.

Ain = A

- 121 Hudalankon do uhum pakon hapintoron, ulang ma ondoskon Ham ahu hubani na mangodoh-odoh ahu.
- 122 Apiti Ham ma juakjuak-Mu bahen hadearonni; ulang ma itokoh-tokoh halak na jungkat ahu.
- 123 Siholan do matangku mangkawah dampak pangurupion-Mu, ampa dampak bagah-bagah-Mu na pintor in.
- 124 Bahen Ham ma bani juakjuak-Mu romban hubani idop ni uhuru-Mu; anjaha aturan-Mu ajarhon Ham ma bangku.
- 125 Juakjuak-Mu do ahu, paruhuri Ham ma ahu, ase huarusi hasaksian-Mu.
- 126 Domma jumpah panorangni bani Jahowa mandalankon uhum; domma seda ibahen sidea titah-Mu.
- 127 Halani ai holong do uhuru hubani parentah-Mu, lobih hubani omas ampa hubani omas pitah.

128 Halani ai do ase sintong ahu marparlahou
romban bani ganup aturan-Mu, anjaha
magigi ahu bani dalan ladung.

Pe = P

129 Halongangan do hasaksian-Mu, halani ai do
ase ijolom tonduyhu ai.

130 Panangkasion bani hata-Mu do na paliharhon,
anjaha na mamparuhuri halak na bulus.

131 Hupangangang do pamanganku, hosah-hosah
do ahu, ai parentah-Mu do na huhasiholhon.

132 Dompakkon Ham ma ahu anjaha maidop ma
uhur-Mu bangku, romban hubani na patut
bani ma mangkaholongi goran-Mu.

133 Sai patotap Ham ma langkahku bani
bagah-bagah-Mu, anjaha ulang ma paturut
Ham hajahaton manrajai ahu.

134 Paluah Ham ma ahu humbani odoh-odoh ni
jolma, ase huramotohon aturan-Mu.

135 Sai sondangkon Ham ma bohi-Mu bani
juakjuak-Mu, anjaha ajarhon Ham ma
bangku uhum-Mu.

136 Iluh na marpansur do mabaor humbani
matangku, halani na so saud idalankon
titah-Mu.

Zade = Z

- 137 Pintor do Ham, ale Jahowa, anjaha sintong do uhum-Mu.
- 138 Domma itonahkon Ham hasaksian-Mu ibagas hapintoron, anjaha ibagas hasintongan botul.
- 139 Pongut ni uhuru do mamboiskon ahu, ai ihalupahon lawanku do hata-Mu.
- 140 Pitah tumang do hata-Mu, holong do uhur ni juakjuak-Mu bani.
- 141 Etek do ahu anjaha madorun, tapi seng lupa ahu bani aturan-Mu.
- 142 Hapintoron-Mu pintor do ai ronsi sadokah ni dokahni, anjaha hasintongan do undang-undang-Mu.
- 143 Hasosakan ampa hasunsahan do mangonai bangku, tapi parentah-Mu do na huhamegahkon.
- 144 Pintor do hasaksian-Mu ronsi sadokah ni dokahni; paruhuri Ham ma ahu, ase manggoluh ahu.

Kop = K

- 145 Dilo-dilo do ahu humbani gok ni uhur, balosi Ham ma ahu, ale Jahowa, sihol ramotkononku do aturan-Mu,

- 146 Dilo-dilo do ahu Bamu, paluah Ham ma ahu!
sai dalankononku do hasaksian-Mu.
- 147 Paima buha siang dilo-dilo do ahu; bani
hata-Mu do ahu mangarap.
- 148 Puho do ahu sanggah marhorin parrunda;
bagah-bagah-Mu do hupingkir-pingiri.
- 149 Sai tangihon ma sorangku romban hubani
idop ni uhur-Mu, ale Jahowa, domu hubani
uhum-Mu, pagoluh Ham ma ahu.
- 150 Madohor ma halak parjahat sipardakdak ahu;
daoh do sidea humbani titah-Mu.
- 151 Dohor do Ham, ale Jahowa, hasintongan do
sagala parentah-Mu.
- 152 Domma dokah hubotoh pasal hasaksian-Mu;
ipajonam Ham do ai ronsi sadokah ni
dokahni.

Resch = R

- 153 Tatap Ham ma hadoyukonku anjaha paluah
Ham ma ahu! Ai seng lupa ahu bani
undang-undang-Mu.
- 154 Tinggilhon Ham ma partinggilanku, anjaha
tobus Ham ma ahu; pagoluh Ham ma ahu
romban hubani bagah-bagah-Mu.
- 155 Daoh do humbani halak parjahat haluahon, ai
seng ipindahni sidea aturan-Mu.

- 156 Banggal do holong ni uhur-Mu, ale Jahowa;
pagoluh Ham ma ahu romban hubani
titah-Mu.
- 157 Buei do halak na marburu pakon na
mangimbang ahu, tapi seng manambil ahu
humbani hasaksian-Mu.
- 158 Mangidah halak na marbalik magigi do
uhurhu, halani na so idalankon sidea
hata-Mu.
- 159 Tonggor Ham ma, aturan-Mu do na
huhaholongi, ale Jahowa; pagoluh Ham ma
ahu romban hubani idop ni uhur-Mu.
- 160 Rimpun ni hata-Mu ai ma hasintongan, ronsi
sadokah ni dokahni do uhum-Mu na pintor
in.

Schin = Sch

- 161 Raja-raja do na marburu ahu seng marhala;
tapi hata-Mu tumang do ihabiari uhurhu.
- 162 Marmalas ni uhur do ahu halani hata-Mu,
songon halak na dapotan buei taban-taban.
- 163 Sogam do uhur hubani ladung anjaha
huhagigihon do ai, tapi holong do uhur
hubani undang-undang-Mu.
- 164 Pitu hali ibagas sadari hupuji Ham, halani
uhum-Mu na pintor in.

- 165 Damei na sumurung do rupei ni halak na mangkaholongi titah-Mu, seng anjai tartolsu sidea.
- 166 Mangarap do uhur hubani pangurupion-Mu, ale Jahowa; parentah-Mu do hubalosi.
- 167 Iramotkon tonduyhu do hasaksian-Mu, anjaha holong tumang do uhur hubani ai.
- 168 Huramotkon do aturan-Mu pakon hasaksian-Mu, ai talar do i lobei-Mu sagala dalanku.

Tau = T

- 169 Paturut Ham ma dilo-dilongku das i lobei-Mu, ale Jahowa, paruhuri Ham ma ahu romban hubani hata-Mu.
- 170 Sai das ma elek-elekku hu Bamu, paluah Ham ma ahu romban hubani bagah-bagah-Mu.
- 171 Sai mabaor ma puji-pujian humbani bibirhu, halani iajarhon Ham do bangku aturan-Mu.
- 172 Sai idodingkon dilahku ma hata-Mu, ai pintor do sagala parentah-Mu.
- 173 Sai tangan-Mu ma na mangurupi ahu, ai aturan-Mu do na hupilih.
- 174 Siholan do ahu bani hatuahon-Mu, ale Jahowa. anjaha titah-Mu do na huhamegahkon.
- 175 Sai manggoluh ma tonduyhu anjaha ham ma ipuji; titah-Mu ma na mangurupi ahu.

¹⁷⁶ Kahou do ahu songon biribiri na magou,
pindahi Ham ma juakjuak-Mu, ai seng lupa
ahu bani parentah-Mu.

DODING LAHO TANGKOG HU RUMAH PANUMBAHAN

**Tonggo Mangindo Haluahon
humbani Bangsa Sipartinggil**

120 ¹ Doding laho tangkog. Bani Jahowa
do ahu dilo-dilo sanggah tarsosak ahu,
anjaha ibalosi do ahu.

² Ham Jahowa, paluah Ham ma tonduyhu
humbani bibir siparladung, humbani dilah
sipangoto-otoi.

³ Aha ma berehononni bam, aha ma
tambahkononni bam, ale dilah sipangoto-
otoi?

⁴ Panah ni puanglima na marot, ampa narnar ni
hayu tatada na gara.

⁵ Magou ma ahu, na manginsolat i Mesek, anjaha
na marianan i lampolampo ni halak Kedar.

⁶ Madokahtu ma ai marianan ahu, i lambung ni
halak na mangkagigihon damei.

⁷ Marosuh do ahu bani damei, tapi marsahapkonsi
ahu, mintor ipindahi sidea do partinggilan.

**Tenger ni Uhur bani Panjagaion ni
Jahowa, Sijaga Israel**

- 121** ¹ Doding laho tangkog. Sai kawah-kawah do matangku dampak dolog; hunja do nani roh pangurupion bangku?
- ² Pangurupion bangku roh humbani Jahowa, sitompa langit pakon tanoh.
- ³ Seng palopason-Ni jiris naheimu, anjaha seng tartunduh Sijaga ho.
- ⁴ Tonggor ma, seng tartunduh, anjaha modom Sijaga Israel.
- ⁵ Jahowa do sijaga ho, Jahowa do parlinggomanmu bani tanganmu siamun.
- ⁶ Arian seng doiton ni mata ni ari ho, sonai age bulan borngin.
- ⁷ Jahowa do na manjagai ho, humbani sagala parmaraan, sai jagaon-Ni do tonduymu.
- ⁸ Jahowa do manjagai ho laho luar ampa laho masuk, humbani sonari ronsi sadokah ni dokahni.

Tonggo Mangkopkop Jerusalem

- 122** ¹ Doding laho tangkog. Humbani si Daud. Malas do uhurhu, sanggah ihatahon halak bangku, “Laho ma hita hu rumah ni Jahowa.”

- ² Jongjong do nuan naheinami, bani
horbanganmu, ale Jerusalem.
- ³ Ale Jerusalem, na pinajongjong songon kota, na
niatur gabe mardomu.
- ⁴ Tangkog do hujai sagala marga, marga ni
Jahowa, aturan do ai bani Israel laho mamuji
goran ni Jahowa.
- ⁵ Tongon, ijai do ipajongjong hotak paruhuman,
hotak bani ginompar ni si Daud.
- ⁶ Pindo nasiam ma damei bani Jerusalem;
mardamei ma sagala na mangkaholongi ho.
- ⁷ Sai damei ma masa ibagas tembokmu, na
sonang ibagas rumah bolonmu.
- ⁸ Halani saninangku pakon huan-kuanku, sai
pindohononku do damei ibagas ho.
- ⁹ Halani rumah ni Jahowa Naibatanta, sai
pindahanku do na madear bam.

**Mangkawah Dompok Jahowa Laho
Mangindo Idop ni Uhur-Ni**

- 123** ¹ Doding laho tangkog. Bamu do
hudompakkon pangkawah ni matangku,
Ham siparhotak i nagori atas.
- ² Tonggor ma, songon mata ni juakjuak
mangkawah bani tangan ni tuanni, songon
mata ni juakjuak naboru mangkawah
bani tangan ni na marsuruhsi, sonai
do mangkawah matanami bani Jahowa

Naibatanami, paima maidop uhur-Ni bennami.

³ Maidop ma uhur-Mu bennami, ale Jahowa, maidop ma uhur-Mu; domma sobalan hanami bani risa-risa.

⁴ Sobalan tumang do tonduynami ibahen apas-apas ni sigijang uhur, ampa parpahiri ni halak na jungkat.

Puji-pujian bani Jahowa,

Sipaluah Israel

124 ¹ Doding laho tangkog. Humbani si Daud. Ambit lang Jahowa mangkasomani hita, sonai ma patut hatahonon ni Israel. Ambit lang Jahowa mangkasomani hita,
² sanggah roh halak mangimbang hita,
³ sai bondutonni do hita manggoluh, sanggah gajag ringis ni sidea dompak hita;
⁴ ayubkonon ni bah do hita, anjaha landaon ni bah marbanggal,
⁵ langkoban ni bah marhasak do tonduyta, tongon.
⁶ Na puji ma Jahowa na so mangondoskon hita, gabe sisorohon ni ipon ni sidea.
⁷ Maluah do tonduyta songon manuk-manuk humbani sambil ni parsambil, rotap do sambil, gabe maluah hita.

⁸ Pangurupion banta, ai ma ibagas goran ni Jahowa, na manompa langit pakon tanohon.

Hatotapon ni Halak na Martenger ni Uhur bani Jahowa

125 ¹ Doding laho tangkog. Halak na martenger ni uhur bani Jahowa, songon Dolog Sion do, lang dugur, ronsi sadokah ni dokahni do totap.

² Jerusalem, dolog do manginggotisi, sonai ma Jahowa manginggoti bangsa-Ni, sonari ronsi sadokah ni dokahni.

³ Tungkot harajaon ni halak parjahat seng totap ai i atas tanoh parbagianan ni halak parpintor, ase ulang idurdurhon halak parpintor tanganni bani hagedukon.

⁴ Bahen Ham na madear, ale Jahowa, bani halak parbujur, bani halak paruhur na bulus.

⁵ Tapi halak, na marbalik hubani dalan na geduk, sai iboiskon Jahowa ma namin, rap pakon halak parjahat. Damei ma bani Israel.

Apoh-apoh Ibagas Sitaranon

126 ¹ Doding laho tangkog. Sanggah na ipaulak Jahowa na tarbuang hun Sion, usih bani halak na marnipi do hita.

- ² Ijia gok tawa do pamanganta, gok surak-surak dilahtha. Ijia isahapkon halak do i tongah-tongah ni parbegu, “Banggal do tongon na binahen ni Jahowa bani sidea!”
- ³ Banggal do tongon na binahen ni Jahowa banta, marmalas ni uhur ma hita.
- ⁴ Pasuang Ham ma hanami, ale Jahowa, songon binanga i Tanoh Dangsina.
- ⁵ Halak na mariluh-iluh laho manabur, marolob-olob do laho manabi.
- ⁶ Mardalan-dalan pe sidea anjaha tangis paboan-boan bonih sisaburhononkon tongon, roh do sidea marolob-olob mamboan radeanni.

Margantung bani Pasu-pasu ni Jahowa do Ganupan

- 127** ¹ Doding laho tangkog. Humbani si Salomo. Anggo seng Jahowa na pauli rumah, soya-soya do halojaon ni halak na manukangi; anggo seng Jahowa na manramotkon huta, sisoya-soya do parrundaon ni halak parjaga.
- ² Sisoya-soya do age girah hanima puho anjaha dokah borngin ase modom, mangankon ruti na hinalojahon bani na hinaholongan-Ni do ibere sanggah modom.
- ³ Tonggor ma, silayak-layak ni Jahowa do anak, sada upah do buah ni partapaan.

- ⁴ Songon lingkit ibagas tangan ni puanglima,
sonai do anak ibagas haposoon.
- ⁵ Martuah ma dalahi na manggoki parlingkitanni
bani sisonai, seng tumaram maila ia anggo
marsahap pakon imbangni i horbangan.

**Pasu-pasu bani Rumah Tangga
ni Halak Sihabiari Jahowa**

- 128** ¹ Doding laho tangkog. Martuah ma
ganup na mangkabiari Jahowa, na
mardalan bani dalan-Ni.
- ² Na hinorjahon ni tanganmu sai panganonmu
do; martuah do ho anjaha sonang.
- ³ Parinangonmu songon hayu anggur na ramos
ibagas rumahmu, anakmu songon tunas ni
hayu jetun manlioti mejamu.
- ⁴ Tonggor ma, sai sonai do dapotan pasu-pasu
halak, na marhabiaran bani Jahowa.
- ⁵ Sai pasu-pasuon ni Jahowa do ho hun Sion, ase
paidah-idahonmu hinadear ni Jerusalem
sadokah ari-ari ni goluhmu.
- ⁶ anjaha idahonmu do anak ni anakmu. Damei
ma bani Israel!

**Bador do Sidomdomi Sion na
So Tarkahua halani Jahowa**

- 129** ¹ Doding laho tangkog. Gati do isosak halak ahu humbani haposoonku nari, sonai ma patut hatahonon ni Israel,
- ² “Gati do isosak halak ahu humbani haposoonku nari, tapi seng tarkahua sidea ahu.”
- ³ Bani gurungku do maninggala paninggala, marbaluran na ganjang-ganjang do ibahen.
- ⁴ Tapi Jahowa parpintor in do, manrotapi tali ni parjahat.
- ⁵ Maningon maila do anjaha surut hu pudi, sagala na mandomdomi Sion.
- ⁶ Songon poyon na dob tubuh i tayub do sidea, domma melus lape iorbat;
- ⁷ seng anjai dais tangan ni panabi hujai, barang tangan ni sirahuti radean,
- ⁸ anjaha seng hatahonon ni halak na montas; Pasu-pasu ni Jahowa ma bani nasiam! Ipasu-pasu hanami ma nasiam marhitei goran ni Jahowa!

Doruh-doruh humbani Hasosakan na Bagas

- 130** ¹ Doding laho tangkog. Humbani hasosakan bagas do ahu, doruh-doruh Bamu, ale Jahowa.

- ² Ham Tuhan, tangihon Ham ma sorangku,
sai ipardiatei pinggol-Mu ma sora ni
elek-elekkon.
- ³ Anggo ihira Ham ganup dousa, ale Jahowa, ise
ma na tahan jongjong, ale Jahowa?
- ⁴ Tapi Bamu do hasasapan ni dousa, ase ihabiari
halak Ham.
- ⁵ Mangarap do ahu bani Jahowa, mangarap do
tonduyhu, hata-Ni do na hupaima-ima.
- ⁶ Siholan do tonduyhu bani Tuhan, lobih humbani
sihol ni parjaga bani siang ni ari, bani siang
ni ari tongon.
- ⁷ Arapkon ma Jahowa, ale Israel! Ai bani Jahowa
do idop ni uhur, anjaha buei do haluahon
Bani.
- ⁸ Tongon, la do na paluahkon Israel, humbani
haganup dousani.

Hasonangan ni Tonduy na dob Jumpahan Damei

- 131** ¹ Doding laho tangkog. Humbani si Daud.
Ham Jahowa, seng gijang uhurhu, seng
mangenjeng pangkawah ni matangku;
seng habanggalon na huayak-ayak, barang
hatimbulon na mangatasi diringku.
- ² Tapi tene, hupaminop anjaha hupasip do
tonduyhu; songon dakdanak na dob
pinainum bani abingan ni inangni, sonai do
tonduyhu ibagas.

³ Arapkon ma Jahowa, ale Israel, humbani sonari ronsi sadokah ni dokahni.

Pamilih ni Jahowa bani si Daud ampa Sion

- 132** ¹ Doding laho tangkog. Mardingat ma Ham, ale Jahowa, bani si Daud, ampa bani haganup halojaonni,
- ² na dob marbulawan bani Jahowa, na dob marpadan bani Parkuasa ni Jakob:
- ³ Tongon, seng masukanku lampolampo ni rumahku, seng naikanku iananku modom,
- ⁴ tongon, seng lopasonku matangku tartunduh, atap tarpitpit langkop ni matangku,
- ⁵ paima jumpah ahu sada ianan bani Jahowa, sada rumah bani Parkuasa ni Jakob.
- ⁶ Tongon, domma ibogei hita pasal poti parpadanan ai i Eprata, domma dapot hita ai i talun Jaar.
- ⁷ Masuki hita ma rumah-Ni, manrogop ma hita bani sidogeian ni nahei-Ni.
- ⁸ Jongjong ma Ham, ale Jahowa, laho ma Ham bani ianan parsaranan-Mu, Ham pakon poti hagogohon-Mu.
- ⁹ Malim-Mu marpakeian hapintoron do, anjaha hinaholongan-Mu marsurak-surak.
- ¹⁰ Halani si Daud juakjuak-Mu, ulang ma tulakkon Ham bohi ni na mininakan-Mu.

- ¹¹ Domma marbija Jahowa bani si Daud, tongon, seng mangeluk la hunjai, “Humbani ginompar-Mu do pahundulon-Ku bani paratas-Mu.
- ¹² Anggo iramotkon anakmu padan-Ku ampa hasaksian-Ku na Huajarhon bani sidea, anak ni sidea pe hundul do bani paratasmu sadokah ni dokahni.”
- ¹³ Tongon, domma ipilih Jahowa Sion, ipindo uhur-Ni do marhundulan ijai:
- ¹⁴ On do parsaranan-Ku ronsi sadokah ni dokahni, ijon do Ahu sihol marianan, in do Huharosuhkon.
- ¹⁵ Parbohalanni sai pasu-pasuon-Ku do, halak na masombuhni pabosuron-Ku do bani ruti.
- ¹⁶ Malimni bahenon-Ku do marpakeian haluahon, na hinaholonganni marolob-olob ibagas malas ni uhur.
- ¹⁷ Ijai patubuhon-Ku do sada tanduk bani si Daud, pasirsiron-Ku sada suluh bani na mininakan-Ku.
- ¹⁸ Munsuhni bahenon-Ku do marhiou habadoron, tapi bani uluni marlinang-linang do sortalini.

Hinajenges ni Parsaoran ni na Marsanina

133 ¹ Doding laho tangkog. Humbani si Daud. Tonggor ma, naha dearni ampa naha jengesni, anggo rap hundul na marsanina.

² Usih bani minak na maharga, na bani ulu ai,
na manjalir hu jambek, humbani jambek
ni si Aron, na mangkatektek hu rambu ni
pakeianni.

³ Usih bani namur Dolog Hermon, na sogop bani
Dolog Sion. Ai hujai do ipasorap Jahowa
pasu-pasu-Ni hagoluhan ronsi sadokah ni
dokahni.

Parsombahon bani Jahowa Borngin-borngin

134 ¹ Doding laho tangkog. Roh ma, puji ma
Jahowa, ale haganup juakjuak ni Jahowa,
na jongjong marugas i rumah ni Jahowa
ganup borngin.

² Paherbang nasiam ma tangan nasiam dompak
ianan na ma pansing in, anjaha puji ma
Jahowa!

³ Ipasu-pasu Jahowa ma ho hun Sion, la na
manompa langit pakon tanoh on.

Puji-pujian bani Jahowa na Banggal in, Siatasi Sagala Naibata-naibata

135 ¹ Haleluya! Puji ma goran ni Jahowa, puji
ma, ale juakjuak ni Jahowa,

² nasiam na jongjong i rumah ni Jahowa, i alaman
ni rumah ni Naibata.

- ³ Puji nasiam ma Jahowa, ai pardear layak do Jahowa; dodingkon nasiam ma goran-Ni, ai jenges do in.
- ⁴ Ai Jakob do ipilih Jahowa Bani, sonai Israel bahen parbagianan-Ni.
- ⁵ Tongon hubotoh do: Banggal do Jahowa: Tuhannami, iatasi do sagala naibata-naibata.
- ⁶ Sagala na hinarosuhkon ni Jahowa, ipasaud do i langit pakon i tanoh on, ibagas laut pakon ibagas ianan na bagas-bagas:
- ⁷ Ipanaik do hambun hambani ujung ni tanoh on, ibahen do hilap bani udan, ipadarat logou hambani kamar-Ni;
- ⁸ ibogbog do bunga tubuh ni Masir, jolma sonai age pinahan;
- ⁹ itongos do tanda pakon halongangan hu tongah-tongah ni Masir, laho mangimbang Parao pakon sagala juakjuakni;
- ¹⁰ ibogbog do buei bangsa-bangsa, anjaha ibunuh raja-raja na markuasa;
- ¹¹ ai ma si Sihon, raja ni halak Amori, si Og, raja ni Basan, ampa haganup Raja Kanaan;
- ¹² ibere do tanoh ni sidea bahen parbagianan, parbagianan ni halak Israel bangsa-Ni in.
- ¹³ Ham Jahowa, ronsi sadokah ni dokahni do goran-Mu! Ham Jahowa, marsundut-sundut do pardingatan Bamu.

- ¹⁴ Tongon, ipintori Jahowa do bangsa-Ni,
marulak-ulakan do uhur-Ni dompak
juakjuak-Ni.
- ¹⁵ Sisombahon ni parbegu ai ma pirak pakon
omas, jadi-jadian ni tangan ni jolma.
- ¹⁶ Dong do babahni, tapi seng boi marsahap,
dong do matani, tapi seng marpangidah;
- ¹⁷ dong do pinggolni, tapi seng marpanangar,
tongon, seng dong hosah ibagas babahni.
- ¹⁸ Sai songon sidea ma halak na paulihonsi,
sagala halak na martenger ni uhur hujai.
- ¹⁹ Ale rumah ni Israel, puji ma Jahowa! Ale rumah
ni si Aron, puji ma Jahowa!
- ²⁰ Ale rumah ni si Lepi, puji ma Jahowa! Ale
sihabiari Jahowa, puji ma Jahowa.
- ²¹ Tarpuji ma Jahowa hun Sion, la na marianan i
Jerusalem! Haleluya!

**Puji-pujian bani Jahowa Mardingat
Haganup Pambahenan-Ni**

- 136** ¹ Puji ma Jahowa, ai pardear layak do
la, tongon, ronsi sadokah ni dokahni do
idop ni uhur-Ni.
- ² Puji ma Naibata ni sagala naibata, tongon, ronsi
sadokah ni dokahni do idop ni uhur-Ni.
- ³ Puji ma Tuhan ni sagala tuan, tongon, ronsi
sadokah ni dokahni do idop ni uhur-Ni;

- ⁴ na mambahen, sahalak-Si, halongangan
banggal, tongon, ronsi sadokah ni dokahni
do idop ni uhur-Ni;
- ⁵ na manompa langit marhitei hapentaran,
tongon, ronsi sadokah ni dokahni do idop ni
uhur-Ni;
- ⁶ na paherbang tanoh i atas ni bah, tongon, ronsi
sadokah ni dokahni do idop ni uhur-Ni;
- ⁷ na manjadihon panondang na bolon, tongon,
ronsi sadokah ni dokahni do idop ni uhur-Ni;
- ⁸ mata ni ari, na manrajai na siang, tongon, ronsi
sadokah ni dokahni do idop ni uhur-Ni;
- ⁹ bulan pakon sagala bintang na manrajai
borngin, tongon, ronsi sadokah ni dokahni
do idop ni uhur-Ni;
- ¹⁰ na mamunuh bunga tubuh ni Masir, tongon,
ronsi sadokah ni dokahni do idop ni uhur-Ni;
- ¹¹ na mambobahon Israel luar hun tongah-tongah
ni sidea, tongon, ronsi sadokah ni dokahni
do idop ni uhur-Ni;
- ¹² marhitei tangan na gogoh pakon botokon na
gostong, tongon, ronsi sadokah ni dokahni
do idop ni uhur-Ni;
- ¹³ na mambahen marbolah Laut Arung, tongon,
ronsi sadokah ni dokahni do idop ni uhur-Ni;
- ¹⁴ na padiparhon halak Israel hun tongah-
tongahni, tongon, ronsi sadokah ni dokahni
do idop ni uhur-Ni;

- 15 na mangogapkon Parao pakon balani hubagas
Laut Arung, tongon, ronsi sadokah ni
dokahni do idop ni uhur-Ni;
- 16 na mambobahon bangsa-Ni i halimisan,
tongon, ronsi sadokah ni dokahni do idop ni
uhur-Ni;
- 17 na mantaluhon raja-raja na banggal, tongon,
ronsi sadokah ni dokahni do idop ni uhur-Ni;
- 18 na mamunuh raja-raja na sangap, tongon,
ronsi sadokah ni dokahni do idop ni uhur-Ni;
- 19 si Sihon, raja ni halak Amori, tongon, ronsi
sadokah ni dokahni do idop ni uhur-Ni;
- 20 pakon si Og, raja ni Basan, tongon, ronsi
sadokah ni dokahni do idop ni uhur-Ni;
- 21 na mamberehon tanoh ni sidea bahen
parbagianan; tongon, ronsi sadokah ni
dokahni do idop ni uhur-Ni;
- 22 gabe parbagianan ni Israel, juakjuak-Ni in,
tongon, ronsi sadokah ni dokahni do idop ni
uhur-Ni;
- 23 na mardingat hita bani haetekonta, tongon,
ronsi sadokah ni dokahni do idop ni uhur-Ni;
- 24 na paluah hita humbani imbangta, tongon,
ronsi sadokah ni dokahni do idop ni uhur-Ni;
- 25 na mambere sipanganon bani sagala
mardaging, tongon, ronsi sadokah ni
dokahni do idop ni uhur-Ni.

²⁶ Mangkatahon tarima kasih ma nasiam bani
Naibata ni surga, tongon, ronsi sadokah ni
dokahni do idop ni uhur-Ni.

Pardingatan bani Panorang Hamarsikon na i Babel

137 ¹ I topi ni bah na i Babel, ijai do
hundul-hundul anjaha tangis hanami,
sanggah mardingat hanami bani Sion.

² Bani hayu baringin na ijai ai, igantungkon
hanami do husapinami.

³ Ai ijai do ipindo na manaban hanami
pabogeihononnami dodingnami, anjaha
halak na mangarsik-arsik hanami mangindo
doding malas uhur, “Dodingkon hanima ma
bennami sada doding Sion!”

⁴ Sonaha ma boi dodingkononnami doding bani
Jahowa i tanoh ni halak na legan?

⁵ Anggo lupa ahu bam, ale Jerusalem, age melus
ma tanganku siamun;

⁶ longkot ma dilahku bani langit-langitku, anggo
lang huingat ho, anggo lang Jerusalem
hubahen i atas ni ganup malas ni uhur.

⁷ Ingat Ham ma, ale Jahowa, ginompar ni Edom,
na mangkatahon bani ari partaban ni
Jerusalem, “Parseda, parseda ma, das bani
palas-palasni!”

- ⁸ Ale boru Babel, ho na parsedahon! Martuah ma halak na mambalaskon bam, sagala na binahenmu bennami.
- ⁹ Martuah ma halak na manangkap anakmu, anjaha na manampakkon ai bani dolog batu.

**Doding Tarima Kasih bani Jahowa,
Sitatap Halak na Malumat**

- 138** ¹ Humbani si Daud. Tarima kasih do hatahononku Bamu, ale Jahowa, humbani gok ni uhurhu; dodingkononku do Ham i lobei ni parnagori atas.
- ² Manrogop do ahu dompak rumah-Mu na pansing in, pujionku do goran-Mu, halani idop ni uhur-Mu ampa hasintongan-Mu, ai ipabanggal Ham do goran-Mu ampa bagah-bagah-Mu mangatasi haganup.
- ³ Sanggah dilo-dilo ahu, ibalosi Ham do ahu; itambahi Ham do gogoh bani tonduyhu.
- ⁴ Sai Ham ma pujion ni ganup raja-raja ni tanoh on, ale Jahowa, anggo ibogei sidea ma hata ni pamangan-Mu.
- ⁵ Dodingkonon ni sidea do pasal dalan ni Jahowa, ai banggal do hasangapon ni Jahowa.
- ⁶ Tongon, timbul do Jahowa, tapi itatap do halak na malumat; halak sigijang uhur, humbani na daoh pe domma itanda.

⁷ Mardalan pe ahu i tongah-tongah ni hasosakan,
Ham do na pagoluh ahu; iolatkan Ham
do tangan-Mu dampak gila ni munsuhku,
anjaha ipaluah Ham do ahu marhitei
tangan-Mu siamun.

⁸ Jahowa do na pasaloseihon bangku. Ham
Jahowa, ronsi sadokah ni dokahni do idop
ni uhur-Mu. Ulang ma tadingkon Ham
jadi-jadian ni tangan-Mu.

Naibata do Siiani Haganup ampa Sibotoh Haganup

139 ¹ Bani pambobai koor. Sada Psalm
humbani si Daud. Ham Jahowa, ipareksa
Ham do ahu, anjaha itanda Ham do.

² Ibotoh Ham do atap na hundul atap na jongjong
ahu; iarusi Ham do pingkiranku humbani na
daoh.

³ Pardalanku atap parpodomku itulimati Ham do,
haganup do dalanku ibotoh Ham.

⁴ Tongon seng dong hata bani dilahku, sabonarni,
ganup do ibotoh Ham, ale Jahowa.

⁵ Hun pudi pakon hun lobei iinggoti Ham do ahu,
inahkon Ham do tangan-Mu bangku.

⁶ Halongangan botul do bangku habotohan in,
magijangtu, seng tardungdung ahu.

⁷ Huja ma ahu laho manimbili tonduy-Mu, anjaha
huja ma ahu lintun manlembangi bohi-Mu?

- ⁸ Porini naik ma ahu hu nagori atas, ijai do Ham;
Porini hubahen podomanku i nagori toruh
ijai do Ham.
- ⁹ Porini hupakei bangku habong ni buha siang ari,
sihol sogop ahu hu ujung ni laut,
- ¹⁰ ijai pe tangan-Mu do na manangkap ahu,
anjaha ijolomi tangan siamun-Mu do ahu.
- ¹¹ Porini huhatahon, “Na golap ma manrungkub
ahu, anjaha gabe borngin ma na lihar in
bangku!”
- ¹² Jadi hagolapan ai pe seng golap Bamu;
marsinondang do borngin songon arian, na
golap usih songon na lihar.
- ¹³ Ai Ham do na manjadihon piah-piahku, itonun
Ham do ahu ibagas partapaan ni inang,
- ¹⁴ Ham do pujionku, halani halongangan
do parjadingku; halongangan do
pambahenan-Mu, anjaha torang do ai
ididah tonduyhu.
- ¹⁵ Seng ponop holi-holingku i lobei-Mu, sanggah
na ijadiahon ahu bani na ponop, sanggah na
itonun ahu i partapaan ni inang.
- ¹⁶ Sanggah solat ope ahu domma ididah
panonggor-Mu, domma tarsurat ganupan ai
ibagas buku-Mu, domma ibuhul ari-aringku
sanggah lape adong age sada.
- ¹⁷ Mahol do bangku pingkiran-Mu, Ham Naibata!
Buei tumang do bilanganni.

- 18 Porini sihol hiraonku, bueian do ai ase
horsik; anggo puho ahu tong ope ahu i
lambung-Mu.
- 19 Ambit ibunuh Ham ma, ale Naibata, halak
parjahat; anjaha ambit surut ma humbangku
halak sionsop daroh,
- 20 na manlawan dampak Ham marhitei akal-akal,
na jongjong mangimbang Ham ibagas
hajahaton.
- 21 Mintor lang ma sogam uhurhu, ale Jahowa,
mangidah halak na marsogam ni uhur
Bamu; anjaha mintor lang ma magigi ahu,
mangidah halak na manlawan dampak
Ham?
- 22 Das do sogam ni uhurhu mangidah sidea,
munnsuh do sidea bangku.
- 23 Pareksa Ham ma ahu, ale Naibata, anjaha
tanda Ham ma uhurhu! Uji Ham ma anjaha
tanda Ham ma pingkiranku!
- 24 Kawahkon Ham ma atap dong mardalan ahu
bani dalan hamagouan; togu Ham ma ahu
bani dalan sisadokah ni dokahni.

**Tonggo Mangindo Panramotion
Marimbang Parjahat**

140¹ Bani pambobai koor. Psalm humbani
si Daud. (140-2) Sai paluah Ham ma
ahu, ale Jahowa, humbani jolma parjahat;

- humbani halak sipangodoh-odoh, sai
parorot Ham ma ahu,
- ² (140-3) ai ma halak, na mamingkiri hajahaton
ibagas uhurni, na patubuh-tubuhkan
hamunsuhon ari-ari.
- ³ (140-4) laroti sidea do dilahni songon ulog, bisa
ni ulog darih do i toruh ni bibir ni sidea. Sela.
- ⁴ (140-5) Sai parorot Ham ma ahu, ale Jahowa,
dompok tangan ni parjahat, anjaha
ramotkon Ham ma ahu humbani halak
sipangodoh-odoh, na mamingkiri ase jiris
naheihu.
- ⁵ (140-6) Halak sigijang uhur manaon siding
bangku, ipaherbang do puhot bani dalanku,
anjaha inahkon sidea do tirangkap i dalam
padapot ahu. Sela.
- ⁶ (140-7) Ningku do bani Jahowa, “Naibatanku
do Ham, tangar Ham ma, ale Jahowa, sora
ni elek-elekku.”
- ⁷ (140-8) Ham Jahowa, Tuhanku, pangurupi na
margogoh bangku, Ham do na mangondingi
ulungku bani ari parporangan.
- ⁸ (140-9) Ulang ma palopas Ham, ale Jahowa,
sura-sura ni parjahat, ulang ma pasaud Ham
riah ni sidea. Sela.
- ⁹ (140-10) Ulang ma mandirgak ulu ni halak na
manginggoti ahu, sai mangonai ma bani
sidea hajahaton ni bibir ni sidea.

- ¹⁰ (140-11) Sai mangkadabuh ma narnar bani sidea; sai madabuh ma sidea hubagas lubang, ase ulang tarjongjongsiksi be.
- ¹¹ (140-12) Halak sipanukas-nukasi, sai ulang ma totap i nagori on; Halak sipangodoh-odoh, sai hamagouan ma na mardakdak sidea.
- ¹² (140-13) Tongon, hubotoh do, Jahowa do na pasintongkon uhum bani halak na madoyuk, anjaha na mamintori halak na masombuh.
- ¹³ (140-14) Tongon, sai pujion ni halak parpintor do goran-Mu, anjaha halak sibujur uhur do marianan i lobei-Mu.

Tonggo Mangindo Panramotion humbani na Jahat

141 ¹ Psalm humbani si Daud. Ham Jahowa, dilo-dilo do ahu Bamu, tarolos ma Ham roh bangku; tangar Ham ma sorangku sanggah dilo-ilo ahu Bamu!

² Doskon dahupa ma tonggongku i lobei-Mu, anjaha panatang ni tanganku songon galangan bodari.

³ Bahen Ham ma, ale Jahowa, panjaga bani pamanganku, anjaha ramotkon Ham ma labah ni bibirhu.

⁴ Sai ulang ma lopus Ham teleng uhur hubani na jahat, laho mandalankon horja hajahaton rap pakon halak sihorjahon na masambor;

ulang ma lопас Ham ahu mangan humbani sipanganon ni sidea na mantin.

- ⁵ Anggo ibogbog anjaha iuhum halak parpintor ahu, holong do ai bangku, tapi minak ni halak parjahat ulang ma dais bani ulungku, ai mangimbang hajahaton ni sidea do tongtong tonggongku.
- ⁶ Anggo iondoskon sidea bani halak na manguhum sidea, jadi botohon ni sidea ma na sintong do hata ni Jahowa.
- ⁷ Songon hayu na itaha, mangkamistak ompak-ompak i tanoh, sai sonai ma merap holi-holi ni sidea bani babah ni nagori toruh.
- ⁸ Tapi Bamu do, ale Tuhan Jahowa, mangkawah matangku; Bamu do ahu maporus, ulang ma useihon Ham tonduyhu.
- ⁹ Ramotkon Ham ma ahu humbani jarot, na tinaon ni sidea bangku, ampa humbani tirangkap ni parjahat.
- ¹⁰ Sai madabuh ma raprap halak parjahat hubagas godung ni sidea, tapi anggo ahu lopus ma hunjai.

Tonggo ni Halak Tartutup

142 ¹ Doding podah humbani si Daud, sanggah ibagas liang ia. Sada tonggo.
(142-2) Maling do sorangku dilo-dilo bani

Jahowa, gogoh do sora ni elek-elekku bani Jahowa.

² (142-3) Huuseihon do susah ni uhurhu hu lobei-Ni, hupabotohkon do hasosakanku Bani.

³ (142-4) Galek do tonduyhu ibagas diringku, tapi Ham do na pabotoh-botoh langkahku. Bani dalam sibontasonku, itaon sidea do siding ponop bangku.

⁴ (142-5) Mangkawah ahu dompak siamun, tonggor ma, sahalak pe seng dong na parduli bangku; seng dong be haporusan bangku, seng dong be na manungkun pasal goluhku.

⁵ (142-6) Hu Bamu do ahu dilo-dilo, ale Jahowa, ningku, "Ham do parlingodanku, rupeihu bani tanoh ni halak na manggoluh."

⁶ (142-7) Pardiateihon Ham ma doruh-doruhku, ai galek tumang do huahap; paluah Ham ma ahu hambani na marburu ahu, ai gogohan do sidea ase ahu.

⁷ (142-8) Paluah Ham ma ahu hambani tutupan, ase hupuji goran-Mu; halak parpintor do na sihol manlioti ahu, anggo ibahen Ham na madear bangku.

**Tonggo Mangindo Haluahon
ampa Panogu-noguon**

- 143** ¹ Psalm ni si Daud. Ham Jahowa, tangihon Ham ma tonggongku, tangar Ham ma elek-elekk; romban hubani hasintongan ampa hapintoron-Mu, balosi Ham ma ahu.
- ² Ulang ma boan Ham juakjuak-Mu hu paruhuman, ai seng dong halak na manggoluh pintor i lobei-Mu.
- ³ Ai iparburu munsuh do tonduyhu, idogei-dogei do goluhku hu tanoh; inahkon do ahu bani ianan na golap, songon halak na dob dokah matei.
- ⁴ Mandatei do tonduyhu ibagas diringku, jorgong do pusu-pusungku ibagas.
- ⁵ Hudingat do ari na dob salpu, hupingkiri sagala pambahenan-Mu, anjaha ipahusor-husor uhurhu do jadi-jadian ni tangan-Mu.
- ⁶ Hupaherbang do tanganku hu Bamu, siholan do tonduyhu Bamu songon tanoh horah-horah. Sela.
- ⁷ Oloskon Ham ma mambalosi ahu, ale Jahowa, madotei do tonduyhu; ulang ma ponopkon Ham bohi-Mu bangku, ase ulang usih songon halak na manuruk tanoman ahu.

- ⁸ Patangarhon Ham ma bangku sogod-sogod idop ni uhur-Mu, Bamu do ahu martenger ni uhur. Pabotohkon Ham ma bangku dalan na patut sidalananku, ai Bamu do hudompakkon tonduyhu.
- ⁹ Paluah Ham ma ahu humbani munsuhku, ale Jahowa, Bamu do ahu maporus.
- ¹⁰ Ajari Ham ma ahu, mambahen harosuh-Mu, ai Ham do Naibatanku; Tonduy-Mu na madear in ma manogu ahu bani dalan na hornop.
- ¹¹ Halani goran-Mu, ale Jahowa, pagoluh Ham ma ahu; halani hapintoron-Mu, paluah Ham ma tonduyhu humbani hasosakan.
- ¹² Halani idop ni uhur-Mu, boiskon Ham ma munsuhku, anjaha ripaskon Ham ma sagala na manosak-nosak tonduyhu, ai juakjuak-Mu do ahu.

Tonggo ni Sada Raja bani Jahowa

Mangindo Hamonangan ampa Hadoharon

144 ¹ Humbani si Daud. Napuji ma Jahowa, dolog batu bangku, na mangajari tanganku marporang, sonai jari-jaringku marmunsuh;

² hagogohon ampa batar-batar bangku, bentengku ampa Sipaluah ahu, gantarhu

ampa hatengeran ni uhurhu, na
patundukkon bangsa-bangsa hu toruh ni
kuasanku.

- ³ Ham Jahowa, aha ma jolma in, ase ipardiatei
Ham ia, anjaha anak ni jolma in, ase idingat
Ham ia?
- ⁴ Doskon logou tumang do jolma, ari-arini usih
songon halinoh na mamontas.
- ⁵ Ale Jahowa, ondun Ham ma langit-Mu anjaha
turun ma Ham; jamah Ham ma dolog-dolog
in, ase martimus.
- ⁶ Sampakkon Ham ma hilap-Mu anjaha paerap
Ham ma sidea; siarhon Ham ma panah-Mu
anjaha pardakdak Ham ma sidea.
- ⁷ Surdukkon Ham ma tangan-Mu hun datas, rotap
Ham ma ahu, anjaha paluah Ham ma ahu
humbani bah marbanggal, hambani kuasa
ni halak na legan,
- ⁸ na tongtong manluarhon hata ladung babahni.
anjaha tangan siamunni tangan panipuon
do.
- ⁹ Ham Naibata, sihol dodingkononku do doding
na bayu Bamu, anjaha sihol pujionku do
Ham marhitei husapi sisapuluh tali.
- ¹⁰ Ham sibere hamonangan bani raja-raja,
anjaha na paluahkon si Daud, juakjuak-Mu,
humbani podang hamagouan,

- ¹¹ rotap anjaha paluah Ham ma ahu humbani kuasa ni bangsa na legan, na tongtong manluarhon ladung babahni, anjaha tangan siamunni tangan panipuon do.
- ¹² Sai songon suan-suanan ma anakta, na dulas marganjang bani haposoorni, anjaha borunta songon basikah parsuhi, na niuhirhon bani rumah bolon.
- ¹³ Sai gok ma tuanganta, padaratkon bagei-bagei ni sipanganon, marribu-ribu ma biribirinta, marlaksa-laksa bani sampalanta.
- ¹⁴ Sai mombur-mombur ma lombunta, ulang mahua-mahua, ulang molei, anjaha ulang ma dong na tangis i alamanta.
- ¹⁵ Martuah ma bangsa na sonin untungni, martuah ma bangsa, na mar-Naibatahon Jahowa.

Puji-pujian bani Habangalon ni Naibata

145 ¹ Doding puji-pujian ni si Daud. Sihol do patimbulonku Ham, ale Naibatanku, Raja in, anjaha sihol pujionku do goran-Mu lalab ronsi sadokah ni dokahni.

² Ganup ari do pujionku Ham, anjaha pasangaponku do goran-Mu lalab ronsi sadokah ni dokahni.

³ Banggal do Jahowa, anjaha sipujian tongon, seng tardodou hatimbulon-Ni.

- ⁴ Marsipatugahan do sundut-sundut pasal pambahenan-Mu, anjaha ipatugah do horja-Mu na banggal in.
- ⁵ Hinajenges ni hamuliaon-Mu do isahapkon sidea, anjaha halongangan-Mu do na hupingkir-pingkiri.
- ⁶ Hagogohon ni halongangan-Mu do ihata-hatahon sidea, anjaha habanggalon-Mu do ibaritahon sidea.
- ⁷ Pardingatan bani buei ni dear layak-Mu do patugah-tugahon ni sidea, anjaha hapintoron-Mu do olobkononni.
- ⁸ Paridop ni uhur anjaha parholong atei do Jahowa, nanget manringis anjaha parontou ni uhur banggal.
- ⁹ Pardear layak do Jahowa bani haganup anjaha holong do atei-Ni bani ganup jadi-jadian-Ni.
- ¹⁰ Ham do ipuji sagala jadi-jadian-Mu, ale Jahowa, anjaha hinalongan-Mu do pasangapkon Ham.
- ¹¹ Hamuliaon ni harajaon-Mu do ibaritahon sidea, anjaha kuasa-Mu do isahapkon,
- ¹² Iaho pabotohkon bani anak ni jolma hagogohon-Mu, pakon hamuliaon ampa hasangapon-Mu.
- ¹³ Harajaon-Mu ai ma harajaon sisadokah ni dokahni, anjaha panggomgomion-Mu marsundut-sundut do.

- ¹⁴ Jahowa do manatang ganup halak na sihol jurgang, anjaha ipajongjong do halak na dob ipatunduk.
- ¹⁵ Ganup do mata mangkawah dampak Ham, anjaha Ham do na mambere sipanganonni bani panorangni.
- ¹⁶ Ham do na mambuha tangan-Mu, anjaha Ham do na pabosur sura-sura ni sagala na manggoluh.
- ¹⁷ Pintor do Jahowa bani sagala dalan-Ni, anjaha paridop ni uhur bani sagala jadi-jadian-Ni.
- ¹⁸ Dohor do Jahowa bani sagala na mandilo-Si, bani haganup na mandilo-Si ibagas hasintongan.
- ¹⁹ Sura-sura ni na mangkabiari-Si isuhuni do, itangar do doruh-doruh ni sidea anjaha ipaluah do sidea.
- ²⁰ Jahowa do na manramotkon sagala ma mangkaholongi-Si, tapi sagala halak parjahat iboiskon do.
- ²¹ Puji-pujian bani Jahowa do sahapkonon ni pamanganku, anjaha sagala na manggoluh ipuji ma goran-Ni na pansing in, lalab ronsi sadokah ni dokahni.

Pitah Naibata hansa Tarhatengerhon

146 ¹ Haleluya. Puji ma Jahowa, ale tonduyhu!

- ² Sai pujionku do Jahowa sadokah ahu
manggoluh, sai dodingkononku do Naibata
sadokah dong ahu. *
- ³ Ulang ma marhatengeran nasiam bani halak na
sangap-sangap, bani anak ni jolma, na seng
dong pangurupion bani. *
- ⁴ Rotapkonsi hosahni mulak ma ia hu tanoh, jadi
bani ari ai magou ma ganup sura-surani. *
- ⁵ Martuah ma halak, na mambahen Naibata ni si
Jakob gabe pangurupini, na marpangarapan
bani Jahowa Naibatani,
- ⁶ ai ma Sitompa langit pakon tanoh sonai
laut ronsi ganup isini; na manramotkon
hasintongan ronsi sadokah ni dokahni. *
- ⁷ na mamintori halak na niodoh-odoh, na
mambere sipanganon bani halak na loheian.
Jahowa do na paluahkon halak na tartutup.
- ⁸ Jahowa do na mangungkab mata ni na
mapitung, Jahowa do na pajongjong
halak na dob ipatunduk, Jahowa do na
mangkaholongi halak parpintor. *
- ⁹ Jahowa do na manramotkon halak panginsolat;
isarihon do halak na tading maetek pakon
na mabalu, tapi ipapelet do dalan ni halak
parjahat. *
- ¹⁰ Jahowa do manrajai ronsi sadokah ni dokahni.
Marsundut-sundut do Naibatamu, ale Sion.
Haleluya!

**Puji-pujian bani Jahowa na Marpanatap bani
Bangsa ampa Sagala na Mangkabiari-Si**

- 147** ¹ Haleluya. Dear do mandoding bani
Naibatanta, tongon, jenges anjaha talup
do puji-pujian sisonai.
- ² Jahowa do na pajongjong Jerusalem; la do na
pahumpul halak Israel na merap in.
- ³ la do na pamalumkon uhur na marosak, anjaha
na mambaluti ugah ni sidea.
- ⁴ la do na manotapkon bilangan ni bintang.
anjaha idilo do ganup bani goranni.
- ⁵ Banggal do Tuhanta anjaha margogoh tumang,
seng tarsibar hapentaran-Ni.
- ⁶ Jahowa do panotap bani halak na masombuh,
tapi ipatoruh do halak parjahat das hu
tanoh.
- ⁷ Dodingkon ma bani Jahowa doding puji-pujian,
dodingkon ma Naibatanami marhitei husapi,
- ⁸ ai la do na manrungkub langit marhitei
hombun, la na pasirsir udan bani tanoh, na
patubuhkan poyon-poyon bani dolog-dolog;
- ⁹ na mambere gagaton bani pinahan, sonai bani
anak ni kawak, na siok-siok hu Bani.
- ¹⁰ Seng dear uhur-Ni mangidah hagogohon ni
huda, seng ihadearhon hae-hae ni dalahi.

- ¹¹ Marosuh do Jahowa bani halak na mangkabiari-Si, na marpangarapan bani idop ni uhur-Ni.
- ¹² Puji ma, ale Jerusalem, Jahowa; pasangap ma Naibatamu, ale Sion!
- ¹³ Ai la do na patoguh oruk-oruk ni horbanganmu, ipasu-pasu do anakmu i tongah-tongahmu.
- ¹⁴ Ibahen do nagorimu mardamei, ipabosur do ho bani gandum na mataboh.
- ¹⁵ Ia do na manongos hata-Ni hu tanoh on, doras do mardalan tonah-Ni.
- ¹⁶ Ia do na mambere salju songon wol, anjaha na manaburhon namur songon abuan.
- ¹⁷ Ia do na manampakkon sira-sira-Ni songon batu ranggisgis, ise do na tahan bani borgohni?
- ¹⁸ Itongos do hata-Ni gabe malala ma ai; ibahen do logou-Ni mangombus, jadi mabaor ma bah.
- ¹⁹ Ipatugah do hata-Ni bani si Jakob, paraturan-Ni ampa titah-Ni bani Israel.
- ²⁰ Seng ibahen na sonai bani ganup bangsa, anjaha titah-Ni seng ibotoh sidea. Haleluya.

**Puji-pujian bani Jahowa
humbani Sagala na Tinompa**

148 ¹ Haleluya. Puji ma Jahowa hun nagori atas, puji ma la bani ianan na i babou.

- ² Puji ma la, nasiam haganup malekat-Ni, puji ma la nasiam ganup bala-Ni.
- ³ Puji ma la, ale mata ni ari ampa bulan; puji ma la sagala bintang na marsinalsal.
- ⁴ Puji ma la, ale langit ni langitan, ampa nasiam bah na i atas ni langit.
- ⁵ Sai ipuji sidea ma goran ni Jahowa, halani marsahap la, gabe jadi ma sidea.
- ⁶ la do na patotap sidea ronsi sadokah ni dokahni, ibere do bani sidea aturan, na so boi langgaron.
- ⁷ Puji ma Jahowa hun tanoh on, hanima dengke bolon na i laut ampa luhung na bagas;
- ⁸ ale apuy pakon sira-sira, salju pakon hambun na manorap, sonai haba-haba na pasaudkon hata-Ni;
- ⁹ ale dolog-dolog pakon buntu-buntu, hayu na marbuah ampa ganup hayu ares;
- ¹⁰ ale binatang pakon ganup pinahan, sagala na manjuluk pakon manuk-manuk na marhabong;
- ¹¹ ale raja-raja ni tanoh on ampa sagala bangsa, ale na sangap-sangap ampa panguhum na i tanoh on;
- ¹² ale nasiam garama pakon anak boru, nasiam na matua rap pakon dakdanak.
- ¹³ Talup do sidea mamuji goran ni Jahowa, ai pitah goran-Ni do na timbul, anjaha

hamuliaon-Ni do na mangatasi tanoh pakon langit.

¹⁴ Ia do na patimbul tanduk bani bangsa-Ni, gabe puji-pujian bani ganup na hinaholongan-Ni, bani ginompar ni Israel, bangsa na rapat hu Bani. Haleluya.

Puji-pujian bani Jahowa na Pamonang Israel

149 ¹ Haleluya. Dodingkon nasiam ma bani Jahowa sada doding na bayu, puji-pujian hu Bani ibagas kuria ni halak na daulat.

² Marmalas ni uhur ma Israel mangidah na manompasi, marsurak-surak ma anak ni Sion mangidah rajani.

³ Sai ipuji sidea ma goran-Ni marhitei tortor, sai idodingkon sidea ma la marhasoman tambur ampa husapi.

⁴ Ai marosuh do Jahowa mangidah bangsa-Ni, anjaha irudangi halak na toruh maruhur marhitei haluahon.

⁵ Sai marolob-olob ma halak na daulat ibagas hamuliaon, sai marmalas ni uhur ma sidea i atas podomanni!

⁶ Puji-pujian bani Naibata ma ibagas pamangan ni sidea, anjaha podang sidua mata ibagas tanganni,

⁷ laho mandalankon pambalason bani sipajuh begu-begu, ampa uhum bani sagala bangsa,

- ⁸ laho manangkuti raja-raja ni sidea marhitei rantei, ampa na sangap-sangapni marhitei gari bosi,
- ⁹ ase ipasaud bani sidea uhum na dob tarsurat. Hasangapon ma on bani sagala na hinaholongan-Ni. Haleluya.

**Puji-pujian bani Jahowa
Marhitei Parugas na Laingan**

- 150** ¹ Haleluya. Puji ma Naibata bani ianan Ni na ma pansing, puji ma la ibagas hajangkajang ni hagogohon-Ni!
- ² Puji nasiam ma la, halani pambahenan-Ni na banggal in; puji ma la halani hagogohon-Ni na tarlobih in!
- ³ Puji nasiam ma la marhasoman sora ni tarompit,
- ⁴ Puji ma la marhasoman tambur pakon tortor, puji ma la marhasoman sarunei pakon sordam!
- ⁵ Puji ma la marhasoman ogung na marlolol puji ma la marhitei ogung na marliting!
- ⁶ Sagala na marhosah, sai ipuji ma Jahowa! Haleluya.

Podah

- 1** ¹ On do podah ni si Salomo, anak ni si Daud,
raja ni Israel,
² ase ibotoh halak hapentaran pakon pangajaran,
ase iarusi hata hapantason,
³ ase tarjalosi pangajaran na madear, hapintoron,
uhum pakon habonaron,
⁴ laho mambere hapantason bani halak sibulus
uhur, habotohon pakon panimbangion bani
anak garama.
⁵ Halak na pentar pe itangihon ma ai, ase tambah
habotohon bani, anjaha halak na maruhur
dapotan pangajarion,
⁶ laho mangartihon podah pakon limbaga, hata ni
halak na pentar pakon hutinta ni sidea.

Bona ni Hapentaran

- ⁷ Biar mangidah Jahowa do parmulaan ni
habotohon; halak na bodoh teos do uhurni
bani hapentaran pakon pangajaran.
⁸ Tangihon ma, ale anakku, pangajarion ni
bapamu, ulang ma buangkon podah ni
inangmu.
⁹ Ai rudang na majenges do ai bani ulumu, anjaha
sinongkok bani borgokmu.

Lumba-lumba dompak na Pakahouhon

- ¹⁰ Ale anakku, anggo iajar-ajari pardousa ho, ulang ma tangihon.
- ¹¹ Porini ihatahon sidea, “Eta, irikkon ma hanami monggop laho manduruskon daroh, gompangi hita ma halak na so marpipot, age seng dong halani.
- ¹² Bolur hita ma sidea songon pambahen ni nagori toruh, manggoluh anjaha hibul, songon halak na dob tuad hu tanoman.
- ¹³ Bagei ma arta na maharga dapot hita holi, boi ma igoki hita jabunta bani barang rampasan.
- ¹⁴ Dihut do ho marbagian rap pakon hanami, sisada parduitan do hita haganup.”
- ¹⁵ Ale anakku, ulang ma ho ra sadalanan pakon sidea, padaoh ma naheimu humbani dalam ni sidea;
- ¹⁶ ai dompak hasamboron do marlintun nahei ni sidea, tarolos do sidea manduruskon daroh.
- ¹⁷ Ai soya do itaon puhot i lobei ni mata ni manuk-manuk,
- ¹⁸ anjaha sidea ai, daroh ni sidea sandiri do nionggopanni, anjaha hosahni sandiri do ginompanganni.
- ¹⁹ Sonai do masa bani halak na hisapan bani pansarian, hosahni sandiri do hona buat.

Dilo-dilo Hapentaran ai

- ²⁰ Dilo-dilo do hapentaran ai i alaman, ipamaling do sorani i tiga;
- ²¹ bani ianan na ramei taur-taur do la, anjaha bani horbangan ni huta ai luarhon hatani.
- ²² Piga dokah nari do, ale halak na oto, holong uhurnima bani haotoon? Piga dokah nari do, ale halak siparrehei, marosuh hanima manrehei, anjaha halak na oto magigi bani habotohon?
- ²³ Dompakkon hanima ma pangajaranku, tonggor ma, useihononku do Tonduyhu, anjaha pabotohkononku do hatangku bennima.
- ²⁴ Halani dilo-dilo ahu, tapi seng ra hanima manangihon, husurdukkon tanganku, tapi sahalak pe lang na parduli,
- ²⁵ itulak hanima do tene haganup podahku, anjaha seng pot hanima bani pangajarionku,
- ²⁶ halani ai partatawaonku do hanima bani hamagouannima, anjaha mandoruni bani pangonai ni songgot-songgot bennima,
- ²⁷ bani na mangonai bennima songgot-songgot songon haba-haba, bani na roh bennima hasedaon songon halisungsung, bani na sogop bennima hasosakan ampa hagobiron.

- 28 Jadi dilo-dilo ma sidea bangku, tapi seng
 hubalosi, pindah-pindah sidea bangku, tapi
 seng jumpah sidea ahu.
- 29 Halani magigi sidea bani habotohon, anjaha
 seng ipilih biar bani Jahowa,
- 30 seng pot sidea bani podahku, anjaha itulak
 ganup pangajarionku,
- 31 halani ai, maningon panganon ni sidea do
 buah ni parlahouni, anjaha bosur sidea bani
 ranggianni.
- 32 Ai panundalion ni halak na oto do gabe
 hamatean bani, anjaha halanseion ni halak
 na lontong parsedahon dirini.
- 33 Tapi atap ise na manangihon ahu, marsonang-
 sonang do ia marianan, seng anjai gobir ia
 dompak songgot-songgot ni hamagouan.

Pasu-pasu bani Halak Siirikkon Hapentaran in

- 2** ¹ Ale anakku, anggo ijalo ho hatangku anjaha
 iparimbagaskon ho titahku,
- ² tangi ho bani hapentaran anjaha itareihon ho
 uhurmu dompak pangarusion,
- ³ tongon, anggo dilo-dilo ho bani pangarusion,
 ipamaling ho soramung mangindo hauhurong,
- ⁴ anggo ipindah ho ai songon na mangindah
 pirak, anjaha i torihi ho ai songon bani arta
 na ponop,

- ⁵ jadi arusanmu ma biar dompak Jahowa, anjaha jumpah ho habotohon pasal Naibata.
- ⁶ Ai Jahowa do sibere hapentaran, humbani pamanganni do roh habotohon pakon hauhuron;
- ⁷ Ia do sipasirsir pangurupion bani halak parpintor, Ia do gantar bani halak na bujur marparlahou.
- ⁸ Ijaga do pardalan ni uhum, anjaha iramotkon do dalan ni halak na daulat Bani.
- ⁹ Jadi arusanmu ma hapintoron pakon uhum, habonaron pakon sagala dalan na dear;
- ¹⁰ ai roh ma hapentaran hubagas uhurmu, anjaha mantin ma habotohon bani tonduymu;
- ¹¹ uhur hapantason ma manramotkon ho, anjaha pangarusion siparjaga bam.
- ¹² Paluahonni do ho humbani dalan hamagouan, humbani halak sisahapkon na masambor,
- ¹³ halak na manundalhon dalan hasintongan, laho mardalan bani dalan hagolapan,
- ¹⁴ na marosuh mangkorjahon na marsambor anjaha na marmalas uhur bani tahi-tahi na jahat,
- ¹⁵ halak na marlegot-legot pardalanni, na mardalan bani dalan hakahouan.
- ¹⁶ Paluahonni do ho humbani parinangon ni halak, humbani parinangon na legan simantin sahap,

- ¹⁷ na manadingkon hasoman haposoanni hinan,
na mangkalupahon padan ni Naibatani.
- ¹⁸ Ponop do rumahni hu hamatean, sonai age
dalanni hu nagori toruh.
- ¹⁹ Sagala na laho hu bani, seng mulak be, anjaha
seng dapotsi be dalan hagoluhan.
- ²⁰ Mardalan ma ho bani dalan ni halak na bujur,
anjaha totap ma ho bani dalan ni halak
parpintor.
- ²¹ Tongon halak parpintor do siiankon tanoh
on, anjaha halak na daulat totap marianan
ibagas,
- ²² tapi halak parjahat ripasonkon do hun tanoh
ai, anjaha halak sipangosei iorbat do hunjai.

Ojur-ojur Marparlahouhon Hadaulaton

- 3** ¹ Ale anakku, ulang ma ho lupa bani podahku,
sai paruhurhon ma parentahku,
- ² ai tambahkononni do bam ari na madear, umur
na ganjang ampa hadoharon na gok.
- ³ Holong ampa hasintongan ulang ma laho
humbam, parsinongkok ma ai anjaha
suratkon ma bani atei-ateimu.
- ⁴ Jadi dapotan idop ni uhur ma ho ampa na
madear i lobei ni Naibata ampa jolma.
- ⁵ Tenger ma uhurmu bani Jahowa humbani gok ni
uhurmu, ulang ma ho marpangunsandeian
bani pingkiranmu sandiri.

- ⁶ Bani haganup dalanmu ingat ma la, jadi la ma papintor dalanmu.
- ⁷ Ulang na dob maruhur ho ninuhurmu, habiari ma Jahowa, anjaha padaoh dirimu humbani hajahaton.
- ⁸ Gabe tambar ma ai bani dagingmu, anjaha hahisaron bani holi-holimu.
- ⁹ Pasangap ma Jahowa marhitei habayakonmu ampa marhitei limbuah ni sagala pansarianmu;
- ¹⁰ jadi gok ma tuanganmu bani gandum, anjaha sampur kilangmu ibahen anggur.
- ¹¹ Ale anakku, ulang ma mapas uhurmu bani pangajarion ni Jahowa, anjaha ulang sogam uhurmu bani uhuman-Ni.
- ¹² Ai hinaholongan-Ni do ipinsang Jahowa songon bapa dampak anak, na hinarosuhkon ni uhur-Ni.

Seng dong na Mangatasi Hapentaran

- ¹³ Martuah do jolma na dapotan hapentaran, ampa jolma na jumpahan pangarusion,
- ¹⁴ ai na mandapot ai dearan do ai humbani na mandapot pirak, harganan do ai humbani omas.
- ¹⁵ Harganan do ai ase mutiha, anjaha sagala na hinarosuhkonmu seng taratasisi ai.

- ¹⁶ Umur na ganjang do bani tangan siamunni,
bani tangan sambilouni habayakon pakon
hamuliaon.
- ¹⁷ Dalanni, ai ma dalan harosuh, anjaha damei do
sagala nilangkahkonni.
- ¹⁸ Hayu hagoluhan do ai bani halak na jumpahan
ai, anjaha martuah do halak, na manjolomsi.
- ¹⁹ Jahowa do na pajonam dunia on marhitei
hapentaran; langit ai marhitei uhur
panimbangion.
- ²⁰ Marhitei habotohonni mapultak luhung ni laut,
anjaha hambun manektekkon namur.
- ²¹ Ale anakku, ulang magou ai humbani
panonggormu; ramotkon ma hauhuron
ampa partimbangan,
- ²² ase gabe hagoluhan ai bani tonduymu, anjaha
hajagaron bani borgokmu.
- ²³ Gabe sonang ma ho bani dalanmu, anjaha
naheimu seng anjai tarantuk.
- ²⁴ Bani na hundul ho seng anjai songgotan, anggo
ipatabal ho dirimu, sonang do parpodommu.
- ²⁵ Ulang pala rusak ho halani songgot-songgot na
sompong parrohni, atap halani hamagouan
na mangonai bani halak parjahat;
- ²⁶ ai Jahowa do hatengeran ni uhur bam,
ramotkonon-Ni do naheimu humbani jarot.

Hata Golpa-golpa ampa Lumba-lumba

- ²⁷ Ulang ma ho manjua mambahen na madear bani halak na hurangan, anggo tuk do gogohmu mandalankon ai.
- ²⁸ Ulang ma hatahon bani hasomanmu, “Laho ma, sahali nari ma ho roh, patar pe hubere, hape adong do bam.”
- ²⁹ Ulang ma uhurhon na jahat dampak hasomanmu, na marianan martenger ni uhur rap pakon ho.
- ³⁰ Ulang ho marsalisih dampak halak seng marhala, anggo seng dong ibahen na jahat bam.
- ³¹ Ulang ma ho simburu bani halak sipangodoh-odoh anjaha ulang ma ihutkon dalanni;
- ³² ai hagigi do halak sipanlawan bani Jahowa, tapi saor do la bani halak parpintor.
- ³³ Papa ni Jahowa do mangonai bani rumah ni parjahat, tapi ianan ni parpintor ipasu-pasu-Si do.
- ³⁴ Halak na pahiri-hirihon ipahiri do, tapi maidop do uhur-Ni bani halak sitoruh uhur.
- ³⁵ Hamuliaon do siteanon bani halak siparuhur, tapi habadoron do parbagianan ni halak na oto.

**Sipaingat ni Bapa bani Anak, ase
Ipindahi Hapentaran**

- 4** ¹ Tangar ma, ale anakku, pangajarion ni bapanima, paruhurhon ma, ase dapotan pangarusion.
- ² Ai ajaran na madear do sihol bereonku bennima, podahkai ulang ma tadingkon hanima.
- ³ Sanggah poso ope ahu i lobei ni bapa, etek anjaha anak sasada i lambung ni inang,
- ⁴ iajari do ahu, nini hu bangku, “Sai marsijoloman bani hatangku ma uhurmu, dalankon parentahku, ase manggoluh ho.”
- ⁵ Pindahi ma hapentaran, pindahi hauhuron, ulang lupa ho pasal ai, ulang ho manlembang humbani hata ni pamanganku.
- ⁶ Ulang ma tadingkon ai, ase iramotkon ho, haholongi ma ai, ase ijaga ho.
- ⁷ Parjadi ni hapentaran, ai ma, sari ma hapentaran, sari ma hauhuron marhitei sagala na dong bam.
- ⁸ Harga ma bahen ai, jadi patimbulonni ma ho, rohop ma ai, ase ipasangap ho.
- ⁹ Nahkononni do bani ulumu rudang na majenges, anjaha sortali na majagar do berehononni bam.

- 10 Tangihon ma, ale anakku anjaha jalo ma hatangku, ase tambah ari-ari ni goluhmu.
- 11 Sihol do ajarhononku bam dalam hapentaran, anjaha togu-toguonku ho bani dalam na pintor.
- 12 Bani pardalanmu, seng dong na mangolat langkah-langkahmu, anjaha marlintun pe ho, seng anjai tartolsu.
- 13 Jolom ma ho bani podah ulang paluah, ramot bahen, ai hagoluhan do ai bam.
- 14 Dalam ni parjahat ulang masuki, anjaha ulang ma dalani dalam ni halak na jahat.
- 15 Lembangi ma ai, ulang montas hunjai, simbili ma ai, toruskon dalammu.
- 16 Seng tarpodom sidea anggo lang palobei manjahati, seng ra sinok matani, anggo lang lobei dong na targompang ibahen.
- 17 Hajahaton do ruti bani sidea, anjaha pangodoh-odohon anggur ni sidea.
- 18 Tapi dalam ni halak parpintor songon sinalsal sogod-sogod do, lambin torang marsinondang paima tongah ari.
- 19 Dalam ni halak parjahat lotir do, seng ibotoh sidea ija partolsuan.
- 20 Ale anakku, parimbagaskon ma hatangku, bani sahapku ma pateleng pinggolmu.
- 21 Ulang ma sasap ai humbani matamu, simpan ma ai ibagas uhurmu.

- 22 Tongon, hagoluhan do ai bani na jumpahan ai,
tambar bani haganup angkulani.
- 23 Tang siporlunan, jaga ma uhurmu, ai hunjai do
luar hagoluhan.
- 24 Ambukkon ma humbam pamangan
siparladung, anjaha sahap na marputor-
putor daoh ma ai humbam.
- 25 Pintor ma panonggor ni matamu hu lobei,
anjaha dampak lobei ma pangkawahmu.
- 26 Pardiategon ma panlangkah ni naheimu, ase
tarjamin ganup dalanmu.
- 27 Ulang ma manlembang hu siamun atap hu
sambilou, pasurut ma naheimu humbani
hajahaton.

Lumba-lumba dampak Puang-puang Parbangkis

- 5** ¹ Ale anakku, paruhurhon ma hapentaran na
humbangku, anjaha pateleng pinggolmu
hubani hauhuron na humbangku,
- ² ase tarramotkon ho uhur panimbangion, anjaha
bibirmu manjolom habotohon.
- ³ Mantektekkon manis do bibir ni boru jalang,
anjaha landitan do tolonanni ase minak;
- ⁴ tapi dobni paetan do ai ase pogu, marot songon
podang sidua mata.
- ⁵ Naheini tuad hu hamatean, anjaha langkah-
langkahni menuju nagori toruh;

- ⁶ seng ipardulihon dalan hu hagoluhan, kahou do panlangkahni, seng panagamanni.
- ⁷ Ai pe, ale anakku, tangihon hanima ma ahu, ulang ma manlembang hanima humbani hata ni pamanganku.
- ⁸ Padaoh ma dalanmu hun bani, anjaha ulang ma dohori labah ni rumahni,
- ⁹ ase ulang ibere ho gogohmu bani halak na legan, ampa ari-ari ni goluhmu bani halak na so parholong,
- ¹⁰ ase ulang halak na legan marbosur-bosur humbani pansarianmu, anjaha na hinangalutkonmu laho hu rumah na legan,
- ¹¹ gabe morong-orong ho bani ujungni, bani parreong ni dagingmu pakon angkulamu,
- ¹² gabe ihatahon ho, "Mase ma nani huhagigihon pangajaran, anjaha itulak uhurhu pinsang-pinsang?"
- ¹³ Mase ma lang hutangihon sora ni gurungku, anjaha mase ma lang hupateleng pinggolhu bani na mangajari ahu?
- ¹⁴ Otik nari mando ase magou tumang ahu, i tongah-tongah ni humpulan ni kuria in."
- ¹⁵ Minum ma ho humbani parigimu sandiri, humbani bah na mabaor humbani bah tubuhmu.
- ¹⁶ Ulang ma manjalir bah na hun parigimu hu darat, gabe bah na mardalan i alaman!

- 17 Ho ma gelah parsimada ijai, ulang dong halak na legan hasomanmu.
- 18 Sai pinasu-pasu ma bah tubuhmu, anjaha malas ma uhumu bani parinangon sanggah haposoonmu, na laingan songon ursa, na majenges songon balua.
- 19 Sai hajengesonni ma na pabosurhon ho, anjaha marsombuh-sombuh ma ho marhitei holongni.
- 20 Mase ma, ale anakku, mabuk ho bani parinangon ni halak, anjaha irohoh ho naboru na legan?
- 21 Ai talar do dalan ni ganup halak i lobei ni Jahowa, anjaha ipardiatei do ganup langkah-langkahni.
- 22 Hajahatonni sandiri do na manangkap parjahat, anjaha ipardiatei do ganup langkah-langkahni.
- 23 Matei do ia halani itulak pangajaran, anjaha halani bangga ni haotoonni kahou do ia.

**Hata Lumba-lumba bani Halak Sijamini
Hasomanni, bani Halak Siparrayoh
ampa bani Halak Pargeduk**

- 6**¹ Ale anakku, anggo ra ho manjamin hasomanmu, pala marjabat tangan ho mangkopkop halak na legan.

- ² Jadi anggo sangkut ho marhitei sahap ni
bibirmu, tartangkap ibahen hata ni
pamanganmu,
- ³ on ma bahen, ale anakku, paluahkon dirimu,
ai domma madabuh ho hubagas tangan
ni hasomanmu. Laho ma, patoruh dirimu,
elek-elek ma hasomanmai!
- ⁴ Ulang ma lopas matamu modom, atap
salibonmu tartunduh;
- ⁵ sai paluah ma dirimu, songon balua hun tangan
ni parburu, songon manuk-manuk hun
tangan ni parsambil.
- ⁶ Laho ma bani porkis, ale parrayoh, pardiatei ma
pambahenanni, anjaha maruhur ma!
- ⁷ Age pe lang dong bani sidea pangulu, mandur
atap raja,
- ⁸ ipasirsir do sipanganonni bani musim logou ni
ari, ipatumpu do sipanganonni bani musim
sabion.
- ⁹ Sadiha dokah ho modom-modom, ale parrayoh?
Andigan pe ho puho humbani na modom?
- ¹⁰ Nim, "Tongkin nari modom, tongkin nari
tartunduh, tongkin nari tibal-tibal anjaha
marlompit tangan,"
- ¹¹ jadi roh ma bam hamiskinon songon panamun,
anjaha hahurangan songon halak parsinjata.

- ¹² Jolma na so margagan, halak sihorjahon
hajahaton, ai ma na mansahap-sahapkon
hata ladung,
- ¹³ ai ma na pahirdop-hirdop matani, sibere
partanda marhitei naheini, anjaha na
patuduhkon marhitei jari-jarini,
- ¹⁴ ai ma na manranggihon na masambor
marhitei akal-akal ampa na torus manuan
paringoran.
- ¹⁵ Halani ai sompong do roh hasedaon bani;
podas do ia maropuk, seng hatambaran.
- ¹⁶ Na onom on ihasogamkon Jahowa, na pitu on
tene ihagigihon:
- ¹⁷ Mata na mangenjeng, dilah siparladung, ampa
tangan siduruskon daroh na so marpipot,
- ¹⁸ uhur na paranggi-ranggi hajahaton, ampa
nahei na sihap marlintun bani na masambor,
- ¹⁹ saksi palsu siluarhon ladung, ampa na manuan
parbolah-bolahan i tongah-tongah ni na
marsanina.

Lumba-lumba Pasal Parbangkison

- ²⁰ Ale anakku, ramotkon ma parentah ni bapamu,
anjaha ulang ma ambukkon pangajaran ni
inangmu.
- ²¹ Sangkutkon ma ai tongtong ibagas uhurmu,
anjaha parsinongkok bani borgokmu.

- ²² Anggo mardalani ho, ai ma na manogu-nogu
ho, anggo modom ho, ai ma na manjagai ho;
anjaha anggo puho, ai ma na marsahapkon
ho.
- ²³ Ai suluh do titah ai, anjaha pangajaran
ai panondang; dalam hu hagoluhan do
pinsang-pinsang ampa lumba-lumba,
- ²⁴ na manjaga ho humbani naboru na jahat,
humbani naboru na legan silandit dilah.
- ²⁵ Ulang oji ho mangidah hajengesonni ibagas
uhurmu, anjaha ulang ma tartangkap ho
ibahen hirdop ni matani.
- ²⁶ Ai halani boru jalang rugi do halak sansayat
ruti, tapi halani parinangon ni halak na legan
magou tonduy na maharga ai.
- ²⁷ Ai boi do halak mamboan apuy bani abinganni,
anjaha hiouni ai seng mosog?
- ²⁸ Atap tarbahen halak do mardalan i atas ni
narnar, anjaha naheini ai seng matutung?
- ²⁹ Sonai do halak na mandohori parinangon ni
hasomanni; seng anjai lang hona uhum na
manjamahsi.
- ³⁰ Ai lang bador do panangko, anggo manangko
ia laho pasombuh hisapni, halani loheian ia?
- ³¹ Anggo tardapot ia, maningon paulakonni do
pitu hali lompit, ronsi haganup ugas-ugas na
i rumahni maningon berehononni do.

- ³² Tapi halak na lontong do halak sihorjahon parbangkison; na mandedahon dirini do halak na mangkorjahon ai.
- ³³ Pukul-pukul pakon habadoron do rupeini, anjaha seng tarsasap be habadoronni ai.
- ³⁴ Ai parsimburuon do mamuhoi ringis ni dalahi, anjaha seng maralang-alangan uhurni bani ari pambalason.
- ³⁵ Pardearan aha pe lang martarima bani, sadiha pe ibere ho, seng ra ia manjalosi.

**Marjaga ma dampak Akal-akal
ni Naboru Parbangkis**

- 7** ¹ Ale anakku, ramotkon ma hatangku, anjaha simpan ma bahen parentahku;
- ² jaga ma parentahku ase manggoluh ho, ampa titahku songon anak ni matamu.
- ³ Sangkutkon ma ai bani jari-jarimu, bani uhurmu ma suratkon ai.
- ⁴ Hatahon ma bani hapentaran, “Botouhu do ham” anjaha huanmu ma goran hauhuron ai,
- ⁵ ase ia ma na manramotkon ho dampak parinangon ni halak, dampak parinangon na legan siparsahap na landit.
- ⁶ Mangkawah do ahu sahali humbani jendela ni rumahku, humbani jaring-jaringni ai,

- ⁷ gabe huidah ma sahalak na so maruhur, dapot panonggorhu ma sada garama, na so marpangartian,
- ⁸ montas i pasar, dohorhon suhi-suhi ni rumahni, mardalan bani dalan hu rumahni ai,
- ⁹ sanggah samun ari, sanggah bodari, sanggah borngin anjaha golap ari.
- ¹⁰ Anjaha tonggor ma, sada naboru roh manjumpahkoni, marpakeian boru jalang, maruhur akal-akal.
- ¹¹ Seng marhatontuan panlangkahni, garang do ia, seng tarsohkoni be naheini i rumahni;
- ¹² tongkin ia i alaman, tongkin nari domma i tiga, bani ganup sirpang ni dalan do ia manggompangi.
- ¹³ Itangkap ma parana ai anjaha isummah, marhasoman bohi na so maila iparsahapkon ma ia, nini,
- ¹⁴ “Marutang galangan bangga ni uhur do ahu, sadari on do hugalar bagah-bagahku.
- ¹⁵ Ai do ase luar ahu manjumpahkon ham, laho mangindahi bohimu, gabe jumpah do ham.
- ¹⁶ Domma huamparhon apei bani podomanku, marhasoman linnen Masir sibagei rupa.
- ¹⁷ Domma hupamisbou podomanku marhitei mir, aloe ampa kulit manis.
- ¹⁸ Laho ma hita pasombuh-sombuh uhurta ronsi patar.

- 19 Ai seng i rumah dalahingku, bani pardalanan
na madaoh do ia nuan.
- 20 Iboan do ranjut parduitanni, bani bulan tula pe
ia mulak.”
- 21 Taroto do ia ibahen marhitei buei ni hatani,
teleng do uhurni marhitei landit ni
parsahapni.
- 22 lihutkon ma ia torus songon lembu na tinogu
hu pamotongan, songon ursa na masuk
hubagas jarot,
- 23 ronsi hona tiham atei-ateini ibahen tanja;
songon manuk-manuk do ia mandorab
sambil, seng ibotoh hosahni sandiri do na
niagouni ijai.
- 24 Ai pe, ale anakku, tangihon ma ahu anjaha
paruhurhon ma hata ni pamanganku.
- 25 Ulang ma manirpang uhurmu dampak dalanni
ai, ulang ma kahou ho bani dalanni.
- 26 Ai buei ma halak matei na niraseihonni, anjaha
bahat ma na nibunuhni.
- 27 Dalam manuju dampak nagori toruh do
rumahni, tuad hu kamar ni hamatean.

Dilo-dilo ampa Hasaksian ni Hapentaran

8 ¹ Ai lang dilo-dilo do hapentaran ai, anjaha
hauhuron ai pamaling sorani?

² I atas, bani buntu-buntu, i lambung ni dalan,
bani sirpang do ia jongjong,

- ³ bani horbangan, bani dalan masuk hubagas
huta, bani horbangan hudarat do ipamaling
sorani, nini,
- ⁴ “Bennima do, ale dalahi, dilo-dilo ahu, anjaha
taur-taur bennima, ale anak ni jolma.
- ⁵ Guruhon hanima ma habotohon, ale halak
na bodoh, anjaha hanima, gabe halak na
maruhur ma.
- ⁶ Tangihon ma, ai sihol mansahapkon na maharga
do ahu, sihol manluarhon hasintongan do
bibirhu;
- ⁷ ai hasintongan do sihol hatahonon ni
pamanganku; tapi magigi do bibir hubani na
masambor.
- ⁸ Pintor do haganup sahap ni pamanganku; seng
dong na geduk atap na lepak ijai.
- ⁹ Haganupan ai sintong do bani siparuhur, anjaha
bonar bani halak na marpambotoh.
- ¹⁰ Jalo ma pangajaranku, rahanan humbani pirak,
sonai homa habotohon, dearan humbani
omas pitah.
- ¹¹ Harganan do hapentaran ase mutiha, anjaha
haganup na hinarosuhkon ni halak seng
taratasisi ai.
- ¹² Ahu, hapentaran ai, marianan do i lambung ni
hapandeian, jumpahan habotohon pakon
hapandeian do ahu.

- ¹³ Biar bani Jahowa, magigi do ai bani na masambor, uhur hagijangon ampa pangenjengon, parlahou na masambor ampa parsahap na margoling-goling, magigi do ahu pasal ai.
- ¹⁴ Ahu do simada panuturion pakon na pasaudkon ai, Ahu do simada hauhuron pakon hagogohon.
- ¹⁵ Marhitei ahu do manggomgomi raja-raja, anjaha itotapkon siparkuasa hapintoron.
- ¹⁶ Marhitei ahu do manrajai sipanggomgomi, sonai homa na sangap-sangap ampa haganup panguhum na pintor.
- ¹⁷ Holong do uhur hubani sagala na mangkaholongi ahu, anjaha halak sipindahi ahu, sai jumpahsi do ahu.
- ¹⁸ Bangku do habayakon pakon hamuliaon, arta na manotap pakon hapintoron.
- ¹⁹ Dearan do buahku humbani omas, humbani omas pitah tene, sonai age pansarianku humbani pirak pilihan.
- ²⁰ Bani dalan hapintoron do ahu mardalan, bani dalan habonaran do langkahku,
- ²¹ laho manlayak-layakkon parbagianan bani na mangkaholongi ahu, laho manggoki parartaan ni sidea.

- 22 Jahowa do manompa ahu bani mungkah ni panompaon-Ni, gabe parmulaan ni horja-Ni bani na basaia.
- 23 Bani panorang sapari ai do ahu iadongkon, bani mulani, paima adong tanoh on.
- 24 Seng dong ope laut domma itubuhkan ahu, seng dong ope bah tubuh na marburlak-burlakkon bah,
- 25 sanggah lape ipasuk sagala dolog, anjaha sanggah lape adong buntu-buntu, domma itubuhkan ahu;
- 26 sanggah lape iadongkon tanoh on tene, ampa ladangni, sonai age orbuk na parlobei i tanoh on.
- 27 Sanggah la pajongjongkon langit ai, ijai do ahu, sanggah na binolat-Ni ai hajangkajang i atas ni laut ai,
- 28 sanggah ninahkon-Ni ai hambun i atas, sanggah pinaroh-Ni ai bah na marburlak-burlak hun toruh,
- 29 sanggah na binahen-Ni ai parbolatan ni laut, ase ulang ilanggar bah ai parentah-Ni, sanggah na pinasuk-Ni ai onjolan ni tanoh on, ijai do ahu, anak hinaholongan-Ni,
- 30 i lambung-Ni ijia, megah ni uhur-Ni ahu ganup ari, marguro-guro tongtong i lobei-Ni,
- 31 marguro-guro do ahu i sab dunia on, anjaha malas do uhur hubanijolma manisia.

- ³² Ai pe, ale anakku, tangihon ma ahu, martuah do halak siramotkon dalanku.
- ³³ Tangihon hanima ma pangajaranku, ase pentar hanima, sai ulang ma lansei pasal ai.
- ³⁴ Martuah ma halak sitangihon ahu, na marjaga ganup ari bani labahku, anjaha sipanramotkon bani horbanganku.
- ³⁵ Halak na jumpahan ahu, hagoluhan do jumpahsi anjaha gabe harosuh bani Jahowa.
- ³⁶ Tapi na so jumpahan ahu, dirini do pinarsedani, sagala na magigi bangku, hamatean do hinaholonganni ijai.”

Ontangan humbani Hapentaran ampa Haotoon

- 9** ¹ Ia hapentaran ai domma ipajongjong rumahni, ipasuk do basikahni na pitu ai,
- ² isayat do pinahanni, irarui anggurni, anjaha ipasirsir do mejani.
- ³ Isuruh do juakjuakni naboru martaur humbani ianan na gijang i huta ai,
- ⁴ “Barang ise na so marpambotoh, roh ma ia hujon!” Bani halak na oto ihatahon,
- ⁵ “Roh ma, pangan hanima ma indahanku anjaha inum ma anggurhu, na dob hurarui.
- ⁶ Tadingkon hanima ma haotoon ase manggoluh anjaha mardalan ma hanima bani dalam pangarusion.”

- ⁷ Halak sipinsang sipanrisai dapotan habadoron,
anjaha halak sihata parjahat pasambor dirini
sandiri do.
- ⁸ Ulang ma pinsang sipanrisai, ase ulang
mardomdom ia bam, halak siparuhur ma
pinsang, gabe haholonganni ma ho.
- ⁹ Bere ma bani siparuhur, ase lambin maruhur
ia, ajari ma halak parpintor, ase tambah
habotohonni.
- ¹⁰ Biar mangidah Jahowa do mula ni hapentaran,
anjaha panandaion bani Na Pansing ai, ai do
pangarusion.
- ¹¹ Ai marhitei ahu do ganjang ari-arimu anjaha
tambah bam tahun ni goluhmu.
- ¹² Anggo pentar ho, bam do hapentaranmai;
tapi anggo manrisai ho, ho sandiri do na
mangahapkon ai.
- ¹³ Ia haatoon doskon naboru na garang do
ai, seng dong pangartianni, seng dong
binotohni.
- ¹⁴ Bani labah ni rumahni do ia hundul-hundul,
bani ianan sigijangan i huta ai,
- ¹⁵ dilo-dilo bani halak na mamontas, na
mannunuti pardalananni, nini,
- ¹⁶ “Barang ise na bodoh, singgah ma hujon!” Bani
halak na oto ihatahon,

¹⁷ “Matobu do bah tinangko-tangko, anjaha mantin do ruti na pinangan marponop-ponop.”

¹⁸ Tapi seng ibotoh adong do hamatean ijai, anjaha ibagas nagori toruh do niontangni ai.

Podah Pasal Hapentaran ampa Hadaulaton

10 ¹ Podah ni si Salomo. Anak na maruhur pamalas uhur ni bapani, tapi anak na bodoh papusok uhur ni inangni,

² Arta na dapot humbani hajahaton, seng marguna, tapi hapintoron do na paluahkon humbani hamatean.

³ Seng ipaturut Jahowa loheian parpintor, tapi anggo hisap ni halak parjahat isundati do.

⁴ Tangan parrayoh mangkorhon hamiskinon, tapi tangan na ringgas mambahen bayak.

⁵ Halak na ringgas patumpu-tumpuhon bani musim milas, ai ma siparuhur; tapi halak na modom-modom musim sabion, parohkon habadoron.

⁶ Pasu-pasu do sogop bani ulu ni halak parpintor, tapi gok hagedukon do babah ni halak parjahat.

⁷ Mardingat halak parpintor parohkon pasu-pasu, tapi bau do barita ni halak parjahat.

- ⁸ Halak siparuhur ra do manjalo pangajaran, tapi halak parsahap haotoon maningon madabuh do.
- ⁹ Sonang do halak na pitah marparlahou, tapi halak na geduk marparlahou sai tardapot do.
- ¹⁰ Halak na paserleng matani parohkon na maborit, tapi halak na torang-torang maminsang mangkorhon hadearon.
- ¹¹ Bah hagoluhan do pamangan ni halak parpintor, tapi gok hagedukon do pamangan ni halak parjahat.
- ¹² Domdom do mamuhoi paringoran, tapi irungkub holong ai do sagala hasalahan.
- ¹³ Bani bibir ni halak na pantas do dapot hapentaran, tapi lonsing-lonsing do patut mangonai bani gurung ni halak na hurang uhur.
- ¹⁴ Halak na pentar pagugun habotohon, tapi pamangan ni halak na bodoh ai ma hamagouan na mangondam.
- ¹⁵ Arta ni halak na bayak, huta na toguh do ai bani, tapi hasedaon do hamiskinon ai bani halak na masombuh.
- ¹⁶ Pansarian ni halak parpintor mambobai hu hagoluhan, tapi na sinari ni halak parjahat hubagas dousa.

- 17 Mardalan bani dalan hagoluhan do halak siramotkon pangajaran, tapi kahou do halak na so parduli bani pinsang-pinsang.
- 18 Halak pardomdom, ai ma parbibir ladung, tapi halak sipangkatai ai ma halak na bodoh.
- 19 Lang tarbahen lang dong salah bani hata na buei, tapi halak na manrantei bibirni ai ma na pandei.
- 20 Doskon pirak pilihan do dilah ni halak parpintor, tapi pingkiran ni halak parjahat seng sadiha hargani.
- 21 Bibir ni halak parpintor do sipambobai bani buei halak, tapi matei do halak na bodoh ibagas haotoonni.
- 22 Pasu-pasu ni Jahowa do mambahen bayak, anjaha seng pala marhasoman halojaon.
- 23 Gurou-gurou do bani halak na oto mandalankon hajahaton, tapi hapentaran do rosuh ni halak na maruhur.
- 24 Na hinabiaran ni halak parjahat, ai do sogop hu bani, tapi ibere do bani halak parpintor, na pinindo ni uhurni.
- 25 Anggo montas haba-haba, bois do parjahat, tapi totap do lalab halak parpintor.
- 26 Doskon na migar bani ipon ampa timus bani mata, sonai do parrayoh bani na marsuruhsi.
- 27 Biar bani Jahowa do paganjang umur, tapi ari-ari ni halak parjahat ipapondok do.

- ²⁸ Pangarapan ni halak parpintor paroh malas ni uhur, tapi na lang do pinaima-ima ni halak parjahat.
- ²⁹ Batar-batar do Jahowa bani halak na daulat, tapi hamagouan do bani halak sihorjahon hajahaton.
- ³⁰ Seng anjai dugur halak parpintor, tapi halak parjahat seng iankononni tanoh in.
- ³¹ Pamangan ni halak parpintor patubuh hapentaran, tapi dilah pargeduk maningon rotapon do.
- ³² Bibir ni halak parpintor mambotoh na madear, tapi pamangan ni parjahat mansedahon do.

Sambatni

- 11** ¹ Timbangan palsu hagigi do ai bani Jahowa, tapi batu timbangan na sintong do harosuh-Ni.
- ² Masa gijang ni uhur, masa ma habadoron, tapi hapentaran do jumpah bani sitoruh uhur.
- ³ Habonaron ni halak parpintor, ai do pambobai bani sidea, tapi hagedukon ni halak sipangosei do na parseda sidea.
- ⁴ Seng marguna habayakon bani panorang mardalan uhuman, tapi hapintoron do na paluahkon humbani hamatean.

- ⁵ Hapintoron ni halak na daulat do mambahen dalanni hornop, tapi tompas do parjahat ibahen hajahatonni.
- ⁶ Hapintoron ni halak parpintor do paluahkon sidea, tapi hona tangkap do halak sipangosei ibahen hisapni.
- ⁷ Anggo matei halak parjahat magou do pangarapanni, anjaha sinta-sinta ni halak na so pintor gabe na lang.
- ⁸ Maluah do halak parpintor humbani parmaraan, anjaha halak parjahat do masuk hujai, gantihni.
- ⁹ Marhitei pamangan ni halak parjahat madabuh hasoman hubagas hamagouan, tapi marhitei habotohon ipaluah halak parpintor.
- ¹⁰ Anggo mardohar halak parpintor masa do olob-olob ibagas huta, tapi halak parjahat, marsurak-surak ma parhuta anggo roh hamagouan bani.
- ¹¹ Marhitei pasu-pasu bani halak parpintor timbul do huta, tapi marumbak do ai marhitei pamangan ni halak parjahat.
- ¹² Siapasi hasomanni, ai ma halak na so marpangartian, tapi halak na marpambotoh masip do.
- ¹³ Halak na hujai-hujon pahata-hata halak, mambahen tarbotoh rusia, tapi ponop do ai ibahen halak hatengeran ni uhur.

- ¹⁴ Anggo seng dong be sipambobai, maseda ma bangsa, tapi dear ma ai anggo buei halak sipanuturi.
- ¹⁵ Harugian do ai manjamini halak na legan, tapi sonang do halak na so ra manjamini.
- ¹⁶ Parinangon siparbasar dapotan hormat, tapi bador do naboru na magigi bani na bonar.
- ¹⁷ Dirini do pinadearni anggo layak halak, tapi halak na kejam parseda dirini sandiri.
- ¹⁸ Halak siparjahat jumpahan pansarian sipaoto-oto, tapi halak na manidahkon hapintoron, dapotan untung na totap.
- ¹⁹ Halak na totap jongjong bani hapintoron jumpahan hagoluhan, tapi siayaki hajahaton sai matei do.
- ²⁰ Hagigi ni Jahowa do paruhur na geduk, tapi marosuh do la bani halak na so panurakon parlahouni.
- ²¹ Sintong tumang, seng anjai lang hona uhum halak parjahat, tapi sai maluah do ginompar ni halak parpintor.
- ²² Songon tintin omas na bani unsum ni babuy, sonai do naboru na majenges, na so maradat.
- ²³ Sinta-sinta ni halak parpintor parohkon hadearon, tapi niarapkon ni halak parjahat uhumon do.

- ²⁴ Halak na unjah marsibere-bere, lambin bayakni, tapi halak na sai pagugungugunkon, lambin miskin do.
- ²⁵ Halak pardear layak dapotan layak-layak, anjaha halak na ra mambere siinumon, jumpahan siinumon do.
- ²⁶ Halak sitahan-tahan gandum iburai halak do, tapi pasu-pasu do sogop bani ulu ni sipanjual.
- ²⁷ Halak siparayak na madear, gabe harosuh do, tapi sipindahi na masambor, sai roh do ai bani.
- ²⁸ Halak na marhatengeran bani habayakonni madabuh do, tapi halak parpintor martumbor do songon bulung-bulung na maratah.
- ²⁹ Halak na manggeori rumah tanggani, logou do teanonni, anjaha halak na oto gabe jabolon ni na pentar.
- ³⁰ Buah ni habonaran ai ma hayu hagoluhan, tapi na mandalankon na so uhum goluh do iparseda.
- ³¹ Tonggor ma, halak parpintor dapot pambalason do i tanoh on, samintolah ma halak parjahat ampa pardousa, lang?

Sambatni

- 12** ¹ Halak na mangkarosuhkon sipaingat, ai ma siharosuhkon habotohon, tapi na mangkagigihon pinsang-pinsang, ai ma jolma na bodoh.
- ² Halak sidear uhur gabe harosuh do bani Jahowa, tapi halak paruhur jahat hona uhum-Ni do.
- ³ Seng anjai totap jolma sihorjahon hajahaton, tapi jonam do urat ni halak parpintor.
- ⁴ Parinangon na madear sortali do ai bani paramangonni, tapi na sambor parlahouni gilok-gilok na harat-harat do ai ibagas holi-holini.
- ⁵ Pingkiran ni halak parpintor sintong do ai, tapi riah ni halak parjahat ladung do.
- ⁶ Riah ni halak parjahat sihol manduruskon daroh, tapi pamangan ni halak parpintor paluahkon do.
- ⁷ Hona dabuhkon do halak parjahat gabe seng dong be, tapi totap do anggo rumah ni halak parpintor.
- ⁸ Domu hubani hapentaranni do tarpuji sada dalahi, tapi parakal-akal hona apasan do.
- ⁹ Dearan do gabe halak na maetek, na mannunuti horjani sandiri, humbani na pajuntul-juntulhon diri, hape hurangan sipanganon.

- ¹⁰ Ibotoh halak parpintor do uhur ni pinahanni, tapi uhur ni halak parjahat kejam do.
- ¹¹ Halak sihorjaon jumani sungkupan do bani sipanganon, tapi halak na paihut-ihut na so marguna, halak na bodoh do.
- ¹² Sura-sura ni halak parjahat sihol mambahen hajahaton, tapi urat ni halak parpintor parohkon buah.
- ¹³ Hona tangkap do halak parjahat marhitei lepak ni parsahapni, tapi sai maluah do halak parpintor humbani hasosakanni.
- ¹⁴ Marhitei buah ni parsahapni do bosuran halak bani na madear, anjaha hinorjahon ni tanganni mulak hu bani.
- ¹⁵ Dalam ni halak na bodoh, pintor do ai ninuhurni, tapi halak na manangihon sipaingat, ai ma na maruhur.
- ¹⁶ Halak na bodoh mintor do ipataridahkon gilani, tapi halak na maruhur irungkub do apas-apas na hu bani.
- ¹⁷ Saksi na sintong manluarhon na sintong, tapi saksi palsu mansahapkon ladung.
- ¹⁸ Sahap ni halak sihampung parsahap songon paniam ni podang do, tapi songon tambat do dilah ni halak na maruhur.
- ¹⁹ Bibir na sintong totap do lalab, tapi dilah sipaoto-oto tongkin do ai hansa.

- ²⁰ Akal-akal do marianan ibagas uhur ni halak partahi-tahi, tapi malas ni uhur do bani halak sisuan damei.
- ²¹ Seng anjai mangonai hamagouan bani halak parpintor, tapi halak parjahat igoki hasunsahan do.
- ²² Hagigi ni Jahowa do bibir siparladung, tapi marosuh do la bani sihorjahon hasintongan.
- ²³ Halak na pentar masip do ia pasal habotohonni, tapi halak na bodoh maningtingkon haotoonni.
- ²⁴ Tangan ni halak na ringgas do na marrajai, tapi halak parrayoh gabe sisuruh-suruhan.
- ²⁵ Holsoh ibagas uhur patunduk jolma, tapi parsahap na basar pahinsah uhur.
- ²⁶ Halak parpintor dapotan sampalan, tapi dalam ni halak parjahat mambahensi kahou.
- ²⁷ Halak parrayoh seng dapotan buruanni, tapi lambin bayak do anggo halak na ringgas.
- ²⁸ Bani dalam hapintoron do jumpah hagoluhan, tapi dalam na masambor manuju hu hamatean.

(Sambatni)

13 ¹ Anak na pentar itangihon do pangajaran ni bapani, tapi halak sipanrisai seng ipardulihon pinsang-pinsang.

- ² Humbani buah ni pamanganni do panganon ni halak hadearon, tapi halak sipangeluk hisapan do bani odoh-odoh.
- ³ Halak sirajai pamanganni, goluhni do niramotkonni, tapi halak siganjang dilah maseda do.
- ⁴ Sai marsura-surai do halak parrayoh, hape soya-soya do; tapi halak na ringgas sai dapotan do bani pinarsinta ni uhorni.
- ⁵ Magigi do halak parpintor bani hata ladung, tapi halak parjahat sambor anjaha butak do pambahenanni.
- ⁶ Hapintoron do na manramotkon halak na daulat marparlahou, tapi hajungkaton do na mambahen madabuh pardousa.
- ⁷ Adong do halak na pakulah bayak ia, age pe seng dong bani, dong homa, ibahen ia songon na miskin, hape marnah na dong do.
- ⁸ Habayakonni do ipakei na bayak manobus hosahni, tapi halak na musil seng tarpaluahsi dirini.
- ⁹ Sondang ni halak parpintor marsinalsal do, tapi miloh do suluh ni halak parjahat.
- ¹⁰ Uhur hagijangon patubuhkon paringoran, tapi hapentaran do jumpah bani halak na ra manangihon podah.
- ¹¹ Habayakon na tarolos-olos pinagugun sai surut do, tapi na pinaiduk-iduk lambin tambah do.

- ¹² Pangarapan na so dapot, paborit uhur; tapi sinta-sinta na dapot, hayu hagoluhan do ai.
- ¹³ Halak na so parduli bani hata, parseda dirini do, tapi sihabiari titah dapotan upah do.
- ¹⁴ Podah ni halak na pentar, ai ma bah hagoluhan, na boi paluahkon humbani siding ni hamatean.
- ¹⁵ Hapentaran na sintong parohkon holong, tapi dalam ni halak sipargeduk gabe hasedaon do bani.
- ¹⁶ Halak na pentar mandalankon ganup horjani ibagas partimbangan, tapi halak na bodoh paidahkon haotooni.
- ¹⁷ Suruhan na jahat parohkon hamagouan, tapi suruhan hatengeran ni uhur mamboan hamalumon.
- ¹⁸ Hasombuhon pakon habadoron do sogop bani halak situlak pangajaran, tapi gabe marsangap do halak sitangihon pinsang-pinsang.
- ¹⁹ Sinta-sinta na dapot, tuah do ai bani tonduy, tapi sirang humbani hajahaton hagigi do ai bani na oto.
- ²⁰ Marsaor pakon halak na pentar, parohkon hapentaran, tapi maseda do halak na marhasomankon halak na oto.
- ²¹ Hamagouan do na mardakdak pardousa, tapi hadoharon do upah bani halak parpintor.

- ²² Halak sidear uhur martading-tadingan do ronsi pahompuni, tapi habayakon ni halak pardousa ipagugun do ai bani halak parpintor.
- ²³ Ladang tinombe ni halak na miskin mambere gogohni buei, tapi gati do magou ai halani hagedukon.
- ²⁴ Halak na malang manlonsingkon hotang, anakni do nihagigihonni ijai, tapi na holong uhur bani, ipagirah do mangajarsi.
- ²⁵ Halak parpintor bosur-bosur do mangan, tapi lumei do boltok ni halak parjahat.

14 ¹ Hapentaran ni naboru mambahen dear rumah tanggani, tapi na oto iparseda do marhitei tanganni sandiri.

- ² Halak na mardalan bani dalan na pintor, mabiar do ai bani Jahowa, tapi halak na geduk pardalanni, mapas do la bani.
- ³ Pamangan ni halak na oto do lonsing-lonsing bani gurungni, tapi bibir ni halak na pentar ai do marramotkonsi.
- ⁴ Anggo seng dong lembu na maninggala, lumei do tuangan, tapi buei do sipariamaan marhitei lembu jonggi na gogoh.
- ⁵ Saksi na sintong seng ra marladung, tapi ladung do iluarhon saksi palsu.

- ⁶ Halak sipanrisai mangindahi hapentaran, hape soya do; tapi halak na maruhur urah do dapotan habotohon.
- ⁷ Simbili ma halak na bodoh, ai seng dong jumpah so hata hapentaran hun bani.
- ⁸ Hapentaran ni siparuhur ai ma: ibotoh do dalanni; tapi haotoon ni halak na bodoh pakahouhon do.
- ⁹ Mapas do uhur ni halak na oto bani galangan pardousaon, tapi marosuh do halak parpintor bani ai.
- ¹⁰ Uhur ai do na mambotoh na maborit ibagas dirini, malas ni uhurni pe seng boi ahapkonon ni na legan.
- ¹¹ rumah ni halak parjahat maningon marumbak do, tapi mardohar do lampolampo ni halak parpintor.
- ¹² Adong do dalan, pintor do ai ninuhur ni halak, hape ujungni gabe dalan hamatean do.
- ¹³ Ibagas tawa pe dong do pusok ni uhur, anjaha bani malas ni uhur mangihut horu ni uhur.
- ¹⁴ Marhitei ulahni sihol ipabosur siparbalik uhurni, tapi sidear uhur marhitei pambahenanni na madear.
- ¹⁵ Halak na bodoh porsaya do bani sagala sahap, tapi halak na maruhur itimbangi do langkah-langkahni.

- 16 Marhabiaran do halak na maruhur anjaha isimbili do hajahaton, tapi halak na bodoh seng marrantei marparlahou anjaha raus.
- 17 Halak parringis ihorjahon do habodohon, anjaha ihagigihon halak do partahi-tahi.
- 18 Halak na oto marrupeyi bani haotoon, tapi habotohon do sortali ni siparuhur.
- 19 Tunduk do halak na jahat bani sidear uhur, anjaha halak na jungkat mangindo-indo bani labah ni parpintor.
- 20 Age sindohorni magigi do mangidah halak na masombuh, tapi buei do huan-kuan bani halak na bayak.
- 21 Pardousa do halak na mangapasi hasomanni, tapi martuah do halak na marholong ni atei bani na madoyuk.
- 22 Mintor lang ma kahou halak siuhurhon hajahaton? Tapi idop ni uhur ampa bujur ni uhur do rupei ni sipingkirhon na madear.
- 23 Ibagas sagala hangaluton adong do untung, tapi sahap simarinjaja parohkon hahurangan.
- 24 Sortali ni siparuhur, ai ma hapentaranni; tapi bani halak na oto haotoonni do jadi rudangni.
- 25 Sipaluah hosah do saksi na sintong, tapi sipangagou do siluarhon ladung.

- 26 Biar bani Jahowa do patubuh tenger ni uhur na toguh, anjaha bani anakni pe adong do haporusan.
- 27 Biar mangidah Jahowa do bah tubuh hagoluhan, na mambahen tarsimbili siding ni hamatean.
- 28 Hinabuei ni rayat do hamuliaon bani raja, tapi parsurut ni rayat hasedaon ni na markuasa do ai.
- 29 Halak na nanget manringis ai ma sibuei partimbangan, tapi halak na urah manggila pabanggal haotoon.
- 30 Sipahisar angkula do uhur na lamlam, tapi mangkarat bani holi-holi do uhur simburu.
- 31 Siodoh-odoh halak na maetek, sipahiri na manompasi do ia ai; tapi na mangkaholongi halak na masombuh, ai ma na pasangapkon Naibata.
- 32 Marhitei hajahatonni do maseda halak parjahat, tapi nalom do uhur ni parpintor age bani parmateini.
- 33 Ibagas uhur ni halak na maruhur marianan do hapentaran, tapi seng dong jumpah ai ibagas uhur ni na bodoh.
- 34 Habonaran do patimbul sada bangsa, tapi dousa do na mambahen maseda halak.

³⁵ Harosuh ni raja do juakjuak na pantas maruhur, tapi mangonai do ringisni bani sihorjahon na masambor.

15 ¹ Balos na lamlam pahombun ringis, tapi hata na kasar mamuhoi gila,

² Dilah ni halak na maruhur mantektekton habotohon, tapi haotoon do puas humbani pamangan ni halak na bodoh.

³ Dompok sab dunia on do pangkawah ni Jahowa, ipardiatei do halak parjahat ampa sidear uhur.

⁴ Dilah na lamlam, ai ma hayu hagoluhan; tapi dilah siparladung mambahen maborit uhur.

⁵ Halak na oto magigi do bani pangajaran ni bapani, tapi halak na marimbagaskon pinsang-pinsang, ai ma siparuhur.

⁶ I rumah ni halak parpintor buei do arta, tapi masese do pansarian ni halak parjahat.

⁷ Bibir ni halak na pentar manuan habotohon, tapi seng sonai anggo uhur ni halak na bodoh.

⁸ Galangan ni halak parjahat hagigi do ai bani Jahowa, tapi marosuh do la bani tonggo ni halak parpintor.

⁹ Hagigi ni Jahowa do dalan ni halak parjahat, tapi holong do uhur-Ni bani halak siparayak hapintoron.

- 10 Pangajaran na parah do mangonai bani halak sipanlembang, anjaha maningon matei do na mangkagigihon pinsang-pinsang.
- 11 Nagori toruh ampa naraka, talar do ai i lobei ni Jahowa, samintolah uhur ni jolma ma lang.
- 12 Halak parrisa seng marosuh ia ipaingat, seng ra ia marayak halak na pentar.
- 13 Uhur na megah mambahen bohi minar, tapi marhitei uhur na marhoru galek do tonduy.
- 14 Uhur na pantas mangindahi habotohon, tapi babah ni halak na bodoh mansahapkon haotoon.
- 15 Bani halak na marhoru sambor do sagala panorang, tapi bani halak siparmalas uhur hira ari pesta do tongtong.
- 16 Rahanan na otik marhasoman biar bani Jahowa, ase mararta na buei, tapi marhasunsahan.
- 17 Rahanan do na mangankon lowoh ibagas holong, ase mangankon lembu na mombur ibagas domdom.
- 18 Halak parringis mamuhoi paringoran, tapi halak parsabar mangintopi partinggilan.
- 19 Dalan ni halak parrayoh songon hondor duri do, tapi hornop do anggo dalan ni halak parpintor.
- 20 Anak na pentar pamalas uhur ni bapani, tapi halak na oto mapas do ia bani inangni.

- 21 Haotoon, malas ni uhur do ai bani na hurang uhur, tapi halak na pantas maruhur, pintor do pardalanni.
- 22 Sundat do ranggian anggo hurang panriaahan, tapi saud do ai anggo buei sipamodahi.
- 23 Malas ni uhur do ai bani halak anggo hona balosni, anjaha jengesan ai, sangkababah hata na topat bani panorangni.
- 24 Dalam hagoluan bani halak na maruhur manuju dampak datas, laho manimbili nagori toruh ai.
- 25 rumah ni sigijang uhur iparseda Jahowa do. tapi ipatotap do parbalogan ni naboru na mabalu.
- 26 Hagigi ni Jahowa do riah ni halak parjahat, tapi pansing do hata na madear i lobei-Ni.
- 27 Na parsedahon rumahni sandiri do halak sibuat untung na so tiba dalanni, tapi sai manggoluh do halak sihagigihon sisip.
- 28 Uhur ni halak parpintor ipingkiri do balos sibereonni, tapi humbani pamangan ni halak parjahat marjullak-jullak do hajahaton.
- 29 Daoh do Jahowa humbani halak parjahat, tapi itangihon do tonggo ni halak parpintor.
- 30 Pangkawah na basar pamalas uhur, anjaha barita na madear pahisar holi-holi.

- ³¹ Halak na ra manangihon podah na madear, marianan do ia i tongah-tongah ni halak na maruhur.
- ³² Halak na manulak podah, dirini do iparseda, tapi na manangihon pangajaran dapotan hapentaran.
- ³³ Biar bani Jahowa ai ma pangajaran, na mambahen pentar, anjaha toruh ni uhur do parlobei ni hasangapon.

(Sambatni)

- 16** ¹ Bani jolma do uhur panimbangion, tapi humbani Jahowa do roh sisahapkonon ni dilah.
- ² Haganup dalanni borsih do ninuhur ni halak, tapi Jahowa do siantan uhur.
- ³ Ondoskon ma bani Jahowa sagala horjamu, ase saud haganup sura-suramu.
- ⁴ Haganup do ijadihon Jahowa domu hubani sura-sura-Ni, age parjahat ai, ase hona uhum.
- ⁵ Hagigi ni Jahowa do halak sigijang uhur; tongon seng anjai lang hona uhum ia.
- ⁶ Marhitei holong ampa habujuron do salosei hasalahan, anjaha marhitei biar bani Jahowa boi do tarsimbili halak hajahaton.

- ⁷ Anggo marosuh Jahowa mangidah parlahou ni sada halak, munsuhni pe ipadamei do hu bani.
- ⁸ Rahanan do na otik ibagas hapintoron, ase pansarian na buei, na so tiba dalanni.
- ⁹ Uhur ni jolma marpingkir-pingkir pasal dalanni, tapi Jahowa do na manontuhon langkahni.
- ¹⁰ Haputusan na humbani Naibata do bani bibir ni raja, bani paruhuman seng anjai lepak sahapni.
- ¹¹ Kilo ampa timbangan na sintong, Jahowa do simadasi; la do na mangadongkon haganup batu timbangan.
- ¹² Hagigi ni raja, ai ma mangkorjahon hajahaton, ai marhitei hapintoron do totap paratasni.
- ¹³ Harosuh ni raja, ai ma bibir hasintongan, anjaha parsahap na sintong do ihaholongi.
- ¹⁴ Ringis ni raja, suruhan hamatean do ai, tapi mahombun do ai ibahen halak na pentar.
- ¹⁵ Minar ni bohi ni raja pagoluhkon, anjaha halayakonni doskon hambun na manorap bani logou ni ari.
- ¹⁶ Jumpahan hapentaran, dearan do ai humbani omas, dapotan hauhuron, harganan humbani pirak.
- ¹⁷ Dalan ni halak parpintor daoh do ai humbani hajahaton, anjaha na mangkargahon goluhni, ijaga do langkah-langkahni.

- 18 Parlobei ni hasedaon ai ma gijang ni uhur,
anjaha pangenjengon do parlobei ni
hadabuhon.
- 19 Dearan do martoruh ni uhur rapkon na
masombuh, ase marbagi taban-taban rap
pakon halak na jungkat.
- 20 Halak na marimbangaskon hata, dapotan
na madear, anjaha martuah do halak na
marhatengeran bani Jahowa.
- 21 Halak siparuhur igoran do ai na pentar, anjaha
mantin ni panluar mambahen margogoh
podah.
- 22 Bah tubuh hagoluhan do uhur hapantason
bani parsimada ai, tapi haotoon do ajar ni
halak na bodoh.
- 23 Uhur ni na pentar papandei pamanganni,
anjaha itambah do podah bani bibirni.
- 24 Songon manisan ni lobah do hata na lamlam,
mantin bani uhur, anjaha tambar bani
holi-holi.
- 25 Adong do dalan, pintor do ai ninuhur ni halak,
hape ujungni gabe hamatean do.
- 26 Lohei ni si parhorja manjuljulsi marhorja, ai
pamanganni do sipamaksa bani.
- 27 Halak parjahat paranggi-ranggi hamagouan,
anjaha songon apuy na gara do bibirni.
- 28 Halak sipanggeori pabolag paringoran, anjaha
siparrisai manirang na marhuan.

- ²⁹ Dalahi sipangodoh-odoh pakahou hasomanni,
anjaha ibobai do ia bani dalan na so madear.
- ³⁰ Halak na pahirdop-hirdop matani, sipingkiri
na masambor do ai, anjaha sipangemngem
pamanganni, ai ma sihorjahon hajahaton.
- ³¹ Uban, ai ma sortali hamuliaon, jumpah do ai
marhitei goluh na pintor.
- ³² Dearan do parsabar humbani puanglima,
anjaha na marrajai dirini humbani
sipatunduk huta.
- ³³ Ihursuk-hursuk pe ruji-ruji ibagas abingan, tapi
humbani Jahowa do roh haputusan.

(Sambatni)

- 17** ¹ Dearan do sansayat ruti na mapir
marhasoman uhur na sonang, humbani
rumah na gok gulei marhasoman
paringoran.
- ² Jabolon na pentar do sirajai anak paruhur na
bajan, anjaha dapotan tean-teanan do ia
rap pakon saninani.
- ³ Balanga panlalaan manguji pirak, liang
panloburan manguji omas, tapi Jahowa do
siuji uhur.
- ⁴ Halak parjahat patangi-tangi sahap na
masambor, halak siparladung manareihon
pinggolni bani hata na parsedahon.

- ⁵ Sipahiri-hiri halak na masombuh, pahirihon na manompasi do, anjaha na marmegah-megah pasal hamagouan ni hasomanni, lang tarbahren lang hona uhum do.
- ⁶ Sortali ni halak na matua ai ma pahompuni, anjaha hamuliaon ni anak ai ma bapa ni sidea.
- ⁷ Seng domu bani halak na oto sahap na mantin, samintolah hata ladung ma patut bani na sangap?
- ⁸ Mata intan do sisip, ninuhur ni sibere ai, iagan maruntung ma ia bani sagala langkah-langkahni.
- ⁹ Halak sirungkub hasalahan, ai ma siadongkon uhur na marsihaholongan, tapi halak na pararatkon sahap-sahap manirang na marhuan do.
- ¹⁰ Margogohan do sada hata pinsang-pinsang bani halak na maruhur, ase saratus lonsing-lonsing bani halak na bodoh.
- ¹¹ Halak parjahat pitah mangindahi parlawanan do, tapi suruhan na mabajan do isuruh mangimbangsi.
- ¹² Rahanan do pajumpah pakon gipul na magouan anak, humbani na pajumpah ampa halak na oto ibagas habodohonni.

- 13 Halak na mambalaskon na jahat bani na madear, seng morot be na masambor hun rumahni.
- 14 Sitolkas bah binongbong do halak sibahen paringoran, halani ai, paima pultak paringoran, intopi ma ai.
- 15 Halak na mamintori parjahat ampa halak sisalahkan na bujur, haduasi do ai hagigi bani Jahowa.
- 16 Aha ma gunani duit bani tangan ni halak na bodoh, laho mamboli hapentaran, hape seng dong uhur bani?
- 17 Bani sagala panorang do marholong atei huan-kuan, gabe sanina ibagas hasosakan do ia, ase tubuh.
- 18 Jolma na hurang uhur, urah do marjabat tangan, laho mambere jaminan bani hasomanni.
- 19 Halak na marosuh bani paringoran, siharosuhkon dousa do ai, anjaha na mambahen gijang hu atas labah ni rumahni, ai ma sipindahi hamagouan.
- 20 Halak paruhur na geduk, seng jumpahan na madear, anjaha halak pardilah na lekluk, madabuh hubagas hamagouan.
- 21 Halak siparanak na bodoh, pusok ni uhur do ai bani, seng marmalas ni uhur bapa ni halak na oto.

- ²² Uhur na megah paminar bohi, tapi tonduy na marosak pamerung angkula.
- ²³ Sisip na hunja pe ijalo parjahat do, laho papeol pardalan ni uhur.
- ²⁴ Bani panonggor ni halak na maruhur dong do hapentaran, tapi anggo mata ni na oto maor do ronsi ujung ni tanoh on.
- ²⁵ Borit ni uhur do bani bapa anak na oto, anjaha pusok ni uhur bani na manubuhkonsi.
- ²⁶ Mandonda halak parpintor seng dear, manlonsing halak na sangap salah tumang do ai.
- ²⁷ Halak siantan parsahap, ai ma na marpambotoh, anjaha halak partonduy na lamlam siparuhur do ai.
- ²⁸ Halak na bodoh pe, anggo masip gabe songon siparuhur do, anggo sai itutup pamanganni, tarhira do ia halak na pentar.

(Sambatni)

18 ¹ Halak na papulig dirini, sisuhuni rosuhni sandiri, siimbang sagala uhur hapantason do ai.

- ² Seng marosuh halak na bodoh bani habotohon, tapi pitah bani na patugah-tugahkon pingkiranni do hansa.

- ³ Anggo masa hajahaton, roh ma hahirion,
anjaha habadoron do mangihut bani horja
hasamboron.
- ⁴ Bah na bagas do sahap ni pamangan ni jolma;
bah tubuh hapentaran, bah na mardalan do
ai.
- ⁵ Seng dear mangapiti halak parjahat, laho
mansalahkan halak parpintor ibagas
paruhuman.
- ⁶ Bibir ni halak na bodoh parah paringoran,
anjaha pamanganni dilo-dilo do bani
lonsing-lonsing.
- ⁷ Pamangan ni halak na oto hamagouan do ai
bani, anjaha bibirni, siding bani dirini.
- ⁸ Hata ni siparhusip-husip mantin-mantin do ai,
anjaha masuk-masuk hubagas uhur.
- ⁹ Halak na lansei bani horjani, dos do ai pakon
halak siparseda dirini.
- ¹⁰ Benteng na toguh do goran ni Jahowa,
haporusan do ai bani halak parpintor, gabe
seng mahua be.
- ¹¹ Arta ni halak na bayak, huta na pinatoguh
do ai bani, anjaha tembok na gijang do ai,
ninuhurni.
- ¹² Anggo lape madabuh, gijang do uhur ni jolma,
tapi toruh ni uhur do parlobei ni hamuliaon.

- 13 Halak na mintor marsampang, hape lape torang ibogei, haotoon do ai bani anjaha habadoron.
- 14 Tonduy na hinsah mambahen tahan halak manaron, tapi uhur na mandolei, ise ma na boi pahisar ai?
- 15 Uhur ni halak na pantas jumpahan habotohon, anjaha pinggol ni halak na maruhur pindah-pindah bani hapentaran.
- 16 Sibere-bere ni jolma do palumbang langkah-langkahni, anjaha ai do manogu-nogusi hu lobei ni halak na sangap.
- 17 Songon na pintor do halak, na parlobei mangadu-adu bani parkarani, paima roh imbangni na mansalahkonsi.
- 18 Marjomput na sinurat mangujungi parsalisihan, anjaha mambahen haputusan bani paringoran ni halak na gogoh.
- 19 Sanina na hona tipu, songon benteng na so tardohori do ai, anjaha parsalisihan songon pating-pating situtup rumah bolon.
- 20 Humbani buah ni pamanganni do bosur boltok ni halak, bosuran do ia ibahen buah ni bibirni.
- 21 Hamatean barang hagoluhan marguru bani kuasa ni dilah do, anjaha halak na mambotoh manramotkonsi, ai do na mangankon buahni.

- ²² Halak na dapotan parinangon, jumpahan na madear do, jumpahan idop ni uhur do ia humbani Jahowa.
- ²³ Mangelek do sahap ni halak na masombuh, tapi halak na bayak koras do parsampangni.
- ²⁴ Adong do hasoman na parsedahon, tapi adong do homa hasoman na sangkanan humbani sanina.

(Sambatni)

- 19** ¹ Dearan do halak na masombuh, na pitah marparlahou, humbani halak parbibir ladung, age pe bayak ia.
- ² Anggo seng marhasoman pamingkirion, seng marguna haringgason, anjaha halak na mangolos-olos mandalankon horjani, maningon lepak do.
- ³ Haotoon ni jolma do parseda dalanni, hape dompak Jahowa marungut-ungut uhurni.
- ⁴ Habayakon do pabuei huan-kuan, tapi halak na masombuh, gari diha-dihani manadingkansi.
- ⁵ Saksi palsu seng tarbahen lang hona uhum, anjaha sisahapkon ladung seng anjai maluah.
- ⁶ Buei do halak na mamuji-muji na sangap, anjaha ganup do halak gabe huan ni halak siparlayak,

- ⁷ Halak na masombuh, saninani pe haganup
sogam do uhurni bani, samintolah ma
diha-dihani lang padaoh diri hun bani?
- ⁸ Halak na jumpahan uhur hapantason, holong
do uhurni bani goluhni, halak siramotkon
pangarusion dapotan tuah do.
- ⁹ Saksi palsu seng anjai lang hona uhum, anjaha
sisahapkon ladung magou do.
- ¹⁰ Lang patut halak na oto marsonang-sonang
manggoluh, lobih hunjai seng patut jabolon
manrrajai raja-raja.
- ¹¹ Hapentaran ni jolma mambahensi nanget
manringis, anjaha hamuliaon do ai bani,
manalpuhon hasalahan,
- ¹² Songon paraum ni singa do ringis ni raja,
tapi dear ni uhurni songon namur na bani
poyon-poyon.
- ¹³ Hasedaon ni bapa do anak na oto, anjaha
naboru siparingor songon tiris na manektek
torus.
- ¹⁴ Rumah pakon arta, ai ma tading-tadingan
humbani na matoras, tapi humbani Jahowa
do parinangon na maruhur.
- ¹⁵ Harayohon mambahen dokah modom, anjaha
uhur na rahanan soh mambahen gayuran.
- ¹⁶ Halak na mandalankon parentah, ai ma na
manramotkon goluhni, tapi maningon matei
do na so parduli bani langkah-langkahni.

- 17 Na papinjamkon bani Jahowa do halak, na maridop ni uhur bani halak na masombuh, anjaha la do na mambaloskon ai bani.
- 18 Ajar ma anakmu, ai adong ope arapan, tapi ulang roh uhurmu pamatehonsi.
- 19 Halak siparringis bangga, ia sandiri do na manaron, anggo sihol urupanmu ia, paparahkon do ai.
- 20 Tangihon ma podah, anjaha jalo ma sipaingat, ase lambin pentarni ho use.
- 21 Buei do ranggian ibagas uhur ni jolma, tapi sura-sura ni Jahowa do na saud.
- 22 Hisap-hisap ni jolma pindah-pindah bani paruntungan; tapi dearan do masombuh humbani na gabe siparladung.
- 23 Biar bani Jahowa do na pagoluhkon, bosur do halak anjaha sonang modom, seng mangonai hamagouan bani.
- 24 Domma ipohul siparrayoh indahanni, tapi rayohan do ia mannahkon ai hu pamanganni.
- 25 Maningon lonsingon do sipanrisai, ase maruhur halak na oto, tapi anggo halak na pantas, ipinsang gelah domma jumpahan habotohon.
- 26 Ise na mangarsik bapani anjaha iusir-usir inangni, ai ma anak sibahen hasamboron ampa habadoron.

- ²⁷ Anggo iparontihon ho, ale anakku,
manangihon podah, jadi kahou ma ho
humbani hauhuron.
- ²⁸ Saksi paruhur jahat mapas do bani uhum,
anjaha mantin do hagedukon bani
pamangan ni halak parjahat.
- ²⁹ Sirsir do uhum bani halak sipanrisai, sonai
lonsing-lonsing bani gurung ni halak na oto.

(Sambatni)

- 20** ¹ Sipatubuh panrisaion do anggur, sibahen
mabuk minuman koras, anjaha ise na
sompat rebad-rebad ibahen, seng maruhur
be.
- ² Songon paraum ni singa do ondam-ondam ni
raja, barang ise na mamuhoi ringisni, na
parseda dirini sandiri do.
- ³ Hasangapon do ai bani dalahi mandaoh
humbani paringoran, tapi halak na oto
marosuh do martinggil.
- ⁴ Halani borgoh ari, seng ra siparrayoh
maninggala; sihol ma ia namin marpariama,
hape aha pe lang adong.
- ⁵ Songon bah bagas do uhur ni jolma ibagas, tapi
halak na pentar tardodousi do ai.
- ⁶ Buei do jolma patugah-tugahkon hadearonni,
tapi halak hatengeran ni uhur, ija do jumpah
ai?

- ⁷ Marparlahou na pitah do halak parpintor;
martuah do anakni i pudini.
- ⁸ Raja na hundul bani hotak paruhuman,
mamurpurhon sagala hajahaton marhitei
pangkawahni.
- ⁹ Ise ma na barani mangkatahon, “Domma
hupaborsih uhurhu, pansing do ahu
humbani dousangku?”
- ¹⁰ Timbangan na palegan-legan, suhat-suhata na
palegan-legan, haduasi do ai hagigi bani
Jahowa.
- ¹¹ Age marhitei pambahenanni, tartanda do
dakdanak, atap na borsih atap na pintor
biakni.
- ¹² Pinggol na marpanangar pakon mata na
marpangidah, Jahowa do na manjadihon ai
haduasi.
- ¹³ Ulang ma harosuhkon na modom-modom, ase
ulang miskin ho; ungrab ma matamu, gabe
sungkupan sipanganon ma ho.
- ¹⁴ “Sambor do, sambor do,” nini sipamboli, hape
dob misir ia, ipuji do dirini.
- ¹⁵ Age adong omas, buei age mutiha, tapi arta
siharganan ai ma bibir na marpambotoh.
- ¹⁶ Buat ma hiouni, ai ijamini do halak na legan,
gadeihon ma ai, halani iampuni halak
sileban.

- 17 Mantin do bani halak sipanganon na tinangko,
hape dobni gabe gok ranggisgis do
pamanganni.
- 18 Saud do sura-sura marhitei panriahan, halani
ai marhitei partimbangan ma dalankon
porang.
- 19 Halak na hujai-hujon pahata-hatahon,
mambahen tarbotoh rusia, halani ai ulang
ma marhuan pakon halak siher tep bibir.
- 20 Halak na mamurai bapani atap inangni, sai
na mintop do suluhni ibagas na golap
marimpot-impot.
- 21 Tean-teanan na tarolos-olos ipatumpu, dobni
seng marpasu-pasu ai.
- 22 Ulang hatahon, "Hubalaskon ma hajahaton ai!"
Hatengerhon ma Jahowa, sai urupan-Ni do
ho.
- 23 Hagigi ni Jahowa do timbangan na palegan-
legan, anjaha kilo palsu seng dear
ai.
- 24 Jahowa do na manontuhon langkah-langkah
ni jolma; naha ma jolma boi mangarusi
dalanni?
- 25 Siding do ai bani jolma, mapodastu
mangkatahon bagah-bagah; hape dob
ibagakon pe ase iuhurhon ai.

- ²⁶ Mapurpur do halak parjahat ibahen raja na pantas, anjaha galapang do ipadalan hun datas ni sidea.
- ²⁷ Suluh ni Jahowa do tonduy ni jolma, na mamareksa haganup lompit-lompit ni uhurni.
- ²⁸ Halayakon ampa hasintongan do na manramotkon raja; anjaha totap do paratasni marhitei uhur holong.
- ²⁹ Hamuliaon bani garama, ai ma gogohni, tapi ubanni do hasangapon bani na matua.
- ³⁰ Lonsing-lonsing na mardaroh padaoh hajahaton, anjaha bogbog-bogbog paborsih uhur parbagas.

(Sambatni)

- 21** ¹ Songon bah na bani bondar do uhur ni raja ibagas tangan ni Jahowa; ibobai do ai dompak ja rosuh ni uhur-Ni.
- ² Haganup dalanni, pintor do ai ninuhur ni halak, tapi Jahowa do siuji uhur.
- ³ Na mandalankon hapintoron pakon uhur, rosuhan do uhur ni Jahowa bani ai humbani na mangidah galangan.
- ⁴ Mata na mangenjeng pakon uhur hagijangon, ai ma suluh bani parjahat, dousa do ai.

- ⁵ Uhur haponguton mambahen halak marlobih-lobih, tapi halak na tarolos-olos marhahurangan do.
- ⁶ Halak na patumpu arta marhitei sahap ladung, na marleilei logou anjaha na mangindahi hamatean do ai.
- ⁷ Panokohon ni halak parjahat, ai do na parseda sidea sandiri, ai manjua do sidea mangkorjahon hasintongan.
- ⁸ Mareluk-eluk do dalan ni halak parjahat, tapi pintor do dalan ni halak siparuhur na pitah.
- ⁹ Rahanan do marianan bani suhi-suhi ni tayub, ase rap marianan i rumah ampa naboru sipartinggil.
- ¹⁰ Uhur ni halak parjahat marosuh bani na masambor, gari hasomanni seng harga bani.
- ¹¹ Anggo hona uhum sipanrisai, gabe maruhur do halak na oto, anggo iajari halak na pentar, jumpahan habotohon do ia.
- ¹² Mangkawah do halak parpintor hu rumah ni parjahat; hona dabuh do parjahat ai hu hamagouan.
- ¹³ Halak na manutup pinggolni dompak doruh-doruh ni halak na masombuh, ia pe, anggo dilo-dilo holi, seng dong na mambalosi.
- ¹⁴ Sibere-bere na ponop pahombun ringis, anjaha siluah na buni mangampogi gila na parah.

- 15 Malas ni uhur bani halak parpintor, ai ma na mandalankon uhum; tapi habiaran do ai bani halak sihorjahon na masambor.
- 16 Jolma na kahou humbani dalan hapentaran, bani urung habeguon do ia marianan.
- 17 Gabe marhahurangan do halak na marosuh marpesta-pesta, anjaha halak na rosuh bani anggur ampa minak, seng anjai bayak.
- 18 Tobus bani halak parpintor do halak parjahat, anjaha sipangosei-osei do gantih ni halak sibujur uhur.
- 19 Dearan do marianan i halimisan, ase rap sajabu pakon parinangon sipartinggil ampa sipargila-gila.
- 20 Arta na maharga pakon minak, adong do i rumah ni halak na maruhur, tapi halak na bodoh mintor do iparbois-bois.
- 21 Halak siparayak hapintoron pakon habasaron, dapotan hagoluhan ampa hamuliaon do.
- 22 Huta ni puanglima pe ipanangkih halak na pentar do, irumbakkon do benteng, hatengeran ni uhurni ai.
- 23 Halak na manjaga pamanganni ampa dilahni, iramotkon do goluhni humbani parmaraan.
- 24 Halak sigijang uhur ampa sipangenjeng, margoran do ai sipanrehei, tarlobih do jungkat ni parlahouni.

- ²⁵ Hisap-hisap ni siparrayoh do hamatean bani, ai marayoh do tanganni marlahoan.
- ²⁶ Ganup ari do halak parjahat marsura-surai, tapi halak parpintor layak do, seng maruhur haut.
- ²⁷ Galangan ni halak parjahat, hagigi do ai, tarlobih anggo manggalang ia, hape laho mambahen na jahat do.
- ²⁸ Saksi parladung maningon magou do, tapi na sinahapkon ni na manangar totap do.
- ²⁹ Halak parjahat pajingar-jingar bohini, tapi anggo halak parpintor totap do parlangkahni.
- ³⁰ Seng dong hapentaran, seng dong hauhuron, anjaha seng dong riah, na totap i lobei ni Jahowa.
- ³¹ Pinasirsir pe huda bani panorang porang, tapi anggo hamonangan humbani Jahowa do.

(Sambatni)

- 22** ¹ Harganan do goran na madear ase habayakon na buei, anjaha dearan do anggo gabe harosuh diri humbani pirak atap omas.
- ² Saor do halak na bayak pakon na masombuh, tapi Jahowa do na manjadihon sidea haganup.

- ³ Halak na pantas mangidah parmaraan, jadi marponop ma ia; tapi halak na oto itoruskon do langkahni, gabe manaron.
- ⁴ Upah ni uhur na toruh ampa biar bani Jahowa, ai ma habayakon, hamuliaon ampa hagoluhan.
- ⁵ Duri pakon siding do bani dalan ni halak pargeduk, halak na mangkargahon hosahni, ipadaoh ma dirini hunjai.
- ⁶ Pasomal-somal ma dakdanak mardalan bani dalan sidalanonni, ia dob matua ia, seng manlembang ia hunjai.
- ⁷ Halak na bayak do na manrajai bani na masombuh, anjaha sipanginjam gabe jabolon ni na painjamkoni.
- ⁸ Halak na manabur hagedukon maningon sabionni do hamagouan, anjaha sai maripuk do tungkot hajungkatonni ai.
- ⁹ Halak na lamlam pangkawahni dapotan pasu-pasu do; ai ibere do humbani sipanganonni hubani na masombuh.
- ¹⁰ Usir siparrisai, jadi lang dong be paringoran, anjaha parsalisihan ampa panreheion pe maronti ma.
- ¹¹ Halak na mangkarosuhkon uhur na pitah, anjaha parsahapni pe basar, raja ma na gabe huan-kuanni.

- ¹² Mata ni Jahowa do na manramotkon habotohon, tapi ibalikkon do hata ni sipangeluk.
- ¹³ Hata ni siparrayoh, “Adong do singa i darat ai, ibunuh holi ahu i dalan ai!”
- ¹⁴ Godung na bagas do sahap-sahap ni naboru parbangkis, halak na pinapaan ni Jahowa do madabuh hujai.
- ¹⁵ Haotoon do longkot ibagas uhur ni dakdanak, tapi hotang sipangajari do palahohon ai hun bani.
- ¹⁶ Halak na mangodoh-odoh na masombuh laho paganda untungni, anjaha marsibere-bere bani halak na bayak, mambahensi marhahurangan.

Podah ni Halak na Pentar-pentar

- ¹⁷ Paeleng ma pinggolmu anjaha tangihon ma hata ni halak na pentar anjaha paruhurhon ma podahku;
- ¹⁸ ai dear do ai, anggo ra ho marimbagaskon ai, anjaha totap ai marianan bani bibirmu.
- ¹⁹ Andohar martenger ni uhur ho bani Jahowa, ai do ase hupatugah ai bam sadari on, hubam tongon.
- ²⁰ Ai lang domma husuratkon bam hata na maharga, podah pakon habotohon,

- ²¹ Iaho paidahkon bam na sintong ampa na tongon, ase ibotoh ho sintong marbalos bani halak na marsuruh ho?
- ²² Ulang ma rampas halak na masombuh, halani masombuh ia; anjaha ulang ma odoh-odoh halak na madoyuk i paruhuman;
- ²³ ai Jahowa do siparlulu bani sidea, anjaha la do na mambuat hosah ni sibuat hosah ni sidea.
- ²⁴ Ulang ra ho marhuan-kuan pakon halak siparringis, anjaha ulang ma saorhon dirimu bani halak pargila-gila,
- ²⁵ ase ulang gabe hasomalan ho bani parlahou ni sidea, anjaha itaon ho siding bani dirimu.
- ²⁶ Ulang ma ra ho gabe halak sipanjamini, na ra mananggung pasal utang-utang,
- ²⁷ ai anggo seng dong panggalmu, podomanmai ma holi ibuat humber.
- ²⁸ Ulang ma paosor batu parbalogan na dob pinasuk ni ompungmu hinan ijia.
- ²⁹ Halak na pongut bani horjani, boi do marhorja ia i lobei ni raja-raja; seng bani halak na malumat ia marugas.

(Sambatni)

23 ¹ Anggo hundul ho rap mangan pakon sahalak panggomgomi, pangkei ma pardiatei atap aha na i lobeimu;

- ² nahkon ma pisou bani tolonanmu, anggo parhisap ho!
- ³ Ulang ma sir uhurmu bani na mantin-mantinni ai, ai sipanganon na paoto-otohon do ai.
- ⁴ Ulang ma lojai dirimu mangindahi habayakon, padaoh ma pingkiranmu hunjai.
- ⁵ Ai anggo mangkawah ho hujai, jadi lang dong be, ai sompong do marhabong ia, gabe habang songon manuk-manuk nanggordaha hu awang-awang.
- ⁶ Ulang ma pangan indahan ni halak parmata na serleng, ulang ma sir uhurmu bani sipanganonni age naha mantinni,
- ⁷ ai mambahen hira-hira do ia ibagas uhurni. "Mangan anjaha minum ma ham," nini hubam, tapi uhurni seng dompak ho.
- ⁸ Gabe utahkononmu ma holi sisampohul na pinanganmai, anjaha sisoya-soya ganup hatamu na madear ai.
- ⁹ Ulang ma marsahap ho i lobei ni halak na oto, ai mapas do uhurni bani sahapmu na marisi hapentaran ai.
- ¹⁰ Ulang ma osor batu parbalogan sisapari, anjaha ulang ma soluk ladang ni na tading maetek,
- ¹¹ ai gogoh do sipanluluhon sidea; la do mansuhutkon parkara ni sidea dompak ho.

- ¹² Dompakkon ma uhurmu bani pangajaran, sonai pinggolmu bani sahap na gok habotohon.
- ¹³ Ulang ma parontihon pangajaran hubani dakdanak, porini ilonsing ho pe ia, seng pala matei.
- ¹⁴ Ilonsing ho do tongon angkulani, tapi na paluahkon tonduyni ai do ho hun nagori toruh.
- ¹⁵ Ale anakku, anggo gok hapentaran uhurmu, uhurhu pe malas do.
- ¹⁶ Anjaha marolob-olob do tonduyhu, anggo isahapkon bibirmu hasintongan.
- ¹⁷ Ulang simburu uhurmu mangidah pardousa, tapi marhabiaran ma ho tongtong.
- ¹⁸ Tongon, adong do ari pangapudianan, seng anjai rotap pangarapanmu.
- ¹⁹ Tangihon ma, ale anakku, ase pentar ho, anjaha dompakkon ma uhurmu bani dalan na pintor.
- ²⁰ Ulang ma saor ho pakon halak sisibur anggur atap pakon halak na hisapan bani gulei;
- ²¹ ai halak parmabuk pakon parhisap maningon miskin do, anjaha marhiou rigat-rigat halak na marosuh modom-modom.
- ²² Tangihon ma bapamu na mantubuhkon ho, anjaha ulang mapas uhurmu bani inangmu anggo matua ia.

- 23 Hasintongan ma boli, anjaha ulang jualhon ai; sonai hapentaran, pangajaran ampa pangarusion.
- 24 Tongon, malas do uhur ni bapa ni halak parpintor; anjaha ise na mantubuhkan anak na maruhur, malas do uhurni marhalanihonsi.
- 25 Malas ma tongon uhur ni bapamu ampa inangmu, marolob-olob ma uhur ni na mantubuhkan ho.
- 26 Bere ma, ale anakku, uhurmu bangku, anjaha sai iharosuhkan matamu ma dalanku.
- 27 Ai doskon godung na bagas do boru jalang, anjaha parigi na sompit do naboru parbangkis.
- 28 Tongon, songon panamun do ia manggompangi, anjaha ipabuei do halak sipangeluk i tongah-tongah ni hajolmaon.
- 29 Ise do na hoih-koih? Ise do siparinangoi? Ise do siparingor? Ise do na holsohan? Ise do na ughan seng marhala? Ise do siparmata na gombur?
- 30 Halak na halalaban minum anggur, halak na laho mandai-dai minuman na koras.
- 31 Ulang pakawah-kawah anggur halani magerger rupani, halani marlinang idahon ibagas

panginumman, halani lamlam panjalirni hubagas.

- ³² Dobni mangkarat do ai songon ulog, anjaha mandoit songon darih.
- ³³ Idahon ni matamu ma na ganjil-ganjil, anjaha uhurmu mansahapkon na so marturut.
- ³⁴ Gabe songon halak na modom i tongah laut ma ho, anjaha songon halak na modom i ujung ni tiang layar.
- ³⁵ Nim, “Ibogbog sidea do ahu, tapi lang maborit, ibalbal sidea do, tapi lang huahapkon. Anggo tarjolma ahu, ulakanku do minum.”

(Sambatni)

- 24** ¹ Ulang ma simburu uhurmu mangidah halak parjahat, anjaha ulang ma ho ra saor pakon sidea;
- ² ai hamagouan do iparanggi-ranggi sidea, anjaha na masambor do isahap-sahapkon bibirni.
- ³ Marhitei hapentaran do tarpajongjong rumah, anjaha marhitei panimbangion do totap ai;
- ⁴ marhitei habotohon gok ma kamar-kamarni bani bagei-bagei ni arta na maharga anjaha na majenges.
- ⁵ Halak na maruhur do tongon na gogoh, anjaha na marpambotoh simada kuasa,

- ⁶ ai marhitei pambobai na pentar tardalankon porang, anjaha marhitei buei ni sipanuturi dapot hamonangan.
- ⁷ Magijangtu do hapentaran bani halak na bodoh; bani partumpuan seng onggga mungkab pamanganni.
- ⁸ Halak na paranggi-ranggi na masambor, targoran do ai kopala ni parjahat.
- ⁹ Dousa do piningkiran ni halak na oto, anjaha halak sipanrisai, hagigi do bani jolma.
- ¹⁰ Anggo seng tahan ho bani panorang hasosakan, ai ma tandani na hurang do gogohmu.
- ¹¹ Sai paluah ma halak na sinarad hu hamatean, anjaha olat ma halak na itogu hu panayatan.
- ¹² Anggo ihatahon ho, "Tonggor ma, seng ibagas botohnami ai," mintor ma nani lang ibotoh sipareksa uhur pasal ai? Siparorot tonduynima ibotoh do ai, anjaha ibaloskon do bani jolma domu hubani na binahenni.
- ¹³ Ale anakku, pangan ma manisan, ai dear do ai, sonai tobu-tobu ni haramah, ai mantin do ai bani langit-langitmu.
- ¹⁴ Sonai ma hapentaran ai bani tonduymu. Anggo jumpah ho ai, adong ma pangapudianan bam, seng soya-soya be pangarapanmu.
- ¹⁵ Ulang ma onggopi, ale parjahat, rumah ni halak parpintor, ulang ma parseda iananni!

- ¹⁶ Ai pitu hali pe tompas halak parpintor, jongjong do ia use, tapi anggo halak parjahat, targompang do lanjar magou.
- ¹⁷ Ulang ho marsombuh-sombuh, anggo targompang munsumu, anjaha ulang megah uhumu mangidah partompasni,
- ¹⁸ ai idahon ni Jahowa do ai, gabe sogam uhur-Ni, anjaha marbalik ringis-Ni humbani hubam.
- ¹⁹ Ulang milas uhumu ibagas bani halak sihorjahon na masambor, anjaha ulang ma ho marngotngot mangidah parjahat;
- ²⁰ ai bani halak parjahat, seng dong siarapkononkon, suluh ni halak parjahat maningon mintop do.
- ²¹ Ale, anakku, sai mabiar ma ho bani Jahowa ampa raja; ulang ma saor ho bani sipanggeori,
- ²² ai sompong do sogop hamagouan bani sidea, anjaha na so niagak ni uhur do mangonai uhum bani sidea.
- ²³ On pe sahap ni halak na pentar do. Seng dear martonggor jumbak bani paruhuman.
- ²⁴ Halak na mangkatahon dompak parjahat, "Pintor do ho!" Hona papa do ia bahenon ni halak simbuei anjaha hona bura ibahen bangsa-bangsa.

- 25 Tapi halak na maminsang sidea madear do,
anjaha sogop do pasu-pasu ampa hatuahon
bani sidea.
- 26 Summah-summah na mantin do parsampang
na hona.
- 27 Pungkah lobei horjamu i ladang, torsa bahen
jumamu, dob ai pe ase marrumah tangga.
- 28 Ulang ra ho manaksihon na so sintong dompak
hasomanmu, anjaha ulang marladung ho
marhitei bibirmu.
- 29 Ulang hatahon, “Sonai ibahen hu bangku,
sonai do bahenonku bani. Baloskononku
do hubani domu hubani na binahenni ai
bangku.”
- 30 Montas do ahu hun lambung ni juma ni halak
parrayoh, hun lambung ni pohon anggur ni
halak na hurang uhur.
- 31 Tonggor ma, tubuhan suga-suga do haganupan
ai, irungkub hupi-hupi do tanoh ai, anjaha
mareong do tembokni.
- 32 Hukawahkon ma ai anjaha huparimbagaskon,
huidah lanjar dapotan lumba-lumba ma
ahu:
- 33 Tongkin nari modom, tongkin nari tibal-tibal,
tongkin marlompit tangan;
- 34 jadi roh ma bam hamiskinon songon panamun,
anjaha hahurangan songon halak parsinjata.

Upah ni Hapentaran

- 25** ¹ On pe podah ni Raja Salomo, ai ma na pinahumpul ni juakjuak ni si Hiskia, raja ni Juda.
- ² Hamuliaon ni Naibata do ai mangadongkon rusia, tapi hamuliaon ni raja, ai ma na manulimati.
- ³ Gijang ni langit, bagas ni tanoh ampa pingkiran ni raja-raja seng tardodou ai.
- ⁴ Iambukkon ma humbani pirak, jadi boi ma ai topaon ni tukang gabe parugas.
- ⁵ Padaoh ma halak parjahat hun lobei-lobei ni raja, gabe totap ma paratasni marhitei hapintoron.
- ⁶ Ulang ma pabanggal-banggal dirimu i lobei ni raja, atap hundul ho bani ianan ni halak na sangap-sangap;
- ⁷ ai rahanan do hatahonon ni halak bam, “Hu luluan ma ham!” Humbani na ipatoruh halak ho i lobei ni na sangap.
- ⁸ Na nididah ni matamu, ulang aduhon ai mapodastu, ai sonaha ma holi ho, anggo bador ho ibahen hasomanmu?
- ⁹ Parkarahon parkaramu dompak hasomanmu, tapi ulang patugah rusia ni halak na legan,
- ¹⁰ ase ulang bador ho ibahen halak na manangar ai, gabe sambor baritamu lalab.

- 11 Doskon jambu omas na i atas ni pinggan pirak do, hata na niluarhon topat bani panorangni.
- 12 Doskon tintin omas atap ugas-ugas omas do, halak siparpodah na pentar bani halak na ra manangihon.
- 13 Songon bah tubuh na patorsukkon bani musim sabion, sonai do suruhan hatengeran ni uhur bani na marsuruhsi, ipahisar do uhur ni tuanni.
- 14 Songon hambun pakon logou na so marhasoman udan, sonai do halak na marbagah sibere-bere, hape seng ipasaud.
- 15 Marhitei hasabaron do dapot uhur ni na markuasa, anjaha hata na lamlam mamonggolhon holi-holi.
- 16 Anggo jumpah ho manisan, pangan ma ansa na porlu bam. ase ulang mabosurtu ho, gabe iutahkon ho ai.
- 17 Ulang magatitu ho martandang hu rumah ni hasomanmu, ase ulang sobalan ia bam, gabe hagigini ho.
- 18 Songon ompong-ompong, podang atap panah na marot, sonai do halak na manaksihon ladung dampak hasomanni.
- 19 Songon ipon na mulluk-ulluk atap nahei na tarlandit, sonai do halak na so hatengeran bani panorang hasosakan.

- ²⁰ Songon halak na mananggali bajuni bani
musim borgoh, anjaha songon na migar
na mangonai bani ugah, sonai do halak na
mandodingkon doding bani halak paruhur
na seda.
- ²¹ Anggo loheian munsuhmu, bere ia mangan,
anggo horahan ia, bere ia minum;
- ²² ai na pajunjun narnar do ho bani uluni marhitei
ai, anjaha Jahowa ma na mambalaskon ai
bam.
- ²³ Logou na hun utara paroh udan, tapi hata
tundal mambahen bohi manringis.
- ²⁴ Rahanan do marianan i suhi-suhi ni tayub,
ase rap sajabu pakon parinangon
partinggil-tinggil.
- ²⁵ Songon bah na torsuk hubani halak na
horahan, sonai do barita na madear hun
tanoh na madaoh.
- ²⁶ Songon pansur na gombur atap bah tubuh
na binutakan, sonai do halak parpintor, na
mambahen parsangisian i lobei ni halak
parjahat.
- ²⁷ Seng dear panganon manisan mabueitu, halani
ai asok ma mambere puji-pujian.
- ²⁸ Songon huta na mareong, na so martembok
be, sonai do halak na so boi manrajai dirini.

(Sambatni)

- 26** ¹ Songon salju musim milas, atap songon udan musim sabion, sonai do, seng patut hamuliaon bani halak na oto.
- ² Songon dingis na laho lintun meper-eper, songon hampilis na maporus habang, sonai do bura-bura na so marhala, seng mangonai.
- ³ Bosik-bosik do talup bani huda, rantei bani halode, sonai do hotang bani gurung ni halak na oto.
- ⁴ Ulang ma sampang halak na oto domu hubani haatoonni, ase ulang gabe songonsi ho.
- ⁵ Marbalos ma ho bani halak na oto romban hubani haatoonni, ase ulang iagan na pentar ia.
- ⁶ Halak na martonah marhitei halak na oto, na manrotap naheini do ia ai anjaha manginum na masambor.
- ⁷ Songon nahei na so marguna bani halak na repat, sonai do podah bani pamangan ni halak na bodoh.
- ⁸ Songon halak na mambahen mata intan batu ni umbalang, sonai do halak na mambere hamuliaon bani halak na oto.

- ⁹ Songon dangkah na marduri na dapot tangan ni halak na mabuk, sonai do hata umpama bani pamangan ni halak na oto.
- ¹⁰ Songon halak siparsior, na manembaki haganup, sonai do halak na mangupahi halak na oto atap halak sipamolus.
- ¹¹ Songon baliang na mangulaki utah-utahni, sonai do halak na oto mulak-ulak mangkorjahon haotoonni.
- ¹² Anggo dong ididah ho halak, na mangagan dirini pentar, bueinan ope pangarapan bani halak na bodoh ase bani.
- ¹³ Hata ni halak parrayoh, “Adong do begu i darat ai, adong do singa i dalam ai!”
- ¹⁴ Songon labah na marhusor bani engselni, sonai do halak siparrayoh bani podomanni.
- ¹⁵ Domma ipohul siparrayoh indahanni, hape rayohan do ia mannahkon hu pamanganni.
- ¹⁶ Pentaran do halak siparrayoh, ninuhurni, marimbang pitu halak na pandei marsampang.
- ¹⁷ Halak na ra manampuri paringoran ni halak na legan, doskon halak na manangkap pinggol ni baliang na montas do ia ai.
- ¹⁸ Songon halak na podouan, na manembakkon panah apuy ampa lingkit na pamatehon,

- ¹⁹ sonai do halak na manipu hasomanni, anjaha ihatahon ope, “Gurou-guroungku do hansa ai.”
- ²⁰ Anggo seng dong be soban, miloh do apuy, anggo seng dong sipanukas-nukasi, maronti do paringoran.
- ²¹ Arang pagajag narnar, soban pagajag apuy, sonai do dalahi sipartinggil pagara paringoran.
- ²² Hata ni si parhusip-husip mantin do ai, anjaha masuk-masuk hubagas uhur.
- ²³ Songon pirak na nilampiskon bani hudon, sonai do parbibir na lampot, hape uhurni ibagas jahat do.
- ²⁴ Halak pardomdom marsipakulah-kulah do parsahapni, tapi gok pangoto-otoion do uhurni ibagas;
- ²⁵ age pe basar parsahapni, ulang ho porsaya, ai adong do pitu lapis hasamboron ibagas uhurni;
- ²⁶ age pe irungkub-rungkub domdomni marhitei sipaoto-oto, maningon talar do hajahatonni ai i tongah-tongah ni humpulan.
- ²⁷ Halak sihurak godung bani na legan, ia sandiri do madabuh hubagas; halak na manggulangkan batu bani na legan, ia sandiri do hona gulangan.

²⁸ Dilah parladung mambahen hasedaon,
pamangan na landit parohkon hamagouan.

(Sambatni)

- 27** ¹ Ulang ma pangunsagahkon pasal ari patar,
ai seng ibotoh ho atap aha na boi masa bani
sada ari.
- ² Halak na legan ma na mamuji ho, ulang ma
pamanganmu sandiri, hasoman na lain ma,
ulang bibir sandiri.
- ³ Borat pe batu, sonai homa horsik, tapi boratan
do hunjai borit ni uhur marhalanohon ni
halak na oto.
- ⁴ Parah do gila, anjaha gajag do ringis, tapi ise ma
na tolap manahan parsimburuon?
- ⁵ Rahanan do pinsang-pinsang na talar, humbani
holong na pinonop-ponop.
- ⁶ Ugah halani lonsing-lonsing ni huan-kuan,
holong do ai, tapi summah-summah ni halak
pardomdom, sipakulah-kulah do.
- ⁷ Halak na bosur sobalan do age bani manis, tapi
halak na loheian matobu do bani age na
mapaet.
- ⁸ Songon manuk-manuk na manadingkon asarni,
sonai do halak na manadingkon tanoh
hatubuhanni.

- ⁹ Minak pakon rium-riuman do mambahen malas uhur, sonai homa do parhuan-kuanon, na marsipodah-podahan.
- ¹⁰ Ulang tadingkon huan-kuanmu atap huan-kuan ni bapamu; anjaha ulang ma tandangi rumah ni saninamu sanggah tarsosak ho. Dearan do simbalog rumah na dohor, marimbang sanina na daoh.
- ¹¹ Maruhur ma, ale anakku, anjaha pamalas ma uhurhu, ase hubotoh marbalos bani na pahiri ahu.
- ¹² Halak na pantas mangidah parmaraan, jadi marponop ma ia, tapi halak na oto itoruskon do langkahni, gabe manaron.
- ¹³ Buat ma hiouni, halani ijamini do halak na legan, gadeihon ma ai, halani iampuni halak sileban.
- ¹⁴ Halak na mamuji-muji hasomanni marsora na maling, girah sogod homa, gabe bura-bura do ai hiraon.
- ¹⁵ Tiris na torus manektek bani musim udan, dos do ai ampa parinangon sipartinggil-tinggil;
- ¹⁶ halak na sihol manjolomisi, doskon na manahan logou do ai, atap na manjolom minak marhitei tangan siamunni.
- ¹⁷ Bosi do pamarot bosu, sonai do jolma marsipadearan samah jolma.

- 18 Halak sipiara hayu ara, panganonni do buahni,
anjaha halak sipambalosi bani tuanni,
dapotan puji-pujian do.
- 19 Songon bah mansorminkon bohini bani jolma,
sonai do uhur ai mansorminkon hadirion ni
jolma ai bani dirini.
- 20 Nagori toruh ampa urung habeguon seng
marnabosur, sonai do mata ni jolma seng
marnabosur.
- 21 Balanga panlalaan pangujian bani pirak, liang
panloburan manguji omas, tapi sada halak
baritani do pangujian bani.
- 22 Porini pe hona duda halak na oto ibagas
losung rap pakon omei, tapi seng ra sirang
haotoonni ai hun bani.
- 23 Pangkei ma botoh haadongan ni biribirimu,
anjaha pardiатеihon ma hulananmu,
- 24 ai seng manongtong habayakon lalab, anjaha
seng tetap hadoharon marsundut-sundut.
- 25 Anggo martubuhan ma poyon-poyon ai,
martumbor simaratah, anjaha ipatumpu
hun dolog-dolog suan-suanan,
- 26 pasirsiron ni biribiri ai ma bam parhiouon
ampa pamboli ni juma humbani hambing ai;
- 27 sungkup homa dadih bahen sipanganonmu,
sipanganon bani parrumahmu ampa
hagoluhan bani jabolonmu.

(Sambatni)

- 28**¹ Maporus do halak parjahat age pe seng dong na mardakdaksi, tapi anggo halak parpintor marnalom ni uhur do songon anak ni singa.
- ² Anggo masa hajahaton bani sada nagori, pagantih pasoluk ma rajani, tapi marhitei sada halak na maruhur anjaha na marpambotoh totap do mardalan uhum.
- ³ Halak na sangap, na mangodoh-odoh halak na masombuh, songon udan doras, na mangayubkon do ai, siparseda gogoh ni tanoh.
- ⁴ Halak sitadingkon uhum mamuji-muji halak parjahat, tapi halak sidalankon uhum ilawan do sidea.
- ⁵ Halak parjahat seng iarusi aha hasintongan, tapi halak sipindah Jahowa iartihon do haganupan ai.
- ⁶ Dearan do halak na masombuh, na pitah marparlahou humbani halak na so pintor langkahni, age pe bayak ia.
- ⁷ Halak siramotkon titah, ai ma anak na pantas maruhur, tapi halak na marhuankon siparhisap, pabador bapani do.

- ⁸ Halak na pabuei artani marhitei bunga ni duit
ampa untung na malobihtu, bani halak
sihaholongi na miskin do arta ipatumpuni ai.
- ⁹ Halak na padaohkon pinggolni humbani na
manangihon titah, tonggoni ai pe gabe
hagigi do.
- ¹⁰ Halak na pakahouhon sibujur uhur hubani
dalan hamagouan, hubagas godungni
sandiri do ia madabuh; tapi halak sipitah
maruhur, na dear do teanonni.
- ¹¹ Halak na bayak, pentar do ia ninuhurni, tapi
halak na miskin siparuhur, tardapotsi do
uhurni ai.
- ¹² Anggo marhamonangan halak parpintor,
banggal ma hatuahon, tapi anggo markuasa
halak parjahat, marponop bei ma jolma.
- ¹³ Barang ise na manrongkob panlanggaronni
seng martuah ai, tapi halak na mansopotkon
salahni anjaha itadingkon ai, dapotan idop
ni uhur do.
- ¹⁴ Martuah ma halak na tongtong marhabiaran
bani Jahowa, tapi na pahengkeng uhurni
madabuh do hubagas hamagouan.
- ¹⁵ Songon singa na maraum pakon gipul na
loheian, sonai do panrajai na jahat bani
rayat na miskin.

- ¹⁶ Raja na hurang uhur, ai do sidalankon odoh-odoh, tapi sihagigihon untung na so sintong, paganjang ari-arini do ai.
- ¹⁷ Halak na hona sapata ni daroh ni jolma, mompas-ompas do ia ronsi matei, ulang iurupi be ia.
- ¹⁸ Halak na so panurakon marpalahou, sai na maluah do, tapi halak na lekluk marparlahou sai madabuh do hubagas godung.
- ¹⁹ Halak sihorjahon jumani bosuran do ia bani sipanganon, tapi halak sipindahi na so marguna, bosuran do ia bani hamiskinon.
- ²⁰ Halak hatengeran, buei do pasu-pasu dapotsi, tapi halak na tarolos sihol bayak, seng anjai lang hona uhum.
- ²¹ Seng dear mambuat-buat uhur; halani sipanganon sampohul pe, ra do halak sipata mandalankon hajahaton.
- ²² Parmata na mangapian, oji do uhurni bayak, tapi seng dapot uhurni hamiskinon do sogop bani.
- ²³ Halak na ra maminsang hasomanni, puji-pujian do ujungni dapotsi, lobih hambani halak na palemes-lemes parsahapni.
- ²⁴ Halak na manangkoi bapani atap inangni anjaha ihatahon homani, "Seng dousa ai!" Dos do ai pakon halak sipanamun.

- ²⁵ Halak paruhur haut, patubuh paringoran, tapi halak na martenger ni uhur bani Jahowa marlobih-lobih do.
- ²⁶ Halak na martenger ni uhur bani pingkiranni sandiri, na oto do ai, tapi halak na pantas marparlahou, sai maluah do.
- ²⁷ Halak parlayak bani na masombuh, seng anjai hurangan, tapi halak na papitpit matani, buei do bura-bura mangonai bani.
- ²⁸ Anggo markuasa halak parjahat, marponop bei ma jolma, tapi anggo masab sidea, lambin tambah ma halak parpintor.

(Sambatni)

- 29** ¹ Halak na gati hona paingat, hape tong ipahengkeng uhurni, sompong do holi maripuk ai, seng hatambaran.
- ² Anggo halak parpintor siparkuasa, marolob-olob ma rayat; tapi anggo halak parjahat manrajai, mangorong ma halak.
- ³ Halak na mangkaholongi hapentaran, pamalas uhur ni bapani, tapi halak na marsaor ampa boru jalang, mambois-boiskon sinari do.
- ⁴ Marhiteihon habonaron do tarpatotap raja sada nagori, tapi na paporsankon balasting maparahtu, ai do na parsedahon.
- ⁵ Halak na mamuji-muji hasomanni, na manaon jarot do ia ai i lobei ni naheini.

- ⁶ Marhitei hajahatonni do halak parjahat hona siding, tapi anggo halak parpintor marolob-olob anjaha marmalas ni uhur do.
- ⁷ Iparuhurhon halak parpintor do hak ni halak na masombuh, tapi anggo halak parjahat seng ipardulihon ai.
- ⁸ Halak sipanrisai mambahen geor huta, tapi mandaoh do ringis ibahen halak siparuhur.
- ⁹ Anggo marparkara halak na pentar ampa halak na oto, manggila anjaha tartawai do halak na oto ai, seng lalab marhadoban.
- ¹⁰ Halak siuseihon daroh magigi do ia bani halak na daulat, tapi halak parpintor mangindahi dalam pagoluhkansi.
- ¹¹ Halak na oto ipapuas do ganup ringisni, tapi anggo halak na maruhur itahan do ai.
- ¹² Anggo ra sipanrajai manangihon hata ladung, haganup gamot-gamotni gabe jahat ma.
- ¹³ Saor do halak na masombuh ampa sipangodoh-odoh, tapi Jahowa do sibere haliharon bani mata ni sidea bei.
- ¹⁴ Raja na manguhumi halak na masombuh ibagas hasintongan, totap do paratasni lalab.
- ¹⁵ Hotang ampa pangajaran do parohkon hapentaran, tapi dakdanak na tinurutan parohkon habadoron bani inangni.

- ¹⁶ Anggo martambah halak parjahat, lambin buei ma hajahaton; tapi idahon ni halak parpintor do pardabuh ni sidea.
- ¹⁷ Ajar ma anakmu, jadi sonang ma ho bahenonni, anjaha ibere sipamalas uhur.
- ¹⁸ Anggo seng dong pangungkabon, geor do bangsa; martuah do halak na mandalankon titah ni Naibata.
- ¹⁹ Marhitei hata tumang seng tarajari jabolon, age pe ibotoh, seng idalankon.
- ²⁰ Anggo ididah ho halak na hertep marsahap, bueinan ope pangarapan bani halak na bodoh ase bani.
- ²¹ Halak na maunjahtu bani jabolonni humbani haetek-etekkonni nari, dobni manlawan do ai.
- ²² Halak pargila-gila patubuh paringoran, anjaha halak parringis mangkorjahon buei dousa.
- ²³ Gijang ni uhurni do patoruh halak, tapi halak sitoruh uhur dapotan hasangapon do.
- ²⁴ Halak na saparbagianan pakon panangko, parseda dirini do, itangar do namin sipamurai, tapi ipasip-sip do.
- ²⁵ Biar dampak jolma mambahen hona siding, tapi hona ondingan do na martenger ni uhur bani Jahowa.

- ²⁶ Buei do halak na mambuat-buat uhur ni sipanrajai, tapi Jahowa do na mamintori ganup halak.
- ²⁷ Hagigi do halak pargeduk bani halak parpintor, tapi halak na pintor parlahouni, hagigi do ai bani halak parjahat.

Podah humbani si Agur

- 30** ¹ Hata ni si Agur, anak ni si Jeke, na hun Massa. Nini halak ai, “Domma loja ahu, ale Naibata, domma loja ahu, angkulangku pe domma hurleh.
- ² Tongon ahu do siotoan humbani jolma, anjaha seng dong panimbangion ni jolma bangku.
- ³ Seng onga huguruhon hapentaran, anjaha seng dong habotohon bangku pasal Na Pansing in.
- ⁴ Ise onga naik hu nagori atas anjaha tuad use hunjai? Ise onga patumpu logou bani tanganni? Ise boi mambaluti bah ibagas hiou? Ise do na pajonamkon haganup tampakan ni tanoh on? Ise do goranni, anjaha ise do goran ni anakni? Ibotoh ho do ai?”
- ⁵ Haganupan hata ni Naibata pitah do, gantar do la bani sagala na marhaporusan Bani.

- ⁶ Ulang tambah-tambahi hata-Ni ai, ase ulang hona pinsang ho, anjaha tardapot ho parladung.
- ⁷ “Dua do na hupindo hun Bamu, ulang ma lang ibere Ham ai bangku, paima lape matei ahu.
- ⁸ Padaoh Ham ma humbangku uhur sipakulah-kulah pakon hata ladung. Ulang ma bere Ham bangku hamiskinon atap habayakon, tapi bere Ham ma bangku sipanganon ansa na porlu,
- ⁹ ase ulang, anggo marlobih-lobih ahu, huporsou Ham, anjaha huhatahon, ‘Ise Jahowa?’ Ase ulang, anggo masombuhtu ahu, manangko ahu, gabe sambor hubahen goran ni Naibatangku.”
- ¹⁰ Ulang ma pasambor-sambor jabolon bani tuanni, ase ulang iburai ho, gabe seda ho.
- ¹¹ Adong do halak na mamurai bapani: anjaha na so pasangap inangni.
- ¹² Adong do halak na mangagan borsih sidea, tapi dungutni pe lang iusah.
- ¹³ Adong do halak parmata na toal, na pamiut-miut salibonni hu atas.
- ¹⁴ Adong do halak paripon na songon podang, parngadol na songon pisou, laho mamondut halak na madoyuk hun tanoh on pakon halak na masombuh hun tongah-tongah ni hajolmaon.

- 15 Dua boru ni lintah mangkatahon, “Bere, bere.”
Tolu seng tarbosuri; ompat seng ongg mangkatahon, “Sungkup ma!”
- 16 Ai ma nagori toruh pakon harambuyon na lambang, tanoh na so ra bosur bani bah ampa apuy na so ongg mangkatahon, “Domma sungkup.”
- 17 Mata ni halak na mapas bani bapani, anjaha ipahiri inangni na dob ubanon, paguton ni kawak na i topi bah do ai, anjaha panganon ni anak ni haluhuy.
- 18 Na tolu on halongangan do bangku, anjaha na ompat on seng tararusi ahu:
- 19 Ai ma parhabang ni manuk-manuk nanggordaha i awang-awang, pardalan ni ulog bani dolog batu, pardalan ni kapal i tongah laut ampa parsaoan ni dalahi bani naboru,
- 20 Sonon do parlahou ni boru jalang: Mangan do ia anjaha iapusi babahni, nini: seng dong hubahen na jahat.
- 21 Halani na tolu masam on do dugur tanoh, anjaha halani na ompat on seng tahan ia.
- 22 Halani jabolon, anggo gabe raja ia, halani halak na oto, anggo marlobih-lobih ia;
- 23 halani naboru na niapasan hape adong na mambuatsi ampa halani jabolon naboru na manoluk kuasa ni tuanni.

- ²⁴ Adong do ompat na etek-etek i tanoh on, tapi pandei tumang.
- ²⁵ Ai ma porkis sada hulanan na so margogoh, tapi ipasirsir sidea do bohalni bani musim milas;
- ²⁶ ampodi, ai ma binatang na so margogoh, tapi ipauli do rumahni bani dolog batu;
- ²⁷ balang, seng marraja, tapi atur do sidea marhulan-hulan misir;
- ²⁸ boraspati, na boi tangkapon ni tangan, tapi bani lopou ni raja marianan.
- ²⁹ Adong tolu na tanggung panlangkahni, ompat na jenges pardalanni:
- ³⁰ Ai ma singa, sigogohan humbani sagala binatang, na so onggasurut hun lobei ni atap aha pe,
- ³¹ huda panjang, hambing bajar pakon raja, na manlangkah i lobei ni balani.
- ³² Atap maoto ho, marhitei na ipagijang ho dirimu, barang ipingkiri ho na masambor, tutup ma lah pamanganmu bani tanganmu!
- ³³ Ai dadih na ginunsang-gunsang manjadi mantega, igung na niantuk gabe tarngurgur, anjaha gila na pinuhoan patubuh paringoran.

Podah humbani si Lemuel

- 31** ¹ On do hata ni si Lemuel, raja ni Massa, pinodahkon ni inangni bani,
- ² “Aha do ale anakku hatahononku bam! Aha do, ale sinuan tunas? aha do, ale anak bagah-bagahku?
- ³ Ulang ma bere gogohmu bani naboru, anjaha ulang ma pasaor dirimu bani halak siparseda raja-raja.
- ⁴ Seng patut bani raja-raja, ale Lemuel, seng patut bani raja-raja minum anggur, sonai homa kopala-kopala minum siinumon na koras,
- ⁵ ase ulang halani haru-haru minum sidea, gabe lupa uhum hasintongan, gabe peol panguhumni bani halak na madoyuk.
- ⁶ Bere ma inuman na koras bani halak na magou-magou, ampa anggur bani halak na pusokan uhur,
- ⁷ ase minum sidea, gabe lupa bani hasombuhonni, anjaha seng idingat be hasunsahanni.
- ⁸ Buha ma pamanganmu mangkopkop halak na longah, halani hak ni halak na tading maetek.
- ⁹ Buha ma pamanganmu, anjaha sintong ma panguhummu, ondingi ma hak ni halak na madoyuk ampa na masombuh.”

Puji-pujian bani Parinangon na Madear

- 10 Parinangon na madear, ise ma na dob
jumpahan ai? Harganan do ai daoh humbani
mutiha.
- 11 Ia do tenger ni uhur ni paramangonni. anjaha
pasal na dong pe seng hurangan ia.
- 12 Na dear do ibahen hubani pargotongni, sedo
na masambor, sadokah manggoluh ia.
- 13 Sari do ia bani wol ampa bonang linnen, anjaha
ringgas do tanganni marhorja.
- 14 Songon kapal ni partiga-tiga do ia, humbani na
daoh do iparroh sipanganon bani.
- 15 Girah sogod, golap-golap ope, domma puho
ia, ipatorsa ma panganon bani pangisi
ni rumahni anjaha ibagihon horja bani
juakjuak naboru.
- 16 Iuhurhon do homa pasal juma, gabe dapotsi do
ai; marhitei pansarian ni tanganni ipungkah
pohon anggur.
- 17 Igonditi do binongeini ase margogoh, anjaha
tanganni sihap do tongtong.
- 18 ididah do, manjadi do horjani, anjaha bani na
golap pe seng miloh suluhni.
- 19 Pandei do tanganni manjamah sorha, anjaha
sihap jari-jarini manangkap tuldak.
- 20 Layak do tanganni bani halak na masombuh,
anjaha buha bani halak na hurangan.

- ²¹ Seng haru uhurni pasal rumahni bani musim salju, halani haganup na i rumahni marbaju wol do.
- ²² Ipauli do salimut bani, hiou linnen na alus ampa na marpurada do pakeianni.
- ²³ Sangap do pargotongni i partumpuan, sangah na hundul ia rap pakon pangintuai ni nagori in.
- ²⁴ Itonun do pakeian linnen, ijuali do ai; gondit do jualonni bani halak partiga-tiga.
- ²⁵ Tunggung anjaha sangap do ia, tawa do ia managam ari na roh.
- ²⁶ Ibuha do pamanganni ibagas hapentaran, anjaha podah halamlamon do i atas ni dilahni.
- ²⁷ Ipardimata do pardalan ni horja i rumahni, anjaha seng ibotoh na marayoh.
- ²⁸ Roh do anakni, ipuji do ia, sonai homa paramangonni, ipatunggung do ia, nini,
- ²⁹ “Buei do parinangon na madear, tapi ham do siatasan humbani haganupan ai.”
- ³⁰ Sipaoto-oto do hajengeson, anjaha na lang do rupa na majenges, tapi parinangon na mabiar bani Jahowa, ai do sipujion.
- ³¹ Bere ma hu bani buah ni na hinorjahonni, anjaha lahoanni do mambahen tarpuji ia i partumpuan.

Parambilan

Haganup na i Tanoh on Sisoya-soya do

- 1** ¹ Hata ni Parambilan ai, anak ni si Daud, raja i Jerusalem.
- ² Sisoya-soya do tongon, nini Parambilan ai, sisoya-soya do haganup.
- ³ Aha ma gunani bani jolma haganup halojaonni, na hinangalutkonni i toruh ni langit?
- ⁴ Salpu sada sundut, roh sundut na legan, tapi tanoh on lalab do totap.
- ⁵ Poltak do mata ni ari, dob ai sundut use, anjaha mangolos mulak bani ianan hapoltakonni.
- ⁶ Mangombus do logou ai dompak dangsina, dob ai mulak dompak utara; marputor-putor do laho logou ai, anjaha mulak use bani habingkatonni.
- ⁷ Haganup binanga ai mabaor dompak laut, tapi laut ai lanjar do lang ra gok. Bani ianan habaoranni, hujai do binanga ai mangulaki mabaor.
- ⁸ Haganup do gok halojaon, seng tarpatugah jolma haganupan ai; seng marnasombuh mata mangidah, anjaha seng marnabosur pinggol manangar.

- ⁹ Aha na dob onggga masa, ai do masa use, anjaha aha na dob onggga ibahen halak, ai do ibahen use, seng dong na baru i toruh ni langit.
- ¹⁰ Ai adong, atap aha pe ai, na boi hatahonon ni halak pasal ai, “Tonggor ma, na baru do on?” Domma adong hinan ai sapari, bani panorang na i lobeita.
- ¹¹ Seng dong be na mardingat bani sisapari ai, sonai homa pasal na sihol masa ope, seng dong be na mardingat pasal ai bani na i pudi ni ai.

Na Mangindahi Hapentaran pe Sisoya-soya do

- ¹² Ahu, Parambilan ai, onggga do raja bani Israel i Jerusalem.
- ¹³ Iporluhon uhurhu do marhasoman hapentaran, mamareksa ampa manulimati sagala na tarjadi i toruh ni langit. Horja hangaluton do ai, na tinotapkon ni Naibata bani jolma manisia, ase marhangaluton marhitei ai.
- ¹⁴ Domma huidah sagala horja, na hinorjahon i toruh ni langit; tonggor ma, haganupan ai sisoya-soya do, anjaha songon na manangkap logou do.
- ¹⁵ Na geduk seng tarpapintor, anjaha na so ijin seng tarbilang.
- ¹⁶ Ningku ma ibagas uhurhu, “Domma hupabuei anjaha hutambahi namin bangku

hapentaran lobih humbani sagala sipanrajai na i Jerusalem, anjaha buei do hapentaran pakon habotohon i idah uhurhu.

¹⁷ Anjaha iporluhon uhurhu do mangarusi hapentaran ampa habotohon, mangarusi haotoon ampa halontongon.” Dapot uhurhu ma, on pe na manangkap logou do hansa.

¹⁸ Ai lambin buei hapentaran lambin buei do sitaronon, anjaha barang ise na patambah habotohon, patambah hasunsahanni do.

Hasonangan Dunia pe Sisoya-soya do

2 ¹ Jadi ningku ma ibagas uhurhu, “Nai ma, husuba ma lobei marhitei na marmalasmalas ni uhur, anjaha hudai ma haganup na mantin-mantin;” tapi tonggor ma, sisoya-soya do homa ai.

² Hubani partatawaan ai huhatahon, “Haotoon do in!” anjaha hubani malas ni uhur ai, “Ai aha do gunani in?”

³ Tubuh do uhurhu ibagas, sihol pahisar angkulangku marhitei anggur, tapi uhurhu do sipambobai bangku ibagas hapentaran; sihol homa mandalankon haotoon, ase boi hubotoh, atap aha do na madear sihorjahonon ni anak ni jolma in i toruh ni langit, sadokah goluhni na pondok in.

- ⁴ Jadi huhorjahon ma pambahenan na bangga-
banggal. Hupauli ma rumah bangku, anjaha
hupungkah pohon anggur.
- ⁵ Hubahen ma bangku pohon ampa taman bunga
halilian, husuani do ijai bagei hayu na
marbuah.
- ⁶ Hubahen homa bangku bongbongan, laho
mangarbahi marhitei ai hayu suanan na
tabun martumbori ijai.
- ⁷ Huboli do jabolon dalahi pakon jabolon naboru,
adong do homa bangku jabolon na dob
tubuh i rumahku. Age hulanan ni lombu
pakon biribiri dong do bangku, bueinan
humbani haganup na i Jerusalem.
- ⁸ Hupajunjun do homa bangku pirak, omas
pakon arta na maharga humbani raja-raja
ampa nagori-nagori. Hubuat homa bangku
pandoding, dalahi pakon naboru, ampa
sipamalas uhur ni jolma manisia, ai ma
naboru-naboru buei.
- ⁹ Jadi timbul ma ahu, anjaha bayakan marimbang
haganup jolma na i lobeihu i Jerusalem;
anjaha totap do homa hapentaran ai rapkon
ahu.
- ¹⁰ Haganup pinarsinta ni matangu seng
hulanglangi; anjaha seng hutahan uhurhu
humbani malas ni uhur aha pe, ai maningon
malas do uhurhu ibagas halani haganup

halojaonku, ai do rupeihi ibagas haganup
halojaonku.

- ¹¹ Tapi dob hukawahkon haganup
pambahenanku, sagala na binahen
ni tanganku, ampa hangaluton, na hudagei
ibagas na mangkorjahon ai, tonggor ma,
sisoya-soya do haganup, anjaha songon na
manangkap logou tumang, seng dong na
marguna i toruh ni langit.
- ¹² Dob ai marhusor ma ahu, laho manimbang
pasal hapentaran, haotoon pakon
halontongan. Ai aha do bahenon ni halak
sipanggantih raja in? Ai ma na dob ongg
binahen ni halak hinan.
- ¹³ Jadi huidah ma, surungan do hapentaran
marimbang haotoon songon surung ni
haliharon marimbang hagolapan.
- ¹⁴ Halak na pentar marhaliharon do mata na
bani uluni, tapi mardalan bani na golap do
anggo halak na oto. Tapi huidah ma, sisada
sitaronon do haduasi ai.
- ¹⁵ Jadi ningku ma ibagas uhurhu, “Anggo songon
pangandungan ni halak na oto do homa
pangandunganku, mase ma sai huparleilei
hapentaran na sain dokah?” Jadi ningku ma
ibagas uhurhu, “Ai pe sisoya-soya do.”
- ¹⁶ Ai seng lalab pardingat ni halak bani halak na
pentar age bani halak na oto; bani panorang

na laho roh, haganupan ai ihalupahon do.
In le, matei do hape halak na pentar usih
songon halak na oto!

¹⁷ Jadi sobalan ma ahu bani goluh on, ai hagigi do
bangku haganup na masa i toruh ni langit, ai
sisoya-soya do haganup, anjaha songon, na
manangkap logou do.

¹⁸ Magigi do ahu mangidah sagala halojaon
na huhalajahon i toruh ni langit, halani
maningon tadingkononku do ai bani jolma
na roh hun pudingku.

¹⁹ Anjaha ise pabotoh-botoh ai atap halak
na pentar ia atap halak na oto? Hape ia
ma siparkuasa bani sagala horja na dob
huhalajahon ibagas hapentaran i toruh ni
langit! Age ai pe sisoya-soya do.

²⁰ Jadi das ma uhurhu hubani na sihol mandolei,
mangidah sagala horja, na dob huhalajahon
i toruh ni langit.

²¹ Ai halak, na dob loja marhasoman hapentaran,
habotohon ampa hapandeian mandalankon
horjani, hape maningon do ai bahen rupei
ni jolma na so pala loja. Sisoya-soya do on
anjaha hamagouan bangga.

²² Ai aha do ulih bani jolma humbani haganup
horjani ampa humbani sinta-sinta ni uhurni,
na hinalajahonni i toruh ni langit?

- ²³ Ai sadokah ia manggoluh marsitaronon do, anjaha gok hasunsahan do horjani, anjaha borngin pe seng marhasonangan uhurni. Sisoya-soya do age ai.
- ²⁴ Seng dong sidearan bani jolma humbani na mangan ampa na minum, anjaha ipasonang uhurni marhitei na madear ibagas halojaonni. Ai pe, mangihutkon na huahap, sibere-bere ni Naibata do ai.
- ²⁵ Ai ise ma boi mangan, anjaha ise ma marmegah-megah, anggo seng marhiteihon-Si.
- ²⁶ Ai bani jolma hinarosuhkon ni uhur-Ni do ilayak-layakkon Naibata hapentaran, habotohon pakon malas ni uhur. Tapi halak pardousa ipaturut do loja laho patumpuhon pakon pajunjunkon, ase ibere Naibata use ai bani halak hinarosuhkon ni uhurni. Ai pe sisoya-soya do, anjaha songon na manangkap logou tumang do.

Marpanorang anjaha Marmusim do Haganup

- 3** ¹ Bani sagala na adong, adong bei do musimni, anjaha bani sagala na masa i toruh ni langit, adong bei do panorangni.
- ² Adong panorang tubuh, anjaha dong panorang matei; adong panorang manuan, anjaha adong panorang mangumpat na dob sinuan;

- ³ adong panorang mangugahi, anjaha adong panorang manambari; adong panorang parsedahon, anjaha adong panorang paulihon;
- ⁴ adong panorang na tangis, anjaha adong panorang tartawa; adong panorang mandoruhi, anjaha adong panorang manortor;
- ⁵ adong panorang mangambukkon batu, anjaha dong do panorang patumpu batu; adong panorang marsisummahan, anjaha dong panorang lang marsisummahan halani padaoh-daoh;
- ⁶ adong panorang mansari, anjaha dong panorang magouan; adong panorang manramotkon, anjaha adong panorang mangambukkon;
- ⁷ adong panorang manrigati, anjaha dong panorang manjarumi; adong panorang sipsip, anjaha dong panorang marsahapi;
- ⁸ adong panorang mangkaholongi, anjaha dong panorang mardomdom; adong panorang marmunsuh, anjaha dong panorang mardamei-damei.
- ⁹ Aha ma untung bani siparhorja humbani na hinangalutkonni ai?

- ¹⁰ Domma huidah hangaluton, na nitotapkon ni Naibata bani jolma manisia, ase loja sidea marhitei ai.
- ¹¹ Haganupan ipauli do jenges bani panorangni; sonai homa uhur pasal sisadokah ni dokahni ibere hubagas uhur ni sidea, tapi seng tardadap jolma in pambahenan, na binahen ni Naibata humbani mulani das bani ujungni.
- ¹² Halani ai domma dapot uhuru, seng dong sidearan bani jolma in, humbani na marmalas ni uhur ampa na pasonangkon dirini sadokah ni goluhni,
- ¹³ anjaha homa, ai boi pe jolma mangan pakon minum mangidah na madear ibagas sagala halojaonni, ai pe sibere-bere ni Naibata do.
- ¹⁴ Hubotoh do, haganup na binahen ni Naibata, totap do ai ronsi sadokahni dokahni, seng dong be sitambahan hujai, seng dong be sioruan. Ibahen Naibata pe sonai, ase mabiar jolma in i lobei-Ni.
- ¹⁵ Aha na masa sonari, na dob onggga masa do ai; anjaha aha na sihol masa, na dob onggga masa do ai, ai ipindahi Naibata do use na dob salpu ai.

Salpu do Homa Jolma Usih Songon Pinahan

- ¹⁶ Huidah do homa i toruh ni langit: Bani ianan ni uhum, ijai do masa hajahaton; anjaha

bani ianan ni hapintoron, ijai do masa hagedukon.

- ¹⁷ Ningku ma ibagas uhurhu, “Halak parpintor ampa halak parjahat uhumon ni Naibata do; panorang ni haganup na dong ampa haganup horja domma itontuhon.”
- ¹⁸ Ningku ma ibagas uhurhu pasal hadirion ni jolma manisia! luji Naibata do sidea, laho patandahon bani sidea, paboa doskon pinahan do sidea.
- ¹⁹ Ai sada sitaronon do jolma ampa pinahan; matei do pinahan, jolma pe matei do. Haganup sidea sisoya-soya do, seng dong hasurungan ni jolma manisia humbani pinahan, ai sisoya-soya do haganup.
- ²⁰ Haganupan ai laho manuju bani sada ianan: Haganupan marharohan humbani orbuk do, lanjar haganupan ai mulak bani orbuk.
- ²¹ Ise mambotoh, atap na naik hosah ni jolma hu atas, anjaha hosah ni pinahan turun hu toruh?
- ²² Jadi huidah ma, seng dong sidearan bani jolma in humbani na marmalas ni uhur ia bani horjani, ai do rupeini. Ise ma na mamboan jolma hujai, ase ididah barang aha na masa dob matei ia?

Pasal Pangodoh-odohon, Horja Hapandeian, na Lungunan ampa na Marsurai Kuasa

- 4** ¹ Dob ai huulaki ma mangidah sagala odoh-odoh na masa i toruh ni langit. Anjaha tonggor ma, iluh ni halak na niodoh-odoh, hape seng dong na mangapohi sidea. Hona paksa do sidea ibahen sipangodoh-odoh, tapi seng dong sipangapoh bani sidea.
- ² Jadi martuahan do halak na dob dokah matei ai nini uhurhu, marimbang halak na manggoluh ope;
- ³ tapi martuahan ope marimbang haduasi ai, halak na so tubuh, ai ma na so mangidah pambahenan na jahat, na masa i toruh ni langit.
- ⁴ Dob ai huidah ma sagala hangaluton pakon horja hapandeian, hape patubuh uhur na marsisimburuan do ai. Ai pe sisoya-soya do, anjaha na manangkap logou tumang do.
- ⁵ Halak na oto lompit-lompit tangan hansa, gabe dagingni sandiri ipangan.
- ⁶ Dearan do sanggolom marhasoman sonang ni uhur humbani dua nanging, tapi gok hangaluton anjaha manangkap logou tumang.
- ⁷ Dob ai huidah ma use na soya i toruh ni langit:

- ⁸ Adong ma sada halak na tarpunjung, na so marniombah, na so marsanina, hape ipukpuk do marhorja, anjaha matani seng marnasombuh mangidah habayakon, dobni sungkun-sungkun bani dirini, “Ai ise do na huhopkop ase lang marsonang-sonang ahu?” On pe sisoya-soya do, anjaha hangaluton na masambor.
- ⁹ Dearan do dua halak humbani na sandirian, ai dapotan upah na madear do sidea bani halojaonni.
- ¹⁰ Ai anggo targompang sidea, boi do sidea marsiurupan; tapi seda do halak na sandirian, ai anggo targompang ia, seng dong na manogusi.
- ¹¹ Sonai homa, anggo rap modom dua halak, jadi marsipamalasan ma sidea; tapi anggo sahalak, sonaha ma boi malas ia?
- ¹² Age pe tartalihon sahalak sada halak na sandirian, tapi dua halak martahan do i lobeini, anjaha tali na tinolu seng urah rotap.
- ¹³ Dearan do sada parana na miskin, tapi na maruhur, humbani sada raja na matua, tapi na botoh anjaha na so ra palumbaon.
- ¹⁴ Ai luar do parana hun tutupon laho bangkit raja, age pe masombuh hinan ia itubuhkon, sanggah raja ope halak na legan.

¹⁵ Huidah do haganup halak na manggoluh na i toruh ni langit, hampit parana ai do, ai ma na manggantihsi ai.

¹⁶ Seng tarbilangi buei ni halak na binobahonni, tapi halak na roh i pudini seng marosuh be bani. On pe sisoya-soya do anjaha manangkap logou tumang.

Lumba-lumba Pasal Hampung ni Uhur Ibagas Parugamaon

5 ¹ (4-17) Jaga ma panlangkahmu laho masuk hu rumah ni Naibata; roh hun dohor laho manangihon, dearan do ai humbani galangan na ginalangkon ni halak na oto, halani seng ibotoh, na sambor do hape hinorjahonni ai.

² (5-1) Ulang Maherteptu Pamanganmu, anjaha Ulang Mapodastu Uhurmu Manluarhon Hata i Lobei ni Naibata, ai Naibata i nagori atas do; tapi anggo ho i tanoh on do; halani ai paotik ma parsahapmu.

³ (5-2) Ai roh do nipi humbani buei ni panarian, anjaha sahap haotoon humbani buei ni sahap-sahap.

⁴ (5-3) Anggo marbagah-bagah ho bani Naibata, ulang ma padokah-dokah pasaudkon ai, ai seng marosuh la mangidah halak na oto. Aha na dob binagahkonmu, pasaud ma ai.

- ⁵ (5-4) Dearan do ulang ho marbagah-bagah humbani na marbagah-bagah, hape seng ipasaud.
- ⁶ (5-5) Ulang lopas pamanganmu mambahen badanmu mardousa, anjaha ulang ma hatahon i lobei ni suruhan ni Naibata, “Na silap do in!” Mase ma pala manringis Naibata halani sahapmu, anjaha iparseda horja ni tanganmu?
- ⁷ (5-6) Ai anggo buei nipi, buei do na so mararti, buei do sahap-sahap; tapi anggo ho, habiari ma Naibata.

**Lumba-lumba Pasal Odoh-odoh
Ibagas Pamarentahan**

- ⁸ (5-7) Anggo ididah ho pandorunon bani halak na masombuh, hasedaon ni uhum sonai hapintoron i nagori in, ulang pala longang uhurmu pasal ai, ai adong do na mardiateihon siparkuasa-siparkuasa ai, anjaha Na Tang Sitimbulan in do mangatasi sidea haganup.
- ⁹ (5-8) Ibagas haganupan ai, adong do untung bani sada nagori, anggo iuhurhon raja parjuma-jumaon.

Seng Marguna age Habayakon

- ¹⁰ (5-9) Halak na marsinta-sintahon pirak, seng anjai bosur ia humbani pirak; anjaha barang ise na gok uhurni bani habayakon, seng sombuh homa halani pansarianni. On pe sisoya-soya do.
- ¹¹ (5-10) Tambah pansarian, tambah do na mangankon; aha ma laba bani simada ai, sobali na mangidah-idah ai?
- ¹² (5-11) Sinok do modom halak siparhorja, atap otik pe ipangan atap buei, tapi seng tarpodom halak na bayak ibahen habayakonni.
- ¹³ (5-12) Adong do hamagouan banggal, na huidah i toruh ni langit, ai ma habayakon na pinagugun gabe hasedaon bani simadasi.
- ¹⁴ (5-13) Ai magou do habayakon ai, halani na masa; seng dong na tading ibagas tangan ni anak na tinubuhkonni.
- ¹⁵ (5-14) Songon na talanjang ai ia mandarat hun boltok ni inangni, sonai do parmula kni use; seng dong tarbuatsi age aha bahen upah ni halojaonni, na gabe siboanon ni tanganni hujai.
- ¹⁶ (5-15) Anjaha on pe hamagouan banggal do: Sonin parrohni, sonai do parmisirni; aha ma

ulihni, ai lang na manangkap logou do ia na ngalutan ai?

¹⁷ (5-16) Sadokah goluhni golapan anjaha pusok do uhurni; buei do hasunsahanni, boritan anjaha panringisan.

¹⁸ (5-17) Tonggor ma, pasal na madear na huidah ai: Patut do mangan anjaha minum jolma in, anjaha ipasonang uhurni bani na madear ibagas hangalutonna, na hinorjahonna i toruh ni langit, sadokah ni goluhni na pondok in, na binere ni Naibata bani; ai do rupeini.

¹⁹ (5-18) Tongon, anggo ibere Naibata bani jolma habayakon pakon arta, ipaturut homa ia mangan ampa marbagian hunjai, anjaha marmalas ni uhur bani horjani, ai pe sibere-bere ni Naibata do.

²⁰ (5-19) Ai seng sadiha be ipingkiri ari-ari ni goluhni na pondok in, halani malas ni uhur na binere ni Naibata hubagas uhurni.

Hadoharon pe Seng Marguna Anggo Seng Marhasoman Pasu-pasu ni Naibata

6 ¹ Adong do hasamboron huidah i toruh ni langit, anjaha na paboratkon do ai bani jolma.

² Sada halak, ibere Naibata habayakon pakon arta ampa hasangapon bani, anjaha lang hurangan ia pasal atap aha pe sinta-sintani,

- tapi lang ilopas Naibata ia mangan hunjai,
halak na legan do na mamboiskon ai.
Sisoya-soya do on, anjaha naborit na
mabajan.
- ³ Porini adong saratus niombah ni sada halak,
ganjang umurni pala sayur matua, tapi seng
sonang uhurni ibagas hadoharonni ai, gari
tanomanni pe seng dong, huhatahon ma
pasalsi, “Dearan do na matei tarposo ase
ia.”
- ⁴ Sisoya-soya do ia roh anjaha ibagas na golap
misir, lanjar hagolapan manrungkub
goranni;
- ⁵ mata ni ari pe seng sompat ididah anjaha lang
itandai; tapi sonangan do ia humbani halak
ondi.
- ⁶ Porini manggoluh pe ia dua ribu tahun dokahni,
hape na madear seng onggga ididah, ai lang
sada ianan do hadasan ni haganup?
- ⁷ Haganup hangaluton ni jolma mansarihon
pamanganni do, tapi lanjar do seng bosur
tonduyni.
- ⁸ Ai aha do hasurungan ni halak na pentar
humbani halak na bodoh? Aha do gunani
bani halak na madoyuk, na mambotoh
marparlahou i tongah-tongah ni halak na
manggoluh?

- ⁹ Dearan do na nididah ni mata, humbani na manguhurhon na so ijin. On pe sisoya-soya anjaha na manangkap logou tumang do.
- ¹⁰ Atap aha pe na masa, domma dokah hinan igoran pasal ai, anjaha pasal jolma in pe domma binotoh hinan; seng mangasup ia martinggil pakon Sigogohan in.
- ¹¹ Lambin tambah hata-hata, lambin tambah na soya; aha ma gunani ai bani jolma?
- ¹² Ise ma na mambotoh aha na madear bani jolma in ibagas goluhni, na pondok anjaha sisoya-soya in, na laho salpu songon halinoh? Ise tene na boi patugahkon bani jolma in, atap aha na sihol masa i pudini i toruh ni langit?

Pasal Hapentaran na Sintong in

- 7** ¹ Rahanan do barita na madear ase minak na morum, anjaha dearan ari parmatei humbani ari partubuh.
- ² Rahanan do laho hu rumah na marpusok ni uhur ase hu rumah na marpesta-pesta; ai ijai taridah ujung ni sagala jolma manisia, anjaha halak na manggoluh patut ma parimbagaskononni ai.
- ³ Rahanan do na marpusok ni uhur ase na tartawa, ai horu ni uhur do na padearhon paruhuran.

- ⁴ Uhur ni halak na pentar sai i rumah partangisan do, tapi uhur ni halak na oto i rumah parpestaan do.
- ⁵ Rahanan do manangihon pinsang-pinsang ni halak na pentar, humbani na manangar doding ni halak na oto.
- ⁶ Tongon, songon parhuratak ni soban duri-duri i toruh ni hudon, sonai do partawa ni halak na oto. On pe sisoya-soya do.
- ⁷ Tongon, odoh-odoh do mambahen oto halak na pentar, anjaha sisip parseda paruhuran.
- ⁸ Dearan do na manginteihon hadobanni humbani parmulaanni, dearan do paruhur na sabar humbani si gijang uhur.
- ⁹ Ulang maurahtu uhurmu manggila, ai ringis ibagas uhur ni halak na oto do ai marianan.
- ¹⁰ Ulang hatahon, "Mase ma dearan ari sapari humbani sisonari?" Ai seng sungkun-sungkun na pentar na sonai ai.
- ¹¹ Dear do hapentaran marhasoman arta tean-teanan; surungan do ai bani halak na mangidah mata ni ari.
- ¹² Ai tarbahen do marlinggom bani hapentaran age bani pirak; tapi hasurungan ni habotohon: Hapentaran ai do mambere goluh bani halak simadasi.
- ¹³ Papangkei ma horja ni Naibata; ise ma tarbahen papintorhon na dob pinageduk-Ni?

- 14 Bani ari na madear marmalas ni uhur ma ho; anjaha bani ari na masambor paruhurhon ma: Naibata do manjadihon na sada ampa na legan ai, ase ulang ibotoh jolma atap aha na sihol masa.
- 15 Haganupan on domma huidah ibagas goluhku sisoya-soya on: Adong do halak parpintor magou ibagas hapintoronni, anjaha adong homa halak parjahat sayur matua ibagas hajahatonni.
- 16 Ulang ma mapintortu ho, anjaha ulang ma mapentartu; mase ma parsedaonmu dirimu?
- 17 Ulang ma majahattu ho, anjaha ulang ma gabe halak na oto ho; mase ma rahanan matei lape jumpah panorangni?
- 18 Dear do, anggo ijolom ho na sada on, anjaha ulang homa maluah tanganmu hambani na sada ai; ai barang ise na mabiar mangidah Naibata, bansah do ia hambani haganupan ai.
- 19 Hapentaran ai do margogohi halak na pentar, lobih hambani sapuluh halak puanglima, na adong ibagas huta.
- 20 Tongon, seng dong halak parpintor i tanoh on, sihorjahon na madear tumang, anjaha na so onggamardousa.

- ²¹ Homa, sagala hata na hinatahon ni halak, ulang ma parimbagaskon ai; ulang ma tangi ho bani juakjuakmu na mamurai ho.
- ²² Ai lang ibotoh ho do homa ibagas uhurmu, na gati do ho mamurai halak na legan?
- ²³ Haganupan on domma huuji marhitei hapentaran, ningku, "Sihol pentar do ahu!" Hape lambin daoh do hapentaran ai humbangku.
- ²⁴ Daoh do sagala na adong ai anjaha bagas tumang; ise ma na boi jumpahan ai?
- ²⁵ Dob ai hupagoling ma uhurhu, sihol mananda, mamareksa pakon mangidah hapentaran pakon panimbangion, anjaha sihol mananda, ia hajahaton ai ma haotoon, anjaha haotoon ai ma podou.
- ²⁶ Jadi jumpah ahu ma: Janginan do humbani hamatean naboru, na dob songon puhot ia, uhurni songon jarot, anjaha tanganni songon tali panangkit; halak harusuh ni Naibata maluah do hun bani, tapi sipardousa hona tangkap do ibahen.
- ²⁷ Tonggor ma, on do na jumpah ahu, nini Parambilan ai, sada-sada huuji, laho mambuat panrampunganni;
- ²⁸ na dob marulak-ulak hupareksa, tapi seng jumpah ahu: Jumpah ahu do sada dalahi humbani saribu halak, tapi anggo naboru,

seng jumpah ahu i tongah-tongah ni ganupan ai.

²⁹ Tonggor ma, on tumang do na jumpah ahu, ai ma, bujur do jolma in itompa Naibata, tapi buei do ranggi-ranggian ni uhurni.

Pasal Pambalosion

8 ¹ Ise do doskon halak na pentar in? Anjaha ise do na mambotoh hatorangan pasal haganup? Hapentaran ni sada jolma do mambahen liar bohini, anjaha koras ni bohini mubah do.

² Ahu mangkatahon, dalankon ma parentah ni raja, ampa hata na dob binulawankonmu bani Naibata.

³ Ulang ma maurahtu ho padaohkon diri hun bani, anjaha ulang ma magolgotu ho bani parkara na so madear, ai aha rosuh ni uhurni, ai do ibahen.

⁴ Ia parentah ni raja gok kuasa do; ise ma na pag mangkatahon dompaksi, “Aha do na binahenmu in?”

⁵ Ise na mandalankon parentah, seng dageionni na masambor, ai ibotoh halak na pentar do pasal panorangni pakon uhumanni.

⁶ Ai bani haganup adong do panorang ampa uhumanni, anjaha hasamboron ni jolma, ai do sibobanon bani.

- ⁷ Tongon, seng dong na mambotoh atap aha na sihol masa, ai ise ma na boi patugahkon na sihol masa ai bani?
- ⁸ Seng dong jolma na markuasa bani logou na boi mangolat ai; seng dong homa na markuasa bani ari parmateini, anjaha na boi maluah humbani porang; seng tarbahen hajahaton paluahkon na mangkorjahonsi.
- ⁹ Haganupan ai domma huidah anjaha huparuhurhon haganup pambahenan na masa i toruh ni langit, bani panorang ni jolma manrajai hasomanni jolma gabe hasedaon bani sandiri.

Panrajaion ni Naibata na So Tardadap

- ¹⁰ Ambah ni ai, huidah do tartanom halak parjahat; tapi halak na mangkorjahon na madear, luar humbani ianan na pansing in, anjaha lupa halak bani ibagas huta. Ai pe sisoya-soya do.
- ¹¹ Halani ai lang mintor podas mardalan uhum bani pambahenan hajahaton, halani ai gok do uhur ni jolma manisia laho mandalankon hajahaton.
- ¹² Age pe ihorjahon si pardousa na masambor saratus hali, anjaha sayur matua homa ia, tapi tangkas do hubotoh, sai na martuah do

halak si habiari Naibata, halani marhabiaran sidea i lobei-Ni;

¹³ tapi seng anjai dear anggo halak parjahat, anjaha seng tarpaganjangsi umurni, songon halinoh do ia, halani seng marhabiaran ia i lobei ni Naibata.

¹⁴ Sisoya-soya do ai, na masa ai i atas tanoh on: Adong do halak parpintor, mangonai do bani sidea, songon na bani pambahenan ni halak parpintor. Ningku ma, “On pe sisoya-soya do.”

¹⁵ Halani ai hupuji do malas ni uhur ai; ai seng dong na madear bani jolma i toruh ni langit, sobali na mangan minum pakon marmalas ni uhur. Ai boi do ia mangkasomanisi ibagas halojaonni sadokah ari-ari ni goluhni, na binere ni Naibata bani, i hasiangan on.

¹⁶ Sanggah na hupabulat uhurhu, laho manandai hapentaran ampa laho marimbagaskon sagala na masa i atas tanoh on, ai ma, na so tarpodom ai halak arian pakon borngin,

¹⁷ jadi huidah ma sagala pambahenan ni Naibata, tongon, seng tarbahen jolma mambotoh pambahenan ai, na masa i hasiangan on. Age sonaha pe loja ni jolma, ase ibotoh ai, seng anjai jumpahsi ai. Age pe nini halak na pentar, domma ibotoh, seng tongon ibotoh ai.

Sisada Sitaronon do Sagala Jolma. Marmalas ni Uhur do Sagala Sihabiari Naibata

- 9**¹ Tongon, haganupan on domma huparuhurhon, anjaha domma hupareksa haganup: la halak parpintor age halak na pentar ampa pambahenan ni sidea ibagas tangan ni Naibata do; holong ni uhur pe atap domdom, seng iarti jolma in. Haganup na i lobei ni sidea sisoya-soya do:
- ² ai sisada sitaronon do haganup, halak parpintor ampa halak parjahat, halak sidear uhur ampa halak na masambor, halak na pansing ampa halak na mabutak, halak sipanggalang ampa na so sipanggalang; songon na masa bani halak na daulat, sonai do bani halak pardousa, songon na bani halak si parbija, sonai do bani halak na mabiar marbija. *
- ³ On do hasamboron ibagas haganup na masa i hasiangan on, ai ma na sisada sitaronon ai haganup; anjaha halani homa gok hajahaton do uhur ni jolma manisia, anjaha haatoon do ibagas uhur ni sidea sadokah manggoluh sidea, dob ai parayakonni do halak na dob matei ai. *
- ⁴ Tongon, ise na marianan ope i tongah-tongah ni halak na manggoluh, na adong ope

pangarapanni, ai baliang na manggoluh,
rahanan do ai humbani singa na matei.

⁵ Ai halak na manggoluh ibotoh do na laho matei
sidea, tapi halak na dob matei, aha pe lang
be ibotoh; seng dong be upah bani sidea,
anjaha seng dong be na mardingat sidea.

⁶ Age holong ni uhur ni sidea, domdomni ampa
simburuni pe masab do; anjaha lalab ma
seng marbagian be sidea bani haganupan
na masa i hasiangan on.

⁷ Ase laho ma, pangan ma rutimu ibagas malas
ni uhur, anjaha inum ma anggurmu ibagas
sonang ni uhur, ai domma iharosuhkon
Naibata pambahenanmu sisonai ai. *

⁸ Sai tongtong ma ho marpakeian silopak, anjaha
ulang ma lang marminak ulumu.

⁹ Sai marmalas ni uhur ma ho rap pakon
parinangonmu, na hinaholongan ni uhurmu
sadokah ari-ari ni goluhmu na pondok in, na
binere ni Naibata bam i hasiangan on, ai do
rupeimu bani goluh on ampa bani horja, na
hinalojahonmu i hasiangan on. *

¹⁰ Atap aha na jumpah tanganmu bahen
sihorjaonkon, dalankon ma ai humbani
gogohmu, ai seng dong be horja atap
panimbangion atap habotohon atap
hapentaran anggo i nagori toruh,
siparayakonmai.

Gati do Suhar na Masa i Tanoh on

- ¹¹ Ambahni ai huidah do i hasiangan on: Seng bani halak na lingkak hape hamonangan maradu, seng puanglima monang bani parporangan, seng halak na pentar na marnah ruti, seng halak na maruhur gabe bayak, anjaha seng halak na pandei gabe harosuh; tapi haganupan sidea tunduk do bani panorang ampa na masa. *
- ¹² Ai seng ibotoh jolma in panorangni: Songon dengke na hona tangkap ibahen jala, anjaha songon manuk-manuk na dapot ibahen siding sonai do jolma manisia hona tangkap sanggah panorang hamagouan, sanggah sogop ai sompong bani sidea.
- ¹³ Hapentaran sisonon pe huidah do i hasiangan on, anjaha bangga do bangku ai:
- ¹⁴ Adong ma sada huta na etek, anjaha otik do pangisini; roh ma sada raja na bangga mamorang ai, ihubu ma huta ai, anjaha ipauli parugas pangkubu inggot.
- ¹⁵ Jadi adong ma sada halak na masombuh, tapi na pentar ibagas huta ai, anjaha tarpaluahsi do namin huta ai marhitei hapentaranni, hape seng dong na mardingat na masombuh ai.

- ¹⁶ Jadi ningku ma, “Dearan do hapentaran ase hagogohon, tapi mapas do uhur ni halak mangidah hapentaran ni halak na masombuh ai, anjaha seng itangihon hata sipaingatni.” *
- ¹⁷ Hata ni halak na pentar, na iluarhon dear-dear, rahanan do manangihon ai humbani surak-surak ni sada raja i tongah-tongah ni halak na oto.
- ¹⁸ Rahanan do hapentaran ase parugas porang, tapi sada pe parjahat bahat do na pinarsedani.

Haotoon na Parsedahon Hapentaran

- 10** ¹ Lanog na matei mambahen marbau minak na misbou ni sipauli morum-moruman sonai do haotoon na otik parseda hapentaran pakon hasangapon.
- ² Uhur ni halak na pentar laho dampak siamun, tapi uhur ni halak na oto laho dampak sambilou do.
- ³ Bani dalan ja pe mardalan halak na oto, taridah do hurang ni uhurni, tapi nini do bani halak haganup, sidea do na oto.
- ⁴ Anggo nahit ringis ni si panggomgomi bam, ulang ma tadingkon iananmu, ai uhur na lamlam do padaohkon buei dousa.

- ⁵ Adong do na masambor huidah masa i hasiangan on, ai ma halepakon na binahen ni halak si panrajai.
- ⁶ Halak na oto ipahundul bani ianan na sangap, tapi halak na bayak hundul bani ianan na toruh.
- ⁷ Huidah jabolon mangajak huda, hape raja-raja mardalan nahei songon jabolon.

**Ojur-ojur Mandalankon Hapentaran
anjaha Manlembangi Haotoon**

- ⁸ Ise na mangkurak godung, ia sandiri do madabuh hubagas; ise na parseda tembok batu, paguton ni ulog do.
- ⁹ Ise na mangungkit batu, ra do ugahan, anjaha ise na mambolah hayu, ra do marmara.
- ¹⁰ Anggo majol hapak anjaha seng iasah matani, maningon marbois gogoh do halak managilhon ai; tapi untung do ai anggo hapentaran mangkasomani gogoh.
- ¹¹ Anggo domma ipagut ulog paima itabasi, seng marguna be habotohon ni si panabas.
- ¹² Hata humbani pamangan ni halak na pentar mambahen ia gabe harosuh, tapi parsahap ni halak na oto parseda dirini do.
- ¹³ Mungkah ni sahap ni pamanganni haotoon do, anjaha ujung ni parsahapanni pe podou do.

- 14 Buei do sahap-sahap ni halak na oto, age pe seng ibotoh jolma in atap aha na sihol masa; ai ise ma na boi patugahkon bani atap aha na sihol masa i pudini?
- 15 Hangaluton do horja bani halak na oto, dalan hu tiga pe seng ibotoh.
- 16 Bursik ma ho, ale tanoh, anggo dakdanak panrajai bam, anjaha halak na sangap-sangap i tongah-tongahmu girah sogod pe domma marpesta-pesta.
- 17 Martuah ma ho, ale tanoh, anggo halak na marjumbalang panrajai bam, anjaha na sangap-sangapmu mambotoh marpesta bani panorangni, songon halak na hormat, seng songon halak parminum-minum.
- 18 Halani harayohon masuk do parhayu ni rumah, anjaha halani tangan na galek tiris rumah.
- 19 Laho marmegah-megah iadongkon halak do pesta-pesta anggur do sipamalas goluh on, anjaha duit do na marsahap bani haganup.
- 20 Age ibagas uhur ulang ma burai raja, anjaha ibagas kamar podomanmu pe, ulang ma burai halak na bayak, ai padason ni manuk-manuk na i awang-awang do soramai, anjaha patugahon ni siparhabong sahapmai.

Ojur-ojur Mansarihon Goluh, Age pe Seng Tontu na Masa-masa

- 11** ¹ Padalan ma rutimu hu dipar ni laut, ai bani dokah-dokah ni ari, sai na jumpah ho do ai.
- ² Bahen ma ai marbagi pitu atap ualuh, ai seng ibotoh ho atap hasedaon aha do na sihol masa hu atas tanoh on.
- ³ Anggo gok udan ma hambun, iduruskon ma ai hu atas tanoh on; anggo marumbak hayu, dompak dangsina atap dompak utara, bani ianan harumbakanni ai ma ai tibal.
- ⁴ Halak na sai mardiateihon logou, seng saud martidah be ai, anjaha halak na patorih-torih hambun, seng saud be manabi.
- ⁵ Songon na so boi botohonmu sonaha pardalanan ni logou, anjaha sonaha parjadi ni holiholi ibagas boltok ni parinangon na boratan rumah, sonai do homa seng ibotoh ho pambahenan ni Naibata na manjadihon haganup.
- ⁶ Girah sogod ma saburhon bonihmu, anjaha bodari pe ulang mintor marsaran tanganmu, ai seng ibotoh ho atap na ija na dua ai manjadi, atap rap do haduasi ai manjadi.
- ⁷ Matobu do na lihar ai, anjaha marosuh do mata mangidah mata ni ari.

⁸ Tongon, anggo manggoluh jolma in marpuluh-puluh tahun, marmalas ni uhur ma ibagas haganupan ai; tapi idingat ma homa pasal ari na golap, buei do ai. Haganup na sihol masa, sisoya-soya do ai.

**Patut do na Maposo Marmalas ni
Uhur Sanggah Haposoorni**

⁹ Marmalas ni uhur ma, ale garama, sanggah panorang haposoorni, anjaha megah ma uhurmu bani panorang haparanaoni. Anjaha bahen ma domu hubani na sininta ni uhurmu, ampa domu hubani harusuh ni matamu, tapi botoh da, bani haganupan ai boanon ni Naibata do ho hu paruhuman.

¹⁰ Padaoh ma uhur na sunsah humbagas uhurmu, anjaha paholang ma na masambor humbani angkulamu; ai panorang hadakdanakon ampa haposoorni, laho salpu do ai.

**Golpa-golpa bani Jolma, ase Idingat
na Manompasi Paima Roh
Panorang Matua ampa Hamatean**

12 ¹ Ingat ma Sitompa ho bani ari haposoorni, paima lape roh ari na masambor, anjaha lape das panorangni, hatahononmu holi ijai, “Seng marosuh be ahu pasal in!”

- ² Paima lape golap mata ni ari ampa na lihar,
bulan ampa bintang-bintang, anjaha mulak
manorap hambun dob salpu udan.
- ³ Ai bani panorang ai holi hitir-hitir ma si jaga
rumah, anjaha gundung dalahi-dalahi na
margogoh, maronti si panduda manduda, ai
otik mando sidea tading, anjaha gombur ma
si pangkawah hambani jandela;
- ⁴ tartutup ma homa na dua labah na dompak
alaman ai, anjaha lambin nangetni sora
ni losung; masihil ma sora songon sora
ni manuk-manuk, anjaha surut ma homa
sipandoding;
- ⁵ mabiar do bani dalan tangkog, anjaha gobir i
tongah dalan; marurus ma homa bunga na
lopak ai hambani untei hasumba, anjaha
borat manlangkah balang, sir ni uhur pe
miloh ma. Ai laho ma jolma in marayak
rumahni sisadokah ni dokahni, anjaha halak
si panangisi pe domma marodor i alaman.
- ⁶ Paima rotap tali pirak ai anjaha matapor batil
omas ai; paima lape mabolah gusi i lambung
ni bah tubuh anjaha marosak tahu-tahu na i
sumur;
- ⁷ paima mulak orbuk ai hu tanoh, pambuatanni
hinan, anjaha tonduy ai mulak hubani
Naibata, na mamberehon ai hinan.

⁸ Sisoya-soya do tongon, nini Parambilan ai,
sisoya-soya do haganup.

Hata Panutup Pasal Buku Parambilan

⁹ Ambah ni na pentar Parambilan ai, iajarhon do
homa habotohon hubani halak na mabuei;
itimbang anjaha ipareksa anjaha ibahen do
buei podah.

¹⁰ Ipindahi Parambilan ai do hata na sangkan,
anjaha sintong do isuratkon hata
hasintongan ai.

¹¹ Hata ni halak na pentar songon lonsing-lonsing
do, anjaha songon paku na ipakuhon do
podah na ipatumpu ai; marhitei sada
parmahan do iberehon ai.

¹² Ambah ni ai, ale anakku, sai ra ma ho
paingaton! Seng ra maronti na mambahen
buku-buku, anjaha halojaon ni angkula do
buei marlajar.

¹³ Pangibulan ni haganup na dob binogei ai,
“Habiari ma Naibata, anjaha dalankon ma
titah-Ni, ai do hawajiban ni ganup jolma.

¹⁴ Ai boanon ni Naibata do sagala pambahenan
hu paruhuman, haganup na ponop, na dear
atap na sambor pe ai.”

Doding Ni Doding

1 ¹ Doding ni Doding humbani Raja Salomo.

Sihol ni Uhur ni Tunangan hubani Siparunjuk

² Sai isummah ma ahu marhitei summah ni pamanganni! Ai mantinan do holongmu ase anggur.

³ Morum do minakmu, goranmu songon minak na misbou na niuseihon; halani ai do ase rosuh anak boru mangidah ham.

⁴ Togu ham ma ahu, papodas hita ma! Iboan raja ai ma ahu hu kamarni. Marolob-olob do hanami anjaha marmalas ni uhur mangidah ham, ipuji hanami do holong ni uhurmu lobih humbani anggur, patut do holong uhur ni sidea bamu.

⁵ Birong do ahu namin, tapi jenges do, ale boru Jerusalem, songon tenda ni halak Kedar, songon tirei ni si Salomo.

⁶ Ulang ma mapas pangkawahnima bangku, halani na birong ai rupangku, ai mata ni ari do na manlulus ahu. Manggila do anak ni inang bangku, isuruh sidea do ahu manjaga pohon anggur; tapi pohon anggurhu sandiri, seng hujaga.

- ⁷ Pabotohkon ma bangku, ham haholongan ni uhurhu, ija do ham marmahan, ija ipasaran ham hulananmu tongah arian? Ai mase ma songon halak na mampar-ampar ahu i lambung ni hulanan ni hasomanmu?
- ⁸ Anggo seng ibotoh ham ai, ham ale si jengesan i tongah-tongah ni anak boru, irikkon ham ma bokas ni biribiri ai, anjaha parmahan ma hambingmu i lambung ni tenda ni parmahan.

Parsahapan ni Tunangan ampa Hinaholonganni

- ⁹ Usih do ham, ale hinasiholan ni uhurhu, bani huda na manarik garetu ni Parao.
- ¹⁰ Jenges do huyummu marnah ugas-ugas, anjaha borgokmu marsinongkok mutiha.
- ¹¹ Sinongkok omas paulionnami ope bamu, marsimatah bani pirak.
- ¹² Sanggah hundul raja ai mangan, muap do misbou ni minakku.
- ¹³ Haholongan ni uhurhu sasangkutan mir do ai bangku, tibal bani tontonku.
- ¹⁴ Haholongan ni uhurhu satandan bunga henna do ai bangku, na dob tubuh i pohon anggur En-Gedi.
- ¹⁵ Tongon, jenges do rupamu, ale hinasiholanku, jenges tumang do ham, songon asas do matamu.

¹⁶ Tongon jenges do ham, ale haholonganku,
jenges tumang do ham. Marbunga-bunga
simaratah do podomanta.

¹⁷ Hayu ares do tiang ni rumahta, anjaha
dingdingni ilampis bani hayu maranti.

2 ¹ Ia ahu bunga na i Saron do, silundat na i
habungan.

² Songon silundat i tongah-tongah ni duri-duri,
sonai do tongon hinasiholan ni uhurhu i
tongah-tongah ni anak boru.

³ Songon hayu untei manis i tongah-tongah
ni hayu harangan, sonai do tongon
haholonganku i tongah-tongah ni garama.
Marosuh do uhurhu hundul bani linggomni,
anjaha mantin do buahni bani tolonanku.

⁴ Iboan do ahu hubagas rumah anggur ai, anjaha
tandani bangku ai ma holong.

⁵ Ipargogohi do ahu marhitei kuei buah anggur,
ipahisar marhitei untei manis; tongon,
boritan do ahu halani sihol ni uhurhu.

⁶ Tangan sambilouni mangkalang ulungku, tangan
siamunni manrohop ahu.

⁷ Hupabija ma nasiam, ale boru Jerusalem, bani
ursa ampa bani balua boru-boru na i talun.
Ulang ma iganggu atap ipuhoi nasiam na
marsihaholongan paima sombuh uurni.

- ⁸ Tangar, sora ni haholonganku! Tonggor ma roh do ia, marlintun-lintun bani dolog-dolog, manlumpat-lumpat bani buntu-buntu.
- ⁹ Usih do haholonganku bani balua atap ursa na maposo. Tonggor ma, jongjong do ia i lopah ni tembok ni rumahnami, mangkawah humbani jandela, manorih-norih humbani jaring-jaring.
- ¹⁰ Marsahap ma haholonganku, nini hu bangku, “Jongjong ma ham, ale hinasiholanku, eta ma, ale botou na majenges!
- ¹¹ Tonggor ma, domma salpu musim borgoh, lopus anjaha salpu musim udan.
- ¹² Martumbori ma bunga-bunga i ladang, domma jumpah panorang mandoding-doding, anjaha sora ni anduhur ginti tarbogei do bani tanohta.
- ¹³ Hayu ara pe marmabeian ma buahni, hayu anggur marbungai anjaha misbou uapni. Jongjong ma ham, ale hinasiholanku, eta ma, ale botou na majenges!”
- ¹⁴ Ale asasku, na marianan bani rigat ni dolog batu, bani parponopan na i salahsah, pataridahkon ham ma rupamu bangku, pabogeihon ma soramu, ai dear do soramu, jenges do rupamu.

- 15 Tangkapi galot in, galot na etek-etek in,
na mandedai pohon anggur, ai domma
marbungai pohon anggurta.
- 16 Haholongan ni uhurhu, ahu do simadasi,
anjaha ia simada ahu, ia do na marmahan i
tongah-tongah ni bunga silundat.
- 17 Paima marombus logou sogod-sogod,
anjaha lintun na golap, roh ma ham, ale
haholonganku, usih bani balua ma ham
atap bani ursa na maposo i atas ni dolog
rium-riuman.”

3 ¹ Bani podomanku, borngin-borngin, hupindahi
do haholongan ni uhurhu. Hupindahi do ia,
tapi seng jumpah ahu.

² Puho ma ahu, husiar ma huta in inggot,
dalan-dalan ampa alaman, pindah-pindah
ahu bani haholongan ni uhurhu. Hupindahi
do ia, tapi seng jumpah ahu.

³ Jumpah si panrunda do ahu, sidea na manrunda
i huta ai, “Haholongan ni uhurhu, adong
tarpaidah nasiam?”

⁴ Ai pe lopus ahu humbani sidea, jumpah ahu
ma haholongankai, hutangkap ma ia, seng
be hupaluah, paima hutaruhkon ia hu
rumah ni inangku, masuk hu kamar ni na
mantubuhkon ahu.

⁵ Hupabija ma nasiam, ale boru Jerusalem,
hubani balua ampa hubani ursa boru-boru

na i talun: Ulang ma iganggu atap ipuhoi na marsihaholongan paima sombuh uhurni.

⁶ Aha do in, na tangkog hun halimisan, na songon tiang timus, na iparium marhitei mir ampa dahupa; ai ma bagei ni rium-riuman ni sipartiga-tiga.

⁷ Tonggor ma, ai ma pangusungan bani si Salomo. Onom puluh halak do na manlioti ia, humbani puanglima-puanglima ni Israel,

⁸ haganup sidea marpodang anjaha na somal marporang; ganup do sidea mangkalhal bani binongeini, manlawan na manginggoti borngin-borngin.

⁹ Ipadear Raja Salomo do pangusungan bani ai ma humbani hayu Libanon.

¹⁰ Ibahen do naheini humbani pirak, pangunsandeanni humbani omas, hundulanni humbani hiou hasumba anjaha humbagas ilampis bani hayu sibirong.

¹¹ Luar ma nasiam, ale boru Sion! Tonggor ma Raja Salomo, marsortali, na sinortalihon ni inangni bani, sanggah panorang parunjukonni, bani ari malas ni uhurni.

4 ¹ Tonggor ma, jenges do ham, ale hinasiholanku, jenges tumang do ham; songon mata ni asas do matamu i pudu ni tudung-tudungmu, jambulanmu usih bani hulanan ni hambing tuad hun dolog Gilead.

- ² Iponmu usih bani biribiri na baru ginunting, na naik humbani paridianni, haganup sidea marrindu-rindu, seng dong na lambang humbani sidea.
- ³ Songon bonang na tinubar do bibirmu, lamlam ia parsahapmu, songon dalima na binolah do huyummu ipudi ni tudung-tudungmu.
- ⁴ Borgokmu songon manara ni si Daud, na pinauli bahen ianan ni sinjata; marribu do gantar margantungan ijai, ganupan ai gantar ni puanglima.
- ⁵ Adopmu haduasi songon anak silinduat ni balua, na manggagat i tongah-tongah ni silundat.
- ⁶ Paima marombus logou sogod-sogod anjaha lintun na golap, sihol do ahu laho hu dolog mir ampa hu buntu-buntu hamonan.
- ⁷ Gok do jengesmu, ale hinasiholan ni uhurhu, seng dong tikasmu age sada.
- ⁸ Rap pakon ahu hun Libanon, ale tunanganku, susur ma ham rap pakon ahu hun Libanon. Tuad ma ham hun pakpak ni Dolog Amana, hun pakpak ni Dolog Senir pakon Hermon, humbani parponopan ni singa, humbani dolog ianan ni begu!
- ⁹ Domma tunduk uhurhu ibahen ham botou, tunanganku, domma ibuat ham uhurhu

- marhitei pangkirdop ni matamu tumang,
marhitei sinongkok na bani borgokmu in.
- ¹⁰ Jengesni in holongmu in, ale botou,
tunanganku! Mantinan do holongmu, lobih
humbani anggur, anjaha moruman do uap
ni minakmu ase haganup minak na misbou.
- ¹¹ Manisan do mangkatektek humbani bibirmu,
ale tunanganku, manisan pakon susu do i
toruh ni dilahmu, anjaha uap ni pakeianmu,
songon uap ni Libanon do.
- ¹² Songon pohon na hinondor do ham, ale botou,
tunanganku, songon pansur na nirungga,
anjaha songon bah tubuh na nilak.
- ¹³ Martumbor do ham, songon pohon na
majenges gok hayu dalima marbuah na
maharga tumang, marbunga-bunga henna
ampa nardus,
- ¹⁴ nardus ampa huning, hamonan pakon kulit
manis, marbagei hayu na morum, mir ampa
aloe, ronsi haganup hayu rompah.
- ¹⁵ Songon bah tubuh i pohon do ham, bah tubuh
hagoluhan, na mabaor hun Libanon.
- ¹⁶ Puho ma, ale logou utara, roh ma, ale logou
dangsina! Mangombus ma bani pohonku,
ase muap uapni na misbou ai! Roh ma
haholonganku marayak pohonni, anjaha
ipangan ma buahni na mantin in.

- 5** ¹ Roh ma ahu hu pohonku, ale botou, tunanganku! Hubuat do mirhu ampa minakku na misbou, hupangan asar ni lobakku ampa manisanni, anjaha huinum do angguru ampa susu: Mangan minum ma, ale huan-kuanku, marsombuh-sombuh ma ibagas holong!
- ² Modom do ahu, tapi puho do uhurhu. Tangar ma, hartuk-hartuk do haholonganku, “Buka bangku botou, hinasiholan, ham asaku ampa na majenges! Marnamur-namur do ulungku, marbah jambulanku ibahen udan borngin.
- ³ Domma hutanggali bajungku, sonaha ma pakeianku use ijai? Domma huburihi naheihu, hubutaki ma use ai?”
- ⁴ Idurdurhon haholongan ni uhurhu do tanganni hun jaring-jaring, gabe muyun ma uhurhu ibagas.
- ⁵ Jongjong ma ahu mangungkab bani haholonganku. Mangkatektek ma mir humbani tanganku, manjalir mir humbani jari-jaringku, sanggah na manjolom pating-pating ai.
- ⁶ Hubuha ma bani haholonganku, hape misir do haholonganku, seng taridah be. Marosak do uhurhu na laho ai ia. Hupindahi ma ia, hape seng jumpah, hudiloi tapi seng marbalos.

- ⁷ Jumpah siparrunda do ahu, sidea na mardalan maringgot i huta ai; ibogbog do ahu pala ughan, ibuat salendangku, sidea siparjaga i tembok ai.
- ⁸ Hupabija ma nasiam, ale boru Jerusalem, anggo jumpah nasiam haholongan ni uhurhu, aha ma hatahonon nasiam hu bani? Boritan do ahu halani sihol ni uhurhu!
- ⁹ Ai aha ma surung ni haholongan ni uhurmu humbani haholongan na legan, ham ale si jengesan i tongah-tongah ni naboru? Ai aha ma surung ni haholonganmu humbani haholongan na legan, ase pala ipabija ham hanami?
- ¹⁰ Lopak anjaha magerger do haholongan ni uhurhu, marhalobihan i tongah-tongah ni halak na marlaksa-laksa.
- ¹¹ Uluni songon omas pitah, jambulanni songon bulung ni halambir, mabirong songon kawak.
- ¹² Matani songon asas na i topi ni bah mardalan, na maridi ibagas susu, marianan bani bah mabuei.
- ¹³ Huyumni songon panampangan ni rompah-rompah, na mantubuhkon suan-suanan na misbou; bibirni songon bunga silundat, na manektekkon mir.

- ¹⁴ Tanganni songon omas na pinahibul, na tinatah bani mata intan tarsi; angkulani songon na pinauli humbani gading, ilampis bani mata intan sapir.
- ¹⁵ Hae-haeni hira tiang batu marmar, jonam bani nahei omas; rupani songon Libanon, tarpilih songon hayu ares.
- ¹⁶ Parsahapni matobu do, siharosuhkonon tumang do ia. Sonai ma haholongan ni uhurhu, sonai ma huankai, ale boru Jerusalem.

- 6** ¹ Huja do laho haholongan ni uhurmu, ale sijengesan i tongah-tongah ni naboru? Dompak ja laho haholongan ni uhurmu, ase dihut hanami mangindahisi rap pakon ham?
- ² Domma tuad haudungan ni uhurhu hu pohonni, hu panampangan ni rompah-rompah, laho marmahan ibagas pohon ai, anjaha laho mambuat bunga silundat.
- ³ Haholongan ni uhurhu, ahu do simadasi, anjaha ia simada ahu, na marmahan i tongah-tongah ni silundat.
- ⁴ Jenges do ham songon Tirsah, ale hinasiholan ni uhurhu, dear songon Jerusalem, anjaha marjumbalang songon bala.
- ⁵ Padaoh ma matamu humbangku, ai sunsah do ahu ibahen. Jambulanmu usih bani hulanan ni hambing, tuad hun Dolog Gilead.

- ⁶ Iponmu usih hubani biribiri na baru ginunting,
na naik hun paridianni; haganup sidea
marrindu-rindu, seng dong na lambang
humbani sidea.
- ⁷ Songon dahupa na binolah do huyummu i pudu
ni tudung-tudungmu.
- ⁸ Onom puluh do nasipuang, ualuh puluh na
binuat na legan, anak boru lang habilangan.
- ⁹ Tapi sahalak do asasku, na majenges bangku,
boru sasada ni inangni, kasihan ni na
mantubuhkoni. Kawah do anak boru hu
bani, iparhatuah do ia, nasipuang ampa na
binuat na legan mamuji-mujisi.
- ¹⁰ Ai ise do ai, na mangkawah songon
simarikkuning, jenges songon bulan, lihar
songon mata ni ari, anjaha jombut songon
bala?
- ¹¹ Tuad do ahu hu pohon hayu pala, laho
manorih bunga-bunga na i habungan, laho
manonggor atap martunasi ma hayu anggur,
atap marbungai ma dalima.
- ¹² Seng panagaman ni uhurhu, ipaosor ma ahu
hubagas gareta odoran ni raja.
- ¹³ Marhusor, marhusor ma, ale Sulamit,
marhusor, marhusor ma, ase ididah hanami
bohimu. Ai aha do kinawahkon nasiam
bani si Sulamit, sanggah na manortor ia i
parsaranan?

- 7** ¹ Dearni in panlangkah ni naheimu marsipatu,
ale anak boru na sangap! Parhibul ni
binongeimu songon ugas si panjagar,
tinukangan ni halak na pandei.
- ² Abinganmu songon panginuman na hibul, na so
ongga hurangan bani siinumon. Boltokmu
songon junjuran gandum, niliotan ni bunga.
- ³ Adopmu haduasi songon anak silinduat ni
balua.
- ⁴ Borgokmu songon manara gading. Matamu
songon bongbongan na i Hesbon, na bani
horbangan Bat-Rabim. Igungmu songon
manara Libanon, na manatap dompak
Damaskus.
- ⁵ Ulumu i atasmu songon Karmel do, anjaha
jambulan na bani ulumu margerger do;
homa sangkut do uhur ni raja ibahen
dandan ni jambulanmu.
- ⁶ Jengesni in ham anjaha laingan, ale
hinasiholanku, na majenges bangku!
- ⁷ Parangkulaonmu songon halambir, adopmu
songon tandanni.
- ⁸ Ningku, “hupanangkih ma halambir on, ase
hujolom dangkahni. Sai songon tandan ni
buah anggur do adopmu, anjaha misbou ni
hosahmu songon untei manis,

⁹ anjaha pamanganmu songon anggur pilihan,
na manjalir lamlam bani tolonan, mabaor
manlopusi bibir ampa ipon.”

¹⁰ Haholonganku do simada ahu, hu bangku do
siholan ia.

¹¹ Roh ma, ale haholonganku, laho ma hita hu
ladang, marborngin bani pohon anggur!

¹² Girah sogod ma hita laho hu pohon anggur,
laho manorih atap martunasi ma hayu
anggur, mangerbang bungani, anjaha
marbungai hayu dalima. Ijai ma bereonku
bam holong ni uhurhu.

¹³ Muap ma misbou ni buah dudaim ai; buei do
buah na maharga bani labahta, na baru
age na madokah, na husimpan bamu, ale
haholongan ni uhurhu.

8 ¹ Porini botouhu ham, na minum humbani
bagod ni inang. Anggo jumpah ahu ham i
darat, summahonku do ham, anjaha ise pe
lang na mangkata.

² Arahkononku ma ham anjaha boanonku hu
rumah ni inang, hubagas kamar ni na
mantubuhkon ahu. Bereonku ma ham
minum anggur na irarui, bah ni buah dalima.

³ Sai tangan sambilouni ma mangkalang ulungku,
tangan siamunni manrohop ahu.

- ⁴ Hupabija ma nasiam, ale boru Jerusalem,
ase ulang iganggu atap ipuhoi nasiam na
marsihaholongan ronsi sombuh uurni.
- ⁵ Ai ise do ai tangkog hun halimisan,
mangunsandei bani haholonganni? I toruh
ni hayu untei manis do hupuhoi ho. Ijai do
inangta mangarou ham, ijai do ia mangarou
mantubuhkan ham.
- ⁶ Bahen ma ahu gabe tintin pansap bani
tontonmu, gabe tintin pansap bani
tanganmu! Gogoh do holong ai songon
hamatean, golgol songon nagori toruh do oji
ni uhur ai. Gajag do ai songon gara ni apuy,
jimbur-jimburni songon jimbur humbani
Jahowa.
- ⁷ Seng tarintopi bah bangga holong, barang
tarayubkon bah mabaor ia. Porini pe ibere
halak ganup arta na adong i rumahni
mambuat holong ai, hona apasan do ia ijai.
- ⁸ Adong do sada botounami na etek-etek, seng
dong ope adopni. Aha do bahenonnami bani
botounami, anggo roh hata ni halak bani?
- ⁹ Ambit tembok ia, pajongjongonnami do i
atasni tayub pirak, anjaha ambit labah ia,
rungaonnami do ia bani papan hayu ares.
- ¹⁰ Tembok do ahu anjaha songon menara do
adopku. Dapot panonggorni do ahu, songon
halak na jumpahan tuah.

- ¹¹ Adong do bani si Salomo sada pohon anggur
i Baal-Hamon, iondoskon do pohon anggur
ai bani halak si parjaga; ganup maningon
mambere saribu sekel pirak boli ni buahni
ai.
- ¹² Ia pohon angguru, ahu tumang do
simadasi; bamu ma, ale Salomo,
sisaribu sekel pirak ai, anjaha dua
ratus bani si parjaga buahni ai.
- ¹³ Ham ale na marianan bani pohon ai,
manangi-nangi do huan-kuanku bani
soramu; pabogehon ma soramu bangku.
- ¹⁴ Papodas ma, ale haholonganku; usih bani
balua ma ham, bani ursa na maposo i atas
ni dolog rium-riuman.

Jesaya

1 ¹ Panonggoran ni si Jesaya, anak ni si Amos, na nididahni pasal tanoh Juda pakon huta Jerusalem bani panorang ni si Usia, si Jotam, si Ahas pakon si Hiskia, raja-raja ni Juda.

Hutuk ni Jahowa bani Bangsa Israel na Dajal ai

- ² Tangar ma ale langit, bogei ma ale tanoh; ai marsahap do Jahowa, “Hupagodang-godang do anak anjaha Hupatimbul, hape iimbang sidea do Ahu.
- ³ Itanda lembu do simadasi, anjaha ibotoh halode do palangka binahen ni tuanni; tapi anggo Israel seng itandai Ahu, anjaha bangsang-Ku seng maruhur.
- ⁴ Bursik ma bangsa si pardousa, bangsa sibuei hajahaton, ginompar ni halak na jungkat, anak si horjahon na masambor! Itadingkon sidea do Jahowa anjaha iapasi Na Pansing ni Israel, itundali sidea do Ia.
- ⁵ Bahen aha in sai nunuton lonsingon hanima, ai lambin surut do hanima humbangku? Ganup ulu boritan do, ganup pusu-pusu pe domma galek.

- ⁶ Humbani jampal ni nahei das bani ulu seng dong ijai na jorgit; na butong pakon na marbulistang, ampa uguh na mardaroh-daroh; seng hona pisat, seng hona balutan barang hona minakan.
- ⁷ Halong do tanohnima, matutung bani apuy hutanima, gogoh ni jumanima ipangan halak na legan i lobeinima; maseda do ai songon Sodom na matornoh.
- ⁸ Tarpunjung do boru Sion songon sopo-sopo i pohon anggur, songon lampolampo i pohon ansimun, songon huta na hinubu.
- ⁹ Ambit lang itadingkon Jahowa Zebaot banta otik na maluah doskon Sodom pakon Gomora do hita.

Rosuhan do Jahowa Mangidah Hamubahon ase Galangan

- ¹⁰ Tangihon hanima ma hata ni Jahowa ale pambobai ni Sodom! Boge i ma titah ni Naibatanta, ale bangsa Gomora!
- ¹¹ “Benahangku ma galangan sisayatonnima na buei in,” nini Jahowa. “Domma sobalan Ahu bani galangan situtungonnima na humbani biribiri tunggal, ampa bani taboh-taboh ni lombu na pinamombur. Seng iharosuhkon uhur-Hu daroh ni lombu jonggi, atap biribiri atap hambing tunggal pe.

- ¹² Anggo roh hanima Bangku sihol mangidah bohing-Ku, ise marsuruh hanima mandogei alaman-Ku?
- ¹³ Ulang be boban hanima galangan na so marnidok; dahupa hagigi do ai Bangku. Poltak ni bulan, ari Sabat, na mangadongkon partumpuan-tumpuan Seng tarharosuhkon Ahu hajahaton ampa na marpesta-pesta.
- ¹⁴ Poltak ni bulannima ampa pesta-pestanima ihagigihon Tonduy-Hu do; gabe boban do ai Bangku, anjaha loja do Ahu pausung-usung ai.
- ¹⁵ Age pe ipaherbang hanima tangannima, lingodkonon-Ku do matang-Ku humbennima; age pe ipagati hanima martonggo, seng tangaron-Ku ai; ai gok daroh do tangannima.
- ¹⁶ Maridi ma hanima, manguras ma hanima! Padaoh hanima ma hajahatonnima hun lobei ni matang-Ku; parontihon hanima mangkorjahon na masambor!
- ¹⁷ Parlajari mambahen na madear, pindahi habonaron, urupi halak na hona tokoh, ondingi halak na tading maetek, apiti naboru na mabalu!
- ¹⁸ Roh ma hanima, ase marturiak hita, nini Jahowa. Age pe gerger dousanima songon bunga ni dapdap lopak do bahenon-Ku ai

songon salju, age pe gerger songon hiou
hasumba, putih do bahenon-Ku ai songon
kapas.

¹⁹ Anggo ra hanima anjaha pambalosi hanima,
hinadear ni tanoh in ma panganonnima.

²⁰ Tapi anggo mangengkar hanima anjaha
manlawan, podang ma mangankon hanima,
sonai do ihatahon pamangan ni Jahowa.”

Ipapitah Jerusalem Marhitei Uhum

²¹ Sonaha do parjadi ni huta na bujur in gabe
boru jalang? Gok hinan habonaron ijai,
anjaha hapintoron marianan ibagas, hape
sonari gok pamunuh!

²² Pirakmu salih do gabe timah, anggurmu
maragu bani bah.

²³ Pambobai panggeori, hasoman ni panangko,
ganupan sidea mangkarosuhkon sisip anjaha
mangindahi sibere-bere. Seng iapiti sidea
halak na tading maetek anjaha pangaduan
ni parinangon na mabalu seng ijalo sidea.

²⁴ Halani ai nini Tuhan Jahowa Zebaot, Pargogoh
ni Israel do, “Sai marpuas-puas do uhur-Hu
bahenon-Ku mangidah imbang-Ku, anjaha
balaskonon-Ku do munsuh-Ku.

²⁵ Ulakan-Ku do mangonai tangan hubam,
tapi papitahon-Ku do ho songon bosu

buruk-buruk anjaha padaohon-Ku do humbam timah-timahmu.

- ²⁶ Anjaha pasuangon-Ku do bam panguhum songon na bani mulani ampa panuturi songon sapari; dob ai goranon ma ho huta hapintoron, huta na bujur.
- ²⁷ Ai tobuson do Sion marhitei habonaron anjaha pangisini na paubahkon uhurni marhitei hapintoron.
- ²⁸ Tapi siapkononkon do sipanggeori ampa pardousa rap-rap, anjaha bois do sagala na manadingkon Jahowa.
- ²⁹ Ai maningon maila do hanima halani hayu jabi-jabi, na hinarosuhkonnima hinan, anjaha maila do hanima halani pohon na pinilihnama.
- ³⁰ Ai maningon gabe songon hayu jabi-jabi do hanima, na melus bulungni, anjaha songon pohon na so marbah.
- ³¹ Halak parkuasa gabe songon bonang hori, pambahenanni songon palian ni apuy, haduasi rap mosog, seng dong na mangintopi.”

**Sion, Huta Pamatang ni Harajaon
Hadameion na Sihol Roh in**

2 ¹ Hata na nididah ni si Jesaya, anak ni si Amos pasal Juda pakon Jerusalem.

(ay. 2-4: Pausih Mik. 4:1-3)

- ² Masa do bani panorang parpudi, totap ma pajonamon dolog ni rumah ni Jahowa bani pakpak ni dolog-dolog, gijangan humbani buntu-buntu; jadi marodor ma sagala bangsa parbegu roh hujai,
- ³ anjaha buei do bangsa-bangsa bingkat hujai, nini, “Eta, tangkog ma hita hu dolog ni Jahowa, hu rumah ni Naibata ni si Jakob, ase iajarhon banta sagala dalam-Ni anjaha mardalan hita bani lapang-Ni. Ai hun Sion do harohan ni titah, anjaha hata ni Jahowa hun Jerusalem.
- ⁴ Jadi la ma manguhum i tongah-tongah ni bangsa parbegu anjaha na padalan uhum bani buei bangsa. Jadi patopahonon ni sidea ma podangni gabe mata ni tinggala, anjaha tanja ni sidea gabe sasabi. Seng be sintakon ni bangsa dompak bangsa podang, anjaha seng be guruhonon ni sidea hamunsuhon.
- ⁵ Ale ginompar ni si Jakob, eta ma, mardalan ma hita bani sondang ni Jahowa.
- ⁶ Tongon, iambukkon Ham do bangsa-Mu, ginompar ni si Jakob, ai igoki partondungon na hun hapoltakan do sidea ampa pangulpukon songon halak Palistim; sariah do sidea pakon halak na legan.

- ⁷ Gok do tanoh ni sidea bani omas ampa pirak,
seng tarhira arta ni sidea; gok do nagori ni
sidea bani huda, anjaha seng tarbilangni
garetani.
- ⁸ Gok do tanohni bani sisombahon; bani
jadi-jadian ni tanganni do sidea manambah,
ai ma na pinauli ni jari-jarini.
- ⁹ Mangunduk jolma, marrogop halak. Ulang ma
marulak-ulakan uhurmu bani sidea.
- ¹⁰ Laho ma hubagas dolog batu, ponopkon ma
dirimu bani orbuk i lobei ni panonggoti ni
Jahowa ampa i lobei ni hamuliaon-Ni na
marhidorat in.
- ¹¹ Mata hagijangon ni jolma sipatoruhon
do, ampa uhur hagijangon ni dalahi
sipatundukon do, pitah Jahowa do na timbul
bani ari ai.
- ¹² Tongon, ari ni Jahowa Zebaot maningon roh
do bani ganup na mangenjeng ampa na
timbul ampa bani sagala na pinagijang, ase
ipatunduk,
- ¹³ age bani sagala hayu ares na i Libanon, sonai
bani hayu jati na i Basan;
- ¹⁴ age bani sagala dolog na gijang ampa bani batu
buntu-buntu na bolon;
- ¹⁵ age bani ganup manara na gijang ampa bani
tembok na toguh;

¹⁶ age bani sagala kapal ni Tarsis ampa bani sagala na madear, na pinauli ni jolma.

¹⁷ Jadi patundukon ma gijang ni uhur ni jolma, ampa pangenjengon ni dalahi, pitah Jahowa do na timbul bani ari ai.

¹⁸ Sagala sisombah-sombahon masab ma.

¹⁹ Jadi masuk ma halak hubagas liang ampa ruang-ruang ni tanoh halani panonggoti ni Jahowa pakon halani jombut ni hamuliaon-Ni, sanggah bingkat la mangkirjati tanoh on.

²⁰ Bani panorang ai iambukkon halak ma gana-ganani na humbani pirak ampa omas, ai ma na pinaulini bahen sisombahonni, igijigkon hubani ubag ampa arip-arip,

²¹ sanggah na laho masuk hubagas liang ni dolog batu ampa bani riga ni dolog-dolog, halani panonggoti ni Jahowa pakon jombut ni hamuliaon-Ni, sanggah bingkat la mangkirjati tanoh on.

²² Paholang hanima ma dirinima humbani jolma si parhosah marhitei igungni! Ai aha ma ia hiraon?

3 ¹ Tonggor ma, paosoron ni Tuhan Jahowa Zebaot ma hun Jerusalem pakon hun Juda panungkoli ampa tungkot, parbohalan ni ruti pakon parbohalan ni bah ganup,

- ² puanglima pakon dalahi si parmunsuh,
panguhum pakon nabi-nabi, si partondung
pakon partua-partua,
³ kopala ni silima-puluh halak, na sangap-sangap
pakon panuturi, parsibalik mata na pandei
ampa si partabas.
⁴ Bahenon-Ku do dakdanak dalahi gabe raja
bani sidea, dakdanak na inumon do na
mamarentah sidea.
⁵ Jadi marsiodoh-odohan ma bangsa in, dalahi
samah dalahi, hasoman samah hasoman; na
maposo pahiri na matua, halak na malumat
mandoruni halak na sangap.”

**Uhum na Binoan ni Ari ni Jahowa
bani Sagala Pangenjengon ampa na
Sangap-sangap si Pardousa i Jerusalem**

- ⁶ Jadi jorotan ni halak ma saninani i rumah ni
bapani, nini ma, “Dong ope mantelmu, ho
ma pambobainami, ho ma na manggomgom
reong-reong ni huta on.
⁷ Jadi bani ari ai nini ma marbalos, ‘Lang tarbahen
ahu gabe panambari, seng dong ruti atap
hiou i jabungku, ulang pabangkit nasiam
ahu gabe pambobai ni bangsa in.’
⁸ Tongon, marumbak do Jerusalem anjaha
Juda madabuh, halani dilah ni sidea ampa
pambahenan ni sidea na mangimbang

Jahowa, laho paboritkon panonggor-Ni na marmulia in.

- ⁹ Rupa ni bohi ni sidea do patandahon sidea, anjaha dousa ni sidea pabotohkon sidea songon par Sodom, seng ihailahon. Magou ma sidea, ai sidea sandiri do parohkon na masambor bani.
- ¹⁰ Martuah do halak parpintor, sonang do ia; tongon, panganonni do buah ni na hinorjahonni.
- ¹¹ Magou do halak parjahat, sunsah do ia, ai balaskononkon do bani domu hubani na hinorjahon ni tanganni.
- ¹² Aih bangsang-Ku! Dakdanak do na mangodoh-odoh sidea, naboru parrajai bani. Aih bangsang-Ku! pambobaimu do na pakahouhon, anjaha sidea do na manggeori dalam sibolusonmu.”
- ¹³ Hehe do Jahowa laho mamorang, jongjong do la laho manguhum bangsa-Ni.
- ¹⁴ Roh do Jahowa laho mandabuh uhum, hubani pangintuai ni bangsa-Ni ampa raja-Ni.
“Hanima, hanima do na mamondut pohon anggur in, ibagas rumahnima do barang rampasan humbani halak na masombuh.
- ¹⁵ Na mahua do hanima, ase idogei-dogei hanima bangsang-Ku, anjaha irojati hanima bohi

ni halak na madoyuk? nini Tuhan Jahowa Zebaot.”

Uhum bani Boru Sion Halani Gijang ni Uhurni

- ¹⁶ Nini Jahowa, “Halani margijang ni uhur boru Sion, ipadiringak-dirgak uluni mardalan, manerep-nerep pangkawahni, mairdit mardalan, anjaha mardiring-diring golang ni naheini ibahen,
- ¹⁷ jadi palpalon ni Tuhan ma ulu ni boru Sion, anjaha pasalangon ni Jahowa na niabitanni.
- ¹⁸ Bani ari ai buaton ni Tuhan ma hajengeson ni tintin ni nahei, alit-alit ni bohi, horungkorung,
- ¹⁹ subang, golang, tudung-tudung,
- ²⁰ bulang, golang bani nahei, gondit, guri-guri ni minak na morum, pagar-pagar,
- ²¹ tintin bani jari-jari, tintin bani igung,
- ²² pakeian na marujuan, baju ganjang, salendang, tas,
- ²³ sormin, baju parbagas, tujung pakon sabling-sabling.
- ²⁴ Jadi masa ma, gantih ni na morum na marbau, gantih ni gondit tali, gantih ni jambulan na kariting hapalpalon, gantih ni pakeian na majenges guni, gantih ni hajengeson habadoron.

²⁵ Sagala anak dalahi bannima rasei do bahenon ni podang, anjaha puanglimanima matei i parmunsuhan.

²⁶ Tangis anjaha marhoru ma horbanganni, lungunan, hundul-hundul ma ia bani tanoh.”

4 ¹ Bani ari ai jorotan ni pitu naboru ma sada dalahi, nini, “Sipanganonnami pe ipangan hanami, anjaha hanami mansarihon parhiouonnami, asal ma marpanggorani bamu hanami; padaoh ham ma habadoron hun bennami.” *

Bagah-bagah Pasal Parsuang ni Sion

² Bani ari ai jenges anjaha marmulia ma tunas ni Jahowa, anjaha gogoh ni tanoh in gabe hasangapon ampa hajagaron ma bani na maluah humbani Israel.*

³ Jadi sagala na tading i Sion anjaha na teba i Jerusalem, goranon ma sidea na ma pansing, ai ma sagala halak na dob tarsurat hu hagoluhan i Jerusalem, *

⁴ ai ma dob iburihi Jahowa dungut humbani boru Sion, anjaha iayubkon utang daroh ni Jerusalem hun tongah-tongahni marhitei tonduy panguhumion ampa tonduy na mammosogkon. *

⁵ Jadi adongkonon ni Jahowa na i babou ni sab Dolog Sion ampa i babou ni ganup

partumpuanni hambun arian pakon
 timus ampa sondang ni apuy na gara
 borngin; tongon, i babou ni haganupan
 ai hasangapon ni Jahowa do pangondingi
 ampa panlinggomi; *

⁶ gabe parlinggoman ma ai arian hambani
 na milas, anjaha gabe haporusan ampa
 panisioan hambani haba-haba ampa udan.

Hutuk ni Jahowa bani Pohon Anggur-Ni

5 ¹ Sihol mandoding do ahui pasal na
 hinaholonganku, doding ni na
 hinaholonganku pasal pohon anggurni. Dong
 do pohon anggur bani na hinaholonganku
 bani dolog-dolog na lambutan.

² Isangkuli ma ai, ipulliti batuni anjaha isuani
 ma bani hayu anggur pilihan; ipajongjong
 ma menara panjagaan i tongah-tongahni,
 anjaha ipauli homa sada pangilangan.
 Mangarap do ia bani buah anggur na dear,
 hape simarbuah-buah anggur do ibere bani.

³ “Ai pe ale par Jerusalem ampa halak Juda,
 padalan hanima ma partimbangan pasal
 Ahu ampa pohon anggur-Hu.

⁴ Aha ope sibahenon bani pohon anggur-Hu, na
 so Hubahen hinan hujai? Mangarap do Ahu
 bereonni buah anggur na madear, hape
 mase ma ibere simarbuah-buah anggur?

- ⁵ Ai pe patugahon-Ku ma bannima atap aha na sihol bahenon-Ku bani pohon anggur-Hu: Dokdokon-Ku ma hondorni, ase hona gagatan ai; parsedaon-Ku ma tembokni, ase hona lotlotan.
- ⁶ Paturuton-Ku ma ai halong; seng be hona ranggason ai barang hona sangkul, tubuhan duri-duri ma ai ampa poyon-poyon. Parentahkonon-Ku ma hambun, ase ulang iparoh udan hujai.”
- ⁷ Tongon, ia pohon anggur ni Jahowa Zebaot, ai ma ginompar ni Israel, anjaha halak na i Juda, ai ma suan-suanan haudunganni. larapkon do hasintongan hape daroh maruseian, sonai hapintonon hape na so uhum do.

Papa ni Jahowa Halani Hasumsamon ni Bangsa ai

- ⁸ Bursik ma, halak na patambah-tambah rumah, na patambah-tambah ladang, gabe seng dong be ianan na lumei, jadi hanima tumang mando mangiankon tanoh in.
- ⁹ Domma ipatangarhon Jahowa Zebaot bani pinggolhu, “Tongon, maningon tadingkononkon do rumah na buei in, na bangga age na jenges, seng be dong na mangiankon.

- ¹⁰ Sapuluh lambar pohon anggur, mambere gogohni sada tapongan, anjaha sabantei bonih, mambere gogohni sada tumba tumang.”
- ¹¹ Bursik ma halak na pagirahkon puho, laho mangayaki siinumon na pamabukkon, anjaha na hundul-hundul ronsi bagas borngin, marmabuk-mabuk ibahen anggur.
- ¹² Mangan-mangan do sidea marhasoman husapi pakon arbap, tambur ampa sulim, anjaha minum-minum anggur; tapi pambahenan ni Jahowa seng ipardulihon sidea, anjaha jadi-jadian ni tangan-Ni seng ididah.
- ¹³ Halani ai tarbuang ma bangsang-Ku ibagas na so binotohni; matei ma na sangap-sangapni halani gayuran anjaha halak na mabuei matei horahan.
- ¹⁴ Ipangangang nagori toruh do tolonanni, anjaha tanggak tumang babahni ibahen, jadi tuad ma hujai hajengeson ni Jerusalem ampa haramionni, hariahonni ampa olob-olob na ijai.
- ¹⁵ Jadi jut ma uhur ni jolma, tunduk ia dalahi, anjaha mata na mangeljeng i patoruh.
- ¹⁶ Tapi gabe timbul ma Jahowa Zebaot halani uhum ai, anjaha Naibata na pansing in pataridahkon hapansingon-Ni ibagas hapintoron.

- 17 Jadi manampal ma anak ni biribiri songon na bani sampalan, anjaha hambing manggagat bani na mangkareong ai.
- 18 Bursik ma halak na mangaitkon hasalahan marhitei tali ni hajahaton, anjaha na mangaitkon dousa songon marhitei tali ni gareta,
- 19 na mangkatahon, “Ipodaskon, ioloskon ma horjani, ase ididah hita ai; sai roh ma tongon, sai saud ma sura-sura ni Na Pansing ni Israel, ase ibotoh hita.”
- 20 Bursik ma halak na mangkatahon bani na bajan, ai do na dear, anjaha bani na dear ai do na bajan, na mambahen na golap gabe na siang, anjaha na siang gabe na golap, na mambahen na mapaet gabe matobu, anjaha na matobu gabe na mapaet.
- 21 Bursik ma halak maruhur ia nini ibagas uhurni, anjaha na pentar ia iagan uhurni.
- 22 Bursik ma halak na beteng minum anggur, anjaha na garang mangagu minuman koras,
- 23 na paluahkon halak parjahat halani sisip, anjaha na padaohkon hapintoron humbani halak parpintor.
- 24 Halani ai, songon dilah ni apuy na mangankon anggala, anjaha songon poyon na mosog ibahen gajag ni apuy, sonai ma uratni gabe abuan, bungani habang songon orbuk, ai

itulak uhur ni sidea do titah ni Jahowa Zebaot, anjaha mapas uhurni bani Na Pansing ni Israel.

**Uhum ni Naibata bani Bangsa-Ni
Marhitei Bangsa na Legan.**

- ²⁵ Halani ai gajag do ringis ni Jahowa dompak bangsa-Ni, anjaha ipagostong tangan-Ni mangimbang sidea; ibogbog do sidea, pala dugur dolog-dolog anjaha radag bangkei ni sidea songon tompoh-tompoh i dalan. Sonai pe ganupan ai, seng surut ope gila-Ni, anjaha tong ope gostong tangan-Ni.
- ²⁶ Anjaha pajongjongon-Ni ma sada partanda bani bangsa na marianan daoh, anjaha idilo sidea hun ujung ni tanoh on; anjaha tonggor ma, podas, doras do sidea roh.
- ²⁷ Seng dong na loja, seng dong na jiris, sahalak pe seng dong tartunduh atap modom; seng dong gondit na tanggal barang tali ni sipatu na rotap.
- ²⁸ Marot do panah ni sidea, anjaha pasang siorni ganup; tambirik ni huda ni sidea songon batu, anjaha galapang ni garetani songon logou sibungkar hasowor.
- ²⁹ Aum ni sidea songon singa, songon anak ni singa do sidea maraum; maraum do sidea

lanjar manoroh, iluahon ma ai seng dong na boi paluahkon.

- ³⁰ Marhasak ma sidea roh bani ari ai, songon parhasak ni laut; anjaha anggo na kawahkon tanoh in, tonggor ma, golap anjaha gobir, anjaha na liar, golap do ibahen hambunin.

Pandiloon ni Jahowa bani si Jesaya

6 ¹ Bani tahun parmateri ni Raja Usia, huidah do Tuhan hundul i atas hotak na gijang anjaha na marmulia; anjaha rambu ni pakeian-Ni do manggoki rumah panumbahan.

² Serapim do jongjong i babou-Ni, na marhabong onom bei; dua marrungkub bohini, dua marrungkub naheini anjaha dua mangkabangkonsi.

³ Marsitauran ma sidea, nini, “Na Pansing, Na Pansing, Na Pansing do Jahowa Zebaot, gok do sab tanoh on bani hamuliaon-Ni.”

⁴ Jadi dugur ma onjolan ni pasihon halani sora ni na dilo-dilo ai, anjaha gok timus ma rumah ai.

⁵ Dob ai ningku ma, “Bursik ma ahu! Magou ma ahu, halani jolma parbibir na mabutak do ahu, anjaha marianan do ahu i tongah-tongah ni halak parbibir na mabutak; ai domma ididah matangku Raja in, Jahowa Zebaot.

- ⁶ Sada humbani Serapim ai habang ma dompak ahu, mamboan narnar ibagas tanganni, ai ma na binuatni marhitei gansip-gansip humbani anjapanjap.
- ⁷ Ijamah ma marhitei ai bibirhu, anjaha nini, 'Tonggor ma, on do na manjamah bibirmu, sae ma salahmu, sasap ma dousamu.'
- ⁸ Dob ai hubogei ma sora ni Tuhan, na mangkatahon, "Ise do sisuruhon-Ku: Ise do utusannami? Jadi ningku ma, 'Ijon do ahu, suruh Ham ma ahu!'
- ⁹ Jadi ihatahon ma, 'Laho ma ho, hatahon ma bani bangsa on: Tangar, tangar hanima ma, tapi ulang artihon; idah, idah hanima ma, tapi ulang arusi hanima!
- ¹⁰ Patendel ma uhur ni bangsa on, panengel pinggolni, anjaha papitung matani, ase ulang marpangidah ia marhitei matani, anjaha ulang marpanangar marhitei pinggolni; ase ulang mangarti uhurni, anjaha ulang ipaubah uhurni gabe malum ia.'
- ¹¹ Jadi ningku ma, 'Piga dokah on, Tuhan?' Balos-Ni, 'Ronsi halong huta-huta, seng dong na mangiankon; rumah-rumah lang marisi jolma, anjaha ladang salih gabe halimisan;
- ¹² ipadaoh Jahowa jolma, anjaha lungun tumang tanoh in.'

¹³ Anjaha anggo adong ope na tading ijai saparsapuluh, ai pe boiskononkon do, usih songon hayu jajabi atap hayu baringin, na jongjong ope martutuho, sanggah hona roboh. Bonih na ma pansing do tutuhoni ai.”

Ojur-ujur bani Raja Ahas ase Totap Porsaya Ia

7 ¹ Sanggah panorang ni si Ahas, anak ni si Jotam, anak ni si Usia raja ni Juda, tangkog ma si Resin, raja ni Aram pakon si Pekah, anak ni si Ramalya, raja ni Israel hu Jerusalem laho marporang, tapi seng tartaluhon sidea huta ai.

² Jadi dob ibaritahon halak bani ginompar ni si Daud, “Domma sariah halak Aram pakon halak Efraim, gabe hitir ma uhurni pakon uhur ni bangsani, songon hayu harangan na nidugur ni logou.

³ Jadi nini Jahowa ma dompak si Jesaya, ‘Laho ma ho manjumpahkon si Ahas, rap pakon anakmu si Sear-Jasub, hu ujung ni dalan ni bah na hun bongbongan parhuluan ai dompak dalan hu ladang panjomuran ai.’

⁴ Hatahon ma hu bani, ‘Marjaga-jaga ma ho, nalom maruhur, ulang ho mabiar, anjaha ulang ma galek uhurmu mangidah sipu-sipu na dua na martimus ai, mangidah parringis ni si Resin, halak Aram ampa anak ni si Remalya.’

- ⁵ Halani na jahat iuhurhon halak Aram, halak Efraim ampa anak ni si Remalya dompak ho, nini,
- ⁶ “Laho ma hita tangkog hu Juda, parsirak hita ma ai, anjaha taban hita banta anjaha pabangkit hita ma si Tabel gabe raja i tengah-tengah ni sidea,
- ⁷ tapi sonon do hata ni Tuhan Jahowa, ‘Seng anjai jadi ai, seng saud ai.’
- ⁸ Tapi Damaskus do pematang ni Aram, anjaha si Resin kopala ni Damaskus. (Onom puluh lima tahun nari masarsar ma Efraim, seng be sada bangsa)
- ⁹ Anjaha Samaria do pematang ni Efraim, anjaha anak ni si Remalya kopala ni Samaria. Anggo seng porsaya hanima, seng anjai totap hanima.”

Bagah-bagah Pasal Immanuel

- ¹⁰ Dob ai nini Jahowa ma use bani si Ahas,
- ¹¹ “Pindo ma bam sada tanda humbani Jahowa Naibatamu, hun nagori toruh na bagas, atap hun datas humbani ianan na gijang.
- ¹² Tapi nini si Ahas ma, ‘Seng mangindo ahu, anjaha seng ra ahu manlajou Jahowa.’
- ¹³ Dob ai nini ma, ‘Tangar ma ale ginompar ni si Daud! Maotiktu do pangahapnima manlajou jolma, gabe sihol lojaannima age Naibatanku?’

¹⁴ Halani ai bereon ni Tuhan sandiri ma bannima sada tanda, 'Tonggor ma, boratan rumah ma sada anak boru, anjaha tubuhkononni ma sada anak, anjaha bahenonni ma goranni: Immanuel.'

¹⁵ Mantega pakon manisan do sipanganonni, paima ibotoh manulak na jahat ampa mamilih na madear.

¹⁶ Tonggon, paima ibotoh manulak na jahat ampa mamilih na madear, tarulang ma nagori ni raja na dua ai, hinabiaranmu sonari."

Hasedaon Sipamasaon ni Jahowa bani Tanoh Juda

¹⁷ Parohon ni Jahowa do bam ampa bani bangsamu ampa bani ginompar ni bapamu panorang na so onnga masa dob sirang Efraim hun Juda ai ma marhitei Raja Assur.

¹⁸ Jadi masa ma bani ari ai: Diloon ni Jahowa ma lanog hun topi ni Bah Masir pakon lobah hun Nagori Assur.

¹⁹ Marrohan ma ai anjaha sogop ganup bani lombang na tungkis ampa bani rigat-rigat ni dolog batu, bani sagala duri-duri ampa bani sagala sampalan.

²⁰ Bani panorang ai, rasipon ni Jahowa ma marhitei rasip na sinewa hun dipar ni Bah Eprat (ai ma raja ni Assur) ulu ai ampa ambulu ni nahei, anjaha buaton ni ai do age jambek.

- ²¹ Jadi masa ma bani panorang ai, sada halak marmahan pitah sada lumbu ampa dua hambing;
- ²² anjaha halani buei ni dadih na binereni, ipangan ma mantega; tongon, mantega ampa manisan do ipangan sagala na tading bani nagori ai.
- ²³ Jadi masa ma bani panorang ai, sagala tanoh na adong ijai, saribu kambona hayu anggur, na marharga saribu pirak, salih ma gabe galunggung hatubuhan ni duri-duri ampa suga-suga.
- ²⁴ Roh ma halak hujai marsior pakon marpanah, halani duri-duri ampa suga-suga do manggoki tanoh in.
- ²⁵ Anjaha sagala dolog-dolog, na sinangkul hinan, seng be idohori halak halani biarni bani duri-duri ampa suga-suga; jadi gabe panggagatan ni lumbu ampa sirojaton ni biribiri ma tanoh in.”

Pasal Parseda ni Damaskus ampa Samaria Ibahen Assur

- 8** ¹ Dob ai nini Jahowa ma hu bangku, “Buat ma bam batu panuratan na bolag, suratkon ma hujai marhitei surat ni jolma: Bani si Podas-manrampas Doras-manaban.”
- ² Jadi hubuat ma bangku saksi hatengeran, ai ma Malim Uria pakon si Sakaria, anak ni si Jeberekya.
- ³ Jadi hudohori ma nabi naboru ai, gabe boratan rumah ma ia, anjaha itubuhkon ma sada anak dalahi. Jadi ihatahon Jahowa ma hu

bangku, “Bahen ma goranni Mahersalal-hasbas
(*Podas-manrampas Doras-manaban*);

⁴ ai paima ibotoh anak ai mangkatahon, ‘Bapa!
inang!’ Usungon ni halak ma habayakon ni
Damaskus ampa taban-taban na hun Samaria
hulobei ni Raja Assur.”

Pasal Parmasuk ni Assur hu Juda

⁵ Dob ai iulaki Jahowa ma marsahap hu bangku,
sonon,

⁶ “Halani mapas bangsa on bani Bah Siloa na
nanget mardalan, anjaha gobir ia bani si
Resin ampa bani anak ni si Remalya,

⁷ halani ai parohon ni Tuhan ma bani sidea Bah
Eprat na gogoh anjaha na bangga ai, ai ma
Raja Assur pakon sagala balani; sampur ma
ai bani sagala bondarni anjaha salpuanni do
sagala topini.

⁸ Masukanni ma tanoh Juda, marbanggal ma
ai mabaor pala das bani borgok, anjaha
habongni na pinaherbangni ai do manggoki
tanohmu, o Immanuel.”

Lumba-lumba bani Halak Assur

⁹ Botoh ma ai, ale bangsa-bangsa anjaha gobir
ma; tangar hanima ma, ale tanoh na daoh,
gonditi hanima ma dirinima anjaha gobir
ma.

¹⁰ Manriahi ma hanima, tapi seng saud ai, bahen hanima ma ranggian, tapi seng jadi ai, ai Naibata do hasomannami.

Jahowa Hansa Pangguruan

¹¹ Sonon do hata ni Jahowa bangku, sanggah na iJOROTI tangan-Ni ahu, anjaha ipalumba ahu ulang mardalan bani dalan ni bangsa on, nini,

¹² “Ulang ma hatahon hanima partahian bani haganup na hinatahon ni bangsa on partahian, anjaha bani na hinabiaran ni sidea ulang ma hanima mabiar, anjaha ulang gobir.

¹³ Jahowa Zebaot, Ia ma na ma pansing bannima, Ia ma sihabiarannima anjaha bani ma hanima hitir-hitir.

¹⁴ Ia do ianan na ma pansing, batu partolsuan pakon batu gingging, pargompangan bani haduasi ginompar ni Israel, tirangkap pakon siding bani na marianan i Jerusalem.

¹⁵ Buei ma na tartolsu humbani sidea, madabuh anjaha mapuntar, hona siding anjaha tartangkap.

¹⁶ Simpan ma hasaksian in, tartokan ma in ibagas susianku!

¹⁷ Tapi mangarap do ahu bani Jahowa, na dob mamonopkon bohi-Ni humbani ginompar ni si Jakob, Ia do hupaima-ima.

¹⁸ Tonggor ma, ia ahu ampa dakdanak na binere ni Jahowa bangku, tanda ampa tuduh-tuduh do

hanami bani Israel, humbani Jahowa Zebaot, na marianan i Dolog Sion.”

Uhum bani Parnaibata Sileban

¹⁹ Anggo ihatahon sidea bannima, “Sungkun ma panieran ampa partondung, si parhusip ampa si partabas! Ai lang patut sungkunon ni sada bangsa naibatani, anjaha marpanungkun ia bani na dob matei, halanijolma na manggoluh?

²⁰ Titah pakon hasaksian ni Jahowa do sisungkunon! Anggo lang romban hubani hata on ihatahon sidea, seng dong be idahon ni sidea na siang,

²¹ mawat-awat mando sidea, marhasunsahan anjaha loheian; halani loheian sidea marah ma sidea anjaha ipapai rajani ampa Naibatani.

²² Itarei dompak datas, ikawahkon hu tanoh, tonggor ma, hasosakan ampa golap, na lotir ampa hamarsikon, bani hagolapan do sidea iambukkon.”

Bagah-bagah Pasal Partubuh ni Raja Damei

9 ¹ (8-23) Tongon, seng lanjar golap nagori na hona odoh-odoh in! Songon na pinaroh ni Jahowa sapari haboron bani tanoh Sebulon ampa tanoh Naftali, sonai do bani panorang na sihol roh bereon-Ni hasangapon bani dalan na dompak laut,

- tanoh na i dipar ni Bah Jordan, ampa bani tanoh ni sipajuh begu-begu.
- ² (9-1) Bangsa na mardalan ibagas hagolapan mangidah sada panondang na bolon, halak na marianan bani linggoman ni hamatean, poltak do i babou ni sidea sada panondang.
- ³ (9-2) Ipabuei Ham do bangsa in, itambahi Ham malas ni uhurni; marmalas ni uhur do sidea i lobei ni bohi-Mu, songon malas ni uhur sanggah pariama, songon halak na marolob-olob sanggah marbagi taban-taban.
- ⁴ (9-3) Ai pasangan na bani tangkuhukni, pakon lanja-lanja na bani abarani ampa lonsing-lonsing ni sipangodoh-odoh, Ham do na mamonggolhon songon bani ari ni Midian.
- ⁵ (9-4) Ai sagala sipatu na mardorob-dorob manlangkah, anjaha sagala pakeian porang na marlapu daroh maningon bois do tutungon, gabe sipanganon ni apuy.
- ⁶ (9-5) Ai domma tubuh banta sada na etek-etek, ibere do banta sada anak, tampei bani abarani do panggomgomion, anjaha ibahen do goran-Ni: Paruhur Halongangan, Naibata Parkuasa, Bapa sadokah ni dokahni, Raja Damei.

⁷ (9-6) Parrarat ni harajaon-Ni ampa hadameion-Ni seng marpunsa ai bani hotak ni si Daud ampa bani harajaonni, halani ipatotap anjaha ipatoguh do ai marhitei uhum pakon hapintoron humbani sonari nari ronsi sadokah ni dokahni. Simburu ni Jahowa Zebaot do mambahen sonai.

**Uhum ni Naibata bani Efraim
halani Hengkeng ni Uhurni**

- ⁸ (9-7) Itongos Tuhan do sada hata bani si Jakob, anjaha sogop do ai bani Israel.
- ⁹ (9-8) Botohon ni ganup bangsa in do ai, ai ma halak Efraim ampa halak Samaria, na mangkatahon ibagas pangenjengon ampa gijang ni uhur:
- ¹⁰ (9-9) Tembok batu na dob marumbak ai, paulionnami do marhitei batu gingging; hayu jetun na dob irobah ai, gantihonnami do bani hayu ares.
- ¹¹ (9-10) Jadi isuruh Jahowa ma si Resin mandorab sidea, anjaha ijuljul munsuh bani sidea,
- ¹² (9-11) ai ma halak Aram hun hapoltakan, halak Palistim hun hasundutan, gabe bois Israel ibonduti. Sonai pe ganupan ai seng surut ope ringis-Ni, tongtong ope gostong tangan-Ni.

- ¹³ (9-12) Seng mulak bangsa ai bani na mambogbogsi, seng ipindah Jahowa Zebaot.
- ¹⁴ (9-13) Halani ai irotap Jahowa ma humbani Israel ulu pakon ihur, dangkah ni palem ampa arung-arung ibagas na sadari.
- ¹⁵ (9-14) Pangintuai-pangintuai pakon na sangap-sangap, ai ma ulu ai, anjaha nabi na mangajarhon ladung, ai ma ihur ai.
- ¹⁶ (9-15) Ai pambobai ni bangsa on do na mambahen kahou sidea, anjaha na binobahon ni sidea hona bondut.
- ¹⁷ (9-16) Halani ai seng ihamalaskon uhur ni Tuhan anak garama ni sidea, anjaha seng maidop uhurni bani na tading maetek atap naboru na mabalu, ai ganup do sidea parjahat anjaha sibahen na masambor, anjaha ganup pamangan manluarhon haotoon. Sonai pe ganupan ai seng surut ope ringis-Ni, tongtong ope gostong tangan-Ni.
- ¹⁸ (9-17) Tongon, gara hajahaton ai songon apuy, ipangan rimbang pakon hupi-hupi, imosogkon harangan na potpot, martimpul do timusni hu babou.
- ¹⁹ (9-18) Marhitei panomboh ni ringis ni Jahowa Zebaot mosog do tanoh in, anjaha bangsa

in doskon soban sipanganon ni apuy; seng marsihaholongan be na marsanina.

²⁰ (9-19) Mangkarat halak dompak siamun, tong do loheian ia, mandaub halak dompak sambilou, tong do seng bosur; ganup marsipangan daging ni hombar rumahni.

²¹ (9-20) Manase mangankon Efraim, Efraim mangankon Manase, dob ai rap sidea mangimbang Juda. Sonai pe ganupan ai, seng surut ope ringis-Ni, tongtong ope gostong tangan-Ni.

10 ¹ Bursik ma halak, na mambahen aturan na so pintor, ampa si panurat, na manuratkon odoh-odoh,

² laho papeletkon pahara ni halak na masombuh, anjaha manrampas hak ni halak na musil i tongah-tongah ni bangsang-Ku, ase naboru na mabalu gabe taban-taban bani sidea, anjaha halak na tading maetek gabe sirampokan ni sidea.

³ Tapi aha ma na sihol bahenonnima bani ari pambalason ampa bani haba-haba na sihol roh humbani na daoh? Bani ise ma hanima maporus mangindo pangurupion? Ija do tadingkononnima habayakonnima?

⁴ On do hansa: Unduk i tongah-tongah ni halak na tartaban, atap tibal i tongah-tongah ni halak

na iraseihon. Sonai pe ganupan ai lape surut ringis-Ni, tongtong ope gostong tangan-Ni.

Uhum bani Assur halani Pangenjengonni

- ⁵ Bursik ma Assur lonsing-lonsing ni ringis-Hu
ampa simambu ni ringis-Ku.
- ⁶ Bani bangsa parjahat do ia Husuruh, anjaha bani
bangsa sigilaan-Ku do ia Huparentahkon,
laho manrampas sirampason ampa
manaban sitabanon, laho manrojatisi
songon hubang i alaman.
- ⁷ Tapi anggo ia seng sonai sura-surani, anjaha
uhurni seng sonai tujuanni; tapi sihol
marripaskon do uhurni, anjaha mamboiskon
bangsa-bangsa, seng otik,
- ⁸ ai nini do, “Ai lang raja do ganup gamot-
gamotku?”
- ⁹ Ai lang songon na bani huta Karkemis do masa
bani Kalno? Barang songon na bani Arpad
masa bani Hamat? Barang songon na bani
Samaria masa bani Damaskus?
- ¹⁰ Songon pangonai ni tanganku bani harajaon na
marsisombah-sombahon, na margana-gana
sibueinan marimbang na i Jerusalem ampa
na i Samaria,
- ¹¹ mintor lang ma bahenonku bani Jerusalem
ampa bani gana-ganani songon na

dob hubahen bani Samaria ampa bani gana-ganani.”

¹² Tapi dob isaloseihon Tuhan ganup horja-Ni i Dolog Sion ampa i Jerusalem, luluhonon-Ni ma pangenjengon ni Raja Assur ampa mapas ni pangkawahni.

¹³ Ai nini do, “Marhitei hagogohon ni tanganku do hubahen ai anjaha marhitei hapentaranku, ai na pantas do ahu. Ahu do na mammasabkon parbalogan ni bangsa-bangsa anjaha hurampas arta-artani, anjaha songon puanglima hupaturun do sagala na marparatas.

¹⁴ Jumpah tanganku do habayakon ni bangsa-bangsa songon asar ni manuk-manuk, anjaha songon halak na manjomputi tolur na dob tinadingkon, sonai do hupatumpu ganup tanoh on, seng dong na paherbang habong, atap na pangangang pagut atap na marsiok pe.

¹⁵ Mintor manggagah ma tangkei dompak halak na manahahonsi, atap mangunsagah ma sihit dompak halak na manariksi? Tungkot ma gakni mangangkat halak na manjolomsi, atap simambu ma gakni manjomput halak, na so hayu ai?”

¹⁶ Halani ai tongoson ni Tuhan Jahowa Zebaot do tirahap hu tongah-tongah ni halakni na

- mombur, anjaha pagaraon do pinurun i toruh ni hasangaponni, songon gara ni apuy.
- ¹⁷ Anjaha panondang ni Israel do gabe songon apuy, anjaha na pansing-Ni gabe jirlam ni apuy, laho mangankon anjaha mamboiskon suga-sugani, hupi-hupini ibagas na sadari.
- ¹⁸ Hamuliaon ni haranganni ampa jumani boiskononni do, hosah ronsi badan, songon parmerung ni naboritan parmerungni.
- ¹⁹ Hayuni na tading i harangan boi hiraon, dakdanak pe boi ma manuratkon.

Haluahon ni Teba-teba na humbani Israel

- ²⁰ Bani ari ai, teba-teba humbani Israel ampa na maluah humbani ginompar ni si Jakob, lang be mangunsandei bani halak na mambogbogsi, tapi bani Jahowa, Na Pansing ni Israel mando sidea mangunsandei ibagas hasintongan.
- ²¹ Teba-teba do na mulak, teba-teba humbani si Jakob mulak hubani Naibata na gogoh in.
- ²² Age pe songon horsik i topi ni laut bangsamu ale Israel, teba-teba do hansa hunjai na mulak, domma iputuskon hamagouan, marhitei parsampur ni hapintoron-Ni.
- ²³ Tongon hasedaon na dob iputuskon Tuhan Jahowa Zebaot pasaudon-Ni do i tongah-tongah ni sab tanoh on.

²⁴ Halani ai sonon do nini Tuhan Jahowa Zebaot, “Ulang hanima mabiar dampak Assur, ale bangsang-Ku, na marianan i Sion, age pe ibogbog hanima marhitei libas-libas anjaha iondamkon simambuni bam, songon binahen ni Masir.

²⁵ Ai otik nari mando, marpunsa ma ringis-Ku, anjaha marbalik ma ringis-Ku bani sidea laho mamboiskon.”

²⁶ Jadi sintakon ni Jahowa Zebaot ma lonsing-lonsing dampak sidea songon na binahen-Ni manlonsing halak Midian dohorhon Dolog Batu Oreb, anjaha angkaton-Ni do tungkot-Ni i babou ni laut, songon na bani halak Masir ijia.

²⁷ Bani ari ai mosor ma rodi-Ni humbani abaramu, ampa pasangan-Ni laho ma humbani tangkuhukmu.

Parroh ni Munsuh hun Utara ampa Partalu ni Sidea

²⁸ Tangkog do ia hun Rimon, das ma ia hu Ayat, mamontas ma ia hun Migron anjaha i Mikmas ipatumpu ugas-ugasni.

²⁹ Ibontas sidea ma lombang ai, i Geba do sidea marborngin; gobir do Rama, maporus ia Gibeasaul.

³⁰ Taur-taur ma ho ale boru Gallim! Tangar ma, ale Laisa! Balosi ma ia, ale Anatot!

³¹ Maporus do Madmena, pangisi ni Gebim lintun mangindahi parbansahan.

- ³² Sadari on ope das do ia i Nob, iondamkon tanganni dampak dolog ni boru Sion, dampak buntu-buntu ni Jerusalem.
- ³³ Tonggor ma, Tuhan Jahowa Zebaot do manultuli dangkah marhasoman kuasa na majangin; irobah do panuntunni anjaha ipatoruh na matabun.
- ³⁴ limas do tombak marhitei hapak bosu, anjaha Libanon rap pakon hayuni na bangga-bangga ai marumbak ma.

Raja Parpintor na humbani Ginompar ni si Daud ampa Harajaon Hadameion ai

- 11** ¹ Dob ai mandarat ma sada tunas humbani tutuho ni si Isai, anjaha marbuah sada tumbor na roh humbani uratni.
- ² Sogop ma hubani Tonduy ni Jahowa, tonduy hauhuron ampa pangarusion, tonduy panuturion ampa hagogohon, tonduy habotohon ampa biar bani Jahowa. Harosuh ni uhurni ai ma marhabiaran bani Jahowa.
- ³ Seng mangihutkon pangidah ni matani ia manguhumi, anjaha seng mangihutkon pambogei ni pinggolni ia mamutuskon.
- ⁴ Tapi marhitei hapintoron do uhumanni halak na masombuh, anjaha marhitei hasintongon do dabuhonni timbangan bani halak na madoyuk i nagori in. Marhitei

simambu ni pamanganni do libasonni halak sipangodoh-odoh, anjaha marhitei hosah ni bibirni bunuhonni halak parjahat.

⁵ Hapintoron do gondit ni binongeini, anjaha hasintongan do bonting ni angkulani.

⁶ Jadi rap marianan ma sorigala ampa biribiri, anjaha manggompang begu i lambung ni hambing; rap manggagat ma anak ni lembu pakon anak ni singa, anjaha dakdanak do na marmahan sidea.

⁷ Lembu pakon gipul rap manggagat, anak ni sidea rap manggompang, singa mangan poyon-poyon songon lembu.

⁸ Dakdanak na inumon marguro-guro i lambung liang ni ulog darih, anjaha dakdanak na sirang minum manjukjukkon tanganni hu ruang ni ulog na marbisa.

⁹ Seng be manjahati atap mangagou be sidea bani sab dolog-Ku na pansing in, tongon habotohon pasal Jahowa do manggoki tanah in, songon bah na manggoki laut.

Parsuang ni Israel ampa Panggomgomion ni Sidea bani Bangsa-bangsa.

¹⁰ Bani ari ai roh ma pindah-pindah halak si pajuh begu-begu bani urat ni si Isai, na pinajongjong songon mandera partanda

bani bangsa-bangsa, gabe marmulia ma
iananni.

- ¹¹ Bani panorang ai ulakan ni Jahowa ma
pagostong tangan-Ni, laho manobus
teba-teba ni bangsa-Ni na tading ope i Assur,
i Masir, i Patros, i Etiopia, i Elam, i Sinear, i
Hamat ampa i pulou-pulou na i laut.
- ¹² Pajongjongon-Ni ma sada mandera partanda
bani bangsa si pajuh begu-begu, anjaha
patumpuon-Ni ma sagala na binuang
humbani Israel ampa na merap hambani
Juda; ipatumpu do sidea hambani deisa na
ompat i tanoh on.
- ¹³ Jadi maronti ma parsimburuon ni Efraim,
anjaha iboiskon ma na manosak Juda. Seng
be simburu Efraim bani Juda anjaha Juda
seng be sosakonni Efraim.
- ¹⁴ Tapi rap ma sidea habang bani raboyon ni halak
Palistim dampak hasundutan, rap do sidea
manrampas dampak halak parhapoltakan.
Edom pakon Moab patundukon ni tangan
ni sidea do, anjaha ginompar ni Amon
mambalosi bani sidea.
- ¹⁵ Anjaha pahorahon ni Jahowa do laut tador ni
Masir, anjaha ondamkonon-Ni tangan-Ni hu
bani Bah Eprat marhitei milas ni hosah-Ni,
anjaha bogbogon-Ni do ai gabe pitu
binanga, gabe boi diparan marsipatu.

¹⁶ Gabe dong ma dalan na bolon sada bani teba-teba ni bangsa-Ni, na tading hun Assur, songon na bani Israel sanggah mandarat sidea hun tanoh Masir.

Doding Puji-pujian ni Halak na dob Maluah

12 ¹ Anjaha hatahononmu ma bani ari ai, “Sihol do pujionku Ham ale Jahowa, ai dob igilai Ham ahu, surut do ringis-Mu anjaha iapohi Ham do ahu.

² Tonggor ma, Naibata do haluahon bangku, tenger do uhurhu anjaha seng mabiar ahu; ai Tuhan Jahowa do gogohku pakon dodingku, anjaha la do gabe hatuahon bangku.

³ Jadi marmalas ni uhur ma nasiam manahui bah humbani bah tubuh haluahon.

⁴ Hatahon nasiam ma bani ari ai, ‘Puji ma Jahowa, dilo ma goran-Ni, patugah nasiam ma pambahenan-Ni i tongah-tongah ni bangsa-bangsa, ingat nasiam ma, timbul do goran-Ni tongon.’

⁵ Mandoding ma nasiam bani Jahowa, ai banggal do na binahen-Ni; sai tarbarita ma on i sab tanoh on.

⁶ Marsurak anjaha marolob-olob ma nasiam na marianan i Sion, ai banggal do i tongah-tongah nasiam Na Pansing ni Israel.”

Parrongrong ni Huta Babel

- 13** ¹ Pangungkabon pasal Babel, na nididah ni si Jesaya, anak ni si Amos.
- ² Pajongjong hanima ma mandera partanda bani dolog na leseng, pagomos ma martaur bani sidea; hilapkon hanima ma tangannima, ase masuk sidea humbani horbangan ni halak na sangap-sangap!
- ³ Ahu na dob mamarentahkon hubani halak na Hupapansing, domma Huhara puanglima-Ku, na roh garang marsurak, laho padalankon ringis-Ku,
- ⁴ tangar, sora na gosou bani dolog songon sora ni bala na buei! Tangar, sora na guyu bani harajaon-harajaon, bangsa-bangsa na roh martumpu! Jahowa Zebaot patitirhon bala laho marmunsuh.
- ⁵ Na roh do sidea humbani nagori na daoh, humbani ujung ni langit, Jahowa ampa sinjata ni ringis-Ni, laho mamboiskon ganup tanoh in.
- ⁶ Mandoruh ma hanima, ai dohor do ari ni Jahowa, songon hasedaon humbani Siparkuasa in do parroh-Ni.
- ⁷ Halani ai galek ma sagala tangan, madotei uhur ni ganup halak, anjaha tarsonggot sidea.

- ⁸ Hajorgongon ampa pangarouon do mandorab sidea, mangarou do sidea songon naboru na laho tubuhan tuah, marsinonoan do sidea, gerger bohini songon narnar.
- ⁹ Tonggor ma, na roh ma ari ni Jahowa, jangin marhasoman gila ampa ringis na gajag, laho mambahen halimisan tanoh in ampa laho mamboiskon pardousa hunjai.
- ¹⁰ Ai sagala bintang na i langit ampa bintang pariama seng be bereonni sinalsalni; golap do mata ni ari bani parpoltakanni, anjaha bulan seng marsinondang.
- ¹¹ Balaskonon-Ku do bani dunia on hajahatonni, ampa bani halak parjahat salahni, parontihonon-Ku ma pangenjengon ni halak si gijang uhur, anjaha patoruhon-Ku do gijang ni uhur ni halak siunsagakon gogoh.
- ¹² Bahenon-Ku ma jolma jarangan humbani omas pitah, anjaha manisia jarangan humbani omas Opir.
- ¹³ Halani ai dugur ma langit anjaha tanoh on mosor humbani iananni, halani gila ni Jahowa Zebaot bani panorang paragajag ni ringis-Ni.
- ¹⁴ Jadi songon ursa na binuru, anjaha songon biribiri na so marpahaman, mulak ganup sidea bani bangsani anjaha maporus ganup hu nagorini.

- ¹⁵ Sagala na dapot ai itiham, anjaha sagala na tartangkap ai matei ibahen podang.
- ¹⁶ Irosaki do dakdanak ni sidea ididah matani, hona rampas rumah ni sidea, anjaha na binuat ni sidea ibutaki.
- ¹⁷ Tonggor ma, pajujuon-Ku ma halak Madai mangimbang sidea, na so impolan bani pirak anjaha na so mangkamegahkon omas.
- ¹⁸ Raseihonon ni sior ni sidea do garama-garama, seng holong uhur ni sidea bani boras ni boltok, anjaha seng ihargai panonggor ni sidea dakdanak.
- ¹⁹ Anjaha masa ma bani Babel, bungaran ni harajaon-harajaon, hamegahon ampa hamuliaon bani halak Kasdim, songon na masa bani Sodom ampa Gomora, sanggah na ibalikkon Naibata ai.
- ²⁰ Seng be iankonon ai lalab atap hundulan ai marsundut-sundut; seng dong be halak Arab na marlampolampo ijai, anjaha parmahan seng be marlampolampo ijai.
- ²¹ Tapi binatang na i halimisan do manggompang ijai, anjaha langkupa manggoki rumah ni sidea; marianan do ijai burung unta, anjaha manortori do ijai setan-setan.
- ²² Baliang harangan do markaing-kaing bani lopou ni sidea, anjaha sorigala i rumah

bolon ni sidea. Dohor ma roh panorangni,
anjaha seng be paganjangon ari-arini.

Doding Hamegahon Pasal Pardabuh ni Raja Babel

14 ¹ Tongon, marpangulaki do uhur ni Jahowa bani Jakob, anjaha ulakan-Ni mamilih Israel, anjaha pasuangon-Ni sidea hu tanoh ni sidea. Halak panginsolat mangirikkon laho padomu dirini bani ginompar ni si Jakob.

² Anjaha boanon ni sidea ma bangsa-bangsa hubani ianan ni sidea, anjaha ginompar ni Israel ma simada sidea i tanoh ni Jahowa, laho mambahen gabe jabolon dalahi ampa jabolon naboru; sidea do na manahan si partaban ni sidea hinan, anjaha sidea manrajai na mangodoh-odoh sidea hinan.

³ Jadi masa ma bani ari pinasonang ni Jahowa ho, humbani hangalutonmu ampa humbani hasunsahanmu ampa humbani horja rodi na borat, na pinarjabolon ai ho ibagas ai,

⁴ jadi luarhononmu ma salig-salig on dompak raja ni Babel, hatahononmu ma, “Ee! Domma bois si pangodoh-odoh, maronti pangarsik-arsikon!”

⁵ Domma iponggolhon Jahowa tungkot ni parjahat, simambu ni parrajai,

⁶ na mambogbog bangsa-bangsa ibagas gila-Ni, marhitei bogbog-bogbog na so marnamangadi, na manrojati bangsa-bangsa

ibagas ringis-Ni, marhitei rojat-rojat na so maralang-alang.

- ⁷ Sonang anjaha mardamei-damei ma sab tanoh on, mariah marolob-olob ma sidea.
- ⁸ Age hayu tusam marmalas ni uhur do pasal ho, sonai hayu ares na i Libanon, nini, “Dobkonsi na gadab in ho, seng dong be na tangkog laho marroboh hanami.
- ⁹ Guyu do nagori toruh halani ho laho mangalalo parrohmu; ipuhoi do na dob matei manjalo ho, ipahehe do humbani hotak ni sidea sagala raja ni parbegu.”
- ¹⁰ Ganup sidea marsahap, mangkatahon bani, “Ho pe galek do songon hanami! Gabe doskon hanami do age ho!
- ¹¹ Ipaturun do hamegahonmu hu nagori toruh, hinariah ni husapimu; na masik-masik do podomanmu i toruh, anjaha goya do panrungkubmu.
- ¹² Sonaha do pardabuhmu hun langit, ale bintang parkawas, anak ni buha siang ari! Irobob do ho, marumbak hu tanoh, ho si taluhon bangsa-bangsa!
- ¹³ Ia ho, nim do ibagas uhurmu, ‘Sihol do ahu naik hu langit; i babou ni bintang ni Naibata do pagijangonku paratasku; sihol do ahu hundul i dolog partumpuan, hampit utara sahalian.’

- ¹⁴ Sihol do ahu naik mangatasi hambun, sihol doskon Sitimbulan in do ahu.
- ¹⁵ Hape hu nagori toruh do ho ipatuad, hu luhung tang sibagasan.
- ¹⁶ Halak na mangidah ho, mannonoi ho, anjaha marpingkir pasal ho: Ai on do hape halak na mambahen gobir dunia on, na mandugur harajaon-harajaon,
- ¹⁷ na mambahen dunia on gabe halimisan, na parsedahon huta-hutani, anjaha na so mambere mulak halak na tartaban?
- ¹⁸ Sagala raja-raja ni bangsa parbegu, ganup do tibal marhasangapon, ibagas jeratni bei,
- ¹⁹ tapi anggo ho ibuangkon do, daoh hambani tanomanmu, songon dangkah na hinagigihon, nirungkub ni buei halak na rasei, na hona tikam ibahen podang, na tuad hu godung na nirungkub bani batu, songon bangkei na nirojatan.
- ²⁰ Seng rap pakon sidea ho bani na tartanom ho, halani na dob iparseda ho tanohmu, ibunuh ho bangsamu. Seng be sitarsingatan ronsi sadokah ni dokahni ginompar ni parjahat.
- ²¹ Pasirsir hanima ma bani anakni panayatan halani hasalahan ni bapani; ase ulang mulgap be sidea laho mambuat tanoh in, anjaha igoki sisik ni dunia on bani huta-huta.

²² Sihol do Ahu hehe mangimbang sidea, nini Jahowa Zebaot, anjaha sihol do masabkonon-Ku hun Babel goran ampa teba-teba, tumbor ampa tunas, ihatahon Jahowa.

²³ Bahenon-Ku ma ai gabe parbagianan ni tanggiling ampa tanoh rawang-rawang, anjaha sapuon-Ku ma ai marhitei sapu-sapu hasedaon, nini Jahowa Zebaot.

Bulawan ni Jahowa Mangimbang Assur

²⁴ Domma pala marbulawan Jahowa Zebaot, nini, “Tongon, songon na Husurahon, sonai do saud, anjaha songon na Hupingkiri sonai do jadi,

²⁵ ai ma sihol ropukon-Ku do Assur i tanoh-Ku, anjaha rojaton-Ku do i atas ni dolog-dolog-Ku, ase tanggal pasanganni humbani sidea, anjaha mosor na pinaporsankonni humbani abarani.

²⁶ Ai ma ranggian na dob iranggihon pasal ganup tanoh in, anjaha ai ma na pinagostong dompak ganup bangsa-bangsa.

²⁷ Ai Jahowa Zebaot do na manranggihon, ise ma na manlangkon ai? Anjaha tangan-Ni na gostong ai, ise ma na manulak ai?

Uhum na Nilumbahon bani Halak Palistim

²⁸ Bani tahun parmateri ni Raja Ahas roh ma pangungkabon on:

²⁹ Ulang ma malas uhumu, ale tanoh Palistim, hanima haganup, halani maponggol tungkot na manlonsing ho; ai humbani urat ni ulog ai luar do upar, anjaha buahni gabe naga na habang.

³⁰ Jumpahan sampalan do bani dolog-Ku halak na masombuh, anjaha halak na musil marsonang-sonang marianan, tapi anggo ginomparmu bunuhon-Ku do marhitei lohei, anjaha simasimamu raseihonon-Ku do.

³¹ Mandoruh ma ale horbangan, mandorak ma ale huta, gobir-gobir ma, ale tanoh Palistim, hanima ganup! Ai roh do timus hun utara, seng dong na pinjil humbani barisanni.

³² Naha ma parsampang bani suruhan ni bangsa parbegu in? Jahowa do na pajonam Sion, anjaha hujai marhaporusan na sombuh ni bangsa-Ni.

Lumba-lumba Pasal Parseda ni Moab

15 ¹ Pangungkabon pasal Moab: Tongon, ibagas saborngin do iparseda Ar-Moab anjaha iboiskon; tongon, ibagas saborngin do iparseda Kir-Moab anjaha iboiskon!

- ² Tangkog do boru Dibon hu dolog panombahan, doruh-doruh; itangisi Moab do huta Nebo ampa Medeba. Palpalon do ganup ulu, anjaha isuhur jambek ganup.
- ³ Marhiou guni do sidea mardalani i alaman; i atas tayub ampa i alaman, tangis-tangis do sidea ganup, marsuhap-suhap iluh.
- ⁴ Doruh-doruh do Hesbon ampa Eleale, das hu Jahas tarbogei sora ni sidea; halani ai mandoraki do bala ni Moab, gobir tonduyni ibagas.
- ⁵ Doruh-doruh do uhur-Hu halani Moab; pangungsi ni sidea das do hu Soar, hu Eglat-Selisia; tongon, bani tangkogan Luhit tangis-tangis do sidea manangkogi ai; tongon, bani dalan hu Horonaim doruh-doruh do sidea mardingat hasedaon.
- ⁶ Tongon, bah na hun Nimrim domma halong, poyon-poyon melus, suan-suanan bois, lowoh-lowoh seng dong be.
- ⁷ Ai do ase iusung sidea pansarian na gok ai ampa na pinahumpul-humpul ni sidea mandipari Bah Arabah.
- ⁸ Tongon, sar do tangis-tangis ai hu sab tanoh Moab, das do hu Eglaim doruh-doruh ai, das do hu Beerelim.
- ⁹ Tongon, gok daroh do Bah Dimon, tongon, lobih ni ai ope bahenon-Ku bani Dimon; na

maluah hun Moab panganon ni singa do,
ronsi teba-teba ni tanoh ai.

Lumba-lumba Pasal Parseda ni Moab (sambatni)

- 16** ¹ Tongos hanima ma guguan na bani raja,
ai ma biribiri, hun huta Sela mamontas
halimisan hu dolog ni boru Sion.
- ² Songon manuk-manuk na margepor-gepor, na
niusir hambani asarni, sonai do boru Moab
bani pandiparan Arnon.
- ³ Bere nasiam podah, bahen haputusan, bahen
linggommou songon borngin sanggah siang
ni ari; ponopkon nasiam na pinardakdak,
ulang tahihon na maporus,
- ⁴ tondok bani nasiam ma halak na merap hun
Moab, nasiam ma haporusan ni sidea
hambani sipangagou. Anggo seng ijin be
halak sipangodoh-odoh, anjaha maronti ma
hasedaon, anjaha misir sipanrojati hambani
tanoh in,
- ⁵ jadi patotapon ma sada hotak marhitei idop
ni uhur, anjaha hundul ma i atas ni ibagas
hasintongan bani lampolampo ni si Daud
sada panguhum na mangkargai uhum,
anjaha na hinsah mandalankon hapintoron.
- ⁶ Domma ibogei hanami pasal gijang ni
uhur ni Moab, sumbang tumang, pasal
pangenjengonni, pasal hatonalonni, pasal

pangunsagahni ampa sahap-sahapni na lumei.

- ⁷ Halani ai tangis ma Moab, ganup ma manangisi Moab; tangis ma hanima halani ruti na markismis na hun Kirharet, sosombopon tumang.
- ⁸ Ai ladang ni Hesbon domma maseda, ampa hayu anggur na i Sibma; raja-raja ni parbegu do marropuki ranting-rantingni; das do ai hu Jaeser, manjuluk i halimisan mangumparpar do ranting-rantingni pala mandipari laut.
- ⁹ Halani ai tangis ma ahu rap pakon par Jaeser, ampa halani hayu anggur ni Sibma; bonsot ma ho hubahen marhitei iluhku, ale Hesbon ampa Eleale, ai domma mangonai surak-surak ni munsuh bani pariamamu ampa buahmu.
- ¹⁰ Anjaha hona buat do malas ni uhur ampa olob-olob hun tongah juma, i pohon anggur seng dong be na marmegah-megah, seng dong na marsurak-surak, seng dong na marhorja ibagas kilang anggur; domma hupasoh surak-surak malas ni uhur.
- ¹¹ Halani ai tangis do tonduyhu songon husapi halani Moab, anjaha uhuru ibagas halani Kir-Heres.
- ¹² Jadi age pe ipataridahkon anjaha ilojai Moab dirini bani buntu-buntu panombahan,

anjaha masuk ia hubagas rumah
panumbahanni laho martonggo, lang
dapotan ia.

¹³ Ai ma hata nilumbahon ni Jahowa dompak Moab
ijia.

¹⁴ Tapi sonari sonon do nini Jahowa, “Ibagas tolu
tahun on, romban hubani tahun ni halak upahan,
sipahirion ma hasangapon ni Moab rap pakon
hariahonni ganup, anjaha simasimani otik tumang
mando anjaha galek.”

Pasal Parseda ni Damaskus ampa Harajaon Israel

17 ¹ Pangungkabon pasal Damaskus, “Tonggor
ma, masabkononkon do Damaskus, ase
ulang be kota ai, gabe timbunan batu ma ai.

² Tarulang ma huta-huta ni Aroer, gabe ianan ni
pinahan-pinahan ma ai, panggompangan
bani sidea anjaha ise pe lang be na
mangkirjati sidea.

³ Masab ma benteng-benteng hun Efraim ampa
harajaon hun Damaskus; anjaha teba-teba
ni Aram gabe songon hamuliaon ni Israel
ma, nini Jahowa Zebaot.

⁴ Bani ari ai sipaoruon do hamuliaon ni Jakob,
anjaha dagingni na mombur ai pamerungon
do.

⁵ Sonon ma parjadini, songon panabi na
manjormak gandum sisabion anjaha

tanganni manabi buyurni, songon halak na manjomputi buyur i pamah Repairim.

⁶ Tapi dong ope tading turiangni, songon sanggah na mandugur hayu jetun, dua atap tolu daoh i atas, ompat atap lima bani dangkahni, sonai do nini Jahowa, Naibata, pasal Israel.

⁷ Bani ari ai kawahkonon ni jolma in ma na manompasi, anjaha matani mangidah Na Pansing ni Israel.

⁸ Seng be kawahkononni anjapanjap na tinukangan ni tanganni, anjaha na pinauli ni jari-jarini seng be tataponni, ai ma Asera atap gana-ganani mata ni ari.

⁹ Bani ari ai huta na pinatoguhnima ai doskon ianan na tinadingkon ni halak Hefi pakon halak Amori ma ai, ai ma na tinadingkon ni sidea, sanggah maporus i lobei ni halak Israel, gabe tarulang.

¹⁰ Ai ihalupahon ho do Naibata ni haluahonmu, anjaha dolog batu ni hagogohonmu lang idingat ho. Halani ai age ipungkah ho pohon na jenges anjaha isuan ho hujai ranting ni hayu anggur humbani nagori na legan,

¹¹ bani ari isuan ho ai, boi tubuh ibahen ho, anjaha sogod sanggah itidahkon ho ai, marbunga ibahen ho -- tapi magou do pariama ai bani panorang sitaronon ampa pusok ni uhur na so tartambari.”

Partalu ni Assur Ibahen Jahowa

- ¹² Bursik ma! Hageoron ni bangsa-bangsa na buei in, na geor songon pargeor ni laut, pargilumbang ni hajolmaon, na marhasak songon bah marbanggal.
- ¹³ Songon pardorom ni bah marbanggal do pardorom ni bangsa-bangsa, tapi mangonai hata do la bani sidea, gabe maporus ma sidea daoh, mapurpur songon lamlam i buntu-buntu niombus ni logou, anjaha songon orbuk na habang binahen ni halisungsung.
- ¹⁴ Bodari-bodari, tonggor ma, songgot-songgot! Paima siang ari, seng ijin be! Ai ma rupei ni halak na manaban hita ampa parbagianan ni halak na manrampas hita.

Panjahaion Pasal Etiopia

- 18** ¹ Bursik ma tanoh, na gok parngongos na habang, na i dipar ni Bah Kus,
- ² na paingkat suruhanni hun Bah Nil, bani solu hotang mamontas bah! Bingkat ma hanima, ale suruhan na hinsah, bani bangsa parangkula na bolon anjaha na lemes, bani bangsa na hinabiaran ni halak na dohor ampa na daoh, bani sada bangsa na gogoh

anjaha sipartaban, partanoh na binontas ni bah bangga.

³ Hanima haganup pangisi ni dunia on, hanima na marianan i tanoh on, anggo ipajongjong mandera partanda i atas dolog, kawahkon hanima ma ai, anjaha anggo isompul tarompit tangihon hanima ai!

⁴ Ai sonon do hata ni Jahowa hu bangku, “Sipsip do Ahu manorih-norih humbani ianan-Ku, songon milas ni ari bani pardeteng ni mata ni ari, songon hambun na borat musim pariama.

⁵ Tongon, paima pariama, dob salpu panorang marbunga, lape matoras buahni, rotaponni ma dangkahni marhitei pisou pamotong anjaha tagilonni ma ranting-rantingni.

⁶ Tadingkonon ni sidea ma ai ganup bani manuk-manuk panoroh na i dolog ampa bani binatang na i tanoh in. Manuk-manuk panoroh do marianan ijai musim milas, anjaha binatang na i tanoh in do marianan ijai musim borgoh.

⁷ Bani panorang ai marrohan ma sibere-bere bani Jahowa Zebaot, humbani bangsa parangkula na bolon anjaha na lemes, bangsa na hinabiaran ni halak na dohor ampa na daoh, bangsa na gogoh anjaha si partaban, partanoh na binontas ni bah

banggal, hu Dolog Sion, ianan ni goran ni Jahowa Zebaot.”

Panjahaion Pasal Masir

- 19** ¹ Pangungkabon pasal Masir. Tonggor ma, margareta bani hambun na doras do Jahowa, anjaha das ma la hu Masir. Jadi hitir ma si sombah-sombahon ni Masir i lobei-Ni, anjaha malala uhur ni halak Masir ibagas.
- ² Pajobuon-Ku do Masir dampak Masir, ase sidea marsimunsuhan samah sidea sanina dampak sanina, hasoman dampak hasoman, huta dampak huta, harajaon dampak harajaon.
- ³ Sipalumbaon do tonduy ni halak Masir ibagas anjaha georon-Ku do riah ni sidea; jadi sungkun-sungkun ma sidea bani si sombahon ni sidea, ampa bani datu ni sidea, bani paniaran ampa si partondung.
- ⁴ Anjaha ondoskonon-Ku do Masir hubagas tangan ni pamarentah na mabisang anjaha raja na koras parrajai bani sidea, nini Tuhan Jahowa Zebaot.
- ⁵ Horah ma bah na bani Nil, marsik anjaha horing ma bah mardalan.
- ⁶ Marbau ma bah hurakan, lambin damok anjaha horah ma bah ni Masir, arung-arung pakon tolong melus.

- ⁷ Sampalan na bani Bah Nil, poyon-poyon na i topi ni ampa haganup bonih na sinabur ijai, melus ma, ihabangkon logou gabe seng dong be.
- ⁸ Marhoru ma si pardengke anjaha marhoih sagala si pangkail i Bah Nil; anjaha halak si parjala bani bah ai mangorong.
- ⁹ Jut do uhur ni halak si horjahon tali rami, anjaha marposi bohi ni si palemes tali rami ampa si partonun.
- ¹⁰ Marumbak do basikah ni tanoh ai, anjaha sagala si pangan gaji marhoru.
- ¹¹ Lontong tumang do gamot-gamot na i Soan, ai ma panuturi na pentar bani Parao, bodoh do pangajarini. Ija ma boi tarluarhon hanima bani Parao: Anak ni na maruhur do ahu, anjaha anak ni raja humbani sapari.
- ¹² Ija do siparuhurnima ai? Ipatugah ma bannima anjaha ipabotohkon ma, atap aha do ranggian ni Jahowa Zebaot bani Masir!
- ¹³ Gabe na oto do gamot-gamot na i Soan, anjaha hona oto-otoan na sangap-sangap na hun Nop; kahou do Masir ibahen kopala ni marga-marga.
- ¹⁴ Iuseihon Jahowa do tonduy hakahouon hubagas uhur ni sidea, gabe ipakahou sidea do Masir bani sagala pambahenanni songon si parmabuk na margulu bani utah-utahni.

¹⁵ Gabe seng manjadi horja na hinorjahon i Masir, marhitei ulu atap ihur, marhitei dangkah ni palem atap arung-arung.

¹⁶ Bani panorang ai gabe doskon inang-inang ma halak Masir, gobir anjaha hitir bani tangan ni Jahowa Zebaot, na niondamkon-Ni dompak sidea.

¹⁷ Gabe songgot-songgot ma tanoh Juda bani Masir; anggo itarsingati ai bani, gobir ma ia halani ranggian ni Jahowa, na niranggihon-Ni dompak sidea.

¹⁸ Bani ari ai dong ma lima huta i Masir, na mansahapkon sahap Kanaan anjaha na marbulawan hubani Jahowa Zebaot. Ir-Heres do goran ni sada humbani huta ai.

¹⁹ Bani ari ai dong ma anjapanjap bani Jahowa i tongah-tongah ni tanoh Masir ampa tiang pardingatan bani Jahowa dohorhon parbaloganni.

²⁰ Gabe tanda ampa saksi ma ai bani Jahowa Zebaot i tanoh Masir; anggo doruh-doruh sidea bani Jahowa halani si pangodoh-odoh, jadi tongoson-Ni ma bani sidea sipaluah, anjaha la do marporang laho paluahkon sidea.

²¹ Jadi patandahonon ni Jahowa ma diri-Ni bani halak Masir, anjaha tandaon ni halak Masir ma Jahowa bani ari ai; galangkonon ni sidea ma galangan sisayaton ampa galangan sipanganon, anjaha marbagah-bagah ma sidea bani Jahowa, anjaha suhunan ni sidea do ai.

²² Lonsingon ni Jahowa do Masir, ilonsing tapi itambari; mulak do sidea bani Jahowa, marpangulaki do uhur-Ni bani sidea, anjaha pamalumon-Ni do sidea.

²³ Bani ari ai dong ma pasar hun Masir hu Assur; roh ma Assur hu Masir anjaha Masir hu Assur, rap manambah ma Masir pakon Assur bani Jahowa.

²⁴ Bani ari ai gabe patoluhon ma Israel i lambung ni Masir pakon Assur, jadi pasu-pasu i tongah-tongah ni tanoh on,

²⁵ na pinasu-pasu ni Jahowa Zebaot, nini, “Pinasu-pasu ma Masir, bangsang-Ku, ampa Assur, jadi-jadian ni tangan-Ku, ampa Israel parbagianan-Ku.”

Partalanjangon ni si Jesaya, Tuduh-tuduh dompak na Laho Masa bani Masir ampa Etiopia

20 ¹ Bani tahun parroh ni Tartan hu Asdod, na sinuruh ni si Sargon, raja ni Assur, na mamorang huta Asdod anjaha na patundukkon ai, ² bani panorang ai ma marsahap Jahowa marhitei si Jesaya, anak ni si Amos nini ma, “Laho ma ho, tanggali ma baju guni in humbani binongeimu ampa sipatumin humbani naheimu!” Jadi ibahen ma sonai, mardalan ma ia talanjang anjaha seng marsipatu.

³ Nini Jahowa ma, “Songon juakjuak-Ku si Jesaya, mardalan talanjang anjaha seng marsipatu tolu

tahun dokahni gabe tanda ampa tuduh-tuduh
dompok Masir ampa Etiopia,
⁴ sonai ma boanon ni Raja Assur halak na tartaban
hun Masir ampa halak na tarbuang hun Etiopia,
na maposo ampa na matua, talanjang anjaha seng
marsipatu, sae-sae hundulanni, gabe habadoron
bani halak Masir.

⁵ Jadi tarsonggot ma sidea anjaha maila halani
Etiopia hatengeran ni uhurni, ampa halani Masir
na pinangunsagakon ni sidea.

⁶ Anjaha halak na marianan i topi laut, hatahononni
ma bani ari ai, ‘Tonggor ma, sonon do hape na
masa bani jolma hatengeran ni uhurta ampa
haporusanta, andohar iurupi anjaha ipaluah hita
humbani raja ni Assur! Sonaha ma tarbahen hita
maluah?’”

Panjahaion Pasal Partalu ni Babel

21 ¹ Pangungkabon pasal halimisan laut.
Songon halisungsung na marpuyuh-puyuh
i tanoh dangsina, sonai do parrohni hun
halimisan, hambani tanoh na majangin.

² Pangungkabon na parah do ipatalar bangku,
“Sipanamun manamun, sipanaban
manaban. Tangkog ho, ale Elam! Hubu
ma, ale Madai! Ganup hoih-hoih
parontihononku do!

- ³ Halani ai gok do binongei hu bani na maborit, pangarouon do mandorab ahu, songon pangarouon ni parinangon na sihol tubuhan tuah; mangirput do ahu manangar ai, malitonduy mangidahsi.
- ⁴ Minggot do huahap, hitir-hitir ibahen songgotni; panorang bodari na huharosuhkon, gabe hagobiron do bangku.”
- ⁵ Ipasirsir sidea do sipanganon bani meja, iamparhon parmadani, mangan minum sidea. Hehe ma, ale raja-raja! Minaki gantar!
- ⁶ Ai sonon do hata ni Tuhan bangku, “Lao ho, suruh parjaga marjaga, na nididahni hatahon ipatugah!
- ⁷ Anggo ididah sipangajak hudu na marpasangan siajak halode, siajak unta, pangkei ma itangihon ai, pangkei tumang.
- ⁸ Jadi idilohon ma, ‘Bani panungkir-nungkiran do ahu jongjong, Ham Tuhan, tongtong ari-ari, anjaha bani parjagaanku do ahu jongjong ganup borngin.’
- ⁹ Anjaha, tonggor ma, andon roh sipangajak, hudu na pinasang! Jadi ibalosi, itaurhon ma, ‘Domma talu, domma talu Babel, anjaha sagala gana-gana sisombahon ni sidea domma irosaki hu tanoh.’
- ¹⁰ Ale bangsangku, na nidogei-dogei anjaha na nirojatan, na hubogei humbani Jahowa

Zebaot, Naibata ni Israel, ai do hubaritahon bani nasiam.”

Panjahaion Pasal Edom

- ¹¹ Pangungkabon Pasal Duma. Dong do na dilo-dilo bangku hun Seir, “Ale parjaga, sonaha ma nuan borngin? Ale parjaga, sonaha ma nuan borngin?”
- ¹² Nini siparjaga, ‘Laho siang ma ari, tapi homa na roh ma borngin.’ Anggo sihol manungkun ope nasiam, roh ma nasiam use laho manungkun.”

Panjahaion Pasal Arab

- ¹³ Pangungkabon Pasal Arab. Bani harangan ni Arab ma nasiam marborngin, ale partiga-tiga ni Dedan.
- ¹⁴ Jumpahkon nasiam ma halak na horahan, boan nasiam bah, ale parnagori Tema. Bere nasiam ma ruti bani halak na maporus.
- ¹⁵ Ai maporus do sidea humbani podang, humbani podang na sinintak, ampa humbani sior na gistang ampa humbani jobu ni parporangan.
- ¹⁶ Ai sonon do ihatahon Tuhan hu bangku, “Ibagas satahun nari, domu hubani tahun ni anak gajian, jadi bois ma ganup hamuliaon ni Kedar.

¹⁷ Anjaha na teba humbani bilangan ni puanglima siparsior humbani halak Kedar lambin otikni ma, tongon, Jahowa Naibata ni Israel do na mangkatahon ai.”

Uhum na Mangonai bani Jerusalem halani Hampung ni Uhurni

22 ¹ Pangungkabon Pasal Pamah Panonggoran.
Mangaha ho, ase naik ho ganup hu atas tayub,

² ho ale huta na gok surak-surak, na ramei anjaha na marmegah-megah? Na matei ma in, sedo niraseihon ni podang ai, anjaha seng matei i parporangan.

³ Haganup pambobaimu rap do maporus, haganup sidea itangkapi seng pala marsior, ganup do dapot humbam rap-rap do isangkuti, age pe domma daoh sidea maporus.

⁴ Halani ai ningku do, “Padaoh hanima pangkawahnima humbangku. Ulang sai inunut hanima mangapohi ahu pasal hasedaon ni boru ni bangsang-Ku.”

⁵ Ai ari hageoron, hasedaon ampa hasonggoton do ipamasa Tuhan Jahowa Zebaot i pamah panonggoran; tembok na mangkaseda ampa doruh-doruh na maraloling das hu dolog.

- ⁶ Ibuha Elam do parpanahan, ipasirsir garetapakon huda; ipataridahkon Kir do gantarni.
- ⁷ Habungan pilihanmu igoki garetaporang, anjaha siajak huda mangurup horbanganmu.
- ⁸ Jadi ibuka halak ma onding-onding ni Juda, anjaha bani ari ai mangkawah ma ho bani sinjata na i rumah tombak,
- ⁹ ampa bani rigat ni huta ni si Daud, anjaha ididah hanima ma sonaha bueini; ipatumpuhanima ma bah hun bani
- ¹⁰ anjaha ibilangi hanima rumah na i Jerusalem, iparseda hanima rumah laho patoguhkon tembok.
- ¹¹ Ipauli hanima do bongbongan i holangkolang ni tembok na dua in, partumpuan ni bah humbani bongbongan hinan. Tapi seng mangkawah hanima dampak na mambahensi, anjaha seng ipardiateihon hanima la na mangadongkon in humbani sapari.
- ¹² Bani ari ai idilohon Tuhan Jahowa Zebaot do, ase tangis anjaha doruh-doruh, ase ipalpali uluni anjaha marhiou guni namin,
- ¹³ tapi tonggor ma, malas ni uhur ampa olob-olob, manayati horbou ampa manambolih biribiri, mangan gulei ampa minum anggur, nini sidea: Mangan minum ma hita, ai patar matei ma hita.

¹⁴ Domma ipatalar Jahowa Zebaot bangku, “Seng sasapon be hajahatonnima on, paima matei hanima, nini Tuhan Jahowa Zebaot.”

Uhum bani si Sebna

¹⁵ Sonon do hata ni Tuhan Jahowa Zebaot, “Laho ma ho mangayaki sijaga arta ai, ai ma si Sebna, kopala ni rumah bolon, anjaha hatahon ma hu bani,

¹⁶ ‘Mangaha ho ijon anjaha ise sitanomonmu ijon, ase ihurak ho tanoman bam ijon, ale na mangkurak tanoman bani ianan na gijang anjaha na manuhil ianan ibagas dolog batu?’

¹⁷ Tonggor ma, sampakkonon ni Jahowa ma ho gogoh-gogoh, ale halak na bisang. Joroton-Ni ma ho poltik-poltik,

¹⁸ parpunukon-Ni ma ho, anjaha gijgkonon-Ni ma ho songon bola hu tanoh na madaoh, daoh tumang. Ijai ma ho matei, anjaha ijai ma gareta hasangaponmu, ho ale sibahen haboron bani rumah ni tuanmu.

¹⁹ Jullakkonon-Ni ma ho humbani hajongjonganmu anjaha humbani hundulanmu dabuhkonon-Ni do ho.”

Bagah-bagah ampa Lumba-lumba bani si Eliakim

²⁰ Bani ari ai diloon-Ku ma juakjuak-Ku si Eliakim, anak ni si Hilkia.

- ²¹ Jadi pakeihonon-Ku ma pakeianmu hu bani, anjaha gonditmu gonditkonon-Ku hu bani; anjaha kuasamu ondoskonon-Ku hubagas tanganni, anjaha ia ma gabe bapa bani par Jerusalem pakon bani ginompar ni Juda.
- ²² Tampeihonon-Ku do anakkuni ni rumah ni si Daud bani abarani; anjaha ia ma mangungkab, seng dong na mangkuni, anjaha ia mangkuni, seng dong na mangungkab.
- ²³ Patotapon-Ku ma ia songon paku bani ianan na toguh, jadi gabe hotak hamuliaon ma ia bani ginompar ni bapani.
- ²⁴ Jadi margantung hu bani ma hajojor ganup ginompar ni bapani, ai ma dangkah pakon tunas, ganup parugas na etek-etek, pinggan ampa bongkor.
- ²⁵ Bani ari ai, nini Tuhan Jahowa Zebaot, mullus ma paku, na dob pinatotap ai bani ianan na toguh, ponggol anjaha madabuh lanjar puntar ma boban na bani ai, tongon, sonai do ihatahon Jahowa.

Panjaiaon Pasal Sidon ampa Tirus

23 ¹ Pangungkabon Pasal Tirus: Mandoruhi ma, ale kapal Tarsis, ai domma iparseda, seng dong rumah-rumah be. Sanggah mulak hun tanoh Kittim (*Cyprus*) tarbogei ai bani sidea.

- ² Sip ma hanima na marianan i topi laut,
partiga-tiga na i Sidon; suruhanmu do
mandipari laut.
- ³ Manlopusi laut bolag do iboban bam gandum
si Sihor ampa pariama ni Nil, ho do gabe
partiga-tiga ni bangsa-bangsa.
- ⁴ Bador ma ho ale Sidon, ai domma marsahap
laut, benteng ni laut in: Seng be mangarou
anak ahu barang mantubuhkon, seng
pagodang-godang anak garama be ahu atap
anak boru.
- ⁵ Bani na das barita ai hu Masir, tarsonggot ma
sidea songon sanggah na mambogei barita
ni Tirus.
- ⁶ Mandipar ma hanima hu Tarsis, mandoruhi ma
hanima, na marianan i topi ni laut!
- ⁷ Ai on do hutanima na maria ai, na tinombei
bani na basaia, parbingkatan nasiam laho
manginsolat bani tanoh na daoh?
- ⁸ Ise do na mansurahon sisonai pasal Tirus,
sibagihon sortali-sortali, saudagarni songon
raja-raja, anjaha partiga-tigani halak
pinarsangapan i tanoh on?
- ⁹ Jahowa Zebaot do na mansurahon ai, laho
pahirihon hasangapon na gok hatoalon,
laho patoruhkon halak na bangga i dunia
on.

- ¹⁰ Ornangi ma tanohmu, songon na bani Bah Nil, ho, ale boru Tarsis; seng dong be kapal.
- ¹¹ Domma ipagostong tangan-Ni hu atas ni laut in, idugur do harajaon-harajaon, domma iparentahkon Jahowa pasal Kanaan, laho masedahon benteng-bentengni.
- ¹² Anjaha ihatahon do, “Seng be marolob-olob ho hu lobeian on, ho, ale boru Sidon, na dob pinadorun. Jongjong ma ho, mandipar ma hu Cyprus! Ijai pe seng anjai sonang ho.
- ¹³ Tonggor ma, tanoh ni halak Kasdim! In ma bangsa ai, sedo Assur, na mambahen Sidon gabe ianan ni sorigala. Ipajongjong sidea do manara pangkubu, iparseda sidea istana-istana, anjaha mareong do ibahen sidea huta ai.
- ¹⁴ Mandoruhi ma, ale kapal Tarsis, ai domma iparseda bentengnima!
- ¹⁵ Bani ari ai, halupahononkon ma Tirus pitu puluh tahun dokahni songon dokah ni ari-ari ni sada raja. Tapi dob salpu na pitu puluh tahun ai, masa ma bani Tirus songon bani doding-doding ni boru jalang.
- ¹⁶ Buat ma husapi, dalani ma huta in, ale boru jalang na dop hinalupahon! Padear ma panggiutmu, pabuei ma dodingmu, ase idingat halak ho use!
- ¹⁷ Ai dob salpu sipitu puluh tahun ai, tohuon ni Jahowa do Tirus, gabe mulak ma ia marupah

boru jalang; marnriah-riahi do ia pakon sagala harajaon na i dunia on, na bani sab tanoh on.

¹⁸ Tapi untungni ampa upahni marboru jalang gabe pinapansing do ai bani Jahowa; seng pahumpulon ai atap ponopkononkon, tapi bani na marianan i lobei ni Jahowa do untungni ai, bahen sipanganon marsulei-sulei ampa pakeian na jenges-jenges.”

24 ¹ Tonggor ma, palumeion anjaha parsedaon ni Jahowa ma tanoh in; pabalikon-Ni ma sisikni anjaha pamerapon-Ni pangisini.

² Gabe doskon simbuei ma malim, doskon juakjuak tuan-tuan; doskon jabolon naboru tuan naboru, doskon sipamboli sipanjual; doskon panraih na paraihkon, anjaha na pautangkon dos pakon siparutang.

³ Lungun tumang do tanoh in anjaha bois hona rampas, ai Jahowa do na mangkatahon hata in.

⁴ Horu anjaha melus do tanoh in; mangeruti anjaha hurleh do dunia on; na banggal-banggal,jolma na i tanoh in lambin galek.

⁵ Anjaha butak do tanoh in ibahen pangisini, ai ilanggar sidea do titah, iparnalang aturan anjaha iosei padan sisadokah ni dokahni.

⁶ Halani ai papa do mambondut tanoh in, anjaha pangisini marsitaronon halani

panlanggaronni; halani ia imosogkon do pangisi ni tanoh in, anjaha otik mando jolma na tading.

- ⁷ Marhoru do anggur, melus hayu anggur, marhoih-koih sagala siparmalas ni uhur.
- ⁸ Mangadi do malas ni uhur binahen ni tambur, maronti surak-surak ni siparolob-olob, marsaran megah ni uhur binahen ni husapi.
- ⁹ Seng be mandoding-doding sidea sanggah minum anggur, siinuman na koras paet do bani na manginumsi.
- ¹⁰ Domma irumbakkon huta na tarulang in, tutup do sagala rumah gabe seng tarmasuki.
- ¹¹ Doruh-doruh halani lang dong anggur tarbogei i alaman, sundut do sagala malas ni uhur, anjaha misir olob-olob na i tanoh in.
- ¹² Hasedaon do tading i huta in, marosak do horbanganni itondoli.
- ¹³ Ai sonon do sihol masa i tanoh in i tongah-tongah ni bangsa-bangsa, songon hayu jetun na nidugur, songon na marturiang dob salpu pariama buah anggur.
- ¹⁴ Anggo sidea ipagogoh ma sorani marolob-olob, halani hamuliaon ni Jahowa marsurak-surak do sidea hun hasundutan.
- ¹⁵ Halani ai pasangap nasiam ma Jahowa, ale parhapoltakan, nasiam na bani pulou-pulou,

puji nasiam ma goran ni Jahowa Naibata ni Israel.

- ¹⁶ Humbani ujung ni tanoh on ibogei hanami do doding puji-pujian: Hasangapon ma bani Parpintor in. Tapi anggo ahu ningku do, “Magou ma ahu, bursik ma ahu!” Halak partahi-tahi mantahihon, tongon mantahihon do halak partahi-tahi.
- ¹⁷ Hagobiron, godung ampa siding do mangonai bam, ale pangisi ni tanoh in!
- ¹⁸ Barang ise na maporus halani sora ni hagobiron, madabuh do hubagas godung, anjaha atap ise na naik humbagas godung hona siding do. Ai domma ibuha jandela ni langit, anjaha idugur onjolan ni tanoh in.
- ¹⁹ Bolah tumang do tanoh in, mangkarigat anjaha dugur.
- ²⁰ Munjei-unjei do tanoh in songon halak na mabuk, mambal-ambal songon gayang-gayang, ai borat do panlanggaronni ai mardondon bani, gabe dabuh ma ia, anjaha seng tarjongjongkansi be.
- ²¹ Bani panorang ai marlulu ma Jahowa bani bala na i atas ai, na i babou, pakon bani raja-raja ni tanoh on, na i atas tanoh on.
- ²² Rap do sidea patumpuon songon halak na tartangkap ibagas godung, tutupon do sidea

hubagas tutupan, anjaha dob piga-piga dokah uhumon do sidea.

- ²³ Jadi maila ma bulan anjaha bador mata ni ari, ai Jahowa Zebaot do Raja i Dolog Sion ampa i Jerusalem, anjaha patalaron-Ni do hamuliaon-Ni, i lobei ni sintua-sintua-Ni.

Doding Puji-pujian bani Jahowa Sipasaud Sura-sura-Ni

- 25** ¹ Ale Jahowa, Ham do Naibatanku; sihol patimbulonku do Ham, sihol pujionku do goran-Mu; ai Ham do sibahen halongangan, sipasaud sura-sura na dob niranggihon humbani sapari ibagas hasintongan ampa habujuron.
- ² Gabe timbunan batu do ibahen Ham huta in, huta na toguh in gabe reong-reong, anjaha istana ni partoloh seng dong be; seng sipaulion be ai lalab.
- ³ Halani ai pasangapon ni bangsa na gogoh ma Ham, anjaha huta ni bangsa na bisang mangkabiari Ham.
- ⁴ Ai Ham do haporusan bani halak na madoyuk, haporusan bani halak na masombuh ibagas hasosakanni, panisioan sanggah haba-haba, parlinggoman sanggah milas ni ari; ai ondandam-ondam ni halak sipangodoh-odoh

doskon haba-haba do sanggah musim
borgoh,

- ⁵ doskon milas ni ari bani ianan na horah.
Ipaminop Ham do halutuon ni partoloh,
songon na milas nirungkub ni hambun;
olob-olob ni sipangodoh-odoh ipasip Ham
do.

Pesta Bolon na i Atas Dolog

- ⁶ Jadi bahenon ni Jahowa Zebaot ma bani sagala
bangsa i atas dolog on sada pesta na gok
sipanganon na mataboh, sada pesta na gok
anggur madokah, na gok sipanganon na
mataboh ampa utok-utok, na gok anggur na
madokah anjaha na pitah.
- ⁷ Anjaha pasision-Ni ma i atas dolog on
parrungkub na nirungkubkon bani sagala
bangsa ampa panutup na tinutupkon bani
ganup bangsa parbegu.
- ⁸ Boiskonon-Ni do hamatean ronsi sadokah ni
dokahni, anjaha apusan ni Tuhan Jahowa
do iluh hambani sagala bohi, anjaha
padaohon-Ni do habadoron ni bangsa-Ni
hun sab tanoh on; tongon Jahowa do
mangkatahon in.

Doding Olob-olob halani Pangurupion ni Jahowa

- ⁹ Jadi hatahonon ni halak ma bani ari ai,
 “Tonggor ma, on do Naibatanta, na niarapkonta laho mangurupi hita. On do Jahowa, na niarapkonta! Marolob-olob anjaha marmalas ni uhur ma hita halani pangurupion-Ni.
- ¹⁰ Tongon, tampei do tangan ni Jahowa i atas dolog on, tapi sidogeian do anggo Moab bani iananni songon anggala sidogeian ibagas godung parhubungan.
- ¹¹ Age pe ipaherbang tanganni ibagas ai songon parlanguy na paherbang tanganni marlanguy, tapi patoruhon ni Jahowa do hagijangonni rap pakon hapandeian ni tanganni.
- ¹² Anjaha batar-batar ni tembokni na gijang ai patoruhon-Ni do ai, ondunon-Ni, sampakkonon-Ni hu tanoh, hubagas orbuk.”

Doding Mangkamalaskon Huta na Niadongkon ni Naibata

26 ¹ Bani ari ai dodingkononkon ma doding on i tanoh Juda: Dong do huta na toguh banta, haluahon do ibahen songon tembokni ampa batar-batarni.

- ² Buhai nasiam ma horbangan, ase bongkot bangsa parpintor, na manjolom habujuron.
- ³ Ipatotap Ham do damei bani uhur na marramotkon damei, tongon Bamu do ai marhatengeran.
- ⁴ Martenger ni uhur ma nasiam tongtong bani Jahowa, dolog batu sisadokah ni dokahni do Tuhan Jahowa.
- ⁵ Tongon, ipatoruh do na marianan bani na gijang, bani huta na tinggi. londun do ai, iondun hu tanoh, isampakkon hubagas orbuk.
- ⁶ Dogei-dogeion ni nahei ma ai, nahei ni halak na madorun, langkah-langkah ni halak na masombuh.

Panramotion ni Naibata bani Bangsa-Ni ibagas Uhum na Mangonai Tanoh on

- ⁷ Pintor do dalan ni halak parpintor, hornop do ibahen Ham dalan ni halak parpintor.
- ⁸ Age bani panguhumion-Mu, ale Jahowa, Ham do iarapkon hanami, goran-Mu ampa pardingat Bamu do na hinasiholhon ni tonduynami.
- ⁹ Siholan do tonduyhu Bamu borngin, tonduyhu pe ibagas ahu Ham do tongon ipindahi. Ai anggo ihonai uhum-Mu tanoh on, mintor

mangguruhon hapintoron do pangisi ni dunia on.

- ¹⁰ Jumpahan idop ni uhur pe halak parjahat, seng iguruhon hapintoron, i tanoh ni halak parpintor pe mambahen hajahaton do ia, seng ididah uhurni hatunggungan ni Jahowa.
- ¹¹ Ham Jahowa, timbul do tangan-Mu, tapi seng ididah sidea in; idahon ni sidea ma ai gabe tarbador; pongut ni uhur bani bangsa-Mu ampa apuy sipangan imbang-Mu do mamboiskon sidea.
- ¹² Ale Jahowa, Ham do sibere damei bennami, ai Ham do na mambahen saud sagala pambahenannami.
- ¹³ Ham Jahowa Naibatanami, onggga do irajai tuan-tuan, legan ni Ham hanami, tapi Ham tumang, goran-Mu do idingat hanami.
- ¹⁴ Na matei, seng mulak manggoluh, halinoh seng mulak puho; halani ai do ase marlulu Ham laho mamboiskon sidea, anjaha isasap Ham do ganup pardingatan bani sidea.
- ¹⁵ Itambahi Ham do bangsa in, Ham Jahowa, itambahi Ham do bangsa in; ipatimbul Ham do diri-Mu; ipabolag Ham do parbalogan ni tanoh in.

- ¹⁶ Ham Jahowa, ipindahi sidea do Ham sanggah tarsosak; doruh-doruh do sidea sanggah mangonai ajar-Mu bani sidea.
- ¹⁷ Songon naboru na boratan rumah, na dohor sihol mantubuhkan tuah, na mandodoruh halani mangarou, sonai do hanami halani Ham, ale Jahowa.
- ¹⁸ Boratan rumah do hanami, mangarou do hanami, doskon na mantubuhkan logou do hanami. Haluahon seng tarparoh hanami bani nagori in, anjaha seng dong tubuh siiankon tanoh on.
- ¹⁹ Manggoluh do use na matei-Mu, puho do use bangkei ni sidea. Puho ma anjaha marolob-olob ma, nasiam na marianan ibagas orbuk. Ai namur haliharon do namur-Mu, anjaha padaraton ni tanoh in do use na matei.
- ²⁰ Roh ma, ale bangsanku, masuki ma kamarmu, tutup ma labah i pudimu, ponopkon ma dirimu tongkin paima lopus ringis in.
- ²¹ Ai tonggor ma, luar do Jahowa humbani ianan-Ni, laho manluluhon salah ni halak na mangiankon tanoh on, anjaha patidakkon ni tanoh in ma daroh na madurus bani, anjaha seng rungkubonni na matei tarbunuh i atas ni.

**Parseda ni Parkuasa i Dunia
on ampa Parsuang ni Israel**

- 27** ¹ Bani ari ai, uhumon ni Jahowa ma marhitei podang-Ni na morsik, na banggal anjaha na gogoh ai, Leviatan, ai ma ulog na lingkat ai, Leviatan, ulog na mangarpei ai, bunuhon-Ni ma naga na i laut ai.
- ² Bani ari ai hatahonon ni halak ma, “Pohon anggur na jenges, dodingkon ma in! Ahu, Jahowa do na marramotkon in, tongtong do Husiram in.
- ³ Ase ulang dong na mansedahonsi, Hujaga do in arian pakon borngin.
- ⁴ Gila seng dong Bangku, tapi anggo jumpah Ahu suga-suga barang hupi-hupi pe, marhitei hamunsuhon, dorabon-Ku ma sidea, mosogkonon-Ku sidea rap-rap,
- ⁵ anggo seng marsijoloman sidea bani pangondingon-Ku, ibahen sidea pardameian Bangku, pardameian ibahen sidea Bangku.
- ⁶ Bani panorang na roh marurat ma Jakob, marbunga Israel anjaha martumbor, gokanni ma sab dunia on bani buah.
- ⁷ Ai ipukul Jahowa do Israel songon pamukul-Ni bani imbang ni sidea? Ai ibunuh do sidea songon pamunuh-Ni bani munsuh ni sidea?

- ⁸ Lang! Marhitei na palahohon, na marsuruh misir sidea, iparingorhon Ham sidea; iusir do sidea marhitei logou-Ni na mapor ai bani panorang ni logou hapoltakan.
- ⁹ Halani ai marhitei on do hona sasap dousa ni Jakob, anjaha on do buahni hasasapan ni dousani: Iropuki ganup batu ni anjapanjap songon batu hapur na nilumatan; seng dong be na tading jongjong gana-gana ni Asera ampa tiang panumbahan bani mata ni ari.
- ¹⁰ Ai huta na pinatoguh domma lungun, gabe ianan na tarulang anjaha na tinadingkon songon halimisan; ijai do manggagat lombu, ijai do ia manggompang anjaha igagati ranting-ranting.
- ¹¹ Anggo masak rantingni, iponggoli ma ai; marrohan ma naboru marsobankon ai. Ai bangsa na so maruhur do on; halani ai, la na manompa sidea seng maridop ni uhur bani sidea, anjaha la na manjadihon sidea, seng marholong ni uhur bani sidea.
- ¹² Bani ari ai, dogeion ni Jahowa ma buyur hun Eprat nari das hu Bah Masir, anjaha patumpuon ma nasiam marsada-sada, ale ginompar ni Israel.
- ¹³ Bani ari ai sompulon ma tarompit na banggal, jadi mulak ma sidea na magou i nagori Assur ampa sidea na nierap hu Masir, roh

marsombah bani Jahowa i dolog na ma pansing i Jerusalem.”

Uhum na Mangonai bani Samaria, Huta Pamatang ni Harajaon Parutara ai

28 ¹ Bursik ma sortali hajengeson ni halak na mabuk i Efraim, ampa hameluson ni bunga ni hasangaponni na jagar ai, ai ma na bani ulu ni pamah na lambutan, ianan ni halak na mabuk binahen ni anggur.

² Tonggor ma, dong do sada na margogoh ampa na markuasa bani Tuhan; songon udan na marambolas do ai, songon halisungsung na mandedahon, songon udan na manalosou, bah na marbanggal, na manimpalhon hu tanoh gogoh-gogoh.

³ Marhitei nahei do lotlotanni sortali hagijangon ni halak na mabuk i Efraim,

⁴ ampa hameluson ni bunga ni hasangaponni na jagar ai, ai ma na bani ulu ni pamah na lambutan, songon buah ni hayu ara na parlobei mabei paima musim milas; anggo adong na mangidah ai, mintor ibondut do daskonsi i tanganni.

⁵ Bani ari ai Jahowa Zebaot ma gabe sortali hamuliaon ampa rudang hajengeson bani na tading humbani bangsa-Ni,

⁶ ampa tonduy habonaron bani halak sidabuh uhum, ampa gogoh bani halak na mangusir munsuh hun horbangan.

**Uhum na Mangonai bani Malim-malim
ampa Nabi na i Jerusalem**

⁷ Age halak on, rebad-rebad do ibahen anggur, anjaha mirdong ibahen siinumon na koras; malim ampa nabi rebad-rebad do ibahen siinumon na koras, mabuk ibahen anggur; minggot do sidea halani siinumon na koras, kahou sidea ibagas na manjahai, anjaha mugar-ugar uhurni mandabuh uhum.

⁸ Tongon, ganup do meja gok ibahen utah-utah ni sidea, seng dong ianan na so butak.

⁹ Nini sidea, “Bani ise do sihol ajarhononni habotohon, anjaha bani ise do sihol patorangonni pangungkabon? Bani na baru sirang minum nani, bani na baru ganggang humbani tadahni?”

¹⁰ Lalab titah, lalab aturan, lalab titah, lalab aturan, ijon otik, ijai otik.”

¹¹ Tongon, marhitei halak parsahap na so niarusan ampa parhata na legan do Naibata sihol marsahap bani bangsa on:

¹² Ia na dob mangkatahon bani sidea, “On do parsaranan, palopas marsaran na loja in,

anjaha on do ianan hasonangan.” Tapi seng itangihon sidea.

- ¹³ Jadi mangonai ma bani sidea hata ni Jahowa -- lalab titah, lalab aturan, lalab titah, lalab aturan, ijon otik, ijai otik -- gabe tinggalak ma sidea sanggah mardalan, maripuk hona jarot anjaha tartangkap.
- ¹⁴ Halani ai tangar hanima ma hata ni Jahowa, ale halak sipanrehei, na marrajai bangsa on, na marianan i Jerusalem.
- ¹⁵ Ai ihatahon hanima do, “Domma marpadan hanami pakon hamatean, anjaha domma manriah hanami pakon nagori toruh, paboa anggo roh bah marbanggal, seng anjai das ai bennami; ai domma ibahen hanami haporusannami ladung, anjaha pangoto-otoion ibahen hanami parlingodannami.
- ¹⁶ Halani ai sonon do hata ni Tuhan Jahowa, ‘Tonggor ma, Hupatibal do i Sion sada batu onjolan, sada batu na dob niuji, sada batu parsuhi na maharga, bahen onjolan na totap. Barang ise na porsaya Bani, seng anjai tarbador.’
- ¹⁷ Anjaha bahenon-Ku do habonaron gabe bonang arang, anjaha hapintoron gabe tali dondon; anjaha ayubkonon ni udan

ambolas do haporusan ladung anjaha bah marbanggal do mambaorhon parlingodan,

¹⁸ anjaha masabkononkon do padannima pakon hamatean anjaha seng asi be panriahannima pakon nagori toruh; anggo roh bah marbanggal ai, ropukonni do hanima.

¹⁹ Barang piga hali pe ia roh, luahononni do hanima; tongon, siap sogod do ai roh, arian pakon borngin. Anjaha pitah songgot-songgot do mambahen naarusi pangungkabon.

²⁰ Ai mapondoktu do podoman sihol tibal mangintordang ijai, anjaha sabing hurang bolag parsabingon.

²¹ Ai jongjongkonon ni Jahowa ma songon na bani Dolog Perasim, anjaha gajag ma ringis-Ni songon na i pamah Gibeon, laho pasaudkon horja-Ni, tapi ganjil do horja-Ni -- laho mandobkon lahoan-Ni -- legan humbani na somal do lahoan-Ni!

²² Ai pe, ulang nunut pahiri-hirihon, ase ulang roh poltikni panangkutnima, ai domma hubogei hasedaon humbani Jahowa Zebaot, na dob pinutuskon-Ni bani sab tanoh on."

**Limbaga na Patorangkon Pingkiran
ni Naibata na gok Halongangan ai**

- ²³ Paeleng pinggolmu, tangar sorangku, bogei anjaha tangar ma hatangku!
- ²⁴ Ai ganup ari do paninggala maninggala laho martidah? Ai torus do inunut manangkul pakon manisir tanohni?
- ²⁵ Ai lang sonon do? Dob ipados tanoh ai, ai lang isaburhon ma longa, itidahkon juragi, marbaris isuan gandum, anjaha inahkon jagul bani iananni, anjaha andolei songon balogni ibahen?
- ²⁶ Sonai do ia ipodahi sintong-sintong, Naibatani do mangajarisi.
- ²⁷ Tongon, seng marhitei garetta pardogei idogei halak longa, seng galapang ni garetta ibahen halak mardogei juragi, tapi marhitei tungkot do idogei longa, anjaha juragi marhitei bogbog-bogbog.
- ²⁸ Ai iropuki halak do gandum? Lang, seng paturutonna lotlotan ai lalab. Anggo ipadalan galapang ni garetani ampa hudani hunjai, seng iropuk ai.
- ²⁹ Age ai marharorohan humbani Jahowa Zebaot do, halongangan do sura-sura-Ni, anjaha timbul do hapentaran-Ni.

Hona Hubu Jerusalem, tapi Maluah do

- 29** ¹ Bursik ma ho, ale Ariel, ale Ariel,
ianan parsaranan bani si Daud hinan.
Tambah-tambahi hanima ma tahun pesta in,
sai marpestai ma hanima!
- ² Tapi parohon-Ku do hasosakan bani Ariel, gabe
masa ma doruh-doruh ampa partangison;
gabe doskon Ariel ma ai Bangku.
- ³ Anjaha hubuon-Ku ma ho inggot, sosakon-Ku
ho marhitei hubuan, anjaha bahenon-Ku do
na mangimbang ho.
- ⁴ Jadi unduk ma ho hun tanoh marsahap,
anjaha humbagas orbuk do tarbogei
hatamu; soramu songon sora ni begu-begu
humbagas tanoh, anjaha humbagas orbuk
do sahapmu marhusip-husip bogeion.
- ⁵ Tapi munsuhmu na buei ai gabe songon orbuk
na lumat ma ai, anjaha songon lapa-lapa na
habang ma sipangodoh-odoh na buei ai.
Anjaha sompong, na so panagamon do ai
masa. Jahowa Zebaot do na roh marlulu
- ⁶ marhitei longgur pakon lalou ampa sora
na bangga, marhitei halisungsung
pakon haba-haba ampa gara ni apuy na
mangankon.
- ⁷ Gabe songon nipi, songon panonggoran borngin
ma bangsa-bangsa na buei ai, na marporang

dompok Ariel, haganup na marporang
dompaksi ampa dompok batar-batarni
anjaha na manosaksi.

⁸ Songon halak na loheian, na marnipi ia mangan,
hape dob puho seng sombuh loheini iahap,
barang songon halak na horahan, na marnipi
ia minum, hape dob puho, loja ia anjaha
horahni seng miloh: Sonai do bala ni bangsa
ai, na marporang dompok Dolog Sion.

Hapitungon ni Bangsa ai ampa Pambobaini

⁹ Jonong ma hanima anjaha longang, ulang ma
hanima marpangidah, pitung ma! Mabuk
ma hanima, tapi sedo binahen ni anggur,
rebad-rebad ma hanima, tapi sedo halani
siinumon na koras!

¹⁰ Ai domma iuseihon Jahowa bannima tonduy na
pasinok modom, anjaha itutup matanima,
ai ma nabi-nabi ai, anjaha irungkub do
ulunima, ai ma halak na marpanonggoran
ai.

¹¹ Anjaha ganup pangungkabon ai, gabe songon
hata ni buku na nilak do ai bannima, na binere bani
sada halak na mambotoh mambasa, nini, "Basa
on! Jadi ibalosi, 'Seng tarbahen ahu, ai ilak do in.'

¹² Atap anggo ibere buku ai bani halak na so
mambotoh mambasa, nini, 'Basa on!' Jadi ibalosi,
'Seng hubotoh mambasa surat.'

- ¹³ Jadi ihatahon Tuhan ma, 'Halani ipadohor bangsa on dirini marhitei pamanganni anjaha ipasangap sidea Ahu marhitei bibirni, hape uhurni ganggang do hun Bangku, anjaha biar ni sidea Bangku, domu bani titah-titah ni jolma, na ginuruhon do hansa,
- ¹⁴ halani ai, tonggor ma, halongangan do use bahenon-Ku dampak bangsa on, halongangan botul-botul; jadi magou ma hapentaran ni na pentar-pentarni, anjaha masab hauhuron ni paruhur ni sidea.
- ¹⁵ Bursik ma halak, na mamonopkon sura-surani bagas i lobei ni Jahowa, anjaha na mangkorjahon horjani ibagas hagolapan, na mangkatahon, 'Ise mangidah hanami? Ise mananda hanami?'
- ¹⁶ Ee hanima sipasuhar haganup! Ai doskon sitopa hudon do tanoh liat ai? Atap hatahonon ni jadi-jadian ma dampak na manjadihonsi: Seng ia manjadihon ahu; atap hatahonon ni na ginana ma dampak na mangganasi: Seng dong hapandeianni?"

Habayuon na Banggal ai

- ¹⁷ Ai lang tongkin nari mando ase mubah Libanon gabe juma na lambutan, anjaha juma na lambutan hiraon gabe harangan?

- 18 Bani ari ai, bogeion ni halak na nengel ma hata na tarsurat, anjaha marpangidah ma mata ni halak na mapitung humbani na golap anjaha na lotir.
- 19 Anjaha martambah ma malas ni uhur ni halak na martoruh uhur ibagas Jahowa, anjaha halak na masombuh i tongah-tongah ni jolma marolob-olob do marhitei Na Pansing ni Israel.
- 20 Ai bois ma halak sipangodoh-odoh, magou halak sipanrehei ampa haganup na pasura-sura hajahaton,
- 21 ai ma na papeol uhur i paruhuman, ampa na manidingi halak sidabuh uhur i horbangan, anjaha na mandabuhkan halak parpintor marhitei hasaksian ladung.
- 22 Halani ai sonon do hata ni Jahowa, na paluahkon si Abraham, pasal ginompar ni Jakob, "Seng anjai tarbador be Jakob, seng anjai marposi be bohini.
- 23 Ai anggo ididah sidea jadi-jadian ni tangan-Ku i tongah-tongah ni sidea, papansingon ni sidea ma goran-Ku, papansingon ni sidea ma pakon Na Pansing ni Jakob anjaha habiaran ni sidea Naibata ni Israel.
- 24 Anjaha halak na kahou ibagas partonduyon dapotan uhur pangarusion anjaha siparungut-ungut ra manjalo podah."

**Hona Pinsang Bangsa ai halani
Marhatengeran bani Masir**

- 30** ¹ Bursik ma anak sipanlawan, nini Jahowa, na mambahen sada sura-sura, na so marharorohan hun Bangku, anjaha na mambahen parpadanan, na so marharorohan humbani tonduy-Hu, gabe martambah-tambah dousa ibahen,
- ² na bingkat hu Masir lang palobei marpanungkun bani pamangan-Ku, laho marlingod bani pangondingi ni Parao, laho maporus bani linggom ni Masir.
- ³ Tapi gabe habadoron do bannima pangondingi ni Parao, anjaha parporusnima bani linggom ni Masir gabe hahirion.
- ⁴ Age pe domma i Soan raja ni sidea, anjaha suruhanni das hu Hanes,
- ⁵ ganup do sidea maila marhalanohon ni bangsa na so marguna bani sidea, na so boi mambere pangurupion atap untung, tapi habadoron ampa hahirion do hansa.”
- ⁶ Pangungkabon Pasal Binatang na i Tanoh Dangsina: Mamontas tanoh na gok habiaran ampa hasosakan, tanoh harohan ni singa boru-boru ampa singa tunggal, ulog darih ampa naga na habang, itaruhkon sidea do artani i atas gurung ni halode ampa

ugas-ugasni bani gurung ni unta hubani bangsa na so marguna bani sidea.

⁷ Ai pangurupion ni Masir na lang do ai anjaha sisoya-soya, halani ai do ase hugoran ia: Binatang na soh-soh.

**Uhum bani Bangsa ai halani Mapas ni
Uhurni bani Hata ni Naibata**

⁸ Ai pe, roh ma ho, uhirhon ma ai i lobei ni sidea bani sada lei, anjaha suratkon ma ai bani sada buku, ase gabe saksi ma ai bani panorang na roh ronsi sadokah ni dokahni.

⁹ Ai bangsa sipanlawan do sidea, anak siparladung, anak na so ra manangihon pangajarion ni Jahowa,

¹⁰ sidea na mangkatahon hubani siparalamat, “Ulang maralamat!” hubani nabi, “Ulang ijahai bennami pasal hasintongan, hatahon ma bennami na madear, jahai bennami na sininta ni uhurnami,

¹¹ tadingkon dalan in, lembangi lapang in, ulang be pabogehon bennami pasal Na Pansing ni Israel!”

¹² Halani ai sonon do nini Na Pansing ni Israel, “Halani mapas uhurnima bani hata on, anjaha martenger ni uhur bani pangodoh-odohon ampa haleklukon, anjaha mangunsandei hujai,

- ¹³ halani ai mangonai ma bannima hajahaton on songon rigat na lambin marbolag bani tembok na gijang, na mulai lengleng hu darat, na sihol sompong tompas, ibagas na so panagamon;
- ¹⁴ anjaha parbolahni usih songon parbolah ni hudon tanoh, na iropuki seng maralang-alang, gabe seng jumpah be topik-topik hambani sanga-sangani, ianan mambuat apuy hun tataring atap manahui bah hun bagas parigi.
- ¹⁵ Ai sonon do hata ni Tuhan Jahowa, Na Pansing ni Israel, 'Marhitei na mulak ampa na sip do maluah hanima, marhitei na soh pakon marhatengeran margogoh hanima.' Tapi seng ra hanima,
- ¹⁶ nini hanima, 'Lang!' Rahanan do hanami marhuda lintun, halani ai tongon, maporus ma hanima. Nini hanima ope, 'Huda na doras do ajakonnami, halani ai tongon, doras do na mangayak-ayak hanima.'
- ¹⁷ Saribu halak do hanima maporus halani pangondam ni sada halak; halani pangondam ni lima halak maporus do hanima ganupan, ronsi na tading humbennima ai, songon tiang mandera mando ai i atas dolog, songon alatan i raboyon."

**Naibata na Marulak-ulakan
Uhur-Ni bani Bangsa-Ni**

¹⁸ Halani ai paima-imahon do Jahowa, sihol do marulak-ulakan uhur-Ni dampak nasiam; halani ai bingkat do la laho mangidopi nasiam. Ai Jahowa, ai ma Naibata ni uhum, martuah ma ganup halak na martenger ni uhur Bani.

¹⁹ Tongon, ale bangsa na i Sion, na marianan i Jerusalem, seng lanjar tangis be nasiam. Maidop do uhur-Ni mangidah ham mambogei sora ni doruh-doruhmu. Anggo tartangar-Si ai, mintor balosan-Ni do ham.

²⁰ Age pe ibere Tuhan bani nasiam ruti hasosakan ampa bah hasunsahan, tapi seng be ponopkonon ni gurumu be dirini humbani nasiam, tapi idahon ni matamu ma gurumu tongtong.

²¹ Anjaha pinggolmu manangar hata hun pudimu, mangkatahon, “On ma dalan, dalani ma ai! Ulang manimbil hu siamun atap hu sambilou!”

²² Jadi pabutakon nasiam ma ijai gana-gana nasiam na nilampis bani pirak, ampa gana-gana tuangan nasiam na nilampis bani omas. Sampakkonon nasiam ma ai songon ugas na mabutak, anjaha hatahonon nasiam ma, “Misir ma!”

²³ Anjaha bereon-Ni ma udan bani bonih na dob sinaburhonmu hu juma, ampa gandum, gogoh ni

juma ai, dear ma anjaha buei. Bani ari ai manggagat ma pinahan nasiam bani sampalan na bolag.

²⁴ Lumbu age halode na mangkorjahon tanoh, panganonni ma gagaton na dob ginaraman, na dob pinaborsih marhitei durung-durung ampa anduri.

²⁵ Anjaha bani ganup dolog na gijang ampa buntu-buntu na bangga dong ma binanga ampa bah mardalan, bani ari pamunuhon bolon, sanggah na mangkarumbak manara-manara.

²⁶ Ambahni ai sondang ni bulan gabe songon sondang ni mata ni ari ma, anjaha sondang ni mata ni ari pitu hali lompit ma, songon haliharon ni pitu ari ma ai bani ari sanggah Jahowa mambaluti na maponggol humbani bangsa-Ni, anjaha manambari ughani hinorhon ni hona bogbogan.

Uhum bani Bangsa ai

²⁷ Tonggor ma, goran ni Jahowa roh humbani na daoh! Gajag do ringis-Ni, parah parjimbur-Ni; bibir-Ni gok do bani gila, anjaha dilah-Ni songon apuy na mangankon;

²⁸ hosah-Ni songon bah na marbanggal, na sampur das hu borgok, laho mamiari bangsa sipajuh begu-begu marhitei anduri hamagouan, anjaha mannahkon kokang na pakahouhon bani osang ni bangsa-bangsa.

²⁹ Mandoding-doding ma nasiam, songon na marpesta na ma pansing sanggah borngin,

anjaha marmalas ni uhur ma nasiam,
songon halak na bingkat marhasoman tulila
hu dolog ni Jahowa, hu dolog batu ni Israel.

³⁰ Anjaha pabogehonon ni Jahowa ma sora-Ni
na marmulia in, anjaha patidakon-Ni
do tangan-Ni na tinampulhon-Ni ai
marhasoman parah ni ringis-Ni ampa gara
ni apuy na mangankon, marhitei haba-haba,
udan na manalosou ampa sira-sira.

³¹ Gobir ma Assur halani sora ni Jahowa, sanggah
na binogbogkon-Ni simambu-Ni bani sidea.

³² Anjaha ganup lonsing-lonsing uhum ai,
na nilonsingkon ni Jahowa bani Assur,
ipamasa do ai marhasoman sora ni tambur
ampa husapi, anjaha marhitei tangan na
mawas-awas do iporang sidea.

³³ Ai domma dokah hinan sirsir panutungan,
bani raja ai pe ipasirsir do; bagas anjaha
bolag do godung ai, gok tumang bani soban
panutungi; hosah ni Jahowa, na mardalan
songon hirtah na martimpul, ai do na
pagarahon ai.

**Sedo hun Masir, humbani Jahowa
do Harohan ni Pangurupion**

31 ¹ Bursik ma halak, na tuad hu Masir
mangindo pangurupion, na marpangajaman
bani huda, anjaha na martenger ni uhur

bani gareta porang halani bueini ai, pakon bani siajak huda halani gogohni ai; tapi na so mangkawah bani Na Pansing ni Israel, anjaha lang marpanungkun bani Jahowa.

² Tapi la pe maruhur do, iparroh do hamagouan, seng mubah la humbani hata-Ni, tapi hehe do la mangimbang ginompar ni halak parjahat ampa sibere pangurupion bani halak sihorjahon hajahaton.

³ Jolma do halak Masir, sedo Naibata, daging do huda ni sidea, sedo tonduy. Anjaha pagostongon ni Jahowa do tangan-Ni, gabe jiris ma sipanolongi, anjaha targompang ma na tinolongan, anjaha rap do sidea magou.

Uhum bani Assur, tapi Haluahon do bani Sion

⁴ Ai sonon do hata ni Jahowa bangku, “Songon singa atap anak ni singa maraum mandompakkon sisorohonni, anjaha age pe na pahumpul hulanan ni siparmahan manjumpahkansi, seng tarsonggot mambogei surak-surak ni sidea, atap tunduk halani gosou ni sidea, sonai do Jahowa Zebaot susur bani Dolog Sion ampa bani buntu-buntuni laho marporang.

⁵ Songon manuk-manuk na habang, sonai do Jahowa Zebaot laho manjagai Jerusalem,

jagaon-Ni do ai anjaha paluahon-Ni,
ramotkonon-Ni do ai anjaha pagoluhon-Ni.

⁶ Mulak ma nasiam hu Bani, ale anak ni Israel, na
dob tinundalan nasiam ai parah-parah.

⁷ Bani ari ai ganup ma mangambukkon gana-gana
pirakni ampa gana-gana omasni, na pinauli ni
tangan nasiam laho mambahen dousa.

⁸ Anjaha Assur madabuh ma ibahen podang,
seng podang ni jolma; tongon, podang
do mangankonsi, sedo podang ni manisia;
maporus do ia halani podang, gabe halak
siparrodi do anak ni sidea.

⁹ Jadi salpu ma batu ginggingni halani biar, anjaha
ibagas gobir do pambobaini manadingkon
mandera partandani, nini Jahowa simada
apuy i Sion ampa simada pamurunan i
Jerusalem.”

Pasal Harajaon Hapintoron na Sihol Roh in

32 ¹ Tonggor ma, ibagas hapintoron marrajai
sada raja, anjaha pambobai romban hubani
habonaron manggomgom.

² Anjaha ganup sidea songon parlingodan
humbani logou madoras do, songon
panisioan humbani haba-haba, songon
bah mardalan bani tanoh na horah, anjaha
songon linggom ni dolog batu na bangga i
tanoh dorging-dorging.

- ³ Jadi seng be tutupon mata ni halak na marpangidah, anjaha tangi do pinggol ni halak na marpanangar.
- ⁴ Uhur na urahtu mambahen haputusan gabe marpartimbangan do, anjaha dilah ni halak na bebet, pandei anjaha torang marsahap.
- ⁵ Halak na bodoh, seng be igoran halak na sangap, anjaha halak sipangoto-otoi, seng be igoran halak na marmulia.
- ⁶ Tongon, haotoon do isahapkon halak na oto, anjaha uurni manguhuri hajahaton, laho mangkorjahon hasamboron, laho mansahapkon na lepak pasal Jahowa, laho paturutkon holtei-holteian halak na loheian anjaha laho mambuat siinumon humbani na horahan.
- ⁷ Hajahaton do akal-akal ni siparakal-akal, sai marranggi-ranggi do ia laho mangagou halak na madoyuk marhitei hata ladung, age pe hata sintong ihatahon halak na masombuh.
- ⁸ Tapi halak paruhur na pitah, hapitahon do ipingkiri, anjaha totap do ia marsijoloman bani na pitah.

**Uhum bani Parinangon na i Jerusalem
ampa Hasuangan i Pudini ai**

- ⁹ Jongjong ma hanima, ale parinangon na marsonang-sonang, tangar hanima ma

hatangku, ale anak boru sipangenjeng,
tangihon hanima ma sahapku!

¹⁰ Tar satahun nari hitir-hitir ma hanima ale
sipangenjeng, ai salpu ma pambuatan
anggur, pariama buah ni hayu seng dong be.

¹¹ Hitir ma, ale parinangon na marsonang-sonang,
gobir ma ale anak boru sipangenjeng!
Tanggali ma pakeiannima, gabe talanjang
ma, gonditi ma binongeinima bani guni!

¹² Marsitompuk tontonni bei ma hanima, halani
juma na dear-dear, halani hayu anggur na
ramos,

¹³ halani tanoh ni bangsangku, na mantubuhkon
hupi-hupi ampa suga-suga, tongon, halani
haganup rumah parmegah-megahan na i
huta na mariah in.

¹⁴ Ai tadingkononkon do istana-istana, mangadi
hariahon ni huta, buntu-buntu ampa
manara panjagaan, gabe liang ma lalab,
gabe malas ni uhur bani halode liar,
sampalan bani pinahan,

¹⁵ paima iuseihon banta Tonduy na hun datas,
gabe tanoh na lambutan halimisan anjaha
tanoh na lambutan gabe doskon tombak.

¹⁶ Marianan ma habonaron i halimisan, anjaha
hapintoron marianan bani tanoh na
lambutan.

- ¹⁷ Buah ni hapintoron ai ma damei, anjaha pangkorhon ni habonaron ai ma hasonangan ampa haatokon ronsi sadokah ni dokahni.
- ¹⁸ Jadi marianan ma bangsangku bani ianan hadameion, bani ianan na sonang, ampa ianan parsaranan na minop.
- ¹⁹ Anjaha bois do rumbakkononkon harangan ai, anjaha nepnep tumang do huta ai bahenon.
- ²⁰ Martuah ma nasiam na boi martidah i lambung ni bah mardalan, anjaha na boi palopaskon mardalani lembu ampa halode.

**Jahowa do Sipaluah ampa
Raja, na Patorsa-torsa Sion**

- 33** ¹ Bursik ma, ho na parsedahon, tapi na so pinarseda ope, ampa ho siparrampas, na so hona rampas ope. Anggo salpu ma ho mansedahon, parsedaon ma ho, dob salpu ho manrampas, rampason ma ho.
- ² Ham Jahowa, maidop ma uhur-Mu bennami, Ham do iarapkon hanami. Sai Ham ma tangan na mangurupi hanami siap sogod, ampa pangurupi bennami bani panorang hasosakan.
- ³ Halani sora ni hagosouon maporus do bangsa-bangsa, halani parroh-Mu mandorab mambur merap do bangsa sipajuh begu-begu,

- ⁴ anjaha patumpuon do taban-taban, songon pambuati ni balang, songon parurup ni tamponok, sonai do iurup ai.
- ⁵ Timbul do Jahowa, ai i babou do la marianan, igoki do Sion bani habonaron ampa hapintoron.
- ⁶ Sogop ma hubani panorang na sonang, haluahon na marlobih-lobih, hapentaran ampa habotohon, biar bani Jahowa do arta bani Sion.
- ⁷ Tonggor ma, doruh-doruh do i darat halak na i Ariel, suruhan na padameihon tangis sosombopon.
- ⁸ Halong do pasar, maronti pardalanan. Hona osei parpadanan, seng iparduli huta-huta, seng harga jolma.
- ⁹ Horu anjaha melus do tanoh in, maila do Libanon anjaha mangeruti, Saron gabe doskon halimisan, anjaha Basan ampa Karmel mangkatangtang bulungni.
- ¹⁰ Sonari, jongjong ma Ahu, nini Jahowa, sonari, hehe ma Ahu, sonari, bingkat ma Ahu.
- ¹¹ Marhitei anggala do hanima boratan rumah, panabian do itubuhkon hanima, apuy do hosahnima na sihol mangankon hanima.
- ¹² Anjaha tutungon do bangsa-bangsa gabe hapur, anjaha songon suga-suga na niroboboh, ipuruni sidea ibagas apuy.

- 13 Tangar ma, hanima na daoh, pasal na Hubahen, anjaha hanima na dohor, tanda hanima ma gogoh-Ku.
- 14 Mabiari do pardousa i Sion, hagobiron do mandorab halak sipakulah-kulah, nini, "Ise hun banta na boi marianan bani apuy na mamboiskon? Ise hun banta na boi marianan bani gara ni apuy sisadokah ni dokahni?"
- 15 Ai ma halak na mardalan ibagas hapintoron, na sintong-sintong marsahap, na mangkagigihon laba halani odoh-odoh, na manjaga tanganni, ase ulang ijalo sisip, na mamitut pinggolni ase ulang ibogei pasal na manduruskon daroh, na papitpit matani, ase ulang mangidah na masambor,
- 16 ai do na marianan bani na gijang, ianan partahanan bani; ai ma dolog batu, sai bereon do ruti bani, anjaha bah inumonni totap do dong.
- 17 Matamu do mangidah Raja in ibagas hajengeson-Ni, anjaha tatapon ni sidea do sada tanoh na lumbang.
- 18 Dingaton ni u hurmu do hasonggotan ai, nim ma, "Ija do sipangkira ondi, ija do sijalo sohei ondi? Ija do sihira manara ondi?"
- 19 Seng anjai idahonmu be bangsa na jungkat ai, bangsa siparsahap na ganjil, na so boi

urusanmu, na bebet marsahap, na so boi artihononmu.

- ²⁰ Kawahkon ma Sion, huta pesta partumpu-tumpuan banta. Matamu sandiri do na mangidah Jerusalem, ai ma ianan na sonang, sada lampolampo na so meser-eser, pasuk-pasukni pe seng siumpaton ronsi sadokah ni dokahni, anjaha ganup parrahutini seng anjai rotaponkon.
- ²¹ Tongon, Jahowa na marmulia in do hasomanta ijai, dong do ijai binanga ampa bah na bolag, seng montas ijai parau silugaan, anjaha kapal na bangga seng mandipar hunjai.
- ²² Tongon, Jahowa do panguhum banta, Jahowa do sibere titah banta, Jahowa do Rajanta, la do na paluahkon hita.
- ²³ Hondur do tali-Ni, seng be ijolomi tiang layar-Ni, seng boi be herbang ibahen layar-Ni. Jadi bagion ma buei taban-taban, gari halak na repat dapotan taban-taban.
- ²⁴ Anjaha sada pe lang pangisini mangkatahon, “Boratan do ahu!” Bangsa na marianan ijai dapotan hasasapan ni dousa.

Uhum ni Naibata bani Edom

34 ¹ Roh ma hanima ale sipajuh begu-begu anjaha tangar ma hanima pe, ale bangsa-bangsa, bogei ma! Manangi ma tanoh ampa

- ganup isini, dunia on pakon sagala na tubuh
ijin.
- ² Ai marringis do Jahowa bani ganup sipajuh
begu-begu, anjaha manggila bani ganup
bala ni sidea. Hona papa do sidea anjaha
iondoskon do sidea hu panayatan.
- ³ Marsampakan do halak na rasei humbani sidea,
muap do bau ni bangkei ni sidea, anjaha
dolog malala ibahen daroh ni sidea.
- ⁴ Masab do haganup bala ni langit, anjaha igulung
songon pustaha langit ai, ganup balani
hurleh, songon parmelus ni bulung ni hayu
anggur, songon parrurus ni bulung ni hayu
ara.
- ⁵ Tongon, mabuk do podang-Ku i nagori atas,
tonggor ma, turun do ai bani Edom, bani
bangsa na pinapaan-Ku laho manguhum ai.
- ⁶ Podang ni Jahowa gok do ibahen daroh,
marlimur ibahen taboh-taboh, ibahen
daroh ni biribiri ampa hambing tunggal,
ibahen taboh-taboh ni piah-piah ni biribiri
tunggal. Ai Jahowa do na mangadongkon
panggalangan i Bosra ampa panambolihan
banggal i Edom.
- ⁷ Anjaha tompas do lembu jalang rap pakon
sidea, sonai lembu ampa lembu jonggi,
marbah do tanoh ni sidea ibahen daroh,

anjaha marlapu-lapu tanohni ibahen
taboh-taboh.

- ⁸ Ai Jahowa do na pamasa ari pambalason, tahun
marlulu bani Sion.
- ⁹ Mubah do bah ni Edom gabe asal, ladangni gabe
hirtah, anjaha tanohni gabe aspal na gara.
- ¹⁰ Borngin age arian seng miloh ai, ronsi
sadokah ni dokahni do martimpul timusni;
marsundut-sundut do tarulang ai, ronsi
sadokah ni dokahni, seng dong na montas
hunjai.
- ¹¹ Sitanda ulog ampa landak do simada ai,
langkupa ampa kawak do marianan ijai,
ai Jahowa do na pagistang sibar-sibar
hasedaon ampa tali dondon halungunon i
atas ni.
- ¹² Seng dong be raja sipabangkiton ijai, anjaha
ganup na sangap-sangap ni sidea gabe na
lang.
- ¹³ Tubuhan tatada do istanani, latong pakon
suga-suga do ibagas bentengni; gabe ianan
ni sorigala do ai, panggagatan bani burung
unta.
- ¹⁴ Pajumpah do ijai binatang halimisan ampa
sorigala, anjaha setan-setan samah
setan-setan; tongon, begu borngin do
marianan ijai, jumpahsi do parsaranan ijai.

- ¹⁵ Marasar do ijai ulog darih, martolur anjaha iposahi bani na linggom; tongon, marurup do ijai kawak, marsiarah-arahan.
- ¹⁶ Pareksa hanima ma buku ni Jahowa, basa ma: Sada pe lang na tading humbani sidea, sada pe lang na telpang. Ai pamangan-Ni do na mangkatahon ai, anjaha tonduy-Ni do na patumpu-tumpuhon sidea.
- ¹⁷ Ia sandiri do mandabuh ruji-ruji bani sidea, anjaha tangan-Ni do na mambagihon tanoh ai bani sidea marhitei sibar-sibar; ronsi sadokah ni dokahni do sidea manean ai, anjaha marsundut-sundut do sidea marianan ijai.

Hatuahon ni Bangsa ni Naibata, na dob Pinaluah

35 ¹ Marmalas ni uhur ma halimisan pakon tanoh dorging-dorging, marolob-olob ma tanoh na lungun anjaha marbunga. Songon silundat ma ai marbunga, anjaha marolob-olob; tongon, marsurak-surak anjaha marolob-olob.

² Hamuliaon ni Libanon ibere do bani, sonai hajagaron ni Karmel ampa Saron. Idahon ni sidea do hamuliaon ni Jahowa, hajombuton ni Naibatanta.

³ Pargogohi nasiam ma tangan na galek, patotap towod na rebad-rebad!

- ⁴ Hatahon nasiam ma bani paruhur na galek,
“Tenger ma uhur nasiam, ulang mabiar!
Tonggor ma Naibata nasiam, roh do la
mambalas ampa marlulu; la sandiri do na
roh, laho paluahkon nasiam.”
- ⁵ Bukaon ma ijai mata ni halak na mapitung,
anjaha unkgabon pinggol ni halak na nengel;
- ⁶ manlumpat-lumpat do ijai halak na repat
songon urasa, anjaha marsurak-surak dilah
ni halak na longah; anjaha pultak do bah
i halimisan, sonai age binanga i tanoh
dorging-dorging.
- ⁷ Gabe tao do horsik na marohop-ohop, anjaha
martubuhan bah i tanoh na horah; ianan
ni sorigala hinan gabe hatubuhan ni tolong
ampa arung-arung.
- ⁸ Anjaha dong do ijai dalan na bolon, anjaha
igoran do ai dalan na ma pansing; seng
montas hunjai halak na mabutak, tapi
bangsani na mandalani dalan ai do simada
ai; halak na oto pe seng kahou ijai.
- ⁹ Seng dong singa ijai, anjaha binatang panoroh
seng montas hunjai, seng dong jumpah ai
ijai; tapi halak na pinaluah do mardalan
ijai. Anjaha mulak ma halak na tinobus ni
Jahowa,
- ¹⁰ roh hu Sion mandoding-doding, malas ni uhur
sisadokah ni dokahni do i atas uluni. Jaloon

ni sidea do hamegahon ampa malas ni uhur, tapi maporus ma pusok ni uhur ampa hoih-hoih.

Si Sanherib, Raja ni Assur Mamorang Jerusalem

(Pausih 2 Raj. 18:13-37; 2 Kron. 32:1-19)

36¹ Pasapuluhompat-tahunkon dob raja si Hiskia, tangkog ma si Sanherib, raja ni si Assur manlawan sagala huta na toguh na i Juda, anjaha ipatunduk ma ai.

² Jadi isuruh raja ni Assur ma Rabsake hun Lakis hu Jerusalem, laho marayak Raja Hiskia, marhasoman buei bala. Jadi jongjong ma ia bani bondar ni bongbongan na hampit huluan, bani dalan na bolon na laho hu ladang pamurihan.

³ Dob ai luar ma manjumpahkonsi, si Eliakim anak ni si Hilkia, sijaga rumah bolon ai, pakon si Sebna jurutulis ai, ampa si Joah, anak ni si Asap, sipanuturi ai.

⁴ Nini Rabsake ai ma dompak sidea, “Patugah nasiam ma bani si Hiskia, ‘Sonon do hata ni raja na bolon in, raja ni Assur: Ai aha do hatengeran na pinangunsagahkonmin?’

⁵ Nini uhurmu gakni, sungkup ma hata ni bibir tumang gabe haputusan ampa kuasa ibagas hamunsuhon? Ai pe, hubani ise do ho marpangarapan, ase pag ho marbalik humbangku?

⁶ Tonggor ma, mangunsagah do ho bani tungkot tolong na marosak, ai ma Masir, na manolpusi tangan ni jolma na martungkotkorsi. Sonai do pambahenan ni Parao, raja ni Masir, bani sagala na martenger ni uhur bani.

⁷ Tapi anggo porini ihatahon ho hu bangku, “Martenger ni uhur bani Jahowa Naibatanami do hanami,” ai lang ia do ai, na dob iparseda si Hiskia panombahanni na i buntu-buntu ampa anjapanjapni, sanggah na ihatahon bani Juda pakon Israel: Maningon i lobei ni anjapanjap on do nasiam marrogop?’

⁸ On pe, martaruh-taruh ma ho pakon tuanku, Raja Assur, ‘Hubere ma bam dua ribu huda, atap na boi do tarpasirsir ho na mangajak ai!’

⁹ Ija ma tartahan ho mangimbang sahalak gelah humbani juakjuak ni tuanku sietekan. Martenger ni uhur do ho tene bani Masir, halani gareta pakon bala parhudani?

¹⁰ Ambahni ai, iagan ho na so mangunsagakon Jahowa do gakni ahu tangkog hu tanoh on, laho parsedahon in? Jahowa do na mangkatahon bangku, ‘Tangkog ma ho hu tanoh in, anjaha parseda ma in!’

¹¹ Dob ai nini si Eliakim pakon si Sebna ampa si Joah ma bani Rabsake, ‘Dearan ma marsahap Aram ham bennami, juakjuakmu on, ai iarusi hanami do

in. Ulang ma marsahap Jahudi ham bennami ibogei bangsa in, na i atas tembok in.'

¹² Jadi nini Rabsake ma, 'Ai hubani tuanmu pakon hu bam gakni ahu isuruh tuanku mangkatahon hata on? Ai lang dihut do bani dalahi na i atas tembok in, na maningon mangankon ginagatni anjaha manginum bah na niinumni rap pakon hanima?'

¹³ Dob ai jongjong ma Rabsake ai ipamaling ma sorani ibagas sahap Jahudi, nini ma, 'Tangihon nasiam ma hata ni raja na bolon, raja ni Assur!'

¹⁴ Sonon do hata ni raja ai, 'Ulang ma ra nasiam paoto-otoan ni si Hiskia, ai lang tolap ia paluahkon nasiam.'

¹⁵ Anjaha ulang ma ra nasiam ojur-ojuron ni si Hiskia marhatengeran bani Jahowa marhitei na mangkatahon, 'Sai paluahon ni Jahowa do hita, seng anjai ondoskonon-Ni huta on hubagas tangan ni Raja Assur.'

¹⁶ Ulang ma tangihon nasiam si Hiskia, ai sonon do hata ni Raja Assur, 'Mardamei ma nasiam pakon ahu, anjaha luar ma nasiam manjumpahkon ahu, ase ganup nasiam bulih mangan humbani hayu anggurni, ampa humbani hayu arani, anjaha ganup nasiam boi minum humbani parigini,

¹⁷ paima roh ahu mangalop nasiam hu tanoh na songon tanoh nasiam on, hu tanoh hatubuhan ni

gandum pakon anggur, hu tanoh na lobihan bani ruti pakon pohon anggur.’

¹⁸ Ulang ma ra nasiam paoto-otoon ni si Hiskia marhitei na mangkatahon, ‘Sai paluahon ni Jahowa do hita. Naha, mintor tarpaluah naibata ni bangsa-bangsa ma nagori ni sidea bei humbani tangan ni Raja Assur?’

¹⁹ Ija do naibata ni Hamat pakon Arpad? Ija do naibata ni Separwaim? Ai tarpaluah sidea do Samaria hun tanganku?

²⁰ Ise ma humbani naibata ni nagori ondi na tolap paluahkon nagori ni sidea humbani tanganku? Mintor tarpaluah Jahowa ma Jerusalem humbagas tanganku?

²¹ Jadi sip ma sidea, seng dong ibalosi age sangkababah hata, ai sonai do parentah ni raja ai, ‘Ulang balosi nasiam ia!’”

²² Dob ai roh ma si Eliakim, anak ni si Hilkia, sijaga rumah bolon pakon si Sebna, jurutulis ai ampa si Joah, anak ni si Asap, panuturi ai, marayak si Hiskia marhiou na marigat, laho patugahkon hu bani, hata ni Rabsake ai.

Parluah ni Jerusalem

(Pausih 2 Raj. 19; 2 Kron. 32:20-23)

37¹ Jadi dob ibogei Raja Hiskia hata ai, irigati ma hiouni, isorongkon ma hiou guni, dob ai laho ma ia hu rumah ni Jahowa.

² Dob ai isuruh ma si Eliakim, sijaga rumah bolon, pakon si Sebna, jurutulis ai rap pakon malim situanan, marhiou guni marayak Nabi Jesaya, anak ni si Amos.

³ Nini sidea ma hu bani, “Sonon do hata ni si Hiskia, ‘Ari hasosakan, paminsangon ampa habadoron do ari on. Jumpah ma namin panorangni tubuh na etek-etek, tapi seng dong gogoh laho manubuhkan.’

⁴ Ra ibogei Jahowa Naibatamu do hata ni Rabsake, na sinuruh ni tuanni Raja Assur, laho pahirihon Naibata na manggoluh in, ase ibalaskon hata ai, na dob binogei ni Jahowa Naibatamu; antong martonggo ma ham mangapiti simasima na tading in ope.”

⁵ Jadi dob das juakjuak ni Raja Hiskia bani si Jesaya,
⁶ nini si Jesaya ma bani sidea, “Sonon ma hatahon nasiam bani tuan nasiam: Sonon do hata ni Jahowa, ‘Ulang ho mabiar pasal hata na dob binogeimu, na dob niapaskon ni juakjuak ni Raja Assur hu Bangku.’

⁷ Tonggor ma, Ahu ma mamberehon bani sada tonduy, ase ibogei barita, gabe mulak hu tanohni, ase Ahu mambahen rasei ia marhitei podang i tanohni sandiri.”

⁸ Mulak ma Rabsake ai, anjaha jumpahsi ma Raja Assur marmunsuh pakon Libna; ai domma ibogei hinan na dob misir raja ai hun Lakis.

⁹ Anjaha dob ibogei si Sanherib pasal si Tirhaka, raja ni Etiopia, “Tonggor ma, domma bingkat ia laho marmunsuh dompak ham, isuruh ma use suruhanni bani si Hiskia, mangkatahon,

¹⁰ ‘Sonon ma hatahon nasiam bani si Hiskia, raja ni Juda: Ulang ma ra ho paoto-otoon ni Naibatamu, na pinangunsagakonmin, na mangkatahon: Seng ondoskononkon Jerusalem hubagas tangan ni Raja Assur.’

¹¹ Tonggor ma, domma ibogei ho na binahen ni Raja Assur hu bani ganup nagori laho marraseihon sidea. Mintor tumaram ma maluah ia ho?

¹² Tarpaluah naibata ni bangsa-bangsa ai do sidea, ai ma bangsa-bangsa na siniapkon ni ompungku: Gosan, Haran, Resep ampa halak na i Eden, na marianan i Telasar?

¹³ Ija do raja ni Hamat, raja ni Arpad, raja hun huta Separwaim, Hena pakon Iwa?”

¹⁴ Jadi ijalo si Hiskia ma surat ai hun tangan ni suruhan ai, anjaha ibasa ma ai, dob ai tangkog ma ia hu rumah ni Jahowa anjaha ipaherbang si Hiskia ma surat ai i lobei ni Jahowa,

¹⁵ anjaha martonggo ma si Hiskia hubani Jahowa, nini ma,

¹⁶ “Ham Jahowa Zebaot, Naibata ni Israel, na marparatas bani herubim! Sahalak Ham do Naibata ni haganup harajaon na i tanoh on! Ham do na manompa langit pakon tanoh on.

¹⁷ Paeleng Ham ma pinggol-Mu, ale Jahowa, anjaha tangar ma! Ungkab Ham ma panonggor-Mu anjaha tonggor ma! Tangar Ham ma haganup hata ni si Sanherib, na tinonahkonni laho pahiri Naibata na manggoluh in.

¹⁸ Tongon do, ale Jahowa, domma iboiskon raja ni Assur haganup bangsa-bangsa ampa nagori ni sidea.

¹⁹ Anjaha domma igijigkon hubagas apuy naibata ni sidea ai, ai seng tongon Naibata ai, tapi jadi-jadian ni tangan ni jolma do, hayu pakon batu, halani ai do ase iparseda sidea ai.

²⁰ On pe, Ham Jahowa, Naibatanami, paluah Ham ma hanami humbani tanganni, ase itanda haganup harajaon na i tanoh on, paboa Ham do Jahowa, Ham tumang.”

²¹ Dob ai isuruh si Jesaya, anak ni si Amos ma na mangkatahon bani si Hiskia sonon, “Sonon do hata ni Jahowa Naibata ni Israel, ‘Domma Hutangihon tonggomu na hu Bangku pasal si Sanherib, raja ni Assur.’

²² On do hata na hinatahon ni Jahowa pasalsi, ‘Pis do uhurni mangidah ho, iapasi anak boru, boru Sion do ho, iupir-upirhon boru Jerusalem do uluni i pudimu.’

²³ Ise do na nirehean pakon na niapasanmin?

Dompak ise do na pinamalingmin soramu,

anjaha ipatingkal ho matamu? Dompok Na Pansing ni Israel do.

- ²⁴ Marhitei juakjuakmu iapasi ho do Jahowa, anjaha ihatahon ho, 'Rap pakon garetanku na buei in naik do ahu hu atas ni dolog, daoh das hu Libanon; huroboh do hayu aresni sigijangan ampa marantini sidearan; das do ahu bani pakpakni si atasan ampa hubagas haranganni sipotpotan.'
- ²⁵ Huhurak do parigi anjaha huinum do bah na legan; anjaha huarsik do marhitei tapak-tapak ni naheihu ganup bah i Masir.
- ²⁶ Seng ope ibogei ho? Na dob Hutotapkon hinan, anjaha na dob Huranggihon humbani na basaia, ai ma na Hupamasa sonari, ase isiapkon ho huta na toguh gabe timbunan batu,
- ²⁷ anjaha pangisini ai, na so margogoh ai, gabe tarsonggot anjaha gaor, anjaha gabe songon suan-suanan na i ladang, anjaha gabe songon poyon-poyon na galek, songon poyon-poyon na i atas tayub anjaha songon gandum na hahorahan.
- ²⁸ Tapi Hubotoh do parjongjongmu pakon parhundulmu, pardaratmu pakon parmasukmu, ampa pangoga-ogamu Bangku.

²⁹ Halani mangoga ho dompak Ahu anjaha das bani pinggol-Hu hajungkatonmu, bahenon-Ku ma halihir bani igungmu pakon rantei bani bibirmu, anjaha paulakon-Ku do ho humbani dalam harohanmu.

³⁰ On ma tanda bam, ale Hiskia, 'Panganonmu ma omei sagak tahun on pakon bani tahun paduahon; patolu-tahunkon martidah ma hanima anjaha marpariama, manuan hayu anggur anjaha mangankon buahni.'

³¹ Anjaha simasima na maluah humbani ginompar ni Juda, marurat ma use hu toruh anjaha marbuah hu atas.

³² Ai hun Jerusalem do luar sada simasima, anjaha hun Dolog Sion sada hulanan na pinaluah. Ringis ni Jahowa Zebaot do sibahen in.

³³ Halani ai sonon do hata ni Jahowa pasal raja ni Assur, 'Seng anjai masuk ia hubagas huta on, atap siorhononkon sada lingkit hujon, barang roh ia hu lobei ni huta on margantar atap bahenonni hubuan inggot huta on.'

³⁴ Maningon humbani dalam harohanni ai ia mulak, tapi seng anjai masuk ia hubagas huta on, nini Jahowa.

³⁵ Ai sihol ondingan-Ku do huta on laho paluahkansi, halani Ahu sandiri pakon halani juakjuak-Ku si Daud."

³⁶ Jadi luar ma malekat ni Jahowa, gabe ibunuh ma i parsaranan ni halak Assur saratus ualuh puluh lima ribu halak. Jadi dob puho sidea girah patarni ai, tonggor ma, domma gabe bangkei ganup.

³⁷ Dob ai bingkat ma si Sanherib, raja ni Assur mulak hu hutani, anjaha marianan ma ia i Ninive.

³⁸ Jadi sanggah na manumbah ia i rumah ni Nisrok, naibatani ai, ibunuh anakni si Adramelek pakon si Sareser ma ia marhitei podang; dob ai maporus ma sidea hu tanoh Ararat, anjaha si Asar-Hadon, anakni ai ma bangkit raja manggantiksi.

Naborit ni Raja Hiskia, Parmalumni ampa Hata Puji-pujianni

(ay. 1-8, 21, 22: pausih 2 Raj. 20:1-11; 2 Kron. 32:24)

38 ¹ Bani panorang ai boritan ma si Hiskia, narus-narus matei. Jadi roh ma Nabi Jesaya, anak ni si Amos marayaksi, nini ma dompaksi, “Sonon do hata ni Jahowa, ‘Patorsa ma rumahmu, ai matei ma ho, seng manggoluh be.’

² Jadi ipahusor si Hiskia ma bohini dompak dingding, martonggo bani Jahowa;

³ nini ma, ‘Ham Jahowa, ingat Ham ma naha ahu marpangabak i lobei-Mu ibagas hasintongan, ibagas bulat ni uhur, anjaha hudalankon do aha na madear i lobei ni bohi-Mu.’ Anjaha gogoh-gogoh do tangis si Hiskia.

⁴ Dob ai roh ma hata ni Jahowa bani si Jesaya, sonon,

⁵ ‘Laho ma ho anjaha hatahon ma bani si Hiskia: Sonon do hata ni Jahowa, Naibata ni si Daud, ompungmu: Domma Hutangihon tonggomu, domma Huidah iluhmu, tonggor ma, tambahkonon-Ku ma umurmu sapuluh lima tahun nari.

⁶ Paluahon-Ku ma ho pakon huta on humbagas tangan ni Raja Assur, anjaha ondingan-Ku do huta on.

⁷ Anjaha on do tanda humbani Jahowa bamu, paboa pasaudon ni Jahowa do hata na hinatahon-Ni ai.

⁸ Tonggor ma, paulakon-Ku ma dampak pudi sapuluh garis halinoh ni mata ni ari na bani jam ni si Ahas ai.” Jadi mulak ma tongon sapuluh garis dampak pudi halinoh ni mata ni ari na dob turun ai.

⁹ Surat ni si Hiskia, raja ni Juda, sanggah boritan ia anjaha malum ia use humbani naboritni ai,

¹⁰ “Ningku do, bani parsitongahan ni ari-aringku do ahu misir. Bani horbangan ni nagori toruh do ahu iondoskon. Ibuati do ari-ari ni goluhku.

¹¹ Ningku do, ‘Seng be idahonku Jahowa bani tanoh ni halak na manggoluh, seng be

idahonku jolma i tongah-tongah ni na mangiankon dunia on.'

- ¹² Irumbakkon do barung-barungku, ibuat humbangku songon lampolampo ni parmahan; songon partonun, sonai do ibalun goluhku, irotap do ahu humbani tali-Ni. Arian pakon borngin sai ipaturut Ham do ahu. Doruh-doruh do ahu ronsi sogod,
- ¹³ songon singa do la mamparponggol holi-holingku, arian pakon borngin do ipadob Ham ahu.
- ¹⁴ Songon manuk-manuk layang-layang do ahu marditit-ditit, marduhur-duhur songon asas. Loja do matanku mangkawah dompak babou. Ham Jahowa, hona odoh-odoh do ahu, Ham ma pangondingi bangku.
- ¹⁵ Aha ma hatahononku? Ai domma isahapkon ai bangku, anjaha ai do ipasaud. Maporus do humbangku sura sihol modom, halani pusok ni uhurhu.
- ¹⁶ Ham Jahowa, maronjolan hujai do goluh ni jolma, anjaha ibagas ai do goluh ni tonduyhu, sai pajorgit Ham ma ahu, anjaha pagoluh Ham ma ahu.
- ¹⁷ Tonggor ma, gabe hatuahon do bangku paet ni pangahapanku; anjaha Ham do na marramotkon tonduyhu humbani godung

hamagouan, ai isampakkon Ham do ganup dousaku hu pudi-Mu.

¹⁸ Ai pe seng tarpuji nagori toruh Ham, seng tarpasangap hamatean: anjaha sagala na dob manuruk tanoman seng tarbahen mangarap bani hasintongan-Mu.

¹⁹ Halak na manggoluh, do mamuji Ham songon na hubahen sadari on. Bapa hubani anakni patugahkon hasintongan-Mu.

²⁰ Jahowa do sipaluah bangku, halani ai marhusapi ma hita mamuji-muji sadokah goluhta i rumah ni Jahowa.

²¹ Dob ai nini si Jesaya ma, ‘Boan ma hujon buah ara na hinarei, lapuhon ma ai bani bayoh ai, ase malum ai.’

²² Anjaha nini si Hiskia ma, ‘Aha ma tanda paboa na tangkog ma ahu hu rumah ni Jahowa?’”

Suruhan na hun Babel

(Pausih 2 Raj. 20:12-19; 2 Kron. 32:25-31)

39 ¹ Bani panorang ai isuruh si Merodak-Baladan, anak ni si Baladan, raja ni Babel ma suruhanni mamboan surat pakon siluah bani si Hiskia, halani ibogei boritan ia anjaha jorgit use. ² Jadi malas ma uhur ni si Hiskia mangidah sidea, gabe ipatuduhkon ma bani sidea rumah parartaanni, pirak, omas, morum-moruman, minak na misbou, rumah parsinjataanni pakon haganup

na dong bani i rumah parartaanni. Seng dong na ibagas rumahni ampa na bani sab gomgomanni na so ipatuduhkon si Hiskia bani sidea.

³ Dob ai roh ma Nabi Jesaya marayak Raja Hiskia, nini ma dompaksi, “Aha do hinatahon ni halak in, anjaha hunja do sidea na roh in marayak ham? Nini si Hiskia ma, ‘Hun nagori na daoh do sidea na roh in marayak ahu, hun Babel.’

⁴ Nini ma, ‘Aha do na nididah ni sidea i rumahmu?’ Nini si Hiskia ma, ‘ididah sidea do ganup na ibagas rumahku, seng dong na ibagas rumah parartaanku na so hupatuduhkon bani sidea.’

⁵ Dob ai nini si Jesaya ma dompak si Hiskia, ‘Tangihon ma hata ni Jahowa Zebaot.’

⁶ Tonggor ma, na roh ma panorangni, tarboan ma ijai hu Babel sagala na i rumahmu ampa sagala na pinahumpul ni ompungmu ronsi sadari on, seng dong na teba, nini Jahowa.

⁷ Anjaha deba humbani anakmu na tubuh bamu, boannonni do, gabe siparugas i rumah ni Raja Babel.

⁸ Jadi nini si Hiskia ma dompak si Jesaya, ‘Dear do hata ni Jahowa na niluarhonmu ai.’ Ai nini ibagas uhurni, ‘Asal ma sonang anjaha mardamei sadokah goluhku!’”

**Apoh-apoh ni Naibata bani
Bangsa-Ni, na Tarbuang ai**

- 40** ¹ Apohi, apohi hanima ma bangsang-Ku!
nini Naibata nasiam.
- ² Hatahon hanima ma ibagas halamlamon
bani Jerusalem, anjaha dilohon ma hu
bani, paboa marpunsa ma parjabolongan
bani, domma isasap salahni, domma ijalo
humbani tangan ni Jahowa lompit dua
gantih ni ganup dousani.
- ³ Sora na dilo-dilo, 'Pasirsir dalam ni Jahowa i
halimisan, bahen pintor dalam na bolon bani
Naibatanta i tanoh dorging-dorging!'
- ⁴ Ganup lombang pagijangon do, anjaha
patoruhon ganup dolog ampa buntu-buntu;
tanoh na marholbung-holbung padosdoson
do, anjaha gabe pamah dolog batu.
- ⁵ Jadi talar ma hamuliaon ni Jahowa anjaha
sagala daging do mangidah ai, haganup ai
pamangan ni Jahowa do mangkatahon ai.
- ⁶ Sada sora mangkatahon, 'Dilohon ma!
Jadi ningku ma, 'Aha ma dilohononku?'
Poyon-poyon do sagala daging anjaha ganup
hinajengesni ai usih bani bunga na i talun.
- ⁷ Melus do poyon-poyon ai, marurus bungani,
anggo mangombus Tonduy ni Jahowa
hunjai; tongon, poyon-poyon do bangsa in.

- ⁸ Melus do poyon-poyon ai, marurus bungani,
tapi anggo hata ni Naibatanta totap do ronsi
sadokah ni dokahni.
- ⁹ Bani dolog na gijang ma ho tangkog, ale Sion,
siboan ambilan malas ni uhur! Pamaling ma
soram, ale Jerusalem, siboan Ambilan Na
Madear, sai pamaling ma, ulang ho mabiar!
Hatahon ma bani huta ni Juda, 'Tonggor ma,
andin do Naibatanim!'
- ¹⁰ Tonggor ma, Tuhan Jahowa, roh ibagas
hagogohon, anjaha tangan-Ni sandiri do
na mandalankon kuasa Bani; tonggor ma,
irik do hubani upah-Ni anjaha na sinari-Ni
mardalan i lobei-Ni.
- ¹¹ Parmahanon-Ni do hulanan-Ni songon
parmahan, marhitei tangan-Ni ipatumpu
sidea; iusung do anak ni biribiri ibagas
abingan-Ni, anjaha nanget do itogu-togu na
marmurik."

Timbul Anjaha Pargogoh Na So Tarimbang do Naibata Sipaluah Israel

- ¹² Ise do na boi manuhati sagala bah marhitei
nangging-nanggingni? Ise do na boi manibar
langit marhitei jongkal-jongkalni? Ise do na
boi marsuhat orbuk ni tanoh on, anjaha
ise do na boi manimbang dolog marhitei

timbangan atap buntu-buntu marhitei
dasing?

- ¹³ Ise do na boi manibar Tonduy ni Jahowa,
anjaha songon sada halak panuturi iajari la?
- ¹⁴ Ise panungkunanni laho mambere uhur bani,
anjaha na patuduhkon bani dalam ni uhum,
na mangajarhon bani habotohan anjaha
dalam ni pangarusion ipabotohkon bani?
- ¹⁵ Tonggor ma, sagala bangsa usih do bani
santektek bah na bani ember, anjaha ihira
doskon orbuk na longkot bani timbangan;
tonggor ma, ijomput do pulou-pulou doskon
sangkamata horsik.
- ¹⁶ Hayu ni Libanon seng sungkup bahen soban,
anjaha sagala binatangni seng sungkup
bahen galangan situtungon.
- ¹⁷ Sagala bangsa doskon na lang do i lobei-Ni,
hurang humbani na lang do sidea ihira,
sabonar na lang do.
- ¹⁸ Bani ise do pausihon nasiam Naibata, atap
hubani aha do pausihon nasiam la?
- ¹⁹ Gana-gana ai! Tuhang do na manuang ai,
anjaha tuhang omas manlampiskon omas
hujai, anjaha marrantei-rantei pirak do ai
ibahen.
- ²⁰ Halak na so boi mambere sisonai, ipilih ma
hayu na so ra masuk bani, ipindahi ma sada

- tukang na pandei laho patureihon sada gana-gana na so ra miut bani.
- ²¹ Ai seng ibotoh nasiam? Ai seng ibogei nasiam? Ai lang domma ipatugah ai bani nasiam humbani mungkahni? Ai lang domma iarusi nasiam ai humbani parjonam ni tanoh on?
- ²² Ia do marhotak i babou ni tanoh on, anjaha na mangiankon on doskon balang do. Ia do na paherbang langit songon hiou anjaha na paamparhon ai songon lampolampo bahen siianonkon;
- ²³ Ia do na manlangkon raja-raja, panguhum ni tanoh on gabe sisoya-soya ibahen.
- ²⁴ Ai pe sidea isuan, ai pe itidahkon, ai pe mamungkah marurat hubagas tanoh, anggo roh ia manompul sidea, mintor melus do sidea, anjaha habang sidea ibahen haba-haba songon lamlam.
- ²⁵ Bani ise do paasihonnima Ahu, anjaha usih hu hujai, nini Na Ma Pansing in?
- ²⁶ Kawahkon nasiam ma hu babou, anjaha tonggor ma, ise do na manompa in? Ia do na padarat balani marbilangan, na mandilo sidea ganup bani goran-Ni. Halani hinagok ni kuasa-Ni, anjaha habanggalon ni gogoh-Ni, sada pe lang ai magou.
- ²⁷ Mase ma isahapkon ham, ale Jakob, anjaha ihatahon ham, ale Israel, "Ponop do dalanku

humbani Jahowa, anjaha Naibatanku seng parduli bani parkarangku?

²⁸ Ai seng ibotoh ham, atap seng ibogei ham, Naibata sisadokah ni dokahni do Jahowa, sitompa ujung ni tanoh on? Seng ra loja la atap ngayotan, seng tarsibar pingkiran-Ni.

²⁹ Ia do na mambere gogoh bani halak na loja, anjaha halak na so margolle ibahen do hinsah.

³⁰ Loja pe garama anjaha ngayotan, anjaha mangkatompas halak na maposo,

³¹ tapi halak na martenger ni uhur bani Jahowa jumpahan gogoh mardapot-dapot, anjaha marhabong ni haluhuy do sidea naik; marlintuni pe sidea tapi seng marnaloja, mardalani pe sidea, tapi seng marnangayotan.”

Marguru bani Naibata do na Masa bani Bangsa-bangsa

41 ¹ Sip ma hanima manangihon Ahu, ale sagala pulou, anjaha hanima bangsa-bangsa, pabayu ma gogohnima. Roh ma sidea hun dohor, ihatahon ma, “Rap ma hita marayak paruhuman.”

² Ise do na mamuhosi hun hapoltakan, na jumpahan hamonangan bani ganup langkahni? Ise do na mangondoskon bangsa

sipajuh begu-begu hu lobeini, anjaha ibere kuasa bani marrojati raja-raja? Doskon orbuk do sidea ibahen podangni, anjaha songon lamlam na sinaburhon sidea ibahen siorni.

³ Ipardakdak do sidea, anjaha sonang do ia montas, bani dalan na so onggga nidogei naheini.

⁴ Ise do na mambahen pakon na mandalankon ai? Ise do na mandilo sundut ni jolma humbani mungkahni? Ahu do, Jahowa, na parlobei anjaha na parpudi, Ahu do ai.

⁵ ididah pulou do ai gabe mabiar, ujung ni tanoh on gobir do; roh ma sidea hundohor anjaha martumpu-tumpu ma.

⁶ Ganup sidea marsiurupan, anjaha nini dompak hasomanni, "Tenger ma uhurmu!"

⁷ Tuhang bosi pahinsahon tuhang omas, sonai sijolom parpalu bani halak siantuk nanggar, mangkatahon bani pamodi, "Dear ma ai." Jadi ipatoguh ma ai marhitei paku, gabe seng be miut-iut.

**Iramotkon Naibatani do
Bangsa-Ni halani Goran-Ni**

⁸ Tapi ho, ale Israel, juakjuak-Ku ho ale Jakob, na dob Hupilih in, ginompar ni si Abraham, huan-kuan-Ku ai,

- ⁹ ho na dob Hualop hun ujung ni tanoh on, anjaha Hudilo hun tampakanni, anjaha domma Huhatahon bam, “Juakjuak-Ku do ho, Ahu do mamilih ho, anjaha seng ambukkonon-Ku ho.
- ¹⁰ Ulang ho mabiar, ai Ahu do hasomanmu, ulang ho rusak, ai Ahu do Naibatamu. Hupargogohi pe ho, tongon Huurupi pe ho, tongon Hutatang pe ho marhitei tangan-Ku siamun na marhamonangan in.
- ¹¹ Tonggor ma, maningon maila anjaha bador do sagala halak na marah dampak ho; halak na mambahen partinggilan bam, masab anjaha magou do.
- ¹² Pindahanmu do sidea, na manlawan ho ai, tapi seng jumpah ho be sidea; gabe na lang do sidea anjaha magou, sidea na mammunsuhi ho ai.
- ¹³ Ai Ahu, Jahowa Naibatamu do, na manjolom tanganmu siamun; Ahu do na mangkatahon bam, ‘Ulang mabiar, Ahu do na mangurupi ho!’
- ¹⁴ Ulang ho mabiar, ale goya Jakob, ale Israel hulanan na etek-etek! Ahu do na mangurupi ho, nini Jahowa; Na Pansing ni Israel do Sipaluah bam.
- ¹⁵ Tonggor ma, bahenon-Ku do ho gabe gareta pardogei na baru, na marot anjaha na

maripon; dogeionmu do dolog anjaha
parropukonmu do ai, anjaha gabe lapa-lapa
do bahenonmu buntu-buntu.

- ¹⁶ Piaranmu do sidea, anjaha luahonon ni logou
do sidea, haba-haba do mangerap sidea.
Tapi anggo ho marolob-olob do ibagas
Jahowa, mamuji-muji ibagas Na Pansing ni
Israel.
- ¹⁷ Halak na madoyuk na masombuh mangindahi
bah, hape seng dong, horah do dilah ni sidea
ibahen horahni, Ahu Jahowa, manangihon
sidea, Ahu Naibata ni Israel, seng anjai
tadingkonon-Ku sidea.
- ¹⁸ Patubuhon-Ku do bah mardalan bani
buntu-buntu na leseng, anjaha bah tubuh i
tongah-tongah ni habungan; bahenon-Ku
do halimisan gabe tao, anjaha tanoh
dorging-dorging gabe hatubuhan ni bah.
- ¹⁹ Nahkonon-Ku do i halimisan hayu ares, tusam,
sampinur ampa hayu jetun; suanon-Ku
do bani tanoh dorging-dorging sampinur,
jabi-jabi rap pakon maranti,
- ²⁰ ase ididah, itanda, iparuhurhon, anjaha
iartihon sidea, paboa tangan ni Jahowa na
mambahen ai, anjaha Na Pansing ni Israel
do na manompa ai.”

Na Lang do Sagala Sisombahon i lobei ni Jahowa

- ²¹ Boan hanima ma hujon pakaranima, nini Jahowa, patugah ma tanda-tandani, nini Raja ni Jakob.
- ²² Roh ma sidea hun dohor anjaha ipatugah ma bennami aha na laho masa. Na masa bani mungkahni, aha do ai, patugah hanima ma, ase iparimbagaskon hanami, anjaha ibotoh hanami ujungni ai. Atap pabogeihon hanima ma bennami na sihol masa,
- ²³ patugah hanima ma aha na masa dob on, ase ibotoh hanami atap Naibata do hanima tongon. Antong bahen hanima ma na madear atap na masambor, ase longang hanami anjaha gobir.
- ²⁴ Tonggor ma, na lang do hanima, anjaha horjanima sisoya-soya do; anjaha hagigi do halak na mamilih hanima.
- ²⁵ Hupuhoi do sada halak hun utara, anjaha domma roh ia; hun hapoltakan ni mata ni ari, idilo do goranku; rojattonni do parkuasa songon tanoh halampung, songon sitopa hudon mandogei tanoh hudon.
- ²⁶ Ise do na patugahkon ai humbani mulani, ase ibotoh hanami, humbani na hinan, ase tarhatahon hanami: Sintong do ai? Tapi ise pe lang na patugahkon ai, ise pe lang na

pabotohkon, sahalak pe lang na manangar hatanima.

²⁷ Ahu do na parlobei na patalar ai bani Sion, anjaha Husuruh do hu Jerusalem siboan ambilan malas ni uhur.

²⁸ Anjaha mangkawah Ahu inggot, tapi sahalak pe seng dong; sada pe lang humbani sidea sipanuturi, na boi mambere balos anggo manungkun Ahu.

²⁹ Tongon, na lang do sidea ganup, anjaha sisoya-soya do pambahenan ni sidea; logou anjaha na lang do gana-gana ni sidea.

Juakjuak ni Jahowa, na Manondangi Dunia on

42 ¹ Tonggor ma, juakjuak-Ku, na Hutogu in, na Hupilih in, na hinarosuhkon ni Tonduy-Hu. Domma Hupasorap Tonduy-Hu hu Bani, patandahonon-Ni do habonaron hubani sipajuh begu-begu.

² Seng marsurak-surak la barang maling sora-Ni ibahen, anjaha seng ipabogeihon sora-Ni i dalam-dalan.

³ Arung-arung na dob marosak, seng lanjar ponggolhonon-Ni, anjaha sumbu na mirlop-irlop, seng lanjar intopan-Ni; domu hubani hasintongan do dalankonon-Ni uhum.

- ⁴ Seng anjai miloh ia anjaha seng anjai marosak ia, paima ipajongjong hasintongan i tanoh on anjaha pulou-pulou masihol bani titahni.
- ⁵ Sonon do hata ni Naibata Jahowa, Sitompa langit anjaha na paherbangkorsi, na pajonamkon tanoh on ampa sagala na tubuh hunjai, na mambere hosah bani halak na marianan ijai ampa tonduy bani jolma na mardalan ijai,
- ⁶ “Ahu do Jahowa, na mandilo ho ibagas hapintoron anjaha na manogu tanganmu. Ahu do na parorot ho anjaha Ahu do na pabangkit ho gabe parpadanan bani bangsa in, gabe panondang bani bangsa parbegu,
- ⁷ laho mambuha mata ni na mapitung, laho padaratkon na tarsangkut ibagas tutupan, humbagas rumah tahanan halak na marianan ibagas na golap.
- ⁸ Ahu do Jahowa, ai ma goran-Ku, anjaha hasangapon-Ku, seng bereon-Ku bani na legan, sonai hamuliaon-Ku bani gana-gana.
- ⁹ Na dob hinatahon hinan domma saud, anjaha na baru Hupatugah ma sonari; paima martumbor ai, pabogei honon-Ku ma ai bannima.”

**Doding Puji-pujian bani
Jahowa, Sipaluah Bangsa-Ni**

- ¹⁰ Dodingkon nasiam ma bani Jahowa sada doding na baru, hamuliaon-Ni bani ujung ni tanoh on, nasiam na marlayar i laut ampa ganup na mangingani ai, nasiam pulou-pulou ampa na marianan ijai.
- ¹¹ Sai ipamaling halimisan ma sorani ampa na montas ijai, dusun-dusun, na niiankon ni halak Kedar; sai marolob-olob ma halak na marianan bani dolog batu, marsurak-surak ma sidea hun pakpak ni dolog.
- ¹² Ibere sidea ma hasangapon bani Jahowa, anjaha ibaritahon ma hamuliaon-Ni bani pulou-pulou.
- ¹³ Bingkat do Jahowa songon puanglima, songon halak siparmunsuh gajag ringis-Ni; ipamaling sora-Ni, marsurak porang do la, anjaha ipataridahkon hapuanglimaon-Ni bani munsuh-Ni.
- ¹⁴ Hupasip do humbani nahinan, sai soh do Ahu, hutahan diri-Ku, tapi sonari mandodoruh do Ahu songon puang-puang na mangarou, hosah-kosah do Ahu mangalop hosah.
- ¹⁵ Seda do bahenon-Ku dolog-dolog pakon buntu-buntu, anjaha pameluson-Ku do suan-suananni; salihkonon-Ku do bah

mardalan gabe tanoh dorging-dorging
anjaha horah bahenon-Ku tao.

- ¹⁶ Togu-toguon-Ku do halak na mapitung bani
dalan na so onnga tinandani, bobaan-Ku
do sidea bani dalan na so onnga binotohni,
paubahon-Ku do hagolapan na ilobei ni
sidea gabe haliharon, anjaha dalan na
marjuntul-juntul gabe tanoh na rata. Ai
ma na sihol bahenon-Ku anjaha seng anjai
lupahonon-Ku ai.
- ¹⁷ Maningon surut do hupudi anjaha tarbador
sagala na martenger ni uhur bani gana-gana
na niuhir, na mangkatahon bani gana-gana
na tinuang, “Nasiam do Naibatanami.”

Jahowa do Sipaluah bani Bangsa-Ni

- ¹⁸ Nasiam na nengel, tangar ma, anjaha
nasiam na mapitung, mangkawah ma ase
marpangidah nasiam!
- ¹⁹ Ise do na pitung anggo lang juakjuak-Ku,
atap na nengel songon suruhan-Ku na
Husuruh in? Ise do na pitung songon na
Huhaporsayai in, atap na pitung songon
juakjuak ni Jahowa?
- ²⁰ Tongon, buei do na nididahmu, tapi lang
iparimbagaskon ho, buha do pinggolmu,
tapi seng ibogei ho.

²¹ Iharosuhkon Jahowa do, halani hapintoron-Ni, patimbulhon anjaha pasangapkon titah-Ni.

²² Tapi on do sada bangsa na nirampok ampa na nirampas; ganup do sidea targari ibagas liang, anjaha iponopkon ibagas tutupan; gabe sisorohon do sidea seng dong na paluahkon, gabe sirampason, anjaha seng dong na mangkatahon, “Paulak!”

²³ Ise i tengah-tongahnima na manangihon hata ai, anjaha na marimbagaskon anjaha na mardiateihon ai bani panorang na roh?

²⁴ Ise do na mambere Jakob bani siparrampas anjaha Israel bani halak panamun? Ai lang Jahowa do, halani mardousa hita hu Bani? Seng ra sidea mardalan bani dalan-Ni, anjaha seng itangihon sidea titah-Ni.

²⁵ Halani ai iuseihon do bani sidea gara ni ringis-Ni, ampa jobu ni hamunsuhon; ai ma na mambahen gara sidea inggot, tapi lalab do seng iarusi; tapi seng iparuhurhon ai.

43 ¹ Tapi sonari, sonon do hata ni Jahowa, “Sitompa ho, ale Jakob, anjaha na manjadihon ho, ale Israel, ‘Ulang ho mabiar, ai Ahu do sipaluah ho, domma Hudilo goranmu, Ahu do simada ho.

² Anggo ibontas ho bah, Ahu do hasomanmu, bani na mandipari bah bangga seng ayubkonon-Ni ho. Anggo mardalan ho

hubagas apuy, seng anjai mosog ho, anjaha seng matutung ho bahenon ni gara ni apuy.

- ³ Ai Ahu do Jahowa Naibatamu, Na Pansing ni Israel, Sipaluah ho. Domma Hubere Masir gabe partobusmu, Kus pakon Seba do panggantihmu.
- ⁴ Halani harga do Huidah anjaha na pinasangap, anjaha holong do uhur-Hu bam, Hubere do jolma panggantihmu, ampa bangsa-bangsa ganti ni hosahmu.
- ⁵ Ulang ho mabiar, ai Ahu do hasomanmu, hun hapoltakan do parohon-Ku ginomparamu, anjaha hun hasundutan patumpuon-Ku ho.
- ⁶ Hatahonon-Ku ma bani utara, "Paulak!" Dompok dangsina, "Ulang jolomi!" Boan anak-Ku humbani na daoh, ampa borung-Ku hun ujung ni tanoh on,
- ⁷ haganup na marpanggoranan bani goran-Ku, na Hutempa bahen hasangapon-Ku, na Hurumang anjaha na Hujadihon.

Israel do Hasaksian Pasal Naibata Jahowa

- ⁸ Boan ma hujon bangsa na pitung, hansi pe dong matani, anjaha na nengel, hansi pe adong pinggolni!
- ⁹ Sagala bangsa parbegu, roh ma marhumpul, anjaha martumpu ma ganup bangsa-bangsa! Ise ma humbani sidea na pabotohkon on,

anjaha na pabogehon na masa hinan hu banta? Ipajongjong ma saksini mamintori sidea, ase itangar halak anjaha ihatahon, “Sintong do!”

- ¹⁰ Hanima do saksing-Ku, nini Jahowa, anjaha juakjuak-Ku na dob Hupilih, ase itanda anjaha ihaporsayai hanima Ahu, anjaha iarusi hanima: Ahu do in. I lobei-Hu seng dong Naibata, i puding-Ku pe seng anjai dong.
- ¹¹ Ahu, Ahu do Jahowa, anjaha sobali Ahu seng dong Sipaluah.
- ¹² Ahu do na pabotohkon ampa na paluahkon ampa na pabogehon ai, anjaha seng dong naibata na legan i tongah-tongahnima; hanima do saksi-Ku, nini Jahowa, Ahu do Naibata.
- ¹³ Ahu do ai humbani na basaia, seng dong na boi paluahkon humbani tangan-Ku; Ahu do mambahen, mintor ise ma na boi manundatisi?

Jahowa do Sipasuang Israel

- ¹⁴ Sonon do hata ni Jahowa, “Sipaluah bannima, Na Pansing ni Israel: Halani hanima, Ahu do marsuruh hu Babel, anjaha Huhatahon iparseda pating-pating ni tutupannima,

gabe mubah ma olob-olob ni halak Kasdim
gabe tangis-tangis.”

- ¹⁵ Ahu do Jahowa Na pansing bannima, Sitompa
Israel, Rajanima.
- ¹⁶ Sonon do hata ni Jahowa na mambahen pasar
i tongah laut ampa na pauli dalam bani bah
marbanggal,
- ¹⁷ na mambahen ase mandarat gareta porang
ampa huda, bala ampa siparporang;
martibalan do sidea seng tarjongjongkorsi
be, miloh do sidea, mintop songon sumbu.
- ¹⁸ Ulang be dingat-dingat hanima na parlobei
ondi, anjaha ulang ma pingkir-pingkiri na
dob masa.
- ¹⁹ Tonggor ma, Ahu mambahen na baru, domma
martumbor nuan, ai lang ididah hanima
ai? Ahu mambahen pasar i halimisan, bani
tanoh dorging-dorging bah mardalan.
- ²⁰ Pasangapon ni binatang na i talun do Ahu,
sorigala ampa burung unta; ai Ahu do
na mambere bah i halimisan ampa bah
mardalan i tanoh dorging-dorging, laho
mambere minum bangsa-Ku na Hupilih in,
- ²¹ bangsa na Hujadihon Bangku ase ibaritahon
hamuliaon-Ku.
- ²² Tapi seng Ahu ipadilo-dilo ho, ale Jakob, anjaha
seng ra ho loja marhalani Ahu, ale Israel.

- ²³ Seng iboan ho Bangku biribiri bahen galangan situtungonmu, anjaha seng ipasangap ho Ahu marhitei galangan sisayatonmu. Ai sedo na Huparjabolon ho marhitei galangan sipanganon, atap Hulojai ho marhitei dahupa.
- ²⁴ Seng iboli ho Bangku morum-moruman marhitei pirakmu, anjaha taboh-taboh ni galanganmu seng pabosur Ahu. Tapi domma iparjabolon ho Ahu marhitei dousamu, domma ilojai ho Ahu marhitei hajahatonmu.
- ²⁵ Ahu, Ahu sandiri pasaloseihon panlanggaronmu halani Ahu, anjaha dousamu seng be padingat-dingaton-Ku.
- ²⁶ Paingat ma Ahu, marsipatorangan ma hita. Pajojor ma, pintori dirimu.
- ²⁷ Ompungmu na parlobei ai mardousa do, anjaha sipangapiti bam marbalik do hun Bangku;
- ²⁸ ipabutak raja-rajamu do rumah-Ku na ma pansing in. Halani ai do ase Huondoskon Jakob bani hasedaon, anjaha Israel bani hahirion.”

**Bagah-bagah ni Jahowa pasal Tonduy-Ni
Siuseihonon-Ni bani Bangsa-Ni**

44 ¹ Tapi sonari, tangihon ma, ale Jakob, juakjuak-Ku, ampa ho Israel, na dob Hupilih in!

² Sonon do nini Jahowa, na manjadihon ho, na marrumang ho i partapaan ope, anjaha na sihol mangurupi ho: Ulang ho mabiar ale Jakob, juakjuak-Ku ampa ho ale Jesurun na Hupilih in.

³ Ai useihonon-Ku do bah bani tanoh na horah, ampa bah mardalan bani tanoh dorging-dorging: Useihonon-Ku do Tonduy-Hu bani dakdanakmu ampa pasu-pasung-Ku bani ginomparamu.

⁴ Jadi martumbor ma sidea songon poyon-poyon i lambung ni bah, anjaha songon arung-arung i topi ni bah mardalan.

⁵ Hatahonon ni deba halak ma, "Jahowa do simada ahu; na legan marpanggorankon goran ni Jakob, na legan use manuratkon bani tanganni, 'Rupe ni Jahowa, anjaha manggorani dirini marhitei goran Israel.'" "

Na Lang do Sisombah-sombahon ni jolma

⁶ Sonon do hata ni Jahowa, Raja ni Israel, anjaha na paluahkonsi, Jahowa Zebaot! "Ahu do na

parlobei anjaha Ahu do na parpudi; seng dong Naibata sobali Ahu.

⁷ Ise ma na songon Ahu? Idilohon ma ai, ipatugah ma, ituri-turihon ma i lobei-Hu. Ise do na patugahkon humbani mungkahni, aha na sihol masa? Ipabotohkon ma banta aha na sihol roh!

⁸ Ulang hanima gobir, ulang mabiar! Ai lang domma humbani nahinan Hupabogehon anjaha Hupabotohkon ai bannima? Anjaha hanima do saksi-Ku. Ai adong do Naibata sobali Ahu? Seng dong batu gingging, seng dong anggo Hubotoh.”

⁹ Sipauli gana-gana, na lang do ganup sidea, anjaha na hinarosuhkon ni sidea seng marguna ai; saksi ni sidea seng marpangidah, seng marpambotoh, halani ai bador do sidea.

¹⁰ Ai ise do sidea sipauli naibata, situang gana-gana na so marguna ai?

¹¹ Tonggor ma, ganup hasomanni ai tarbador do, anjaha tuhangni jolma do; age pe martumpu anjaha marrohan sidea, sai na tarsonggot do sidea anjaha bador.

¹² Tuhang bosi patureihon hapak, marhasoman milas ni apuy; itopa do ai marhitei parpalu, ipadear marhitei gogoh ni tanganni; pala loheian ia gabe

seng margogoh, maradu seng minum bah ia gabe galek ia.

¹³ Tuhang hayu pagistang bonang arang, mambahen martanda marhitei panurat; ihorjai ma ai marhitei hotam, iuhir anjaha ipolas; ibahen ma ai mangusih dalahi, songon jolma na jenges, laho marianan ibagas rumah.

¹⁴ Adong halak na marrobah hayu ares bani, atap na mambuat hayu maranti atap hoting batu, na pinilihni humbani hayu na i tombak; adong na manuan hayu tusam, ipabanggal-banggal udan ma ai.

¹⁵ Marguna do ai bani jolma gabe soban ibuat ma deba hunjai bahen pandadangan, deba pagara apuy laho pamasak ruti; ipauli do homa hunjai naibata, anjaha isombah ma ai; ibahen do hunjai gana-gana anjaha marrogop ia i lobei ni.

¹⁶ Satongah hunjai panggarai ni apuy, igoreng do gulei marhitei ai, anjaha na ginoreng ai ipangan gabe bosur; mandadang homa ia anjaha ihatahon ma, "Ah, malas huahap, ibahen apuy on!"

¹⁷ Na tading ai gabe naibata ibahen, gabe gana-gana, marrogop ma ia hujai laho marsombah; martonggo do ia hujai, nini, "Paluah ham ma ahu, ai ham do naibata bangku."

¹⁸ Seng dong na binotoh ni sidea, anjaha seng dong na niartihon ni sidea; domma rapat mata ni sidea

seng marpangidah, anjaha domma hobal uhur ni sidea, gabe seng marpangartian be.

¹⁹ Seng dong na marimbagaskon seng dong habotohon atap pangarusion, gabe ihatahon, “Satongah hututung ibagas apuy, anjaha hupamasak roti i atas narnarni, hugoreng gulei anjaha hupangan; mintor bahenonku ma na tading ai gabe sisombahon? Mintor manrogop ma ahu i lobei ni samponggol hayu?”

²⁰ Siramotkon abuan, uhurni do na hona tipu anjaha na kahou ijai; seng tarpaluahsi tonduyni atap tarluarhonsi, “Ai ladung do nani na ibagas tangan siamunkon?”

Olob-olob halani Partobus ni Jahowa bani Bangsa-Ni

²¹ Paruhurhon ma on ale Jakob ampa ho ale Israel, ai juakjuak-Ku do ho! Ahu do na manjadihon ho, juakjuak-Ku do ho, ale Israel, seng anjai lupahonon-Ku ho.

²² Domma Hupasisi salahmu songon hambun, anjaha songon hambun na manorap dousamu. Mulak ma ho hu Bangku, ai Ahu do na manobus ho.

²³ Marolob-olob ma, ale langit, ai Jahowa do sibahen ai! Marsurak ma, ale pusat ni tanoh on! Marmegah-megah ma ale dolog, ampa ho ale tembok, rap pakon sagala hayu na

ibagas ai! Ai domma itobus Jahowa Jakob,
anjaha marhitei Israel marmulia Ia.”

Ipakei Naibata si Kores gabe Parugas-Ni

- ²⁴ Sonon do hata ni Jahowa na manobus
ho anjaha na manjadihon ho sanggah
i partapaan ope. Ahu do Jahowa, na
manjadihon sagala na dong, na paherbang
langit marhitei Ahu tumang, anjaha na
paamparhon tanoh on marhitei gogoh-Ku
sandiri;
- ²⁵ na manlangkon tanda ni parladung, na
mambahen oto partondung, na mambahen
surut hu pudi halak na pentar, anjaha na
mambahen haotoon hapentaran ni sidea;
- ²⁶ na mambahen totap hata ni juakjuak-Ni,
anjaha na pasaudkon ranggian na ipatugah
suruhan-Ni, na mangkatahon bani
Jerusalem, “Ningon ianonkon do; anjaha
bani huta-huta ni Juda: Ningon paulion do
anjaha reong-reongni pajongjongon-Ku do;
- ²⁷ na mangkatahon bani bah na bagas: Horah ma,
anjaha binangani arsikon-Ku do;
- ²⁸ na mangkatahon bani si Kores: Ale parmahan-
Ku anjaha sagala sura-surang-Ku pasaudonni
do; na mangkatahon bani Jerusalem: Paulion
do in; anjaha bani rumah panumbahan:
Pajonamon do in.”

- 45** ¹ Sonon do hata ni Jahowa dampak si Kores na mininakan-Ni ai, na Hujolom ai tanganni siamun laho patundukkon bangsa-bangsa i lobei ni, mananggali sinjata humbani binongei ni raja-raja, laho mambuha labah i lobei ni, ase ulang boi hona tutup horbangan.
- ² Ahu do mardalan i lobeimu anjaha padosdoskon dolog-dolog; Ahu do na marropuki labah tombaga, anjaha na manrosaki pating-pating bosi.
- ³ Ahu do mamberehon bam arta na ponop, ampa ugas-ugas na buni, ase itanda ho, paboa Ahu do Jahowa Naibata ni Israel, na mandilo ho bani goranmu.
- ⁴ Marhalanohon ni juakjuak-Ku si Jakob pakon Israel na Hupilih in, ase Hudilo ho bani goranmu, anjaha marmulia Hubahen goranmu age pe seng itanda ho Ahu.
- ⁵ Ahu do Jahowa, seng dong na legan, sobali Ahu seng dong Naibata; Hugonditi do ho, age pe seng itanda ho Ahu,
- ⁶ ase ibotoh halak na i hapoltakan pakon na i hasundutan, na so adong Naibata sobali Ahu. Ahu do Jahowa, seng dong na legan, na manjadihon haliharon anjaha na mangadongkon na golap,

- ⁷ na mambahen hadameion ampa na mangadongkon hamagouan. Ahu do Jahowa sibahen haganupan ai.
- ⁸ Manekteki ma, ale langit, hun babou, anjaha hambun iuseihon ma udan hapintoron! Buha ma tanoh on, ase itubuhkon hatuahon, anjaha ibahen ma homa hapintoron martumbor! Ahu do Jahowa na manjadihon ai.

Golpa-golpa bani Israel, ase Unduk bani Panogu-noguon ni Jahowa

- ⁹ Bursik ma halak na mambahen paringoran dampak na manompasi, sada sanga-sanga dampak sitopa hudon. Mintor hatahonon ni tanoh halampung ma dampak na manompasi, "Aha do na binahenmin? atap hatahonon ni tinopani ai ma, 'Seng dong tanganmu!'"
- ¹⁰ Bursik ma halak na mangkatahon bani bapani, 'Mase ma manubuhkon ho?' atap dampak inangni, 'Mase ma mangarou ho?'"
- ¹¹ Sonon do hata ni Jahowa, 'Na Pansing ni Israel anjaha na manompasi: Sihol sungkunonnima Ahu pasal anak-Ku anjaha aturonnima Ahu pasal jadi-jadian ni tangan-Ku?'"
- ¹² Ahu do na manjadihon tanoh on, anjaha jolma na i atas ni, Ahu do manompa; Ahu,

tangan-Ku sandiri do na paherbang langit,
anjaha Ahu do na mamarentah ganup
balani.

- ¹³ Ahu do pabangkitkansi marhitei hapintoron
anjaha Ahu pahornop dalam bani; ia do na
paulihon hutang-Ku anjaha paluahonni do
bangsang-Ku na tarbuang in; seng halani
upah atap halani sisip; nini Jahowa Zebaot.”

**Maningon Mangaku anjaha Tunduk
bani Jahowa do Ganup Tanoh on**

- ¹⁴ Sonon do hata in Jahowa, “Habayakon ni halak
Masir, boniaga ni halak Etiopia pakon halak
Seba, pardaging na ganjang ai, maningon
bam do ai mandipar anjaha ho simada
ai: irikkonon ni sidea do ho, roh do sidea
ibagas gari marrogop i lobeimu, bam do
sidea mangelek-elek: Pitah bamu do dong
Naibata, anjaha seng dong na legan, sobali
la seng dong Naibata.”
- ¹⁵ Tongon, Ham do Naibata na ponop
marhadirion, ale Naibata ni Israel, Sipaluah
in.
- ¹⁶ Maila anjaha tarbador do sidea haganup;
madorun do sidea haganup halak sipauli
gana-gana.
- ¹⁷ Tapi Israel, maluah do marhitei Jahowa,
maluah tongon ronsi sadokah ni dokahni,

seng anjai maila anjaha seng anjai bador
hanima sadokah ni dokahni.

¹⁸ Ai sonon do nini Jahowa, “Sitompa langit in, ai
ma Naibata na manompa tanoh on ampa na
manjadihonsi, ai ma na pajonamkonsi, sedo
ase tarulang ase itompa, bahen ianan do
ase ijadihon ai; Ahu do Jahowa, seng dong
na legan.

¹⁹ Seng bani na ponop marsahap Ahu atap
bani ianan na golap i tanoh on; seng
dong Huhatahon bani ginompar ni si
Jakob: Soya-soya do na pinindahannima
in Ahu! Ahu do Jahowa, na mangkatahon
hapintoron, na patugahkon hasintongon.

²⁰ Martumpu ma, anjaha roh ma hanima hu
Bangku, padohor hanima ma ganup, ale
na pinaluah hambani bangsa-bangsa!
Seng marpangarusion sidea ai, na
mangusung gana-gana hayu ni sidea, ampa
na manumbah bani naibata na so boi
paluahkon.

²¹ Baritahon ma, pajojor ma; manriah ma hanima
samah hanima. Ise do na pabogei hon on
hambani na hinan, na pabotohkon hambani
sapari? Ai lang Ahu do Jahowa? Seng dong
Naibata sobali Ahu, Naibata na pintor
anjaha na boi paluahkon, seng dong sobali
Ahu.

- ²² Dompakkon hanima ma Ahu ase ipaluah hanima, ale ujung ni tanoh on. Ai Ahu do Naibata, seng dong na legan be.
- ²³ Domma marbija Ahu bani diring-Ku, hapintoron do luar humbani pamangan-Ku, hata na so boi mulak: Maningon manowod do sagala towod Bangku, marbija sagala dilah,
- ²⁴ nini, ‘Pitah ibagas Jahowa do adong hapintoron ampa hagogohon bangku.’ Haganup na mangimbangi maningon roh do hubani gabe tarbador.
- ²⁵ Ibagas Jahowa dapotan hapintoron anjaha mamuji-muji do ganup ginompar ni Israel.”

**Pardabuh ni Sisombah-sombahon na i
Babel, ampa Panarohon ni Naibata na
Timbul in bani Bangsa-Ni**

- 46** ¹ Domma tompas Bel, domma gadab Nebo; bani binatang ampa pinahan ipausungkon gana-ganani ai; boratan do sidea anjaha ngayotan, paboan-boan gana-gana na ni usung-usungnima ai hinan.
- ² Rap gadab anjaha tompas do sidea, seng tarpaluah sidea sipangusung ai; sidea sandiri laho hu habuangan.
- ³ Tangihon hanima ma Ahu, ale ginompar ni Jakob, ampa haganup na tading humbani ginompar ni Israel, na Huombah humbani

partapaan nari, na Huabing mulai humbani partubuhni.

- ⁴ Das bani hatuaonnima totap do tong Ahu, ronsi na ubanon hanima, Ahu do tong mangambah hanima. Ahu do na dob mambahen ai, anjaha Ahu ma na mangambah, Ahu ma na mangusung anjaha Ahu ma na paluahkon.
- ⁵ Bani ise sihol pausihonnima Ahu anjaha parbandingkonnima, barang parumpamahononnima Ahu, paboa usih Ahu hujai?
- ⁶ Irungrungi sidea do omas humbani ranjutni, anjaha pirak idasing bani timbangan; iupahi sidea do tuhang omas, anjaha ipauli sidea ma sada naibata. Marrogop ma sidea, marsombah sidea tene hujai.
- ⁷ Iabarai sidea ma ai, anjaha iusung ma; inahkon sidea ma ai bani iananni, jadi jongjong ma, seng meret ia humbani iananni. Anggo adong na dilo-dilo bani, seng ibalosi ai, seng ipaluah ia humbani hasosakanni.
- ⁸ Ingat hanima ma ai anjaha parimbagaskon, ulak-ulak hanima mardiateihon ai, ale hanima sipanlanggar.
- ⁹ Ingat hanima ma na dob masa humbani mungkahni: Ahu do Naibata, seng dong na

- legan; Ahu do Naibata, seng dong na doskon Ahu,
- ¹⁰ na pabotohkon na sihol masa humbani mungkahni, anjaha humbani na basaia na so masa ope, na mangkatahon, “Sai totap do sura-surang-Ku, anjaha pasaudkon sagala ranggian-Ku,
- ¹¹ na mandilo manuk-manuk nanggordaha hun hapoltakan, humbani tanoh na daoh dalahi sipasaud sura-surang-Ku. Songon na dob Huhatahon, sonai do pamasaon-Ku, aha na dob Huranggihon, ai do bahenon-Ku.
- ¹² Tangihon hanima ma Ahu, ale na hengkeng maruhur; hanima na ganggang humbani hapintoron.
- ¹³ Domma Huboan hundohor hapintoron-Ku, seng be daoh, anjaha haluahon na hun Bangku seng dokah be. Bereon-Ku do haluahon bani Sion, ampa hamuliaon-Ku bani Israel.”

Uhum bani Babel

- 47** ¹ Turun anjaha hundul ma bani orbuk, ho anak boru Babel! Hundulhon bani tanoh, seng marparatas, ho boru Kasdim! Seng be goranon ho naboru na lamlam anjaha na jenges.

- ² Alop losung, duda nitak! Padaoh tudung-tudungmu, anjaha tanggali baju ganjangmu; marbasahan ho, dipari ma binanga ai!
- ³ Talar ma hatalanjangonmu anjaha taridah hailaonmu; sihol do Ahu marlulu, jolma pe lang Hulioi,
- ⁴ nini, “Sipaluah hita, ai ma Jahowa Zebaot, Na Pansing ni Israel.”
- ⁵ Sip ho hundul, anjaha laho ma hubani na golap, ale boru Kasdim! Ai seng be goranon ho, boru jujungan ni harajaon-harajaon.
- ⁶ Manggila do Ahu bani bangsang-Ku, Hupaturut do butak parbagianan-Ku; Huondoskon do sidea hubagas tanganmu, tapi seng marholong ni atei ho bani sidea; bani na matua pe itampeihon ho do pasanganmu na borat ai.
- ⁷ Nim, “Sadokah ni dokahni do ahu dong, boru jujungon do ahu lalap!” Seng iparuhurhon ho ai atap ipingkiri ho, sonaha ujung ni ai.
- ⁸ Halani ai tangihon ma on, ale siparmegah-megah, ho na hundul marsonang-sonang, na mangkatahon ibagas uhurmu, “Ahu ma da in, seng dong sobali ahu!” Seng anjai mabalu ahu, seng anjai popor ahu!
- ⁹ Na dua on maningon mangonai bam, sompong ibagas na sadari: Hapoporon ampa habaluon maningon roh do bam ibagas parsuhatan

na gok, age pe buei uti-utiannima anjaha marhagogohon tabas-tabasmu.

¹⁰ Ipangajamkon ho do hajahatonmu, nim, “Seng dong na mangidah ahu!” Hapentaranmu ampa habotohonmu do na pakahouhon ho, gabe ihatahon ho ibagas uhurmu, “Ahu ma da in, seng dong sobali ahu!”

¹¹ Tapi roh ma bam hamagouan, na so boi tulakonmu, mangonai ma bam hasedaon, na so tarlembangi ho; sompong do ho malonglong, na so niagak ni uhurmu.

¹² Nunut ma tongon uti-utianmin ampa hinabuei ni tabasmin, na hinalojahonmin humbani sietek-etekonmu nari, ra tolak do ho mangurupi, ra tarpambiar-biari ho do.

¹³ Loja ni in ho ibahen buei ni sipodahi ho, jongjong ma tongon sidea mangurupi ho, sisibari langit ai, na mardiateihon bintang-bintang ai, na pabotohkon aha na sihol roh bam, bani ganup poltak ni bulan.

¹⁴ Tonggor ma, songon tompoh-tompok do sidea siboiskonon ni apuy; seng tarpaluah sidea dirini humbani gara ni apuy. Ai apuy ai sedo bahen pandangan ai, sedo apuy tataring ai, na boi sidohoran.

¹⁵ Sonon do masa bam humbani halak na hinopkopmu, humbani hasomanmu martiga-tiga humbani sietek-etekonmu nari:

Ganup sidea lintun marsitohu dalanni; seng dong na paluahkon ho.

**Halani Goran-Ni do ase lidopi Naibata
Bangsa-Ni na Tendel Maruhur ai**

48 ¹ Tangihon ma on, ale ginompar ni Jakob, na marpanggoranan bani Israel, na luar humbani bah ni Juda, na marbija ibagas goran ni Jahowa, anjaha na manaksihon Naibata ni Israel, tapi seng ibagas hasintongan atap hapintoron.

² Tongon, marpanggorankon huta na pansing ai do sidea, anjaha marpangunsandeian bani Naibata ni Israel; Jahowa Zebaot do goran-Ni.

³ Na dob masa in, humbani sapari do in Hupatugah, humbani pamangan-Ku do ai luar, anjaha Ahu do na pabogehon ai. Sompong do ai masa Hubahen, gabe saud do ai.

⁴ Halani Hubotoh, tendel do uhurmu, tangkuhukmu songon urat-urat humbani bosi anjaha pardompakanmu songon tombaga,

⁵ halani ai Hupabotohkon do ai bam humbani na basaia, paima masa ai, domma Hupabogehon ai bam, ase ulang ihatahon ho, "Sisombahonku do na mambahen ai,

gana-gana na huuhir ampa gana-gana na hutuang do na mamarentahkon ai.”

⁶ Domma itangar ho, torih ma ganupan ai! Ai seng baritahononnima ai? Pabotohknonon-Ku do bannima na baru humbani sonari ampa na ponop, na so binotohnima.

⁷ Sonari do ijadihon ai, seng na ijia, seng ibogei ho ai hinan, ase ulang ihatahon ho, “Tonggor ma, domma hubotoh ai hinan.”

⁸ Seng onggga ibogei ho, seng onggga ibotoh ho, humbani sapari seng buha ope pinggolmu. Ai Hubotoh sipangosei-osei do ho anjaha margoran siparbalik humbani partapaan nari.

⁹ Halani goran-Ku do ase Hutahan ringis-Ku, anjaha halani hamuliaon-Ku do ase marulak-ulakan uhur-Hu mangidah ho, ase lang Huboiskon ho.

¹⁰ Tonggor ma, domma Hupapitah ho, tapi seng songon pirak, domma Huuji ho bani pamurunan hadoyukon.

¹¹ Halani Ahu, halani Ahu do, ase Hubahen sonai, ase ulang sambor goran-Ku; seng Hubere hasangapon-Ku bani na legan.

Jumpah ma Panorang Haluahon ai bani Israel

- ¹² Tangihon ma Ahu, ale Jakob, ampa Israel, na dob Hudilo in! Ahu do in, Ahu do na Parlobei anjaha Ahu do na Parpudi.
- ¹³ Tongon, tangan-Ku do na pajonam tanoh on, anjaha tangan siamun-Ku paherbang langit. Dilo-dilo Ahu bani sidea, jadi jongjong ma sidea ganup.
- ¹⁴ Martumpu ma hanima haganup anjaha tangar ma! Ise humbani sidea na patugahkon ai? Ia, na hinaholongan ni Jahowa, Ia do na pasaudkon rosuh ni uhur-Ni dompak Babel, anjaha tangan-Ni ai do mangimbang halak Kasdim.
- ¹⁵ Ahu, Ahu do tongon na dob marsahap, Ahu do na mandilosi, Ahu do na parohkonsi, anjaha Ahu do na manumpaki dalanni.
- ¹⁶ Padohor hanima ma bangku, tangihon ma on! Humbani mungkahni seng marponop-ponop Ahu marsahap, humbani ari parjadini ai ijai do Ahu. Tapi sonari isuruh Tuhan Jahowa pakon Tonduy-Ni do ahu.
- ¹⁷ Sonon do hata ni Jahowa, na paluahkon ho, Na Pansing ni Israel, "Ahu do Jahowa Naibatamu, na mangajari ho ase martuah ho, na manogu ho bani dalan na patut sidalananmu."

- ¹⁸ Ambit itangihon ho ma namin titah-Ku, tontu songon bah mardalan ma hatuahonmu, anjaha hapintoronmu songon gilumbang ni laut,
- ¹⁹ anjaha ginomparamu, songon horsik na i topi ni laut, anjaha tunasmu na luar hambani badanmu songon bueini ai; seng sasap anjaha seng magou be goranmu hun lobei-Hu.
- ²⁰ Luar ma hanima hun Babel, maporus ma hun Kasdim! Patugah ma ai marsora olob-olob, pabotohkon ma ai, anjaha sar ma ai bahen hanima das hu ujung ni tanoh on! Hatahon hanima, “Domma ipaluah Jahowa juakjuak-Ni si Jakob.”
- ²¹ Seng horahan sidea sanggah na binobahon-Ni ai sidea hun halimisan. Ibahen do bah mabaor hambani dolog batu bani sidea, batu gingging ibolah, gabe marbaoran ma bah.
- ²² Tapi bani halak parjahat, nini Jahowa, seng dong hadameion.

Juakjuak ni Jahowa, Hatuahon bani Israel ampa Panondang bani Parbegu

49 ¹ Tangar hanima ma ahu, ale sagala pulou, anjaha bogei ma, ale bangsa-bangsa bani na madaoh! Jahowa do na mandilo ahu

- humbani partapaan ope, itarsingati do goranku humbani boltok ni inang ope.
- ² Ibahen do pamanganku songon podang na marot, bani linggom ni tangan-Ni do iponopkon ahu; ibahen do ahu gabe panah na pinapinsur, anjaha ibagas parlingkitan-Ni do ahu ibunihon.
- ³ Ihatahon do hu bangku, “Juakjuak-Ku do ho, ale Israel, parhiteian ase marmulia Ahu.”
- ⁴ Tapi anggo ahu, ningku do, “Soya-soya do ahu na loja in, bani na lang ampa bani na so marguna do huparbois-bois gogohku, tapi Jahowa do na pasintongkon uhum bangku anjaha upahku marguru bani Naibatanku.”
- ⁵ Tapi sonari ihatahon Jahowa, na manjadihon ahu gabe juakjuak-Ni humbani partapaan ope, laho paulakkon Jakob hu Bani, anjaha mambahen Israel martumpu hu Bani, ai marmulia do ahu bani pangidah ni Jahowa, anjaha Naibatanku do gabe hagogohon bangku,
- ⁶ nini do, “Maotiktu do ai ho gabe juakjuak Bangku, pitah pajongjong marga ni Jakob ampa paulakkon simasima ni Israel; tapi Hubahen do ho homa gabe panondang bani bangsa sipajuh begu-begu, anjaha ho do parhiteian ni haluahon das huujung ni tanoh on.”

Parsuang ni Israel

- ⁷ Sonon do hata ni Jahowa, Sipaluah Israel, Na Pansing in, dampak halak na niapasan, dampak na hinagigihon ni bangsa-bangsa, dampak na pinarjabolon ni parrajai, “Idahon ni raja-raja ma ai gabe jongjong bei ma laho mangkormati, anjaha na sangap-sangap marrogop laho marsombah, halani Jahowa, hatengeran ai, ampa Na Pansing ni Israel, na dob mamilih ho.”
- ⁸ Sonon do hata ni Jahowa, “Bani panorang paridop ni uhuran do ho Hubalosi, anjaha bani ari haluahon do ho Huurupi, Huramotkon do ho anjaha Hupabangkit do ho gabe padan bani bangsa in, laho patorsahon tanoh in, laho mambagihon tanoh na dob tarulang in,
- ⁹ laho mangkatahon bani halak na tartutup, ‘Luar ma!’ dampak na ibagas hagolapan, ‘Roh ma bani haliharon!’ Dapotan gagaton do sidea i topi dalam, anjaha buntu-buntu na leseng do sampalan bani sidea.
- ¹⁰ Seng loheian sidea anjaha seng horahan, seng mangonai bani sidea logou na milas atap mata ni ari pe, ai Parholong bani sidea ai do na mambobai sidea anjaha itogu-togu do sidea i lambung ni bah tubuh.

- 11 Bahenon-Ku do sagala dolog gabe dalan anjaha dalan na bolon pagijangon do.
- 12 Tonggor ma, on roh humbani na daoh, on roh hun utara ampa hun pastima, on roh hun Sinim.
- 13 Marsurak-surak ma ale langit anjaha marolob-olob ma ale langit anjaha marolob-olob ma ale tanoh on! Marmegah-megah ma ale dolog! Ai iapoh Jahowa do bangsa-Ni anjaha maidop do uhur-Ni bani bangsa-Ni na madoyuk.
- 14 Tapi nini Sion, 'Domma itadingkon Jahowa ahu, domma lupa Tuhan bangku.'
- 15 Mintor tarhalupahon puang-puang ma anakni na inuman, mintor lang ma holong uhurni bani anak tinubuhkonni? Porini pe tarhalupahonsi sidea, anggo Ahu seng tarhalupahon Ahu ho.
- 16 Tonggor ma, domma Huuhirhon ho bani tapak tangan-Ku; tembokmu tongtong do i lobei-Hu.
- 17 Mangolos do roh na paulihon ho, tapi halak siparseda ampa siparreong ho maporus do humbam.
- 18 Mangkawah ma ho inggot anjaha tonggor ma, 'Ganup do sidea martumpu, roh do sidea bam.' Songon sintongni manggoluh Ahu, nini Jahowa, maningon sorungkononmu

do sidea songon panjagar, maningon gonditkononmu do sidea songon pambahen ni tunangan.

- ¹⁹ Tongon, tanohmu na dob maseda, na dob tarulang anjaha na dob mareong, masompittu do ai bani na mangiankansi, anjaha mandaoh ma na sihol mangagou ho.
- ²⁰ Homa hatahonon ni anakmu do bani pinggolmu ale boru na lambang: Masompittu do ianan on bangku, palumbang ma bangku ase boi huiankon.
- ²¹ Jadi hatahononmu ma ibagas uhurmu, 'Ise na manubuhkon on bangku?' Ai lambang do ahu anjaha lungunan, tarbuang anjaha iambuk-ambukkon. Ise do na pagodang-godangkon on bangku? Tonggor ma, punjung do ahu, hunja do sidea on roh?
- ²² Sonon do hata ni Tuhan Jahowa, 'Tonggor ma, hilapkonon-Ku do tangan-Ku bani bangsa sipajuh begu-begu, anjaha pajongjongon-Ku do mandera partanda bani bangsa-bangsa, jadi boanonni ma anakmu ibagas abinganni, ampa borumu bani abara ni sidea.'
- ²³ Raja-raja do gabe parorot bam, anjaha raja naboru inang na pagodang-godangkon. Marrogop do sidea das hu tanoh marsombah bam, anjaha idilat orbuk ni naheimu. Maningon botohonmu do, Ahu do

Jahowa; seng bador sagala na martenger ni uhur Bangku.

²⁴ Ai tarbuat do humbani na gogoh taban-taban, atap tarpaluah do halak tahanan humbani sipangodoh-odoh?

²⁵ Tongon, sonon do hata ni Jahowa, ‘Buaton ma halak tahanan humbani halak na gogoh, anjaha paluahon taban-taban ni halak sipangodoh-odoh, ai Ahu do mangimbang siimbang ho, anjaha Ahu do na paluahkon anakmu.’

²⁶ Anjaha bahenon-Ku do halak na mangarsik ho mangankon dagingni sandiri, anjaha mabuk do sidea bani darohni sandiri songon na minum anggur. Jadi botohon ni sagala daging ma, Ahu do Jahowa, Sipaluah ho anjaha Sitobus ho, na gogoh bani Jakob.”

**Halani Hajahatonni do ase Magou Israel,
Sedo halani Hurang Gogoh Jahowa**

50 ¹ Sonon do hata ni Jahowa, “Ija do surat sirang bani inangnima, tandani na dob Hupaulak ia? Atap ise do parutangan-Ku, panjualan-Ku bannima? Tonggor ma, halani hajahatonmu do ho tarjual, anjaha halani panlanggaronnima do ase isirangkon inangnima.

- ² Mase ma, sanggah roh Ahu, ise pe lang na ijin?
Dilo-dilo Ahu, ise pe lang na marbalos?
Ai mapondoktu do nani tangan-Ku laho
paluahkon, atap na so margogoh do Ahu
pabansahkon? Tonggor ma, marhitei
ondam-ondam-Ku horah do Hubahen laut,
Hubahen do bah mardalan gabe halimisan;
marbau do bangkei ni sidea halani seng
dong bah, anjaha marmateian halani
horahan.
- ³ Marhiou sibirong do Hubahen langit anjaha
guni Hubahen sabingni.”

Juakjuak ni Jahowa na Marsitaronon ai

- ⁴ Domma ibere Tuhan Jahowa Ahu mardilah
susian, ase hubotoh marhitei hata ai
manungkoli halak na loja. Ipuhoi do ahu
ganup sogod, ibahen do pinggolhu torang
marpanangar songon susian.
- ⁵ Tuhan Jahowa do na mambuha pinggolhu, seng
manlawan ahu, anjaha seng surut ahu hu
pudi.
- ⁶ Huberehon do gurungku bani halak sibogbog
ahu, sonai age huyumku bani halak na
marrintak gumisku; seng huponopkon
bohingku dampak hahirion ampa tijur.
- ⁷ Tapi Tuhan Jahowa do na mangurupi ahu, halani
ai seng bador ahu; hubahen do bohingku

songon batu bosì, ai hubotoh seng anjai ipaturut ahu bador.

⁸ Dohor do sipintori ahu. Ise sihol marimbang pakon ahu? Jongjong bei ma hita. Ise lawanku bani parkara on? Ipadohor ma hu bangku.

⁹ Tonggor ma, Tuhan Jahowa do na mangurupi ahu, ise do na mansalahkon ahu? Tonggor ma, buruk do sidea songon hiou, ngitngit do mangankon sidea.

¹⁰ Ise humbennima na mabiar mangidah Jahowa, itangihon ma hata ni juakjuak-Ni; ise na mardalan bani na golap, anjaha seng dong haliharon bani, ihatengerhon ma goran ni Jahowa, anjaha marpangajaman ma ia bani Naibatani.

¹¹ Tonggor ma, hanima haganup sipagara apuy, ampa sitembakkon panah na pinagara, laho ma hanima hubagas gogoh ni apuynima sandiri ampa hubagas apuy pinagara ni lingkitnima. Tanganku do na pamasa ai bannima, maningon tibal-tibal do hanima marhamarsikon.

Totap do Haluahon na humbani Naibata bani Israel

51 ¹ Tangihon hanima ma Ahu, ale sipindahi hapintoron, hanima na mandarami Jahowa! Kawahkon hanima ma dolog batu

pambuatannima, ampa parigi pangkurakan
bannima!

² Kawahkon ma si Abraham ompungnima ampa si
Sara na manubuhkan hanima; sahalaksi do
sanggah Hudilo ia, jadi Hupasu-pasu anjaha
Hupabuei ma ia.

³ Tongon, apohon ni Jahowa do Sion, apohon-Ni
do ianan na tarulang ai; bahenon-Ni do
halimisan songon pohon Eden, anjaha
tanohni dorging-dorging songon pohon ni
Jahowa. Malas ni uhur ampa hamegahon
do jumpah ijai, puji-pujian ampa sora ni na
mandoding-doding.

⁴ Tangihon hanima ma Ahu, ale bangsang-Ku,
anjaha hanima bangsa-bangsa, pateleng
hanima ma pinggolnima Bangku! Ai hun
Bangku do harohan ni titah, anjaha Ahu do
pajongjong hasintongan-Ku gabe haliharon
bani bangsa-bangsa.

⁵ Domma dohor hapintoron-Ku, domma bingkat
haluahon na hun Bangku; tangan-Ku do
na manguhum bangsa-bangsa; Bangku do
martenger ni uhur sagala pulou, anjaha bani
tangan-Ku do sidea marpangarapan.

⁶ Tarei hanima ma dompak langit, anjaha
kawahkon hanima ma tanoh on hu toruh!
Laho salpu do langit songon timus, anjaha
tanoh on pe buruk do songon hiou, anjaha

isini marmateian songon rongit. Tapi haluahon na hun Bangku totap do sadokah ni dokahni anjaha hapintoron-Ku seng anjai maronti.

⁷ Tangihon hanima ma Ahu, ale sitandai hapintoron, ho bangsa na marimbagaskon titah-Ku ibagas uhurni! Ulang ma habiari hanima parpahiri ni jolma, anjaha ulang ma tarsonggot hanima bani panrisaion ni sidea!

⁸ Tongon, songon hiou do sidea bois panganon ni ngitngit, anjaha songon hiou wol gagaton ni gilok-gilok; tapi hapintoron-Ku totap do ronsi sadokah ni dokahni, anjaha haluahon na hun Bangku marsundut-sundut do.

**Apoh-apoh ni Jahowa bani
Bangsa-Ni na Marsitaranon ai**

⁹ Puho Ham, puho ma Ham, sorungkon ma hagogohon. Ham tangan ni Jahowa! Puho ma Ham songon bani panorang na basaia, songon bani sundut na parlobei! Ai lang Ham do na manoktoki si Rahab ampa na mamantom naga ai?

¹⁰ Ai lang Ham do na pahorahkon laut ai, bah ni luhung na bagas ai, na mambahen laut na bagas gabe dalan, bahen pandiparan ni na tinobusmu?

- ¹¹ Anjaha na tinobus ni Jahowa mulak ma, roh hu Sion marhasoman olob-olob, malas ni uhur sisadokah ni dokahni do i atas ulu ni sidea. Malas ni uhur ampa hamegahon do jaloon ni sidea, tapi maporus do pusok ni uhur ampa hoih-hoih.
- ¹² Ahu, Ahu do ai na mangapohi hanima! Ise do ho, ase mabiar ho bani jolma na laho matei in atap bani anak ni jolma, na laho salpu in songon poyon-poyon,
- ¹³ gabe lupa ho bani Jahowa, na manompa ho, na paherbang langit ampa na pajonamkon tanoh on, gabe tongtong ho mabiar ganup ari, mangidah gila ni sipangodoh-odoh, na marsura-sura laho mangagouhon? Ija do nuan gila ni sipangodoh-odoh ai?
- ¹⁴ Podas do maluah halak na tarbayang, seng anjai matei ia; masuk hu tanoman, seng anjai hurangan sipanganon ia.
- ¹⁵ Ahu do Jahowa Naibatamu, na manggunsang laut gabe marhasak gilumbangni; Jahowa Zebaot do goran-Ku.
- ¹⁶ Ahu do na mannahkon hatang-Ku bani pamanganmu, anjaha na mangondingi ho bani linggom ni tangan-Ku, sanggah na Hupaherbang use langit anjaha Hupajonam tanoh on, anjaha Huhatahon bani Sion, "Bangsang-Ku do ho."

Ipatenger Jahowa do Uhur ni Bangsa-Ni

- ¹⁷ Hehe ma, hehe ma, jongjong ma ale Jerusalem, ho na dob minum humbani tangan ni Jahowa, humbani panginuman ni gila-Ni, na dob manginum, ronsi mandilati panginuman parmabukon.
- ¹⁸ Seng dong na manogusi humbani anak na tinubuhkonni, seng dong na manjolom tanganni humbani anak na pinagodang-godangni.
- ¹⁹ Na dua pahara on do mangonai bam, ise ma dong na horu pasal ho? Hasedaon ampa hasosakan, lohei ampa podang, ise ma na mangapoh ho?
- ²⁰ Mandatei do anakmu, martibalan bani ganup topi ni pasar, songon ursa na hona siding; gok do gila ni Jahowa mangonai bani sidea, asup-asup ni Naibatamu.
- ²¹ Halani ai tangihon ma on, ale na madoyuk, ampa na mabuk, tapi sedo binahen ni anggur.
- ²² Sonon do hata ni Tuhanmu, ai ma Jahowa, Naibatamu na marporang mangkompok bangsamu, “Tonggor ma, buaton-Ku ma humbani tanganmu panginuman hamabukon ai, ai ma panginuman na gok bani ringis-Hu, seng be inumonmu ai.”

²³ Berehonon-Ku ma ai hubagas tangan ni na mangarsik ho, na mangkatahon bam, “Paunduk, ase mandipar hanami!” gabe ibahen ho do gurungmu rata songon tanoh, anjaha songon dalam bani halak sipamontas.

Idilohon Jahowa Haluahon ni Bangsa-Ni

- 52** ¹ Puho ma, puho ma, sorungkon ma gogohmu ale Sion! Pakei ma pakeianmu na jenges, ale Jerusalem, huta na pansing in! Ai seng malo be masuk bam halak na so marsunat atap halak na mabutak.
- ² Paspaskon ma humbam orbuk in, jongjong ma, ale Jerusalem na tartangkap in! Tanggali ma sangkut-sangkut in humbani borgokmu, ale boru Sion na tartaban in!
- ³ Ai sonon do hata ni Jahowa, “Domma tarjual hanima seng marboli, seng marhitei pirak hanima homa tobuson.
- ⁴ Ai sonon do hata ni Tuhan Jahowa, ‘Hu Masir do ijia tuad bangsang-Ku laho manginsolat ijai, anjaha iodoh-odoh Assur do sidea seng marhala.’
- ⁵ Tapi sonari, aha do bahenon-Ku ijon, nini Jahowa, ai tarboan do bangsang-Ku lang marhala; na manggomgomsu marmogah-mogah, nini Jahowa, anjaha tongtong ganup ari do goran-Ku iapasi.

⁶ Halani ai, maningon tandaon ni bangsang-Ku do goran-Ku bani panorang ai, anjaha botohon ni sidea do, Ahu do ai na mangkatahon: Ijon do Ahu.”

Ambilan Na Madear

⁷ Jenges ni in i atas dolog nahei ni parambilan na madear, na patangarhon hadameion, na mangambilankon Ambilan Na Madear, na pabogeihon haluahon, na mangkatahon bani Sion, “Naibatamu do bangkit raja.”

⁸ Tangar, parjagamu pamaling sorani, rap do sidea marsurak-surak, ai torang do ididah sidea parmula ni Jahowa hu Sion.

⁹ Marsurak anjaha marolob-olob ma hanima, ale reong-reong ni Jerusalem! Ai iapoh Jahowa do bangsa-Ni, anjaha itobus do Jerusalem.

¹⁰ Ipatalar Jahowa do kuasa-Ni na pansing in i lobei ni sipajuh begu-begu, anjaha haganup do ujung ni tanoh on mangidah haluahon na humbani Naibata.

¹¹ Misir, misir ma, mandarat ma hunjai, ulang jamah na mabutak! Luar ma hun tengah-tengah ni sidea, urasi dirinima, hanima siusung parugas ni Jahowa.

¹² Ulang pala tarolos hanima mandarat, anjaha ulang marlintun hanima songon na laho maporus, ai Jahowa do mardalan

i lobeinima, anjaha Naibata ni Israel do panjaga i pudinima.

Panaronon ni Juakjuak ni Jahowa Mangkopkop Jolma Pardousa

- ¹³ Tonggor ma, mardohar do juakjuak-Ku, pagijangon do ia anjaha patimbulon, maningon gijang tumang do ia.
- ¹⁴ Buei do na longang mangidahsi, ai bajan do rupani, legan humbani jolma na somal, anjaha rumangni seng songon anak ni jolma na legan;
- ¹⁵ sonai do bahenon-Ni longang buei bangsa parbegu, anjaha raja-raja manutup pamanganni i lobei ni; ai na so onggga ope ibaritahon bani sidea, idahon ni sidea ma, anjaha na so onggga ibogei sidea arusan ni sidea ma.

53 ¹ Ise do porsaya bani na pinabogei hon bennami? Anjaha tangan ni Jahowa bani ise do ai talar?

- ² Dulas do ia tubuh songon taruhup i lobeini, songon tunas hun tanoh dorging-dorging, seng dong hatunggungan bani atap hamuliaon, ase ikawahkon hanami ia, anjaha seng dong hajengesonni ase iharosuhkon hanami ia.

- ³ Ipahiri anjaha isimbili jolma do ia, dalahi na somal mandagei sitaronon ampa naborit do ia; iponopkon halak do bohini dompaksi, ipahiri do ia anjaha seng masuk hira ia bennami.
- ⁴ Tongon do naboritta iusung, anjaha hadoyukonta iporsan; tapi nini uhurta, Naibata do na maminsang, mamukul ampa na mangarsik-Si.
- ⁵ Hape halani panlanggaronta do ia hona pantom, binahen ni hajahatonta do la ughan. Tampei hu Bani do pinsang-pinsang parhiteian ni damei banta, anjaha binahen ni ugh-Ni malum iahap hita.
- ⁶ Haganup do hita kahou songon biribiri, ganup do hita marsitohu dalanni; tapi hajahaton ni hita haganup do ihonahon Jahowa bani.
- ⁷ Iarsik do la, tapi ipaunduk do diri-Ni seng ibuha pamangan-Ni; songon biribiri na tinogu hu panayatan, songon anak ni biribiri na sip i lobei ni na marrasipsi, sonai do seng ibuha pamanganni.
- ⁸ Marhitei pangarsikon ampa uhum do la iayob, anjaha na masa bani, ise ma na mamingkirhon ai? Tongon, imasabkon do ia hun tanoh ni halak na manggoluh, anjaha halani panlanggaron ni bangsang-Ku do mangonai hu bani pinsang-pinsang.

- ⁹ Rapkon halak parjahat do ibahen tanoman-Ni, anjaha rapkon halak sihorjahon na masambor do ia sanggah matei, age pe seng dong na jahat ihorjahon, anjaha seng dong tipu ibagas pamangan-Ni.
- ¹⁰ Tapi iharosuhkon Jahowa do parropukni ai mandagei na maborit. Dob na binere ni ai hosah-Ni bahen galangan pardearan, idahon-Ni ma ginompar anjaha roh ganjangni ari-arini, anjaha saud sura-sura ni Jahowa marhitei tangan-Ni.
- ¹¹ Dob na maluah tonduy-Ni humbani halojaon, idahon-Ni ma na pasabou uhur-Ni; buei do halak pintoran ni juakjuakku na pintor in marhitei habotohon-Ni; ai dousa ni sidea la do na mamorsan.
- ¹² Halani ai, buei do halak berehononku gabe rupei-Ni, anjaha marbagi taban-taban la rap pakon halak na markuasa, halani na binere-Ni ai hosah-Ni hu hamatean, anjaha tarhira la bani halak parjahat, halani na niusung-Ni dousa ni buei halak, anjaha iapiti halak parjahat.

**Ibagahkon Jahowa Panorang Idop ni
Uhur na Baru bani Bangsa-Ni**

54 ¹ Marolob-olob ma ho, ale na lambang, na so onggga manubuhkon anak! Maling

ma soramu marsurak-surak anjaha
marmegah-megah ma ho, na so onggga
mangarou anak, ai bueinan do anak ni
naboru na punjung marimbang anak ni
naboru na marhajabuan, nini Jahowa.

² Pabolag ma ianan ni lampolampomu, anjaha
paherbang ma hirei-hirei ni rumahmu!
Ulang pandang, paganjang ma talini anjaha
patoguh masuk-pasukni!

³ Ai manggargar ma hanima hu siamun ampa hu
sambilou, ginomparmu do gabe panean
bani sipajuh begu-begu, anjaha sidea do
mangiankon huta na tarulang.

⁴ Ulang mabiar, ai seng anjai bador ho; ulang
maila, ai seng anjai hiranana ho! Ai lupa ma
ho bani habadoron ni haposoonmu, anjaha
seng be paingat-ingatonmu hahirion ni
habaluonmu.

⁵ Ai paramangonmu ai ma Sitompa ho, Jahowa
Zebaot do goran-Ni; anjaha Sipaluah ho
ai ma Na Pansing ni Israel, Naibata ni sab
tanoh on do la igoran.

⁶ Ai songon naboru na sinirangkon anjaha na
marpusok ni uhur do ho idilo Jahowa,
anjaha naboru hinaholongan sanggah poso,
mintor tarambungkon ma ai? nini Jahowa
Naibatamu.

- ⁷ Tongkin do hansa Hutadingkon ho, tapi marhitei holong ni uhur na bangga patumpuon-Ku do ho.
- ⁸ Sanggah pargajag ni ringis-Hu Huponopkon tongkin bohing-Ku dampak ho, tapi marhitei idop ni uhur sisadokah ni dokahni idopan-Ku do ho, nini Jahowa, Sipaluah ho.
- ⁹ Songon panorang ni si Noak do on bangku: Songon na Hubijahon ase ulang be irungkub bah ni si Noak tanoh on, sonai do Ahu marbija, paboa seng gilaan-Ku be ho, anjaha seng be hataon-Ku ho.
- ¹⁰ Ai mosor pe sagala dolog anjaha dugur sagala buntu-buntu, tapi idop ni uhur-Hu seng anjai mosor humber, anjaha padan pardameian na hun Bangku seng anjai morot, nini Jahowa, na maridop ni uhur bam.
- ¹¹ Ho ale na masombuh, na pinarburu, na so niapohan! Tonggor ma, Ahu do na patibal batumu bani batu intan, anjaha na pajonam onjolanmu bani batu sapir.
- ¹² Paulion-Ku do anjung-anjungmu humber kristal, horbanganmu humber batu rubin, anjaha tembokmu haganup humber batu na maharga.
- ¹³ Anjaha haganup anakmu gabe susian ni Jahowa, anjaha bangga do hadoharon ni niombahmu.

- ¹⁴ Ibagas hapintoron do ho pajonamon, anjaha mandaoh ma ho humbani odoh-odoh, ai seng dong be sihabiaranmu; sonai humbani songgot-songgot, ai seng anjai dohor be ai bam.
- ¹⁵ Tonggor ma, anggo dong na roh mangimbang ho, seng na Huharosuhkon ai, barang ise na roh mangimbang ho, maningon talu do ia marimbang ho.
- ¹⁶ Tonggor ma, Ahu do na manjadihon tukang bosi, sisompul arang ibagas apuy, anjaha sipauli sinjata marguru hubani habotohonni, tapi Ahu do homa na manjadihon sipangagou laho parsedahon;
- ¹⁷ sinjata na tinopa mangimbang ho, seng anjai mangasi, anjaha dilah na mangimbang ho bani paruhuman, taluhononmu do. Ai ma parbagianan ni sagala juakjuak ni Jahowa, anjaha hapintoron ni sidea hun Bangku do marharorohan, nini Jahowa.

Ontangan ni Jahowa bani Padan Idop ni Uhur-Ni

55 ¹ Ale hanima, sagala na horahan, roh ma bani bah on! Anjaha hanima na so marduit, roh ma, boli anjaha pangan ma! Roh ma hanima, boli ma anggur ampa dadih, lang pala marduit atap marpamboli!

² Mase ma mambere duit hanima bani na so sipanganon, atap gogoh bani na so boi pabosurhon, tangihon, tangihon hanima ma Ahu, jadi panganonnima ma na mantin, anjaha bosur ma hanima bani na mataboh!

Ojur-ojur Mulak bani Jahowa, Simada Hata na Marhagogohon ampa Hapentaran na Sumurung

³ Pateleng pinggolnima, anjaha roh ma hanima hu Bangku! Tangihon ma, ase manggoluh tonduynima! Bahenon-Ku do bannima padan sisadokah ni dokahni, ai ma idop ni uhur na bani si Daud, na manongtong in.

⁴ Tonggor ma, Hubahen do ia gabe hasaksian bani bangsa-bangsa, gabe raja pakon pangomgom bani bangsa-bangsa.

⁵ Tonggor ma, bangsa na so tinandamu maningon do homa dilonmu, anjaha bangsa parbegu, na so manandai ho, roh do marayak ho, halani Jahowa Naibatamu pakon halani Na Pansing ni Israel, ai la do na pasangap ho.

⁶ Pindahi hanima ma Jahowa, sanggah boi ope la jumpah! Dilo hanima ma la sanggah donok ope la.

⁷ Itadingkon parjahat ma dalanni, ampa halak pargeduk sura-surani! Sai mulak ma ia bani Jahowa, ase marpangulaki uhur-Ni

mangidahsi, sai mulak ma ia hubani
Naibatanta, ai unjah do la manaloseihon.

⁸ Sedo pingkiran-Ku pingkirannima, anjaha sedo
dalan-Ku dalannima, nini Jahowa.

⁹ Ai songon gijang ni langit humbani tanoh
on, sonai do gijangan dalan-Ku humbani
dalannima, anjaha pingkiran-Ku humbani
pingkirannima.

¹⁰ Ai songon udan pakon salju na madabuh
hun langit anjaha mulak hujai, tapi iarbahi
do tanoh ai, ibahen do ai napu anjaha
martumbor, laho mambere bonih bani
parjuma ampa sipanganon bani jolma,

¹¹ sonai do hatang-Ku na luar humbani
pamangan-Ku: Seng lumei sonin mulak hu
Bangku, tapi bahenonni do domu hubani na
Huharosuhkon, anjaha manjadi huja pe ai
Husuruh.

¹² Ai ibagas malas ni uhur do hanima luar anjaha
ibagas hadameion itogu-togu. Dolog-dolog
ampa buntu-buntu marolob-olob i
lobeinima, anjaha sagala hayu na i talun
martopap-topap.

¹³ Gantih ni duri-duri tubuh ma hayu ares anjaha
gantih ni latong tubuh bunga na morum;
masa do ai gabe barita bani goran ni Jahowa,
anjaha gabe tanda sisadokah ni dokahni na
so boi masab.

**Boi do Halak na Legan, na so
Israel Parrupei bani Jahowa**

- 56** ¹ Sonon do hata ni Jahowa, “Ramotkon hanima ma uhun, anjaha horjahon hanima ma hapintoron, ai barah ma roh haluahon na hun Bangku, anjaha talar ma hapintoron-Ku!
- ² Martuah ma jolma na mandalankon on, ampa anak ni jolma na marsijoloman hujai, na marramotkon ari Sabat humbani habutakon, anjaha na marramotkon tanganni humbani na mangkorjahon na masambor.
- ³ Sai ulang ma ihatahon halak na legan, na dob padomuhon dirini hubani Jahowa, ‘Sirangkonon ni Jahowa do ahu humbani bangsani; anjaha ulang ma ihatahon halak na kinasihkon: Tonggor ma, hayu na masak do ahu.’
- ⁴ Ai sonon do hata ni Jahowa, ‘Bani halak na kinasihkon, na marramotkon ari Sabat-Ku anjaha na mamilih na Huharosuhkon, anjaha na totap manjolom padan-Ku,
- ⁵ bereon-Ku do bani sidea ibagas rumah-Ku ampa i tengah-tengah ni tembok ianan pakon goran, na dearan humbani anak ampa boru. Goran sisadokah ni dokahni do bereon-Ku bani sidea, goran na so sisasapon.’

- ⁶ Anjaha halak na legan na dob padomuhon dirini bani Jahowa, laho mambalosi-Si anjaha laho mangkaholongi goran-Ni, ase gabe juakjuak-Ni sidea, haganup na marramotkon ari sabat humbani habutakon, anjaha na totap manjolom padan-Ku,
- ⁷ sidea do boanon-Ku hu dolog hapansingon-Ku, anjaha pamalason-Ku do uhur ni sidea ibagas rumah partonggoan Bangku. Galangan situtungon ampa galangan sisayaton ni sidea harusuhkonon-Ku do ai bani anjapanjap-Ku, ai rumah partonggoan do goranon rumah-Ku bani sagala bangsa.”
- ⁸ Sonon do hata ni Tuhan Jahowa, na patumpu halak na merap humbani Israel, “Patumpuon-Ku ope halak na legan hu bani, ambah ni na dob tumpu in!”

Hutuk-hutuk dompak Parmahan ni Bangsa in

- ⁹ Sagala binatang na i talun roh ma mangankon, sonai ganup hanima binatang na i harangan.
- ¹⁰ Parjaga ni sidea mapitung do ganup, seng dong na binotoh ni sidea; baliang na longah do sidea ganup, na so mambotoh mangorong; marnipinipi do sidea tibal anjaha marosuh modom.
- ¹¹ Tapi baliang on parhisap do, na so ra bosur. Anjaha homa parmahan na so maruhur do

sidea, ganup sidea marsitohu dalanni bei,
 ganup mangindahi paruntunganni,
¹² nini sidea, “Eta, hualop pe anggur, bosuri hita
 ma dirinta bani siinumon na koras; patar pe
 sonai do, songon sadari on, sabasan tene.”

**Pinsang-pinsang ni Jahowa
 dampak Israel Siparbalik ai**

- 57** ¹ Bois do halak parpintor, hape seng
 dong halak na mamparuhurhon ai; ibuati
 halak na daulat, hape seng dong halak
 na marimbagaskon ai, tongon, hona alop
 hamagouan,
² laho do ia ibagas damei, marsaran do i podoman
 ni sidea na bujur marparlahou.
³ Tapi hanima, padohor ma hujon, ale anak
 ni naboru partondung, ale ginompar ni
 parbangkis pakon boru jalang!
⁴ Ai ise do na pinahirinima? Dampak ise do na
 pinangangangnima in babahnima anjaha
 ipahurei-hurei hanima dilahnima? Ai lang
 hanima do anak ni halak sipanlanggar,
 ginompar ni halak sipangoto-otoi,
⁵ na pasombuh hisap-hisapni i lambung ni hayu
 bangga, i toruh ni hayu na maratah, na
 manayat anakni i lombang-lombang, i
 tongah-tongah ni rigat ni dolog batu?

- ⁶ Bani batu lemes na i binanga do rupeinima, ai do parbagianannima; hujai do iuseihon hanima galangan siinumon, anjaha ibere hanima galangan sipanganon. Mintor tarharosuhkon Ahu ma ai?
- ⁷ Bani dolog na gijang ampa na atas do ibahen ho podomanmu, anjaha hujai do ho tangkog manggalangkon galangan sisayaton.
- ⁸ I pudi ni labah ampa tiangni do inahkon ho tanda sidingaton bam; ai tundal hun Bangku, ibuka ho podomanmu, naik ho hujai, anjaha ipalumbang ho ai; manriah do ho rap modom pakon sidea, ronsi na marbangkis.
- ⁹ Laho do ho marayak Molok mamboan minak, anjaha ipabuei ho do minak na morum; isuruh ho do suruhanmu hu na daoh, isuruh ho do ronsi hu nagori toruh.
- ¹⁰ Loja do ho halani daoh ni pardalananmu, tapi seng ihatahon ho, "Sae ma in," jumpahan gogoh do tong ho, ai seng ngayotan ho."
- ¹¹ Bani ise do ho gobir atap mabiar, ase marladungi ho, seng mardingat ho be Bangku, anjaha seng marparuhuran ho? Ai lang halani na sip ai do Ahu anjaha Huponopkon diring-Ku, ase seng mabiar ho Bangku?

- ¹² Ahu, sihol pabotohkon hapintoronmu ampa pambahenanmu, tapi seng dong gunani bam.
- ¹³ Anggo dilo-dilo ho, mahua gana-gana na pinahumpulmin ma namin pangurupi bam! Hape logou do manluahon sidea anjaha hosah do na mangombuskonsi. Tapi barang ise na martenger ni uhur Bangku, ia do manean tanoh on, anjaha ia do simada dolog hapansingon-Ku.

Hata Apoh-apoh bani Israel na Pinatunduk ai

- ¹⁴ Anjaha ihatahon ma, “Pabolag, pabolag, padosdos ma dalam in! Padaoh hanima ma partolsuan humbani dalam ni bangsang-Ku!”
- ¹⁵ Ai sonon do hata ni Na Tang Timbul pakon Na Tang Marmulia in, na marhotak sadokah ni dokahni anjaha pargoran Na Ma Pansing, “I nagori atas pakon bani na ma pansing do Ahu marianan, tapi homa i lambung ni halak partonduy na marosak ampa partoruh ni uhur, ase Hupagoluh tonduy ni halak si toruh maruhur ampa halak partonduy na marosak.
- ¹⁶ Ai seng ronsi sadokah ni dokahni Ahu manggila, anjaha seng tongtong Ahu marah, ase ulang mandatei tonduy ni sidea i lobei-Hu ampa hosah na Hujadihon ai.

- ¹⁷ Halani hajahaton ni sidea do Ahu manggila, Hubogbog sidea, Huponopkon diring-Ku anjaha marringis Ahu, tapi marbalik do sidea mangirikkon rosuh ni sidea sandiri;
- ¹⁸ tapi sai pamalumon-Ku do sidea, togu-toguon-Ku anjaha apohon-Ku; anjaha bani na marpusok ni uhur Ahu mambere buah ni bibir.
- ¹⁹ Damei, damei bani na daoh pakon na dohor, nini Jahowa, anjaha Ahu do na pamalum sidea.
- ²⁰ Tapi halak parjahat songon laut na gunsang do; seng tarbahensi soh, ipansampakkon gilumbangni do hubang pakon tompoh-tompoh.
- ²¹ Seng dong damei, nini Naibatanku, bani halak parjahat.”

Parpuasaon na Sintong

- 58** ¹ Dilohon ma, gogoh tumang, ulang alang-alang! Pamaling ma soramun songon tarompit, pabotohkon ma bani bangsang-Ku panlanggaronni, hubani ginompar ni si Jakob dousa ni sidea!
- ² Tongon, Ahu do ipindahi sidea ari-ari, anjaha habotohon pasal dalan-Ku iharosuhkon sidea; hira bangsa na mandalankon hapintoron do sidea anjaha titah ni

Naibatani seng onggga itadingkon. Ipindo sidea do hun Bangku panguhumion na pintor, anjaha pardohor ni Naibata bani sidea ihasiholi sidea do.

- ³ Nini sidea, “Mase ma marpuasa hanami, hape seng ikawahkon Ham hanami? Mase ma ipatoruh hanami dirinami tapi seng parduli Ham?” Tonggor ma, bani ari parpuasaonnima, ijai do hanima mansari, anjaha isosak-sosak hanima ganup parhorjanima.
- ⁴ Tonggor ma, laho maringor ampa martinggil do hanima ase marpuasa, laho mambogbogi marhitei tenju-tenju. Ulang ma songon sisonari ai hanima marpuasa, laho padaskon soranima hu nagori atas.
- ⁵ Ai mintor on ma parpuasaon na Huharosuhkon atap panorang bani jolma laho paundukkon uhurni, anggo ipahurleh halak uluni songon arung-arung, marpakeian guni ia anjaha tibal bani orbuk? Hatahononmu do ai parpuasaon ampa ari harusuh bani Jahowa?
- ⁶ Ai lang on do parpuasaon na Huharosuhkon, “Mananggali sangkut-sangkut halani hajahaton, mangkarhari tali ni pasangan, paluahkon halak na niodoh-odoh ampa manrosaki sagala pasangan.

- ⁷ Ai lang on do, mambere sipanganon bani halak na loheian, mangarahkon halak na mampar-ampar hu rumahmu, anjaha anggo ididah ho halak na talanjang iparhioui ho ia anjaha lang iponopkon ho bohimu dompak hasomanmu jolma?”
- ⁸ Jadi poltak ma sondangmu songon buha siang ari, anjaha podas ma tubuh hamalumon bam; hapintoronmu mardalan i lobeimu, anjaha hamuliaon ni Jahowa mangondingi ho hun pudi.
- ⁹ Anggo dilo-dilo ho, jadi balosan ni Jahowa ma ho; anggo doruh-doruh ho, jadi hatahonon-Ni ma, “Ijon do Ahu.” Anggo ipadaoh ho hun tongah-tongahmu pasangan, jajari na tulduk-tulduk ampa na mansahapkon hajahaton,
- ¹⁰ anjaha maidop uhurmu bani na loheian, ipasabou ho uhur ni na madoyuk, jadi poltak ma sondangmu i tongah-tongah ni na golap, anjaha hagolapanmu songon tongah ari ma.
- ¹¹ Jadi Jahowa ma tongtong mangiring-iring ho, anjaha pabosuron ho age i tanoh dorging-dorging, anjaha pargogohon-Ni holi-holimu, gabe songon pohon na niarbahan ma ho, anjaha songon bah tubuh, na so marnahorah-horah.

¹² Jadi paulion ni ginomparamu ma reong-reong na dob madokah ai, anjaha pajongjongonmu na dob pinajonam ai bani na basaia; goranon ni halak ma ho, “Sipauli na mabungbung, sipadear dalam ase tariankon.”

Pasal Papansingkon Ari Sabat

¹³ Anggo ipasoh ho naheimu bani ari Sabat, laho mangkorjahon horjamu bani aring-Ku na pansing in, anjaha ihira ho Sabat ari malas ni uhur, anjaha ari na pansing ni Jahowa ra ho papansingkon; anggo ipasangap ho ai, seng dalam-dalan ho, seng ipindahi ho rosuh-rosuhmu, atap marsahap-sahapi tumang ho,

¹⁴ jadi malas ma uhurmu mangidah Jahowa anjaha bahenon-Ku ma ho margareta i atas ni buntu-buntu ni tanoh on, anjaha parmudu-muduon-Ku ma ho marhitei parbagianan ni si Jakob, ompungnima, tongon, pamangan ni Jahowa do na mangkatahon in.

Dousa ni Bangsa ai do Mangambat Haluahon na humbani Jahowa bani Sidea

59 ¹ Tonggor ma, seng na hurang ganjang tangan ni Jahowa laho mangurupi, anjaha seng marhapal pinggol-Ni laho manangihon;

- ² tapi hajahatonnima do tene manirang hanima humbani Naibatanima, anjaha dousanima mambahen lingod bohi-Ni hu bannima, gabe seng itangihon hanima.
- ³ Ai marsapu daroh do tangannima anjaha marlapu hajahaton jari-jarinima; bibirnimamangkatahon ladung, anjaha gok hajahaton do dilahnima.
- ⁴ Sahalak pe lang dong be na mansahapkon hapintoron, anjaha seng dong be na manguhum ibagas hasintongan; bani na lang do sidea marhatengeran, anjaha ladung do iluarhon; boratan rumah do sidea marhitei hajahaton, anjaha hamagouan do itubuhkan.
- ⁵ Tolur ni ulog darih do ipodomkon sidea, anjaha asar ni lawah-lawah ipauli; ise na mangankon tolur ni sidea, maningon matei do, anjaha humbani tolur na hona dogei luar ulog darih.
- ⁶ Na tinonun ni sidea ai seng marguna gabe hiou, anjaha seng tarbahen jadi sabing na hinorjahon ni sidea. Horja hajahaton do horja ni sidea, anjaha pangodoh-odohon do horja ni tangan ni sidea.
- ⁷ Podas do nahei ni sidea mangkorjahon hajahaton, anjaha tarolos do sidea manduruskon daroh na so marpipot; uhur

hajahaton do uhur ni sidea, na parsedahon
ampa na mangagou dalan ni sidea.

⁸ Dalan hadameion seng itanda sidea, seng dong
habonaron bani dalan ni sidea; mareluk-eluk
do dalanni ibahen sidea, sagala na mardalan
ijai seng marhasongan.

⁹ Halani ai do ase daoh habonaron hun banta,
anjaha seng roh hapintoron banta.
Mangarap do hita bani haliharon, hape na
golap do, atap bani sinalsal, hape bani na
lotir do hita mardalan.

¹⁰ Dadap-dadap do hita bani dingding songon
halak na mapitung, anjaha jamah-
jamah songon halak na so marmata.
Mangkatartolsu hita arian songon bani
golap ni ari, anjaha songon na matei do hita
bani hagogohon ni angkulanta.

¹¹ Ganup do hita morong songon gipul,
anjaha marduhur-duhur songon asas; sai
paima-imahon do hita bani habonaron,
hape seng dong; paima-imahon do hita bani
haluahon, hape daoh do hun banta.

¹² Ai buei do panlanggaronnami i lobei-Mu,
anjaha dousanami do mangaduhon hanami;
talar do bennami panlanggaronnami, anjaha
ibotoh hanami do hajahatonnami.

¹³ Marbalik anjaha marnalangkong Jahowa
do hanami anjaha itundali hanami do

Naibatanami; mansahapkon pangodoh-
odohon do hanami ampa parbalikon;
iluarhon hanami do hata ladung humbagas
uhurnami.

¹⁴ Surut do dompak pudi habonaron, anjaha
mandaoh-daoh do hapintoron jongjong.

¹⁵ Seng jumpah be hasintongan, anjaha barang
ise na paholang dirini humbani hajahaton,
gabe sirampokan ma. ididah Jahowa do ai,
gabe seda uhur-Ni, halani seng dong be
habonaron.

¹⁶ Anjaha ididah, seng dong jolma na boi
paluahkon; longang do uhur-Ni halani seng
dong na mangapiti; jadi tangan-Ni sandiri
ma na manumpaki-Si, anjaha hapintoron-Ni
na mangurupi-Si.

¹⁷ Ipakei hapintoron songon baju partahanan,
anjaha inahkon tangkuluk haluahon bani
ulu-Ni; hiou pambalason do ipahei, anjaha
ihiou diri-Ni bani baju-baju parsimburuon.

¹⁸ Romban hubani pambahenan do la mambalas:
ringis hu bani imbang-Ni, pambalason
bani munsuh-Ni; bani pulou-pulou pe
dalankonon-Ni do pambalason.

¹⁹ Jadi habiaran ni halak na i hasundutan ma
goran ni Jahowa, ampa halak na i hapoltakan
mabiar do bani hamuliaon-Ni, ai roh do la

songon bah marbanggal na doras, ai ma na jinuljul ni hosah ni Jahowa.

²⁰ Jadi roh ma hu Sion Sipaluah, sonai bani halak na i Jakob, na mulak humbani hajahaton, nini Jahowa.

²¹ Tapi anggo Ahu, on do padan-Ku bani sidea, nini Jahowa, “Tonduy-Hu, na sorap bam ampa hatang-Ku, na dob Hunahkon bani pamanganmu, seng boi morot ai humbani pamanganmu, age humbani pamangan ni ginomparmu, age humbani pamangan ni ginompar ni ginomparmu, nini Jahowa, humbani sonari nari ronsi sadokah ni dokahni.”

Hamuliaon ni Sion na Sihol Masa ai

60 ¹ Jongjong ma, marsinondang ma ho! Ai domma roh panondangmu anjaha hamuliaon ni Jahowa domma poltak i baboumu.

² Ai tonggor ma, na lotir do marrungkub tanoh on, anjaha hagolapan sagala bangsa; tapi i baboumu do poltak Jahowa anjaha hamuliaonni taridah i atasmu.

³ Jadi roh ma bangsa sipajuh begu-begu marayak panondangmu ampa raja-raja roh bani sinalsal na poltak bam.

- ⁴ Mangkawah ma ho inggot, anjaha tonggor ma:
Ganup do sidea martumpu, marrohan bam.
Roh do anakmu hambani na daoh, anjaha
borumu iboban bani abing-abingan.
- ⁵ Jadi idahonmu ma ai gabe minar ma bohimu;
hinsah anjaha lubang ma uhurmu, ai roh
ma bam habayakon ni laut ampa arta ni
bangsa-bangsa das ma bam.
- ⁶ Hulanan ni unta do marrungkub tanohmu,
unta na hinsah hun Midian ampa hun Epa;
haganupan sidea na hun Seba roh do. Iboan
sidea do omas pakon hamonan anjaha
iambilankon sidea do puji-pujian ni Jahowa.
- ⁷ Haganup biribiri na hun Ketar martumpu bam,
biribiri tunggal na hun Nabayot marugas
bam; roh do sidea bani anjapanjap-Ku gabe
galangan harosuh, anjaha pasangapon-Ku
do rumah-Ku na marmulia in.
- ⁸ Ise do sidea na habang ai songon hambun,
anjaha songon asas na laho bani harangni?
- ⁹ Ai siholan do sagala pulou Bangku, anjaha
kapal-kapal na hun Tarsis parlobei laho
mamboan anakmu hambani na madaoh,
iboan homa pirak ampa omas ni sidea,
haporluan bani goran ni Jahowa Naibatamu
ampa bani Na Pansing ni Israel, ai la do
mambahen marmulia ho.

- ¹⁰ Halak na legan ma paulihon tembokmu, anjaha raja-raja ni sidea marugas bam; tongon ibagas ringis-Ku Hubogbog ho, tapi marhitei parontou ni uhur-Hu idopan-Ku do ho.
- ¹¹ Anjaha horbanganmu manongtong ma ai buha, arian pakon borngin seng tutup, ase boi iboban hu bam habayakon ni bangsa-bangsa, rap pakon raja ni sidea marodor itogu.
- ¹² Ai bangsa pakon harajaon na so mambalosi ho maningon magou do; bangsa-bangsa ai maningon siapkononkon do.
- ¹³ Habayakon ni Libanon roh do bam, ai ma hayu ares, maranti ampa sampinur, laho pajagarhon ianan ni hapansingon-Ku, ampa mambahen marmulia sidogeian ni nahei-Hu.
- ¹⁴ Roh do marrogop hu bam ginompar ni na mandoruni ho, anjaha sagala na mangapasi ho maningon marsombah do bani naheimu; anjaha goranon ni sidea ma ho, "Huta ni Jahowa, Sion ni Na Ma Pansing ni Israel."
- ¹⁵ Tembal ni na dob tinadingkon ho anjaha nidomdoman anjaha sinimbilan ni halak, bahenon-Ku ma ho marmulia sadokah ni dokahni, anjaha gabe malas ni uhur marsundut-sundut.
- ¹⁶ Onsoponmu ma dadih ni bangsa-bangsa, anjaha minum ma ho humbani habayakon

ni raja-raja; jadi botohonmu ma, Ahu do Jahowa, Sipaluah bam ampa Sipartobus, Sipargogoh bani Jakob.

- ¹⁷ Gantih ni tombaga boanon-Ku ma omas, anjaha gantih ni bosu boanon-Ku ma pirak; gantih ni hayu, tombaga; gantih ni batu, bosu. Bahenon-Ku ma damei panggomgomi bam, anjaha parrajai hapintoron.
- ¹⁸ Seng tarbogei be odoh-odoh i tanohmu, hareongon ampa hasedaon i nagorimu; goranon ma tembokmu Hatuahon anjaha horbanganmu Puji-pujian.
- ¹⁹ Seng dong be mata ni ari bahen panondang bam arian, anjaha sondang ni bulan seng marsinalsal bam; tapi Jahowa ma gabe panondang bam sadokah ni dokahni, anjaha Naibatamu gabe hamuliaon bam.
- ²⁰ Seng sundut mata ni arimu, anjaha seng lingod be bulanmu; ai Jahowa do gabe panondang sisadokah ni dokahni bam, anjaha marpunsa ma panorang pusok ni uhurmu.
- ²¹ Anjaha bangsamu, ganup do sidea halak parpintor, anjaha teanon ni sidea do tanoh on ronsi sadokah ni dokahni; sidea, ai ma tumbor na Husuan, jadi-jadian ni tangan-Ku, bahen hasangapon-Ku.

²² Na etek ai gabe saribu, na otik ai gabe sada bangsa na gogoh; Ahu do Jahowa, na papodaskon roh bani panorangni.

Ambilan Na Madear Pasal Hatuahon na Sihol Roh

- 61** ¹ Tonduy ni Tuhan Jahowa do na sogop bangku, ai domma iminaki Jahowa ahu, laho mangambilankon Ambilan Na Madear bani halak na madoyuk; isuruh do ahu pauli-ulihon halak paruhur na maropuk, maningtingkon haluahon bani halak na tartutup, ampa parharhar ni gari bani halak na tarsangkut;
- ² laho maningtingkon tahun idop ni uhur humbani Jahowa, ampa ari pambalason ni Naibatanta; laho mangapoh sagala na marpusok ni uhur i Sion,
- ³ mamberehon bani sidea sortali gantih ni abuan, minak malas ni uhur gantih ni hiou pusok ni uhur, doding puji-pujian gantih ni tonduy na horu, ase targoran sidea hayu hapintoron, na sinuan ni Jahowa, bahen puji-pujian Bani.
- ⁴ Paulion do na dob pinarseda; pabayuon ni sidea do huta-huta na dob mareong, na dob tarulang marsundut-sundut.
- ⁵ Halak na legan do jongjong-jongjong marmahani hulanannima, anjaha bangsa

na legan gabe parhorja i jumanima ampa i pohon anggurnima.

- ⁶ Tapi anggo hanima goranon do malim ni Jahowa, siparugas bani Naibatanta do hatahononkon hanima. Habayakon ni sipajuh begu-begu do panganonnima, anjaha hasangapon ni sidea solukonnima.
- ⁷ Gantih ni habadoronnima, jaloonnima do parbagianan sidua lompit i tanohnima; gantih ni hahirionnima jaloonnima do malas ni uhur sisadokah ni dokahni.
- ⁸ Ai Ahu do Jahowa sihaholongi hapintoron, tapi na magigi bani panrampokon ampa na masambor. Sai berehonon-Ku do upah bani sidea sintong-sintong, anjaha bahenon do padan sisadokah ni dokahni bani sidea.
- ⁹ Tarbarita do ginompar ni sidea i tongah-tongah ni sipajuh begu-begu, sonai anak ni sidea i tongah-tongah ni bangsa-bangsa. Sagala na mangidah sidea botohonnima, bangsa na pinasu-pasu ni Jahowa do sidea.
- ¹⁰ Marmalas ni uhur tumang do ahu ibagas Jahowa, marolob-olob do tonduyhu ibagas Naibatanku; ai iparhioui do ahu bani hiou haluahon, anjaha isabingi do ahu bani hiou hapintoron, songon siparunjuk na manggotongi dirini, anjaha songon tunangan na mamakei ugas-ugasni.

¹¹ Ai songon tanoh na manubuhkon suan-suanan, anjaha songon pohon na mambahen martumbor bonih na sinaburhon hujai, sonai do Jahowa patubuhkon hapintoron ampa puji-pujian i lobei ni ganup bangsa parbegu.

Hamuliaon ni Sion na Sihol Roh in

62 ¹ Halani Sion seng anjai sip Ahu, anjaha halani Jerusalem seng soh Ahu, paima poltak hapintoronni songon sondang ni mata ni ari, anjaha hatuahonni songon rigapan na gara.

² Idahon ni bangsa sipajuh begu-begu ma hapintoronmu anjaha sagala raja-raja mangidah hamuliaonmu; anjaha goranon ma ho marhitei goran na baru, ai ma sitontuhonon ni pamangan ni Jahowa.

³ Gabe sortali hamuliaon do ho ibagas tangan ni Jahowa, anjaha sortali harajaon ibagas tangan ni Naibatamu.

⁴ Lang be goranon ho na tinadingkon, anjaha tanohmu seng be hatahonon na tarulang; tapi goranon ma ho na hinarosuhkonni uhur-Hu, anjaha tanohmu goranon na dob laho; ai marosuh do Jahowa mangidah ho, anjaha tanohmu marhalahoan do.

- ⁵ Ai songon garama mambuat anak boru, sonai do ho buaton ni Sipauli ho; songon malas ni uhur ni siparunjuk bani tunanganni, sonai do malas ni uhur ni Naibatamu mangidah ho.
- ⁶ Bani tembokmu, ale Jerusalem, domma Husuruh parjaga. Arian pakon borngin seng anjai sip sidea. Hanima, na padingatkon Sion bani Jahowa, ulang ma marnasoh!
- ⁷ Ulang sip hanima i lobei-Ni, paima itatap Jerusalem anjaha ibahen ai gabe puji-pujian i tanoh on.
- ⁸ Domma ibijahon Jahowa marhitei tangan-Ni siamun ampa marhitei tangan-Ni na gogoh in: Seng be bereon-Ku omeimu gabe panganon ni munshumu, anjaha seng be inumon ni halak na legan anggurmu, na dob hinangalutkonmu,
- ⁹ tapi na patumpu-tumpuhon, sidea ma na mangankon anjaha mamuji-muji Jahowa; anjaha na mambuat, sidea ma na manginum bani alaman-Ku na ma pansing in.
- ¹⁰ Luar ma, luar ma hanima hun horbangan in! Pasirsir dalam bani bangsa in! Palumbang, palumbang dalam in, padaoh batu-batu! Pajongjong ma mandera partanda bani bangsa-bangsa!

- ¹¹ Tonggor ma, domma itingtingkon Jahowa das hu ujung ni tanoh on: Hatahon ma bani boru Sion, “Tonggor ma, roh do haluahonmu! Mangihut do bani upahni, anjaha i lobei-Ni do na sinari-Ni.”
- ¹² Goranon do sidea: bangsa na pansing, Na pinaluah ni Jahowa. Anjaha ho goranon do na hinasiholan, huta na seng be sitadingkononkon.

Uhum ni Naibata bani Edom

- 63** ¹ Ise do in, na roh hun Edom, marhiou sigerger hun Bosra, marmulia marpakeian, luar ibagas hinagok ni gogohni? Ahu do, sihatahon hapintoron, na margogoh paluahkon.
- ² Mase gerger pakeian-Mu, anjaha hiou-Mu songon hiou ni halak sipardogei anggur ibagas kilang anggur?
- ³ Sahalak Ahu do na mardogei ibagas kilang ai, seng dong humbani bangsa-bangsa hasoman-Ku. Domma bois Hulotloti sidea ibagas ringis-Ku, anjaha domma Hurosaki sidea ibagas ringis-Ku; marbirsak do daroh ni sidea bani hiou-Hu, gabe butak ganup pakeian-Ku.

- ⁴ Tongon, domma Huputuskon ari pambalason, anjaha roh ma tahun haluahon na hun Bangku.
- ⁵ Mangkawah Ahu, hape seng dong na mangurupi. Longang Ahu, halani seng dong na ra mangkasomani Ahu. Jadi tangan-Ku mando pangurupi Bangku, anjaha ringis-Ku mangkasomani Ahu.
- ⁶ Domma Hurojati bangsa-bangsa ibagas ringis-Ku, anjaha mabuk Hubahen sidea ibagas ringis-Ku; Huuseihon do daroh ni sidea hu tanoh.

**Tonggo Mansopotkon Dousa ampa
Elek-elek humbani Bangsa ai**

- ⁷ Sai baritahononku do ganup dear ni layak ni Jahowa, pambahenan habanggalon ni Jahowa, domu hubani haganup na binahen ni Jahowa banta, ampa buei ni dear ni layak-Ni hubani ginompar ni Israel, na binahen-Ni bani sidea romban hu bani idop ni uhur-Ni, domu hubani hinagok ni dear ni layak-Ni.
- ⁸ Ai nini do, “Tongon, bangsang-Ku do sidea, anak na so ra marladung.” Jadi la do gabe Sipaluah bani sidea, ibagas sagala hasosakan ni sidea.

- ⁹ Sedo suruhan atap malekat, tapi bohi-Ni do na paluahkon sidea; marhitei holong ni atei-Ni ampa idop ni uhur-Ni do sidea ipaluah; iabing do sidea anjaha iusung tongtong humbani sapari.
- ¹⁰ Tapi marbalik do sidea anjaha isunsahi Tonduy-Ni Na Pansing in; halani ai mubah do la bani sidea gabe munsuh, anjaha la sandiri marporang dampak sidea.
- ¹¹ Dob ai mardingat ma bangsa-Ni bani panorang sapari, bani si Musa juakjuak-Ni ai, nini sidea, "Ija do la, na mambuat humbagas bah siparmahan bani hulananni? Ija do la, na dob mamberehon Tonduy-Ni marianan ibagas dirini,
- ¹² na mambahen tangan-Ni na marmulia in mardalan bani ianan ni si Musa, na mambolah bah ai i lobei ni sidea, laho mambahen goran Bani sadokah ni dokahni,
- ¹³ na manogu-nogu sidea mamontas laut na bagas, songon huda na mardalan i halimisan, seng tartolsu?"
- ¹⁴ Songon pinahan na tuad hu habungan, sonai do ibere Tonduy ni Jahowa parsaranan bani sidea. Sonai do pambobai-Mu bani bangsa-Mu, laho mambahen Bamu goran na marmulia.

- ¹⁵ Mangkawah ma Ham hun nagori atas, anjaha tatap Ham ma humbani ianan-Mu na pansing anjaha na marmulia in! Ija do pongut ni uhur-Mu pakon hagogohon-Mu? Sihol ni uhur-Mu ampa holong ni atei-Mu mandaoh-daoh do humbangku.
- ¹⁶ Tongon, Ham do Bapanami, ai seng itanda si Abraham hanami, anjaha si Israel pe seng ipabotoh-botoh hanami. Ham do ale Jahowa, Bapanami, humbani sapari do goran-Mu Sitobus hanami.
- ¹⁷ Ham Jahowa, mase ipaturut Ham hanami manlembang humbani dalan-Mu? Mase ipahengkeng Ham uhurnami gabe seng marhabiaran hanami Bamu? Marulak-ulakan ma uhur-Mu halani juakjuak-Mu, halani marga parbagianan-Mu.
- ¹⁸ Tongkin do bangsa-Mu marrupei bani ianan-Mu na pansing in; munsuhnami do mandogei-dogei ianan hapansingon-Mu.
- ¹⁹ Gabe doskon bangsa na so onggaginomgomon-Mu do hanami, doskon halak na so onggamarpanggorankon goran-Mu.

64 ¹ Ambit iribakkon Ham ma namin langit in anjaha susur Ham, gabe dugur ma dolog-dolog i lobei-Mu,

- ² songon apuy na mambahen gara soban, anjaha songon apuy na pagurgur bah, ase tarbarita

goran-Mu bani imbang-imbang-Mu, anjaha bangsa-bangsa gobir i lobei-Mu.

³ Anggo ibahen Ham halongangan na so tinagam ni uhurnami, susur Ham tene, gabe malala dolog i lobei-Mu,

⁴ ai ma na so onnga binogei humbani na basaia. Seng onnga ibogei pinggol, seng onnga ididah mata, dong Naibata sobali Ham, na manumpaki halak na marpangarapan Bani.

⁵ Ijumpahkon Ham do halak na bujur mangkorjahon hapintoron, halak na mardingat Ham bani dalan-Mu. Tonggor ma, manggila do Ham, halani mardousa hanami hu Bamu humbani sapari anjaha marbalik hanami.

⁶ Gabe doskon halak na mabutak do hanami ganup, anjaha hapintoron nami ganup songon hiou gok bani na mabutak. Melus do hanami haganup songon bulung-bulung, anjaha iluahon hajahaton nami do hanami songon pambahen ni logou.

⁷ Sahalak pe seng dong na mandilo goran-Mu, atap na mamorluhon marsijoloman Bamu; ai domma iponopkon Ham bohi-Mu hun bennami, anjaha iondoskon Ham hanami bani kuasa ni hajahaton nami.

⁸ Tapi tene, ale Jahowa, Bapanami do Ham! Tanoh halampung do hanami, anjaha Ham

do Sitompa hanami; ganup do hanami
jadi-jadian ni tangan-Mu.

- ⁹ Ulang ma mamarah tu Ham, ale Jahowa,
ulang ma tongtong mardingat Ham bani
hajahaton! Marpanatap ma Ham, ai
bangsa-Mu do hanami ganup.
- ¹⁰ Gabe halimisan do sagala huta-Mu na pansing
in; gabe halimisan do Sion anjaha tarulang
Jerusalem.
- ¹¹ Rumah na pansing anjaha na marmulia
bennami, ianan ni ompungnami mamuji
Ham, mosog do ibahen apuy; anjaha sagala
ianan hamalasan ni uhurnami bois do
mareong.
- ¹² Mangidah ganupan ai, tahan do Ham,
ale Jahowa? Sai sip ope Ham, anjaha
ompoton-Mu ope mangodoh-odoh hanami?

Ipabali Halak Pardousa, Ijalo Halak na Tarpilih

65 ¹ Sirsir do Ahu pindahan ni halak, na so
sungkun-sungkun Bangku, sirsir do Ahu
jumpahan ni halak na so mangindahi Ahu.
Ningku do dompak bangsa na so mandilo
goran-Ku, “Ijon do Ahu, ijon do Ahu!”

- ² Hupaherbang do tangan-Ku ganup ari bani
bangsa na manendel, na mardalan bani
dalan na so madear, na mangihutkon rosuh
ni uhurni sandiri,

- ³ Hubani bangsa na pagara ringis-Ku tongtong,
na manggalang ibagas pohon, anjaha na
manutung dahupa i atas batu bata,
- ⁴ na hundul bani tanoman, na marborngin ibagas
liang, na mangankon gulei babuy, anjaha
kuah ni sipanganon sihagigihononkon do
ibagas hudon ni sidea;
- ⁵ na mangkatahon, “Padaoh dirimu humbangku,
ulang dohori ahu, ai ahu do na papansing
ho.” Ningon gabe timus do sidea ibagas
igung-Ku, gabe apuy na gara tongtong.
- ⁶ Tonggor ma, tarsurat do i lobeihu, “Seng anjai
sip Ahu, tapi sai luluhonon-Ku do, tongon,
balaskonon-Ku do bani abingan ni sidea,
- ⁷ hajahaton ni sidea ai ampa hajahaton ni
ompung ni sidea, nini Jahowa; halani
manutung dahupa sidea i atas dolog anjaha
ipahiri Ahu i atas ni buntu-buntu, halani ai
suhatkonon-Ku do bani abingan ni sidea
upah domu bani pambahenan ni sidea ai.”
- ⁸ Sonon do hata ni Jahowa, “Songon parsahap
ni halak, anggo adong ope bahni ibagas
buah anggur: Ulang ambukkon in, dong
ope pasu-pasu ijin, sonai do bahenon-Ku,
halani juakjuak-Ku, seng parsedaon-Ku sidea
ganup.”
- ⁹ Parohon-Ku do ginompar humbani Jakob, ampa
sada halak sitean dolog-Ku humbani Juda;

- na pinilih-Ku do manean tanoh in, anjaha juakjuak-Ku marianan ijin.
- ¹⁰ Gabe panggagatan ni biribiri do Saron, anjaha habungan Akor gabe pangompangan ni lombu bani bangsang-Ku, na pindah-pindah Bangku.
- ¹¹ Tapi hanima, sitadingkon Jahowa, na lupa bani dolog-Ku na pansing in, na parsirsirhon meja bani sisombahon Gad, anjaha na manggalangkon galangan siinumon bani sisombahon Men,
- ¹² ondoskonon-Ku do hanima bani podang, anjaha ganup hanima maningon tunduk i panayatan; halani sanggah dilo-dilo Ahu, seng marbalos hanima, sanggah marsahap Ahu, seng itangihon hanima, tapi ihorjahon hanima do sogam ni uhur-Hu, anjaha ipilih hanima na so Huharosuhkon.
- ¹³ Halani ai sonon do hata ni Tuhan Jahowa, “Tonggor ma, mangan do juakjuak-Ku, tapi loheian do hanima, tonggor ma, minum do juakjuak-Ku, tapi horahan do hanima; tonggor ma, marmalas ni uhur do juakjuak-Ku, tapi bador do hanima.
- ¹⁴ Tonggor ma, marolob-olob do juakjuak-Ku halani malas ni uhurni, tapi hanima tangis ma halani horu ni uhur, anjaha doruh-doruh halani uhur na maseda.”

- ¹⁵ Tadingkononnima ma gorannima bani halak na Hupilih gabe hata sipakeion mamurai, “Sai ibunuh Tuhan Jahowa ma ho songon sidea.” Tapi anggo juakjuak-Ku diloon do sidea marhitei goran na legan,
- ¹⁶ ase atap ise na mamasu-masu dirini i tanoh on, pasu-pasuonni ma dirini marhitei Naibata na sintong in, anjaha atap ise na marbija i tanoh on, marhitei goran ni Naibata na sintong in ma ia marbija; halani domma lupa humbagas uhur hasosakan na dob salpu, anjaha lingod ai humbani matang-Ku.

Bagah-bagah Pasal Tanoh na Baru

- ¹⁷ Tongon, tonggor ma, Ahu manompa langit na baru pakon tanoh na baru, anjaha seng be ingaton na parlobei in, barang puho ibagas uhur.
- ¹⁸ Tapi marmalas ni uhur anjaha marolob-olob ma hanima ronsi sadokah ni dokahni marhitei na Hutompa ai; ai tonggor ma, Ahu do manompa Jerusalem gabe parolob-oloban, anjaha bangsa pangisini gabe malas ni uhur.
- ¹⁹ Marolob-olob do Ahu mangidah Jerusalem, anjaha marmalas ni uhur mangidah bangsang-Ku, seng tarbogei be ijai sora na tangis-tangis, atap sora na doruh-doruh.

- ²⁰ Seng dong be ijai dakdanak siotik umur, atap na matua na so gok ari-ari ni goluhni; ai dakdanak ope na matei saratus tahun umurni, anjaha pardousa iuhum bani na marumur saratus tahun.
- ²¹ Pajongjongon ni sidea do rumah anjaha iiankon, suanon ni sidea do hayu anggur anjaha ipangan buahni.
- ²² Seng pajongjong rumah sidea, gabe halak na legan mangiankon, seng manuan sidea, gabe halak na legan mangankon. Songon umur ni hayu, sonai do umur ni bangsang-Ku, anjaha na Hupilih ai, panganon ni sidea do na hinalojahon ni tanganni.
- ²³ Seng soya-soya sidea marhorja, seng tubuhan anak ase podas matei; ai ginompar pinasu-pasu ni Jahowa do sidea, anjaha ginomparni rap do pakon sidea.
- ²⁴ Lape sidea mardilo domma Hubalosi, marsahap ope sidea domma Hutangihon.
- ²⁵ Sorigala pakon anak ni biribiri rap manampal; singa manggagat na sinabi songon lombu, anjaha ulog mangankon orbuk; seng dong be na manjahati atap na parsedahon bani sab dolog-Ku na pansing in, nini Jahowa.

Uhum bani Parnaibata na Legan

- 66** ¹ Sonon do nini Jahowa, “Langit ai do paratas-Hu, tanoh sidogeian ni nahei-Hu. Rumah na sonaha do na sihol paulionnima in Bangku, anjaha aha do in ianan parsaranan-Kin?”
- ² Ganupan in tangan-Ku do manjadihon, gabe tarjadi ganupan in, nini Jahowa. Tapi bani halak sisonon do Ahu marpanatap: Bani halak na madoyuk ampa partonduy na maropuk anjaha na hitir-hitir mambogei hatang-Ku.
- ³ Halak na manayat lombu, doskon na mamunuh jolma do ai, halak na manggalangkon biribiri, doskon na manampul baliang do ia ijai; halak na manggalangkon galangan sipanganon, doskon na manggalangkon daroh ni babuy do ia ijai; atap halak na manutung dahupa, doskon na mamuji sisombahon do ia ijai. Tongon, marsitohu dalanni bei do halak on, anjaha iharosuhkon uhur ni sidea do mangkorjahon sihagigihononkon.
- ⁴ Ahu pe harusuhkonon-Ku do pangarsikon bani sidea, parohon-Ku do bani sidea na hinabiaranni; ai sanggah dilo-dilo Ahu, seng dong na marbalos, sanggah marsahap Ahu, seng dong na manangihon, tapi lambin

ibahen sidea do na jahat i lobei-Hu, anjaha ihamegahkon na so Huharosuhkon.

**Habanggalon ni Sion na Sihol
Roh in. Uhum bani Parjahat**

- ⁵ Tangar ma hata ni Jahowa, hanima na hitir mambogei hata-Ni, “Saninanima, na mardomdom mangidah hanima, na padarat hanima halani goran-Ku mangkatahon, ‘Ipasangap Jahowa ma diri-Ni, ase ididah hanami malas ni uhurnima!’ Tapi sidea ai, ningon bador do.
- ⁶ Tangar, sora na lutu roh hun huta in! Tangar, sora hun rumah panumbahan! Ai ma sora ni Jahowa, na mandalankon pambalason bani munsuh-Ni.
- ⁷ Paima mangarou ia, domma itubuhkon anak, lape maborit iahapkon, domma itubuhkon anak dalahi.
- ⁸ Ise na dob onggga mambogei na sonai ai? Ise na dob onggga mangidah na sonai ai? Boi do sada nagori tubuh ibagas sadari? Boi do hana sada bangsa ibagas na tongkin? Tapi anggo Sion, tongkin ni in mangarou, mintor itubuhkon do anak.
- ⁹ Mintor untkabon-Ku ma partapaan, anggo lang paturuton-Ku tubuh? nini Jahowa. Mintor

Ahu ma, na dob paturutkon tubuh, manutup ai use? nini Jahowa.

- ¹⁰ Marmalas ni uhur ma hanima rap pakon Jerusalem, anjaha marolob-olob ma mangidahsi, ganup hanima na marholong ni uhur bani! Marmalas ni uhur tumang ma hanima rap pakonsi, ganup hanima na marpusok ni uhur mangidahsi hinan.
- ¹¹ Ai boi ma hanima mangonsop anjaha bosur humbani bagod ni pangapoh ai, ai boi ma hanima minum sombuh anjaha marmegah-megah humbani hasangaponni na tarlobih ai.
- ¹² Ai sonon do hata ni Jahowa, "Tonggor ma, Ahu patuduhkon hadoharon bani, songon bah mardalan bueini, ampa habayakon ni bangsa parbegu, songon binanga na marbanggal; minum ma hanima, abing-abingonni do hanima anjaha titeng-titengonni."
- ¹³ Songon halak na niapoh ni inangni, sonai do apohon-Ku hanima; maningon apohon do hanima i Jerusalem.
- ¹⁴ Idahonnima ma ai, gabe malas ma uhurnima, hisar ma holi-holinima songon bulung-bulung maratah; jadi botohon ni halak ma, tangan ni Jahowa do mangkasomani juakjuak-Ni, tapi ringis-Ni do mangimbang munsuh-Ni.

- 15 Ai tonggor ma, na roh do Jahowa marhitei apuy, anjaha gareta-Ni songon haba-haba, laho marlulu ibagas gajag ni gila-Ni, anjaha asup-asup-Ni marhasoman jirlam ni apuy.
- 16 Ai marhitei apuy do Jahowa manguhumi tanoh on, anjaha marhitei podang sagala daging; buei do na binunuh ni Jahowa.
- 17 Halak na papansing ampa na manguras dirini, na manggalang ibagas pohon, na mangirikkon sada halak na i tongah-tongah ai, halak na mangankon gulei babuy, sihagigihononkon ampa ubag, maningon do bois ganup, nini Jahowa.
- 18 Ai Hutanda do horja ampa pingkiran ni sidea; anjaha roh do Ahu laho patumpuhon sagala bangsa ampa sahap; jadi roh ma sidea, anjaha idahonni ma hasangapon-Ku.
- 19 Anjaha pajongjongon-Ku ma sada tanda bani sidea; humbani sidea, na dob maluah ai, paingkaton-Ku do marayak bangsa sipajuh begu-begu, hu Tarsis, hu Put ampa Lud, sisintak sior, hu Tubal pakon Javan, hubani pulou na madaoh, na so onggga mambogei hatang-Ku atap mangidah hamuliaon-Ku; baritahonon ni sidea do hamuliaon-Ku i tongah-tongah ni bangsa-bangsa.
- 20 Jadi boanon ni sidea ma saninanima humbani sagala bangsa-bangsa gabe galangan bani

- Jahowa, roh mangajak huda, margareta, martandu, mangajak halode ampa unta, marayak Jerusalem, dolog-Ku na ma pansing in, nini Jahowa, usih songon Israel, mamboan galangan sibere-bere ibagas pinggan na ma pansing hu rumah ni Jahowa.
- ²¹ Anjaha humbani sidea pe pabangkiton-Ku do gabe malim ampa halak Levi, nini Jahowa.
- ²² Ai songon langit na baru pakon tanoh na baru sitompaon-Kai, jonam jongjong i lobei-Hu, nini Jahowa, sonai do tetap jongjong ginomparnima ampa gorannima.
- ²³ Jadi masa ma bani ganup poltak ni bulan, bani ganup ari Sabat, roh ma sagala na manggoluh manambah hu lobei-Hu, nini Jahowa.
- ²⁴ Jadi luar ma sidea, mangidah bangkei ni halak na manlawan dompak Ahu; ia gilok-gilok ni sidea seng matei, anjaha apuy ni sidea seng mintop, anjaha gabe hagigi do sidea bani sagala na manggoluh.”

Jeremia

Pandiloon ni Jahowa bani si Jeremia

1 ¹ Hata ni si Jeremia, anak ni si Hilkia, sada humbani malim na i Anatot, na i tanoh Benjamin;

² roh do hata ni Jahowa bani, bani panorang ni si Josia, anak ni si Amon, raja ni Juda, pasapuluhtolu-tahunkon dob raja ia.

³ Roh do homa bani panorang ni si Joyakim, anak ni si Josia, raja ni Juda, das bani pasapuluhsada-tahunkon dob raja si Sedekia, anak ni si Josia, raja ni Juda, das bani na tarbuang Jerusalem bani bulan lima.

⁴ Roh do hata ni Jahowa hu bangku, mangkatahon,

⁵ “Paima Hutompa ho ibagas partapaan, domma Hutanda ho, anjaha paima itubuhkon inangmu ho, domma Hupapansing ho, anjaha Hupabangkit ho gabe nabi bani bangsa-bangsa.”

⁶ Dob ai ningku ma, “Ham Tuhan Jahowa! Seng hubotoh naha marsahap, ai poso ope ahu.”

⁷ Tapi nini Jahowa ma dompak ahu, “Ulang ihatahon ho, ‘Poso ope ahu.’ Atap huja pe ho Husuruh, maningon laho ho, anjaha

atap aha na Hutonahkon bam, ai do hatahononmu.

⁸ Ulang ho mabiar i lobei ni sidea, ai Ahu do hasomanmu, laho paluahkon ho,” nini Jahowa.

⁹ Jadi isurdukkon Jahowa ma tangan-Ni, anjaha ijamah ma pamanganku; nini Jahowa ma dompak ahu, “Tonggor ma, domma Hunahkon hatang-Ku hubagas pamanganmu.

¹⁰ Tonggor ma, Hupabangkit do ho sadari on mardiateihon bangsa-bangsa ampa harajaon-harajaon, laho mangumpat ampa manreongkon, laho parsedahon ampa mangagouhon, laho padearhon ampa manuan.”

¹¹ Dob ai roh ma hata ni Tuhan Jahowa hu bangku mangkatahon, “Jeremia aha do ididah ho?” Jadi ningku ma, “Huidah do dangkah ni hayu na dulas marbanggal.”

¹² Jadi nini Jahowa ma hu bangku, “Sintong do pangidahmu, ai puho do Ahu marjaga-jaga, laho pasaudkon hatang-Ku.”

¹³ Dob ai roh ma hata ni Jahowa hu bangku paduahalihan, mangkatahon, “Aha do ididah ho?” Jadi ningku ma, “Hudon na gurgur do huidah, lunsat gurgurni, roh hun utara.”

- 14 Dob ai nini Jahowa ma bangku, “Hun utara do roh ni hasedaon bani sagala pangisi ni nagori on.
- 15 Ai tonggor ma, diloon-Ku do sagala bangsa, harajaon na i utara,” nini Jahowa, “Jadi roh ma sidea, anjaha ganup sidea pajongjong paratasni i lambung ni horbangan ni Jerusalem, laho manlawan tembokni inggot ampa sagala huta ni Juda.
- 16 Jadi dabuhon-Ku ma uhum bani sidea, halani hajahaton ni sidea, ai ma na tinadingkon ni sidea ai Ahu, laho manggalang bani naibata na legan, anjaha marsombah bani jadi-jadian ni tangan ni sidea.
- 17 Tapi anggo ho, gonditi ma binongeimu; misir ma ho, anjaha hatahon ma hubani sidea haganup na Hutonahkon bam. Ulang ma ho tarsonggot mangidah sidea, ase ulang bajoraon ho Hupaturut ibahen sidea.
- 18 Tapi Ahu sandiri mambahen ho sadari on gabe huta na toguh, gabe basikah bosu, gabe tembok tombaga, laho mangimbang haganup nagori in, mangimbang raja-raja ni Juda, pangintuaini, malimni ampa pangisi ni nagori in.
- 19 Porangon ni sidea do ho, tapi seng tartaluhon sidea, ai Ahu do hasomanmu,” nini Jahowa, “na paluahkon ho.”

Parbalikon ni Bangsa Israel

2¹ Roh do hu bangku hata ni Jahowa nini,
² “Laho ma ho, hatahon ma torang-torang
hubani par Jerusalem: Sonon do hata ni Jahowa,
‘Hudingat do habujuronmu, sanggah poso ho,
holong ni uhurmu, sanggah tunangan ope ho,
sonaha pangirikkonmu Bangku i halimisan, bani
tanoh na so boi tidahon.

³ Pansing do ijia Israel bani Jahowa, limbuah ni
pariama-Ni do ia. Sagala na sihol mangankon
ai marsalah do, sogop do hamagouan bani
sidea,’ nini Jahowa.

⁴ “Tangihon ma hata ni Jahowa, ale ginompar ni
si Jakob, sonai sagala marga na hun rumah
ni Israel.

⁵ Sonon do hata ni Jahowa, ‘Aha dong jumpah
ompungnima salah Bangku, ase surut sidea
hun Bangku, anjaha iirikkon na so margagan,
mambahen gabe na lang sidea?’

⁶ Seng dong ihatahon sidea, ‘Ija do Jahowa,
na mambobahon hita tangkog hun tanoh
Masir, na mangiring-iring hita i halimisan,
bani tanoh dorging-dorging anjaha
marlombang-lombang, bani tanoh na horah
anjaha na golap tumang, bani tanoh na so
ongga binontas ni halak, na so niiankon ni
jolma?’

⁷ Huboan do hanima hu tanoh na lambutan, ase ipangan hanima buahni ampa gogohni. Tapi dob das hanima hujin, ibutaki hanima do tanoh-Ku, anjaha parbagianan-Ku ibahen hanima gabe hagigi.

⁸ Malim pe seng dong manungkun, 'Ija do Jahowa?' Siramotkon titah pe seng itandai Ahu. Parmahan ni bangsani marbalik do hun Bangku; nabi-nabi manjahai marhitei Baal anjaha iirikkon na so marguna.

⁹ Halani ai partinggihonon-Ku do torus hanima, nini Jahowa, 'ronsi ginompar ni ginomparnima partinggihonon-Ku do.

¹⁰ Tongon, laho hanima hu pulou ni halak Kittim, anjaha tonggor ma ijai, atap suruh hanima halak hu Kader, anjaha pardiateri ma ijai, atap dong do masa na sonai:

¹¹ Ai dong bangsa, na manggantih naibatani, age pe seng naibata sidea ai? Tapi anggo bangsang-Ku, itukar do hamuliaonni bani sisombahon.

¹² Longang ma hanima ale langit mangidah ahu, tarsonggot anjaha gobir tumang ma,' nini Jahowa.

¹³ 'Dua do salah na binahen ni bangsang-Ku: Ahu bah tubuh hagoluhan itadingkon sidea; ihurak sidea do bani sidea parigi, parigi na marruang, na so marisi bah.

- ¹⁴ Ai jabolon do Israel atap anak ni jabolon do?
Mase ma gabe sisorohon ia?
- ¹⁵ Maraum do singa dompaksi, ipamaling sidea sorani. Tarulang do ibahen sidea tanohni, itutung hutani, seng dong be pangisini. Sonai homa halak na hun Nob ampa Tahpanhes
- ¹⁶ Ipong do ibahen ulumu.
- ¹⁷ Ai lang ho do parohkon ai bam, halani na tinadingkonmu Jahowa Naibatamu, bani na tinogu-togu-Ni ai ho bani dalan na sintong?
- ¹⁸ On pe, aha do untungni bam, na laho ai ho hu Masir sihol minum bah ni Nil? Atap aha do untungni bam na laho ai ho hu Assur sihol minum bah ni Eprat?
- ¹⁹ Hajahatonmu do na maminsang ho, anjaha parbalikonmu mambahen hona uhun ho. Halani ai botoh anjaha idah ma, naha janginni ampa paetni bam, manadingkon Jahowa Naibatamu; seng dong biarmu dampak Ahu,' nini Tuhan Jahowa Zebaot.
- ²⁰ 'Tongon humbani sapari nari pe sai ipampongghon ho do pasanganmu, anjaha irotapi ho talimu, anjaha ihatahon ho, 'Seng ra ahu jabolon!' Tongon, bani ganup buntu-buntu na gijang ampa i toruh ni hayu na maratah do ho modom songon boru jalang.

- 21 Husuan do ho songon hayu anggur na dear,
tongon, humbani bonih na pitah. Sonaha do
parsalihmu gabe hayu anggur harangan na
so margagan?
- 22 Age pe iusah ho dirimu marhitei guboh ni
sabun, anjaha buei ipakei ho sabun, sai tong
do tartanda hajahatonmu i lobei-Hu,' nini
Tuhan Jahowa.
- 23 Mase ma pag ho mangkatahon, 'Seng butak
ahu, seng dong hupaihut-ihut Baal!'
Ingati ma pambahenanmu i habungan,
botoh ma na binahenmu! Mardalan do ho
maringgot-inggot songon unta boru-boru
bani panorang hagarangonni, songon
halode boru-boru i halimisan,
- 24 na unsong-unsong ibagas hisapni. Ise do na boi
manahan hisapni? Sagala na mangindahisi
seng pala loja, bani bulan hahisaponni sai
jumpah do ia.
- 25 Jaga ma naheimu ulang lang marsipatu, ampa
tolonanmu ulang horahan! Tapi ihatahon
ho do, 'Seng tarbahen be, ai domma
huhaholongi halak na legan, sidea do
siirikkononku.'
- 26 Songon panangko na maila anggo tardapot,
sonai do maila ginompar ni Israel rap pakon
raja ni sidea, pambobai, malim ampa nabi ni
sidea,

- 27 ai ma sidea na mangkatahon bani hayu, 'Ho do bapangku,' bani batu, 'ho do mantubuhkon ahu!' Ai gurung ni sidea do idompakkon Bangku sedo bohi ni sidea. Tapi bani panorang hasosakan ni sidea, ihatahon sidea do, 'Jongjong ma Ham, paluah Ham ma hanami!'
- 28 Ai ija do naibatamu, na pinaulimai bam? Sidea ma jongjong, anggo tarbahen sidea do mangurupi ho bani panorang hasosakanmu? Ai songon buei ni hutamu, sonai do buei ni naibatamu, ale Juda?
- 29 Mase Ahu iparingorhon hanima? Haganup do hanima marbalik hun Bangku," nini Jahowa.
- 30 "Soya-soya do na Hubogbogi ai anaknima, seng tarajari sidea, podangnima sandiri do mamboiskon nabinima songon singa na manoroh.
- 31 Hanima na sansundut on, parimbagaskon hanima ma hata ni Jahowa! Ai halimisan do Ahu bani Israel atap tanoh na lotir? Mase ma hatahonon ni bangsang-Ku, 'Rosuhnami bennami, seng benahanami mulak Bamu.'
- 32 Ai tarhalupahon anak boru do ugas-ugasni atap tarhalupahon tunangan do gonditni? Hape bangsang-Ku, lupa do ia Bangku, domma dokah tumang.

- ³³ Jengesni in ibahen ho panlangkahmu, laho mangindahi haholonganmu, halani ai do ase ra ho pasomal-somal dirimu mangkorjahon na masambor.
- ³⁴ Bani sisi ni hioumu pe jumpah do daroh ni halak na so marpipot. Sedo halani na martuah jumpah ho sidea, tapi halani na pininsangni ho pasal nongkan ai.
- ³⁵ Ihatahon ho, ‘Seng marsalah ahu, domma surut ringis-Ni humbangku.’ Tonggor ma, dabuhonon-Ku do uhum bam, halani ihatahon ho, ‘Seng mardousa ahu.’
- ³⁶ Urahni in margoling ho anjaha mubah-ubah. Maningon bador do ho bahenon ni Masir, songon na dob bador ho ibahen Assur.
- ³⁷ Hujai pe ningon laho do ho, jujung tanganmu bani ulumu, ai domma iambukkon Jahowa hatengeran-hatengeran ni uhurmu, seng dong be untungmu humbani sidea.”

Seng Tarjalo Bangsa Israel Mangihutkon Aturan

- 3** ¹ Nini Jahowa, “Porini isirangkon sada halak binuatni, gabe misir naboru ai hun bani, anjaha laho ia bani dalahi na legan, ra ope dalahi ai mangulaki mambuatsi? Ai lang gabe butak tumang ma nagori ai? Tapi anggo ho domma marbangkis pakon buei

halak, ai sihol ope mulak ho hu Bangku?"
Nini Jahowa.

- ² "Mangkawah ma ho dompak sagala buntu-buntu, anjaha tonggor ma! Ija ho na so onggam marbangkis? I topi ni dalan do ho hundul paima-imahon sidea, songon pambahen ni halak Arab i halimisan. Ibutaki ho do tanoh in marhitei parriah-riahonmu ampa hajahatonmu.
- ³ Halani ai do ase tarambat paroh ni udan pamungkah anjaha tartahan udan pangujung, tapi songon pardompakan ni boru jalang do pardompakanmu, seng ibotoh ho na maila.
- ⁴ Ai lang dilo-dilo do ho ronsi sonari hu Bangku, 'Ale Bapa, Ham do hatengeran ni uhur bani haposoonku?'
- ⁵ Ai mintor ra ma la manringis lalab? Mintor idingat-dingat ma ai lalab? Tonggor ma, sonai do parsahapmu, tapi ihorjahon ho do na masambor, pala marolom-olom ho."

Age pe Sonai Parbalikon ni Israel Itampin Naibata do Sidea

- ⁶ Jadi nini Jahowa ma dompak ahu sanggah panorang ni Raja Josia, "ididah ho do pambahen ni Israel na marbalik in? Laho ia hu atas ni ganup

dolog na gijang ampa hu toruh ni ganup hayu na maratah, laho mandalankon parbangkison ijai.

⁷ Nini uhur-Hu, ‘Dob idalankon ganupan ai, tontu mulak do ia Bangku; tapi seng mulak ia.’ Anjaha age pe ididah Juda, anggini na marbalik ai,

⁸ sonaha pangambukkonon-Ku bani Israel na mangosei ai halani haganup parbangkisonni, anjaha Hubere bani surat sirang, tapi seng mabiar Juda, anggini na marbalik ai, laho do ia homa mandalankon parbangkison.

⁹ Marhitei parriah-riahonni na so maralang-alang ai, gabe butak do ibahen nagori in; marbangkis do ia rap pakon batu ampa hayu.

¹⁰ Tapi sonai pe ganupan ai, lanjar do seng mulak hu Bangku Juda, anggini siparbalik ai humbani bulat ni uurni; tapi marsipakulah-kulah do hansa,” nini Jahowa.

¹¹ Jadi nini Jahowa ma hu bangku, “Pintoran ope Israel na marbalik ai marimbang Juda sipangosei in.

¹² Laho ne, anjaha tingtingkon ma hata on dompak utara, ‘Mulak ma ho, ale Israel na marbalik in,’” nini Jahowa. “Lang pe manringis Ahu mangidah hanima, ai paridop ni uhur do Ahu,” nini Jahowa; “Seng torus Ahu manggila.

¹³ Asal itanda ho salahmu, paboa na manlawan ho dompak Jahowa Naibatamu, ai ma na

niondoskonmai dirimu bani na legan i toruh ni ganup hayu na maratah, tapi anggo hatang-Ku seng itangihon ho,” nini Jahowa.

¹⁴ “Mulak ma, ale anak na marbalik,” nini Jahowa, “Ai Ahu do tuannima; sihol buaton-Ku do humbennima, sahalak humbani sada huta anjaha dua halak humbani sada marga, anjaha boanon-Ku do hanima hu Sion.

¹⁵ Anjaha bereon-Ku do bannima parmahan romban hubani rosuh ni uhur-Hu, ai ma na marmahan hanima marhitei habotohon ampa hauhuran.

¹⁶ Anjaha anggo martambah anjaha manggargar ma hanima i nagori in,” nini Jahowa. “Bani ari ai seng be sahapkonon ni halak pasal poti parpadanan ni Jahowa, seng be taringat ai ibagas uhur, atap ingat-ingaton ai, seng be magouan pasal ai barang paulion ai.

¹⁷ Bani panorang ai goranon ma Jerusalem paratas ni Jahowa, anjaha martumpu hujai sagala bangsa sipajuh begu-begu, marsombah hubani goran ni Jahowa i Jerusalem; seng be ihutkonon ni sidea uurni na tendel anjaha na jahat in.

¹⁸ Bani panorang ai ipadomu ginompar ni Juda ma dirini bani ginompar ni Israel, anjaha rap sidea mulak hun utara hun tanoh, na dob Hubere gabe parbagianan ni ompungnima.

- ¹⁹ Nini uhur-Hu, ‘Sonaha ma parpabangkit-Hu bam i tongah-tongah ni anak-Ku, anjaha mamberehon bam tanoh na majenges, parbagianan sijengesan i tongah-tongah ni bangsa-bangsa?’ Anjaha nini uhur-Hu, hatahononmu do hu Bangku, ‘Ale Bapa’ anjaha seng marbalik ho hun Bangku
- ²⁰ tongon, songon puang-puang na so bujur manadingkon paramangonni, sonai do hanima manadingkon Ahu, ale ginompar ni Israel,” nini Jahowa.

Hamubahon ni Uhur na Sintong do Mambahen Saud Bagah-bagah ni Jahowa

- ²¹ Tarbogei do sora bani ianan na gijang, ai ma sora tangis-tangis ampa elek-elek ni ginompar ni Israel, halani sambor ni parlahou ni sidea, anjaha lupa sidea bani Jahowa Naibata ni sidea.
- ²² “Mulak ma, ale anak siparbalik, sihol pamalumon-Ku do panundalionnima in. Tonggor ma, roh do hanami mangayaki Ham, ai ham do Jahowa Naibatanami.
- ²³ Tongon, sipaoto-oto do pangarapan bani buntu-buntu ampa bani halutuon i atas dolog. Tongon, bani Jahowa Naibatanta do hansa haluahon ni Israel.

²⁴ Tapi pambalosion bani sihagigihononkon ai do mamboiskon na hinalojahon ni ompungta humbani etek-etekkon nari, biribiri ni sidea ampa lombuni, anak ni sidea ampa boruni.

²⁵ Tibal do hita ibagas habadoronta anjaha sabing banta hahirion, halani mardousa hita dompak Jahowa Naibatanta, hita pakon ompungta humbani hadakdanakonta das ronsi sadari on; anjaha seng itangihon hita sora ni Jahowa Naibatanta in.”

4 ¹ “Anggo sihol mulak ho, ale Israel,” nini Jahowa, “Hu Bangku ma ho mulak! Anjaha anggo iambukkon ho sihagigihononmai seng anjai mompas-ompas be ho hun Bangku.

² Anjaha anggo ibijahon ho, “Songon sintongni manggoluh Jahowa, ibagas hasintongan, habonaron ampa hapintoron, jadi parhatuahon ni bangsa sipajuh begu-begu ma dirini ibagas ho, anjaha puji-pujionni ho.”

³ Sonon do hata ni Jahowa hubani halak na i Juda ampa pangisi ni Jerusalem, “Tinggala hanima ma juma roba bannima, ulang martidah i tongah-tongah ni hupi-hupi.

⁴ Sunat hanima ma dirinima bani Jahowa, ambukkon hanima ma sibur-sibur ni uhurnima, ale dalahi na i Juda ampa pangisi ni Jerusalem, ase ulang manomboh ringis-Ku

songon apuy, anjaha gajag seng dong na mangasup mangintopi, halani hajahaton ni pambahenannima.”

Munshuh hun Utara na Roh Parsedahon

- ⁵ “Baritahon hanima ma i Juda anjaha pabogei hon i Jerusalem, hatahon hanima ma, ‘Sompul ma tarompit i nagori in, gogoh ma mardilo-dilo, hatahon ma: Martumpu ma, laho ma hita masuk hu huta na pinatoguh in!
- ⁶ Pajongjong ma mandera partanda dompak Sion! Maporus ma, ulang sohsoh! Ai parohon-Ku ma hamagouan hun utara, sada hasedaon bangga.
- ⁷ Mandarat do singa humbani iananni, bingkak do siparseda bangsa-bangsa; luar do ia humbani iananni laho parsedahon tanohmu; mangkareong ma hutamu, seng marpangisi be.
- ⁸ Halani ai marhiou guni ma hanima, tangis anjaha doruh-doruh ma, ai seng surut hun banta gara ni ringis ni Jahowa.
- ⁹ Bani panorang ai,” nini Jahowa, galek ma uhur ni raja-raja ampa na sangap-sangap, tarsonggot sagala malim anjaha hirjat sagala nabi.

- ¹⁰ Jadi nini sidea ma, “Ham Tuhan Jahowa, taroto tumang do bangsa on ampa par Jerusalem, ibahen Ham, nimu, ‘Marsonang-sonang pe hanima, hape podang do na mangonai bani goluhnami.’
- ¹¹ Bani panorang ai hatahonon ma bani bangsa on ampa bani Jerusalem, ‘Logou na milas hun buntu-buntu na leseng i halimisan mangombus dampak boru ni bangsang-Ku, sedo laho marsege atap mamiari, logou na doras tumang,
- ¹² anjaha Ahu do na mamarentahkon ai, laho manguhumi sidea.
- ¹³ Tonggor ma, songon hambun do ia naik, songon halisungsung do garetani; dorasan do hudani ase lali. Magou ma hita, ai bois ma hita!
- ¹⁴ Burihi ma uhurmu hambani hajahaton, ale Jerusalem, ase maluah ho. Piga dokah nari marianan pingkiranmu, na jahat in ibagas uhurmu?
- ¹⁵ Tangar, roh do tugah-tugah hun Dan ampa barita na masambor hun Dolog Efraim!
- ¹⁶ Patugah ma bani Juda, tingtingkon bani Jerusalem. Roh do sipangkubu hun nagori na madaoh, marsurak do sidea mangimbang huta ni Juda.

- 17 Songon pamurou do sidea manginggoti Jerusalem, halani manlawan ia dompak Ahu," nini Jahowa.
- 18 "Parlahoumu ampa pambahenanmu do parohkon ai bam. Halani hajahatonmu do ase sonai paetni, tongon, ronsi pusu-pusumu do itolpus.
- 19 Aih, boritni in, boritni in huahap! Itusuk do atei-ateihu! Mardojob-dojob do pusu-pusungku, seng tarbahen ahu sip, ai hubogei do sora ni tarompit ampa surak-surak ni siparporang.
- 20 Marnunut do hataluan itingtingkon, maseda do ganup tanoh in, sompong do lampolampong-Ku ipareong, tongkin tumang anggo barung-barung-Ku.
- 21 Piga dokah nari idahon-Ku mandera porang in, anjaha bogeion-Ku sora ni tarompit?
- 22 Tongon, na oto do bangsang-Ku, seng itandai sidea Ahu, anak na lontong do sidea, seng dong maruhur; pandei do sidea mangkorjahon hajahaton, tapi sonaha mambahen na madear, seng ibotoh sidea.
- 23 Mangkawah Ahu dompak tanoh in, tonggor, domma maseda anjaha lumei; Hutarei langit, magou do haliharonni.

- ²⁴ Mangkawah Ahu dompak dolog-dolog, tonggor ma, dugur do sidea; anjaha buntu-buntu mambal-ambal hujai-hujon.
- ²⁵ Mangkawah Ahu inggot, tonggor ma, seng dong jolma, anjaha manuk-manuk pe domma habur ganupan.
- ²⁶ Mangkawah Ahu, tonggor ma, tanoh na lambutan salih jadi halimisan, anjaha sagala hutani domma mareong i lobei ni Jahowa, halani gajag ni ringis-Ni.
- ²⁷ Ai sonon do hata ni Jahowa, 'Haganup tanoh in maningon tarulang do; tapi seng lanjar bois bahenon-Ku.
- ²⁸ Halani ai marhoru ma tanoh in, anjaha langit na i babou ai golap; ai Ahu do na mangkatahon in, seng Husolsoli uhur-Hu; Ahu do na mamutuskon, seng marulak-ulakan uhur-Hu.'
- ²⁹ Maporus do sagala huta halani sora ni parhuta ampa parpamah; marmasukan sidea hu harangan, manangkihi hu salahsah; sagala huta hona tadingkon, seng dong halak na mangiankansi.
- ³⁰ Ho, ale na dob tinaluhon, aha do na binahenmin. ase marbaju saholat ho, ase mamakei ugas-ugas omas ho, ase iminak-minaki ho matamu? Soya-soya do na

pinajengesmai dirimu. Magigi do kasihanmu mangidah ho; hosahmu do sihol buatonni.

³¹ Tongon hubogei do songon sora ni naboru na mangarou, usih bani doruh-doruh ni naboru laho mantubuhkon bunga tubuhni, ai ma sora ni boru Sion na hosah-hosah pagostong tanganni, nini, ‘Magou ma ahu, ai ondos bani sipamunuh do tonduyhu!’”

Uhum ni Naibata bani Bangsa-Ni halani Haganupan Sidea Marjahat

5 ¹ Siari ma dalan-dalan na i Jerusalem, tonggor anjaha papangkei ma! Pareksa ma alamanni laho mangidah, atap dong do jumpah sahalak, sihorjahon na madear, sipindahi hasintongan, ase marpangulaki uhur-Hu bani sidea.

² Age pe ihatahon sidea, ‘Songon sintongni maggoluh Jahowa,’ tapi ladung do bijani ai.

³ Ham Jahowa, ai lang dompak hasintongan do panonggor-Mu? Ilonsing Ham do sidea, tapi seng mangahap sidea; iboiskon Ham do sidea, tapi seng ra sidea manjalo ajar. Ipamampir sidea do bohini lobih humbani batu gingging, manjua do sidea paubah uhumni.

⁴ Tapi nini uhurhu, ‘Na masombuh-sombuh do sidea on, anjaha na oto, ai seng itanda sidea

dalan ni Jahowa, sonai age titah ni Naibata ni sidea.'

- ⁵ Laho ma ahu bani halak na bangga-banggal, sihol marsahap pakon sidea; tontu anggo sidea ibotoh do dalan ni Jahowa ampa titah ni Naibata ni sidea. Tapi sidea ai pe dos do, iparpongol do pasanganni, irotapi talini.
- ⁶ Halani ai sorohon ni singa na hun harangan do sidea, boiskonon ni gipul na hun halimisan. Begu do manggompangi huta ni sidea; sagala na mandarat hunjai sorohonni do, ai buei tumang do panlanggaron ni sidea, bangga do panundalini.
- ⁷ Sonaha ma boi marpangulaki uhur-Hu bam? Itadingkon anakmu do Ahu, anjaha marbija do sidea marhitei goran ni na so Naibata. Anggo domma Hubosuri sidea, laho do sidea marbangkisi, marurup do sidea hu rumah ni boru jalang.
- ⁸ Huda panjangna na mombur, na garang do sidea, na mariha-iha dompak jolma ni hasomanni.
- ⁹ Mintor lang ma luluhonon-Ku sidea halani ai? Nini Jahowa. "Mintor lang ma marbalas Ahu hubani bangsa na sonin?"
- ¹⁰ Tangkog ma hanima hu pohon anggurni anjaha parseda ma, tapi ulang mintor bois; tuhtuhi

hanima ma ranting-rantingni, ai sedo Jahowa simada ai.

- ¹¹ Tongon, mangeluk do hun Bangku ginompar ni Israel ampa ginompar ni Juda,” nini Jahowa.
- ¹² Iparnalang sidea do Jahowa anjaha ihatahon, “Aha pe lang bahenon-Ni, seng anjai dong hamagouan roh hu banta, podang atap lohei pe seng anjai idahonta.”
- ¹³ Sihatahon na so tongon do nabi-nabi ai; seng dong tongon hata ni Jahowa bani sidea; bani sidea sandiri ma masa na sonai ai!
- ¹⁴ Halani ai sonon do hata ni Jahowa, Naibata Zebaot, “Halani sonai hata ni sidea, tonggor ma, bahenon-Ku ma hatang-Ku gabe apuy ibagas pamanganmu, anjaha bangsa on gabe soban, gabe bois ma sidea ipangan apuy ai.
- ¹⁵ Tonggor ma, parohon-Ku ma bannima, sada bangsa humbani na daoh, ale ginompar ni Israel,” nini Jahowa, “Ai ma sada bangsa na so tartaluhon, bangsa na basaia, bangsa na so niarusanmu sahapni, na so niartihonmu atap aha na hinatahonni.
- ¹⁶ Songon tanoman na ngangang do parsumbianni, haganup do sidea puanglima.
- ¹⁷ Bois do panganon ni sidea na pinariamuanmu ampa sipanganonmu; panganonni do anakmu pakon borumu; bondutonni do

biribirimu pakon lombumu; boiskononni do pohon anggurmu pakon hayu aramu; huta-hutamu na pinatoguhmu, na hinatengerhon ni uhurmu, parsedaonni do marhitei podang.

¹⁸ Tapi age pe bani ari ai,” nini Jahowa, “Seng mintor bois tumang hanima bahenon-Ku.

¹⁹ Anjaha anggo ihatahon sidea, ‘Mase ma ibahen Naibata Jahowa Naibatanami haganupan ai bennami?’ Hatahon ma bani sidea, ‘Songon na tinadingkonnima Ahu, anjaha ibalosi hanima naibata na legan i tanohnima,’ sonai do balosannima halak na legan, bani tanoh na so nagorinima.

²⁰ Patugah ma on bani ginompar ni si Jakob, anjaha tingtingkon ma ai i Juda,

²¹ ‘Bogei ma on, ale bangsa na oto anjaha na so maruhur, na marmata hape seng marpangidah, na marpinggol hape seng marpanangar!’

²² Ai seng mabiar hanima mangidah Ahu?” nini Jahowa. “Ai seng gobir hanima i lobei-Hu? Ahu do na mambahen buntu-buntu horsik gabe parbalogan ni laut, gabe olat-olat na manontong na so boi lopusanni; manggila pe gilumbangni seng monang sidea, marhasak pe sidea, seng boi diparanni ai.

- 23 Tapi bangsa on, paruhur na tendel anjaha na hengkeng do; manlembang do sidea, anjaha inunuti dalanni.
- 24 Seng onggga ihatahon ibagas uhurni, 'Habiari hita ma Jahowa Naibatanta, na mambere udan parmulaan ampa udan pangujungi bani panorangni, na mangatur banta panorang pariama.'
- 25 Tapi hajahatonnima do na papeletkon ai, anjaha dousannima do na mangambat na madear roh hu bannima.
- 26 Tongon, adong do jumpah parjahat i tongah-tongah ni bangsang-Ku; monggop do sidea manggompangi songon halak sisidingi manuk-manuk, laho manangkap jolma.
- 27 Songon harang-harang gok marisi manuk-manuk, sonai do rumah ni sidea gok bani barang tipuan; halani ai do ase sangap anjaha bayak sidea, mombur anjaha tambos do sidea.
- 28 Seng maralang-alang sidea mangkorjahon hajahaton; seng pintor panguhumion ni sidea: Pahara ni halak na tading maetek seng iapiti sidea, anjaha seng ipartahankon sidea hak ni halak na masombuh.
- 29 Mintor lang ma luluhonon-Ku sidea halani ai?" nini Jahowa. "Mintor lang ma marbalas Ahu bani bangsa na sonai ai?"

³⁰ Na majangin anjaha sihagigihononkon do na masa i tanoh in.

³¹ Nabi-nabi manjahai ibagas ladung, malim-malim manrajai uhur-uhur ni sidea; marosuh do bangsang-Ku bani sisonai ai, tapi aha do sibahenonnima, anggo marujung ai?”

Patut do Mangonai Uhum ai

- 6** ¹ “Maporus ma hanima, ale ginompar ni Benjamin, luar hun Jerusalem! Sompul hanima ma tarompit i Tekoa, anjaha pajongjong ma partanda i Bet-Kerem; ai ondam do roh hamagouan hun utara ampa hasedaon banggal.
- ² Sampalan na majenges anjaha na hinarosuhkon do boru Sion, tapi siparsedaon do.
- ³ Roh do hujai parmahan pakon hulanan ni sidea; pasukon ni sidea do lampolamponi inggot Sion ai, ganup sidea marmahan bani iananni bei.
- ⁴ Nini sidea, ‘Marugas ma, marporang dompak sidea! Tangkog ma, dorab ma, sanggah siang ope ari! Aah! Domma bod ari, marganjang ma halinoh.
- ⁵ Eta! Borngin ma dorab hita! Parseda hita ma rumah bolonni.’”
- ⁶ Ai sonon do hata ni Jahowa Zebaot, “Roboh ma hayu-hayuni, bahen ma hubuan dompak

- Jerusalem! Ai huta siuhumon do on; ai odoh-odoh tumang do masa ibagas.
- ⁷ Songon bah tubuh na manjurlak-jurlakkon bahni, sonai do marjurlak-jurlak hajahatonni; odoh-odoh ampa hasamboron do tarbogei ibagas, pamunuhon ampa pangoyaton do tong masa i lobei-Hu.
- ⁸ Sai ra ma ho palumbaon ale Jerusalem, ase ulang rotap uhur-Hu mangidah ho, ase ulang Hubahen ho gabe halimisan, gabe tanoh na so marpangisi.”
- ⁹ Sonon do nini Jahowa Zebaot, “Pangkei ma ho marturiak pasal simasima ni Israel songon pambahan bani hayu anggur; papangkei ma marhitei tanganmu ranting-rantingni ai, songon binahen ni sibuat buah anggur!
- ¹⁰ Bani ise ope ahu marsahap ampa palumbahon ase ibogei sidea? Toggor ma, tutup do pinggol ni sidea, seng marpanangar, tonggor ma, gabe sirisaon do hata ni Jahowa bani sidea, seng iharosuhkon sidea ai.”
- ¹¹ Halani ai gok do uhur hu bani ringis ni Jahowa, loja do ahu manahan-nahan ai. Useihon ma ai bani dakdanak na i pasar, ampa bani humpulan ni garama homa; dalahi pakon naboru, maningon rap do tangkapon, na matua pakon na sayur matua.

- 12 Ondos bani halak na legan ma rumah ni sidea, sonai homa jumani pakon jolmani. “Tongon pagostongon-Ku do tangan-Ku dompak pangisi ni tanoh in,” nini Jahowa.
- 13 “Ai haganup sidea na etek ronsi na magodang, ganup do sidea impolan bani pansarian na so tiba dalanni, nabi pakon malim ganup mangkorjahon panipuon.
- 14 Hampung do panambari ni sidea bani naborit ni bangsang-Ku, marhitei na mangkatahon, ‘Damei do! Damei do!’ hape seng dong damei.
- 15 Patut do sidea maila, ai sihagigihononkon do ihorjahon sidea. Hape, seng be ibotoh na maila, seng be ibotoh hilaon. Halani ai jurgang do sidea rapkon na jurgang in, anjaha bani paroh-Ku marlulu bani sidea, maningon tompas do sidea,” nini Jahowa.
- 16 Sonon do hata ni Jahowa, “Jongjong ma hanima bani dalan, tonggor ma, anjaha sungkun ma pasal dalan sapari, atap ija do dalan na dear ai; dalani hanima ma ai, ase jumpah parsaranan tonduynima.’ Tapi nini sidea do, ‘Seng pot hanami mardalan ijai.’
- 17 ‘Hubahen do parjaga bani sidea, ningku, ‘Pardiatei hanima ma sora ni tarompit ai!’ Tapi nini sidea, ‘Seng benahanami manangihon ai.’

- 18 Halani ai tangihon ma ale bangsa-bangsa,
anjaha pardiateri ma ale humpulan, atap aha
na sihol pamasaon-Ku bani sidea!
- 19 Tangar ma, alo tanoh, tonggor ma, parohon-Ku
do hamagouan bani bangsa on, ai ma buah
ni hasamboron ni paruhuranni, ai seng
iparimbagaskon sidea hatang-Ku, anjaha
iambukkon do titah-Ku.
- 20 Benahang-Ku ma dahupa na hun Seba, atap
rompah-rompah na maharga hun nagori
na madaoh? Seng tarharosuhkon Ahu
galangan situtungonnima, anjaha galangan
sisayatonnima pe seng benahang-Ku.'
- 21 Halani ai sonon do hata ni Jahowa, 'Tonggor
ma, Nahkonon-Ku do i lobei ni bangsa
on batu partolsuan, na mambahen sidea
mangkatartolsu, bapa sonai age anak,
hasoman romban rumah ampa kawan pe
rap magou do.'
- 22 Sonon do hata ni Jahowa, 'Tonggor ma, roh
do sada bangsa na banggal, bingkak hun
ujung-ujung ni tanoh on.
- 23 Marsior anjaha martanja do sidea, bisang do
sidea anjaha seng itanda holong ni atei.
Songon parhasak ni laut do parhasak ni
sidea; mangajak huda do sidea, gopas
marsinjata roh marmunsuh dompak ho, ale
boru Sion.

- 24 Ibogei hanami do baritani, gabe galek ma tangannami; biar do mandorab hanami, na maborit songon puang-puang na mangarou.
- 25 Ulang laho hanima hu juma, atap mardalani i pasar; dong do podang ni munsuh ijai, habiaran do inggot.
- 26 Ale boru ni bangsang-Ku, marbaju guni ma ho, anjaha margulu ma ho bani abuan! Tangis ma ho, songon na manangisi anak sasada, ai sompong do sipangagou roh hu banta.”

Ipabangkit Naibata si Jeremia Gabe Sipanguji

- 27 “Domma Hupabangkit ho gabe sipanguji bani bangsang-Ku, ase itanda ho anjaha iuji ho parlahou ni sidea.
- 28 Haganup do sidea sipanlawan, marparlahou panukasion; doskon tombaga pakon bosu do sidea, haganup do sidea sipangagou.
- 29 Ombus-ombus do pangombusan, malala timah ibagas apuy; hape soya horja na papitahkon ai, halani lanjar do seng ra bali na jahat ai.
- 30 pirak na niambukkon do goranon sidea ai, halani domma itulak Tuhan sidea.”

Ambilan ni si Jeremia i Rumah Panumbahan

- 7** ¹ On do hata na roh hubani si Jeremia, humbani Jahowa,

² “Jongjong ma ho bani horbangan ni rumah ni Jahowa, tingtingkon ma hata on ijai, hatahon ma, ‘Tangihon ma hata ni Jahowa, ale ganup halak Juda, na masuk hubani horbangan on, laho marsambah hubani Jahowa.’

³ Sonon do hata ni Jahowa Zebaot, Naibata ni Israel, ‘Padear hanima ma parlahounima ampa pambahenannima, ase Hupalopas hanima marianan bani ianan on.

⁴ Ulang ma porsaya uhurnima bani hata ladung, na mangkatahon, ‘Rumah panumbahan bani Jahowa do on, rumah panumbahan bani Jahowa do on, rumah panumbahan bani Jahowa do on.’

⁵ Tongon, anggo ipadear hanima parlahounima ampa pambahenannima, ibahen hanima na pintor samah hanima,

⁶ seng iodoh-odoh hanima halak panginsolat, na tading maetek ampa naboru na mabalu, seng iduruskon hanima daroh na so marpipot bani ianan on, anjaha seng iihutkon hanima naibata na legan, na gabe hamagouan bannima,

⁷ jadi palopason-Ku ma hanima marianan bani ianan on, bani tanoh na dob Hubere bani ompungnima, sadokah ni dokahni.

⁸ Tapi tonggor ma, tenger do uhurnima bani hata ladung na so marguna,

⁹ Manangko do hanima, mamunuh, marbangkis, mambijahon na so tongon, manggalang bani Baal,

anjaha mangihutkon naibata na legan, na so onggga tinandanima hinan,

¹⁰ jadi dob ai roh do hanima jongjong i lobei-Hu i rumah panumbahan on, na marpanggoranan bani goran-Ku, ihatahon hanima, 'Domma ipaluah hita!' -- dob ai inunut hanima mangkorjahon na masambor on.

¹¹ Ai liang ni panamun do rumah on, na targoran bani goran-Ku, nini uhurnima? Ahu pe, tongon, Huidah do ai,' nini Jahowa.

¹² 'Laho ma hanima bani ianan-Ku na i Silo, na parlobei Hubahen gabe ianan ni goran-Ku, anjaha tonggor ma, atap aha na Hubahen ijai halani hajahaton ni bangsang-Ku halak Israel.

¹³ On pe, halani ibahen hanima haganupan ai,' nini Jahowa, 'Anjaha age pe Hununut marsahap bannima, tapi seng itangihon hanima, anjaha Hudilo hanima tapi seng marbalos hanima,

¹⁴ halani ai bahenon-Ku ma bani rumah on, na targoran bani goran-Ku anjaha na pinangunsagahkonnima ai, ampa bani ianan na Hubere bannima pakon bani ompungnima, songon na dob Hubahen bani Silo.

¹⁵ Anjaha ambukkonon-Ku do homa hanima hun lobei-Hu, songon saninanima na dob Huambukkon, ai ma haganup ginompar ni Efraim.'"

Uhum Lumba-lumba dampak Parugamaon na Lepak

¹⁶ “Ia ho, ulang ma tonggohon bangsa on, ulang ma pabogeihon elek-elekmu atap tonggomu mangkopkop sidea, anjaha ulang ma apiti sidea i lobei-Hu, ai seng anjai balosan-Ku age ho.

¹⁷ Ai ididah ho do na binahen ni sidea bani huta-huta ni Juda ampa bani dalan-dalan na i Jerusalem?

¹⁸ Dakdanak patumpu soban, dalahi pagara apuy, naboru mangagu topung laho mambahen kue, bani raja naboru i langit; ambahni ai iuseihon galangan siinumon bani naibata na legan, laho manunsahi uhur-Hu.

¹⁹ Ai Ahu do nani na sinunsahan ni sidea ai?” Nini Jahowa. “Ai lang sidea sandiri do gabe habadoron bani sidea?

²⁰ Halani ai sonon do hata ni Jahowa, ‘Tonggor ma, duruskononkon do gilang-Ku ampa ringis-Ku bani ianan on, bani jolma ampa pinahan, bani hayu na i talun ampa bani gogoh ni juma; maningon gara do ai, seng intopkononkon.’

²¹ Sonon do hata ni Jahowa Zebaot, Naibata ni Israel, ‘Tambahi hanima ma galangan situtungonnima bani galangan sisayatonnima, anjaha pangan hanima ma gulei ai.

²² Ai sanggah Hupatangkog ompungnima hun tanoh Masir, seng dong Huhatahon atap Hutonahkon pasal galangan situtungon ampa galangan sisayaton bani sidea.

²³ tapi on do Hutonahkon bani sidea, 'Tangihon hanima ma sorang-Ku, ase Ahu gabe Naibatanim, anjaha hanima gabe bangsang-Ku; anjaha marparlahou ma hanima bani sagala dalam-Ku, na Hutonahkon bannima, ase marsonang-sonang hanima!'

²⁴ Tapi seng itangihon sidea, anjaha seng ipateleng pinggol ni sidea laho manangar, tapi marparlahou do sidea domu bani rosuh-rosuh ni uhurni ampa hengken ni uhur ni sidea na jahat ai; itundali sidea do Ahu, seng idompakkon.

²⁵ Humbani ari pardarat ni ompungnima hun tanoh Masir das ronsi sadari on, marnunut do ganup ari Husuruh bannima juakjuak-Ku, ai ma nabi-nabi;

²⁶ tapi seng itangihon sidea Ahu, atap itareihon pinggol ni sidea, tapi ipajogal sidea do tangkuhukni. Manjahati do sidea lobih humbani ompung ni sidea.

²⁷ Anjaha porini pe ihatahon ho ganup hata on bani sidea, seng anjai tangihonon ni sidea ho, dilo-dilo pe ho bani sidea, seng anjai balosanni ho.

²⁸ Halani ai hatahon ma bani sidea, 'On ma bangsa, na so ra manangihon sora ni Jahowa Naibatani,

anjaha na so ra ajaran. Magou do hasintongan, daoh humbani pamangan ni sidea.'

²⁹ Jambak ma jambulanmu, anjaha ambukkon ma ai; mandoruh-doruh ma ho i atas ni buntu-buntu, ai domma iambukkon anjaha itadingkon Jahowa sundut na ginilaan-Ni on.

³⁰ Ai ihorjahon ginompar ni Juda do na masambor i lobei-Hu," nini Jahowa, "Ai inahkon sidea do gana-gana hagigi hu rumah panumbahan na targoran bani goran-Ku, laho pabutakkon ai.

³¹ Anjaha ipajongjong sidea do panggalangan Topet bani habungan Ben-Hinnom, laho manutung anak pakon boru ni sidea ibagas apuy, ai ma na so onggga Hutonahkon atap tubuh ibagas uhur-Hu.

³² Halani ai, tonggor ma, na roh ma arini," nini Jahowa, "seng be goranon ni halak ai Topet atap habungan Ben-Hinnom, tapi habungan Pamunuhon do anjaha i Topet mando halak mananom na mateini, halani seng dong be ianan na legan.

³³ Anjaha sagala bangkei ni bangsa on, maningon do panganon ni manuk-manuk na i awang-awang ampa binatang na i talun, seng dong na manggora ai.

³⁴ Anjaha parontihonon-Ku do i huta ni Juda pakon i alaman ni Jerusalem sora malas ni uhur ampa olob-olob, sora ni siparunjuk ampa sora ni tunangan, ai maningon tarulang do tanoh in."

8¹ “Bani panorang ai,” nini Jahowa, “Hurakon ma humbagas tanoman holi-holi ni raja ampa na sangap-sangap ni Juda, holi-holi ni malim ampa nabi-nabi sonai homa holi-holi ni par Jerusalem,² anjaha erapon do ai i lobei ni mata ni ari, bulan ampa bala na i langit, ai ma na hinaholongan ampa na nibalosan ni sidea, ai ma na niihutkon, na sinungkun ampa na sinombah ni sidea; seng be patumpuon ai atap tanomon, gabe napu mando ai i atas ni tanoh in.

³ Tapi sagala halak na tading humbani sundut na jahat on, bani haganup ianan pambuangan-Ku bani sidea, rosuhan mando uhur ni sidea matei ase manggoluh,” nini Jahowa Zebaot.

Hapitungon ni Bangsa ai ampa Pambobaini

⁴ Hatahon ma bani sidea, sonon do hata ni Jahowa, “Ai adong do halak na targompang, na so sihol jongjong use, atap halak na kahou, na so sihol mulak use?”

⁵ Mase ma bangsa na i Jeruslem on torus kahou, marsijoloman sidea bani sipaoto-oto anjaha manjua sidea mulak?

⁶ Hupardiateihon anjaha Hutangihon: Seng sintong parsahap ni sidea; sahalak pe lang na manolsoli hajahatonni, mangkatahon, ‘Aha do na hubahen on?’ Haganup do

sidea marsitohu dalanni songon huda na marpojong laho hu parporangan.

- ⁷ Gari sitanda ulog na i awang-awang, ibotoh do panorangni; kuhuy, hampilis ampa pamal ingat do bani musim parmula-kni, tapi anggo bangsang-Ku seng ibotoh aturan ni Jahowa.
- ⁸ Mase ma ihatahon hanima, 'Pentar do hanami, anjaha titah ni Jahowa do bennami.' Tapi, tonggor ma, gabe ladung do ai ibahen sipanurat.
- ⁹ Maningon do bador halak na pentar, maningon tarsonggot anjaha tartangkap do sidea, ai itulak sidea do hata ni Jahowa. Hapentaran aha ma na dong bani sidea ai?
- ¹⁰ Halani ai berehonon-Ku do jolma ni sidea bani halak na legan, anjaha juma ni sidea bani halak na manaluhon sidea. Ai haganup sidea na etek ronsi na magodang, haganup do sidea impolan bani pansarian na so tiba dalanni; nabi pakon malim, haganup mangkorjahon panipuon.
- ¹¹ Hampung do panambari ni sidea bani naborit ni bangsang-Ku, nini, 'Damei do, damei do!' Hape seng dong damei.
- ¹² Patut do sidea maila, ai sihagigihononkon do ihorjahon sidea, seng be ibotoh sidea na maila, seng be ibotoh hilaon. Halani ai jurgang do sidea rap pakon na jurgang in,

anjaha bani paroh-Ku marlulu bani sidea, maningon tompas do sidea, nini Jahowa.

- ¹³ Anggo sihol marpariama Ahu humbani sidea,” nini Jahowa, “Seng jumpah buah bani hayu anggur, seng dong buah bani hayu ara, bulungni pe melus do; halani ai ondoskonon-Ku do sidea bani na marojati sidea.”

Hagobiron ni Bangsa ai; Horu ni Uhur ni Nabi ai

- ¹⁴ “Mase ma sohsoh hita hundul-hundul? Martumpu ma, laho ma hita hu huta na pinatoguh ai, ase ijai hita bois; ai Jahowa Naibatanta do mangondoskon hita hu hamagouan, anjaha ipainumkon bah na marrasun banta, halani mardousa hita dampak Jahowa.
- ¹⁵ Mangarap do hita bani hadameion, hape seng dong roh na madear; mangarap do hita bani hamalumon, hape songgot-songgot do roh.
- ¹⁶ Hun Dan tarbogei do pangunsong ni huda ni sidea, halani pariha-iha ni huda panjangan ni sidea dugur do sab tanoh on. Roh do sidea mangankon tanoh in ampa ganup isini, huta ampa halak na marianan ijai.
- ¹⁷ Ai tonggor ma, Ahu do marsuruh bannima ulog, ulog bisa, na so boi tabas-tabason, jadi pagutonni ma hanima,” nini Jahowa.

- 18 “Seng hatambaran pusok ni uhur-Hu, borit do uhur-Hu ibagas.
- 19 Tangar ma, doruh-doruh ni boru ni bangsang-Ku bani sab tanoh in, nini, ‘Ai seng be nani i Sion Jahowa? Ai seng ijai be raja-Ni? Mase ma ipuhoi sidea ringis-Ku marhitei gana-gana uhiran ni sidea, ampa marhitei sisombahon na legan?’
- 20 Domma salpu pariama, salosei sisabion, tapi hita lanjar ope seng maluah.
- 21 Maropuk do uhur-Hu ibagas halani ugah ni boru ni bangsang-Ku, marhoru do Ahu, anjaha rusak tumang.
- 22 Seng be dong nani minak balsem i Gilead? Seng be dong panambari ijai? Mase ma nani lang ra malum naborit ni boru ni bangsang-Ku?”

Tangis-tangis ni si Jeremia Mangidah Bangsa Israel na Jahat ai, na Maningon Siuhumon ai

- 9**¹ “Ambit gabe bah ma namin ulungku, anjaha matanku gabe sombul iluh, ase boi ah manangisi, arian pakon borngin, na rasei humbani boru ni bangsang-Ku.
- ² Ambit adong ma namin bangku rumah parbornginan i halimisan, tadingkononku ma bangsanku laho bungkas humbani sidea. Ai haganup do sidea parbangkis, partumpuan ni sipangeluk.

- ³ Mardilah songon sior na sinintak do sidea; ladung do, sedo hasintongan manrajai i tanoh in; marnunut do sidea mangkorjahon hajahaton, tapi anggo Ahu seng itandai sidea,” nini Jahowa.
- ⁴ Ganup ma marjaga-jaga bani hasomanni, anjaha ulang martenger ni uhur bani sanina; marsioto-otoan do sanina samah sanina, anjaha marsitukasan hasoman samah hasoman.
- ⁵ marsioto-otoan do na marhuan, anjaha sahalak pe lang sihatahon na sintong; ipasomal sidea do dilahni mangkatahon ladung; jahat do sidea, seng ra sidea mubah.
- ⁶ Marompot do sidea mandalankon odoh-odoh ampa akal-akal, manjua do sidea mananda Ahu,” nini Jahowa.
- ⁷ Halani ai sonon do nini Jahowa Zebaot, “Tonggor ma lalaon-Ku anjaha ujion-Ku do sidea, ai aha ma na legan boi bahenon-Ku bani boru ni bangsang-Ku?
- ⁸ Panah na pamatehon do dilah ni sidea, pangoto-otoion do isahapkon pamanganni; ganup do marsahap na damei bani hasomanni, tapi maggompangi do uhurni ibagas.

⁹ Mintor lang ma marlulu Ahu pasal on bani sidea,” nini Jahowa, “Mintor ma lang mambalas Ahu bani bangsa na sonon?”

¹⁰ Tangisi anjaha doruhi ma dolog-dolog, marhoru ma pasal sampalan na i halimisan, ai domma tarulang ai, seng dong be na mamontas hunjai, anjaha seng tarbogei be umboh ni pinahan; manuk-manuk na i awang-awang ampa binatang-binatang domma lintun, maporus ganup.

¹¹ Bahenon-Ku do Jerusalem gabe timbunan batu, ianan bani sorigala, anjaha mareong do bahenon-Ku sagala huta ni Juda, anjaha seng dong be pangisini.

¹² Ise ma halak na maruhur, gabe iarusi na masa on? Bani ise do marsahap pamangan ni Jahowa, gabe boi patugahon-Ni mase maseda tanoh in, anjaha tarulang songon halimisan, gabe seng dong na montas hunjai?”

¹³ Dob ai nini Jahowa ma, “Halani itadingkon sidea titah-Ku, na Hubere bani sidea, anjaha seng itangihon sidea sorang-Ku, anjaha seng marpangabak sidea romban hujai,

¹⁴ tapi uhurni na hengkeng ai do iihutkon, anjaha Baal do iirikkon, songon niajaran ni bapa ni sidea bani sidea.”

¹⁵ Halani ai, sonon do hata ni Jahowa Zebaot, Naibata ni Israel, ‘Tonggor ma, ‘Bahenon-Ku

do bangsa on mangankon na mapaet, anjaha bereon-Ku do sidea minum bah na marrasun.'

¹⁶ Erapon-Ku do sidea hu tongah-tongah ni bangsa na so tinanda ni sidea age ompung ni sidea pe; suruhon-Ku do podang hun pudi ni sidea, paima bois sidea Hubahen.

¹⁷ Sonon do hata ni Jahowa Zebaot, Ingat da, mardilo naboru sipanangisi ase roh, suruh mangalopi ase roh naboru na pandei martangis-tangis,

¹⁸ papodas ma sidea, ase ipabogei hon tangis banta, ase marabur-abur iluh humbani matanta, anjaha mabaor iluh humbani langkop ni matanta.

¹⁹ Ai tarbogei do sora na doruh-doruh hun Sion, nini, 'Inangou, domma bois hita! Bador tumang do hita, ai maningon tadingkononta do nagori on, ai domma iparseda sidea iananta.'

²⁰ Tangar ma, ale parinangon, hata ni Jahowa, anjaha ijalo pinggolnima ma hata na luar humbani pamanganni; ajarhon hanima ma tangis-tangis bani borunima, anjaha ganup mangajarhon bani hasomanni doding tangis-tangis on:

²¹ Domma manangkih hamatean masuk humbani jandelanta, domma imasuki rumah bolonta,

laho manraseihon dakdanak na i alaman pakon garama na i alaman bolag.

²² Marrageian do bangkei songon napu i juma, songon radean ipudi ni panabi, seng dong na patumpuhon.”

Pamujion Diri na Sintong

²³ Sonon do hata ni Jahowa, “Sai ulang ma ienjengkon halak na pentar hapentaranni, ulang ma iunsagahkon siparkuasa kuasani, anjaha ulang ma ihagijangkon na bayak habayakonni.

²⁴ Tapi barang ise, na sihol tarpuji, marhitei on ma ia pujion, ai ma, na maruhur ai ia anjaha itandai Ahu, paboa Ahu do Jahowa na mandalankon idop ni uhur, hasintongan ampa hapintoron i tanoh on; ai halak sisonai do rosuh ni uhur-Hu,” nini Jahowa.

²⁵ “Tonggor ma, na roh ma panorangni,” nini Jahowa, “Jadi marlulu ma Ahu bani haganup ma marsunat bani sibur-siburni tumang, ai ma: bani Masir, bani Juda, bani Edom, bani Amon pakon bani Moab, ampa bani haganup halak na i halimisan, na marlepong jambulanni ibahen; ai haganup bangsa-bangsa on ampa haganup ginompar ni Israel seng marsunat uhurni ibagas.

²⁶ Seng marguna parsunaton pardarat tumang.”

**Na lang do Sisombah-sombahon,
Pitah Jahowa do Siparkuasa**

(ay. 12-16 pausih bd. 51:15-19)

- 10** ¹ Tangar ma hata, na hinatahon ni Jahowa bannima, ale ginompar ni Israel!
- ² Sonon do hata ni Jahowa, “Ulang ma marguru hanima bani dalam ni sipajuh begu-begu, ulang ma tarsonggot hanima ibahen tanda na i langit, tongon, bangsa parbegu do tarsonggot bani sisonai ai;
- ³ tongon, na lang do naibata ni parbegu: Sada hayu irobob hun harangan, anjaha tuhang manukangi ai marhitei pisou.
- ⁴ Ipajagar ma ai bani omas ampa pirak, ipahat marhitei paku ampa parpalu, ase ulang tarbahen miut.
- ⁵ Songon halak-halak do ai i paransimunan, seng boi marsahap; siusungon do ai, ai seng boi mardalan. Ulang ma habiari hanima sidea, ai seng tarbahensi mambahen na masambor, anjaha mambahen na madear pe seng dong gogohni.”
- ⁶ Seng dong na songon Ham, ale Jahowa. Banggal do Ham, anjaha timbul do goran-Mu marhitei hagogohon.
- ⁷ Ise ma na so mangkabiari Ham, ale Raja ni bangsa-bangsa? Ai sonin do talup i

lobei-Mu. Seng dong na songon Ham i tongah-tongah ni sagala na maruhur bani bangsa-bangsa ampa bani sab harajaon ni sidea.

⁸ Haganup do sidea lontong anjaha bodoh; pangajarion ni sisombah-sombahon, seng marguna ai.

⁹ Pirak ialop hun Tarsis anjaha omas hun Uphas; itukangi ma ai marhitei sipanguhir ampa tukang omas; mahonda anjaha magerger do pakeianni ibahen; anjaha jadi-jadian ni tangan ni tukang do ai ganupan.

¹⁰ Tapi Jahowa, ai ma Naibata na sintong; la do Naibata na manggoluh anjaha Raja sisadokah ni dokahni. Dugur do tanoh on ibahen gila-Ni, anjaha bangsa-bangsa seng tahan i lobei ni ringis-Ni.

¹¹ Sonai do hatahononnima bani sidea, 'Naibata-naibata ai, na so sitompa langit pakon tanoh on, maningon do bois hun tanoh ampa hun toruh ni langit.'

¹² Jahowa do na manjadihon tanoh on marhitei hagogohon, la do na pajonamkon dunia on marhitei hapentaran-Ni, anjaha marhitei habotohon-Ni ipaherbang do langit.

¹³ Anggo ipabogehon sora-Ni marhasak ma bah i langit, anjaha marhitei parentah-Ni naik do hambun hun ujung ni tanoh on. Hilap do

- ibahen parohkon udan, anjaha iparoh do logou humbani rumah panimpanan-Ni.
- ¹⁴ Na bodoh do ganup jolma, seng dong pangartianni; bador do haganup tuhang omas halani gana-ganani; ai sipaoto-oto do gana-gana ai, seng dong hosah ibagas.
- ¹⁵ Logou do hansa ai, jadi-jadian na pakahouhon; magou do ganupan ai bani panorang pambalason bani sidea.
- ¹⁶ Tapi seng sonai anggo rupei ni si Jakob; la do na manjadihon sagala na dong, anjaha Israel marga parbagianan-Ni; Jahowa Zebaot do goran-Ni.”

**Tangis-tangis ni Bangsa na Hona Uhum ai
ampa Tonggo ni si Jeremia**

- ¹⁷ Patumpu ma ugas-ugasmin, ho ale na hinubu.
- ¹⁸ Ai sonon do hata ni Jahowa, “Tonggor ma, ambukkonon-Ku do isi ni tanoh in santorap on, anjaha parohon-Ku do hasosakan bani sidea, ase mangahap sidea.
- ¹⁹ Mogouni in ahu halani ugahkon! Borit do ugahku! Tapi ningku do, ‘Anggo ningon sonai ma sitarononku, na taron ma!’
- ²⁰ Maseda do lampolampongu, mangkarotap talini; itadingkon niombahku do ahu, seng dong be sidea; seng dong be na pajongjong

lampolampo bangku, ampa na paherbang tendangku.

- ²¹ Ai na oto do siparmahan, seng ipindahi Jahowa, halani ai seng mardohar sidea, mambur merap do ganup hulanan ni sidea.
- ²² Tangar ma, roh do sada barita, sada hageoron banggal roh do hun tanoh parutara, laho parsedahon huta ni Juda, ase gabe ianan ni sorigala.
- ²³ Hubotoh do, ale Jahowa, sedo hape guru bani jolma langkahni, anjaha sedo halak pardalan-dalan na manontuhon langkahni.
- ²⁴ Pinsang Ham ma ahu, ale Jahowa, asal marpangantan; ulang ibagas ringis-Mu, ase ulang bois ahu.
- ²⁵ Useihon Ham ma ringis-Mu bani bangsa sipajuh begu-begu na so mananda Ham, ampa bani bangsa na so mandilo goran-Mu, ai ibondut sidea do Jakob, ibondut sidea do ia anjaha iboiskon, anjaha tarulang do ibahen iananni.”

**Hona Uhum Bangsa ai halani losei
Padan ni Jahowa na bani Sidea**

11 ¹ On do hata na roh bani si Jeremia humbani Jahowa,

² “Tangihon ma hata ni padan on, anjaha hatahon ma in bani halak Juda ampa bani pangisi ni Jerusalem.

³ Hatahon ma bani sidea sonon do hata ni Jahowa, Naibata ni Israel, ‘Hona papa do haganup na so manangihon hata ni padan on,

⁴ na dob Hutonahkon bani ompungnima, sanggah na Huboan sidea luar hun tanoh Masir, humbani pamurunan bosu, ningku do, ‘Tangihon hanima ma sorang-Ku, anjaha dalankon hanima haganup na Hutonahkon ai bannima, ase gabe bangsang-Ku hanima, anjaha Ahu gabe Naibatanim,’

⁵ ase Hupatotap bulawan na dob Hubulawankon bani ompungnima, ai ma laho mamberehon bani sidea sada tanoh, na marbaoran ijai dadih ampa manisan songon na masa sonari.” Jadi ningku ma mambalosi, “Sonai ma tongon, ale Jahowa!”

⁶ Dob ai nini Jahowa ma dampak ahu, “Tingtingkon ma haganup hata ai bani huta-huta ni Juda ampa bani dalan-dalan na i Jerusalem, ‘Tangihon hanima ma hata ni padan on, anjaha dalankon ma ai!

⁷ Ai Hupalumba do ompungnima humbani ari sanggah na Huboan sidea tangkog hun tanoh Masir, Hupalumba do sidea tongtong ronsi ari on, ningku do, ‘Tangihon hanima ma sorang-Ku!’

⁸ Tapi seng itangihon sidea Ahu, seng itareihon sidea pinggolni Bangku; haganup do sidea marparlahou domu hu bani hengken ni uhur ni

sidea na jahat in. Halani ai do ase Huparoh bani sidea haganup hata ni padan on, na Hutonahkon bani sidea ase iramotkon, hape seng ihorjahon sidea.”

⁹ Jadi nini Jahowa ma dompak ahu, “Masa do partahi-tahion i tongah-tongah ni halak Juda ampa i tongah-tongah ni pangisi ni Jerusalem.

¹⁰ Domma mulak sidea bani hajahaton ni ompung ni sidea, ai ma sipangengkar manangihon hatang-Ku; iihutkon sidea do naibata na legan laho mambalosi ai. Domma iosei ginompar ni Israel pakon ginompar ni Juda padan na Hubahen bani ompung ni sidea.

¹¹ Halani ai, sonon do hata ni Jahowa, ‘Tonggor ma, parohon-Ku do bani sidea hamagouan, na seng boi lembangan ni sidea; age pe dilo-dilo sidea Bangku, seng Hutangihon sidea.’

¹² Gabe laho ma huta ni Juda ampa pangisi ni Jerusalem, dilo-dilo bani naibata na legan, ginalangan ni sidea ai, hape seng boi iurupi sidea bani panorang hasosakan ni sidea.

¹³ Ai songon buei ni hutamu do buei ni sisombahonmu, ale Juda, anjaha songon buei ni dalan na i Jerusalem do buei ni anjapanjap habadoron, na pinaulinima bahen panggangan bani Baal.

¹⁴ Tapi anggo ho, ulang ma tonggohon bangsa on, anjaha ulang ma ho ra mangelek mangkopkop

sidea, ai seng anjai tangihonon-Ku sidea, age pe dilo-dilo sidea sanggah panorang hasosakan ni sidea.

¹⁵ Ai aha do na hinorjahon ni bangsa kasihan-Ku i rumah-Ku? Mangkorjahon na masambor do ia. Mintor boi ma salpu hamagouan humbam halani bagah-bagah ampa gulei na ginalangkon? Ai boi ope ho marolob-olob?

¹⁶ Igoran Jahowa hinan do ho, ‘Hayu Jetun na maratah, na majenges ramos, marbuah’ marhasoman sora ni logou na mapor pagaraonni do apuy hujai, anjaha mangkaseda ma dangkah-dangkahni.”

Itahihon Halak Anatot si Jeremia

¹⁷ “Ai Jahowa Zebaot, na manuan ho do manlumbahon hamagouan bam halani hajahaton, na binahen ni ginompar ni Israel ampa ginompar ni Juda, laho parohkon ringis-Ku, marhitei na manutung dahupa bani Baal.

¹⁸ Jahowa do na pabotohkon ai hu bangku gabe hubotoh; la do pataridahkon hu bangku pambahenan ni sidea na jahat ai.

¹⁹ Tapi anggo ahu, songon biribiri na lomuk do, na tinogu hu panayatan; seng dapot uhurhu, na ahu do hape tinahihon ni sidea, marhitei na mangkatahon, ‘Parseda hita ma hayumu on pakon buahni, boiskon hita ma ia hun tanoh ni halak na

manggoluh, ase ulang be dong na manarsingati goranni.’

²⁰ Tapi Ham, ale Jahowa Zebaot, panguhum na pintor do Ham, siuji piah-piah pakon uhur, pataridahkon Ham ma bangku pambalason-Mu bani sidea; ai hu Bamu do huondoskon parkarangku.”

²¹ Halani ai sonon do hata ni Jahowa hubani halak na hun Anatot, na manguhurhon hosahku, anjaha na mangkatahon, “Ulang sai manjahai ho marhitei goran ni Jahowa, ase ulang mangonai tangannami bam;

²² sonon do hata ni Jahowa Zebaot, ‘Tonggor ma, ningon marlulu do Ahu bani sidea; ningon matei do garama bunuhon ni podang, anjaha anak pakon boru ni sidea maningon matei gayuran do,

²³ anjaha seng dong be na tading humbani sidea. Ai parohon-Ku do hamagouan bani halak na i Anatot, bani tahun pambalason bani sidea.”

Adu-adu ni si Jeremia Pasal Hadoharon ni Parjahat

12 ¹ “Pintor do Ham, ale Jahowa porini pe dong hutuk-hutukku Bamu; age pe sonai sihol do marsahap ahui Bamu pasal sada parkara, ‘Mase ma mardohar dalan ni halak parjahat? Anjaha marsonang-sonang halak sipangeluk?’

- ² Isuan Ham do sidea, anjaha marurat do sidea; marbanggal do sidea anjaha marbuah. Dohor do Ham bani pamangan ni sidea, tapi daoh do humbagas uhurni.
- ³ Tapi itanda Ham do ahu, ale Jahowa; ididah Ham do ahu anjaha iuji Ham do uhurhu i lobei-Mu. Tarik Ham ma sidea songon biribiri na sihol sisayaton, anjaha papulig Ham ma sidea hubani ari panayatan.
- ⁴ Piga dokah nari marhoru tanoh in anjaha melus suan-suanan i talun? Halani hajahaton ni pangisi ni tanoh in do, ase masab pinahan ampa manuk-manuk, ai nini sidea, 'Seng anjai idahonni tongon ujungta!'
- ⁵ Anggo loja do ho ibahen sidea maradu rap pakon na mardalan nahei, sonaha ma pambahenmu maradu pakon huda? Anjaha anggo seng sonang iahap ho bani tanoh na mardamei-damei, sonaha ma pasal ho i harangan ni Jordan?
- ⁶ Ai gari saninamu pakon parrumah ni bapamu, sidea pe seng bujur dampak ho; martahitahi do sidea i pudimu. Ulang porsaya ho bani sidea, age pe basar parsahap ni sidea bam."

**Pusok ni Uhur ni Jahowa Mangidah
Tanoh Parbagianan-Ni**

- ⁷ “Domma Hutadingkon rumah-Ku, domma Huambukkon parbagianan-Ku; domma Huondoskon haudungan ni uhur-Hu hubagas tangan ni munsuhi.
- ⁸ Gabe songon singa na i harangan do parbagianan-Ku dampak Ahu; ipamaling do sorani dampak Ahu, halani ai do ase magigi Ahu hu bani.
- ⁹ Gabe manuk-manuk panoroh sirintik do parbagianan-Ku Bangku. Manuk-manuk panoroh do roh inggot mandorabsi. Laho ma hanima, patumpu ma sagala binatang na i talun, ase roh mangankon.
- ¹⁰ Buei do parmahan na parseda pohon anggur-Hu, ilot-loti sidea do jumang-Ku, gabe halimisan do juma harosuh-Ku ibahen sidea.
- ¹¹ Gabe halimisan do ai ibahen sidea, marhoru i lobei-Hu halani maseda, tarulang do tanoh in ganup, seng dong na mampardulihon.
- ¹² Bani haganup buntu-buntu na leseng, i halimisan domma roh na parsedahon. Ai podang ni Jahowa do na mangankon hun ujung ni tanoh na sada das hu ujung ni

tanoh na sada nari; seng dong damei bani sagala na tinompa.

- ¹³ Omei do isabur sidea, hape duri do isabi; ilojai sidea do dirini hape seng marlaba. Seng tarhamegahkon sidea pariama ni sidea, halani gajag ni ringis ni Jahowa.”

Sura-sura ni Naibata Pasal Bangsa-bangsa Simbalog ni Israel

¹⁴ Sonon do hata ni Jahowa, “Pasal haganup simbalog-Ku na jahat in, na mangonai tangan bani parbagianan-Ku, na Hubere gabe siteanon ni bangsang-Ku Israel, ‘Tonggor ma, orbaton-Ku do sidea hun tanoh ni sidea, anjaha ginompar ni Juda orbaton-Ku do hun tongah-tongah ni sidea.’

¹⁵ Tapi anggo domma Huorbat sidea, marpangulaki do uhur-Hu mangidah sidea, anjaha boanon-Ku do sidea use mulak ganup hu bani parbagiananni ampa hu tanohni bei.

¹⁶ Dob torang iguruhon sidea dalan ni bangsang-Ku, ai ma marbija marhitei goran-Ku, ‘Songon sintongni manggoluh Jahowa!’ Songon sidea na mangajari bangsang-Ku marbija marhitei Baal, jadi pajonamon do sidea i tongah-tongah ni bangsang-Ku.

- ¹⁷ Tapi anggo seng itangihon sidea, orbaton-Ku do bangsa na sonai ai, anjaha boiskonon-Ku, nini Jahowa.”

Pasal Gondit na Pinonopkon, na Gabe Madotei ai

13 ¹ Sonon do hata ni Jahowa hu bangku, “Laho ma ho, boli ma sada gondit linnen, anjaha gonditkon ma ai bani binongeimu, tapi ulang hona bah bahen ai.”

² Jadi huboli ma sada gondit domu hubani parentah ni Jahowa, anjaha hunahkon ma ai bani binongeihu.

³ Dob ai roh ma hata ni Jahowa hu bangku paduahalihon, nini,

⁴ “Buat ma gondit na binolimai, na bani binongeimai, anjaha misir ma ho laho hu Bah Eprat, ponopkon ma ai bani rigat ni dolog batu.”

⁵ Jadi laho ma ahu, huponopkon ma ai i topi ni Bah Eprat, songon na hinatahon ni Jahowa bangku.

⁶ Dob ai bani dokah-dokah ni ari, nini Jahowa ma hu bangku, “Misir ma ho hu Bah Eprat, alop ma hunjai gondit ondi, na Huhatahon ponopkononmu ijai.”

⁷ Dob ai laho ma ahu hu Eprat, jadi huhurak anjaha hubuat ma gondit ai humbani pamonopanni hinan. Tonggor ma, domma madotei gondit ai, seng marguna be atap bahen aha pe.

⁸ Dob ai roh ma use hata ni Jahowa hu bangku,

⁹ “Sonon do hata ni Jahowa, Sonai do usih parsedaon-Ku gijang ni uhur ni Juda ampa pangenjengon ni Jerusalem na bangga ai.

¹⁰ Bangsa na jahat on, na mangengkar manangihon hatang-Ku, na marparlahou mangihutkon uhurni na hengkeng in, anjaha na mangirikkon naibata na legan, laho mambalosi anjaha marsombah hujai, maningon dos do sidea bani gondit on, na so marguna atap bahen aha pe.

¹¹ Songon gondit na longkot bani binongei ni dalahi, sonai do Hulongkotkon Bangku ganup ginompar ni Israel ampa haganup ginompar ni Juda,” nini Jahowa, “Ase gabe bangsang-Ku sidea. Gabe barita, puji-pujian ampa hamuliaon Bangku, hape seng ra sidea manangihon.”

Pasal Gusi na Ginokan bani Anggur ampa na Niropukan ai

¹² Hatahon ma bani sidea hata on, “Sonon do hata ni Jahowa Naibata ni Israel, ‘Sagala gusi maningon gokan do bani anggur.’ Jadi anggo ihatahon sidea bam, ‘Ai lang ibotoh hanami do maningon gokan sagala gusi bani anggur?’”

¹³ Jadi hatahon ma bani sidea, “Sonon do hata ni Jahowa, ‘Tonggor ma, gok hamabukon do bahenon-Ku haganup pangisi ni nagori on: Raja-raja na hundul bani paratas ni si Daud, malim-malim, nabi-nabi ampa haganup pangisi ni Jerusalem.

¹⁴ Anjaha marsiropukan do sidea bahenon-Ku, ronsi bapa hu bani anakni,’” nini Jahowa, “Seng

holong atei-Hu, seng manosal Ahu anjaha seng marpangulaki uhur-Hu, maningon bois do sidea bahenon-Ku.”

Ojur-ojur Martoruh ni Uhur i Lobei ni Jahowa

- ¹⁵ Tangar anjaha tangihon hanima ma, ulang ma mangenjeng, ai Jahowa do na marsahap.
- ¹⁶ Bere hanima ma hasangapon bani Jahowa Naibatanima, sanggah lape iparoh hagolapan, sanggah lape tartuktuk naheinima bani dolog na golap, anjaha sanggah paima-imahon haliharon hanima, gabe ipaubah ai jadi hagolapan anjaha ibahen ai gabe na lotir.
- ¹⁷ Tapi, anggo seng ra hanima, maningon tangis ma tonduyhu bani na lungun halani gijang ni uhnima ai; marbaoran ma iluh humbani matangku, halani hona buang hulanan ni Jahowa.
- ¹⁸ Hatahon ma bani raja in ampa bani inang ni raja in, ‘Patoruh hanima ma parhundulnima, ai domma matektek sortali hamuliaon humbani ulunima.’
- ¹⁹ Huta na i tanoh Dangsina domma tartutup, sahalak pe seng dong na mangungkab. Haganup do Juda maningon tarbuang, tarbuang do sidea haganup.

**Hona Butakan do Jerusalem
halani Buei ni Hajahatonna**

- ²⁰ Mangkawah ma hanima anjaha idah ma sidea ai na roh hun utara. Ija do hulanan ni biribiri na dob niondoskon bam, biribirimu na jenges-jenges ai?
- ²¹ Aha ma hatahononku, anggo ipabangkit panggomgom bam, ai ma sidea, na dob niajar-ajaranmu gabe hasoman bam? Ai lang mangonai ma bam na maborit, songon bani sada naboru na sihol tubuhan anak?
- ²² Anjaha anggo ihatahon ho ibagas uhurmu, 'Mase ma mangonai na sonon bangku?' Halani buei ni salahmu do, ase isintak hioumu hu atas anjaha hona butakan ho.
- ²³ Ai boi do ipaubah halak Etiopia hulingkulingni atap begu jolangjolangni? Sonai ma sabonar seng tarbahen hanima mambahen na madear, hanima na dob somal mangkorjahon na jahat.
- ²⁴ Halani ai erapon-Ku ma hanima songon lamlam na niombuskon ni logou, na roh hun halimisan.
- ²⁵ Ai ma rupeimu, parbagiananmu na dob Husuhat bam," nini Jahowa, "Halani ihalupahon ho Ahu, anjaha martenger ni uhur ho bani ladung.

- ²⁶ Sintakon-Ku do hioumu das hu atas ni bohimu, ase taridah hailaonmu.
- ²⁷ Ai ma parbangkisonmu, hagarangonmai ampa parriah-riahonmu. Huidah do horjamu sihagigihononkon i atas buntu-buntu ampa i tongah ladang. Bursik ma ho, ale Jerusalem! Sadia dokah nari ase pansing ho?”

**Pangapition na Soya-soya Sanggah Musim
Logou ni Ari ampa Hasosakan Banggal**

- 14** ¹ On do hata ni Jahowa, na roh bani si Jeremia, pasal logou ni ari maningting.
- ² Marpusok ni uhur do Juda, anjaha horbanganni hurleh; pangisini hundul tangis-tangis i toruh, anjaha doruh-doruh ni Jerusalem manaik do hu atas.
- ³ Na sangap-sangap marsuruh juakjuakni mangindahi bah; das ma sidea bani parigi, seng dong bah jumpah sidea; mulak ma sidea, lumei gusini; jut do uurni sidea, hiranan, irungkub sidea do uluni.
- ⁴ Siholan do tanoh bani bah, halani seng roh udan hu tanoh in; jut do uhur ni parjuma-juma, martudung-tudung horu ni uhur do sidea.
- ⁵ Age ursa boru-boru na i talun, itadingkon do anakni na baru tubuh, halani seng dong be poyon-poyon.

- ⁶ Jongjong do halode harangan i atas buntu-buntu na palpalon, daup-daup bani logou songon sorigala; gombur do mata ni sidea halani seng dong sigagaton.
- ⁷ “Ham Jahowa, anggo adu-adu hajahatonnami dampak hanami, sai mangurupi ma Ham, halani goran-Mu; tongon buei do panundalionnami, dampak Ham do hanami mardousa.
- ⁸ Ham, ale pangarapan ni Israel, Sipaluah bani panorang sanggah hasosakan, mase ma songon halak na legan Ham i tanoh in, songon halak pardalan-dalan na roh marborngin hansa?
- ⁹ Mase ma Ham songon halak na jonong, songon puanglima na so boi mangurupi? Tapi i tongah-tongahnami do Ham, ale Jahowa, marpanggorani bani goran-Mu do hanami. Ulang ma tadingkon Ham hanami!”
- ¹⁰ Sonon do hata ni Jahowa bani bangsa on, “Marosuh do sidea hujai-hujon, seng ra sidea pasohkon naheini. Halani ai seng marosuh Jahowa mangidah sidea, idingat do sonari hajahaton ni sidea, anjaha sihol do balaskonon-Ni dousa ni sidea.”
- ¹¹ Nini Jahowa do hu bangku, “Ulang ma sai martonggoi ho mangapiti bangsa on.

¹² Age marpuasa sidea, seng anjai tangihonon-Ku doruh-doruh ni sidea, age pe igalangkon sidea galangan situtungon ampa galangan sipanganon ni sidea, seng marosuh Ahu bani sidea; tapi boiskonon-Ku do sidea marhitei podang, lohei pakon sampar.”

¹³ Dob ai ningku ma mambalosi, “Ham Tuhan Jahowa, tonggor ma, nabi-nabi ai do mangkatahon bani sidea, ‘Seng anjai idahonnima podang, barang loheian hanima, tapi damei na totap do berehononku bannima bani ianan on.’”

¹⁴ Tapi nini Jahowa ma hu bangku, “Ladung do na hinatahon ni nabi-nabi ai marhitei goran-Ku; seng dong Husuruh sidea, atap martonah Ahu bani sidea, atap marsahap bani sidea. Pangungkabon sipaoto-oto, panjahaion na so marnidok, ampa haatoon ni pingkiran ni sidea do ihatahon sidea bannima.

¹⁵ Halani ai sonon do hata ni Jahowa dompak nabi na manjahai marhitei goran-Ku, age pe lang Husuruh sidea, anjaha na mangkatahon, ‘Seng anjai roh podang atap lohei hu nagori on. Maningon bois do nabi na sonai marhitei podang ampa lohei.’

¹⁶ Anjaha halak na nijahaan ni sidea, maningon radag do i alaman ni Jerusalem, rasei ibahen lohei ampa podang, seng dong na mananom sidea, sidea

sandiri, jolmani, anakni pakon boruni. Ai maningon useihonon-Ku do hajahaton ni sidea bani sidea.

¹⁷ Hatahon ma bani sidea hata on, 'Sai marabur-abur do iluh ni matang-Ku arian pakon borngin, anjaha seng marnamangadi ai, ai parah do ugha ni boru ni bangsang-Ku, borat do na mangonai bani ai.

¹⁸ Anggo laho ahu hu ladang, tonggor ma, na mangkamatei binahen ni podang; mulak masuk ahu hu huta, tonggor ma, halak radag binahen ni lohei; tongon, age nabi ampa malim dalan-dalan do i tanoh in, jut do uhur ni sidea.

¹⁹ Ai domma tongon-tongon iambukkon Ham Juda? Ai domma sogam Ham bani Sion? Mase ma ilonsingi Ham hanami, anjaha seng dong hamalumon bennami? Sai mangarap do hanami bani hadameion, tapi seng dong roh na madear, mangarap do hanami bani panorang hamalumon, hape tonggor ma, hasonggoton do roh.

²⁰ Ham Jahowa, itandai hanami do hajahatonnami ampa salah ni ompungnami; tongon, dompak Ham do hanami mardousa.

²¹ Ulang ma buangkon Ham hanami halani goran-Mu! Ulang ma lopas Ham mahiri hotak ni hamuliaon-Mu! Ingat Ham ma, ulang ubah Ham padan-Mu na bennami.

²² Mintor adong ma humbani naibata ni bangsa-bangsa na boi paroh udan? Atap mintor tarparoh langit ma udan? Ai lang Ham do hansa, ale Jahowa Naibata? Bamu do marhatengeran hanami, ai Ham do na manjadihon ai haganupan.”

15 ¹ Dob ai nini Jahowa ma hu bangku, “Porini pe roh si Musa pakon si Samuel hu lobei-Hu, seng anjai marulak-ulakan uhur-Hu mangidah bangsa on, palaho ma sidea hun lobei-Hu, suruh ma sidea misir!

² Jadi anggo ihatahon sidea bam, ‘Huja ma hanami laho?’ Hatahon ma bani sidea, “Sonon do hata ni Jahowa, ‘Na dob tinontuhon hu hamatean, hu hamatean ma; na hubani podang, bani podang ma; na bani lohei bani lohei ma, anjaha na hu buangan, hu habuangan ma.’

³ Ai parohon-Ku do ompat masam hasedaon bani sidea,” nini Jahowa, “Podang laho mamunuh, baliang laho mamparsilbak, manuk-manuk na i awang-awang pakon binatang na i talun laho mangankon pakon mansedahon.

⁴ Bahenon-Ku ma sidea gabe songgot-songgot bani haganup harajaon na i tanoh on, halani pambahenan ni si Manase, anak ni si Hiskia, raja ni Juda, i Jerusalem.

⁵ Ise ma na ra marholong ni atei bam, ale Jerusalem, anjaha ise ma na ra manangisi

- ho? Anjaha ise ma na ra tuluy, laho manungkun atap na horas-horas ho?
- ⁶ Domma iambukkon ho Ahu,” nini Jahowa, “Itundalhon ho do Ahu. Halani ai huondamkon do tangan-Ku dompak ho laho mandedahon ho; domma loja Ahu na manganju-anju in.
- ⁷ Domma Hupiari sidea bani anduri ibagas huta-huta ni nagori. Domma popor sidea Hubahen, domma Huparseda bangsang-Ku; halani seng ra sidea mubah humbani parlahouni.
- ⁸ Hubahen do na mabalu i tongah-tongah ni sidea bueinan ase horsik ni laut. Huparoh do sipangagou tongah arian bani parinangon ampa niombahni; sompong do Huparoh bani sidea biar ampa songgot-songgot.
- ⁹ Mandatei do parinangon siparanak na pitu, tompas do ia halani galekni; sundut do mata ni ari sanggah arian ope; maila do ia anjaha tarbador. Anjaha na tading ai humbani sidea ondoskonon-Ku do bani podang i lobei ni munsuh ni sidea,” nini Jahowa.

**Sangsi ni Uhur ni si Jeremia
bani Jahowa; Balos ni Jahowa Bani**

- ¹⁰ Bursik ma ahu, ale inang, na tinubuhkonmu on, gabejolma sitinggilan ampa silawanon

bani ganup nagori on! Seng namin siparidou
atap siparutang ahu, hape ganup do sidea
mamapai ahu.

- ¹¹ Ham Jahowa, patut ma ai, porini seng onnga
huelek-elek Ham mangkopkop sidea,
porini seng roh ahu hu lobei-Mu mangapiti
munsuh ai bani panorang hasosakan ampa
panorang hamagouan?
- ¹² Boi ma ponggolhononkon bosu, bosu na hun
utara ai ampa tombaga?
- ¹³ Ondoskonon-Ku ma arta ampa habayakonmu
gabe taban-taban, seng pala marboli halani
dousamu, bani haganup nagorimu.
- ¹⁴ Bahenon-Ku ma ho gabe jabolon ni munsuhmu
bani sada nagori na so tinandamu; ai
domma gara apuy ni ringis-Ku bam,
tongtong do gara ai.
- ¹⁵ Ham Jahowa, ibotoh Ham do; ingat Ham ma
ahu anjaha parayak Ham ma; marlulu ma
Ham pasal ahu, dampak na mardakdak
ahu. Ulang ma masabkon Ham ahu. Ulang
ma marlumbang ni uhur lalab Ham bani
munsuh-Mu. Botoh Ham ma, halani Ham do
ase hona risa ahu.
- ¹⁶ Dob jumpah hata-Mu, hupangan ma ai; gabe
malas ni uhur do bangku hata-Mu ampa
hamegahon bani uhurhu; ai marpanggorani

bani goran-Mu do ahu, Ham Jahowa Naibata Zebaot.

- ¹⁷ Seng onggah hundul-hundul ahu i tongah-tongah ni halak sipargereh-gereh, atap marmalas-malas ni uhur ahu. Suhi do ahu hundul, halani tangan-Mu na bangku ai; ai gok ringis do uhurhu ibahen Ham.
- ¹⁸ Mase ma lang maronti naborit bangku, lang hatambaran ugahku, manjua pamalumon? Songon bah tubuh na paoto-otohon do Ham bangku, songon bah horah-horah.”
- ¹⁹ Halani ai sonon do hata ni Jahowa, “Anggo mulak ho hu bangku, pasuangon-Ku do ho, anjaha jongjong ma ho i lobei-Hu; anggo na sintong-sintong iluarhon ho, seng na so margagan, gabe pamangan ma ho Bangku. Maningon ho do dampakkonon ni sidea, tapi anggo ho ulang ma dampakkon sidea.
- ²⁰ Bahenon-Ku do ho bani bangsa on gabe tembok tombaga na so tarpanangkih; porangon ni sidea do ho tapi seng tartaluhon sidea ho; tongon Ahu do mangkasomani ho laho mangurupi ampa paluahkon ho,” nini Jahowa.
- ²¹ “Sai na paluahon-Ku do ho hun tangan ni parjahat, anjaha tobuson-Ku do ho hun tangan ni sipangodoh-odoh.”

**Ihatahon Jahowa si Jeremia Luar
humbani Adat ni Bangsa Siraseionkon ai**

16 ¹ Jadi roh ma hata ni Jahowa hu bangku sonon,

² “Ulang ma ho mambuat boru, anjaha ulang ma dong bam anak atap boru bani ianan on.

³ Ai sonon do hata ni Jahowa pasal anak ampa boru na tubuh bani ianan on, ampa pasal parinangon na manubuhkan sidea ampa pasal paramangon sisuan sidea bani nagori on,

⁴ ‘Maningon matei do sidea halani sampar; seng dong na manangisi atap na mananom; gabe napu do sidea bani sisik ni tanoh in. Rasei do sidea bahenon ni podang pakon lohei, anjaha bangkei ni sidea gabe sipanganon bani manuk-manuk na i awang-awang ampa binatang na i talun.’

⁵ Ai sonon do hata ni Jahowa, ‘Ulang ma masuki rumah parhoruon, laho tangis ijai atap laho mangapohi sidea, ai domma Hupadaoh damei-Hu humbani bangsa on, nini Jahowa, sonai idop ni uhur-Hu ampa holong ni atei-Hu.’

⁶ Na magodang atap na etek-etek maningon do matei i nagori on, seng dong na mananom atap na manangisi sidea, seng dong na marariki angkulani atap na manlepong uluni halani sidea.

⁷ Seng dong na mamboan ruti, laho mangapohi halak na mateian, anjaha seng dong na mambere

panginuman apoh-apoh halani na matei bapani atap inangni.

⁸ Ulang ma masuki rumah parpestaan laho hundul rap pakon sidea, sihol mangan ampa minum.

⁹ Ai sonon do hata ni Jahowa Zebaot, Naibata ni Israel, Tonggor ma, pasohon-Ku do bani ianan on, i lobeinima ampa sanggah panorangnima, sora malas ni uhur, sora olob-olob, sora ni siparunjuk ampa sora ni tunangan.

¹⁰ Anjaha anggo ipadas ho ganup hata on bani bangsa on, anjaha ihatahon sidea bam, 'Mase ma ilumbahon Jahowa bennami ganup hasedaon bangga on? Aha do salahnami ampa dousanami, na binahennami dampak Jahowa Naibatanami?'

¹¹ Jadi hatahon ma bani sidea, 'Halani itadingkon ompungnima Ahu,'" nini Jahowa, "Anjaha iihutkon sidea naibata na legan, ibalosi anjaha isombah sidea ai, tapi anggo Ahu itadingkon sidea, anjaha itadingkon titah-Ku seng idalankon.

¹² Anjaha halani samboran ope pambahenannima marimbang ompungnima ai, tonggor ma, ganup do hanima mangihutkon uhurnima na hengkeng anjaha na jahat in, manjua ia manangihon Ahu:

¹³ Halani ai buangkonon-Ku do hanima hun nagori on hu tanoh na so tinandanima ampa na so tinanda ni ompungnima; balosannima ma ijai naibata na legan, arian pakon borngin, ai seng idop be uhur-Hu bannima."

Uhum ampa Hatuahon na Sihol Parohon ni Jahowa bani Bangsa Israel ampa Bangsa Parbegu

¹⁴ “Halani ai, tonggor ma, na roh ma panorangni,” nini Jahowa, “Seng be hatahonon ni halak ijai, ‘Songon sintongni manggoluh Jahowa, na mambobahon halak Israel tangkog hun tanoh Masir,’

¹⁵ tapi sonon do, ‘Songon sintongni manggoluh Jahowa, na mambobahon halak Israel tangkog hun tanoh parutara ampa humbani haganup tanoh pambuangan-Ku bani sidea. Ai paulakon-Ku do sidea hu tanoh, na dob Huberehon hubani ompung ni sidea.’

¹⁶ Tonggor ma, suruhon-Ku ma buei panjala,” nini Jahowa, “Jadi jalooni ma sidea; dob ai suruhon-Ku ma buei parburu, jadi buruoni ma sidea humbani sagala dolog-dolog, humbani sagala buntu-buntu ampa ronggang-ronggang ni dolog batu.

¹⁷ Ai kawah do panonggor-Hu bani haganup dalan ni sidea; seng lingod sidea hun lobei-Hu, anjaha hajahaton ni sidea seng ponop i lobei ni matang-Ku.

¹⁸ Tapi sihol balaskonon-Ku do lobei lompit dua hajahaton ni sidea ampa dousa ni sidea, halani na dob ipabutak sidea tanoh-Ku marhitei sisombahon ni sidea na matei-matei ai, anjaha gok ibahen sidea parbagianan-Ku bani sihagigihononkon.

- ¹⁹ Ham Jahowa, gogohku ampa batar-batarhu, haporusan bangku bani ari hasosakan! Bamu do sihol roh bangsa sipajuh begu-begu humbani ujung ni tanoh on, anjaha hatahononni ma, ‘Sipaoto-oto tumang do hape na adong bani ompungnima, sisombahon na lang, na so margogoh mangurupi.’
- ²⁰ Ai tarbahenjolma do mambahen Naibata bani? Sedo naibata ai!
- ²¹ Halani ai, tonggor ma, pabotohkonon-Ku ma santorap on bani sidea pasal kuasang-Ku ampa hagogohon-Ku; jadi botohon ni sidea ma, Jahowa do goran-Ku.”

Pintor do Pambalason ni Naibata Sitanda Uhur in

- 17** ¹ Dousa ni Juda tarsurat do marhitei pena bosu; marhitei pena intan do iuhirhon ai bani batu panuratan ni uhur ni sidea. ampa bani tanduk ni anjapanjap ni sidea,
- ² ai idingat anak ni sidea do anjapanjap ampa Asera ni sidea, na i toruh ni hayu na maratah ampa bani buntu-buntu na gijang,
- ³ bani dolog-dolog ampa i tongah ladang. Artamu ampa haganup habayakonmu ondoskonon-Ku do gabe taban-taban gabe upah ni dousamu, bani haganup nagorimu.

- ⁴ Jadi tanggalhononmu ma tanganmu hambani pusakamu na Hubere bam, anjaha bahenon-Ku ma ho gabe jabolon ni munsuhmu bani nagori na so tinandamu. Ai hanima do pagara apuy ni ringis-Ku, apuy na gara tongtong.
- ⁵ Sonon do hata ni Jahowa, “Magou ma halak na martenger ni uhur bani jolma, na marpangajaman bani gogoh ni manisia, anjaha na pasurut uhurni hambani Jahowa.
- ⁶ Usih do ia bani naporon i halimisan, na seng mangahapkon roh na madear; marianan do ia i tanoh dorging na i halimisan, bani tanoh porad, na so niiankon ni jolma.
- ⁷ Tapi martuah ma halak na martenger ni uhur bani Jahowa, anjaha na mambahen Jahowa haporusanni.
- ⁸ Usih do ia hubani hayu na sinuan i topi ni bah, na pajulur uratni dampak bah. Seng mabiar ia age roh na milas, anjaha tongtong do maratah bulungni; seng rusak ia bani tahun logou ni ari, anjaha seng mangadi ia marbuah.
- ⁹ Sipaoto-oto do uhur ni jolma, lobih hambani haganup na legan; jahat tumang, ise ma na boi mananda in?
- ¹⁰ Ahu do Jahowa sipareksa uhur ampa siuji piah-piah, na mambalaskon bani jolma

romban hubani parlahouni domu hubani
buah ni pambahenanni.

- ¹¹ Songon dayok rimba na mamodomkon
tolur na so tinolurhonni, sonai do halak
na patumpuhon arta humbani dalan na
so dalanni; bani partongahan ni umurni
tadingkononni do ai anjaha bani ujung ni
goluhni gabe na oto do ia.
- ¹² Hotak hasangapon, timbul humbani
mungkahni, ai ma ianan na pansing
bennami.
- ¹³ Ham Jahowa, pangarapan ni Israel, sagala na
manadingkon Ham maningon tarbador do;
na marbalik hun Bamu, i tanoh do tarsurat
goranni, halani itadingkon sidea Jahowa,
sumbul ni bah hagoluhan.”

Tonggo ni si Jeremia Sanggah Tarsosak

- ¹⁴ “Pamalum Ham ma ahu, ale Jahowa, ase
malum botul ahu, paluah Ham ma ahu, ase
maluah ahu tongon, ai Ham do puji-pujian
bangku.
- ¹⁵ Tonggor ma, sidea do mangkatahon bangku,
‘Ija do hata ni Jahowa? Sai roh ma ai
tongon!’
- ¹⁶ Tapi anggo ahu seng onggah husosak-sosak Ham
manuruh na masambor, atap huharosuhkon
ari hamagouan ai, ibotoh Ham do ai; aha

na luar humbani pamanganku, talar do ai i lobei-Mu.

¹⁷ Ulang ma Ham gabe songgot-songgot bangku; Ham do haporusan bangku bani ari hamagouan.

¹⁸ Sai bador ma bahen Ham sidea na mangayak-ayak ahu, tapi ulang ma bador anggo ahu; sai tarsonggot ma bahen Ham sidea, tapi ulang ma tarsonggot anggo ahu; paroh Ham ma bani sidea ari hamagouan, lompit dua ma hasedaon ni sidea bahen Ham.”

Ojur-ujur Papansingkon Ari Sabat

¹⁹ Sonon do hata ni Jahowa hu bangku, “Laho ma ho, jongjong ma ho bani horbangan ni anak ni bangsa in, hamasukan ampa pandaratan bani raja-raja ni Juda, ampa bani haganup horbangan ni Jerusalem,

²⁰ anjaha hatahon ma bani sidea, ‘Tangihon ma hata ni Jahowa, ale raja ni Juda, ampa haganup Juda, ampa haganup pangisi ni Jerusalem, na masuk humbani horbangan on!’

²¹ Sonon do hata ni Jahowa, Anggo sihol manggoluh hanima, jaga ma hanima, ulang ma usung hanima sibobanon bani ari Sabat, atap iboan hanima hu horbangan ni Jerusalem.

²² Anjaha ulang ma usung hanima hun rumahnima sibobanon sanggah ari Sabat, atap ilahoi hanima

sada horja, tapi papansing hanima ma ari Sabat in, songon na dob Hutitahkon bani ompungnima.

²³ Tapi seng itangihon sidea atap ipaeleng pinggolni; lambin ipajogal do tangkuhukni, ase ulang marpanangar sidea anjaha tarjalo sidea pangajaran.

²⁴ Tapi anggo itangihon hanima Ahu,” nini

Jahowa, “Anjaha seng iboban hanima masuk sibobanon sanggah ari Sabat hun horbangan ni huta on, tapi ipapansing hanima ari Sabat in, seng marhorja hanima bani ari ai,

²⁵ jadi sai masuk do hun horbangan on raja-raja na hundul bani paratas ni si Daud, mangkunduli gareta ampa huda, sidea ampa na sangap-sangap ni halak Juda, ampa pangisi ni Jerusalem; anjaha ianonkon do huta on ronsi sadokah ni dokahni.

²⁶ Anjaha marrohan do halak humbani huta ni Juda ampa ianan inggot ni Jerusalem, hun tanoh Benjamin ampa hun tanoh bornoh-bornoh, hun tanoh pardologan ampa hun tanoh Dangsina, mamboban galangan situtungon ampa galangan sisayaton, galangan sipanganon ampa dahupa, sonai homa galangan puji-pujian hu Rumah ni Jahowa.

²⁷ Tapi anggo seng itangihon hanima Ahu, ase ipapansing hanima ari Sabat in, anjaha seng iusung hanima sibobanon laho masuk hun horbangan ni Jerusalem bani ari Sabat, jadi pagaraon-Ku

ma apuy bani horbanganni ai, anjaha bois ma istana-istana na i Jerusalem, anjaha seng anjai mintop ai.”

**Pambahenan ni Sitopa Hudon, Usihan
bani Pambahenan ni Naibata**

18¹ On do hata ni Jahowa na roh hubani si Jeremia,

² “Jongjong ma ho, anjaha tuad ma ho hu rumah ni sitopa hudon, ijai ma pabogehonon-Ku hatang-Ku bam.”

³ Jadi tuad ma ahu hu rumah ni sitopa hudon ai anjaha tonggor ma, tudu do ia marhorja manjolom parugasni ai.

⁴ Tapi hudon na sihol paulionni ai humbani tanoh halampung, maseda do ibagas tangan ni sitopa hudon ai; jadi ipauli ma hudon na legan hunjai, sonaha na dear nini uhurni.

⁵ Dob ai roh ma hata ni Jahowa hu bangku sonon,

⁶ “Ai seng tarbahren Ahu gakni bannima, songon pambahen ni sitopa hudon on, ale ginompar ni Israel?” nini Jahowa. “Tonggor ma, songon tanoh halampung ibagas tangan ni sitopa hudon, sonai do hanima ibagas tangan-Ku, ale ginompar ni Israel.

⁷ Marsipota marsahap Ahu pasal sada bangsa atap sada harajaon, laho mangorbat manropuki ampa parsedahon ai;

⁸ tapi anggo mubah do humbani hajahatonni bangsa na dob Hupalumba ai, jadi marpangulaki do uhur-Hu pasal hamagouan na dob Huranggihon ai bani.

⁹ Marsipota marsahap do Ahu pasal sada bangsa atap sada harajaon, laho manuan ampa pajongjongkon ai;

¹⁰ tapi anggo ibahen na jahat i lobei ni matang-Ku, seng itangihon sorang-Ku, jadi solsolan-Ku ma diring-Ku pasal na madear na sihol bahenon-Ku hu bani.

¹¹ Ai pe, hatahon ma hubani halak Juda ampa hubani pangisi ni Jerusalem. Sonon do hata ni Jahowa, 'Tonggor ma, domma Huranggi hinan hamagouan dampak hanima, anjaha Husurahon manlawan hanima. Mulak ma hanima, ganup humbani parlahouni na masambor, anjaha padear hanima ma dalannima ampa pambahenannima.'

¹² Tapi nini sidea ma, 'Sisoya-soya do ai! Domu hubani pingkirannami do hanami marparlahou, anjaha ganup mambahen domu hubani hengkeng ni uhurni na jahat ai.'

¹³ Halani ai sonon do hata ni Jahowa, 'Sungkun ma i tongah-tongah ni bangsa parbegu, atap dong do na dob onga mambogei sisonai!'

Sihagigihonon do Tongon-tongon Ihorjahon Boru ni Israel

- ¹⁴ Ai onggga do masab salju humbani batu-batu na i dolog Hermon? Ai onggga do horah bah na manorsuk, na torus mabaor hun dolog?
- ¹⁵ Tapi anggo bangsang-Ku lupa do sidea Bangku, bani sisombahon do sidea manutung dahupa; jomba do sidea bani dalan ni sidea, bani dalan na basaia ai, mardalan bani dalan na so pinauli.
- ¹⁶ gabe songgot-songgot do sidea ibahen, gabe siapason ronsi sadokah ni dokahni. Ganup na montas hunjai tarsonggot do anjaha iupir-upirhon uluni.
- ¹⁷ Songon logou na hun purba merap do sidea bahenon-Ku i lobei ni munshuh. Gurung-Ku do patuduhkonon-Ku bani sidea sedo bohing-Ku, bani ari ni hamagouan ni sidea.”

Tonggo ni si Jeremia dampak Imbangni

- ¹⁸ Nini sidea, “Laho ma hita mantahihon si Jeremia, ai seng anjai surut titah humbani malim, podah humbani na maruhur ampa hata ai humbani nabi. Laho ma hita, agou hita ma ia marhitei hatani sandiri, anjaha tangi ma hita pasal sagala hatani.
- ¹⁹ Ham Jahowa, pardiatei Ham ma ahu, tangar Ham sora ni sipanlawan bangku.

- ²⁰ Ai patut do na jahat balos ni na madear? Tongon, ihurak sidea do godung bangku? Ingat Ham ma, sonaha parjongjongku i lobei-Mu laho mangapiti sidea i lobei-Mu, laho palembangkon ringis-Mu humbani sidea.
- ²¹ Halani ai uhum Ham ma anak ni sidea marhitei lohei, anjaha ondoskon Ham ma sidea bani kuasa ni podang. Sai popor ma jolma ni sidea anjaha mabalu, anjaha dalahi ni sidea marmateian ma ibahen sampar; garama ni sidea pe rasei ma ibahen podang bani parmunsuhan.
- ²² Sai tarbogei ma doruh-doruh hun rumah ni sidea, anggo iparoh Ham bala sompong mandorab sidea! Ai ihurak sidea do godung laho manangkap ahu, anjaha ponop itaon siding bani naheihu.
- ²³ Ham Jahowa, ibotoh Ham do ganup partahitahian ni sidea; laho mamunuh ahu: Ulang ma sasap Ham hajahaton ni sidea ai, anjaha ulang ma masabkon Ham dousa ni sidea hun lobei-Mu. Mardabuhan ma sidea bahen Ham i lobei-Mu. Pasaud Ham ma uhur-Mu bani sidea bani panorang ni ringis-Mu.”

Botol Tanoh na Irosakkon Tuduh-tuduh bani Uhum

19¹ Sonon do hata ni Jahowa, “Laho ma ho, boli ma sada botol tanoh humbani sitopa hudon, arahkon ma deba pangintuai ni bangsa in ampa malim situanan.

² Anjaha luar ma ho hu habungan Ben-Hinnom, na i lambung ni horbangan parsanga-sangaan, anjaha tingtingkon ma ijai hata na sihol patugahon-Ku bam.

³ Hatahon ma, ‘Tangihon ma hata ni Jahowa ale raja-raja ni Juda ampa pangisi ni Jerusalem! Sonon do hata ni Jahowa Zebaot, Naibata ni Israel, tonggor ma, parohon-Ku ma hamagouan bani ianan on, gabe mardengeng ma pinggol ni sagala na manangar ai.

⁴ Halani na tinadingkon ni sidea ai Ahu anjaha ibutaki ianan on, marhitei na manutung dahupa ijon bani naibata na legan, ai ma, na so tinanda ni sidea atap ompung ni sidea atap raja-raja ni Juda pe; anjaha halani igoki sidea ianan on marhitei daroh ni halak na so marpipot,

⁵ anjaha ipauli ianan panumbahan bani Baal, laho manutung anak ni sidea bahen galangan situtungon bani Baal, ai ma, na so onggga Hutonahkon atap Husahapkon, atap onggga taringat ibagas uhur-Hu;

⁶ halani ai, tonggor ma, na roh ma ari,” nini Jahowa, “Lang be goranon ianan on Topet atap habungan Ben-Hinnom, tapi habungan pamunuhon do.

⁷ Ai gabe na lang do bahenon-Ku hauhuron ni Juda pakon Jerusalem bani ianan on, anjaha marrageian do sidea bahenon-Ku marhitei podang i lobei ni munsuh ni sidea, ampa marhitei tangan ni halak siuhurhon hosah ni sidea; berehonon-Ku do bangkei ni sidea gabe panganon ni manuk-manuk na i awang-awang ampa binatang na i talun.

⁸ Anjaha bahenon-Ku do huta on gabe hasonggotan ampa siapason; ai ganup na montas hujai tarsonggot do, anjaha manrisai halani haganup hasedaon na mangonai hujai.

⁹ Papangankonon-Ku do bani sidea daging ni anak ampa boru ni sidea, anjaha ganup sidea marsipangan daging ni hasomanni, sanggah na tarsosak sidea anjaha marhabiaran binahen ni munsuh ni sidea ampa na manguhurhon hosah ni sidea.

¹⁰ Jadi bolahkon ma botol tanoh ai i lobei ni halak na rapkon ho ai,

¹¹ anjaha hatahon ma bani sidea, sonon do hata ni Jahowa Zebaot, ‘Sonai ma rosakkonon-Ku bangsa on ampa huta on, songon halak na marosakkon hudon ni sitopa hudon, gabe seng tarpauli be.’ I

Topet ma halak mananom na matei, halani seng dong be panimbunan na legan.

¹² Sonai ma bahenon-Ku bani ianan on,” nini Jahowa, “Ampa bani pangisini; songon Topet do bahenon-Ku ianan on.

¹³ Rumah-rumah na i Jerusalem ampa rumah-rumah ni raja-raja ni Juda maningon pabutakon do songon ianan ni Topet, ai ma haganup rumah, na onggga tayubni ipakei panutungan ni dahupa bani ganup bala ni langit, anjaha iuseihon ijai galangan siinumon bani naibata na legan.”

Iarsik Malim Pashur si Jeremia

¹⁴ Dob ai mulak ma si Jeremia hun Topet, na pinarayakni ai laho manjahai ijai isuruh Jahowa; jadi jongjong ma ia i alaman ni rumah ni Jahowa, anjaha ihatahon ma bani ganup bangsa ai:

¹⁵ Sonon do hata ni Jahowa Zebaot, Naibata ni Israel, “Tonggor ma, parohon-Ku do hu huta on ampa hubani huta na legan haganup hamagouan, na dob Hulumbahon ai, halani ipajogal sidea tangkuhukni, anjaha manjua sidea manangihon hatang-Ku.”

20 ¹ Jadi, dob ibogei Malim Pashur, anak ni si Immer, ai ma kopala ni parjaga i rumah ni Jahowa, hata panjahaion ni si Jeremia ai,

² jadi ipukul ma Nabi Jeremia, anjaha inahkon ma ia bani bayangan, na bani horbangan Benjamin parhuluan ai, na bani rumah ni Jahowa.

³ Patarni ai, dob ipadarat si Pashur si Jeremia humbani bayangan, nini si Jeremia ma hu bani, “Lang be si Pashur goranmu diloon ni Jahowa, tapi “Biar Inggot” ma.

⁴ Ai sonon do hata ni Jahowa, ‘Tonggor ma, Ahu do mangondoskon ho hubagas hagobiron, ho ampa haganup hasomanmu. Rasei do sidea bahenon ni podang ni munsuh ni sidea, anjaha matamu sandiri mangidah ai. Ondoskonon-Ku do haganup Juda hubagas tangan ni raja Babel; jadi boanon ma sidea hu Babel, anjaha bunuhonni marhitei podang.’

⁵ Anjaha haganup habayakon ni huta on, haganup pansarianni, haganup ugas-ugasni na maharga ampa haganup arta ni raja-raja ni Juda ondoskonon-Ku do hubagas tangan ni munsuh ni sidea, ai ma na sihol roh manrampas anjaha manangkapi sidea, laho mamboban sidea hu Babel.

⁶ Anjaha ho, ale Pashur, ampa haganup sinrumahmu maningon tabanon do, iboan hu Babel; ijai do ho matei anjaha ijai do tanomon ho ampa haganup hasomanmu, na nioto-otoanmu marhitei panjahaion ladung.”

Paruntolon ni si Jeremia halani Horja Hanabionni

- ⁷ Isahap-sahapi Ham do ahu, ale Jahowa, anjaha ra do ahu sahap-sahapan-Mu, gogohan do Ham ase ahu, italuhon Ham do ahu. Gabe sipartatawaan do ahu ganup ari; haganup do manrisai ahu.
- ⁸ Ai siap marhata ahu maningon dilo-dilo do ahu, maningon taurhononku do pasal odoh-odoh ampa hajahaton, gabe sirisaon ampa sipahata-hataon do ahu halani hata ni Jahowa.
- ⁹ Anggo huhatahon, 'Lang be tarsingatanku ai, atap seng be marsahap ahu marhitei goran-Ni,' jadi songon na adong do apuy na gajag huahap ibagas uhurhu, tartutup ibagas holi-holingku, anjaha loja do ahu manahan-nahan ai, hape seng tolap ahu.
- ¹⁰ Tongon buei do husip-husip hubogei: Habiaran do inggot! Aduhon ma ia! Aduhon hita ma ia! Haganup huan-kuan na sangkan bangku manggompangi ahu, ase dabuh ahu. Ra taroto-otoi hita do ia, anjaha mambahen pambalason ma hita bani!
- ¹¹ Tapi Jahowa do mangkasomani ahu songon puanglima na barani; halani ai maningon targompang do sagala na mardakdak ahu, anjaha seng anjai tartaluhon sidea ahu:

Maningon bador tumang do sidea, seng anjai monang: Torus do sidea tarbador, seng halupahononkon ai.

- ¹² Ham Jahowa Zebaot, siuji halak parpintor, sididah piah-piah ampa uhur, paidahkon Ham ma bangku pambalason na bani sidea, ai ondos bamu do parkarangku.
- ¹³ Dodingkon ma Jahowa, puji ma Jahowa! Ai ipaluah do goluh ni halak na masombuh humbani tangan ni parjahat.
- ¹⁴ Hona papa ma namin ari partubuhku. Sai ulang ma hinan namin hona pasu-pasu ari panubuhkonon ni inang bangku!
- ¹⁵ Hona papa ma namin halak na mamboan barita bani bapa, mangkatahon, “Domma tubuh sada anak bamu”, laho mambahen malas tumang uhurni!
- ¹⁶ Sai mangonai ma bani halak ai, songon na masa bani huta na pinarseda ni Jahowa seng maralang-alang. Sai bogeion-Ni ma namin doruh-doruh sogod ampa hasonggotan arian,
- ¹⁷ halani na so ibunuh ahu, sanggah i partapaan, ase inang ma namin tanoman bangku anjaha boratan rumah lalab ia.
- ¹⁸ Mase ma mandarat ahu hun partapaan, laho mangidah hangaluton ampa horu ni uhur,

gabe bontasonku ari-ari ni goluhku ibagas habadoron?

Ilumbahon si Jeremia Parseda ni Jerusalem bani si Sedekia

21 ¹ On do hata na roh humbani Jahowa bani si Jeremia, sanggah isuruh Raja Sedekia si Pashur, anak ni si Malkia, ampa Malim Sepanya, anak ni si Maaseya hu bani mangkatahon,

² “Sungkun ham ma lobei bennami humbani Jahowa, ai iporang si Nebukadnesar, raja ni Babel do hanami nuan; andohar ra Jahowa mambahen bennami halongangan songon na somal hinan ibahen, ase misir ia hun bennami.”

³ Jadi nini si Jeremia ma hubani sidea, “Sonon ma hatahon hanima hubani si Sedekia.

⁴ Sonon do hata ni Jahowa, Naibata ni Israel, ‘Tonggor ma, pabalikon-Ku do sinjata hamunsuhon na i tangannima, na pinakeinima marmunsuh i darat ni tembok ai dampak raja ni Babel ampa dampak halak Kasdim, na mangkubu hanima, anjaha tarikon-Ku do ai haganup hubagas huta on.’

⁵ Ahu sandiri do marmunsuh dampak hanima marhitei tangan na gostong ampa botohon na gogoh, marhitei ringis ampa gila na parah.

⁶ Anjaha bunuhon-Ku do pangisi ni huta on, jolma, sonai age pinahan; marmateian do sidea halani sampar na parah.’

⁷ Dob ai, nini Jahowa ma, ‘Ondoskonon-Ku do si Sedekia, raja ni Juda, ampa gamot-gamotni, halak na mabuei ibagas huta on, na niliouan ni sampar, podang ampa lohei, hu tangan ni si Nebukadnesar, raja ni Babel, ampa hu tangan ni munsuh ni sidea, na manguhurhon hosah ni sidea. Bunuhonni ma sidea marhitei podang; seng maidop uhurni mangidah sidea, atap liouanni sidea, atap malang uhurni mangidah sidea.’

⁸ Ambahni ai hatahon ma bani bangsa on, sonon do hata ni Jahowa, ‘Tonggor ma, Ahu do mannahkon i lobeinima dalam hagoluhan ampa dalam hamatean.

⁹ Atap ise na tading ibagas huta on, maningon do matei marhitei podang, lohei ampa sampar; tapi atap ise na mandarat anjaha na lintun hubani halak Kasdim na mangkubu hanima, manggoluh ma ia, bani ma hosahni songon taban-taban.

¹⁰ Ai domma Hudompakkon bohing-Ku dompak huta on laho mangagouhon, sedo laho padearhon,” nini Jahowa, “Ondoskononkon do huta on hubagas tangan ni Raja Babel, anjaha tutungonni ma on.

¹¹ Bani ginompar ni raja ni Juda, hatahon ma, ‘Tangihon hanima ma hata ni Jahowa,

¹² ale ginompar ni si Daud!’ Sonon do hata ni Jahowa, ‘Dalankon ma uhum na pintor ganup sogod, anjaha paluah hanima ma na sinamun humbagas tangan ni sipangodoh-odoh, ase ulang roh ringis-Ku

songon apuy anjaha gara, seng dong na boi mangintopi, halani hajahaton ni pambahenannima.’

¹³ Tonggor ma, na roh do Ahu manlawan ho, ale huta, na marianan i atas ni dolog batu, na bani habungan,” nini Jahowa, “Hanima na mangkatahon, ‘Ise ma na tuad manlawan hita, anjaha ise ma na boi mammasuk iananta?’

¹⁴ Luluhonon-Ku do bannima romban hubani buah ni pambahenannima,” nini Jahowa, “Nahitan-Ku do apuy ibagas haranganni, anjaha boiskononni ma haganup na manliotisi.”

Hata Lumba-lumba bani Raja Joahas, Raja Joyakim ampa Raja Joyakin

22 ¹ Sonon do hata ni Jahowa, “Tuad ma ho hu rumah ni raja ni Juda, sahapkon ma ijai hata on.

² Hatahon ma, ‘Tangihon ma hata ni Jahowa, ale raja ni Juda, na hundul i atas hotak ni si Daud, ho ampa juakjuakmu ampa rayatmu, na masuk hun horbangan on.’

³ Sonon do nini Jahowa, ‘Dalankon hanima ma uhum ampa hapintoron, anjaha paluah ma halak na tarsamun hun tangan ni sipangodoh-odoh.’ Ulang ma bahen hasunsahan atap paksa bani halak panginsolat, na tading maetek ampa naboru na

mabalu, anjaha ulang ma duruskon daroh na so marpipot bani ianan on.

⁴ Anggo tongon idalankon hanima hata ai, jadi sai masuk do humbani horbangan ni rumah on raja-raja, na hundul bani hotak ni si Daud, mangkunduli gareta ampa huda, sidea ampa juakjuak ni sidea ampa rayat ni sidea.

⁵ Tapi anggo seng ra hanima manangihon hata on, domma marbija Ahu bani diring-Ku," nini Jahowa, "Maningon mareong do rumah on.

⁶ Ai sonon do hata ni Jahowa pasal istana ni raja ni Juda, 'Songon Gilead do ho Bangku, songon pakpak ni Libanon, tapi tongon gabe halimisan do ho bahenon-Ku, gabe huta na so marpangisi.

⁷ Pasirsiron-Ku do halak na marsedahon ho, ganup sidea marsinjata; anjaha robohon ni sidea do hayu aresmu sidearan, anjaha gijigkononni do ai hubagas apuy.

⁸ Buei do bangsa mamontas hun huta on, anjaha ganup manungkun bani hasomanni, 'Mase ma sonon ibahen Jahowa bani huta na bangga on?'

⁹ Jadi balosan ni sidea ma, 'Halani na itadingkon sidea do padan na binahen ni Jahowa, Naibata ni sidea, anjaha marsombah sidea bani naibata na legan, anjaha ibalosi sidea ai.'

¹⁰ Ulang ma tangisi hanima ia, na matei in, ulang marhoru pasalsi, tapi gogoh ma tangisi

hanima ia, na laho misir in, ai seng mulak be ia laho mangidah tanoh hatubuhanni.

¹¹ Ai sonon do hata ni Jahowa pasal si Salum, anak ni si Josia, raja ni Juda, na mamarentah manggantih bapani, si Josia, na misir humbani ianan on. Seng anjai mulak be ia hujon,

¹² tapi maningon matei do ia bani ianan pambuangan ni sidea bani, anjaha seng idahonni be tanoh on.

¹³ Bursik ma ia, na pajongjong rumahni marhitei hagedukon, ampa na paulihon anjung-anjung ni marhitei na so uhum, na marsuruh hasomanni mangkorja seng margaji, na so mamberehon upahni bani,

¹⁴ na mangkatahon, ‘Paulionku ma bangku rumah na banggal, na markamar-kamar na lumbang i atas, anjaha na mambahen marjandela ai, ilapis bani hayu ares anjaha ibahen marset sigerger.’

¹⁵ Nini uhurmu raja ma ho halani marpala-pala ho marrumah hayu ares? Ia bapamu ai lang mangan minum do ia? Tapi idalankon do hasintongan ampa hapintoron, gabe marsonang-sonang do ia. Sintong do panguhumionni bani na madoyuk pakon na masombuh,

¹⁶ anjaha mardohar do. Ai lang sonai parlahou ni sitandai Ahu?” nini Jahowa.

17 “Tapi anggo matamu pakon uhurmu, pitah dompak untung na so pintor do laho, dompak na manduruskon daroh na so marpipot, anjaha na mandalankon odoh-odoh ampa paksa.

18 Halani ai sonon do hata ni Jahowa pasal si Joyakim, anak ni si Josia, raja ni Juda, Seng anjai tangisan ni sidea ia, mangkatahon: ‘Aih saninangku!’ atap ‘Aih botou!’ Seng anjai doruh-doruh sidea pasalsi, mangkatahon, ‘Ham Tuannami!’ Atap, ‘Ham, na marsangap, na marmulia!’

19 Songon halode do ia tanomon, isarad anjaha isampakkon hudarat ni horbangan ni Jerusalem.

20 Tangkog ma ho hu Dolog Libanon, anjaha mardilo-dilo ma; pamaling ma soramu i Basan, anjaha doruh-doruh ma hun Dolog Abarim, ai domma bois sagala na mangkaholongi ho.

21 Marsahap do ahu bam sanggah na sonang ho, tapi nim, ‘Seng ra ahu manangihon!’ Sonai do parlahoumu humbani haposoonmu, seng onnga itangihon ho sorang-Ku.

22 Haganup parmahanmu ombuskonon ni logou do, anjaha haganup na mangkaholongi ho, maningon tarbuang do; jadi bador

ma ho, anjaha songgotan halani haganup
hajahatonmai.

²³ Ho ale na marparatas i Libanon, na marasar
i tongah-tongah ni hayu ares! Sonaha ma
nani pangorongmu bani paroh ni na maborit
bam, ai ma na maborit songon na bani
naboru na mangarou?

²⁴ Songon sintongni manggoluh Ahu,” nini Jahowa,
“age pe si Konya, anak ni si Joyakim, ai ma raja
i Juda, tintin token bani tangan-Ku siamun, sai
umpaton-Ku do ho,

²⁵ anjaha ondoskonon-Ku do ho hubagas tangan
ni na manguhurhon hosahmu, hubagas tangan ni
halak na hinabiaranmu, ai ma hubagas tangan ni si
Nebukadnesar, raja ni Babel, ampa hubagas tangan
ni halak Kasdim.

²⁶ Anjaha sampakkonon-Ku do ho ampa inangmu
na manubuhkan ho, hu tanoh na legan, na so
hatubuhanmu, anjaha ijai do hanima matei.

²⁷ Tapi hu nagori na hinarosuhkan ni sidea sihol
mulak hujai, seng anjai mulak be sidea hujai.

²⁸ Ai doskon hudon sihagigihonon-Ku anjaha
sirosakkonkon do nani si Konya, doskon
hudon, na so adong be halak na pot bani?
Mase isampakkon anjaha igijigkon ia, hu
tanoh na so onnga tinandani?

²⁹ Ale tanoh, tanoh, tanoh, tangar ma hata ni
Jahowa!

³⁰ Sonon do hata ni Jahowa, ‘Suratkon ma halak on, songon na so marniombah, halak na so marsangap bani goluhni; ai seng dong be humbam ginomparni, na hundul bani hotak ni si Daud anjaha na mamarentah use i Juda.’”

Bagah-bagah Pasal Tumbor ni si Daud na Pintor ai

23 ¹ “Bursik ma parmahan, na mangagou ampa na mangerap biribiri na Huparmahan,” nini Jahowa.

² “Halani ai sonon do hata ni Jahowa, Naibata ni Israel pasal parmahan, na marmahan bangsang-Ku, ‘Merap do ibahen hanima hulanan-Ku, iusir hanima do sidea, anjaha seng ipardimata hanima sidea. Tonggor ma, luluhonon-Ku do bannima pambahenannima na jahat in, nini Jahowa.

³ Tapi anggo Ahu, pahumpulon-Ku do teba-teba ni hulanan-Kin humbani haganup nagori pambuangan-Ku bani sidea, anjaha boanon-Ku do sidea mulak hubani sampalanni hinan, ase manggargar anjaha lambin bueini sidea.

⁴ Pabangkiton-Ku do parmahan bani sidea, na marmahan sidea, anjaha lang be gobir sidea, barang songgotan, anjaha seng dong magou age sada,” nini Jahowa.

⁵ “Tonggor ma, na roh ma panorangni,” nini Jahowa, “Pajongjongon-Ku ma bani si Daud sada

Tumbor na pintor; manggomgomi do ia songon raja marhasoman hapentaran, anjaha dalankononni do hasingtongan ampa hapintoron i nagori in.

⁶ Bani panorangni ai dapotan haluahon ma Juda, anjaha marsonang-sonang Israel marianan. Anjaha on do goranni hatahonon ni halak, 'Jahowa do hapintoron banta.'

⁷ Halani ai, tonggor ma, na roh do panorangni," nini Jahowa, "Seng be hatahonon ni halak ijai, 'Songon sintongni manggoluh Jahowa, na mamboban tangkog halak Israel hun Masir,'

⁸ tapi sonon ma, 'Songon sintongni manggoluh Jahowa, na mamboan ampa na manogu-nogu ginompar ni Israel tangkog hun tanoh par utara ampa hambani ganup nagori pambuangani bani sidea, laho mambahen sidea marianan bani tanoh ni sidea.'"

Hata Lumba-lumba bani Nabi Siparladung

⁹ Pasal nabi-nabi, "Marosak do uhurhu ibagas, hitir-hitir do ganup holi-holingku; songon halak na mabuk do ahu, songon halak na rebad-rebad halani anggur, ai ma marhitei Jahowa ampa hatani na pansing in.

¹⁰ Ai gok parbangkis do tanoh on; pangkorhon ni papa, marhoru do tanoh in, anjaha sampalan na i halimisan horah do. Na jahat

do situjuon bani sidea, anjaha hagedukon do kuasa bani sidea.

- ¹¹ Nabi, sonai age malim parjahat do, gari ibagas rumah-Ku jumpah Ahu do hajahaton ni sidea,” nini Jahowa.
- ¹² “Halani ai dalam ni sidea gabe dalam na landit anjaha na golap do bani sidea; jiris do sidea ijai anjaha dabuh. Ai parohon-Ku do bani sidea hamagouan bani tahun pambalason bani sidea,” nini Jahowa.
- ¹³ “Bani nabi na i Samaria Huidah adong do na so patut. Manjahai do sidea marhitei Baal, gabe kahou do ibahen bangsang-Ku Israel.
- ¹⁴ Tapi bani nabi na i Jerusalem Huidah do sihagigihononkon, marbangkisi do sidea anjaha marparlahou ibagas ladung; ipargogohi sidea do tangan ni parjahat, gabe seng dong na mulak humbani hajahatonni; haganup do sidea gabe songon Sodom Bangku, anjaha songon pangisi ni Gomora.”
- ¹⁵ Halani ai sonon do hata ni Jahowa Zebaot pasal nabi ai, “Tonggor ma, papangankonon-Ku do bani sidea sipanganon na mapaet, anjaha painumkonon-Ku do bah rasun bani sidea; ai luar do hasamboron humbani nabi-nabi na i Jerusalem hu sab tanoh in.”
- ¹⁶ Sonon do hata ni Jahowa Zebaot, “Ulang ma tangihon hanima hata ni nabi na manjahai

bannima! Na mangoto-otoi do sidea bannima, panonggoran ni uhur ni sidea sandiri do ibaritahon, sedo na humbani pamangan ni Jahowa.'

- ¹⁷ Sai ihata-hatahon sidea do bani halak na pahiri-hiri hata ni Jahowa, 'Sai na sonang do nasiam!' Anjaha bani ganup halak na marparlahou domu hubani uhurni na hengkeng ai, ihatahon sidea do, 'Seng anjai roh hamagouan bani nasiam!'
- ¹⁸ Ai ise dong, na jongjong manriah i lobei ni Jahowa, laho manjalo ampa mambogei hata-Ni? Ise do, na marimbagaskon hata-Ni, ase ibaritahon ai?
- ¹⁹ Tonggor ma, haba-haba humbani Jahowa! Luar do gila-Ni, ai ma haba-haba sibungkar hasowor; dorabon ni ai do ulu ni parjahat.
- ²⁰ Seng surut ringis ni Jahowa! paima idalankon anjaha ipasaud sura-sura ni uhur-Ni. Arusannima do ai bani dokah-dokah ni ari.
- ²¹ Seng Husuruh nabi-nabi ai, hape laho do sidea; seng marsahap Ahu bani sidea, hape manjahai do sidea.
- ²² Tapi ambit na dob jongjong sidea manriah i lobei-Hu, jadi baritahonon ni sidea ma hatang-Ku bani bangsang-Ku, laho paulakkon sidea humbani parlahou ni sidea

na jahat ai, ampa humbani pambahenan ni sidea na sambor ai.

²³ Ai Naibata na dohor do hansa Ahu,” nini Jahowa, “Ai lang Naibata na daoh do homa?

²⁴ Anggo marponop halak bani ianan na lingod, ai lang Huidah do ia?” nini Jahowa. “Ai lang Ahu do na manggoki langit pakon tanoh on?” nini Jahowa.

²⁵ “Hutangar do atap aha hata na hinatahon ni nabi-nabi ai, na patugahkon ladung marhitei goran-Ku, nini sidea, ‘Marnipi do ahu, marnipi do ahu!’

²⁶ Piga dokah nari do sonai uhur ni nabi-nabi ai, na patugahkon sipaoto-oto, na mansahapkon ladung na ibagas uhur ni sandiri,

²⁷ na mansurahon, ase lupa bangsang-Ku bani goran-Ku marhitei nipi ni sidea, na hinatahon ni sidea samah sidea, ai ma songon pangkalupahon ni ompung ni sidea bani goran-Ku halani Baal?

²⁸ Nabi na marnipi, ipatugah ma nipini; tapi atap ise na dong hatang-Ku bani, sintong-sintong ma ihatahon hata ai. Ai aha do pardomuan ni lamlam pakon omei,” nini Jahowa.

²⁹ “Ai lang songon apuy do hatang-Ku,” nini Jahowa, “Anjaha songon parpalu, na manropuki batu gingging?

³⁰ Halani ai, tonggor ma, lawanon-Ku do nabi-nabi ai,” nini Jahowa, “Na marsitangkoan bani hatang-Ku.

³¹ Tonggor ma, lawanon-Ku do nabi-nabi ai,” nini Jahowa, “Na somal mangkatahon marhitei dilahni, sonon do hata ni Jahowa,

³² ‘Tonggor ma, lawanon-Ku do nabi-nabi ai, na patugahkon nipi ladung,’” nini Jahowa, “Na mambaritahon ai, sihol pakahouhon bangsang-Ku marhitei ladung ampa sipaoto-oto ni sidea; seng dong Husuruh sidea, atap Huparentahkon; seng dong guna ni sidea bani bangsa on,” nini Jahowa.

³³ “Anggo adong humbani bangsa on, nabi atap malim pe, manungkun ho, ‘Aha do siporsanon humbani Jahowa?’ Hatahon ma hubani sidea, ‘Hanima do siporsanon ai, ambukkonon-Ku do hanima,’” nini Jahowa.

³⁴ “Ia dong nabi, malim atap ise humbani bangsa ai na mangkatahon, ‘Siporsanon humbani Jahowa, uhumon-Ku do ia ampa parrumahni.’

³⁵ Sonon do sihatahononnima ganup bani hasomanni ampa bani saninani, ‘Aha do balos ni Jahowa?’ atap, ‘Aha do na hinatahon ni Jahowa?’

³⁶ Tapi ulang be sahap-sahapkon pasal siporsanon humbani Jahowa, ai hata-Ni sandiri do siporsanon ai bani ganup halak, marhitei na ipabalik hanima hata ni Naibata na manggoluh in, ai ma Jahowa Zebaot, Naibatanta.

³⁷ Sonon ma hatahon hanima bani nabi, ‘Aha do balos ni Jahowa hubam?’ atap, ‘Aha do ihatahon Jahowa?’

³⁸ Tapi, anggo sai ihatahon hanima, ‘Siporsanon humbani Jahowa’, jadi sonon ma hata ni Jahowa, ‘Halani sai ihatahon hanima hata on, Siporsanon humbani Jahowa,’ age pe domma Husuruh na mangkatahon bannima, Seng bulih hatahononnima “Siporsanon humbani Jahowa”,

³⁹ halani ai, tonggor ma, angkaton-Ku ma hanima laho manggijigkon hun lobei-Hu, hanima sonai age huta on, na dob Hubere bannima ampa bani ompungnima.

⁴⁰ Anjaha pasogopon-Ku do bannima habadoron sisadokah ni dokahni ampa hahirion na manongtong, na so boi halupaonkon.”

Pangungkabon Pasal Dua Karanjang na Marisi Buah Ara

24 ¹ Jadi ipataridahkon Jahowa ma hu bangku, tonggor ma, dua karanjang marisi buah ni hayu ara, inahkon i lobei ni rumah ni Jahowa, ai ma na masa dob ibuangkon si Nebukadnesar, raja ni Babel, si Jekonya, anak ni si Joyakim, raja ni Juda, rap pakon na sangap-sangap ni Juda, ampa tuhang hayu, ampa tuhang bosu anjaha iboan sidea hun Jerusalem hu Babel.

² Sada karanjang marisi buah ara na dear tumang, songon limbuah ni buah ara, tapi karanjang na sada nari marisi buah ara na masambor tumang, seng tarpangan halani samborni.

³ Jadi nini Jahowa ma hu bangku, “Aha do na nididahmin, ale Jeremia?” Ningku marbalos, “Buah ara, buah na jenges ai, jenges tumang; tapi na sambor ai, sambor tumang, gabe seng tarpangan.”

⁴ Dob ai roh ma hata ni Jahowa hu bangku sonon,
⁵ Sonon do hata ni Jahowa, Naibata ni Israel,
“Songon buah ara na dear ai, sonai do Huhira halak na tarbuang hun Juda, na dob Huusir humbani ianan on hu tanoh ni halak Kasdim.

⁶ Kawahkonon-Ku do sidea ibagas halamlamon, anjaha boanon-Ku do sidea mulak hu tanoh on. Pajongjongon-Ku do sidea, seng parsedaon-Ku; suanon-Ku do sidea, seng orbaton-Ku.

⁷ Berehonon-Ku do bani sidea uhur laho mananda Ahu, paboa Ahu do Jahowa; gabe bangsang-Ku ma sidea anjaha Ahu gabe Naibata bani sidea, ai mulak do sidea use hu Bangku humbani gok ni uhur ni sidea.”

⁸ Tapi sonon do nini Jahowa, “Songon buah ara na sambor ai gabe seng tarpangan,” nini Jahowa, “Sonai do bahenon-Ku bani si Sedekia, raja ni Juda, bani na sangap-sangapni, bani simasima ni Jerusalem, na tading i nagori on, ampa bani sidea na marianan i tanoh Masir.

⁹ Bahenon-Ku do sidea gabe songgot-songgot bani haganup harajaon na i tanoh on; gabe sirisaon, umpama, siapason ampa siburaan do sidea, bani haganup ianan pambuangan-Ku bani sidea.

¹⁰ Tongoson-Ku do bani sidea podang, lohei ampa sampar, ronsi bois tumang sidea humbani tanoh na dob Hubere bani sidea ampa bani ompung ni sidea.”

Lumba-lumba Pasal Habuangan Sipitupuluh Tahun ampa Parseda ni Babel

25 ¹ On do hata na roh hubani si Jeremia, pasal haganup bangsa Juda, paompat-tahunkon dob raja si Joyakim, anak ni si Josia, raja ni Juda, bani tahun na parlobei dob raja si Nebukadnesar, raja ni Babel,

² ai ma ihatahon Nabi Jeremia bani haganup bangsa Juda ampa bani haganup pangisi ni Jerusalem, nini,

³ “Mulai humbani pasapuluhtolu-tahunkon dob raja si Josia, anak ni si Amon, raja ni Juda, das bani sadari on, dua puluh tolu tahun dokahni, sai roh do hata ni Jahowa hu bangku, anjaha husahapkon do ai bannima marulak-ulak, tapi seng itangihon hanima.

⁴ Tongtong do isuruh Jahowa sagala juakjuak-Ni, ai ma nabi-nabi ai, bannima, tapi seng ra hanima manangihon, anjaha seng ra hanima paeleng pinggolnima laho mambogei ai.

⁵ Nini sonon, ‘Mulak ma hanima ganup humbani parlahouni na masambor ampa pambahenanni na jahat in, ase totap hanima marianan bani tanoh, na dob binerehon ni Jahowa bannima ampa bani ompungnima, humbani sapari ronsi sadokah ni dokahni.’

⁶ Ulang ma ihutkon hanima naibata na legan, laho mambalosisi ampa marsombah hujai, anjaha ulang ma puhoi hanima ringis-Ku marhitei horja-horja ni tangannima, ase ulang Huparoh hasedaon bannima.

⁷ Tapi seng itangihon hanima Ahu,” nini Jahowa, “Gabe ipuhoi hanima do ringis-Ku marhitei pambahenan ni tangannima, na gabe hamagouan bannima sandiri.

⁸ Halani ai sonon do hata ni Jahowa Zebaot, ‘Halani na so itangihon hanima hatang-Ku,

⁹ tonggor ma, parohon-Ku ma bangsa-bangsa par utara,” nini Jahowa, “Ampa si Nebukadnesar, raja ni Babel, juakjuak-Kai, boanon-Ku ma sidea mandorab tanoh on ampa sagala pangisini ampa dompak ganup bangsa-bangsa inggot; boiskonon-Ku do sidea, bahenon-Ku do sidea gabe songgot-songgot, sipahirion ampa siapason tongtong.

¹⁰ Ambah ni ai, padaohon-Ku do hun tongah-tongah ni sidea sora malas ni uhur ampa olob-olob,

sora ni siparunjuk ampa sora ni tunangan, sora ni panduda ampa sinalsal ni suluh.

¹¹ Anjaha tanoh on ganup maningon do tarulang anjaha lungun, anjaha maningon balosan ni bangsa-bangsa on do raja ni Babel pitu puluh tahun dokahni.

¹² Tapi dob salpu na pitu puluh tahun ai,” nini Jahowa, “Marlulu do Ahu dampak raja ni Babel, dampak rayatni ampa dampak tanoh ni halak Kasdim, halani hajahaton ni sidea, anjaha bahenon-Ku do tanoh ai tarulang lalab.

¹³ Parohon-Ku do hubani tanoh ai domu hubani haganup hata na dob Hulumbahon dampaksi, ganup na tarsurat bani buku on, na dob nilumbahon ni si Jeremia dampak sagala bangsa.

¹⁴ Age sidea, buei do bangsa ampa raja-raja na banggal marjabolonkon sidea; balaskonon-Ku do bani sidea romban hu bani pambahenan ni sidea ampa horja ni tangan ni sidea.”

Panginuman na Marisi Ringis ni Jahowa bani Haganup Bangsa

¹⁵ Sonon do hata ni Jahowa, Naibata ni Israel hu bangku, “Buat ma humbani tangan-Ku panginuman on, na gok bani anggur ni ringis-Ku, anjaha bahen ma minum hunjai sagala bangsa, na Husuruh siparayakonmu.

¹⁶ ase minum sidea gabe rebad-rebad,
anjaha podoan halani podang na Husuruh hu
tongah-tongah ni sidea.”

¹⁷ Jadi hubuat ma panginumai ai humbagas tangan
ni Jahowa, anjaha hupainumkon hubani bangsa, na
sinuruh ni Jahowa siparayakonku:

¹⁸ Ai ma hubani Jerusalem pakon hubani huta-huta
ni Juda, hubani raja-rajani ampa hubani na
sanggap-sanggapni, ase gabe tarulang anjaha lungun
sidea, gabe songgot-songgot, sipahirion ampa
siburaan, songon na masa sadari on;

¹⁹ hubani Parao, raja ni Masir, gamot-gamotni, na
sanggap-sanggapni ampa haganup rayatni,

²⁰ ampa haganup bangsa na legan, na i tongah-
tongah ni sidea; hubani haganup raja ni tanoh Us
ampa hubani haganup raja ni tanoh Palistim, ai ma
Askalon, Gasa, Ekron pakon teba-teba ni Asdod;

²¹ Edom, Moab ampa halak Amon;

²² hubani ganup raja ni Tirus, haganup raja ni
Sidon, raja-raja na i dipar ni laut;

²³ hu bani Dedan, Tema, Bus ampa haganup halak
na ilepong jambulanni inggot;

²⁴ hubani ganup raja ni Arab ampa haganup raja ni
marga-marga, na marianan i halimisan;

²⁵ hubani haganup raja ni Simri, haganup raja ni
Elam ampa haganup raja ni Madai;

²⁶ hubani haganup raja na i utara, na daoh ampa
na dohor, marjojor, ampa hubani ganup harajaon

na i dunia on, na adong i sisik ni tanoh on. Anjaha dob salpu sidea, raja ni Babel ma minum.

²⁷ Dob ai hatahon ma bani sidea, “Sonon do hata ni Jahowa Zebaot, Naibata ni Israel, ‘Minum ma, mabuk ma anjaha mutah-utah, tompas ma anjaha ulang be jongjong, halani podang na Hutongos hu tongah-tongahnima.’

²⁸ Tapi anggo manjua sidea manjalo panginuman ai humbagas tanganmu laho minum hunjai, hatahon ma bani sidea: Sonon do hata ni Jahowa Zebaot, ‘Maningon inumonnima do!’

²⁹ Tongon, tonggor ma, bani huta na targoran bani goran-Ku do Hupungkah mambahen hamagouan, mintor hanima ma lang hona uhum? Seng boi lang hona uhum hanima, ai domma Hudilo podang dampak haganup na mangiankon tanoh on,” nini Jahowa Zebaot.

³⁰ “Tapi anggo ho, lumbahon ma bani sidea haganup hata on, anjaha hatahon ma bani sidea, ‘Morom do Jahowa hun babou, anjaha humbani ianan-Ni na ma pansing ai do ipabogeihon sora-Ni. Maling do morom la dampak sampalan-Ni; marsurak do la songon halak sipangkorja ibagas kilang dampak haganup pangisi ni tanoh on.’

³¹ Maraloling do ai das hu ujung ni tanoh on, ai marpakara do Jahowa dampak bangsa-bangsa; roh do la manguhum sagala na mardaging, anjaha parjahat

ai ondoskononni do bani podang,” nini Jahowa.

³² Sonon do hata ni Jahowa Zebaot, “Tonggor ma, manrarat do hamagouan humbani bangsa hu bangsa, anjaha roh do haba-haba bangga hun ujung ni tanoh on.

³³ Bani panorang ai rasei do bangkei ni na binunuh ni Jahowa, martibalan humbani tampakan ni tanoh on das hubani tampakan na sada nari. Seng sitangisan sidea, atap sipatumpuon, atap sitanomom; gabe napu do sidea bani sisik ni tanoh on.

³⁴ Mandoruh ma hanima, ale parmahan, anjaha tangis ma; margulu ma bani abuan, hanima pambobai ni hulanan in, ai roh ma ari pambunuhon ampa pangerapan bannima, anjaha marosak ma hanima songon hudon na maharga.

³⁵ Seng dong be haporusan bani parmahan barang haluahon bani pambobai ni hulanan in.

³⁶ Boge ma, partangis ni parmahan ampa doruh-doruh ni pambobai ni hulanan in! Ai Jahowa do na parsedahon sampalan ni sidea,

³⁷ anjaha harang na marsonang-sonang ai domma iparseda, halani gajag ni ringis ni Jahowa.

³⁸ Itadingkon do parlingodanni, songon pambahen ni sada singa poso-poso, ai domma tarulang tanoh ni sidea halani podang ni Jahowa ampa halani gajag ni ringis-Ni.”

Ambilan ni si Jeremia i Rumah Panumbahan

26 ¹ Bani parmulaan ni harajaon ni si Joyakim, anak ni si Josia, raja ni Juda, roh ma hata on humbani Jahowa:

² Sonon do hata ni Jahowa, “Jongjong ma ho bani alaman ni Rumah ni Jahowa, anjaha hatahon ma bani haganup halak na roh hun huta-huta ni Juda, laho martonggo hu rumah ni Jahowa, haganup on na Hutonahkon bam, sihatahononmu bani sidea; ulang buati age sangkababah hata!

³ Sai andohar ma ra sidea manangihon anjaha mubah uhurni humbani parlahouni na sambor ai, ase marulak-ulakan uhur-Hu pasal hasedaon, na dob Husurahon hinan sibahenon-Ku bani sidea.

⁴ Hatahon ma bani sidea, sonon do hata ni Jahowa, ‘Anggo lang itangihon hanima Ahu, ai ma marpangabak hanima ibagas titah-Ku, na dob Hubere i lobeinima,

⁵ anjaha itangihon hanima hata ni juakjuak-Ku, nabi-nabi ai, na Husuruh bannima marulak-ulak, hape seng ra hanima manangihon,

⁶ halani ai bahenon-Ku ma rumah on songon na bani Silo, anjaha bahenon-Ku do huta on gabe siburaan bani haganup bangsa-bangsa na i tanoh on.”

⁷ Ibogei malim-malim ampa nabi-nabi ampa haganup bangsa ai do si Jeremia mansahapkon hata ai i rumah ni Jahowa.

⁸ Jadi dob salpu ihatahon si Jeremia haganup hata na tinonahkon ni Jahowa sihatahononni bani haganup bangsa ai, roh ma malim-malim, nabi-nabi ampa haganup bangsa ai manangkapsi, nini sidea ma, “Maningon matei do ho!”

⁹ Mase ma manjahai ho marhitei goran ni Jahowa, nim, ‘Maningon songon Silo do rumah on, anjaha maningon tarulang do huta on, seng marpangisi?’ Anjaha marurup do ganup bangsa ai dompak si Jeremia, ibagas rumah ni Jahowa.

¹⁰ Dob ibogei na sangap-sangap ni Juda barita ai, tangkog ma sidea hun rumah ni raja ai hu rumah ni Jahowa, anjaha hundul bei ma sidea i labah ni horbangan na baru, na bani rumah ni Jahowa.

¹¹ Dob ai nini malim-malim ampa nabi-nabi ai ma hubani na sangap-sangap ai ampa hubani ganup bangsa ai, “Patut do marutang hosah dalahi on, ai manjahai do ia dompak huta on, songon na binogei nasiam marhitei pinggol nasiam.”

¹² Tapi nini si Jeremia ma dompak na sangap-sangap ai ampa hubani haganup bangsa ai,

“Jahowa do na marsuruh ahu manjahai dompak rumah panumbahan on pakon dompak huta on marhitei haganup hata na dob ibogei nasiam.

¹³ On pe, padear nasiam ma parlahou ampa pambahenan nasiam, anjaha tangihon nasiam ma sora ni Jahowa, Naibata nasiam, ase marulakulakan uhur ni Jahowa pasal hamagouan, na dob nilumbahon-Ni ai hubani nasiam.

¹⁴ Tapi anggo ahu, tonggor ma, ibagas tangan nasiam do. Bahen nasiam ma bangku, sonaha na dear ampa na sintong ninuhur nasiam.

¹⁵ Tapi botoh nasiam ma torang-torang, anggo ibunuh nasiam ahu, na mambahen marsapata do nasiam bani daroh na so marpipot pakon bani huta on ampa pangisini, ai sintong do, Jahowa do na marsuruh ahu bani nasiam, laho mangkatahon haganup hata on bani pinggol nasiam.”

¹⁶ Dob ai nini na sangap-sangap ampa haganup bangsa ai ma dompak malim-malim ampa nabi-nabi ai, “Seng patut marutang hosah halak on, ai marhitei goran ni Jahowa Naibatanta do ia manluar banta.”

¹⁷ Deba humbani pangintuai ni tanoh ai jongjong ma, anjaha nini sidea ma hubani haganup halak na martumpu ai,

¹⁸ Bani panorang ni si Hiskia, raja ni Juda, adong do sada nabi, ai ma si Mika na hun Moreset, nini do dompak ganup bangsa Juda: Sonon do hata

ni Jahowa Zebaot, “Maningon tinggalaon do Sion songon juma, Jerusalem gabe timbunan batu; anjaha dolog hajongjongan ni rumah panumbahan ai gabe buntu-buntu na marharangan.

¹⁹ Naha, ai ibunuh Raja Hiskia ampa haganup Juda do ia halani ai? Ai lang mabiar do ia mangidah Jahowa, anjaha ielek-elek la, gabe marulak-ulakan uhur ni Jahowa pasal hamagouan on, na dob nilumbahonni bani sidea? Naha hita, parohonta do hamagouan banggal banta?”

²⁰ Adong do homa halak na legan ijia, na manjahai marhitei goran ni Jahowa, ai ma si Uria, anak ni si Semaya, hun Kiriati-Jearim. Manjahai do ia dompak huta on ampa dompak tanoh on, usih songon hata ni si Jeremia.

²¹ Jadi dob ibogei Raja Joyakim ampa haganup puanglimani ampa haganup na sangap-sangap haganup hatani ai, ipindahi raja ai ma dalan laho mamunuhsi. Dob ibogei si Uria ai, mabiar ma ia, gabe maporus ma ia laho hu Masir.

²² Dob ai isuruh Raja Joyakim ma piga-piga halak laho hu Masir, ai ma si Elnatan, anak ni si Akbor ampa halak na legan mangkasomanisi;

²³ jadi ialop sidea ma si Uria hun Masir, anjaha iboan ma ia hu lobei ni Raja Joyakim; dob ai ibunuh ma ia marhitei podang, anjaha igijigkon ma bangkeini bani tanoman ni halak simbuei.

²⁴ Tapi tangan ni si Ahikam, anak ni si Sapan do mangkasomani si Jeremia, gabe seng iondoskon ia hubani simbuei ai laho mamunuhsi.

lojur si Jeremia Bangsa ai Mangunduk bani Pasangan ni Babel

27 ¹ Bani parmulaan ni harajaon ni si Sedekia, anak ni si Josia, raja ni Juda, roh ma hata on humbani Jahowa hubani si Jeremia.

² Sonon do hata ni Jahowa hu bangku, “Bahen ma bam tali ampa pasangan, tampeihon ma ai bani tangkuhukmu,

³ anjaha suruh ma partonahanmu hubani raja ni Edom, raja ni Moab, raja ni halak Amon, raja ni Tirus ampa raja ni Sidon, marhitei suruhan ni sidea, na dob roh hu Jerusalem mangayaki si Sedekia, raja ni Juda.

⁴ Padas ma bani sidea tonah on, sihatahonon ni sidea bani tuan ni sidea, sonon do hata ni Jahowa Zebaot, Naibata ni Israel: On ma sihatahonon nima bani tuannima.

⁵ Ahu do, marhitei gogoh-Ku na bangga in ampa marhitei tangan-Ku na gostong in manjadihon tanoh on,jolma ampa pinahan na i tanoh on, anjaha Hubere do ai bani atap ise harosuh ni uhur-Hu.

⁶ Anjaha nuan domma Huondoskon ganup nagori on hu tangan ni si Nebukadnesar, raja ni Babel,

juakjuak-Ku, anjaha binatang na i talun pe, domma Huondoskon bani laho mambalosisi.

⁷ Anjaha sagala bangsa-bangsa maningon balosan ni sidea do ia, anakni ampa pahompuni, paima roh age ari ni tanohni sandiri; gabe parjabolonan ni buei bangsa ampa raja-raja bangga do homa ia.

⁸ Tapi anggo adong bangsa pakon harajaon, na so ra tunduk hubani si Nebukadnesar, raja ni Babel, anjaha na so ra paundukkon tangkuhukni bani pasangan ni Raja Babel, marlulu do Ahu bani bangsa ai marhitei podang, lohei ampa sampar, nini Jahowa, paima bois sidea Hubahen marhitei tanganni.

⁹ Halani ai ulang ma patangi-tangi hanima hata ni nabinima, partondungnima, sipanorhai nipi, sijaha parhalaan ampa parsibalik mata, na mangkatahon bannima, 'Ulang ra nasiam tunduk bani raja ni Babel.'

¹⁰ Ai ladung do panjahaion ni sidea bannima, laho mambahen hanima tarusir humbani tanohnima, halani ambukkonon-Ku do hanima, ase magou hanima.

¹¹ Tapi bangsa, na ra paunduk tangkuhukni hu toruh ni pasangan ni raja ni Babel, anjaha ibalosi ia, paturuton do sidea i tanoh ni sidea, laho mangkorjai ai ampa marianan ijai," nini Jahowa.

¹² "Age hubani si Sedekia, raja ni Juda, marsahap do ahu romban hubani ganup hata ai, ningku

do, Paunduk hanima tangkuhuknima hu toruh ni pasangan ni Raja Babel, anjaha balosi hanima ma ia ampa bangsani, ase manggoluh hanima.

¹³ Mase ma rahanan matei ho ampa bangsamu marhitei podang, lohei ampa sampar, songon na nilumbahon ni Jahowa pasal bangsa na so ra tunduk bani raja ni Babel?

¹⁴ Ulang ma patangi-tangi hanima hata ni nabi-nabi na mangkatahon bannima, 'Seng anjai patundukon ni Raja Babel nasiam!' Ai ladung do panjahaion ni sidea bannima.

¹⁵ Sedo Ahu na marsuruh sidea, nini Jahowa; ladung do ipatugah sidea marhitei goran-Ku, ase marhitei ai Huusir hanima gabe magou hanima, hanima ampa nabi-nabi na manjahai bannima.

¹⁶ Bani malim-malim ampa ganup bangsa ai pe marsahap do ahu, ningku: Sonon do hata ni Jahowa, 'Ulang ma patangi-tangi hanima hata ni nabi-nabi, na manjahai bannima sonon: Tonggor ma, podas ma boanon mulak hun Babel parugas ni rumah ni Jahowa! Ladung do na ipatugah sidea bannima.'

¹⁷ Ulang ma patangi-tangi hanima sidea! Balosi hanima ma raja ni Babel, ase manggoluh hanima. Mase ma rahanan maseda huta on?

¹⁸ Anggo nabi do sidea tongon, anjaha hata ni Jahowa dong bani sidea, roh ma sidea martonggo hu lobei ni Jahowa Zebaot, ase ulang tarboban

hu Babel parugas na tading i rumah ni Jahowa, i rumah ni Raja Juda ampa na i Jerusalem.

¹⁹ Ai sonon do hata ni Jahowa Zebaot pasal tiang, bongbongan, parburihan ampa parugas na tading ai ope i huta on,

²⁰ ai ma na so binoban ni si Nebukadnesar, raja ni Babel ope, sanggah na iboban hu habuangan si Jekonya, anak ni si Joyakim, raja ni Juda, hun Jerusalem hu Babel ampa haganup halak na sangap-sangap hun Juda ampa hun Jerusalem.

²¹ Tongon, sonon do hata ni Jahowa Zebaot, Naibata ni Israel, pasal parugas na tading ope bani rumah ni Jahowa ampa i rumah ni raja ni Juda ampa i Jerusalem:

²² Maningon tarboban do ai hu Babel, anjaha tading ijai das bani ari mangkawah Ahu use bani sidea,” nini Jahowa. “Dob ai boanon-Ku do sidea mulak, anjaha paulakon-Ku do sidea bani ianan on.”

Si Jeremia Mangimbang si Hananya, Nabi Parladung ai

28¹ Jadi masa ma bani tahun ai, bani parmulaan ni harajaon ni si Sedekia, raja ni Juda, paompat-tahunkon, bani bulan lima, roh ma si Hananya, anak ni si Azur, nabi na hun Gibeon, marsahap hu bangku i rumah ni Jahowa, i lobei ni malim-malim pakon ganup bangsa ai, nini ma,

² “Sonon do hata ni Jahowa Zebaot, Naibata ni Israel, ‘Domma Huponggolhon pasangan na humbani Raja Babel.

³ Ibagas na dua tahun on boanon-Ku do mulak hubani ianan on haganup parugas ni rumah ni Jahowa, ai ma na binuat ni si Nebukadnesar, Raja Babel, humbani ianan on anjaha iboan hu Babel.

⁴ Si Jekonya pe, anak ni si Joyakim, raja ni Juda, ampa haganup na tarbuang hun Juda, na tarboan hu Babel, boanon-Ku do mulak hubani ianan on,” nini Jahowa; “Ai ponggolhonon-Ku do pasangan na humbani Raja Babel.”

⁵ Jadi nini Nabi Jeremia ma dampak Nabi Hananya i lobei ni malim-malim ampa haganup bangsa ai, na jongjong i rumah ni Jahowa;

⁶ nini Nabi Jeremia ma, “Amen! Ibahen Jahowa ma tongon sonai, sai ipasaud Jahowa ma tongon hata na dob ijahahon ho, sai iboban ma mulak hun Babel hubani ianan on sagala parugas ni rumah ni Jahowa ampa haganup na tarbuang ai.

⁷ Tapi tangihon ma hata on, na huhatahon bam ampa hu bani haganup bangsa on,

⁸ ‘Nabi-nabi na parlobei humbangku ampa humbam, humbani sapari nari ilumbahon do porang, lohei ampa sampar dampak buei nagori ampa dampak harajaon na bangga-banggal.’

⁹ Pasal nabi, na manjahai pasal hadameion, ‘Anggo tongon ma saud hata ni nabi ai, jadi botohon ma, Jahowa ma tongon na marsuruhsi.’”

¹⁰ Dob ai ibuat Nabi Hananya ma pasangan ai humbani tangkuhuk ni Nabi Jeremia, anjaha iponggolhon ma ai.

¹¹ Ihatahon si Hananya ma i lobei ni ganup bangsa ai, “Sonon do hata ni Jahowa, ‘Sonai ma ponggolhonon-Ku pasangan na humbani si Nebukadnesar, raja ni Babel, humbani tangkuhuk ni sagala bangsa ibagas dua tahun on.’” Tapi inunut Nabi Jeremia ma dalanni.

¹² Dob iponggolhon Nabi Hananya pasangan ai humbani tangkuhuk ni Nabi Jeremia, roh ma use hata ni Jahowa bani Nabi Jeremia,

¹³ “Laho ma ho, hatahon ma bani si Hananya, sonon do hata ni Jahowa, ‘Domma iponggolhon ho pasangan hayu ai, tapi paulion-Ku do pasangan bosu bahen gantih ni ai.’

¹⁴ Ai sonon do hata ni Jahowa Zebaot, Naibata ni Israel: Pasangan bosu do tampeihonon-Ku bani tangkuhuk ni ganup bangsa-bangsa on, ase tunduk sidea bani si Nebukadnesar, raja ni Babel, anjaha maningon balosan ni sidea do ia; age binatang na i talun domma Huondoskon hu bani.”

¹⁵ Jadi nini Nabi Jeremia ma dampak Nabi Hananya, “Tangihon ma, ale Hananya! Sedo

Jahowa marsuruh ho, ibahen ho do bangsa on martenger ni uhur bani ladung.

¹⁶ Halani ai sonon do hata ni Jahowa, ‘Tonggor ma, usiron-Ku do ho hun sisik ni tanoh on.’ Ibagas tahun on pe matei ma ho, halani iambilankon ho panlawanon dampak Jahowa.”

¹⁷ Jadi matei ma tongon Nabi Hananya ibagas na satahun ai, bani bulan pitu.

Surat ni si Jeremia hu bani Halak na Tarbuang i Babel

29 ¹ On do hata ni surat ni si Jeremia, nabi ai, na tinongosni hun Jerusalem bani pangintuai-pangintuai ni na tarbuang ai, ampa bani malim-malim, nabi-nabi ampa haganup bangsa ai, na binoan ni si Nebukadnesar hu habuangan, hun Jerusalem hu Babel.

² Ai ma dob tarbuang hun Jerusalem Raja Jekonya, inang ni raja ai, juakjuakni, na sangap-sangap ni Juda ampa Jerusalem, tuhang hayu ampa tuhang bosi.

³ Itongos do surat ai marhitei si Eleasa, anak ni si Sapan ampa marhitei si Gemarya, anak ni si Hilkia, na sinuruh ni si Sedekia, raja ni Juda, hu Babel, hubani si Nebukadnesar, raja ni Babel, hatani,

⁴ “Sonon do hata ni Jahowa Zebaot, Naibata ni Israel, hu bani haganup na tarbuang, na tarboan hun Jerusalem hu Babel,

⁵ ‘Pajongjong hanima ma rumah, lanjar iankon ma; pungkah hanima ma juma, anjaha pangan ma gogohni!’

⁶ Mambuat boru ma, ase maranak marboru hanima; paompo hanima anaknima, anjaha borunima palaho hanima, ase tubuhan anak tubuhan boru sidea; manggompari ma hanima ijin ulang ma manginsurut.

⁷ Porluhon hanima ma hadoharon ni huta pambuangan-Ku bannima, anjaha apiti hanima ma sidea i lobei ni Jahowa, ai ibagas hadoharon ni sidea ai dihut do hanima mardohar.’

⁸ Ai sonon do hata ni Jahowa Zebaot, Naibata ni Israel, ‘Ulang ma ra hanima paoto-otoon ni nabinima atap partondung na adong i tongah-tongahnima, anjaha ulang ma patangi-tangi hanima nipi na niipi ni sidea;

⁹ ai sipaoto-oto do panjahaion ni sidea bannima marhitei goran-Ku; sedo Ahu marsuruh sidea,’” nini Jahowa.

¹⁰ Ai sonon do hata ni Jahowa, “Anggo domma gok sipitupuluh tahun ai, na dob Huhatahon bani Babel, parayakon-Ku do hanima, anjaha pasaudon-Ku do bagah-bagah-Ku na bannima ai, anjaha boanon-Ku do hanima mulak bani ianan on.

¹¹ Ai Hubotoh do torang sura-surang-Ku pasal hanima,” nini Jahowa, “Ai ma sura-sura hadearon,

sedo hamagouan, laho parsirsirhon bannima
parsaud ni na niarapkonnima.

¹² Jadi padilo-dilonnima ma Ahu; roh ma hanima
hu Bangku martonggo, gabe tangihonon-Ku do
hanima.

¹³ Pindahannima do Ahu, anjaha jumpah hanima
do Ahu; anggo ipindahi hanima Ahu humbani gok
ni uhurnima,

¹⁴ jadi jumpah hanima do Ahu,” nini Jahowa.

“Pasuangon-Ku do hanima, anjaha patumpuon-Ku
do hanima humbani haganup bangsa-bangsa ampa
humbani ganup ianan pambuangan-Ku bannima,”
nini Jahowa, “Anjaha boanon-Ku do hanima mulak
hubani ianan habingkatannima hu habuangan.

¹⁵ Ihatahon nasiam, ‘Domma ipabangkit Jahowa
bennami nabi i Babel.’

¹⁶ Sonon do hata ni Jahowa pasal raja, na marhotak
bani hotak ni si Daud, ampa pasal haganup halak
na marianan i huta on, ai ma sanina nasiam, na so
dihut tarboan rap pakon nasiam hu habuangan.

¹⁷ Sonon do hata ni Jahowa Zebaot, Tonggor ma,
Hutongos do dompak sidea podang, lohei pakon
sampar, anjaha bahenon-Ku do sidea songon buah
ara na masak, na so tarpangan be halani masakni.

¹⁸ Pardakdakon-Ku do sidea marhitei podang,
lohei ampa sampar, anjaha bahenon-Ku do sidea
gabe songgot-songgot bani haganup harajaon na
i tanoh on, gabe siburaan, hagobiron, sipahirion

ampa sirisaon i tongah-tongah ni bangsa-bangsa pambuangan-Ku bani sidea,

¹⁹ halani na so itangihon sidea hatang-Ku,” nini Jahowa, “Na Hutonahkon bannima marulak-ulak marhitei nabi-nabi ai, tapi seng ra hanima manangihon,” nini Jahowa.

²⁰ “Halani ai, tangihon hanima ma hata ni Jahowa, hanima haganup na tarbuang in, na dob Hubuangkon hun Jerusalem hu Babel!

²¹ Sonon do hata ni Jahowa Zebaot, Naibata ni Israel, pasal si Ahab, anak ni si Kolaya, ampa pasal si Sedekia, anak ni si Maaseya, na manjahahon ladung bannima marhitei goran-Ku, ‘Tonggor ma, ondoskonon-Ku do sidea hubagas tangan ni si Nebukadnesar, raja ni Babel, anjaha bunuhonni do sidea i lobeinima.’

²² Anjaha goran ni sidea ai pakeion ni halak na tarbuang hun Juda, na i Babel ai ma, laho mamurai, nini sidea ma, ‘Sai ibahen Jahowa ma, usih songon na bani si Sedekia ampa na bani si Ahab, na tinutung ni Raja Babel ibagas Apuy!’

²³ halani ibahen sidea hasamboron i tongah-tongah ni Israel, anjaha marbangkisi sidea pakon jolma ni hasomanni, anjaha iluarhon sidea hata ladung marhitei goran-Ku, na so Hutonahkon bani sidea. Ahu do hansa sipabotoh-botoh ampa sisaksihon ai,” nini Jahowa.

²⁴ Anjaha bani si Semaya na hun Nehelam, hatahon ma,

²⁵ ‘Sonon do hata ni Jahowa Zebaot, Naibata ni Israel, ‘Itongos ho do surat marhitei goranmu bani ganup halak na i Jerusalem, ampa hubani Malim Sepanya, anak ni Malim Maaseya, ampa hu bani ganup malim, isini:

²⁶ Domma ipabangkit Jahowa ho gabe malim gantih ni Malim Joyada, laho manramotkon rumah ni Jahowa, ampa mardiateihon halak na podoan na sai manjahai, laho mannahkon sidea hubagas bayangan ampa gari borgok.

²⁷ Ai pe, mase ma lang mangonai hata ho hubani si Jeremia par Anatot ai, na manjahai bannima?’

²⁸ Ai manongos surat do ia hu Babel, mangkatahon, ‘Dokah ope nasiam tarbuang, Paturei nasiam ma rumah, anjaha iankon nasiam ma ai; tombei nasiam ma pohon anjaha pangan nasiam ma gogohni.’

²⁹ Jadi ibasa Malim Sepanya ma surat ai i lobei ni Nabi Jeremia.

³⁰ Dob ai roh ma hata ni Jahowa bani si Jeremia sonon,

³¹ “Suruh ma suruhan marayak sagala na tarbuang in laho patugahkon: Sonon do hata ni Jahowa pasal si Semaya na hun Nehelam, Manjahai do si Semaya bannima, hape sedo Ahu marsuruhsi, anjaha ibahen hanima martenger ni uhur bani ladung,

³² halani ai, sonon do hata ni Jahowa, Tonggor ma, marlulu do Ahu bani si Semaya, na hun Nehelam ampa bani ginomparni: Seng anjai dong humbani ginomparni, na marianan i tongah-tongah ni bangsa on, na mangidah na madear, na sihol bahenon-Ku bani bangsang-Ku,” nini Jahowa, “Halani na niambilankon ai panlawanon dompak Jahowa.”

Bagah-bagah Pasal Parmulak hun Habuangan

30 ¹ On do hata na roh hubani si Jeremia, humbani Jahowa,

² “Sonon do hata ni Jahowa, Naibata ni Israel, ‘Suratkon ma haganup hata na dob Huhatahon bam bani sada buku!

³ Ai tonggor ma, na roh ma panorangni,” nini Jahowa, “Pasuangon-Ku ma ijai bangsang-Ku, ai ma Israel pakon Juda, nini Jahowa, anjaha boanon-Ku do sidea mulak hu tanoh na dob Huberehon bani ompung ni sidea, anjaha teanon ni sidea ma ai.

⁴ On do hata, na hinatahon ni Jahowa pasal Israel ampa Juda.

⁵ Sonon do hata ni Jahowa, Ibogei hanami do sora doruh-doruh; biar do na masa, seng dong hasonangan.

⁶ Sungkun anjaha tonggor ma! Ai boi do paramangon tubuhan anak? Mase ma Huidah sagala paramangon manungkolhon

tanganni bani binongeini songon naboru na mangarou? Mase ma marposi ganup bohi?

⁷ Aih! Jangin ni ari on, seng onggga dong na sonai; panorang hasosakan do ai bani Jakob, tapi maluah do ia hunjai.

⁸ Jadi masa ma bani panorang ai,” nini Jahowa Zebaot, “Ponggolhonon-Ku ma pasangan humbani tangkuhuk ni sidea, anjaha rotapon-Ku tali panangkut ni sidea, anjaha seng be parjabolonon ni halak na legan sidea.

⁹ Tapi balosan ni sidea ma Jahowa, Naibata ni sidea, ampa si Daud, raja ni sidea, sipabangkiton-Ku bani sidea.

¹⁰ Tapi anggo ho, ulang ma mabiar, ale Jakob juakjuak-Ku,” nini Jahowa, “Anjaha ulang ma tarsonggot, ale Israel; ai tonggor ma, paluahon-Ku do ho humbani tanoh na madaoh ampa ginomparmu hun tanoh habuangan ni sidea. Maningon mulak do Jakob, marsonang-sonang ma ia anjaha mardamei-damei, ise pe lang be na manonggotisi.

¹¹ Ai Ahu do mangkasomani ho laho paluahkon ho,” nini Jahowa, “Boiskonon-Ku do tongon sagala bangsa-bangsa pambuangan-Ku bannima, tapi anggo ho seng bois bahenon-Ku. Tongon Huajar do ho domu

hubani na patut, seng paturuton-Ku ho lang hona pinsang.

¹² Sonon do hata ni Jahowa, 'Seng tartambari naboritmu, parah do ugahmu.

¹³ Seng dong tambar bani bayohmu, anjaha seng ra suang ugahmu.

¹⁴ Haganup na mangkaholongi ho lupa do bam, seng parduli sidea bam; songon pambogbog ni munsuh sonai do pambogbog-Ku bam, songon panguhum ni munsuh na so maridop ni uhur; ai ma halani bangga ni salahmu, halani buei ni dousamu.

¹⁵ Mase ma doruh-doruh ho halani ugahmu ampa halani naboritmu na so tartambari in? Halani bangga ni salahmu do, halani buei ni dousamu do, ae Hubahen na sonai bam.

¹⁶ Tapi sagala na mamondut ho, maningon hona bondut do; anjaha sagala na manosak-nosak ho, maningon tarboan do hu habuangan; sagala halak na manrampok ho, maningon hona rampok do; anjaha sagala halak na manrampas ho, maningon hona rampas do.

¹⁷ Tongon, pasuangon-Ku do ho jorgit, anjaha pamalumon-Ku do ugahmu," nini Jahowa, "Halani na dob igoran sidea ho, 'Na niambukkon' ampa: 'Sion, na so adong mampardulihon.'

- ¹⁸ Sonon do hata ni Jahowa, ‘Tonggor ma, pasuargon-Ku do lampolampo ni si Jakob, anjaha marulak-ulakan uhur-Hu mangidah iananni; paulion do use huta ai i atas buntu-buntuni, anjaha rumah bolon ai bani iananni hinan.
- ¹⁹ Kaluar do hunjai sora puji-pujian ampa sora ni na marmalas ni uhur. Pabueion-Ku do sidea, seng manginsurut be sidea; bahenon-Ku do sidea marmulia, seng be mahiri sidea.
- ²⁰ Gabe songon sapari ma anak ni sidea, anjaha kuria ni sidea totap do i lobei-Hu; uhumon-Ku do sagala na mangodoh-odoh sidea.
- ²¹ Humbani sidea do raja bani sidea, anjaha hun tongah-tongah ni sidea do roh na manggomgomi sidea; lopason-Ku do ia roh dohor hu Bangku, ai ise ma na pag marmara goluhni laho mandohori Ahu,” nini Jahowa.
- ²² “Hanima do bangsa Bangku, anjaha Ahu gabe Naibatanima.
- ²³ Tonggor ma haba-haba humbani Jahowa. Luar do gila-Ni, ai ma haba-haba sibungkar hasowor; dorabon-Ni do ulu ni parjahat.
- ²⁴ Seng surut ringis ni Jahowa, paima idalankon anjaha ipasaud sura-sura ni uhur-Ni. Arusannima do ai bani dokah-dokah ni ari.”

Bagah-bagah Pasal Padan na Baru

31¹ “Bani panorang ai,” nini Jahowa, “Ahu ma gabe Naibata ni haganup marga ni Israel, anjaha sidea gabe bangsang-Ku.”

² Sonon do hata ni Jahowa, “Dapotan idop ni uhur do songon na i halimisan ijia bangsa ai, na maluah humbani podang; laho do Israel marayak parsarananni.”

³ Taridah do Jahowa bani humbani na daoh. Nini, “Holong do uhur-Hu bam marhitei holong sisadokah ni dokahni; halani ai Hutogu-togu do ho marhitei idop ni uhur.

⁴ Paulion-Ku do ho use, gabe torsa ma ho, ale boru Israel! Pajagaronmu do use dirimu marhitei arbap, anjaha luar manortor rap pakon na marmalas ni uhur.

⁵ Tombeionmu do use pohon anggur bani dolog-dolog ni Samaria; lanjar sipanuan ai do na mangankon buahni.

⁶ Tongon, na roh ma panorangni, dilo-dilo ma ijai halak parjaga i Dolog Efraim: Eta, laho ma hita tangkog hu Sion manjumpahkon Jahowa Naibatanta.”

⁷ Ai sonon do hata ni Jahowa, “Gogoh ma hanima mandoding ibagas malas ni uhur bani si Jakob, anjaha marsurak ma mangolobkon pambobai ni bangsa-bangsa! Baritahon, puji

anjaha hatahon hanima ma, 'Jahowa do na paluahkon bangsa-Ni, simasima ni Israel!

⁸ Tonggor ma, boanon-Ku do sidea hun tanoh par utara, anjaha patumpuon-Ku do sidea humbani ujung ni tanoh on; rap pakon sidea dihut do na mapitung ampa na repat, naboru na boratan rumah ampa naboru na painumkon; hulanan na banggal do sidea na mulak ai hujon.

⁹ Tangis-tangis do sidea roh, tapi marhasoman pangapohon Hutogu-togu do sidea; Huring-iring do sidea hun lambung ni bah, bani dalan hanopan, ase ulang tartolsu sidea; ai Ahu do gabe bapa bani Israel, anjaha Efraim gabe anak-Ku sikahanan.

¹⁰ Tangihon ma hata ni Jahowa, ale bangsa-bangsa, anjaha baritahon ma ai bani pulou-pulou na madaoh; hatahon ma, 'Ia, na dob mangerap Israel, Ia do na patumpuhonsi, anjaha ramotkonon-Ni do ia songon parmahan na manramotkon hulanan-Ni.'

¹¹ Tongon, Jahowa, do na manobus Jakob, anjaha na paluahkonsi humbagas tangan ni halak sigogohan hun bani.

¹² Roh do sidea anjaha marolob-olob bani pakpak ni Dolog Sion, anjaha marmegah-megah sidea pasal dear layak ni Jahowa, pasal

gandum, anggur ampa minak, pasal biribiri ampa lembu; songon pohon na marbah do goluh ni sidea, seng be marhahurangan sidea.

- ¹³ Marmalas ni uhur do anak boru manontor-nontor, marmegah-megah garama ampa na matua. Paubahon-Ku do pusok uhur ni sidea gabe malas ni uhur, apohon-Ku do sidea, anjaha pamalason-Ku do uhur ni sidea ganti ni horu ni uhur ni sidea.
- ¹⁴ Marlobih-lobihan do bahenon-Ku uhur ni malim-malim bani malas ni uhur, anjaha bosur bangsang-Ku bani pasu-pasung-Ku," nini Jahowa.
- ¹⁵ Sonon do hata ni Jahowa, "Tarbogei do i Rama sora ni doruh-doruh ampa tangis-tangis na parah; Itangisi si Rahel do niombahni, manjua do ia apohon, ai domma bois sidea."
- ¹⁶ Sonon do hata ni Jahowa, "Sip ma ho na tangis in, anjaha apusi ma iluhmin; ai adong do upah bani halojaonmu," nini Jahowa, "Ai mulak do sidea hun tanoh ni munsuh.
- ¹⁷ Adong do siarapkonon bani na i pudimu," nini Jahowa, "Mulak do anakmu bani parbagianan ni sidea.
- ¹⁸ Hubogei do Efraim tangis-tangis: Iajar Ham do ahu, songon anak lembu na so onggahona ajar do ahu iajar Ham. Paubah Ham

ma uhurhu, ase saud mubah, ai Ham do Jahowa, Naibatanku.

- ¹⁹ Ai dob marbalik ahu, manosal do ahu; dob hutanda diringku, hutompuki do tontonku. Maila do ahu anjaha bador, halani huboan-boan hasamboron ni haposoonku.
- ²⁰ Ai anak kasihan do nani si Efraim Bangku? Anak haudungan ni uhur-Hu do ia nani? Ai age pe Huhata ia, sai Hudingat do ia, Siholan do uhur-Hu bani, tongon, marulak-ulakan do uhur-Hu mangidahsi,” nini Jahowa.
- ²¹ “Pajongjong ma bam tanda sipatuduh dalan, bahen ma bam batu partanda. Kawah ma ho bani dalan na bolon, dalan, na dob binontasmai. Mulak ma, ale boru Israel, mulak ma ho hu Tamon.
- ²² Sadia dokah nari ho maor-aor, ale boru siparbalik? Tongon, domma ijadison Jahowa sada naboru i tanoh on; ai ma naboru mangondingi dalahi.
- ²³ Sonon do hata ni Jahowa Zebaot, Naibata ni Israel, ‘Sai hatahonon ni halak ope hata on i tanoh Juda ampa ibagas huta-hutani, dob Hupasuang sidea use,’ nini, ‘Jahowa ma na mamasu-masu ho, ale ianan hapintoron, ale dolog na ma pansing!’

²⁴ Rap ma marianan ijai Juda ampa haganup huta-hutani, parjuma-juma ampa halak na marpindah-pindah mangirikkon pinahanni.

²⁵ Ai Ahu do mambahen sombuh tonduy na mandatei, anjaha Hupabosur do ganup tonduy na loheian.

²⁶ Dob ai tarpuho ma ahua anjaha mangkawah, mantin do na modom ai bangku.

²⁷ Tonggor ma, na roh ma panorangni," nini Jahowa, "Tidakkonon-Ku ma bani ginompar ni Israel pakon bani ginompar ni Juda, jolma pakon pinahan.

²⁸ Jadi masa ma, songon Ahu na dob marjaga-jaga ai bani sidea, laho mangorbat anjaha marreongkon, laho manunggalingkon, parsedahon ampa mangagouhon, sonai do marjaga-jaga Ahu bani sidea, laho paulihon ampa manuan, nini Jahowa.

²⁹ Bani panorang ai lang be hatahonon ni halak, 'Bapa mangankon buah anggur na migar, hape ipon ni anakni ngiluan.'

³⁰ Tapi ganup ma matei halani dousani sandiri; ganup jolma na mangankon buah anggur na migar, iponni sandiri ma na ngiluan.

³¹ Tonggor ma, na roh ma panorangni," nini Jahowa, "Bahenon-Ku ma padan na baru bani ginompar ni Israel pakon bani ginompar ni Juda;

³² sedo songon padan na Hubahen bani ompung ni sidea, sanggah na Hutogu-togu sidea, laho mamboan sidea luar hun tanoh Masir, ai ma padan na niosei ni sidea ai, age pe Ahu tuan ni sidea, nini Jahowa.

³³ Tapi on do padan sibahenon-Ku bani ginompar ni Israel dob salpu panorang on,” nini Jahowa, “Nahkonon-Ku do titah-Ku hubagas atei-atei ni sidea, anjaha suratkonon-Ku do ai bani uhur ni sidea; gabe Naibata ni sidea do Ahu, anjaha sidea gabe bangsang-Ku.

³⁴ Lang be ajaran ni sada halak hasomanni atop sanina mangkatahon bani saninani, ‘Tanda ma Jahowa!’ Ai haganup do sidea mananda Ahu, na etek age na bangga,” nini Jahowa. “Ai sasapon-Ku do hajahaton ni sidea, anjaha lang be ingat-ingaton-Ku dousa ni sidea.”

³⁵ Sonon do hata ni Jahowa, “Na mambere mata ni ari gabe panondang arian, anjaha na manotapkon bulan ampa bintang gabe panondang borngin, na manggunsang laut gabe marhasak gilumbangni, Jahowa Zebaot do goran-Ni,

³⁶ “Songon paraturan ai seng maronti hun lobei-Hu,” nini Jahowa, “Sonai do ginompar ni Israel seng anjai maronti songon sada bangsa i lobei-Hu sadokah ni dokahni.”

³⁷ Sonon do hata ni Jahowa, “Songon langit na i babou ai seng tarsibar, anjaha onjolan ni tanoh na i toruh ai seng tarpareksa, sonai do seng tarambukkon Ahu ginompar ni Israel, age pe sonai haganup na binahen ni sidea ai, nini Jahowa.

³⁸ Tonggor ma, roh ma panorangni,” nini Jahowa, “Paulion ma huta ai bani Jahowa humbani manara Hananel das hubani horbangan suhi-suhi ai.

³⁹ Torus do tali panibar ai, pintor hu Buntu-buntu Gareb, dob ai marlegot hu Goat.

⁴⁰ Haganup habungan bangkei ampa habungan abuan ai, ampa haganup ladang ai das hu Bah Kidron, das hubani suhi-suhi ni horbangan huda ai, hampir hapoltakan, papansingon do ai bani Jahowa; seng anjai parsedaon atap reongkononkon huta ai ronsi sadokah ni dokahni.”

Iboli si Jeremia Juma i Anatot na Martudu-tudu bani Parsuang ni Tanoh ai

32 ¹ On do hata na roh bani si Jeremia humbani Jahowa pasapuluh-tahunkon dob marrajai si Sedekia, raja ni Juda, ai ma pasapuluhualuh-tahunkon dob raja si Nebukadnesar.

² Bani panorang ai ihubu tentara ni Raja Babel do Jerusalem, tapi tartutup do anggo Nabi Jeremia bani ianan ni siparjaga, na ibagas istana ni raja ni Juda.

³ Ai ipatutupkon si Sedekia, raja ni Juda do ia, nini, “Mase ma manjahai ho, nim: Sonon do hata ni Jahowa, ‘Tonggor ma, ondoskonon-Ku do huta on hubagas tangan ni Raja Babel, anjaha patundukonni do on;

⁴ anjaha si Sedekia, raja ni Juda, seng anjai maluah humbagas tangan ni halak Kasdim, maningon ondoskononkon do ia hubagas tangan ni Raja Babel, marsahap do ia padumpar bohi pakonsi anjaha marsikawahan do sidea,

⁵ anjaha boanonni do si Sedekia hu Babel, lanjar ijai ma ia tading paima roh Ahu marlulu hu bani, nini Jahowa. Age pe manlawan hanima dompak halak Kasdim, seng anjai monang hanima.’

⁶ Jadi nini si Jeremia ma, ‘Roh do hata ni Jahowa hu bangku:

⁷ Tonggor ma, na roh ma si Hanamel, anak ni si Salum, bapatuamu marayak ho, hatahononni do bam: Boli ma jumangku na i Anatot ai, ai ho do marhak mamboli ai bahen parbagiananmu.’

⁸ Dob ai roh ma si Hanamel, anak ni bapatuangku, romban hu bani hata ni Jahowa, marayak ahu hubani ianan ni siparjaga ai, ihatahon ma hu bangku, ‘Boli ham ma jumangku na i Anatot, na i tanoh Benjamin ai, ai ham do na marhak mamboli laho manean ai; boli ham ma ai bamu.’” Jadi hubotoh ma, hata ni Jahowa do ai hape.

⁹ Jadi huboli ma juma na i Anatot ai humbani si Hanamel, anak ni Bapatuangku, anjaha hutimbang ma pirak bani sepuluh pitu sekel boratni.

¹⁰ Hutandatangani ma surat ai anjaha hubahen marlak, hudilo ma saksi anjaha hutimbang pirak bani timbangan.

¹¹ Dob ai hubuat ma surat pambolian ai, na marlak anjaha na marisi aturan ampa sarat-saratni, sonai homa salinan na buha ai.

¹² Jadi hubere ma surat pambolian ai bani si Baruk, anak ni si Neriya, niombah ni si Maseya, i lobei na si Hanamel, anak ni bapatuangkai, ampa i lobei ni sagala saksi na dihut martanda tangan bani surat pambolian ai, ampa i lobei ni haganup halak Jahudi na hundul bani ianan panjagaan ai.

¹³ Anjaha huhatahon do bani si Baruk i lobei ni sidea, sonon,

¹⁴ “Sonon do hata ni Jahowa Zebaot, Naibata ni Israel, ‘Buat ma surat pambolian on haduasi, na marlak ampa salinanni na buha ai, nahkon ma ai hubagas gusi, ase tahan dokah ai.’

¹⁵ Ai sonon do hata ni Jahowa Zebaot, Naibata ni Israel, ‘Maningon bolion do use i tanoh on rumah, juma ampa pohon anggur.’”

¹⁶ Dob huberehon surat pambolian ai hubani si Baruk, anak ni si Neriya, martonggo ma ahu hubani Jahowa,

¹⁷ “Ham Tuhan Jahowa! Ham do na manjadihon langit ampa tanoh on, marhitei gogoh-Mu na banggal in ampa marhitei tangan-Mu na pinagostong-Mu! Seng dong na so tarbahen Ham.

¹⁸ Maidop do uhur-Mu bani halak na marribu-ribu, tapi ibalaskon Ham do hajahaton ni bapa bani anakni i pudi ni sidea, Ham Naibata na banggal anjaha na markuasa, na margoran Jahowa Zebaot.

¹⁹ Bagas do pingkiran-Mu anjaha gok kuasa pambahenan-Mu. Ikawahkon panonggor-Mu do sagala dalan ni jolma, laho mambalaskon bani jolma domu hubani parlahouni ampa domu hubani buah ni pambahenanni.

²⁰ Ham do na dob mambahen tanda ampa halongangan i tanoh Masir anjaha ronsi sadari on bani Israel ampa bani haganup jolma, laho mambahen tarambilan goran-Mu songon na bani panorang on.

²¹ Ibobahon Ham do bangsa-Mu Israel, mandarat hun tanoh Masir marhasoman tanda ampa halongangan marhitei tangan na gogoh ampa botohon na pinagostong ampa marhitei songgot-songgot.

²² Ibere Ham do bani sidea tanoh on, ai ma dob binulawankon-Mu bani ompung ni sidea, laho mamberehon ai bani sidea, ai ma tanoh habaoran ni dadih ampa manisan.

²³ Imasuki sidea ma ai laho manean ai, tapi seng itangihon sidea sora-Mu, anjaha seng marparlahou sidea ibagas titah-Mu; seng dong ihorjahon sidea humbani haganup na pinarentahkon-Mu bani sidea. Halani ai do ase ipasogop Ham bani sidea haganup hamagouan on.

²⁴ Tonggor ma, domma das hu huta on hubuan laho patundukkonsi, anjaha domma ondos huta on hubagas tangan ni halak Kasdim sipangkubu in, halani podang, lohei pakon sampar. Saud do sagala nilumbahon-Mu ididah ham sandiri do in.

²⁵ Hape, Ham Tuhan Jahowa, ihatahon Ham do bangku, 'Boli ma juma in marhitei duit, anjaha bahen marsaksi! Hape domma ondos huta on hubagas tangan ni halak Kasdim.'

²⁶ Dob ai roh ma hata ni Jahowa bani si Jeremia, sonon,

²⁷ 'Tonggor ma, Ahu do Jahowa, Naibata ni sagala na mardaging; ai adong do na maborattu Bangku?'

²⁸ Halani ai, sonon do hata ni Jahowa, 'Hubere ma huta on hubagas tangan ni halak Kasdim ampa hubagas tangan ni si Nebukadnesar, raja ni Babel, anjaha patundukonni do on.'

²⁹ Halak Kasdim, na mangkubu huta on, roh ma mammasuk i anjaha manutung huta on; tutungon ni sidea ma rumah-rumah, na ongg a tayubni ipakei panutungan dahupa bani Baal, anjaha iuseihon

ijai galangan siinumon bani naibata na legan, laho mamuhoi ringis-Ku.

³⁰ Ai ihorjahon halak Israel pakon halak Juda do sogam ni uhur-Hu humbani haposoorni nari; tongon, sai tong do ipuhoi halak Israel ringis-Ku marhitei pambahenan ni tangan ni sidea, nini Jahowa.

³¹ Tongon, ipuhoi huta on do ringis-Ku ampa gilang-Ku humbani parjongjongni nari ronsi sadari on, gabe maningon ambukkonon-Ku do in hun lobei-Hu,

³² halani haganup hajahaton ni halak Israel pakon Juda, sagala na binahen ni sidea laho mamuhoi ringis-Ku, sidea ampa raja-raja ni sidea, malim-malim pakon nabi-nabi ni sidea, halak Juda ampa pangisi ni Jerusalem.

³³ Gurung ni sidea do idompakkon sidea Bangku, sedo bohi ni sidea; age pe marulak-ulak Ahu mangajari sidea, seng dong ra sidea manangihon laho manjalo pangajarion.

³⁴ Ipajongjong sidea do gana-gana sihagigihononkon ai ibagas rumah na targoran bani goran-Ku, laho pabutakkon ai.

³⁵ Ipajongjong sidea do panggаланan bani Baal bani habungan Ben-Hinnom, laho manutung anak pakon boru ni sidea ibagas apuy bani sisombahon Molok, age pe seng onggga Hutonahkon ai bani sidea, atap taringat ibagas uhur-Hu, bahenon ni

sidea habutakon na sonai, laho mambahen Juda mardousa.

³⁶ Tapi age pe sonai, sonon do hata ni Jahowa, Naibata ni Israel, pasal huta on, na dob hinatahonnima, 'londoskon do ai hubagas tangan ni Raja Babel marhitei podang, lohei pakon sampar:

³⁷ Tonggor ma, patumpuon-Ku do sidea humbani haganup nagori pambuangan-Ku bani sidea, ibagas ringis-Ku ampa gilang-Ku ampa bangga ni marah-Ku; boanon-Ku do sidea mulak bani ianan on, anjaha sonang do bahenon-Ku sidea marianan ijin.'

³⁸ Gabe bangsang-Ku ma sidea, anjaha Ahu gabe Naibata ni sidea.

³⁹ Berehonon-Ku do bani sidea sada paruhuran, sada parlahou, ase marhabiaran sidea lalab Bangku, bahen hatuahon bani sidea ampa bani ginompar ni sidea i pudi ni sidea.

⁴⁰ Bahenon-Ku do bani sidea padan sisadokah ni dokahni, paboa seng surut be Ahu mambahen na madear bani sidea; anjaha nahkonon-Ku do biar mangidah Ahu hubagas uhur ni sidea, ase ulang be marbalik sidea hun Bangku.

⁴¹ Marmalas ni uhur do Ahu mambahen na madear bani sidea, anjaha suanon-Ku do sidea tongon-tongon i tanoh on, humbani gok ni uhur-Hu pakon gok ni tonduy-Hu.

⁴² Ai sonon do hata ni Jahowa, ‘Songon na dob Huparoh haganup hamagouan bangga on bani bangsa on, sonai do parohon-Ku bani sidea haganup na madear, na dob Huparbagah bani sidea.’

⁴³ Bolion ni halak do use juma i nagori on, na hinatahonnima ai, ‘Halimisan do in, na so marisi jolma barang pinahan; domma ondos in bani tangan ni halak Kasdim.’

⁴⁴ Bolion do use juma marhitei duit, anjaha ibahen surat pambolian martanda tangan, marlak ampa marsaksi, i tanoh Benjamin, bani tanoh inggot ni Jerusalem, ibagas huta-huta ni Juda, ibagas huta-huta na i pardologan, ibagas huta-huta na i bornoh-bornoh, ampa ibagas huta-huta na i tanoh Dangsina; ai sihol do pasuangon-Ku sidea, nini Jahowa.”

Parsuang ni Jerusalem ampa Juda

33 ¹ Dob ai roh ma hata ni Jahowa paduahalihon hubani si Jeremia, sanggah tartutup ope ia bani ianan ni siparjaga:

² Sonon do hata ni Jahowa na mangadongkon tanoh on, na manjadihon ampa na pajonamkon ai, Jahowa do goran-Ni,

³ “Dilo ma Ahu, jadi balosan-Ku do ho, anjaha pabotohkonon-Ku do bam pasal habanggalon ampa rusia na so binotohmu ope.

⁴ Ai sonon do hata ni Jahowa, Naibata ni Israel, pasal rumah-rumah na i huta on ampa rumah-rumah ni raja-raja ni Juda, na dob pinarseda bahen partahanan dampak munsuh,

⁵ Iaho manlawan halak Kasdim, ai ma rumah-rumah na gok bani bangkei ni jolma, na dob Hubunuh ibagas ringis-Ku ampa ibagas gilang-Ku, ai domma Hupadaoh bohing-Ku hun huta on halani haganup hajahaton ni sidea.

⁶ Tonggor ma, parohon-Ku do hajorgiton ampa hamalumon bani huta on; pamalumon-Ku do sidea anjaha patalaronku do bani sidea hadoharon ampa hadameion na manongtong.

⁷ Pasuangon-Ku do Juda ampa Israel, anjaha pajongjongon-Ku do sidea songon na bani mulani.

⁸ Urason-Ku do sidea humbani haganup hajahaton ni sidea, na binahen ni sidea ai dampak Ahu, anjaha sasapon-Ku do haganup panlanggaron ni sidea ampa panlawanon ni sidea na dampak Ahu.

⁹ Anjaha huta on gabe goran malas ni uhur ma on Bangku ampa puji-pujian ampa hamuliaon i lobei ni sagala bangsa-bangsa na i tanoh on, na mambogei sagala na madear na Hubahen bani; tarsonggot anjaha gobir ma sidea halani haganup na madear pakon hadoharon na Hubahen bani huta on.

¹⁰ Sonon do hata ni Jahowa, 'Bani ianan on, na hinatahonnima ai: Domma maseda in, seng dong be jolma ampa pinahan ijin, sonai ibagas huta-huta

ni Juda ampa bani dalan-dalan na i Jerusalem, na dob halong ai, anjaha seng marisi jolma be atap pinahan,

¹¹ maningon tarbogei do ijai sora olob-olob pakon sora malas ni uhur, sora ni siparunjuk pakon sora ni tunangan, sora ni halak sipandoding, sanggah mamboan galangan puji-pujian sidea hu rumah ni Jahowa: Puji ma Jahowa Zebaot, ai pardear layak do Jahowa, ronsi sadokah ni dokahni do idop ni uhur-Ni.' Ai pasuangon-Ku do tanoh in songon na bani mulani, nini Jahowa.

¹² Sonon do hata ni Jahowa Zebaot, 'Bani ianan on, na dob halong on, na so marisi jolma atap pinahan pe, sonai homa ibagas haganup huta-hutani, maningon dong do use sampalan ni parmahan bahen parmahanan ni pinahan ni sidea.'

¹³ Bani huta na i pardologan, bani huta-huta na i bornoh-bornoh ampa bani huta-huta i Dangsina, bani tanoh Benjamin, bani tanoh inggot ni Jerusalem ampa bani huta-huta ni Juda, maningon montas do ijai hulanan ni biribiri hun toruh ni tangan ni halak sipangkira, nini Jahowa."

Totap do Sadokah ni Dokahni Bagah-bagah ni Naibata bani si Daud

¹⁴ Tonggor ma, na roh ma panorangni, nini Jahowa, pasaudon-Ku ma ijai bagah-bagah na dob Hubahen

bani ginompar ni Israel ampa bani ginompar ni Juda.

¹⁵ Bani ari ai ampa bani panorang ai bahenon-Ku do martumbor sada Tumbor na pintor bani si Daud; dalankononni do hasintongan ampa hapintoron i tanoh on.

¹⁶ Bani panorang ai maluah ma Juda anjaha marsonang-sonang Jerusalem marianan. Anjaha on do goranni hatahonon ni halak, “Jahowa parpintoranta.”

¹⁷ Ai sonon do hata ni Jahowa, “Seng be rotap humbani si Daud sada halak na hundul bani paratas ni ginompar Israel.

¹⁸ Anjaha humbani malim-malim na humbani marga Lepi pe, seng rotap be humbani sidea halak na mamboan galangan situtungon hu lobei-Hu, na manutung galangan sipanganon ampa na pasirsirhon galangan sisayaton tongtong.

¹⁹ Dob ai roh ma use hata ni Jahowa bani si Jeremia,

²⁰ Sonon do hata ni Jahowa, ‘Songon na so boi langkononnima padan-Ku na bani torang ari ampa padan-Ku na bani borngin, gabe seng roh arian ampa borngin bani panorang na dob tinontuhon bani,

²¹ sonai ma seng tarparontihon padan-Hu na bani si Daud juakjuak-Kai; gabe seng dong bani sada anak na marrajai bani paratasni, sonai homa

padan-Ku bani malim-malim na humbani marga Levi, na marugas Bangku.

²² Songon bala ni langit na so tarbilang ai ampa horsik ni laut na so tarsuhati ai, sonai do pabueion-Ku ginompar ni si Daud juakjuak-Kai, ampa halak Levi na marugas Bangku.”

²³ Dob ai roh ma use hata ni Jahowa bani si Jeremia,

²⁴ “Ai lang ibotoh ho do na hinatahon ni bangsa on, ‘lambukkon Jahowa do na dua suku, na pinilih-Ni in?’ Mapas do uhur ni sidea mangidah bangsang-Ku, sedo bangsa be ai ihira uhur ni sidea.

²⁵ Sonon do hata ni Jahowa, ‘Songon Ahu na manompa arian pakon borngin, anjaha Ahu na manotapkon aturan bani langit pakon tanoh on,

²⁶ sonai do seng anjai ambukkonon-Ku ginompar ni si Jakob ampa ginompar ni si Jakob ampa ginompar ni si Daud juakjuak-Kai, gabe seng be Hubuat humbani ginomparni panggomgom bani ginompar ni si Abraham, si Isak pakon si Jakob.’ Tongon, pasuargon-Ku do sidea, anjaha maidop do uhur-Hu mangidah sidea.”

Tugah-tugah Pasal na Sihol Masa bani si Sedekia

34 ¹ On do hata na roh bani si Jeremia humbani Jahowa, sanggah roh si Nebukadnesar, raja ni Babel, ampa sagala tentarani ampa haganup harajaon na i tanoh on, na masuk hubani

gomgomanni, ampa haganup bangsa-bangsa na marporang dompak Jerusalem ampa dompak haganup huta-hutani:

² Sonon do hata ni Jahowa, Naibata ni Israel, “Laho ma ho, anjaha marsahap ma ho bani si Sedekia, raja ni Juda, anjaha hatahon ma bani: Sonon do hata ni Jahowa, ‘Tonggor ma, ondoskonon-Ku do huta on hubagas tangan ni raja ni Babel, anjaha tutungonni do on bani apuy.’

³ Ho pe seng anjai maluah humbagas tangan-Ni, tapi maningon tartangkap do anjaha iondoskon hubagas tangan-Ni; maningon marsididahan do ho pakon raja ni Babel, anjaha maningon marsahap do ho pakonsi padumpar bohi; maningon tarboan do ho hu Babel.

⁴ Tapi, tangar ma homa hata ni Jahowa, ale Sedekia, raja ni Juda! Sonon do hata ni Jahowa pasal ho, ‘Seng matei anggo ho marhitei podang,

⁵ sonang do ho matei; songon na itutung dahupa bani ompungmu, ai ma raja-raja na i lobeimu, sonai do tutungon dahupa bam, anjaha tangisan do ho. Aih tuannami! Tongon, Ahu do na mangkatahon ai, nini Jahowa.’”

⁶ Jadi ipadas Nabi Jeremia ma ganup hata ai hubani si Sedekia, raja ni Juda i Jerusalem,

⁷ ai ma sanggah iporang tentara ni raja ni Babel Jerusalem ampa haganup huta-huta ni Juda na

tading ai ope, ai ma Takis ampa Aseka; pitah on mando huta na pinatoguh i Juda na tading ope.

Iosei Bangsa ai Parpadanan Pasal Haluahon ni Jabolon

⁸ On do hata na roh hubani si Jeremia humbani Jahowa, dob ibahen Raja Sedekia parpadanan pakon haganup bangsa ai i Jerusalem, ai ma pasal haluahon sitingtingkononkon:

⁹ Paboa ganup halak maningon paluahonni do jabolonni halak Heber, dalahi atap naboru, ase ulang dong be halak Juda, na marjabolonkon hasomanni halak Jahudi.

¹⁰ Anjaha mangaku do haganup pangintuai-pangintuai ampa haganup bangsa ai, na masuk bani parpadanan ai, na mangkatahon, ase ganup paluahkon jabolonni, dalahi atap naboru, ase ulang be iparjabolon sidea; mangaku bei do sidea, anjaha ipaluah do tongon sidea.

¹¹ Tapi margoling do use uhur ni sidea, ialop sidea do mulak jabolonni dalahi atap naboru, na dob pinaluah ni sidea ai, anjaha ipaksa sidea do use gabe jabolon.

¹² Jadi roh ma hata ni Jahowa, bani si Jeremia sonon,

¹³ "Sonon do hata ni Jahowa, Naibata ni Israel, Ahu do na mambahen padan bani ompungnima,

sanggah na Huboan sidea mandarat hun tanoh Masir, hun rumah parjabolonan, ningku do,

¹⁴ Bani tahun papituhon maningon ganup do hanima paluahkon hasomanni halak Heber, na targadei bam anjaha na dob marhorja bam onom tahun; tapi seng itangihon ompungnima Ahu atap itareihon pinggolni Bangku.

¹⁵ Ia hanima ipaubah hanima do uhurnima, anjaha ibahen hanima do na pintor bani uhur-Hu marhitei na maningtingkon haluahon bani ganup hasomanni, anjaha ibahen hanima do parpadanan i lobei-Hu ibagas rumah on na targoran bani goran-Ku,

¹⁶ tapi margoling do use uhurnima, gabe ipabutak hanima goran-Ku, marhitei na ialop hanima haganup use jabolonnima, dalahi atap naboru, na dob maluah mandalankon domu hu bani rosuhni, anjaha ipaksa hanima do sidea use mulak gabe jabolonnima.

¹⁷ Halani ai, sonon do hata ni Jahowa, Seng itangihon hanima Ahu, gabe seng saud itingtingkon hanima haluahon bani ganup hasomanni. Tonggor ma, tingtingkonon-Ku do bannima haluahon bani podang, bani sampar ampa lohei, nini Jahowa. Anjaha bahenon-Ku do hanima gabe songgot-songgot bani haganup harajaon na i tanoh on.

¹⁸ Anjaha halak, na manlanggar padan-Ku, anjaha na so manjolom hata ni padan ai, na dob binahen ni sidea i lobei-Hu, bahenon-Ku do sidea songon anak ni lembu na dob pinonggol dua ai, songon ponggol-ponggol ai, na dob montas sidea hun tengah-tengah ni ai,

¹⁹ ai ma na sangap-sangap ni Juda, ampa na sangap-sangap ni Jerusalem, siparugas i rumah ni raja, malim-malim ronsi haganup halak na marianan i nagori in, na dob montas hun tengah-tengah ni ponggol-ponggol ni anak ni lembu ai.

²⁰ Ondoskonon-Ku do sidea hubagas tangan ni munsuh ni sidea ampa hubagas tangan ni halak na manguhurhon hosah ni sidea; anjaha bangkei ni sidea ai maningon do panganon ni manuk-manuk na i awang-awang ampa binatang na i talun.

²¹ Anjaha si Sedekia, raja ni Juda, ampa gamot-gamotni ondoskonon-Ku do hubagas tangan ni munsuh ni sidea ampa hubagas tangan ni tentara ni raja ni Babel, na dob mulak namin humbennima.

²² Tonggor ma, martonah do Ahu, nini Jahowa, boanon-Ku do sidea mulak hu huta on; parangonni do huta on anjaha tabanonni, lanjar tutungonni bani apuy. Bahenon-Ku do tarulang huta-huta ni Juda, seng dong be na mangiankon.”

Habujuron ni Halak Rekab

35 ¹ On do hata, na roh bani si Jeremia humbani Jahowa, bani panorang ni si Joyakim, anak ni si Josia, raja ni Juda,

² “Laho ma ho hubani halak Rekab, marsahap ma ho pakon sidea; boan ma sidea hu rumah ni Jahowa, hubani sada kamar, anjaha bere ma sidea minum anggur.”

³ Jadi hualop ma si Jaasania, anak ni si Jeremia, anak ni si Habasinya, ampa saninani ampa haganup anakni ampa haganup ginompar ni si Rekab.

⁴ Dob ai huboan ma sidea hu rumah ni Jahowa, hu kamar ni anak ni si Hanan, anak ni si Igdalya, juakjuak ni Naibata, na dohor hubani kamar ni kopala-kopala, i atas ni kamar ni si Maaseya, anak ni si Salum, sijaga labah ai.

⁵ Dob ai hunahkon ma i lobei ni halak Rekab panginuman ampa gusi na gok anggur, lanjar huhatahon ma bani sidea, “Inum nasiam ma anggur in!

⁶ Tapi nini sidea ma mambalosi, ‘Seng minum anggur hanami, ai itonahkon si Jonadab, anak ni si Rekab, ompungnami do bennami: Ulang inum hanima anggur, hanima sonai ginomparnima, age antigan pe;

⁷ ulang pauli hanima bannima rumah, ulang martidah hanima, ulang manombei pohon

anggur hanima atap marnah pohon anggur; tapi marianan bani lampolampo ma hanima sadokah goluhnima, ase dokah hanima manggoluh bani tanoh panginsolatannima.'

⁸ Ibalosi hanami do sora ni si Jonadab, anak ni si Rekab, ompungnami ai, pasal haganup tinonahkonni ai bennami, ai ma ase lang minum anggur hanami sadokah manggoluh hanami, parinangonnami, anaknami ampa borunami,

⁹ anjaha lang pauli rumah hanami bahen ianannami: Seng marpohon anggur hanami, atap marjuma atap martidah.

¹⁰ Tapi marianan bani lampolampo do hanami, anjaha idalankon hanami do romban hubani tonah ni si Jonadab, ompungnami ai, bennami.

¹¹ Tapi dob tangkog si Nebukadnesar, raja ni Babel mamorang nagori on, nini hanami do, 'Eta, laho ma hita hu huta Jerusalem, ai roh do tentara ni halak Kasdim pakon halak Aram! Jadi marianan i Jerusalem ma hanami.'

¹² Dob ai roh ma use hata ni Jahowa bani si Jeremia,

¹³ Sonon do hata ni Jahowa Zebaot, Naibata ni Israel, 'Laho ma ho, anjaha hatahon ma hubani halak Juda ampa pangisi ni Jerusalem: Ai seng ra hanima ajaran ampa manangihon hatang-Ku? nini Jahowa.'

¹⁴ Hata ni si Jonadab, anak ni si Rekab, na tinonahkonni bani anakni, ase ulang sidea minum anggur, idalankon sidea do; ronsi sadari on seng minum anggur sidea, ai itangihon do tonah ni ompung ni sidea. Tapi, age pe marulak-ulak Ahu marsahap bannima, seng itangihon hanima Ahu.

¹⁵ Husuruh do marulak-ulak juakjuak-Ku bannima, nabi-nabi ai, laho mangkatahon bannima, 'Tadingkon hanima ma ganup parlahounima na jahat in, anjaha padear hanima ma pambahenannima, anjaha ulang ma irikkon hanima naibata na legan, laho mambalosi ai, ase totap hanima marianan bani tanoh, na dob Hulayakkon bannima ampa bani ompungnima. Tapi seng ra hanima manareihon pinggolnima, anjaha seng itangihon hanima Ahu.'

¹⁶ Tongon, ihorjahon ginompar ni si Jonadab, anak ni si Rekab do tonah ni ompung ni sidea, na tinonahkonni ai bani sidea, tapi anggo bangsa on seng itangihon Ahu!

¹⁷ Halani ai sonon do hata ni Jahowa, Naibata Zebaot, Naibata ni Israel, 'Tonggor ma, parohon-Ku ma bani Juda pakon ganup pangisi ni Jerusalem haganup hamagouan na dob Hulumbahon bani sidea; ai marsahap do Ahu bani sidea, tapi seng itangihon, dilo-dilo do Ahu bani sidea, tapi seng ibalosi.

¹⁸ Tapi bani ginompar ni si Rekab, nini si Jeremia ma, ‘Sonon do hata ni Jahowa Zebaot, Naibata ni Israel: Halani itangihon hanima do tonah ni si Jonadab, ompungnima ai, anjaha idalankon hanima ganup tonahni, anjaha ibahen hanima ganup romban hu bani tinonahkonni bannima, ¹⁹ halani ai sonon do hata ni Jahowa Zebaot, Naibata ni Israel, ‘Seng anjai rotap dalahi bani si Jonadab, anak ni si Rekab, na jongjong tong marugas i lobei-Hu.’”

Gulungan Panuratan na Tinutung ni Raja Joyakim

36 ¹ Paompat-tahunkon, dob raja si Joyakim, anak ni si Josia, raja ni Juda, roh ma hata on hubani si Jeremia humbani Jahowa,

² “Buat ma sada gulungan panuratan, suratkon ma hujai haganup hata na dob Hutonahkon hubam pasal Israel pakon pasal Juda ampa pasal haganup bangsa-bangsa, mulai humbani ari Huparsahapkon ho, humbani panorang ni si Josia nari das hubani sadari on.

³ Andohar ra ginompar ni Juda manangihon pasal haganup hamagouan, na dob Husurahon sibahenon-Ku bani sidea, ase andohar ganup sidea mulak humbani dalanni na jahat in, gabe marpamuati uhur-Hu mangidah hajahaton ni sidea, ampa mangidah dousa ni sidea.”

⁴ Jadi idilo si Jeremia ma si Baruk anak ni si Neriya, gabe isuratkon si Baruk ma bani gulungan panuratan ai, domu hubani na niluarhon ni si Jeremia hata ni Jahowa, na hinatahon-Ni hu bani.

⁵ Jadi ihatahon si Jeremia ma hubani si Baruk, “Hona larang do ahu masuk hu rumah ni Jahowa.

⁶ Halani ai ho ma laho hujai, anjaha sanggah ari puasa, i lobei ni bangsa ai, i rumah ni Jahowa, basa ma hata ni Jahowa na bani gulungan panuratan ai, na sinuratkonmu domu hubani na huhatahon bam. Maningon basaonmu do homa ai ibogei haganup halak Juda, na marrohan hun hutani bei.

⁷ Andohar ra sidea marrogop i lobei ni Jahowa padaskon elek-elek ni sidea, anjaha ganup sidea ra mulak humbani dalanni na jahat in, ai bangga tumang do ringis ampa gila, na nilumbahon ni Jahowa bani bangsa on.”

⁸ Jadi ibahen si Baruk, anak ni si Neriya ma haganup, songon na tinonahkon ni Nabi Jeremia hu bani, ai ma pasal na mambasa hata ni Jahowa humbani gulungan panuratan ai ibagas, rumah ni Jahowa.

⁹ Dob ai palima-tahunkon dob raja si Joyakim, anak ni si Josia, raja ni Juda, bani bulan siah, itingtingkon ma ari parpuasaon i lobei ni Jahowa hubani haganup bangsa na i Jerusalem ampa hubani haganup halak na roh hun huta-huta ni Juda hu Jerusalem.

¹⁰ Jadi ibasa si Baruk ma i lobei ni haganup bangsa ai hata ni si Jeremia humbani gulungan panuratan ai ibagas rumah ni Jahowa, ibagas kamar ni si Gemarya, anak ni si Sapan, jurutulis ai, ai ma i alaman parhuluan bani dalan masuk hu horbangan baru, na bani rumah ni Jahowa.

¹¹ Jadi dob ibogei si Mikaya, anak ni si Gemarya, anak ni si Sapan haganup hata ni Jahowa na humbani buku ai,

¹² turun ma ia hu rumah ni raja ai, laho hu kamar ni jurutulis ai; marrapot do ijai haganup kopala-kopala: Si Elisama jurutulis ai, si Delaya anak ni si Semaya, si Elnatan anak ni si Akbor, si Gemarya anak ni si Sapan, si Sedekia anak ni si Hananya ampa kopala-kopala na legan.

¹³ Jadi ibaritahon si Mikaya ma bani sidea haganup hata na binogeini ai, sanggah na ibasa si Baruk buku ai i lobei ni bangsa ai.

¹⁴ Jadi isuruh haganup kopala-kopala ai ma si Jehudi, anak ni si Netanya, anak ni si Selemya, anak ni si Kusi marayak si Baruk, laho mangkatahon, “Boan ma gulungan na binasamai i lobei ni na mabuei in, anjaha eta ma.” Jadi iboan si Baruk, anak ni si Neriya ma gulungan ai, laho ma ia marayak sidea.

¹⁵ Nini sidea ma hu bani, “Hundul ma ho, anjaha basa ma in!” Jadi ibasa si Baruk ma ai bani sidea.

¹⁶ Jadi dob ibogei sidea haganup hata ai, marsikawahan ma sidea halani tarsonggot; nini sidea ma hubani si Baruk, “Maningon patugahonnami do haganup hata on bani rajanta.

¹⁷ Lanjar isungkun sidea ma si Baruk, ‘Patugah ma bennami, sonaha do panuratkonmu bani ganup hata on?’

¹⁸ Balos ni si Baruk bani sidea, ‘Si Jeremia do mangkatahon ganup hata ai bangku, sanggah na husuratkon ai bani buku on marhitei tinta.’

¹⁹ Dob ai nini kopala-kopala ai ma bani si Baruk, ‘Laho anjaha marponop ma ho pakon si Jeremia, anjaha ulang ma adong na mambotuh atap ija hanima.’”

²⁰ Jadi masuk ma sidea hu alaman ni istana ai laho marayak raja ai, dob isimpan buku ai i kamar ni si Elisama, jurutulis ai, ipatugah sidea ma ganup hata ai bani raja ai.

²¹ Dob ai isuruh raja ai ma si Jehudi mangalop buku ai, anjaha ialop ma ai hun kamar ni si Elisama, jurutulis ai; ibasa si Jehudi ma ai ibogei raja ai ampa ganup kopala-kopala ai, na jongjong i lambung ni raja ai.

²² Bulan siah ma ai, gabe hundul do raja ai i rumah musim borgoh Ni; gara do apuy ibagas pandadangan i lobei ni.

²³ Siapkonsi ibasa si Jehudi tolu atap ompat kolom mintor irotap raja ai ma ai bani pisou penani, lanjar

igijigkon hubagas apuy pandadangan ai, ronsi bois haganup gulungan panuratan ai ipangan apuy na i pandadangan ai.

²⁴ Tapi ise pe lang dong na tarsonggot atap na marrigati pakeianni, age raja ai ampa haganup juakjuakni, na manangar ganup hata ai.

²⁵ Age pe ielek-elek si Elnatan, si Delaya ampa si Gemarya raja ai, ase ulang namin itutung buku ai, tapi seng itangihon sidea.

²⁶ Iparentahkon raja ai do Jerahmeel, anak ni raja ai, ampa si Seraya anak ni si Asriel, ampa si Selemya anak ni si Abdeel, laho manangkap si Baruk jurutulis ai pakon Nabi Jeremia, tapi domma iponopkon Jahowa sidea.

²⁷ Dob ai roh ma use hata ni Jahowa bani si Jeremia, dob bois itutungi raja ai gulungan panuratan ai na marisi hata na sinuratkon ni si Baruk ai, domu hubani na hinatahon ni si Jeremia bani.

²⁸ Buat ma gulungan na legan, anjaha suratkon ma hujai haganup hata ondi, na bani gulungan na parlobei ondi, ai ma na dob itutungi si Joyakim raja ni Juda.

²⁹ Anjaha pasal si Joyakim raja ni Juda hatahon ma, “Sonon do hata ni Jahowa, ‘Itutung ho do gulungan ai, nim: Mase ma isuratkon do ijai, paboa na maningon roh do raja ni Babel laho parsedahon tanoh on, ampa laho mamboiskon jolma ampa pinahan?’

³⁰ Halani ai sonon do hata ni Jahowa pasal si Joyakim, raja ni Juda, ‘Seng dong be ginomparni na hundul bani paratas ni si Daud, anjaha maningon sampakkononkon do bangkeini hu darat, milasan arian, borgohan bodari.’

³¹ Anjaha marlulu do Ahu bani pakon bani ginomparni ampa bani juakjuakni halani hajahaton ni sidea; anjaha pasogopon-Ku do bani sidea, bani pangisi ni Jerusalem ampa bani halak Juda haganup hamagouan, na dob Hulumbahon hinan bani sidea, tapi seng ra sidea manangihon.”

³² Dob ai ibuat si Jeremia ma sada gulungan na legan, iberehon ma bani si Baruk, anak ni si Neriya, jurutulis ai; isuratkon ma hujai, domu hubani na hinatahon ni si Jeremia, haganup hata ni buku ondi, na dob tinutung ni si Joyakim, raja ni Juda ibagas apuy; buei ope hata na domu hujai itambahkon hujai.

Tartangkap anjaha Tartutup si Jeremia

37 ¹ Jadi bangkit raja ma si Sedekia, anak ni si Josia, manggantih si Konya, anak ni si Joyakim: Si Nebukadnesar, raja ni Babel do na pabangkitkansi gabe raja ni tanoh Juda.

² Tapi anggo ia ampa juakjuakni ampa pangisi ni nagori in, seng itangihon sidea hata ni Jahowa, na dob nilumbahon-Ni marhitei Nabi Jeremia.

³ Jadi isuruh Raja Sedekia ma si Jehukal, anak ni si Selemya, ampa Malim Sepanya, anak ni si Maaseya, marayak Nabi Jeremia laho mangkatahon, “Tonggohon ham ma hanami bani Jahowa Naibatanta!”

⁴ Ia si Jeremia boi ope hujai-hujon i tongah-tongah ni bangsa in, ai seng ope tartutup ia.

⁵ Ijia domma bingkat tentara ni Parao hun Masir, anjaha dob ibogei halak Kasdim, na mangkubu Jerusalem barita ai, surut ma sidea hun Jerusalem.

⁶ Dob ai roh hata ni Jahowa, bani Nabi Jeremia,

⁷ “Sonon do hata ni Jahowa, Naibata ni Israel: Sonon ma hatahon hanima bani raja ni Juda, na marsuruh hanima manungkun Ahu, ‘Tonggor ma, tentara ni Parao na roh laho mangurupi hanima, mulak do ia hu tanohni, hu tanoh Masir.’

⁸ Tapi halak Kasdim mulak do roh mamorang huta on; tabanon ni sidea do on anjaha tutungonni do bani apuy.

⁹ Sonon do hata ni Jahowa, ‘Ulang paoto-oto hanima dirinima marhitei na mangkatahon: Tontu mulak torus do halak Kasdim hun banta. Tongon, seng lanjar mulak sidea.’

¹⁰ Porini pe domma italuhon hanima haganup tentara ni halak Kasdim na marmunsuh dompak hanima, gabe tading humbani sidea pitah na ugahan hansa, maningon jongjong do sidea ganup ibagas lampolampo laho manutung huta on.”

¹¹ Jadi bani na mulak tentara ni halak Kasdim hun Jerusalem, halani parroh ni tentara ni Parao,

¹² luar ma si Jeremia hun Jerusalem, sihol misir hu tanoh Benjamin namin, laho marbagi tean-teanan rap pakon diha-dihani.

¹³ Sanggah das ia hu horbangan Benjamin, roh ma sada parjaga ijai, na margoran si Jeria, anak ni si Selemya, anak ni si Hananya manangkap Nabi Jeremia, nini ma, “Laho marbalik do ho bani halak Kasdim!

¹⁴ Nini Jeremia ma, ‘Seng tongon ai; seng sihol marbalik ahu bani halak Kasdim.’” Tapi seng itangihon si Jeria ia, itangkap ma si Jeremia, lanjar iboan hulobei ni kopala-kopala.

¹⁵ Jadi marah tumang ma kopala-kopala ai bani si Jeremia, ilonsingi sidea ma ia lanjar inahkon hubagas tutupan na i rumah ni si Jonatan, jurutulis ai, ai domma ibahen sidea gabe tutupan ai.

¹⁶ Sonai ma parmasuk ni si Jeremia hubagas lubang sel ai; dokah do si Jeremia itahan ijai.

¹⁷ Jadi isuruh Raja Sedekia ma na mangalopsi. Isungkun raja ai ma ia marponop-ponop ibagas rumahni, nini ma, “Ai adong do bam hata hambani Jahowa? nini si Jeremia ma, ‘Adong do!’ Dob ai nini ma, ‘Ondoskononkon do ham hubagas tangan ni Raja Babel!’

¹⁸ Ihatahon si Jeremia do homa hubani Raja Sedekia, ‘Aha do dousangku bamu, bani

juakjuakmu atap bani bangsa on, ase ipatutupkon ham ahu?’

¹⁹ Ija do nuan nabi-nabimu, na mangkatahon bamu, ‘Seng anjai roh raja ni Babel mangimbang ham age tanoh on?’

²⁰ On pe, tangar ham ma, tuannami anjaha rajanami, sai siat ma bamu pangindoankon, ‘Ulang ma suruh ham ahu mulak hu rumah ni si Jonatan, jurutulis ai, ase ulang matei ahu ijai.’”

²¹ Jadi ibere Raja Sedekia ma parentah, gabe ipadas sidea ma si Jeremia hu alaman parjagaan, ibere ma sada ruti bani ganup ari hun dalam tukang roti ai, das ronsi na bois haganup ruti i huta ai. Sonai ma si Jeremia marianan i alaman parjagaan ai.

Si Jeremia Idabuhkon hubagas Parigi

38 ¹ Tapi sompat do ibogei si Sepatya anak ni si Matan, pakon si Gedalya anak ni si Pashur, pakon si Jukal anak ni si Selemya, pakon si Pashur anak ni si Malkiya, haganup hata na hinatahon ni Jeremia hubani ganup na mabuei ai:

² Sonon do hata ni Jahowa, “Barang ise na tading i huta on, maningon matei do ia marhitei podang, lohei atap sampar; tapi barang ise na marbalik hubani halak Kasdim, manggoluh ma ia; bani ma hosahni songon taban-taban.

³ Ai sonon do hata ni Jahowa, ‘Maningon ondoskononkon do huta on hubagas tangan ni tentara ni raja ni Babel anjaha patundukonni do.’

⁴ Jadi nini kopala-kopala ai ma dampak raja ai, ‘Nabunuh ma dalahi an, ai ia do mambahen galek tangan ni tentara na tading i huta on ampa haganup bangsa in, marhitei na mangkatahon hata na sonai ai bani sidea. Ia halak on sedo hadearon ni bangsa on ipindah, tapi hasedaonni do.’

⁵ Nini Raja Sedekia ma, ‘Tonggor ma, ondos bani tangan nasiam ma ia; ai aha ma tarbahen raja in dampak nasiam?’”

⁶ Jadi ibuat sidea ma si Jeremia anjaha idabuhkan ma ia hubagas godung ni si Malkiya, anak ni raja ai, ai ma na i alaman parjagaan ai; tali do ibahen sidea manantan si Jeremia hu toruh. Tapi seng dong bah ibagas parigi ai, hubang do hansa, gabe munob ma si Jeremia hubagas hubang ai.

⁷ Tapi dob ibogei si Ebedmelek, halak Etiopia, juakjuak na i rumah ni raja ai pasal ai, ai ma na dob inahkon sidea si Jeremia hubagas parigi ai, *(ia raja ai hundul-hundul do i horbangan Benjamin)*,

⁸ luar ma si Ebedmelek hun rumah ni raja ai, nini ma dampak raja ai,

⁹ “Ham tuannami anjaha rajanami: Na jahat do pambahenan ni halak on bani si Jeremia, ai idabuhkan sidea do ia hubagas parigi ai; tontu

matei gayuran ma ia ijai, ai seng dong be ruti i huta on.

¹⁰ Jadi iparentahkon raja ai ma hubani si Ebedmelek, halak Etiopia ai, 'Arahkon ma hunjon hasomanmu tolu halak, anjaha tarik ma Nabi Jeremia humbagas parigi ai, paima lape matei ia.'"

¹¹ Jadi iarahkon si Ebedmelek ma halak ai mangkasomanisi, laho ma ia hu rumah ni raja ai, hu kamar ianan ni pakeian, ibuat ma hunjai sigundal ampa hiou na marigat, anjaha itantan ma ai hu toruh hubani si Jeremia marhitei tali.

¹² Dob ai nini si Ebedmelek, halak Etiopia ai ma dompak si Jeremia, "Nahkon ma sigundal pakon hiou in bani kihikmu, bahen lapit ni tali in." Jadi ibahen si Jeremia ma sonai.

¹³ Dob ai idokdok sidea ma si Jeremia humbagas parigi ai hu atas, gabe marianan i alaman parjagaan ai ma si Jeremia.

Parsahapan ni Raja Sedekia ampa Nabi Jeremia

¹⁴ Jadi isuruh Raja Sedekia ma na mangalopi si Jeremia, ase roh ia hu labah patoluhon, na bani rumah ni Jahowa. Nini raja ai ma dompak si Jeremia, "Dong do sungkunonku humbam; ulang ma porsou atap aha pe hu bangku.

¹⁵ Nini si Jeremia ma mambalosi Raja Sedekia, 'Anggo hupatugah hu bamu, ibunuh ham do ahu!

Anjaha anggo hupatugah bamu aha sibahenonmu, seng itangihon ham ahu.'

¹⁶ Jadi marponop-ponop ma Raja Sedekia marbija bani, nini ma, 'Songon sintongni manggoluh Jahowa, na manjadihon tonduyta, seng anjai bunuhonku ho atap ondoskononku ho hubagas tangan ni halak on, na manguhurhon hosahmu.'

¹⁷ Jadi nini si Jeremia ma hubani si Sedekia, 'Sonon do hata ni Jahowa Zebaot, Naibata ni Israel: Anggo ra ham mangondoskon dirimu hubani kopala-kopala na pinabangkit ni Raja Babel, maluah ma hosahmu, anjaha huta on pe seng tutungon pala bani apuy; anjaha parrumahmu pe ganupan manggoluh ma rap pakon ham.

¹⁸ Tapi anggo seng ra ham marondos bani kopala-kopala na pinabangkit ni Raja Babel, jadi ondoskonon-Ku ma huta on hubagas tangan ni halak Kasdim, anjaha tutungon ni sidea ma in, anjaha ham pe seng anjai maluah humbagas tangan ni sidea.'

¹⁹ Dob ai nini Raja Sedekia ma dompak si Jeremia, 'Mabiar do ahu dompak halak Juda, na dob marbalik bani halak Kasdim, ra ipadas do ahu hubagas tangan ni sidea, gabe dorunan ni sidea ma ahu.'

²⁰ Nini si Jeremia ma, 'Seng anjai padason ham bani sidea. Tangihon ham ma sora ni Jahowa na

hutonahkon bamu, jadi sonang ma ham, anjaha maluah hosahmu.'

²¹ Tapi anggo manjua ham marondos, on ma na dob pinatar ni Jahowa bangku,

²² 'Tonggor ma, haganup naboru na tading ope i rumah ni raja Juda, tarboan do bani kopala-kopala na pinabangkit ni Raja Babel, anjaha ihata-hatahon sidea do: Ipaoto-oto anjaha ipatunduk huan-kuan hatengeran ni uhurmu do ho; halani na dob losop ibagas hubang naheimu, gabe itadingkon sidea do ho.'

²³ Tongon haganup parinangonmu ampa anakmu maningon boanon do hubani halak Kasdim, anjaha ham sandiri seng anjai maluah humbani tangan ni sidea, tapi maningon tangkapon ni tangan ni Raja Babel do; anjaha huta on maningon tutungon do.

²⁴ Jadi nini si Sedekia ma bani si Jeremia, 'Ulang ma tarbotoh hata on age bani ise, ase ulang matei ho.'

²⁵ Anggo ibogei kopala-kopala ai, na dob marsahap ahu pakon ho, gabe roh sidea marayak ho, anjaha ihatahon bam, 'Patugah ma bennami aha parsahamanmu pakon rajanta; ulang porsou bennami, ase ulang ibunuh hanami ho,

²⁶ jadi hatahon ma bani sidea: Na padaskon pangindoanku do ahu bani raja in, ase ulang isuruh mulak ahu hu rumah ni si Jonatan, gabe matei ahu ijai.'"

²⁷ Jadi roh ma tongon, ganup kopala-kopala ai bani si Jeremia lanjar isungkun ma ia, gabe ibalosi ma sidea songon na hinatahon ni raja ai bani. Jadi sip mando sidea, halani seng dong na mambogei parsahapan ai.

²⁸ Jadi soh i alaman parjagaan ai ma si Jeremia das hubani na tartaban Jerusalem.

Tartaban Jerusalem, Maluah do Anggo Nabi Jeremia

39 ¹ Pasiyah-tahunkon dob raja si Sedekia, raja ni Juda, bani bulan sapuluh, roh ma si Nebukadnesar, raja ni Babel ampa haganup tantarani mamorang Jerusalem, anjaha ihubu ma ai.

² Pasapuluhsada-tahunkon, dob raja si Sedekia, bani bulan ompat, ari siah bani bulan ai, bungbung ma huta ai.

³ Sanggah na itaban huta ai, masuk ma haganup kopala-kopala pinabangkit ni Raja Babel, lanjar hundul bani horbangan tongah-tongah, ai ma: Si Nergal-Sareser, raja ni Sinmagir, Rabmag ai, ampa si Nebusasban, Rabsaris ai, ampa kopala-kopala na legan pinabangkit ni Raja Babel.

⁴ Jadi dob ididah Raja Sedekia, raja ni Juda, ampa haganup balani ai, maporus ma sidea, luar hun huta ai borngin, humbani dalan na bani pohon ni raja ai manlopusi horbangan na i holangkolang ni

tembok na dua ai; dompak pamah ni Jordan do sidea maporus.

⁵ Tapi iayak tentara ni halak Kasdim ma sidea, gabe dapot ma si Sedekia i pamah ni Jeriko; dob itangkap sidea ia, iboan ma ia hu lobei ni Raja Nebukadnesar, raja ni Babel, hu Ribla, na i nagori Hamat; jadi idabuh ma uhum hu bani.

⁶ Isayati raja ni Babel ma anak ni si Sedekia i Ribla i lobei ni matani; sonai homa haganup na sangap-sangap ni juda isayati raja ni Babel do.

⁷ Ipulsitkon do anggo mata ni si Sedekia, anjaha irantei do ia, laho mamboansi hu Babel.

⁸ Itutungi halak Kasdim do rumah ni raja ai ampa rumah-rumah ni rayat, anjaha ipanepnep tembok ni Jerusalem.

⁹ Teba-teba ni bangsa ai, na tading ope i huta ai, ampa halak na marbalik, ampa na tading ope humbani tukang, iboan si Nebusaradan, kopala ni parjaga ai ma hu Babel, hu habuangan.

¹⁰ Tapi deba halak na masombuh, na so marnadong, itadingkon si Nebusaradan, kopala ni parjaga ai do i tanoh Juda, anjaha lanjar ibere do bani sidea pohon anggur pakon juma.

¹¹ Ia si Nebukadnesar, raja ni Babel, martonah do bani si Nebusaradan, kopala ni parjaga ai, pasal si Jeremia sonon,

¹² “Alop ma ia anjaha ramotkon, ulang bahen na sambor bani, bahen ma bani domu hubani rosuh ni uhurni.”

¹³ Jadi roh ma si Nebusaradan, kopala ni parjaga ai, ampa si Nebusasban Rabsaris ai ampa si Nergal-Sareser Rabmag ai, ampa kopala-kopala na legan, na pinabangkit ni Raja Babel,

¹⁴ marsuruh mangalopi si Jeremia, hun alaman parjagaan ai. londoskon sidea ma ia bani si Gedalya, anak ni si Ahikam, anak ni Sapan, ase ijalo ia hu rumahni. Jadi marianan i tongah-tongah ni na mabuei ai ma ia.

Bagah-bagah Haluahon bani si Ebedmelek

¹⁵ Sanggah na tartahan ai ope si Jeremia i alaman ni parjagaan ai, roh do hata ni Jahowa bani,

¹⁶ “Laho ma, patugah ma bani si Ebed-Melek, halak Etiopia ai: Sonon do hata ni Jahowa Zebaot, Naibata ni Israel, ‘Tonggor ma, pasaudon-Ku do hatang-Ku na dompak huta on, ai ma hata hamagouan ai, sedo hadearon, anjaha idahonmu do ai bani panorangni.’

¹⁷ Tapi paluahon-Ku do anggo ho bani ari ai, nini Jahowa, anjaha seng padason ho hubagas tangan ni halak na hinabiaranmu.

¹⁸ Tongon, Ahu do na paluahkon ho, seng anjai matei ho bahenon ni podang; maluah do hosahmu

songon taban-taban, halani martenger ni uhur ho Bangku, nini Jahowa.”

Totap do si Jeremia Marianan i Juda; si Gadalya Ipabangkit Manggomgomi Juda

40¹ On do hata na roh bani si Jeremia humbani Jahowa, dob maluah ia ibahen si Nebusaradan, kopala ni parjaga ai, hun Rama; tarboan do ia hujai ibagas gari rap pakon tahanan na hun Jerusalem ampa Juda, na sihol buangon hu Babel.

² Isuruh kopala ni parjaga ai ma na mangalop si Jeremia anjaha nini ma dompaksi, “Jahowa, Naibatamu do manlumbahon hamagouan on bani ianan on;

³ ipasaud Jahowa do ai, ibahen do songon na hinatahon-Ni ai. Halani mardousa nasiam dompak Jahowa, anjaha seng itangihon nasiam sora-Ni, ai do ase masa on bani nasiam.

⁴ On pe, tonggor ma, hupaluah do ham sadari on humbani gari na bani tanganmu. Anggo marosuh uhurmu laho hu Babel rap pakon ahu, dear, eta ham ma, ahu pe na patorsahon ham; tapi anggo seng dear ai ninuhurmu, laho hu Babel rap pakon ahu, age ulang. Tonggor ham ma haganup tanoh na i lobeimu in; laho ma ham huja na dear ampa na pintor, nini uhurmu.

⁵ Tapi anggo ijon do ham nini uhurmu, mulak ma ham hubani si Gedalya, anak ni si Ahikam, anak ni si Sapan, na pinabangkit ni Raja Babel manggomgom huta-huta ni Juda, anjaha marianan ma ham rap pakonsi i tongah-tongah ni na mabuei in; atap laho ham huja na dear, nini uhurmu.” Jadi ibere kopala ni parjaga ai ma bohal ampa sibere-bere bani, anjaha ipaturut ma ia laho.

⁶ Jadi laho ma si Jeremia hubani si Gedalya, anak ni si Ahikam, hu Mispas, lanjar marianan ma ia rap pakonsi i tongah-tongah ni na mabuei ai, na tading i nagori ai.

⁷ Dob ibogei haganup kopala ni tentara ai, na mambur merap ope i tanoh ai ampa tentara ni sidea, na dob ipabangkit raja ni Babel si Gedalya, anak ni si Ahikam manggomgom nagori in, anjaha iondoskon hubani paramangon, parinangon ampa dakdanak, ai ma halak na masombuh, na so hona buang hu Babel,

⁸ jadi roh ma sidea marayak si Gadalya hu Mispas, ai ma si Ismael, anak ni si Netanya, si Johanan pakon si Johanan anak ni si Kareah, si Seraya, anak ni si Tanhumet, anak ni si Epai hun Netopa, si Jesania anak ni halak Maakati ai, sidea ampa pangiring ni sidea.

⁹ Jadi marbulawan ma si Gedalya, anak ni si Ahikam, anak ni si Sapan, hubani sidea pakon hubani pangiring ni sidea, nini ma, “Ulang ma

nasiam mabiar unduk bani halak Kasdim. Iankon nasiam ma tanoh in, anjaha balosi nasiam ma raja ni Babel, jadi sonang ma nasiam.

¹⁰ Tapi anggo ahu, i Mispa do marianan, mawakili nasiam i lobei ni halak Kasdim, na roh hu banta; anggo nasiam pariamai nasiam ma buah ni anggur, buah ni hayu ampa minak, anjaha simpan nasiam ma ai; marianan ma nasiam bani huta na tinodoh nasiam.”

¹¹ Sonai homa, dob ibogei haganup halak Juda, na i Moab, na i tongah-tongah ni halak Amon, na i Edom ampa na i nagori-nagori na legan, na ipaturut Raja Babel do tading deba i Juda, anjaha ipabangkit si Gedalya, anak ni si Ahikam, anak ni si Sapan, manggomgomi sidea,

¹² jadi mulak ma haganup halak Juda, humbani haganup ianan hamerapan ni sidea gabe das ma sidea hu tanoh Juda, hubani si Gedalya i Mispa. Anjaha buei do anggur ampa buah ni hayu ipariamai sidea.

¹³ Roh do ijia si Johanan, anak ni si Kareah ampa haganup kopala ni tentara na i darat marayak si Gedalya hu Mispa;

¹⁴ nini sidea ma dompaksi, “Ai seng ibotoh ham, na isuruh si Baalis, raja ni Amon do si Ismael, anak ni si Netanya, laho mamunuh ham? Tapi seng porsaya si Gadalya, anak ni si Ahikam, bani hata ni sidea ai.

¹⁵ Dob ai nini si Johanan, anak ni si Kareah ma dompak si Gedalya marponop-ponop i Mispa, ‘Palopas ham ma ahu laho, ase hubunuh si Ismael, anak ni si Netanya, anjaha ise pe lang na mambotoh ai. Mase ma ia mambunuh ham, gabe merap halak juda, na martumpu i lambungmu, gabe masab simasima na humbani Juda?’

¹⁶ Tapi nini si Gedalya, anak ni si Ahikam ma dompak si Johanan, anak ni si Kareah, ‘Ulang bahen sonai, seng sintong sahapmu pasal si Ismael ai.’”

Si Gadalya Tarbunuh Ibahen si Ismael

41 ¹ Papitubulankon roh ma si Ismael, anak ni si Netanya, anak ni si Elisama, ai ma sada halak humbani ginompar ni raja in, sada halak humbani kopala-kopala bani raja in, odor rap pakon sapuluh halak, marayak Gedalya, anak ni si Ahikam, hu Mispa; rap mangan ma sidea ijai i Mispa.

² Jadi jongjong ma si Ismael, anak ni si Netanya pakon na sapuluh halak hasomanni ai, gabe ibunuh sidea ma si Gedalya, anak ni si Ahikam, anak ni si Sapan, marhitei podang; ibunuh sidea do ia, na pinabangkit ni Raja Babel ai manggomgomi nagori in.

³ Ibunuh si Ismael do homa haganup halak Juda na rap pakon si Gedalya i Mispa, ampa tentara ni halak Kasdim na tudu adong ijai.

⁴ Patarni ai, dob hona bunuh si Gedalya, sanggah seng dong ope atap ise na mambotoh ai,

⁵ roh ma dalahi hun Sikem, hun Silo ampa hun Samaria, ualuh puluh halak bueini, isuhur bei miseini anjaha marigat pakeianni, irariki angkulani, mamboan galangan sipanganon ampa dahupa, laho manggalangkon ai i rumah ni Jahowa.

⁶ Jadi roh ma si Ismael, anak ni si Netanya hun Mispa manjumpahkon sidea, tangis-tangis do ia mardalan. Dob jumpah sidea, nini ma dompak sidea, “Laho ma hita marayak si Gedalya, anak ni si Ahikam.”

⁷ Tapi dob das sidea hubagas huta ai, ibunuh si Ismael, anak ni si Netanya, rap pakon hasomanni ai ma sidea lanjar igijigkon hubagas parigi.

⁸ Tapi sapuluh halak humbani sidea mangkatahon humbani si Ismael, “Ulang bunuh hanami, dong do iponopkon hanami i ladang gandum, jagul, manisan ampa minak.” Jadi ipaturut ma sidea, seng saud ibunuh rap pakon hasoman ni sidea ai.

⁹ Ia parigi ai, pambuangan ni si Ismael bani sagala bangkei ni halak na binuhunni ai, ai ma parigi na bangga ai, na tinombei ni Raja Asa bahen partahanan dompak si Baesa, raja ni Israel; igoki

si Ismael, anak ni si Netanya do ai bani halak na binunuh ai.

¹⁰ Jadi itangkap si Ismael ma haganup na tading humbani bangsa in, na adong i Mispa, ai ma boru ni raja ai, ampa haganup halak na tading i Mispa, ai ma na dob niondoskon ni si Nebusaradan, kopala ni parjaga ai, hubani si Gedalya, anak ni si Ahikam. Haganup do sidea iboan si Ismael, anak ni si Netanya, anjaha misir ma sidea, marbalik hubani halak Amon.

¹¹ Tapi dob ibogei si Johanan, anak ni si Kareah ampa haganup kopala ni tentara hasomanni ai pasal haganup hajahaton na binahen ni si Ismael, anak ni si Netanya,

¹² jadi iarahkon sidea ma haganup tentara ni sidea, anjaha laho ma sidea mamorang si Ismael, anak ni si Netanya. Jadi dapot sidea ma ia dohorhon bah bolag na i Gibeon.

¹³ Dob ididah bangsa ai, na rap pakon si Ismael ai si Johanan, anak ni si Kareah, ampa haganup kopala ni tentara, na mangkasomanisi ai, jadi malas ma uhur ni sidea.

¹⁴ Haganup halak ai, na binoan ni si Ismael hun Mispa, marbalik ma anjaha mulak marayak si Johanan, anak ni si Kareah.

¹⁵ Tapi anggo si Ismael, anak ni si Netanya, sompat do maporus humbani si Johanan rap pakon

hasomanni ualuh halak, anjaha laho ma ia hubani halak Amon.

¹⁶ Jadi iarahkon si Johanan, anak ni si Kareah ampa haganup kopala ni tentara na mangkasomanisi ai ma haganup bangsa na tading ai, ai ma na binoan ni si Ismael, anak ni si Netanya, hun Mispa, dob binunuhni ai si Gedalya, anak ni si Ahikam. Tentara, parinangon, dakdanak ampa juakjuak do na binoan ni si Johanan ai mulak hu Gibeon.

¹⁷ Jadi laho ma sidea, lanjar marsaran i Gerut Kimham dohorhon Betlehem; marsura-sura do sidea laho hu tanoh Masir

¹⁸ halani halak Kasdim; ai mabiar do sidea mangidah sidea, halani ibunuh si Ismael, anak ni si Netanya si Gedalya, anak ni si Ahikam, na pinabangkit ni Raja Babel manggomgomi nagori in.

Ipalumba si Jeremia ase Ulang Bungkas Bangsa ai hu Masir

42 ¹ Dob ai roh ma hun dohor haganup kopala ni tentara ai ampa si Johanan anak ni si Kareah, ampa si Asaria anak ni si Hosaya, ampa haganup bangsa ai na etek ampa na banggal, ² ihatahon sidea ma hubani Nabi Jeremia, “Jalo ham ma pangindoannami anjaha tonggohon ham ma hanami hu bani Jahowa Naibatamu ampa haganup na tading on, ai otik mando hanami tading

humbani na buei hinan, songon na nididahmu bennami,

³ ase andohar ipatuduhkon Jahowa Naibatamu bennami dalam sidalanannami ampa na boi sibahenonnami.

⁴ Nini Nabi Jeremia ma dampak sidea, 'Domma hubogei ai. Tonggor ma, martonggo pe ahu bani Jahowa Naibata nasiam, songon na pinindo nasiam ai, anjaha atap aha balos ni Jahowa bani nasiam, hupatugah pe bani nasiam; seng pe huporsou atap aha hu bani nasiam.'

⁵ Jadi nini sidea ma dampak si Jeremia, 'Jahowa do saksi na bonar anjaha na sintong mangimbang hanami, anggo lang idalankon hanami holi haganup hata na tinonahkon ni Jahowa Naibatamu marhitei ham hu bennami.'

⁶ Atap dear atap sambor, maningon balosannami do sora ni Jahowa Naibatanami, na sinuruhnami parayakonmu, andohar boi sonang hanami, anggo ibalosi hanami sora ni Jahowa Naibatanami."

⁷ Dob salpu sapuluh ari, roh ma hata ni Jahowa hubani si Jeremia:

⁸ Jadi idilo ma si Johanan, anak ni si Kareah ampa ganup kopala ni tentara hasomanni ai, ampa haganup na mabuei in na etek ampa na magodang,

⁹ nini ma bani sidea, "Sonon do hata ni Jahowa, Naibata ni Israel, na dob huparayak isuruh nasiam, laho padaskon pangindoan nasiam hu lobei-Ni,

¹⁰ ‘Anggo ra hanima marianan i nagori on, pajongjongon-Ku ma hanima, seng parsedaon-Ku; suanon-Ku ma hanima, lang orbaton-Ku, ai manosal do uhur-Hu pasal hamagouan na dob Hubahen bannima.’

¹¹ Ulang hanima hitir-hitir bani raja ni Babel, na hinabiarannima ai; ulang gobir hanima, nini Jahowa, ai Ahu do hasomannima, laho marramotkon hanima ampa paluahkon hanima humbagas tanganni.

¹² Jumpahan idop ni uhur pe hanima Hubahen, ase maidop uhurni mangidah hanima, gabe ipalopas hanima marianan i tanohnima sandiri.

¹³ Tapi anggo ihatahon hanima, ‘Seng ra hanami marianan i nagori on! Marhitei na so ra hanima manangihon sora ni Jahowa, Naibat анима,

¹⁴ anjaha ihatahon hanima: Lang, maningon laho do hanami hu tanoh Masir, ase ulang ididah hanami porang, atap ibogei hanami sora ni tarompit, atap hurangan ruti hanami; anjaha ijai do hanami marianan,

¹⁵ anggo sonai do, tangihon nasiam ma hata ni Jahowa, ale simasima ni Juda.’ Sonon do hata ni Jahowa Zebaot, Naibata ni Israel, ‘Anggo sai isurahon hanima do laho hu Masir laho marianan ijai,

¹⁶ jadi podang na hinabiarannima ai ma manjumpahkon hanima ijai, i tanoh Masir; anjaha

lohei na hinabiarannima ai ma mardakdak hanima hu Masir; maningon matei do hanima ijai.'

¹⁷ Haganup dalahi na marsura-sura laho hu Masir laho marianan ijai, maningon matei do bahenon ni podang, lohei ampa sampar; seng dong na tading atap na horas humbani hamagouan siparohon-Ku bani sidea.

¹⁸ Ai sonon do hata ni Jahowa Zebaot, Naibata ni Israel, 'Songon ringis ampa gilang-Ku na dob Huuseihon bani pangisi ni Jerusalem, sonai do useihononkon ringis-Hu bannima anggo laho hanima hu Masir. Gabe siburaan, songgot-songgot, siapason ampa sipahirion do hanima. Seng idahonnima be ianan on.'

¹⁹ Ipatugah Jahowa do bani nasiam, ale simasima ni Juda, 'Ulang hanima laho hu Masir. Torang ma botoh nasiam, na dob Hupalumba nasiam sadari on,

²⁰ paboa hamateihononkon nasiam do, anggo kahou nasiam.' Ai nasiam do marsuruh ahu bani Jahowa, Naibata nasiam, nini nasiam, 'Martonggo ma ho bani Jahowa, Naibatanami, anjaha atap aha na hinatahon ni Jahowa Naibata-nami, patugah ma bennami, sai horjahononnami do ai.'

²¹ Anjaha domma hupabotohkon bani nasiam sadari on, hape seng itangihon nasiam sora ni Jahowa, Naibata nasiam pasal atap aha pe na sinuruh-Ni patugahonku bani nasiam.

²² On pe, ulang lang ibotoh nasiam, maningon matei do nasiam marhitei podang, lohei pakon sampar bani ianan, na sinurahon nasiam laho marianan ijai.”

Tarboan si Jeremia hu Masir

43 ¹ Jadi dob ihatahon si Jeremia hubani na mabuei ai haganup hata ni Jahowa, Naibata ni sidea, ai ma songon na tinonahkon ni Jahowa, Naibata ni sidea hu bani, sipadasonni hubani sidea, ² gabe roh ma si Asarya anak ni si Hosaya, ampa si Johanan anak ni si Kareah, ampa sagala dalahi na jungkat, nini sidea ma dompak si Jeremia, “Ladung do na hinatahonmu; sedo Jahowa, Naibatami marsuruh ho mangkatahon, ‘Ulang hanima laho hu Masir laho marianan ijai!’

³ tapi si Baruk, anak ni si Neriya do marsuruh ho mangimbang hanami, laho mangondoskon hanami hu tangan ni halak Kasdim, ase ibunuh hanami, atap iboban hanami tarbuang hu Babel.”

⁴ Ase seng ra si Johanan, anak ni si Kareah, ampa haganup kopala ni tentara ampa haganup simbuei ai manangihon sora ni Jahowa, ase totap marianan i tanoh Juda.

⁵ Jadi roh ma si Johanan, anak ni si Kareah, ampa haganup kopala ni tentara mangarahkon haganup teba-teba ni Juda, na roh mulak marianan i

tanoh Juda humbani haganup bangsa-bangsa
pambuangan ni sidea,

⁶ paramangon, parinangon, boru ni raja ampa
haganup halak, na tinadingkon ni si Nebusaradan,
kopala ni parjaga ai mangkasomani si Gedalya,
anak ni si Ahikam, anak ni si Sapan; sonai homa
Nabi Jeremia ampa si Baruk, anak ni si Neriya.

⁷ Jadi laho ma sidea hu tanoh Masir, ai seng ra
sidea manangihon sora ni Jahowa. Das ma sidea hu
Tahpanhes.

Ilumbahon si Jeremia Parroh ni si Nebukadnesar Patunduk Masir

⁸ Dob ai roh ma hata ni Jahowa hubani si Jeremia i
Tahpanhes,

⁹ “Boan ma bani tanganmu batu banggal anjaha
ponopkon ma ai ibagas tanoh bani dalan masuk hu
rumah ni Parao i Tahpanhes, ididah dalahi-dalahi
na hun Juda,

¹⁰ anjaha hatahon ma bani sidea: sonon do hata
ni Jahowa Zebaot, Naibata ni Israel, ‘Tonggor ma,
suruhon-Ku ma na mangalopi si Nebukadnesar, raja
ni Babel, juakjuak-Kai, anjaha pajongjongonni ma
paratasni i atas batu na Huponopkon on, anjaha
paherbangonni do lampolampo harajaonni i atas
ni.’

¹¹ Maningon roh do ia anjaha patundukonni do
tanoh Masir; ondoskononni do hu hamatean na

dob tinontuhon hu hamatean, hu habuangan na
dob tinontuhon hu habuangan, hubani podang na
dob tinontuhon bani podang.

¹² Nahitanni do apuy ibagas rumah ni sisombah-
sombahon ni Masir; tutungonni ma ai atap
boanonni deba hu habuangan; hutuanni ma Masir,
songon pangkutui ni parmahan bani hiouni; anjaha
marsonang-sonang do ia mulak hunjai.

¹³ Ropukonni do tiang batu na i Betsemes na
i tanoh Masir, anjaha tutungonni do rumah ni
naibata-naibata ni Masir.”

Ilumbahon si Jeremia Uhum halani Inunut Bangsa ai Marsombah bani Naibata Naboru na i Langit

44 ¹ On do hata na roh hubani si Jeremia pasal
haganup halak juda, na marianan i tanoh
Masir, ai ma i Migdol, i Tahpanhes, i Mempis ampa
i tanoh Patros, nini,

² “Sonon do hata ni Jahowa Zebaot, Naibata ni
Israel, ‘Ididah hanima do haganup hasedaon na
Huparoh hubani Jerusalem ampa hubani haganup
huta-huta ni Juda. Tonggor ma, halong do ai nuan,
seng dong na marianan ijai,

³ halani hajahaton na hinorjahon ni sidea, laho
mamuhoi ringis-Ku marhitei na laho sidea
manutung dahupa anjaha ibalosi naibata na
legan, na so tinanda ni sidea, age hanima, age
ompungnima,

⁴ age pe Husuruh marulak-ulak bannima juakjuak-Ku, nabi-nabi ai, mangkatahon: Ulang bahen hanima habutakon, na Huhagigihon in.'

⁵ Tapi seng itangihon sidea, anjaha seng ipaeleng pinggolni, laho surut humbani hajahaton ni sidea, anjaha ase ulang manutung dahupa bani naibata na legan.

⁶ Halani ai durus do gilang-Ku pakon ringis-Ku, anjaha gara i huta-huta ni Juda ampa bani dalan-dalan na i Jerusalem; gabe halong anjaha tarulang do ai ronsi sadari on.

⁷ On pe sonon do hata ni Jahowa, Naibata Zebaot, Naibata ni Israel, 'Mase ma iparroh hanima hamagouan bangga on bannima, gabe bois hun tongah-tongahnima, hun tongah-tongah ni Juda, paramangon ampa parinangon, dakdanak pakon na inumon, gabe seng dong na teba humbennima?'

⁸ Mase ma ipuhoi hanima ringis-Ku marhitei pambahenan ni tangannima, ai ma manutung dahupa bani naibata na legan i tanoh Masir, hadasannima ai, laho manginsolat ijai, gabe bois hanima, gabe siburaan ampa sirisa-risaon i tongah-tongah ni bangsa-bangsa na i tanoh on?

⁹ Ai domma lupa hanima bani hajahaton ni ompungnima, bani hajahaton ni raja-raja ni Juda, bani hajahaton ni jolma ni sidea, bani hajahatonnima sandiri ampa bani hajahaton ni

jolmanima, ai ma na binahen ni sidea i tanoh Juda
ampa alaman ni Jerusalem?

¹⁰ Seng ipaunduk sidea uhur ni sidea ronsi
sadari on, anjaha seng mabiar sidea, anjaha
seng mardalan sidea domu hu bani titah-Ku
ampa aturan-Ku na Hubere bannima ampa bani
ompungnima.

¹¹ Halani ai sonon do hata ni Jahowa Zebaot,
Naibata ni Israel, 'Tonggor ma, dompakkonon-Ku
do bohing-Ku bannima, laho mambahen
hasamboron, laho mamboiskon ganup Juda.'

¹² Anjaha teba-teba ni Juda, na mandompakkon
bohini laho hu Masir, sihol marianan ijai, maningon
do bois sidea ganup; i tanoh Masir do sidea
marrageian, bois ibahen podang pakon lohei,
marmateian sidea, na etek age na magodang,
ibahen podang pakon lohei; gabe siburaan do
sidea, gabe songgot-songgot, gabe umpama ampa
sirisaon.

¹³ Ai marlulu do Ahu age dampak na marianan i
tanoh Masir, songon parlulung-Ku bani Jerusalem
marhitei podang, lohei pakon sampar,

¹⁴ ase ulang adong na maluah atap na tading
humbani teba-teba ni Juda, na laho hu Masir, sihol
manginsolat ijai. Seng mulak be sidea hu tanoh
Juda, na hinasiholan ni sidea sihol mulak hujai
anjaha marianan ijai; tongon, seng dong sidea na
mulak, sobali piga-piga halak na maporus."

¹⁵ Dob ai marbalos ma sidea hubani si Jeremia, ai ma haganup dalahi na dob mambotoh manutung dahupa jolma ni sidea bei hu bani naibata na legan, ampa haganup naboru na dihut jongjong ijai, sada humpulan na bangga, sonai homa haganup halak na marianan i Patros, i tanoh Masir, nini sidea ma,
¹⁶ “Hata na hinatahonmu bennami marhitei goran ni Jahowa, seng ra hanami manangihon ai.

¹⁷ Tapi maningon dalankononnami do domu hubani na dob ibagahkon hanami; maningon manutung dahupa do hanami hubani raja naboru na i langit ai, anjaha manguruskon galangan siinumon hu lobeini, songon na dob binahennami, hanami age ompungnami, raja-rajanami ampa kopala-kopalanami, ibagas huta-huta ni Juda pakon bani dalan-dalan na i Jerusalem; ijia sungkupan sipanganon do hanami anjaha marsonang-sonang, seng dong hasedaon ididah hanami.

¹⁸ Tapi dop iparontihon hanami na manutung dahupa bani raja naboru na i langit ai ampa na manggalangkon galangan siinumon i lobeini, marhahurangan do hanami pasal haganup, anjaha bois hanami ibahen podang pakon lohei.

¹⁹ Anjaha naboru-naboru mangkatahon, manutung dahupa pe hanami bani raja naboru na i langit ai, anjaha manggalangkon galangan siinumon pe hanami i lobei ni, ibagas botoh ni paramangonnami do ai, ai ma na binahennami kuei mangusihi

rupani, anjaha na ginalangkonnami ai galangan siinumon i lobeini.

²⁰ Jadi nini si Jeremia ma dampak haganup bangsa ai, dampak dalahi ampa naboru, dampak haganup halak na marbalos ondi,

²¹ 'Ia dahupa, na tinutungnima bani huta-huta ni Juda pakon na i dalan-dalan na i Jerusalem, hanima age ompungnima, rajanima age kopalanima ampa halak na marianan i tanoh ai, ibotoh Jahowa do ai, iparuhurhon do ai.'

²² Seng be tartahan Jahowa uhur-Ni mangidah pambahenannima na masambor in ampa hagigi na nidalankonnima in; halani ai do ase tarulang, halong anjaha hona bura tanohnima, seng dong na mangiankon songon nuan ai.

²³ Halani na manutung dahupa ai, halani na mardousa ai hanima dampak Jahowa, anjaha seng itangihon hanima sora-Ni, seng idalankon hanima titah-Ni, aturan-Ni ampa hasaksian-Ni, halani ai do ase mangonai hamagouan on bannima songon nuan on.

²⁴ Dob ai nini si Jeremia ma hubani ganup simbuei ai ampa hubani ganup naboru ai, 'Tangihon hanima hata ni Jahowa, hanima haganup halak Juda, na adong i tanoh Masir.'

²⁵ Sonon do hata ni Jahowa Zebaot, Naibata ni Israel, 'Hanima ampa jolmanima do na manluarhon ai marhitei pamangannima, anjaha na pasaudkon

ai marhitei tangannima, nini hanima: Maningon pasaudonnami do bagah-bagahnami, na dob pinarbagahnami, ai ma manutung dahupa bani raja naboru na i langit ai ampa mamboan galangan siinumon hu lobeini. Pasaud hanima ma tongon bagah-bagahnima ai, suhuni ma tongon ai!

²⁶ Halani ai, tangihon hanima ma hata ni Jahowa, hanima haganup halak Juda na marianan i tanoh Masir, 'Tonggor ma, domma marbija Ahu marhitei goran-Ku na timbul in, nini Jahowa, na so malo be goran-Ku diloon ni pamangan ni atap ise pe halak Juda, na marianan i tanoh Masir, mangkatahon: Songon sintongni manggoluh Tuhan Jahowa.'

²⁷ Tonggor ma, mangkawah do Ahu dompak sidea laho mambahen hamagouan, sedo mambahen na madear; haganup halak Juda, na i tanoh Masir, maningon ripas do ibahen podang ampa lohei, bois tumang ganup sidea.

²⁸ Anjaha halak na maluah humbani podang, na mulak hun Masir hu tanoh Juda, otik do bilanganni. Jadi haganup teba-teba ni Juda na laho hu tanoh Masir, sihol manginsolat ijai, botohonni ma atap hata ni ise do na sintong, hatang-Ku atap hata ni sidea do.

²⁹ On do tandani bannima, nini Jahowa, paboa na marlulu do Ahu bannima bani ianan on, ase ibotoh hanima, paboa na tongon do hata na Hulumbahon ai mangimbang hanima:

³⁰ Sonon do hata ni Jahowa, ‘Tonggor ma, ondoskonon-Ku do Parao Hopra, raja ni Masir, hubagas tangan ni munsuhni ampa hubagas tangan ni halak na manguhurhon hosahni, songon na dob Huondoskon ai si Sedekia, raja ni Juda, hubagas tangan ni si Nebukadnesar, raja ni Babel, ai ma munsuhni ai, na manguhurhon hosahni.’”

Hata Lumba-lumba ampa Apoh-apoh bani si Baruk

45 ¹ On do hata, na hinatahon ni Nabi Jeremia hubani si Baruk, anak ni si Neriya, sanggah na sinuratni hata on ibagas sada buku domu hubani pangkatahon ni si Jeremia, ai ma paompat-tahunkon dob raja si Joyakim, anak ni si Josia, raja ni Juda, nini,

² “Sonon do hata ni Jahowa Zebaot, Naibata ni Israel hu bam, ale Baruk,

³ ‘Ihatahon ho: Magou ma ahu! Ai itambahi Jahowa ope pusok ni uhur bani naboritku; loja do ahu halani hoih-hoihku, anjaha seng dapotan parsaranan ahu!’

⁴ Sonon ma hatahon bani, ‘Sonon do hata ni Jahowa: Tonggor ma, na dob Hupauli, Huparseda do, na dob Husuan, Hudokdok do, ai ma haganup tanoh in.’

⁵ Naha ho, pindahanmu ope habanggalon bam? Ulang ma pindahi, ai tonggor ma, parohon-Ku do hamagouan bani sagala daging, nini Jahowa; tapi

berehonon-Ku do bam hosahmu songon upah taban-taban bani sagala ianan siparayakonmu.”

Lumba-lumba Pasal Parseda ni Masir

46 ¹ On do hata ni Jahowa na roh hubani Nabi Jeremia pasal bangsa-bangsa.

² Pasal Masir: Pasal tentara ni Parao Neko, raja ni Masir, na marsaran i lambung ni Bah Eprat, dohorhon Karkemis, na tinaluhon ni si Nebukadnesar, raja ni Babel, paompat-tahunkon dob raja si Joyakim, anak ni si Josia, raja ni Juda,

³ “Pasirsir ma gantar na etek ampa na banggal, anjaha bingkat ma hu parporangan!

⁴ Palanai ma huda in, naiki ma, ale siajak huda! Jongjong ma martangkuluk bosu bei, pamarot tanjanima, sorungkon baju-baju partahanan!

⁵ Aha do na Huidah ai? Gobir-gobir do sidea, anjaha surut hu pudi! Talu do puanglima ni sidea, tarolos maporus; seng mangkawah dompak pudi, habiaran do inggot, nini Jahowa.

⁶ Na doras marlintun seng tarbahensi maporus, age na barani-barani seng maluah; i utara i lambung Bah Eprat do sidea marjurgangan anjaha radag.

⁷ Ise do ai, na marbanggal songon Bah Nil, songon bah bolon na marhasak bahni?

- ⁸ Masir do ai na marbanggal songon Bah Nil, anjaha songon bah bolon parhasak ni bahni. Nini, 'Marbanggal ma ahu, sihol do rungkubonku tanoh in, parsedaonku huta-huta ampa pangisini.'
- ⁹ Maju ma, ale sagala huta, marpojong ma, ale gareta! Bingkat ma siparporang! Halak Kus ampa halak Put sijolom gantar, halak Lud, na pandei manintak Sior.
- ¹⁰ Ari ai, ai ma ari ni Tuhan Jahowa Zebaot, sada ari pambalason, laho mambalas munsuh-Ni. Bosur do podang mamangani, anjaha marmabuk-mabuk do ia minum daroh ni sidea. Ai Jahowa, Naibata Zebaot do na mangadongkon panayatan i tanoh parutara i lambung ni Bah Eprat.
- ¹¹ Tangkog ma hu Gilead, alop ma minak balsem, ale anak boru, boru Masir! Soya-soya do na pinakeimin buei tambar, seng tarbahen malum be ho.
- ¹² Tarbogei do bani bangsa-bangsa hailaonmu, gok do tanoh on bani doruh-doruhmu; ai marsijombaan do siparporang samah siparporang, rap radag do sidea."
- ¹³ On do hata ni Jahowa, na hinatahon-Ni bani Nabi Jeremia, ai ma pasal parroh ni si Nebukadnesar, raja ni Babel, laho patunduk tanoh Masir,

- 14 “Baritahon ma i Masir, anjaha tingtingkon i Migdol; pabogei hon ma i Nob ampa i Tahpanhes! Hatahon ma, ‘Jongjong ma anjaha marjaga-jaga, ai domma bois ipangan podang simbalogmu.’
- 15 Mase marrageian puanglimamu? Seng jongjong be! Jahowa do patundukkon sidea.
- 16 Ibahen do sidea buei mangkatompas, radag do sidea; nini sidea do samah sidea, ‘Eta, mulak ma hita hubani bangsanta ampa hu tanoh hatubuhanta halani podang sipangagou in.’
- 17 Bahen ma goran ni Parao, raja ni Masir: Sibuei hata-hata, siparsoya-soya panorang na madear.
- 18 Songon sintongni manggoluh Ahu, nini Raja in, na margoran Jahowa Zebaot: Songon Dolog Tabor i tongah-tongah ni dolog-dolog, songon Karmel na i topi laut, sonai do parrohni ai.
- 19 Pasirsir ma ugas-ugasmu, laho hu habuangan, ale pangisi ni Masir! Tongon, maningon tarulang do Nob, mareong, seng dong na mangiankon.
- 20 Lombu na majenges do Masir, tapi roh ma sipangagou hun utara marayaksi.
- 21 Age tentara na niupahan, na i tongah-tongah ni sidea, songon anak ni lombu na mombur do; marbalik do sidea anjaha rap maporus, seng

martahan sidea; ai sogop do ari hamagouan
bani sidea, panorang pambalason bani
sidea.

²² Songon parlisik ni ulog do parrohni bogeion;
tongon, marhulan-hulan do sidea roh,
marsiboan kapakni songon siroboh hayu.

²³ Robohon ni sidea do haranganni, nini Jahowa,
ai seng marsibar sidea; bueinan do sidea ase
balang, seng tarbilangni sidea.

²⁴ Maningon bador do boru Masir, maningon
ondoskononkon do ia hubagas tangan ni
bangsa na hun utara.

²⁵ Ihatahon Jahowa Zebaot, Naibata ni Israel
do, 'Tonggor ma, marlulu do Ahu dampak
Amon, na hun No, dampak Parao, dampak
Masir, dampak sisombahonni ampa
raja-rajani, dampak Parao ampa dampak
halak na martenger ni uhur bani.'

²⁶ Ondoskonon-Ku do sidea hubagas tangan ni na
manguhurhon hosah ni sidea, hubagas tangan ni si
Nebukadnesar, raja ni Babel, ampa hubagas tangan
ni gamot-gamotni. Tapi dob salpu ai ianonkon
do use Masir songon bani panorang sapari, nini
Jahowa.

²⁷ Tapi anggo ho, ulang ma mabiar, ale Jakob
juakjuak-Ku, anjaha ulang ma tarsonggot,
ale Israel; ai tonggor ma, paluahon-Ku do ho
hun tanoh na madaoh ampa ginomparmu

hun tanoh habuangan ni sidea. Maningon mulak do Jakob, marsonang-sonang do ia anjaha mardamei-damei, ise pe lang be na manonggotisi.

²⁸ Ulang ma ho mabiar, ale Jakob juakjuak-Ku, nini Jahowa, ai Ahu do hasomanmu. Boiskonon-Ku do bangsa-bangsa pambuangan-Ku bannima, tapi anggo ho seng bois bahenon-Ku, tongon, Huajar do ho domu hubani na patut; tapi seng paturuton-Ku ho lang hona pinsang.”

Lumba-lumba Pasal Palistim

47 ¹ On do hata ni Jahowa na roh hubani Nabi Jeremia, pasal halak Palistim, sanggah lape ipatunduk Parao Gasa.

² Sonon do hata ni Jahowa, “Tonggor ma, marbanggal do bah roh hun utara, gabe bah bolon na sampur. Landaonni do tanoh in ampa haganup na adong ijin, huta-huta ampa na marianan ijin. Tangis-tangis ma jolma anjaha doruh-doruh na mangiankon tanoh in.

³ Pangkorhon ni gurojob ni nahei ni huda ampa parhurasak ni garetta porang ampa parputor ni rodani, seng be ikawahkon bapa anakni, sonai ma hagalekon ni sidea,

- ⁴ halani panorang na roh laho mamboiskon haganup halak Palistim, laho mansiapkon sagala na tading, sipangurupi bani Tirus ampa Sidon. Tongon, Jahowa do na mamboiskon halak Palistim, teba-teba na roh hun Pulou Kaptor.
- ⁵ Hona palpal do Gasa, masab ia Askalon. Ale teba-teba ni halak Enak, piga dokah nari rarikannima dirinima?
- ⁶ Ale podang ni Jahowa! Piga dokah nari pe, ase soh ho? Mulak ma ho hubagas sarungmu, Maronti ma anjaha marsaran ma!
- ⁷ Sonaha ma parsohni, ai Jahowa do na marsuruhsi? Dompok Askalon pakon dampak topi ni laut do ai ihatahon.”

Lumba-lumba Pasal Parseda ni Moab

- 48** ¹ Pasal Moab: Sonon do hata ni Jahowa Zebaot, Naibata ni Israel, “Bursik ma Nebo, ai domma maseda! Bador do Kiriataim, anjaha hona taban; maila do benteng anjaha iparreong.
- ² Sasap do hamuliaon ni Moab. Martahi-tahi do halak i Hesbon pasalsi: Eta, parseda hita ma Moab, ase ulang masuk bangsa be ai! Ho pe, ale Madmen, maningon parsedaon do; podang do mardakdak ho.

- ³ Tarbogei do sora doruh-doruh hun Horonaim:
Hasedaon ampa hamagouan bangga.
- ⁴ Maseda do Moab, tarbogei do doruh-doruh das
hu Soar.
- ⁵ Tongon, tangis-tangis do sidea tangkog bani
tangkogan Luhit; tarbogei do doruh-doruh
pasal hasedaon bani tuadan Horonaim.
- ⁶ Maporus ma! Ase maluah hosahnima! Tapi
songon tatada ma hanima i halimisan.
- ⁷ Halani martenger ni uhur ho bani batar-batarmu
ampa bani artamu, ho pe maningon tarboan
do; anjaha Kemos maningon tarbuang
do, rap pakon malim-malimni ampa na
sangap-sangapni.
- ⁸ Ai roh do sipangagou bani sagala huta,
anjaha sada pe lang na maluah; seda do
habungan-habungan, anjaha tarulang sagala
pamah, songon na hinatahon ni Jahowa.
- ⁹ Bere ma habong bani Moab, ai sihol habang do
ia daoh. Maningon tarulang do huta-hutani,
seng dong na marianan ibagas.
- ¹⁰ Hona papa ma halak na marayoh pasaudkon
horja ni Jahowa, anjaha hona papa ma halak
na pasoh podangni manduruskon daroh.
- ¹¹ Marsonang-sonang do Moab humbani
haposoonni nari, sonang tibal bani lutokni;
seng onggga ia ipausei humbani gusi hu
gusi, seng onggga tarboan ia hu habuangan.

Halani ai totap do daini anjaha seng mubah morumni.

- ¹² Tapi, tonggor ma, roh ma panorangni, nini Jahowa, suruhon-Ku ma halak na manguseihonsi, na palumeihon gusi-gusi ai ampa na marrosakisi.
- ¹³ Maningon bador do Moab halani Kemos, songon halak Israel na bador halani Betel, hatengeran ni uhur ni sidea ai.
- ¹⁴ Mase ma ihatahon hanima, 'Puanglima do hanami anjaha tentara na barani?'
- ¹⁵ Tangkog do siparseda Moab ronsi huta-hutani, gabe tuad hu panayatan anak garama pilihanni, nini Raja ai, na margoran Jahowa Zebaot.
- ¹⁶ Dohor do parseda ni Moab, anjaha mangolos do roh hamagouanni.
- ¹⁷ Tangisi ma ia, hanima ganup simbalogni, ampa haganup na mambotoh goran-Ni! Hatahon ma, 'Naha do parpongol ni tungkot harajaon in ampa simambu hasangapon in?'
- ¹⁸ Turun ma humbani hasangaponmu, anjaha hundul ma bani orbuk, ale boru Dibon! Ai domma tangkog mangayak ho, ai ma siparseda Moab; iparseda do batatarmu.
- ¹⁹ Jongjong ma i dalan anjaha kawahkon ma, ale pangisi ni Aroer! Sungkun ma halak na maporus ampa halak na maluah; hatahon ma, 'Aha do na masa?'

- ²⁰ Domma bador Moab, ai domma maseda;
mandoruhi ma anjaha tangis ma! Patugah
ma ai i lambung ni Arnon, paboa na dob
bois do Moab.
- ²¹ Madabuh do uhum bani tanoh hanopan, bani
Holon, Jahas, Mepaat,
- ²² bani Dibon, Nebo, ampa Bet-Diblataim,
- ²³ bani Kiriataim, Bet-Gamul ampa Bet-Meon,
- ²⁴ bani Keriyyot ampa Bosrah ampa bani haganup
huta na i nagori Moab, na daoh pakon na dohor.
- ²⁵ Maponggol do tanduk ni Moab, marosak
botokonni, nini Jahowa.
- ²⁶ Bahen ma ia mabuk, ai do dirini i lobei ni Jahowa,
ase margulu ia bani utah-utahni, anjaha gabe
sipahirion ia homa.
- ²⁷ Ai lang gabe sipahirion do Israel bam? Ai adong
jumpah ia rap pakon panangko ase iupir-upirhon
ho ulumu, anggo taringat ho pasalsi?
- ²⁸ Tadingkon ma huta in, anjaha marianan
ma i dolog batu, ale pangisi ni Moab!
Songon kuhuy ma hanima na marasar bani
liang-liang.
- ²⁹ Domma itangar hanami pasal pangenjengon
ni Moab, mangenjeng tumang do ia ampa
pasal hatoalonni, pangunsagahni, jungkatni
ampa gijang ni uhurni.

- ³⁰ Hubotoh do pangenjengonni, nini Jahowa, lumei do sahap-sahapni, anjaha seng sintong pambahenanni.
- ³¹ Halani ai tangis do Ahu pasal Moab, doruh-doruh pasal haganup Moab; anjaha pasal halak na i Kir-Heres marhoih do Ahu.
- ³² Lobih humbani partangis-Hu bani Jaeser do partangis-Hu bam, ale hayu anggur na i Sibma! Mandipar laut do rantingmu, das hu Jaeser; roh do sipangagou bani pariamamu ampa buah anggurmu.
- ³³ Hona buat do malas ni uhur ampa olob-olob humbani tanoh na lambutan ni tanoh Moab; domma Hupangadi anggur roh hun pangilangan; seng dong be na marhorja i pangilangan, seng tarbogei be surak-surak malas ni uhur.
- ³⁴ Doruh-doruh do Hesbon ampa Eleale; das do hu Jahas tarbogei sora ni sidea, hun Soar das hu Horonaim, ronsi Eglat-Selisia, age bah ni Nimrim domma halong.
- ³⁵ Parontihonon-Ku ma i Moab, nini Jahowa, ase ulang adong be halak na manggalang i atas buntu-buntu atap manutung dahupa bani naibata ni sidea.
- ³⁶ Halani ai tangis do uhur-Hu songon sordam mangidah Moab, anjaha tangis do tonduy-Hu

songon sordam mangidah halak Kir-Heres, ai magou do habayakon na sinari ni sidea.

³⁷ Ai hona palpal do sagala ulu, hona suhur sagala jambek; hona rarikan do sagala tangan, anjaha hiou guni do bani binongei ni sidea.

³⁸ Bani ganup tayub ni rumah na i Moab ampa bani alaman-alaman pitah tangis-tangis do hansa tarboge, ai domma Hubolahkon Moab songon hudon na so hinarosuhkon ni halak, nini Jahowa.

³⁹ Ai, parbolahni in! Ai, partangis ni sidea in! Partundal ni Moab in, halani tarbador! Sonai ma Moab gabe sipahirion ampa songgot-songgot bani ganup simbalogni.

⁴⁰ Ai sonon do hata ni Jahowa, 'Tonggor ma, songon manuk-manuk nanggordaha do ia habang, anjaha ipaherbang habongni i atas ni Moab;

⁴¹ ipatunduk do sagala huta, anjaha isoluk sagala huta na pinatoguh.' Uhur ni siparporang ni Moab bani ari ai usih do bani uhur ni naboru na mangarou.

⁴² Maningon bois do Moab, seng hiraon be sada bangsa, halani na mangenjeng ai ia dompak Jahowa.

⁴³ Hagobiron, godung ampa siding do mangonai bam, ale pangisi ni Moab, nini Jahowa.

⁴⁴ Barang ise na maporus halani hagobiron ai, madabuh do hubagas godung; barang ise na

luar hambani godung ai, hona siding do. Ai parohon-Ku do ganupan ai bani Moab, bani tahun pambalason-Ku, nini Jahowa.

- ⁴⁵ Bani linggom ni Hesbon do marsaran halak na maporus, loja tumang; tapi luar do apuy hun Hesbon, gajag ni apuy hun rumah ni si Sihon; iparseda do pardompakan ni Moab ampa pakpak ni ulu ni halak sipanggeori.
- ⁴⁶ Magou ma ho, ale Moab! Magou ma bangsa ni Kemos; ai tarboan do anakmu hu habuangan ampa borumu hu parjabolonan.
- ⁴⁷ Tapi i pudi ni ari pasuangon-Ku do Moab, nini Jahowa.” Sibar jai ma uhum na bani Moab.

Lumba-lumba Pasal Parseda ni Amon

49 ¹ Pasal halak Amon: Sonon do hata ni Jahowa, “Ai seng dong nani anak bani Israel? Ai seng dong sipanean bani? Mase ma Milkom sipanean bani Gad anjaha bangsani marianan bani huta-hutani?

- ² Halani ai, tonggor ma, na roh ma panorangni, nini Jahowa, pabogehonon-Ku ma surak-surak porang dompak Rabba, huta ni halak Amon; gabe timbunan batu do ai, janah dusun-dusunni bois tutungon ni apuy; jadi teanon ni Israel ma tean-teanan ni halak sipambuat tean-teananni hinan, nini Jahowa.

- ³ Tangis ma, ale Hesbon, ai maseda ma in!
Doruh-doruh ma, ale boru Rabba! Gonditi
ma dirimu bani hiou guni, tangis ma, anjaha
marlintun ma hujai-hujon, rariki dirimu! Ai
maningon tarbuang do Milkom, rap pakon
malim-malimni ampa na sangap-sangapni.
- ⁴ Mase ma mangenjeng ho pasal habuanganmu,
ale boru sipangosei, ho na martenger ni
uhur bani arta, na mangkatahon, 'Ise na pag
roh hu bangku?'
- ⁵ Tonggor ma, parohon-Ku ma bam songgot-
songgot, nini Tuhan Jahowa Zebaot,
humbani halak na marianan inggot bam;
erapkononkon do hanima ganup marsitohu
dalanni, janah seng dong na patumpuhon
na maporus ai.
- ⁶ Tapi i pudi ni ai pasuangon-Ku do halak Amon,
nini Jahowa."

Lumba-lumba Pasal Parseda ni Edom

- ⁷ Pasal Edom: Sonon do hata ni Jahowa Zebaot,
"Ai seng dong be na maruhur i Teman? ai
domma magou ranggian ni halak na pentar?
Ai domma masab hapentaran ni sidea?"
- ⁸ Maporus ma, marhusor, marponop ma bani
ianan na bagas, ale pangisi ni Dedan! Ai
pasogopon-Ku do hamagouan bani Esau,
bani panorang pambalason-Ku bani.

- ⁹ Anggo roh sibuat buah anggur bam, seng tadingkononni age turiang. Anggo roh panangko borngin, parsedaonni ma domu hubani rosuhni.
- ¹⁰ Tongon, Ahu do na pasalang Esau, anjaha Ahu na patidak parponopanni; seng tarponopkonsi dirini. Magou do ginomparni ampa saninani ampa simbalogni; seng dong be sidea.
- ¹¹ Paturut ma dakdanakmu na tading maetek in, sihol do pagoluhon-Ku on; martenger ni uhur Bangku ma na mabalunima!
- ¹² Ai sonon do hata ni Jahowa, 'Tonggor ma, gari halak na so patut manginum panginuman in, minum do hunjin, mintor ho ma lang hona uhum? Seng tarbahen lang hona uhum ho, maningon inumonmu do.'
- ¹³ Ai domma marbulawan Ahu bani diring-Ku, nini Jahowa, ia Bosra maningon do gabe songgot-songgot, sipahirion, tarulang anjaha hona bura; anjaha sagala hutani maningon tarulang do lalab."
- ¹⁴ Domma hubogei barita humbani Jahowa, janah domma isuruh sahalak suruhan hu tongah-tongah ni bangsa-bangsa maningtingkon, "Marhumpul ma hanima anjaha dorab ma ia, bingkat ma hanima hu parmunsuhan!

¹⁵ Ai tonggor ma, paetekon-Ku do ho i
tongah-tongah ni bangsa-bangsa, mahiri i
tongah-tongah ni jolma.

¹⁶ Hagijangon ni uhurmu do paoto-otohon
ho ampa pangenjengon ni uhurmu, ho
ale na marianan ibagas liang ni dolog
batu, na markuasa bani buntu-buntu na
gijang. Age pe ibahen ho asarmu gijang
songon manuk-manuk nanggordaha,
dabuhkonon-Ku do ho hunjai, nini Jahowa.

¹⁷ Maningon gabe songgot-songgot do Edom;
ganup na mamontas hunjai maningon tarsonggot
do mangidah ai anjaha manrisai halani haganup
hasedaonni.

¹⁸ Songon sanggah parseda ni Sodom pakon
Gomora ampa dusun-dusunni, nini Jahowa, sonai
do seng dong be jolma marianan i Edom, seng
dong be halak na manginsolat ijai.

¹⁹ Tonggor ma, songon singa na tangkog hun
harangan ni Bah Jordan dampak sampalan,
sonai ma sompong pamerapon-Ku sidea hun
tanoh ai, anjaha halak na Hupilih pabangkiton-Ku
manggomgom ai. Ai ise ma na songon Ahu? Ise ma
siparhutuk Bangku? Ise ma parmahan na tahan
mandompakkon Ahu?

²⁰ Halani ai, tangihon ma sura-sura ni Jahowa
sidalankonon-Ni dampak Edom ampa pingkiran-Ni
pasal pangisi ni Teman: Tongon, ronsi na etek-etek

humbani biribiri ai, maningon saradon do; tongon, songgotan do sampalan ni sidea mangidah na masa bani sidea.

²¹ Halani sora ni pardabuh ni sidea dugur do tanoh on; tarbogei do doruh-doruh ni sidea ronsi laut arung.

²² Tonggor ma, songon manuk-manuk nanggordaha do ia naik anjaha habang; ipaherbang do habongni i atas ni Bosra, jadi songon uhur ni naboru na mangarou ma uhur ni halak siparporang na i Edom bani panorang ai.”

Lumba-lumba Pasal Parseda ni Damaskus

²³ Pasal Damaskus: Bador do Hamat ampa Arpad, ai barita hamagouan do ibogei sidea. Mandolei do uhur ni sidea halani biar, seng dong hasohan bani sidea.

²⁴ Mandolei do pangahap ni Damaskus, marhusor do ia sihol maporus, hasonggotan do sogop bani. Rusak ni uhur ampa na maborit do mangonai bani, songon naboru na mangarou.

²⁵ Hona tadingkon do huta na tarbarita ai, ianan parolob-oloban ai.

²⁶ Rasei do anak garama i alamanni, anjaha haganup halak siparmunsuh bois do bani panorang ai, nini Jahowa Zebaot.

27 Pagaraon-Ku do apuy bani tembok ni Damaskus, anjaha boiskononni do rumah-rumah ni si Benhadad.

Lumba-lumba Pasal Parseda ni Halak Arab

28 Pasal Kedar ampa harajaon-harajaon ni Hasor, na ipatunduk si Nebukadnesar, raja ni Babel: Sonon do hata ni Jahowa, “Jongjong ma, bingkat ma dompak Kedar! Patunduk ma bangsa na i hapoltakan

29 Maningon rampason do lampolampo ampa biribiri ni sidea, tenda ni sidea ampa haganup ugas-ugasni; maningon buaton do homa unta ni sidea, anjaha dilohononkon pasal sidea: Songgot-songgot do inggot.

30 Maporus ma, lintun ma podas, marponop ma bani liang-liang, ale pangisi ni Hasor, nini Jahowa. Ai adong do ranggian ni si Nebukadnesar, raja ni Babel, dompak hanima, adong do sura-sura sidalankononni bannima.

31 Jongjong ma, bingkat ma dompak sada bangsa na mardamei-damei, na marianan marsonang-sonang, nini Jahowa, na so pala marhorbangan atap maroruk-oruk, na marianan punjung.

32 Sirampason do unta ni sidea, anjaha hulanan ni pinahan ni sidea sitabanon do; paerapon-Ku do sidea bani haganup deisa, sidea ai, na

ilepong jambulanni inggot; parohon-Ku do hamagouan bani sidea humbani haganup ianan na inggot, nini Jahowa.

³³ Gabe ianan ni sorigala do Hasor, gabe halimisan lalab; sen dong be halak na marianan ijai, seng dong be jolma na manginsolat ijai.”

Lumba-Lumba asal parseda ni Elam

³⁴ On do hata ni Jahowa na roh hubani Nabi Jeremia pasal Elam, bani mungkah ni harajaon ni si Sedekia, raja ni Juda.

³⁵ Sonon do hata ni Jahowa Zebaot, “Tonggor ma, ponggolhonon-Ku do sior ni Elam, panguntu ni hagogohon ni sidea.

³⁶ Parohon-Ku do logou na ompat ai hu bani Elam, humbani deisa na ompat ni langit in, anjaha paerapon-Ku do sidea hubani deisa na ompat in, gabe seng dong be bangsa na so das hujai humbani halak Elam na merap ai.

³⁷ Gobir do bahenon-Ku uhur ni halak Elam i lobei ni munsuh ni sidea ampa i lobei ni halak na manguhurhon hosah ni sidea; parohon-Ku do hamagouan bani sidea, gajag ni ringis-Ku, nini Jahowa. Suruhon-Ku do porang mangayak sidea, paima bois sidea hubahen.

³⁸ Pajongjongon-Ku do paratas-Hu i Elam, anjaha boiskonon-Ku do raja-raja ni sidea ampa kopala-kopalani nini Jahowa.

³⁹ Tapi i pudi ni ari pasuangon-Ku do Elam, nini Jahowa.”

Lumba-lumba Pasal Parseda ni Babel ampa Parluah ni Israel

50 ¹ On do hata na hinatahon ni Jahowa pasal Babel ampa pasal tanoh ni halak Kasdim, marhitei Nabi Jeremia,

² “Pabotohkon ma i tongah-tongah ni bangsa-bangsa anjaha tingtingkon ma; pajongjong ma mandera partanda anjaha pabogei-hon ma; ulang ponopkon, tapi hatahon ma: Hona taban do Babel, tarbador do Bel, maropuk do Merodak. Bador do gana-ganani, maropuk naibata-naibatani.

³ Ai tangkog do dompaksi sada bangsa hun utara, na mambahen tanohni tarulang, gabe seng dong be na mangiankansi; maporus do jolma age pinahan.

⁴ Bani ari ai ampa bani panorang ai, nini Jahowa, Roh ma halak Israel rap pakon halak Juda, tangis-tangis sidea na roh ai; pindahan ni sidea do Jahowa, Naibata ni sidea.

⁵ Sungkun-sungkun do sidea bani dalan laho hu Sion, anjaha hujai do idompakkon

sidea, nini, 'Eta, parapat hita ma dirinta bani Jahowa, marhitei padan sisadokah ni dokahni, seng sihalupahononkon.'

⁶ Biri-biri na dob magou do bangsang-Ku; kahou do sidea ibahen parmahan ni sidea, iboan sidea manlembang hu pardologan; mampar do sidea hun dolog hu buntu-buntu, lupa do sidea bani harangni.

⁷ Ganup na jumpahan sidea mangankon sidea, anjaha munsuh ni sidea mangkatahon, 'Seng marsalah hanami ijai'; halani na mardousa do sidea dampak Jahowa, Parmahan na pintor in, anjaha pangarapan bani ompung ni sidea.

⁸ Maporus ma hanima hun tongah-tongah ni Babel anjaha luar ma hun tanoh ni halak Kasdim; songon biribiri tunggal ma hanima mardalan i lobei ni hulanan.

⁹ Ai tonggor ma, juljulon-Ku anjaha patangkogon-Ku do dampak Babel hulanan ni bangsa-bangsa na bangga, hun tanoh parutara; patitir do sidea mandorab huta ai, laho manaban ai. Ia panah ni sidea, songon panah ni siparmunsuh do, na totap monang, na so onga lumei mulak.

¹⁰ Maningon hona rampas do tanoh Kasdim; bosuran do sagala na manrampas ai, nini Jahowa.

- ¹¹ Age pe marolob-olob hanima, age pe marmalas ni uhur, ale sirampas parbagianan-Ku, age pe marinjak-injak hanima songon anak ni lombu bani sampalan, anjaha mariha-iha songon huda panjang,
- ¹² maningon bador tumang do inangnima, anjaha maila na mantubuhkan hanima. Tonggor ma, gabe sietekan do ia i tongah-tongah ni bangsa-bangsa, gabe halimisan, tanoh horah, anjaha tarulang.
- ¹³ Halani ringis ni Jahowa seng be ianonkon ai, gabe halimisan botul ma ai. Ganup na montas hun Babel, tarsonggot do anjaha mandoruni halani haganup hasedaonni ai.
- ¹⁴ Titir ma hanima inggot mamorang Babel, ale sagala sisintak sior. Tembak ma ia, ulang marrugi-rugi bani lingkit; halani na mardousa ai ia bani Jahowa.
- ¹⁵ Marsurak ma hanima inggot huta ai! Domma talu ia, mangkarumbak batar-batarni, anjaha maruntas tembokni. Pambalason humbani Jahowa do ai; mambalas ma hanima bani huta ai, bahen ma bani usih songon na dob binahenni.
- ¹⁶ Boiskon ma hun Babel halak sipartidah ampa halak sijolom sasabi sanggah pariama. Halani podang ni sipangodoh-odoh, ganup

do mulak hubani bangsani, anjaha ganup do maporus hu tanohni bei.

¹⁷ Biri-biri na mambur merap do Israel, na pinardakdak ni singa. Lobei raja ni Assur do na mangankonsi, dob ai si Nebukadnesar, raja ni Babel do na mangkilhili holi-holini.

¹⁸ Halani ai, sonon do hata ni Jahowa Zebaot, Naibata ni Israel, “Tonggor ma, marlulu do Ahu bani raja ni Babel ampa bani tanohni, songon na dob marlulu Ahu bani raja ni Assur.

¹⁹ Paulakon-Ku do Israel hubani sampalanni, manggagat ma ia use i Karmel ampa i Basan, anjaha bosur ma ia i Dolog Efraim ampa i Gilead.

²⁰ Bani ari ai pakon bani panorang ai, nini Jahowa, pindahan ni halak ma hajahaton ni Israel, hape seng dong jumpah, sonai age dousa ni Juda, hape seng dong dapot, ai sasapon-Ku do dousa ni halak na Hutadingi ai.

²¹ Tangkog ma dompak tanoh Merataim ampa dompak pangisi ni Pekod. Boiskon anjaha pamasab ma ginompar ni sidea, nini Jahowa; ‘Dalankon ma romban hubani na dob Huparentahkon.’

²² Sora ni hamunsuhon do i tanoh ai anjaha hasedaon bangga!

- 23 Irosakkon anjaha iponggolhon do parpalu ni haganup dunia on. Gabe songgot-songgot do Babel i tongah-tongah ni bangsa-bangsa.
- 24 Huta on do tirangkap bam, anjaha tartangkap do ho, ale Babel, seng ibagas botohmu. Dapot do ho anjaha tartangkap, halani imunsuhi ho Jahowa.
- 25 Ibuha Jahowa do rumah parsinjataan-Ni, anjaha ipadarat sinjata ni ringis-Ni; halani adong na sihol sidalankonon ni Naibata, Jahowa Zebaot, i tanoh ni halak Kasdim.
- 26 Roh ma mandorabsi humbani ganup ianan, untkab ma parbohalanni; pagugun ma ai songon luhutan, anjaha bois ma parseda ai, ulang dong na tading.
- 27 Bunuh ma sagala lombu jonggini, boban hu panayatan! Magou ma sidea, ai domma jumpah ari ni sidea, panorang pambalason bani sidea.
- 28 Boge! Sora ni halak na maporus ampa na maluah hun tanoh Babel, laho patugahkon hu Sion pambalason ni Jahowa, Naibatanta, pambalason halani rumah-Ni.
- 29 Dilo ma mangimbang Babel ai partembak, haganup halak sisintak sior. Hubu ma ia inggot; ulang paturut dong na maluah. Balaskon ma bani rombang hubani pambahenanni, bahen ma bani romban

hubani na hinorjahonni; ai mangenjeng do ia dompak Jahowa, Na ma pansing ni Israel.

³⁰ Halani ai maningon rasei do anak garamani bani alamanni, anjaha ripas haganup tentarani bani panorang ai, nini Jahowa.

³¹ Tonggor ma, Ahu do siimbang ho, ale sipangenjeng, nini Jahowa, Naibata Zebaot; Ai domma das arimu, panorangni Ahu mambalas bam.

³² Jiris anjaha targompang ma sipangenjeng ai, seng dong na manogusi, pagaraon-Ku do apuy bani huta-hutani, jadi panganonni do ganup na manginggotisi.

³³ Sonon do hata ni Jahowa Zebaot, 'Hona odoh-odoh do halak Israel rap pakon halak Juda; haganup na mambuankon sidea manjolomi sidea, manjua do sidea paluahkon sidea.'

³⁴ Tapi na gogoh do Sipaluah sidea; Jahowa Zebaot do goran-Ni. Ia do martinggilhon partinggilan ni sidea, laho mambahen marsonang-sonang tanoh in, tapi hitir-hitir ia pangisi ni Babel.

³⁵ 'Podang do na roh, nini Jahowa, bani halak Kasdim, bani pangisi ni Babel, bani kopala-kopala ni sidea ampa bani na pentar-pentar ni sidea.'

³⁶ Podang do na roh bani sipartondung, mambahen maoto sidea. Podang do na roh

bani puanglima ni sidea, mambahen galek sidea.

³⁷ Podang do na roh bani huda ni sidea ampa bani gareta ni sidea ampa bani haganup bala na legan na i tongah-tongah ni sidea, na mambahen songon naboru sidea; podang do na roh bani arta ni sidea, gabe hona rampas do ai.

³⁸ Podang do na roh bani bah ni sidea, gabe horah do ai. Ai tanoh ianan ni gana-gana do ai, anjaha gabe maoto do sidea halani gana-gana sipanonggoti ai.

³⁹ Halani ai, marianan ma i Babel binatang, sorigala ampa burung unta; seng dong be na mangiankon ai lalab, anjaha seng dong be jolma na marianan ijai.

⁴⁰ Songon sanggah parseda ni Sodom pakon Gomora ampa dusun-dusunni, nini Jahowa, sonai do seng dong be halak na marianan ijai, anjaha seng dong be jolma na manginsolat ijai.

⁴¹ Tonggor ma, roh do sada bangsa hun utara, sada bangsa na bangga, anjaha buei raja-raja bingkat humbani ujung ni tanoh on.

⁴² Mamboan sior ampa tanja do sidea; jahat do sidea, seng itanda holong ni uhur. Songon parhasak ni laut do sora ni sidea; marhuda do sidea roh, gopas marsinjata laho marmunsuh dampak ho ale boru Babel.

⁴³ Ibogei raja ni Babel ma barita ni sidea ai, gabe galek ma tanganni; biar do mandorabsi ampa na maborit songon parinangon na mangarou.

⁴⁴ Tonggor ma, songon singa na tangkog hun harangan ni bah Jordan, marayak sampalan, sonai ma sompong pamerapon-Ku sidea hun tanoh ai, anjaha halak na hupilih pabangkiton-Ku manggomgom ai. Ai ise ma na songon Ahu? Ise ma siparhutuk Bangku? Ise ma parmahan na tahan mandompakkon Ahu?

⁴⁵ Halani ai, tangihon ma sura-sura ni Jahowa, sidalankonon-Ni dampak Babel ampa pingkiran-Ni pasal tanoh ni halak Kasdim; tongon, ronsi na etek-etek humbani biribiri ai maningon saradon do. Tongon, songgotan do sampalan ni sidea mangidah na masa bani sidea.

⁴⁶ Halani sora na patugahkon partunduk ni Babel, dugur do tanoh on tarbogei do doruh-doruh ni sidea i tongah-tongah ni bangsa-bangsa.”

Sambat ni Lumba-lumba Pasal Hasedaon ni Babel ampa Parluah ni Israel

(ay. 15-19 pausih bd. 10:12-16)

51 ¹ Sonon do hata ni Jahowa, “Tonggor ma, papuhoon-Ku do tonduy na parsedahon dampak Babel ampa dampak pangisi ni Kasdim,

- ² anjaha paingkaton-Ku do hu Babel pamiari, na mamiari sidea, anjaha palumeion ni sidea do tanohni, sanggah na roh sidea inggot mangkubusi, bani ari hamagouan ai.
- ³ Ulang paturut parpanah manintak siorni, anjaha ulang ma paturut ia jongjong marbaju-baju partahanan; ulang lioi anak garama ni sidea, bois tumang ma bahen hanima balani haganup.
- ⁴ Maningon radag do sidea tarbunuh i tanoh ni halak Kasdim, anjaha tartikam bani alaman ni sidea.
- ⁵ Tapi seng lalab mabalu Israel pakon Juda ipaturut Naibata ni sidea, Jahowa Zebaot; ai gok hasalahan do tanoh ni halak Kasdim dompak Na Ma Pansing ni Israel.
- ⁶ Maporus ma hanima hun tongah-tongah ni Babel, anjaha marsipaluah dirini bei ma, ase ulang bois hanima bani panguhumon na bani ai. Ai panorang pambalason ni Jahowa do ai, laho mambalaskon domu hubani pambahenan ni sidea.
- ⁷ Panginuman omas do Babel ibagas tangan ni Jahowa, laho mambahen mabuk ganup tanoh on. Minum do sagala bangsa humbani anggurni, halani ai ratou do bangsa-bangsa.

- ⁸ Sompong do marumbak Babel anjaha marosak; tangisi ma ia! Buat ma minak bani ugahni, ra boi ope malum ia.
- ⁹ Sihol pamalumonnami do Babel, hape seng tartambari be. Tadingkon ma ia, laho ma hita ganup hu tanohni bei, ai das ronsi langit do uhum na bani ai, sundol ronsi hombun.
- ¹⁰ Ipatalar Jahowa do hapintoronnami. Eta, baritahon hita ma i Sion pambahenan ni Jahowa, Naibatanta.
- ¹¹ Aroti ma panah! Buat ma gantar! Ipuhoi Jahowa do tonduy ni raja-raja ni Madai, ai dompak Babel do uhur-Ni laho mangagou ai; pambalason ni Jahowa do ai, pambalason halani rumah-Ni.
- ¹² Pajongjong ma mandera partanda manlawan tembok ni Babel. Pangkei ma marjaga-jaga; suruh ma siparjaga; suruh ma sipangonggopi! Ai Jahowa do na marranggihon ampa mandalankon na nilumbahon-Ni pasal pangisi ni Babel.
- ¹³ Ho ale na marianan i lambung ni bah bangga, pararta na mabuei, jumpah ma ajalmu, rotapon ma hosahmu.”
- ¹⁴ Domma marbulawan Jahowa Zebaot bani diri-Ni, “Tongon, gok do bahenon-Ku ho bani jolma, songon balang bueini,

marsurak-surak hamonangan do sidea
dompok ho.

- ¹⁵ Ia do na manjadihon tanoh on marhitei
gogoh-Ni, Ia do na pajonamkon dunia on
marhitei hapentaran-Ni; anjaha marhitei
habotohon-Ni ipaherbang do langit.
- ¹⁶ Anggo ipabogei hon sora-Ni marhasak ma bah
ni langit, anjaha naik do hambun marhitei
parentah-Ni humbani ujung ni tanoh on;
hilap do ibahen parohkon udan, anjaha
ipaluar do logou hun ianan panimpananni.
- ¹⁷ Bodoh do ganup jolma, seng marpangartian;
bador do ganup tukang omas ibahen
gana-ganani; ai sipaoto-oto do gana-ganani
anjaha seng marhosah.
- ¹⁸ Na lang do ai, horja na pakahouhon; magou do
ganupan ai bani panorang pambalason bani
sidea.
- ¹⁹ Seng sonai rupei ni si Jakob, ai Ia do na
manjadihon sagala na dong, anjaha Israel
do marga parbagianan-Ni, Jahowa Zebaot
do goran-Ni.
- ²⁰ Ho do parpalu Bangku, ale Babel, sinjata hu
parmunsuhan; Huropuki do bangsa-bangsa
marhitei ho, Huparseda harajaon-harajaon.
- ²¹ Huropuki do huda pakon na mangajaksi
marhitei ho, garet a porang ampa
sipargareta porang.

- 22 Huropuki do dalahi pakon naboru marhitei ho, na matua age na maposo, garama age anak boru.
- 23 Huropuki do parmahan ampa hulananni marhitei ho, parjuma ampa horbou paninggalani, raja-raja ampa kopala-kopala.
- 24 Tapi balaskonon-Ku do bani Babel pakon bani haganup pangisi ni Kasdim i lobei ni panonggornima, haganup hajahaton ni sidea, na binahen ni sidea bani Sion, nini Jahowa.
- 25 Tonggor ma, Ahu do siimbang ho, ale dolog sipangagou, nini Jahowa, ho ma siagou ganup tanoh on; pagostongon-Ku do tangan-Ku dompak ho, anjaha gulangkonon-Ku do ho humbani dolog batu, anjaha bahenon-Ku do ho gabe dolog na tinutung.
- 26 Seng be tarbuat humbam batu gabe batu parsuhi atap batu onjolan; tapi halong ma ho lalab, nini Jahowa.
- 27 Pajongjong ma mandera partanda i tanoh on, sompul ma tarompit i tongah-tongah ni bangsa-bangsa; pasirsir ma bangsa-bangsa marporang dompaksi, dilo ma harajaon-harajaon mangimbangsi, Harajaon Ararat, Minni pakon Askenas! Pabangkit ma puanglima mangimbangsi, boan ma huda songon balang bueini!

- 28 Pasirsir ma bangsa-bangsa mandorabsi, raja-raja ni Madai, rap pakon kopala-kopalani ampa pambobaini ronsi ganup nagori jajahanni ai.
- 29 Dugur do tanoh in anjaha hitir-hitir, ai saud do sura-sura ni Jahowa pasal Babel, laho mambahen tanoh Babel gabe halimisan, seng dong na mangiankon.
- 30 Iparonthon puanglima ni Babel do marporang, soh do sidea ibagas bentengni; mintop do habaranion ni sidea, gabe songon naboru do sidea; gajag do ianan ni sidea, mangkaponggol oruk-orukni.
- 31 Marodor do suruhan roh, sonai age siboan barita, laho patugahkon bani raja ni Babel, na dob hona taban hutani inggot;
- 32 hona soluk do pandiparan, hona tutung partahanan, anjaha gok biar tentara.
- 33 Ai sonon do hata ni Jahowa, Naibata ni Israel, 'Doskon pardogeian na niluntak-luntak do boru Babel; tongkin nari, roh ma panorang parpariamaon bani.'
- 34 Ipangan si Nebukadnesar, raja ni Babel do ahu, irosaki do ahu; ibahen do ahu gabe hudon na lumei, ipolgap do ahu songon pambahen ni naga, igoki do boltokni marhitei na mantin-mantin, na adong bangku; hona usir do ahu ibahen,

- 35 Sai sogop ma bani Babel odoh-odoh
na binahenni hu bangku ampa bani
sindohorhu, sonai ma ihatahon pangisi ni
Sion. Marsapata hubani pangisi ni Kasdim
ma darohku, sonai ma ihatahon Jerusalem.
- 36 Halani ai sonon do hata ni Jahowa,
'Tonggor ma, Ahu pe na mantinggilhon
paringoranmu, anjaha na mambalaskon
ho.' Pahorahon-Ku do lautni, anjaha marsik
bahenon-Ku parigini.
- 37 Gabe timbunan batu do Babel, ianan ni
sorigala, gabe songgot-songgot anjaha
sipahirion, seng marpangisi.
- 38 Rap maraum do sidea songon singa anjaha
mangorong songon anak ni singa.
- 39 Sanggah na hisapan sidea, pasirsiron-Ku do
pesta bani sidea, pamabukon-Ku do sidea
gabe galek lanjar tarpodom lalab anjaha
seng puho be, nini Jahowa.
- 40 Patuadon-Ku do sidea songon anak ni biribiri
hu panayatan songon biribiri tunggal pakon
hambing tunggal.
- 41 Tartaban do Babel, tartangkap na marmulia
i sab tanoh on; gabe songgot-songgot do
Babel i tongah-tongah ni bangsa-bangsa.
- 42 Hona rungkub do Babel ibahen laut, parhasak
ni gilumbangni do manutup ai.

- 43 Gabe halimisan do huta-hutani, gabe tanoh dorging anjaha lungun, seng dong marpangisi, seng dong jolma na montas hunjai.
- 44 Marlulu do Ahu bani Bel na i Babel, anjaha dokdokon-Ku hun babahni, na dob pinolgapni. Seng be marurup bangsa-bangsa roh hu bani, domma marumbak tembok ni Babel.
- 45 Haluar ma hun tongah-tongahni, ale bangsang-Ku! Ganup ma paluahkon hosahni humbani gajag ni ringis ni Jahowa.
- 46 Ulang rusak uhornima ulang mabiar manangar barita i tanoh in, sanggah na roh barita tahun on, roh use barita bani tahun na sada nari, sanggah na masa odoh-odoh i tanoh in, marsipatundukan siparkuasa.
- 47 Halani ai, tonggor ma, roh ma panorang ni pambalason-Ku bani gana-gana ni Babel, bador ma ganup tanohni, anjaha radag do i tongah-tongahni sagala halakni na tarbunuh.
- 48 Jadi marsurak-surak ma mangidah Babel, langit pakon tanoh ampa ganup isini, ai roh do sipangagou mandorab sidea, hun utara, nini Jahowa.
- 49 Maningon tompas do Babel, halani na tarbunuh hun Israel, usih songon na rasei halak i sab tanoh on i lobei ni Babel.

⁵⁰ Hanima na maluah humbani podang, bingkat ma, ulang soh! Paingat-ingat ma Jahowa humbani na daoh, anjaha siholan ma hanima bani Jerusalem.

⁵¹ Bador do hanami, ai ibogei-bogei hanami do risa-risa; habadoron do marrungkub bohinami, ai masuk do halak na legan hubagas ianan na pansing na i rumah ni Jahowa.

⁵² Halani ai, tonggor ma, na roh ma panorangni, nini Jahowa, marbalas ma Ahu dompak ganagana ni sidea, anjaha bani sab tanoh ni sidea morong-orong do halak na ughan.

⁵³ Porini pe naik Babel das hu langit, anjaha age pe ipatoguh tembok na gijang ai, tapi parohon-Ku do sipangagou mangimbangi, nini Jahowa.

⁵⁴ Tangar ma! Doruh-doruh hun Babel ampa hataluon bangga hun tanoh ni halak Kasdim!

⁵⁵ Ai Jahowa do na parsedahon Babel anjaha ipasip hariahonni na bangga ai. Marhasak do gilumbangni songon bah bangga, anjaha maraloling do sora ni dilo-dilo ni sidea,

⁵⁶ ai sipangagou do na roh bani Babel; hona tangkap do puanglimani, iparponggol do sior ni sidea; ai Jahowa, Naibata sipambalas, Ia do marlulu bani sidea.

⁵⁷ Pamabukon-Ku do raja-rajani, na pentar-pentarni, kopala-kopalani, pambobaini ampa balani; tarpodom ma sidea lalab, seng puho be, nini Raja in, na margoran Jahowa Zebaot.

⁵⁸ Sonon do hata ni Jahowa Zebaot, ‘Tembok ni Babel na bolag ai, padosdoson do bani tanoh, anjaha horbanganni na gijang ai tutungon do bani apuy.’ Sisoya-soya do jolma mangkorja, anjaha apuy do na mangankon na hinalojahon ni bangsa-bangsa.”

⁵⁹ On do hata na tinonahkon ni Nabi Jeremia bani si Seraya, anak ni si Neriya, anak ni si Maaseya, sanggah na laho ia rap pakon si Sedekia, raja ni Juda, hu Babel, paompat-tahunkon, dob raja ia. Si Seraya do kopala ni kohoman.

⁶⁰ Domma isuratkon si Jeremia hinan bani sada buku sagala hasedaon siparohon hu Babel, ai ma haganup hata on, na isuratkon pasal Babel.

⁶¹ Nini si Jeremia do dompak si Seraya, “Anggo das ho hu Babel, sarihon ma ase ibasahon ho ganup hata on,

⁶² anjaha hatahon ma, ‘Ham Jahowa, Ham do marsahap pasal ianan on sihol mamboiskon in, ase ulang dong be na marianan ijin, jolma age pinahan, maningon gabe halimisan do in lalab.’

⁶³ Siapkonsi ibasa ho buku on, rahutkon ma batu hujin, anjaha gijigkon ma in hu Bah Eprat,

⁶⁴ anjaha hatahon ma, ‘Sonai do manongnong Babel, anjaha seng mulgap be, ibahen hasedaon siparohon-Ku bani.’” Singgan jai ma hata ni si Jeremia.

Parseda ni Jerusalem ampa Pambuangan na hu Babel

(ay. 31-34 pausih 2 Raj. 25:27-30)

52¹ Marumur dua puluh sada tahun do si Sedekia, sanggah bangkit ia gabe raja, anjaha sapuluh sada tahun do ia mamarentah i Jerusalem. Goran ni inangni, ai ma si Hamutal, boru ni si Jeremia, na hun Libna.

² Ihorjahon do sogam ni uhur ni Jahowa, usih songon na binahen ni si Joyakim.

³ Ai halani ringis ni Jahowa do ase masa sonai hu Jerusalem ampa hu Juda, gabe iusir sidea hun lobei ni bohi-Ni. Dob ai marbalik ma Raja Sedekia mangimbang Raja Babel.

⁴ Anjaha pasiah-tahunkon dob raja ia, bani bulan sapuluh, ari sapuluh roh ma si Nebukadnesar, raja ni Babel, rap pakon ganup tentarani mandorab Jerusalem; ihubu sidea ma huta ai, anjaha ibahen batar-batar inggot.

⁵ Jadi tarhubu ma huta ai das ronsi pasapuluhsada-tahunkon, dob raja si Sedekia.

⁶ Paompatbulankon ari siah, masa ma lohei maningting i huta ai, seng dong be sipanganon bani bangsa parnagori ai.

⁷ Dob ai ibuha ma sada dalan halopusan ibagas tembok ni huta ai; maporus ma raja ai ampa haganup siparmunsuh borngin-borngin hun

horbangan, na i holangkolang ni tembok na dua ai, na dohor bani pohon ni raja ai; tapi ihubu halak Kasdim do huta ai inggot. Laho ma sidea dompak Arabah.

⁸ Tapi iayak tentara ni halak Kasdim ma raja ai, jadi dapot ma si Sedekia i pamah ni Jeriko, anjaha ganup tentarani ai merap ma hun lambungni.

⁹ Itangkap sidea ma raja ai anjaha iboan ma ia tangkog mangadap raja ni Babel hu Ribla, na i tanoh Hamat, lanjar idabuh ma uhum bani.

¹⁰ Ibunuh raja ni Babel ma anak ni si Sedekia i lobei ni matani, anjaha ibunuh do homa haganup kopala-kopala ni Juda i Ribla.

¹¹ Ipadarat do mata ni si Sedekia haduasi anjaha irantei ma ia bani rantei tombaga, anjaha iboan raja ni Babel ma ia hu Babel, lanjar inahkon hubagas tutupan ronsi ari parmateini.

¹² Bani bulan lima, ari sepuluh, ai ma pasapuluhsiah-tahunkon dob raja si Nebukadnesar, raja ni Babel, roh ma hu Jerusalem si Nebusaradan, kopala ni papanriah-riah parriah-riahngawal, siparugas i lobei ni raja ni Babel.

¹³ Itutung ma rumah ni Jahowa, rumah ni raja ai ampa haganup rumah-rumah na i Jerusalem; itutung do haganup rumah na bangga-banggal.

¹⁴ Iparseda haganup tentara ni halak Kasdim, hasoman ni kopala ni pangawal ai ma haganup tembok ai, inggot Jerusalem.

¹⁵ Deba humbani halak na masombuh ni bangsa ai ampa teba-teba ni bangsa ai, na tading ibagas huta ai ampa na marbalik hu bani raja ni Babel ampa halak na tading humbani tuhang, iboan si Nebusaradan, kopala ni pangawal ai do hu habuangan.

¹⁶ Tapi deba humbani halak sisombuhan i nagori ai, itadingkon si Nebusaradan, kopala ni pangawal do, laho mangkorjai pohon anggur pakon juma.

¹⁷ Ia tiang tombaga, na bani rumah ni Jahowa pakon sagala onjolan ampa bongbongan tombaga, na i rumah ni Jahowa iparseda halak Kasdim do, anjaha tombaga ai iboan do ganup hu Babel.

¹⁸ Ibuat sidea do hudon, sonduk, raot, batil ampa haganup parugas tombaga, na pinakei marugas i rumah panumbahan;

¹⁹ sonai homa sagala mangkuk, balanga parapuyan, mangkuk pamispisan, hudon, parsuluhan, batil ampa sambung, haganup na humbani omas ampa na humbani pirak, ibuat kopala ni pangawal ai do.

²⁰ Tiang na dua ai, bongbongan na sada ai ampa na sapuluh dua lembu tombaga, na i toruh ni bongbongan tombaga ai, ampa onjolan ai, na pinauli ni Raja Salomo bani rumah ni Jahowa, sabonar na so tartimbang do buei ni tombaga ni ganup parugas ai.

²¹ Sapuluh ualuh asta do gijang ni sada tiang, anjaha lilitni sapuluh dua asta, hapalni ompat jari anjaha marruang do ai.

²² I atas tiang ai adong do uluni humbani tombaga; lima asta do gijangni. Adong do jala-jala ampa buah ni dalima inggot ulu ni tiang ai, haganup humbani tombaga; usih do hujai tiang na paduahon ai, ampa buah dalimani.

²³ Siah puluh onom kamata do buei ni buah dalima ai margantungan. Haganup saratus kamata do buah ni dalima, ai ma na bani jala-jala ai inggot.

²⁴ Anjaha iboan kopala ni pangawal ai do si Seraya, sintua ni malim ai, ampa si Sepanya, malim paidua ai, ampa sijaga labah sitolu halak ai.

²⁵ Anjaha iboan do homa hun huta ai sada siparpangkat, ai ma na mangopalai halak siparmunsuh ampa pitu halak hasoman sapanriah ni raja ai, na jumpah ibagas huta ai, ampa jurutulis ni kopala ni tentara ai, na marhara parnagori ai jadi tentara, ambahni ai onom puluh halak humbani bangsa parnagori ai, na jumpah ibagas huta ai.

²⁶ Iboan si Nebusaradan, kopala ni pangawal ai ma sidea hu Ribla, hu lobei ni raja ni Babel.

²⁷ Ihatahon raja ni Babel ma sidea bogbogan matei i Ribla, i tanoh Hamat. Sonai ma parbuang ni Juda hun tanohni.

²⁸ In ma buei ni bilangan ni bangsa, na binoan ni si Nebukadnesar hu habuangan: Bani pasapuluhpitu-

tahunkon tolu ribu dua puluh tolu halak bangsa Juda.

²⁹ pasapuluhualuh-tahunkon dob raja si Nebukadnesar, iboan do hun Jerusalem ualuh ratus tolu puluh dua halak;

³⁰ dua puluh tolu tahun dob raja si Nebukadnesar, ibuang si Nebusaradan, kopala ni pangawal ai do pitu ratus ompat puluh lima halak Juda; tumpu haganup: ompat ribu onom ratus halak.

³¹ Tapi patolupuluhpitu-tahunkon dob tarbuang si Joyakin, raja ni Juda, ari dua puluh lima bulan sapuluh dua, iidopi si Ewil-Merodak, raja ni Babel ma si Joyakin, raja ni Juda; bani tahun parlobei dob raja ia ipadarat ma ia hun tutupan.

³² Basar do ia marsahap pakonsi, anjaha gijangan do ibahen hundulanni marimbang raja-raja na rap pakonsi i Babel.

³³ Bulih do ia mananggali pakeian tutupanni ai, anjaha sapanganan do ia tongtong rap pakon raja ai, sadokah manggoluh ia.

³⁴ Anjaha siap arian do ibere Raja Babel bani bohalmi, songon na dob tinotapkon bani, barang sadiha na porlu bani, sadokah manggoluh ia das hubani na rotap hosahni.

Tangis-tangis

Tarulang Jerusalem, Seng dong na Mangayakisi

- 1** ¹ Aih, lungunni in hundul huta in, sonin riahni hinan! Gabe doskon na mabalu do ia, na timbul hinan i tongah-tongah ni bangsa-bangsa! Na manggomgomi nagori-nagori hinan, hape gabe sibere sohei.
- ² Sai tangis-tangis do ia borngin, humaridei iluhni bani huyumni; seng dong humbani na mangkaholongisi na mangapohisi, marbalik do ganup hasomanni, gabe munsuh do sidea bani.
- ³ Tarbuang do Juda halani pangarsik-arsikon ampa halani parjabolonon. Marianan do ia nuan i tongah-tongah ni bangsa-bangsa, seng jumpahsi parsaranan; Haganup na mangayak-ayaksi manjumpahisi bani na tarsosak ia.
- ⁴ Marhoru do dalan laho hu Sion, halani seng dong halak na roh marpesta; lungun do haganup horbanganni, marhoih malim-malimni; pusok do uhur ni anak boruni, anjaha ia sandiri paet pangahapanni.

- ⁵ Imbangni do gabe pangopalai bani, mardohar do munsuhni, halani ibahen Jahowa ia marsitaronon binahen ni buei ni hajahatonni; misir do ganup niombahni, hona tangkap i lobei ni imbangni.
- ⁶ Laho do humbani boru Sion ganup hamuliaonni, songon ura na so dapotan gagaton do kopala-kopalani; mandatei do sidea mardalan i lobei ni na mardakdaksi.
- ⁷ Taringat do Jerusalem bani panorang hadoyukonni ampa hamarsikonni, bani ganup hamuliaonni na adong bani humbani na basaia. Sanggah madabuh bangsani hubagas tangan ni munsuhni, anjaha seng dong pangurupi bani, mangkawah do munsuhni bani anjaha mandoruni halani parboisni.
- ⁸ Banggal tumang do dousa ni Jerusalem, halani ai do ase hagigi ia. Haganup na pasangapkonni pahirihonsi, halani iidah sidea hailaonni; anggo ia marhoih do anjaha ipadaoh bohini.
- ⁹ Longkot do habutakonni bani rambu ni hiouni, seng ipingkirhon pasal ujungni; bagas do hadabuhanni, seng dong na mangapohisi. Tatap Ham ma ale Jahowa hadoyukonkin, ai mangenjeng do munsuhku.
- ¹⁰ Idurdurhon munsuh do tanganni dompak arta-arta na maharga ijai; tongon, iidah

do parbegu masuk hubagas ianan-Ni
na mapansing ai, ai ma sidea na dob
nilarang-Mu, ase ulang masuk sidea bani
kuria-Mu.

- ¹¹ Haganup bangsani marhoih mangindahi
sipanganon, ibere sidea do ugas-ugasni
halani sipanganon laho mangudut hosahni.
“Tonggor Ham ma, ale Jahowa kawahkon
Ham ma, sonaha hiri ni ahu!
- ¹² Roh ma nasiam sagala pamontas! Kawahkon
anjaha tonggor ma, atap dong do sitaronon
na songon sitaronon na sogop bangku
on, na pinaroh ni Jahowa bani panorang
pargajag ni ringis-Ni.
- ¹³ Humbabou do isuruh apuy, das hubani
holi-holingku do masuk ai. Itaon do jarot
i lobei ni naheihu; itarik do ahu hupudi;
ibahen do ahu marhahurangan, boritan
lalab.
- ¹⁴ Borat do pasangan ni dousangkai bangku, na
isangkutkon Jahowa marhitei tangan-Ni;
inahkon do ai bani tangkuhukku, bois do
gogohku ibahen; iondoskon Tuhan do ahu
hubagas tangan ni halak na so tarimbang
ahu.
- ¹⁵ Ilotloti Tuhan do sagala siparkuasa na i
tongah-tongahku; idilo do sada humpulan
mangimbang ahu, laho manropuki garama

na adong bangku. Irojati Tuhan do anak boru, boru Juda songon bani pangilangan anggur.

¹⁶ Tangis do ahu halani ai, marabur-abur iluh do matangku; ai daoh do humbangku na boi mangapoh ahu, na pasabou uhurhu. Bois do anakku, halani monang munsuh.

¹⁷ Ipaherbang Sion do tanganni, tapi seng dong na mangapohi. Iparentahkon Jahowa do dompak Jakob, simbalogni gabe imbangni, gabe hagigi do Jerusalem i tongah-tongah ni sidea.

¹⁸ Pintor do anggo Jahowa, ai hulawan do hatani; tapi tonggor ma, ale sagala bangsa, idah ma sitarononkin! Tarboan do hu habuangan anak boru ampa garama na dong bangku.

¹⁹ Dilo-dilo do ahu bani na mangkaholongi ahu, tapi itipu sidea do ahu. Malim-malim ampa pangintuaingku ibagas huta in marmateian do; tongon, pindah-pindah do sidea bani sipanganon, tapi seng jumpah sidea.

²⁰ Tonggor Ham ma, ale Jahowa, sonaha sosakku; lutu do tonduyhu ibagas, anjaha rusak do uhurhu, halani manlawan ahu; podang do na mamunuhi i darat, sampar ibagas rumah.

²¹ Tonggor Ham ma hoih-hoihku, seng dong na mangapoh ahu. Haganup munsuhku manangar parsedangku; megah do sidea

halani sonai ibahen Ham bangku. Paroh Ham ma ari na dob nilumbahon-Mu, ase masa bani sidea songon na masa bangku.

²² Sai das ma hu lobei-Mu haganup hajahaton ni sidea, anjaha bahen Ham bani sidea songon na binahen-Mu hu bangku, halani haganup panlanggaronku; tongon buei do hoih-hoihku, anjaha mandatei do uhurhu.”

Jahowa do na Palopaskon Masa Hasedaon bani Bangsa-Ni

2 ¹ Aih, irungkub Tuhan do bani hambun boru Sion halani ringis-Ni. Isampakkon Tuhan do hun langit hu tanoh hamuliaon ni Israel, seng idingat sidogeian ni nahei-Ni bani ari panggila-Ni.

² Iparseda Tuhan do, seng maralang-alang, haganup ianan ni Jakob; anjaha iparreong do ibagas gila-Ni benteng-benteng ni boru Juda; isampakkon do hu tanoh, ipabutak do harajaon ai pakon raja-rajani.

³ Ipongghon do ibagas pargajag ni gila-Ni haganup kuasa ni Israel; itarik do humbani sidea tangan siamun-Ni bani parroh ni munsuh ni sidea; gajag do la i tongah-tongah ni Jakob songon apuy na mangankon inggot.

⁴ Isintak do sior-Ni songon munsuh, iondamkon tangan siamun-Ni; songon imbang do la

mambunuh haganup na hinarosuhkon ni mata-Ni, iuseihon do ibagas lampolampo ni boru Sion ringisni na songon apuy ai.

- ⁵ Gabe doskon munsuh do Tuhan, ibondut do Israel ganup; iparseda do haganup istanani, iparreong benteng-bentengni; mardapot-dapot do ibahen sitaronon ampa pusok ni uhur bani boru ni Juda.
- ⁶ Idogei-dogei do lampolamponi songon juma, iparseda ianan parpestaan bani. Maronti do ibahen Jahowa i Sion pesta ampa ari Sabat, anjaha iambukkon raja ampa malim ibagas gila-Ni.
- ⁷ Iambukkon Tuhan do anjapanjapni, magigi uhurni bani iananni na mapansing in; iondoskon do hubagas tangan ni munsuh tembok ni istana-istana; tarbogei do ibagas rumah ni Jahowa surak-surak ni sidea songon bani ari pesta.
- ⁸ Domma isurahon Jahowa sihol parsedahon tembok ni boru Sion; isibari do marhitei tali sibar-sibar, anjaha seng iambat tanganni laho mansedahon; ipaturut do marhoru batar-batar ampa tembokni, rap do ai marsorak.
- ⁹ Tinob do hubagas tanoh horbanganni, iparseda anjaha iparpongol do oruk-orukni; rajani pakon kopala-kopala i tongah-tongah ni

parbegu do; seng dong be titah anjaha nabi pe seng dapotan pangungkabon be humbani Jahowa.

¹⁰ Sip do hundul i tanoh pangintuai ni boru Sion, inahkon abuan bani uluni, anjaha isorongkon hiou guni; unduk do hu tanoh ulu ni anak boru ni Jerusalem.

¹¹ Marholok do matangku ibahen tangisku, lutu do huahap ibagas; usei do hu tanoh uhurhu parbagas ai halani parbois ni boru ni bangsangku; ai mandatei do dakdanak pakon na inuman i dalan-dalan.

¹² Ihatahon bani inang ni sidea: Ija do indahan pakon anggur? sanggah na mandatei sidea songon halak na ugahan i dalan-dalan ni huta in, bani na laho rotap hosahni sidea ibagas abingan ni inangni.

¹³ Aha ma hatahononku bani, bani aha ma umpamahononku ho, ale boru Jerusalem? Aha ma pausihonku bam laho mangapoh ho, ale anak boru, boru Sion? Ai songon bolag ni laut do hasedaonmu, ise ma na boi pamalum ho?

¹⁴ Nabi-nabimu ijahai hubam ladung pakon tipu; seng ipatar sidea salahmu laho pasuangkon ho, tapi ipajahahon do bam panonggoran ladung ampa na pakahouhon.

- 15 Martopap tangan do pasal ho sagala sipamontas, mandoruni anjaha iupir-upirhon uluni bani boru Jerusalem: Ai on do huta na ginoran ai, na tang sijengesan anjaha olob-olob ni ganup dunia on?
- 16 Ipangangang sagala munsuhmu do babahni dompak ho, mandoruni anjaha harat-harat ipon do sidea, nini: Domma maseda ia ibahen hanami. Tongon on ma ari na sinurahonnami; domma jumpah hanami, domma iidah hanami.
- 17 Ipasaud Jahowa do na sinurahon-Ni, idalankon do lumba-lumba-Ni; songon na dob hinatahon-Ni sapari, iboiskon do ai seng maralang-alang. Ibahen do munsuh ai marmalas ni uhur mangidah ho, anjaha ipatimbul do kuasa ni imbangmu.
- 18 Dilo-dilo ma ho bani Tuhan in! Tangis ma ho ale boru Sion. Paturut ma iluhmu mabaor songon bah arian pakon borngin, ulang ma ho marsaran, ulang pasohkon matamu.
- 19 Jongjong ma, tangis ma ho borngin, sanggah mulai panorang marjaga; useihon ma uhurmu songon bah i lobei ni Tuhan, paherbang ma tanganmu martonggo Bani pasal goluh ni niombahmu, na mandatei halani lohei i topi ni ganup dalan.

- ²⁰ Tonggor ma, ale Jahowa, anjaha kawahkon Ham ma! Bani ise onnga ibahen Ham sonai? Mase ma panganon ni parinangon ginomparni, dakdanak na pinagodang-godangni? Mase ma hona bunuh malim pakon nabi bani ianan na mapansing ni Tuhan?
- ²¹ Radag do bani orbuk ni dalan-dalan dakdanak age na matua, rasei do ibahen podang anak boru ampa garama; ibunuh Ham do sidea bani panorang ni gila-Mu, isayati Ham do sidea seng maralang-alang.
- ²² Iontang Ham do na manonggoti ahu liot, songon na laho marpesta, seng dong na maluah atap na bansah bani ari parringis ni Jahowa. Sidea na huombah-ombah ampa na hupagodang-godang, bois do ibahen munsuhku.

**Adong do Haluahon humbani Jahowa
halani Hinabuei ni Idop ni Uhur-Ni**

- 3** ¹ Ahu ma sada halak na dihut mangahapkon na maborit marhitei pukul-pukul ni ringisni.
- ² lalai anjaha itogu do ahu bani na golap, na so dong sinalsal.
- ³ Tongon sai dampak ahu do itujuhon tanganni, marnunut-nunut layur ari.

- ⁴ Royut do ibahen angkulangku pakon
hulingkulingku, anjaha iparpongol
holi-holingku.
- ⁵ Ipajunjun do dampak ahu inggot na mapaet
ampa hasunsahan.
- ⁶ Ibahen do ahu marianan ibagas hagolapan
songon halak na dob dokah matei.
- ⁷ Ibahen do tembok inggot bangku, seng
tarbahen maluah ahu; inahkon do bangku
gari na borat.
- ⁸ Porini pe dilo-dilo anjaha mangelek-elek ahu,
seng hona tangihon tonggongku.
- ⁹ Irungga do dalanku marhitei batu na niongal,
marlegot-legot do ibahen dalanku.
- ¹⁰ Songon gipul na manggompangi do la bangku,
songon singa na marponop.
- ¹¹ Itogu do ahu dampak dalan na kahou,
iparsilbak ahu, ibahen do ahu tarpunjung.
- ¹² Isintak do siorni, anjaha ipajongjong do ahu
songon sasaran ni panahni.
- ¹³ Ibahen do tolpus ronsi piah-piahku, lingkit ni
parlingkitanni.
- ¹⁴ Gabe sipartatawaan do ahu bani ganup
bangsangu, gabe sidoding-dodingkonon ni
sidea ganup ari.
- ¹⁵ Ibosuri do ahu bani na mapaet, ipainum do
bangku raru.

- 16 Ipaharatkon do bangku batu loting, ipaksahon do ahu masuk hubagas orbuk.
- 17 Ipadaoh do tonduyhu humbani hadameion, gabe lupa ahu bani na madear.
- 18 Jadi ningku ma: Salpu do hamuliaonku, pangarapanku bani Jahowa.
- 19 Mardingat bani sitaronon ampa hasunsahanku, pogu ampa rasun do ai bangku.
- 20 Tongtong mardingat hujai, gabe unduk do tonduyhu ibagas.
- 21 On do tong huparimbagaskon, halani ai do ase marpangarapan ahu:
- 22 Idop ni uhur ni Jahowa do na so ra marpunsa, seng marnarotap holong ni atei-Ni.
- 23 Mulak ratah do ai siap sogod, bangga do habonaron-Mu.
- 24 Jahowa do rupei hu, nini tonduyhu, halani ai Bani do ahu marpangarapan.
- 25 Pardear layak do Jahowa bani halak na martenger ni uhur Bani, bani tonduy na mangindahisi.
- 26 Dear do sipsip marpangarapan bani hatuahon na humbani Jahowa.
- 27 Dear do sada halak anggo mangusung pasangan ia sanggah poso.
- 28 Punjung ma ia hundul anjaha sip, anggo itampeihon Tuhan ai bani.

- 29 Ipadohor ma bani orbuk pamanganni, andohar
dong ope pangarapan.
- 30 Itarehon ma huyumni bani halak sipanompas,
ronsi bosur ia bani pandorunion.
- 31 Ai seng ra Tuhan in mangambukkon halak ronsi
sadokah ni dokahni.
- 32 Ai age pe domma marhoru ibahen, holong do
use uhur-Ni romban hubani hinabuei ni idop
ni uhur-Ni,
- 33 ai sedo halani rosuh-Ni, ase iarsik anjaha
ipusoki uhur ni anak ni jolma.
- 34 Mandogei-dogei halak na tartutup i tanoh on,
35 papeletkon hak ni halak i lobei ni Sitimbulan in,
36 mangodoh halak bani parkarani, ai seng
kawahkonon ni Tuhan ai?
- 37 Ise ma, na marsahap gabe jadi ai, anggo sedo
Tuhan na mamarentahkon?
- 38 Ai lang humbani pamangan ni Sitimbulan in do
luar hamagouan ampa hatuahon?
- 39 Mase marungut-ungut jolma na manggoluh
in? Dompok dousani ma ia marungut-ungut.
- 40 Uji anjaha pareksa hita ma parlahouta, mulak
ma hita bani Jahowa.
- 41 Dear ma angkat hita uhurta ampa tanganta
bani Naibata na i surga.
- 42 Domma marbalik hanami anjaha manlawan,
seng iampuni Ham hanami.

- 43 Ringis do irungkubkon Ham Bamu, anjaha
ipardakdak Ham do hanami; ibunuh Ham do
hanami, seng maralang-alang.
- 44 Irungkub Ham do diri-Mu bani hambun, gabe
seng boi tolpus tonggo.
- 45 Ibahen Ham do hanami gabe tompoh-tompok
ampa sihagigihonon i tongah-tongah ni
bangsa-bangsa.
- 46 Sagala munsuhnami pangangang babahni
dompok hanami;
- 47 hasonggotan pakon godung do mandorab
hanami, hasedaon ampa hamagouan.
- 48 Marabur-abur iluh do matangku songon
binanga halani hasedaon ni boruni
bangsangku.
- 49 Seng marnamangadi iluhku mabaor, seng
marnasoh,
- 50 paima manatap anjaha mangkawah Jahowa
hun surga;
- 51 matangku mambahen pusok ni uhurhu halani
pangahapan ni haganup boru ni hutangku.
- 52 Hona ayak-ayak do ahu songon manuk-manuk,
ibahen munsuhku seng marhala.
- 53 Manggoluh do ahu iunjomkon hubagas
godung, anjaha ipargijig ahu bani batu.
- 54 Isalpui bah do ulungku, gabe huhatahon,
'Magou ma ahu!'

- 55 Dilo-dilo do ahu bani goran-Mu, Ham Jahowa,
humbani parbagasan ni godung ai;
- 56 itangihon Ham do sorangku. Ulang ma tutup
Ham pinggol-Mu dampak dilo-dilongku
ampa elek-elekku!
- 57 Roh do Ham hun dohor sanggah na dilo-dilo
ahu Bamu, nimu, 'Ulang mabiar!'
- 58 Ham do, ale Tuhan, na mantinggilhon
partinggilanku, ipaluah Ham do hosahku.
- 59 lidah Ham do, ale Jahowa, odoh-odoh bangku,
pintori Ham ma ahu.
- 60 lidah Ham do sagala sura-sura pambalason ni
sidea, haganup tahi-tahini sidea dampak
ahu.
- 61 Ibogei Ham do, ale Jahowa, pandorunionni
sidea, pakon haganup tahi-tahini sidea
dampak ahu.
- 62 Sahap-sahap ni imbangku ampa pingkiran ni
sidea roh mandorab ahu ari-ari.
- 63 Sanggah na hundul sidea atap jongjong,
tonggor Ham ma, ahu do gabe doding-
doding bani sidea.
- 64 Ham ma na mambalaskon bani sidea, ale
Jahowa, romban hubani pambahenan ni
tanganni.
- 65 Ham ma na pahengkeng uhur ni sidea,
papa-Mu ma mangonai bani sidea.

⁶⁶ Ham ma na mardakdak sidea ibagas gila-Mu, anjaha Ham ma na mamboiskon sidea hun toruh ni langit-Mu, ale Jahowa!”

Borat ni Uhum na Mangonai bani Sion

- 4** ¹ Aih, gabe birong do omas, mubah rupa ni omas pitah ai! Mambur merap batu na mapansing ai bani topini ganup dalam!
- ² Anak ni Sion na marmulia ai, na maharga songon omas pitah, gabe songon hudon tanoh do sidea ihira, jadi-jadian ni sitopa hudon.
- ³ Gari sorigala ibere do bagodni, anjaha ipainum do anakni, tapi anggo boru ni bangsangku domma gabe jahat, doskon burung unta na i halimisan.
- ⁴ Longkot do dilahni na inuman bani langit-langitni halani horahni, mangindo indahan do dakdanak, hape seng dong na mambere bani sidea.
- ⁵ Halak sipangan na mantin hinan, matei gayuran i alaman. Halak sipakei hiou sitora, martibalan bani tompoh-tompoh.
- ⁶ Dousani boruni bangsangku banggalan do ai ase dousa ni Sodom, na pinarseda ibagas sangkidop mata, seng pala dais tangan.
- ⁷ Na sangap-sangap ai, na pitahan humbani salju, na lopakan ase dadih, na marbadan

- gergeran humbani batu intan, na marrupa songon batu intan sapir,
- ⁸ tapi sonari birongan do rupa ni sidea ase tampar apuy, seng tartandai be sidea bani dalan-dalan; longkot mando hulingkulingni bani holi-holini, horah songon soban-soban.
- ⁹ Sonangan do sidea ai, na matei binahen ni podang, ase sidea ai, na gayuran, na matei marsik, halani seng dong sipanganon hun ladang.
- ¹⁰ Parinangon siparholong manlompah anakni sandiri; sidea do gabe sipanganon bani sidea, sanggah parboisni boru ni bangsangku.
- ¹¹ Ipadas Jahowa do gila-Ni, iuseihon do gajag ni ringis-Ni; ipagara do apuy i Sion, na mamboiskon das ronsi onjolanni.
- ¹² Seng porsaya raja-raja ni tanoh on atap pangisi ni dunia on ganup, paboa masukan ni munsuh atap imbang do horbangan ni Jerusalem.
- ¹³ Halani dousani nabi-nabi ampa hajahatonni malim-malim do ai, ai ma na manduruskon darohni halak parpintor ibagas ai.
- ¹⁴ Mawat-awat do sidea, mapitung i dalan-dalan, marlapu-lapu daroh tumang, gabe seng dong na pag manjamah hiou ni sidea.

- 15 Misir! Mabutak! Dilo-dilo halak bani sidea.
Misir! Misir! Ulang jamah! Lintun do sidea
anjaha mawat-awat. Ihatahon halak do i
tongah-tongahni bangsa-bangsa: Seng bulih
be sidea ijon!
- 16 Jahowa do na mangerap sidea, seng be
idompakkon sidea; seng hona parduli be
malim, seng dong be, na malang dampak na
matua.
- 17 Tongtong do kawah-kawah matanami
bani pangurupion, tapi soya-soya do;
manatap-natap do hanami dampak sada
bangsa, na so boi mangurupi hanami.
- 18 Intei do sidea bani parlangkahnami, gabe seng
boi meret hanami i alamannami. Dohor
mando ujungnami, das ma ari-arinami;
tongon jumpah ma ajalnami.
- 19 Dorasan do na mardakdak hanami ase lali na i
awang-awang. Ipardakdak do hanami i atas
dolog, igompangi i halimisan.
- 20 Hosah hagoluhan bennami, ai ma na mininakan
ni Jahowa, dapot ibagas godung ni sidea.
Nini uhurnami: Itoruh ni linggomni,
manggoluh ma hanami i tongah-tongah ni
bangsa-bangsa.
- 21 Marolob-olob anjaha marmalas ni uhur ma,
ale boru Edom, na marianan i tanoh Us!
Tapi age hubam das do panginuman in

gabe mabuk ma ho, anjaha talanjanganmu dirimu.

- ²² Salosei ma uhum halani hajahatonmu, ale boru Sion, lang be paturutonni tarbuang ho; tapi hajahatonmai, ale boru Edom, balaskononni do, patidakonni do dousamu.

Pangindoan bani Jahowa ase Ipasuang Sion

- 5** ¹ Ingat ham ma, ale Jahowa, na masa bennami; idah anjaha mangkawah ma Ham bani habadoronnami!
- ² Ondos bani halak na legan do parbagianannami, rumahnami bani bangsa na legan.
- ³ Tading maetek do hanami, lang marbapa be, gabe hira na mabalu do inangnami.
- ⁴ Maningon manggalar do hanami bani bahnami, anjaha sobannami maningon bolionnami do.
- ⁵ Tampei pasangan bani tangkuhuknami, hona pardakdak do hanami; loja do hanami, seng ipalopas marsaran.
- ⁶ Hu Masir do isurdukkon hanami tangannami, hu Assur, ase sungkupan sipanganon hanami.
- ⁷ Mardousa do ompungnami, anjaha seng dong be sidea; hanami do mamorsan salah ni sidea.
- ⁸ Jabolon do na manrajai hanami, seng dong na paluahkon hanami humbani kuasa ni sidea.

- ⁹ Mangajamkon hosah hanami mangalop
sipanganonnami, halani podang i halimisan.
- ¹⁰ Milas do hulingkulingnami songon tataring,
halani panutung ni milas ni lohei.
- ¹¹ Hona butakan do naboru i Sion, anak boru i
huta-huta ni Juda.
- ¹² Kopala-kopala hona gantung marhitei tangan
ni sidea; partua-partua seng ipasangap.
- ¹³ Ipaksa do garama mangkorja bani pandudaan,
dakdanak mangkatargompang manarui
soban.
- ¹⁴ Maronti do partua-partua martumpu i
horbangan, anjaha na maposo seng be
marhusapi.
- ¹⁵ Mangadi do malas ni uhurnami; mubah
tortornami gabe tangis-tangis.
- ¹⁶ Madabuh do sortali humbani ulunami; bursik
do hanami halani dousanami!
- ¹⁷ Halani ai do ase maborit uhurnami, halani ai
do ase solong matanami,
- ¹⁸ halani Dolog Sion, na dob tarulang ai; sorigala
mando mardalani ijai.
- ¹⁹ Tapi Ham, ale Jahowa, ronsi sadokahni
dokahni do manrajai; totap do paratas-Mu
marsundut-sundut.
- ²⁰ Mase ma lupa Ham lalab bennami, mase ma
sonin dokahni itadingkon Ham hanami?

- ²¹ Boan Ham ma hanami, ale Jahowa, mulak
Bamu, ase saud hanami mulak! Pabayu Ham
ma ari-arinami songon na ijia!
- ²² Mintor mambur sonin ma hanami paturuton-
Mu? Ai seng marsibar gila-Mu bennami?

Hesekiel

Ipatalar Jahowa Hamuliaon-Ni bani Nabi Hesekiel

1 ¹ Bani tahun patolupuluhkon, bani bulan ompat, ari lima bulan ai, sanggah i tongah-tongah ni na tarbuang ai ahu i topi ni Bah Kebar, buha ma langit, gabe huidah ma pangungkabon humbani Naibata.

² Palima-arihon bani bulan ai, ai ma palima-tahunkon dob tarbuang Raja Joyakin,

³ roh ma hata ni Jahowa hubani Malim Hesekiel, anak ni si Busi, i tanoh ni halak Kasdim, i lambung ni Bah Kebar; tampei do tangan ni Jahowa bani ijai.

⁴ Sanggah na mangkawah ahu, tonggor ma, logou na marhaba-haba roh hun utara ampa hombun na bangga marhasoman apuy na marjimbur-jimbur anjaha marsinondang inggot, anjaha i tongah-tongah ni apuy ai adong do songon tombaga na marlinang-linang.

⁵ Anjaha i tongah-tongahni ai adong do usihan ni ompat sipargoluh; sonon do rupa ni sidea: Usih bani jolma do sidea.

⁶ Tapi ompat do bohi ni sidea bei, anjaha ompat bei do habong ni sidea.

⁷ Pintor do nahei ni sidea, anjaha jampal ni sidea songon jampal ni anak ni lembu do; marlinang-linang do ai songon tombaga pinolas.

⁸ I toruh ni habong ni sidea bani lambung ni na ompat ai martangan ni jolma do sidea. Na ompat ai sonon do bohi ampa habong ni sidea:

⁹ Marsiogosan do habong ni sidea; sanggah mardalan sidea, seng marhusor sidea, ganup do sidea manlangkah pintor hu lobei.

¹⁰ Ia rupa ni bohi ni sidea sonon do: Hampit lobei songon bohi ni jolma bani na ompat ai, hampit siamun songon bohi ni singa bani na ompat ai; hampit sambilou songon bohi ni lembu bani na ompat ai, anjaha hampit pudi, songon bohi ni manuk-manuk nanggordaha bani na ompat ai.

¹¹ Herbang dompak datas do habongni sidea ai; dua bei habong ni sidea marsiogosan, na dua nari manrungkub badan ni sidea.

¹² Ganup do sidea laho pintor hu lobei, huja laho Tonduy ai, hujai do laho sidea, seng marhusor sidea sanggah na laho ai.

¹³ I tongah-tongah ni sipargoluh ai adong do na gara songon narnar ni batubara, songon rigapan na hujai-hujon i tongah-tongahni sipargoluh ai. Lihar do apuy ai, anjaha luar do hilap humbagas apuy ai.

¹⁴ Marhujai-hujon do sipargoluh ai, songon hilap na mardejeb-dejeb.

¹⁵ Jadi sanggah na mangkawah ahu bani sipargoluh ai, tonggor ma, adong do sada galapang i tanoh, i lambung ni sipargoluh ai, i lobei ni na ompat ai.

¹⁶ Ia rupa ni galapang ai ampa rumangni songon parlinang-linang ni mata intan Tarsis do, dos do rupani na ompat ai, tapi popouni songon na i tongah-tongah ni galapang na sada do na sada nari idahon.

¹⁷ Dompok deisa na ompat ai do sidea laho, seng marhusor sidea bani na laho ai sidea.

¹⁸ Gijang do giling-gilingni ai, gok mata do ganup giling-gilingni ai inggot bani na ompat ai.

¹⁹ Anggo mardalan sipargoluh ai, mardalan ma galapang ai i lambung ni sidea; anggo naik sipargoluh ai hun tanoh, naik ma homa galapang ai.

²⁰ Atap huja laho Tonduy ai, hujai ma laho sidea, anjaha galapang ai naik rap pakon sidea, ai ibagas galapang ai do Tonduy ni sipargoluh ai.

²¹ Anggo laho sidea, laho ma on; anggo maronti sidea, maronti ma on; anggo naik sidea hun tanoh, naik ma galapang ai rap pakon sidea; ai ibagas galapang ai do Tonduy ni sipargoluh ai.

²² Ibabou ni ulu ni sipargoluh ai adong do na songon langit, marsinondang songon kristal, ipaherbang ibabou ni ulu ni sidea.

²³ Anjaha i toruh ni langit ai do herbang habongni sidea pintor, marsiogosan na sada hubani na sada, dua bei do habongni manrungkub badanni.

²⁴ Sanggah bingkat sidea, hubogei do habong ni sidea mardongos songon parhasak ni bah banggal, songon sora ni Pargogoh Na So Tarimbang, sora na mariah usih songon sora ni bala; anggo sonto sidea, ipahirput sidea ma habongni.

²⁵ Jadi roh ma sora hun langit, i babou ni ulu ni sidea ai; anggo sonto sidea ipahirput sidea do habongni.

²⁶ Anjaha i atas ni langit, na i babou ni ulu ni sidea ai, adong do sada paratas, rupani songon batu intan sapir; anjaha na hundul i atas ni na songon paratas ai, mausih do bani rupani jolma.

²⁷ Anjaha humbani na songon binongeini ai hu atas huidah do marhilap-hilap songon tombaga, songon rupani apuy na hinondor inggot; anjaha humbani na songon binongeini ai hu toruh, huidah do songon apuy, anjaha adong do sinalsal inggot Bani.

²⁸ Songon rupa ni halibitongan bani hambun sanggah roh udan, sonai do rupa ni sondang ai inggot. Ai ma rupa ni usihan ni hamuliaon ni Jahowa. Dob huidah ai, manrogop ma ahu, gabe hutangar ma sora na marsahap.

**Parsuruh ni Naibata bani si
Hesekiel Pasingatkon Bangsa ai**

2¹ Jadi nini ma hu bangku, “Ale anak ni jolma, jongjong ma ho bani naheimu, ase marsahap Ahu bam!”

² Sanggah na marsahap ai la bangku, masuk ma Tonduy ai hu bangku, lanjar ipajongjong ma ahu bani naheihu, jadi hutangihon ma la na marsahap ai bangku.

³ Anjaha ihatahon ma hu bangku, “Ale anak ni jolma, Husuruh do ho bani halak Israel, bani bangsa sipanlawan, na manlawan dompak Ahu; sidea ampa ompungni sidea sai marbalik do hun Bangku ronsi sadari on.

⁴ Hubani anak parbohi na mapir ampa paruhur na hengkeng do ho Husuruh, anjaha hatahon ma hubani sidea, “Sonon do hata ni Tuhan Jahowa.

⁵ Atap ra sidea manangihon, atap manjua sidea manangihon (*ai bangsa sipanlawan do sidea*), tapi botohon ni sidea ma na adong do nabi i tongah-tongah ni sidea.

⁶ Tapi anggo ho, ale anak ni jolma, ulang ho mabiar bani sidea, ulang gobir ho mambogei hata ni sidea, age pe liot bam duri pakon tatada anjaha marianan ho i tongah-tongah ni gansip golang; ulang gobir ho mambogei hata ni sidea, anjaha ulang ho mabiar mangidah sidea, ai bangsa sipanlawan do sidea.

⁷ Hatahon ma hatang-Ku bani sidea, atap ra sidea manangihon atap lang, ai bangsa sipanlawan do sidea.

⁸ Tapi anggo ho, ale anak ni jolma, tangihon ma na Huhatahon bam, ulang ma ho manlawan songon bangsa sipanlawan in. Buha ma pamanganmu, anjaha pangan ma aha na Hubere bam.”

⁹ Anjaha sanggah mangkawah ahu, tonggor ma, sada tangan durdur bangku, anjaha ibagas adong sada surat gulungan.

¹⁰ Jadi ipaherbang ma ai i lobeihu, anjaha marsurat do ai angkup lopah; tarsurat do ijai hata tangis-tangis, hoih-hoih ampa bursik-bursik.

3¹ Dob ai ihatahon ma hu bangku, “Ale anak ni jolma, pangan ma na dapot ho in; pangan ma surat gulungan in, anjaha laho ma ho, marsahap ma ho bani halak Israel.”

² Jadi hupatanggak ma babahku, gabe ibere ma hu bangku surat gulungan ai ase hupangan.

³ Ihatahon ma hu bangku, “Ale anak ni jolma, bondut ma gulungan on na Hubere bam, anjaha bosuri ma boltokmu bani in.” Jadi hupangan ma ai, matobu do ai ibagas pamanganku songon manis.

⁴ Dob ai nini ma hu bangku, “Ale anak ni jolma, laho ma ho marayak halak Israel, anjaha hatahon ma bani sidea hatang-Kin.

⁵ Ai sedo hubani bangsa parhata na legan atap parhata na so niarusan ho Husuruh, tapi hubani bangsa Israel do,

⁶ sedo hubani buei bangsa-bangsa, parhata na legan, parsahap na so niarusan. Tongon, anggo bani sisonai ho Husuruh, ra do sidea manangihon ho.

⁷ Tapi anggo halak Israel seng itangihon sidea ho, seng ra sidea manangihon Ahu; ai parbohi na mapir anjaha paruhur na hengkeng do halak Israel ganup.

⁸ Tonggor ma, Hupamapir do bohimu songon bohi ni sidea anjaha Hupatenger do pardompakanmu songon pardompakan ni sidea.

⁹ Songon batu intan, tengeran humbani batu loting, sonai do Hupatenger pardompakanmu; ulang ma ho mabiar anjaha ulang ho gobir mangidah sidea, ai bangsa sipanlawan do sidea.”

¹⁰ Ambah ni ai nini ma dompak ahu, “Ale anak ni jolma, ganup hatang-Ku, na Huhatahon bam, parimbagaskon ma ai anjaha tangihon.

¹¹ Ase laho ma, parayak ma na tarbuang in, hasoman sabangsamin, anjaha hatahon ma bani sidea, patugah ma bani sidea: Sonon do hata ni Tuhan Jahowa, atap na ra pe sidea manangihon in atap lang.”

¹² Jadi iangkat Tonduy ai ma ahu, anjaha hubogei ma i pudingku sora ni lalou na bolon, ai ma sangghah

na tarangkat ai hamuliaon ni Jahowa humbani
iananni,

¹³ ai ma sorani habongni sipargoluh ai sanggah na
marsiogosan ampa sora ni galapang na i lambung
ni sidea, na marsora songon lalou na bolon.

¹⁴ langkat Tonduy ai ma ahu, iluahon ma, anjaha
misir ma ahu ibagas uhur na mapaet marhasoman
ringis; anjaha tangan ni Jahowa do odoh bangku,

¹⁵ gabe das ma ahu bani halak na tarbuang ai i
Tel-Abib, na i topi ni Bah Kebar. Ijai ma ahu hundul
jonong i tengah-tengah ni sidea pitu ari dokahni.

Ipabangkit si Hesekiel Gabe Siparjaga Israel

¹⁶ Dob salpu na pitu ari ai roh ma hata ni Jahowa
hu bangku,

¹⁷ “Ale anak ni jolma, Hupabangkit do ho gabe
siparjaga bani bangsa Israel. Anggo itangar ho sada
hata humbani pamangan-Ku, lumbahon ma ai bani
sidea ibagas goran-Ku.

¹⁸ Anggo Huhatahon bani halak parjahat,
‘Maningon matei do ho!’ hape seng ipalumba
ho ia, anjaha seng marsahap ho palumbahon
halak parjahat ai bani parlahouni na masambor
ai, andohar manggoluh ia, sai na matei do namin
parjahat ai halani hajahatonni, tapi humbam do
tungguon-Ku darohni.

¹⁹ Tapi anggo ipalumba ho do parjahat ai,
hape seng ra ia manadingkon hajahatonni atap

parlahouni na masambor ai, sai na matei do ia halani hajahatonni, tapi maluah do anggo tonduymu.

²⁰ Anjaha anggo itadingkon halak parpintor hapintoronni anjaha ihorjahon hagedukon, gabe hunahkon batu partolsuan i lobeini, jadi matei ia, halani na so ipalumba ho ai ia, matei do ia halani dousani, anjaha seng be ingaton hapintoron na dob hinorjahonni; tapi darohni humbam do tungguon-Ku.

²¹ Tapi anggo ipalumba ho parpintor in ase ulang mardousa, anjaha seng tongon mardousa ia, manggoluh ma ia tongon, halani na ra ia palumbaon; ho pe, ipaluah ho do tonduymu.”

²² Dob ai roh ma ijai tangan ni Jahowa hu bangku, anjaha nini dompak ahu, “Jongjong ma, laho ma ho hu pamah ai, ijai pe Ahu marsahap pakon ho.”

²³ Jadi jongjong ma ahu anjaha laho ma ahu hu pamah ai; anjaha tonggor ma, jongjong do ijai hamuliaon ni Jahowa usih songon hamuliaon na huidah i topi ni Bah Kebar; jadi manrogop ma ahu.

²⁴ Jadi masuk ma Tonduy ai hu bangku, anjaha ipajongjong ma ahu bani naheihu: Marsahap ma la hu bangku, nini ma, “Laho ma, marhurung ma ho ibagas rumahmu!

²⁵ Anggo ho, ale anak ni jolma, tonggor ma, nahkonon-Ku ma bam tali, anjaha sangkuton ma

ho marhitei ai, ase ulang ho boi mandarat masuk hu tongah-tongah ni sidea,

²⁶ anjaha longkot ma bahenon-Ku dilahmu bani langit-langit ni pamanganmu, ase longah ho, gabe seng boi be pinsangonmu sidea, ai bangsa sipanlawan do sidea.

²⁷ Tapi anggo marsahap Ahu use hu bam, buhaon-Ku ma pamanganmu anjaha hatahononmu ma hubani sidea: Sonon do hata ni Tuhan Jahowa, atap ise na ra manangihon, itangihon ma, atap ise na manjua manangihon, manjua ma, ai bangsa sipanlawan do sidea.”

Igambarhon si Hesekiel Pangkubon bani Jerusalem

4 ¹ “Tapi anggo ho, ale anak ni jolma, buat ma bam sada batu tanoh halampung, anjaha patibal ma ai i lobeimu, anjaha uhirhon ma hujai sada huta, ai ma Jerusalem.

² Bahen ma hubuan dompak huta ai, pauli ma manara pangkubu, bahen homa tembok pangkubu dompak huta ai, sonai age tentara pangkubu ampa parugas sirongrong tembok inggot.

³ Anjaha buat ma sada bosu bolag, anjaha bahen ma ai gabe tembok bosu, parholanganmu humbani huta ai, dompakkon ma bohimu hu huta ai, sonai ma hona hubu huta ai, anjaha dorab ma ai inggot. On ma gabe tanda bani halak Israel.

⁴ Tapi anggo ho, podomi ma soding sambiloumu, anjaha hunahkon ma bam hajahaton ni Israel. Songon buei ni ari ho tibal ijai, sonai ma dokahni porsanonmu salah ni sidea.

⁵ Hutampeihon do hu bam tahun hajahaton ni sidea, bueini ihira marhitei ari, tolu ratus siah puluh ari; sonai ma dokahni porsanonmu hajahaton ni Israel.

⁶ Anjaha dobkonsi dob ibahen ho sonai, patibal ma use dirimu soding dampak siamun, anjaha porsan ma hajahaton ni halak Juda, ompat puluh ari dokahni, sada tahun ihira gabe sadari siporsanon bam.

⁷ Hubani pangkubun ni Jerusalem ai ma dampakkon bohimu marhasoman tangan na talag, anjaha manjahai ma ho dampak huta ai.

⁸ Tonggor ma, hunahkon do bam tali, ase ulang boi ho marhusor hu siamun atap hu sambilou, paima idobkon ho ari pangkubunmai.

⁹ Tapi anggo ho, buat ma bam gandum pakon jagul, kasang pakon dali, bajaurei ampa daua, anjaha nahkon ma ai hubagas sada hudon, anjaha pauli ma ruti hunjai, anjaha ai ma panganonmu sadokah tibal ho soding tolu ratus siah puluh ari dokahni.

¹⁰ Marsibar do sipanganon na boi panganonmu, ai ma dua puluh sekel sadari; marpanorang do ai panganonmu.

¹¹ Bah pe marsuhat do inumonmu, ai ma saparonom hin; marpanorang do ai homa inumonmu.

¹² Pangan ma ai marrupa ruti jagul; masak ma i lobei ni sidea i atas ni ginagat ni jolma.”

¹³ Anjaha nini Jahowa ma, “Sonai ma butak panganon ni halak Israel rutini i tongah-tongah ni sipajuh begu-begu pambuangan-Ku bani sidea.”

¹⁴ Jadi ningku ma, “Ham Tuhan Jahowa, tonggor Ham ma, seng onggga hubutaki diringku; humbani haetek-etekonku ronsi sonari seng onggga hupangan na matei-matei atap na sinoroh, anjaha gulei na mabutak seng onggga masuk ai hubagas pamanganku.”

¹⁵ Jadi nini ma dampak ahu, “Tonggor ma, ginagat ni lombu pe hubere bam gantih ni ginagat ni jolma laho pamasakkon sipanganonmu.”

¹⁶ Ambah ni ai nini ma dampak ahu, “Ale anak ni jolma, parsedaon-Ku ma parbohalan i Jerusalem; marsibar do panganon ni sidea ruti marhasoman biar; bah pe marsuhat do inumon ni sidea marhasoman gobir.

¹⁷ Hubahen pe sonai, ase hurangan ruti pakon bah do sidea, anjaha rusak sidea marsikawahan, anjaha mandatei sidea halani hajahaton ni sidea.”

Igambarhon si Hesekiel Pasal Parseda ni Jerusalem

5¹ “Ia ho ale anak ni jolma, buat ma bam sada podang na marot, pakei ma ai songon pisou parjambak, anjaha padalan ma ai bani ulumu pakon jambakmu; dob ai buat ma bam dasing, anjaha bagi ma jambulan ai.

² Sapartolu ma ai bani apuy i tongah-tongah ni huta ai, anggo gok ma ari pangkubun ai; anjaha na sapartolu nari buat ma ai anjaha tampuli ma inggot huta ai; dob ai na sapartolu nari purpurhon ma bani logou, anjaha Ahu manintak podang hun pudi ni sidea.

³ Anjaha buat ma otik hunjai, sangkutkon ma ai bani sisi ni bajumu.

⁴ Anjaha hunjon buat ma use otik, anjaha gijigkon ma ai hubagas apuy, anjaha tutung ma ai; hunjai ma roh apuy bani haganup halak Israel.”

⁵ Sonon do hata ni Tuhan Jahowa, “On ma huta Jerusalem, Hupajongjong do in i tongah-tongah ni bangsa-bangsa, anjaha nagori-nagori manginggotisi. *

⁶ Hape ilawan sidea do titah-Ku, jahatan humbani sipajuh begu-begu, sonai homa aturan-Ku lobih humbani nagori na manlioti sidea, ai mapas do sidea bani sagala aturan-Ku anjaha seng iparlahouhon sidea titah-Ku.”

⁷ Halani ai sonon do hata ni Tuhan Jahowa, “Halani jahatan hanima marparlahou marimbang sipajuh begu-begu na manlioti hanima anjaha seng ihorjahon hanima titah-Ku, anjaha seng idalankon hanima aturan-Ku, anjaha songon paraturan ni parbegu na manlioti hanima pe lang idalankon hanima,

⁸ halani ai sonon do hatang-Ku, Ahu Tuhan Jahowa, tonggor ma, Ahu pe imbangmu do; dabuhon-Ku do uhum i tongah-tongahmu, i lobei ni bangsa-bangsa.

⁹ Bahenon-Ku ma hu bam na so onggga Hubahen ope, anjaha na so bahenon-Ku be halani sagala hasamboron na hinorjahonmu.

¹⁰ Halani ai panganon ni bapa ma anakni i tongah-tongahmu, anjaha anak mangankon bapani; padalanon-Ku ma uhum bam, anjaha na teba ai hun bam, erapon-Ku do ai bani ganup deisa.

*

¹¹ Halani ai, songon sintongni manggoluh Ahu,” nini Tuhan Jahowa, “halani ibutaki ho ianan-Ku na mapansing in marhitei haganup sihagigihononkon ampa hasamboron na hinorjahonmin, Ahu pe jambakon-Ku ma ho; seng maidop be matang-Ku mangkawah bam anjaha lang be marulak-ulakan uhur-Hu. *

¹² Sapartolu humbam matei do buaton ni sampar anjaha matei gayuran i tongah-tongahmu; sapartolu radag ibahen podang inggot bam, anjaha

na sapartolu nari erapon-Ku do bani ganup deisa, anjaha podang do Husintak hun pudi ni sidea. *

¹³ Jadi das ma gilang-Ku, mangonai ma ringis-Ku bani sidea, gabe sombuh Huahap; jadi botohon ni sidea ma, paboa Ahu do Jahowa na marsahap ibagas gilang-Ku, bani na Hupasogop ringis-Ku bani sidea. *

¹⁴ Anjaha bahenon-Ku do ho tarulang, anjaha gabe siapason i tongah-tongah ni bangsa-bangsa na manlioti ho, ampa i lobei ni halak na montas hun bam. *

¹⁵ Tongon, gabe siapason ampa sipahirion, gabe lumba-lumba ampa songgot-songgot do ho bani bangsa-bangsa na manlioti ho, bani na Hudabuh uhum bam ibagas gila pakon ringis ampa pinsang-pinsang na parah. (*Ahu, Jahowa do na manluarhon ai*), *

¹⁶ bani na Husiorhon bam panah ni lohei maningting, na laho mandedahon; Ahu do na maniorhon ai laho mandedahon hanima, bani na Hutambahi lohei na parah bennima anjaha Huparseda parbohalannima. *

¹⁷ Tongoskonon-Ku do bannima lohei ampa binatang-binatang, na manoroh hun bannima dakdanaknima; sampar ampa daroh niduruskon do masa bannima; parohon-Ku do podang bannima, Ahu do Jahowa na mangkatahon ai.”

Lumba-lumba Pasal Parseda ni Panumbahan

Sisombah-sombahon ampa Parsombah

- 6**¹ Dob ai roh ma hata ni Jahowa hu bangku,
² “Ale anak ni jolma, dompakkon ma bohimu hu dolog-dolog ni Israel anjaha manjahai ma ho dompaksi,
³ hatahon ma, ‘Ale dolog-dolog ni Israel, tangihon ma hata ni Tuhan Jahowa. Sonon do hata ni Tuhan Jahowa dompak sagala dolog ampa buntu-buntu, dompak lombang bagas ampa habungan: Tonggor ma, parohon-Ku ma bannima podang, gabe parsedaon-Ku ma panumbahannima bani ianan na gijang.
⁴ Maningon parsedaon do anjapanjapnima anjaha parropukon-Ku anjapanjap pardahupaannima; anjaha rasei bahenon-Ku halak na binunuh humbennima i lobei ni gana-gananima.
⁵ Sampakkonon-Ku do bangkei ni halak Israel i lobei ni gana-gana ni sidea, anjaha erapon-Ku do holi-holinima liot anjapanjapnima.
⁶ Bani haganup ianannima parsedaon do sagala huta anjaha parreongon panumbahannima bani ianan na gijang, ase seda anjaha marumbak anjapanjapnima, maropuk anjaha mangkabolah gana-gananima, hona rumbakkon anjapanjap pardahupaannima, anjaha bois na pinaulinima.

⁷ Radag ma halak na tarbunuh i tongah-tongahnima, gabe botohonnima ma, Ahu do Jahowa.

⁸ Tapi paturuton-Ku do deba manggoluh hun bannima, na maluah humbani podang i tongah-tongah ni bangsa-bangsa, bani na Huerap ai hanima i nagori-nagori ai.

⁹ Sidea na maluah ai, ingaton ni sidea ma Ahu i tongah-tongah ni bangsa-bangsa, pambuangan bani sidea, dob Huropuki uhur parbangkison ni sidea ai, na manlembang hun Bangku, sonai mata parbangkison ni sidea ai, na mangkawah bani gana-gana ni sidea; gabe magigi ma sidea mangidah diri ni sidea sandiri, halani hajahaton na hinorjahon ni sidea, halani habutakon ni sidea ai.

¹⁰ Anjaha botohon ni sidea ma, Ahu do Jahowa, seng hape na so marhala Hulumbahon hamagouan sibahenon-Kai bani sidea.”

¹¹ Sonon do hata ni Tuhan Jahowa, “Martopap ma ho, injak-injakkon ma naheimu, anjaha hatahon ma, ‘Magou ma!’ Halani haganup hasamboron na hinorjahon ni halak Israel ai maningon rasei do sidea bahenon ni podang, lohei pakon sampar.

¹² Ise na daoh matei do bahenon ni sampar, anjaha ise na dohor matei do bahenon ni podang, anjaha ise na tading anjaha na bansah matei gayuran do. Sonai ma padalanon-Ku ringis-Ku bani sidea.

¹³ Jadi tandaonnima ma, Ahu do Jahowa, anggo radag ma na rasei humbani sidea i tongah-tongah ni gana-gana ni sidea, inggot bani anjapanjap ni sidea, i atas ni ganup buntu-buntu, bani pakpak ni sagala dolog, i toruh ni ganup hayu na maratah, i toruh ni ganup jajabi na matabun, bani ganup panutungan dahupa i lobei ni gana-gana ni sidea.

¹⁴ Anjaha pagostongon-Ku do tangan-Ku dompak sidea laho mambahen tanoh ai halong anjaha tarulang, bani haganup ianan ni sidea, hun halimisan nari das hu Ribla. Jadi botohon ni sidea ma, Ahu do Jahowa.”

Seng Tarolati be Parroh ni Ujung ni Bangsa ai

7 ¹ Dob ai roh ma hata ni Jahowa hu bangku mangkatahon,

² “Ho ale anak ni jolma, sonon do hata ni Tuhan Jahowa pasal tanoh ni Israel: Na roh ma ujungni, ujung ni suhi-suhi na ompat ni tanoh in.

³ Sonari ma roh ajal ai bam, pasogopon-Ku ma ringis-Ku bam, anjaha uhumon-Ku ho romban hubani parlahoumu; anjaha pinsangon-Ku ho halani haganup hasamboronmu.

⁴ Seng maidop matang-Ku mangidah ho, seng holong atei-Hu, tapi uhumon-Ku do ho romban hubani parlahoumu, anjaha manginsonoh i tongah-tongahmu hasamboronmu, jadi tandaonmu ma, Ahu do Jahowa.”

⁵ Sonon do hata ni Tuhan Jahowa, “Mardapot-dapot do roh hasedaon.

⁶ Na roh ma ujungni, ujungni domma roh; domma puho na mandorab ho. Tonggor ma, roh ma!

⁷ Roh ma hasedaonmu ale pangisi ni tanoh in; domma roh panorangni, domma dohor ari ai, ari hageoron, sedo ari olob-olob, i atas dolog-dolog.

⁸ On pe barah ma duruskonon-Ku ringis-Ku bam, anjaha padason-Ku gilang-Ku bam, anjaha uhumon-Ku ho romban hubani parlahoumu, anjaha mangonai bam bahenon-Ku haganup hasamboronmu.

⁹ Seng maidop matang-Ku mangidah ho, seng holong atei-Hu, tapi uhumon-Ku do ho romban hubani parlahoumu, anjaha manginsonoh i tongah-tongahmu hasamboronmu. Jadi tandaonnima ma, Ahu do Jahowa sipanlonsing.

¹⁰ Tonggor ma, ari ai! Tonggor ma, roh ma! Martunas do hagedukon, marbunga pangenjengon.

¹¹ Timbul do siunsagakon gogoh bahen lonsing-lonsing bani hajahaton. Seng dong be na tading humbani sidea, sonai humbani habayakon ni sidea, atap humbani hadoharonni, salpu do haganup hasangapon ni sidea.

¹² Domma roh panorangni, dohor ma ari ai. Ulang ma marmalas ni uhur sipamboli anjaha jundoh

sipanjual, ai gajag ni ringis do na mangonai bani haganup hadoharonni.

¹³ Seng ulakan ni sipanjual be marjualan, age pe manggoluh ope sidea; ai seng tarolati be ringis dompak hadoharon ni sidea ai, anjaha seng dong be na boi manjolomi goluhni halani hajahaton ni sidea.

¹⁴ Isompul pe tarompit, anjaha domma sirsir haganup ibahen, tapi seng dong na borani bingkat hu parporangan, ai domma sogop ringis-Ku dompak haganup hadoharon ni sidea.

¹⁵ I darat, podang do na manraseihon, i huta, sampar pakon lohei, halak na i juma matei do ibahen podang, halak na ibagas huta bois do bahenon ni sampar pakon lohei.

¹⁶ Anjaha anggo adong na maluah, bani dolog-dolog ma sidea ai, haganup hutur-hutur songon kuhui i habungan, halani hajahaton ni sidea bei.

¹⁷ Haganup do tangan galek, anjaha haganup towod hitir-hitir.

¹⁸ Marhiou guni do sidea, anjaha hagobiron manrongkob sidea; haboron do bani bohi ni sidea, anjaha hona palpal ganup ulu ni sidea.

¹⁹ Ipansampakkon sidea do pirakni hu alaman, anjaha omas ni sidea ihira songon tompoh-tompoh; ai seng boi pirak ampa omas ni sidea paluahkon sidea bani ari ringis ni Jahowa; seng tarpasombuh sidea loheini atap targoki sidea

boltokni marhitei ai. Ai do na mambahen jomba sidea ibagas hajahaton ni sidea.

²⁰ Ugas-ugas ni sidea na jenges ai do mambahen gijang uhur ni sidea, ipauli sidea do hunjai gana-gana ni sidea sihagigihononkon ai; halani ai do ase gabe tompoh-tompok ai bani sidea Hubahen.

²¹ Ondoskonon-Ku do ai bani halak na legan gabe sirampason ampa bani halak parjahat na i tanoh on gabe sitabanon; butakon ni sidea ma ai.

²² Padaohon-Ku do bohing-Ku humbani sidea, ai ibutaki sidea do ianan-Ku na pansing in; jadi masukan ni panamun ma hubagas anjaha pabutakon ni sidea ma ai,

²³ hitir anjaha sursar ma bahenon ni sidea ai. Ai gok panduruson daroh do tanoh ai anjaha gok odoh-odoh do huta ai.

²⁴ Jadi parohon-Ku ma bangsa sijahatan humbani bangsa-bangsa, laho mambuati rumah ni sidea, parontihonon-Ku ma pangenjengon ni sidea ai, anjaha gabe butak ma ianan ni sidea na mapansing ai.

²⁵ Habiaran do na roh, mangindahi haluahon do sidea, hape seng jumpahsi.

²⁶ Mardapot-dapot do roh hamagouan, mardapot-dapot do roh barita na masambor. Manungkun panjahaion do sidea humbani nabi, tapi seng dong

be pangajarion bani malim ampa podah bani pangintuai-pangintuai.

²⁷ Marhoru do raja, mandolei kopala-kopala, anjaha margonggong do tangan ni halak na i nagori in halani biarni. Domu hubani parlahouni do Hubahen hubani sidea, anjaha Huuhumi sidea domu hubani na patut jaloonna; jadi botohon ni sidea ma, Ahu do Jahowa.”

Panonggoran Pasal Parnaibataon na Legan na i Huta Jerusalem

8 ¹ Dob ai bani tahun paonomkon, bani bulan onom, ari lima bulan ai, sanggah hundul ahu i rumahku anjaha sintua-sintua ni Juda hundul i lobeihu, jadi sogop ma hu bangku tangan ni Jahowa.

² Jadi sanggah mangkawah ahu, tonggor ma, adong do sada na marrupa songon jolma, humbani na songon binongeini ai idahon hu toruh, songon apuy do, tapi humbani binongeini ai hu atas marsinalsal do songon tombaga na marlinang-linang.

³ Jadi isurdukkon ma songon sada tangan, anjaha itangkap ma ahu bani jambulanku; iangkat Tonduy ai ma ahu hu tongah-tongah ni tanoh pakon langit, anjaha iboan ma ahu ibagas pangungkabon na humbani Naibata hu Jerusalem, bani horbangan ni alaman parbagas ai, na hampit utara; ai ma

hajongjongan ni gana-gana, na patubuh simburu ni Jahowa.

⁴ Anjaha tonggor ma, jongjong do ijai hamuliaon ni Naibata ni Israel songon panonggoran na huidah i pamah ai.

⁵ Anjaha nini ma dampak ahu, “Ho ale anak ni jolma, kawahkon ma dampak utara!” Jadi mangkawah ma ahu dampak utara, anjaha tonggor ma, hampit utara ni horbangan ai, ijai do jongjong anjapanjap gana-gana, na patubuh simburu ni Jahowa.

⁶ Jadi nini ma hu bangku, “Ho ale anak ni jolma, ididah ho do na binahen ni sidea ai? Hagigi bangga do na binahen ni ginompar ni Israel ijon, na mambahen misir Ahu humbani ianan-Ku na pansing in.”

⁷ Jadi iarahkon ma ahu hu horbangan ni alaman ai, anjaha sanggah mangkawah ahu, tonggor ma, adong do sada lubang bani dingding.

⁸ Dob ai nini ma dampak ahu, “Ho ale anak ni jolma, bahen ma lubang i dingding ai!” Jadi sanggah na mambahen lubang ai ahu i dingding ai, tonggor ma, adong do sada pintu.

⁹ Nini ma hu bangku, “Masuk ma ho, anjaha tonggor ma hagigi na binahen ni sidea ijai.”

¹⁰ Jadi masuk ma ahu anjaha hukawahkon ma; jadi tonggor ma, gambaran ni bagei-bagei ni sihagigihononkon, gilok-gilok, binatang ampa

haganup naibata ni halak Israel, iuhirhon bani dingding ai inggot.

¹¹ Anjaha i lobei ni ai, jongjong do pitu puluh halak humbani pangintuai-pangintuai ni Israel, rap pakon si Jaasania, anak ni si Sapan, i tongah-tongah ni sidea. Ganup sidea manjolom pardahupaan ibagas tanganni, anjaha timus ni dahupa ai martimpul do hu atas.

¹² Jadi nini ma dompak ahu, “Ale anak ni jolma, ididah ho do na binahen ni pangintuai-pangintuai ni halak Israel ai ibagas na golap ai, ganup ibagas kamarni na margambaran ai?” Nini sidea, “Seng ididah Jahowa hita, domma itadingkon Jahowa nagori in!”

¹³ Nini ope hu bangku, “Idahonmu ope hagigi sibanggalan na hinorjahon ni sidea.”

¹⁴ Dob ai iarahkon ma ahu bani horbangan parutara ni rumah ni Jahowa, anjaha tonggor ma, adong do ijai naboru-naboru manangisi si Tammus.

¹⁵ Jadi nini ma dompak ahu, “Domma ididah ho ai, ale anak ni jolma? Idahonmu ope sibajankonon ni ai.”

¹⁶ Dob ai iarahkon ma ahu hu alaman parbagas ni rumah ni Jahowa, anjaha tonggor ma, bani labah ni rumah ni Jahowa, i holang-kolang ni surambih ampa anjapanjap ai, adong do ijai hira-hira dua puluh lima halak dalahi, tundal bani rumah ni

Jahowa, idompakkon hu hapoltakan, marsombah bani mata ni ari, dampak hapoltakan.

¹⁷ Dob ai nini ma dampak ahu, “Domma ididah ho in, ale anak ni jolma? Hampung ni in uhur ni ginompar ni Juda mambahen na mabajan sonin ijon, gabe igoki sidea do tanoh in bani odoh-odoh, anjaha ipuhoi ringis-Ku. Tonggor ma, inahkon sidea do ranting-ranting bani igung ni sidea.

¹⁸ Halani ai, padalanon-Ku ma ringis-Ku bani sidea; seng maidop be matang-Ku mangidah sidea, anjaha seng be holong atei-Hu; ipamaling sidea pe sorani bani pinggol-Hu, seng tangihonon-Ku be sidea.”

Panonggoran Pasal Uhum ni Naibata bani Pangisi ni Jerusalem

9 ¹ Dob ai ipamaling ma sorani i lobei ni pinggolhu, “Padohor hanima ma ale sidalankon uhum bani huta on, ganup marsinjata sipangagou ibagas tanganni!

² Anjaha tonggor ma, roh ma onom halak humbani horbangan parhuluan na hampit utara, ganup marsinjata sipangagou ibagas tanganni; anjaha rap pakon sidea adong do sada dalahi na marhiou silopak, na marparugas panurat bani binongeini. Jadi roh ma sidea anjaha jongjong ma i lambung ni anjapanjap tombaga ai.

³ Jadi naik ma hamuliaon ni Naibata ni Israel humbani herub ai, hasogopanni ai, hu onjolan ni labah ni rumah ai, anjaha dilo-dilo ma la bani dalahi na marhiou silopak ai, na marparugas sipanurat bani binongeini.”

⁴ Nini Jahowa ma dompaksi, “Dalani ma huta Jerusalem in, anjaha bahen ma tanda bani pardompakan ni halak na morong-orong anjaha na marhoih-koih halani haganup hasamboron na idalankon i tongah-tongahni.”

⁵ Tapi bani halak na legan ai nini do hubogei, “Siari hanima ma huta in, irik i pudini, anjaha bunuhi ma! Ulang maidop matanima, anjaha ulang adong na marholong ni atei!

⁶ Bunuhi ma anjaha boiskon ma: na ubanon, garama, anak boru, anak-anak ronsi parinangon; tapi halak na adong tanda ai, ulang kahua! Pungkah ma humbani ianan-Ku na mapansing in!” Jadi ipungkah sidea ma humbani sintua-sintua na i lobei ni Rumah Panumbahan ai.

⁷ Dob ai nini ma dompak sidea, “Butaki hanima ma Rumah Panumbahan in, anjaha goki ma alaman in bani halak na tarbunuh. Dob ai luar ma, anjaha ibagas huta in ma hanima mamunuhi.”

⁸ Jadi sanggah na mamunuhi ai sidea, anjaha tading sahalak ahu, manrogop ma ahu lanjar doruh-doruh, “Ham Tuhan Jahowa, ai boiskonon-Mu do

haganup teba-teba ni Israel bani na niduruskon-Mu in ringis-Mu bani Jerusalem?”

⁹ Jadi nini ma mambalosi ahu, “Buei tumang do salah ni halak Israel ampa Juda; gok daroh na madurus do tanoh in, anjaha gok hagedukon do huta in. Nini sidea do, ‘Domma itadingkon Jahowa tanoh in, seng ikawahkon be in.’

¹⁰ Halani ai, Ahu pe seng maidop matang-Ku anjaha seng holong atei-Hu, tapi balaskonon-Ku do pambahenan ni sidea ai bani ulu ni sidea.”

¹¹ Anjaha tonggor ma, dalahi na marhiou silopak ai, na marparugas panurat ai bani binongeini, mulak ma patugahkon, nini, “Domma hudalankon songon na pinarentahkonmu bangku.”

Hamuliaon na Marianan i Atas ni Herubim ai

10 ¹ Jadi mangkawah ma ahu, anjaha tonggor ma, bani langit na i babou ni herubim ai, adong do songon batu intan sapir, tompati songon paratas, i atas ni ai.

² Dob ai nini ma dompak dalahi na marhiou silopak ai, “Masuk ma ho hu holangkolang ni galapang ai, na i toruh ni herubim ai, goki ma tanganmu bani narnar na gara ai, na i holangkolang ni herubim ai, anjaha sampakkon ma ai hu atas ni huta ai.” Jadi masuk ma ia huidah.

³ Jongjong do herubim ai hampit siamun ni Rumah Panumbahan ai, sanggah na masuk dalahi ai, anjaha igoki hambun do alaman parbagas ai.

⁴ Naik ma hamuliaon ni Jahowa humbani herubim ai hubani onjolan ni labah ni Rumah Panumbahan ai; jadi igoki hambun ma rumah ai, anjaha gok sinalsal ni hasangapon ni Jahowa ma alaman ai.

⁵ Anjaha tarbogei do sora ni habong ni herubim ai das hu alaman pardarat ai usih songon sora ni Naibata pargogoh na so tarimbang, sanggah marsahap la.

⁶ Sanggah na pinarentahkonni ai dalahi na marhiou silopak ai, "Buat ma apuy hun holangkolang ni galapang, hun tongah-tongah ni herubim ai!" Gabe masuk ma ia anjaha jongjong i lambung ni galapang ai.

⁷ Jadi idurdurhon sada herub ma tanganni hun tongah-tongah ni herubim ai dompak apuy na i holangkolang ni herubim ai, anjaha ibuat ma deba hunjai, lanjar ibere hubagas tangan ni dalahi na marhiou silopak ai; ijalo ma ai anjaha luar ma ia.

⁸ Anjaha taridah do bani herubim ai songon rupa ni tangan ni jolma, i toruh ni habong ni sidea bei.

⁹ Dob ai mangkawah ma ahu anjaha tonggor ma, adong do ompat galapang i lambung ni herubim ai, sada galapang i lambung ni ganup herub; ia rupa ni galapang ai, songon batu intan Tarsis na marlinang-linang do.

¹⁰ Dos do rupa ni na ompat ai, tapi popouni songon na i tongah-tongah ni galapang na sada do na sada nari idahon.

¹¹ Anggo bingkat sidea, laho do sidea dompak lobeini bei, seng marhusor sanggah na laho ai; huja galapang parlobei ai laho, hujai do irik laho na legan ai, seng marhusor sanggah na laho ai.

¹² Haganup badan ni herubim ai, gurungni, tangan ni sidea, habong ni sidea ampa galapang ai, gok mata do inggot, haompatsi galapang ai.

¹³ Ia galapang ai, halisungsung do goranni ai hubogei.

¹⁴ Anjaha ompat do bohi ni ganup ai: bohi na parlobei bohi ni herub, na paduahon bohi ni jolma, na patoluhon bohi ni singa anjaha na paompatkon bohi ni manuk-manuk nanggordaha.

¹⁵ Anjaha naik ma herubim ai, ai ma pargoluh na dob huidah i lambung ni Bah Kebar.

¹⁶ Anggo mardalan herubim ai, mardalan ma galapang ai i lambung ni sidea; anjaha anggo ipaherbang herubim ai habongni laho naik hun tanoh, seng mosor galapang ai hun lambung ni sidea.

¹⁷ Anggo maronti sidea, maronti ma ai, anggo naik sidea, naik ma ai rap pakon sidea; ai ibagas galapang ai do tonduy ni pargoluh ai.

¹⁸ Dob ai luar ma hamuliaon ni Jahowa hun onjolan ni labah ni Rumah Panumbahan ai, anjaha sogop ma hu atas ni herubim ai.

¹⁹ Ipaherbang herubim ai ma habongni, anjaha naik ma sidea hun tanoh on huidah bani pardarat ni sidea ai; rap pakon sidea do galapang ai; anjaha maronti ma sidea bani horbangan parhapoltakan ni rumah ni Jahowa, anjaha hamuliaon ni Naibata ni Israel do ibabou ni sidea.

²⁰ Ai ma pargoluh na huidah i toruh ni Naibata ni Israel, i topi ni Bah Kebar; anjaha hutanda ma herubim do sidea hape.

²¹ Ompat bei do bohini anjaha ompat bei do habongni, anjaha i toruh ni habong ni sidea adong do tangan songon tangan ni jolma.

²² Ia rupa ni bohi ni sidea, usih do bani rupa ni bohi na huidah i topi ni Bah Kebar; ganup do sidea laho pintor hu lobei.

Uhum hubani Sipambobai na Tading i Jerusalem

11 ¹ Anjaha iangkat Tonduy ai ma ahu, anjaha iboban ma ahu hu horbangan Parhapoltakan ni rumah ni Jahowa. Anjaha tonggor ma, i labah ni horbangan ai, adong do dua puluh lima halak dalahi; anjaha huidah do i tongah-tongah ni sidea si Jeasanya, anak ni si Assur, ampa si Pelatya, anak ni si Benaya, ai ma kopala-kopala ni bangsa ai.

² Jadi nini ma hu bangku, “Ale anak ni jolma, on ma halak na manranggi hajahaton ampa na mambere podah na masambor ibagas huta on.

³ Nini sidea, ‘Ai lang baru ope ipajongjong rumah? Huta on do hudon ai, hita do gulei ai.’

⁴ Halani ai manjahai ma ho dampak sidea, manjahai ma, ale anak ni jolma!”

⁵ Jadi sogop ma hu bangku Tonduy ni Jahowa, anjaha nini ma dampak ahu, “Hatahon ma, sonon do hata ni Jahowa, sonai do ihatahon hanima, ale ginompar ni Israel, ai Hubotoh do na dong tubuh ibagas uhurnima.

⁶ Ipabuei hanima do jolma na tarbunuh ibagas huta on, anjaha igoki hanima do dalan-dalanni ai bani halak na binunuh.”

⁷ Halani ai sonon do hata ni Tuhan Jahowa, “Jolma na binunuhnima, na niraseihonnima i tongah-tongah ni huta in, sidea ma juhut ai, anjaha huta on ma hudon ai; tapi anggo hanima boanon-Ku do mandarat hun tongah-tongahni ai.

⁸ Mabiari do hanima bani podang, jadi podang do parohon-Ku bannima,” nini Tuhan Jahowa.

⁹ “Anjaha padaraton-Ku do hanima hun tongah-tongah ni huta in, anjaha ondoskonon-Ku do hanima hubagas tangan ni halak na legan, anjaha pasogopon-Ku do uhum bannima.

¹⁰ Boiskonon ni podang do hanima; uhumon-Ku do hanima bani parbalogan ni Israel; jadi botohonnima ma, Ahu do Jahowa.

¹¹ Seng gabe hudon huta ai bannima, anjaha seng hanima gabe juhut ibagas; bani parbalogan ni Israel do uhumon-Ku hanima.

¹² Jadi botohonnima ma, Ahu do Jahowa, ai seng idalankon hanima titah-Ku anjaha seng ihorjahon hanima parentah-Ku, tapi marparlahou do hanima songon bangsa-bangsa na inggot bannima.”

¹³ Jadi masa ma, sanggah manjahai ahu, matei ma si Pelaca, anak ni si Benaya. Manrogop ma ahu, hupamaling ma sorangku, anjaha ningku ma, “Ham Tuhan Jahowa, ai boiskonon-Mu do teba-teba ni bangsa Israel in?”

Bagah-bagah hu bani Halak na dob Tarbuang

¹⁴ Dob ai roh ma hata ni Jahowa hu bangku, mangkatahon,

¹⁵ “Ho ale anak ni jolma, saninamu haganup, hasomanmu samarga ampa halak Israel haganup, sonon do pangkatahon ni pangisi ni Jerusalem pasal sidea, ‘Domma daoh sidea humbani Jahowa; hu banta do iberehon tanoh on gabe parbagiananta.’

¹⁶ Halani ai hatahon ma, sonon do hata ni Tuhan Jahowa, ‘Tongon, Ahu do mambuankon sidea hu tongah-tongah ni bangsa-bangsa, anjaha Ahu do

mangerap sidea hu nagori-nagori ai, tapi Ahu do gabe ianan hapansingon i nagori hamerapan ni sidea ai.'

¹⁷ Halani ai hatahon ma, sonon do hata ni Tuhan Jahowa, 'Patumpuon-Ku do use sidea humbani bangsa-bangsa ai, anjaha pahumpulon-Ku do sidea humbani nagori hamerapan ni sidea ai, anjaha berehonon-Ku do tanoh Israel bani sidea.

¹⁸ Anjaha dob das sidea ijai, padaohon ni sidea ma hunjai sagala hagigi ampa sagala hasamboron.

¹⁹ Jadi berehonon-Ku ma bani sidea uhur na sada, anjaha nahkonon-Ku do tonduy na bayu hubagas sidea; padaohon-Ku do uhur batu humbani daging ni sidea, anjaha berehonon-Ku do bani sidea uhur na marpangahapan,

²⁰ ase marparlahou sidea ibagas titah-Ku, iramotkon aturan-Ku anjaha idalankon; gabe bangsang-Ku ma sidea anjaha Ahu gabe Naibata ni sidea.

²¹ Tapi sidea, na marosuh ni uhur bani hagigi ampa na masambor, balaskonon-Ku do bani ulu ni sidea pambahenan ni sidea ai,'" nini Tuhan Jahowa.

Parmisir ni Hamuliaon ni Jahowa hun Jerusalem

²² Dob ai ipaherbang herubim ai ma habong ni sidea, anjaha mangihut do galapang na i lambung ni sidea ai, anjaha hamuliaon ni Jahowa do i atas ni sidea.

²³ Jadi naik ma hamuliaon ni Jahowa hun tongah-tongah ni huta ai, anjaha sogop ma i atas ni dolog na hampit hapoltakan ni huta ai.

²⁴ Anjaha iangkat Tonduy ai ma ahu, anjaha iboan ma ahu ibagas panonggoran marhitei Tonduy ni Naibata hu tanoh ni halak Kasdim, hubani na tarbuang ai. Dob ai laho ma panonggoran na huidah ai humbangku.

²⁵ Jadi huhatahon ma bani na tarbuang ai haganup hata ni Jahowa, na pinatalarni ai hu bangku.

Igambarhon Naibata Parbuang ni Bangsa Juda marhitei Ulah na Binahen ni si Hesekiel

12 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, i tongah-tongah ni bangsa sipanlawan do ho marianan, na marmata laho mangidah, tapi seng marpangidah, na marpinggol laho mambogei namin, tapi seng marpambogei, ai bangsa sipanlawan do sidea.

³ “Ale anak ni jolma, pasirsir ma bam ugas-ugas hu habuangan anjaha misir ma ho arian ididah sidea. Ra mangahap do sidea, ai bangsa sipanlawan do sidea.

⁴ Padarat ma barangmu arian ididah sidea, songon ugas-ugas laho hu habuangan; tapi anggo ho bodari ma laho ididah sidea, songon na masa bani halak na tarbuang.

⁵ Runtas ma dingding ai ididah sidea, anjaha hunjai ma ho hu darat.

⁶ Usung ma ugas-ugasmu bani abaramu ididah sidea, anjaha dob golap ari boan ma ai; rungkub ma bohimu, ase ulang ididah ho tanoh in; ai Ahu do na pabingkat ho gabe tanda bani halak Israel.”

⁷ Jadi hubahen ma songon na tinonahkon ai hu bangku; hupadarat ma ugas-ugasku arian songon na laho hu habuangan, anjaha bodari huruntas ma dingding ai marhitei tanganku sandiri; anjaha dob golap ari luar ma ahu mangusung ugas-ugaskai ididah sidea.

⁸ Anjaha patarni ai roh ma hata ni Jahowa hu bangku, Mangkatahon,

⁹ “Ale anak ni jolma, ai seng dong humbani bangsa Israel, bangsa sipanlawan in, mangkatahon hubam, ‘Aha do na binahenmin?’

¹⁰ Hatahon ma bani sidea, sonon do hata ni Tuhan Jahowa, ‘Mangonai bani raja na i Jerusalem do in pakon bani ganup bangsa Israel na i tongah-tongahni ai.’

¹¹ Hatahon ma, ‘Ahu do tanda bennima; songon na Hubahen ai, sonai do mangonai bani sidea, maningon bingkat do sidea hu habuangan.

¹² Anjaha raja na i tongah-tongah ni sidea ai maningon usungonni do ugas-ugas bani abarani sanggah na luar ibagas na golap; dingding do

runtasonni laho luar. Rungkubonni do bohini, ase ulang ididah tanoh ai.

¹³ Anjaha paherbangon-Ku do puhot-Ku i babouni, anjaha dapot do ia ibahen siding-Ku. Boanon-Ku do ia hu Babel, hu nagori ni halak Kasdim, tapi seng idahon ni nagori ai, anjaha ijai do ia matei.

¹⁴ Anjaha bani sagala deisa do paerapon-Ku sagala halak na mangkasomanisi, sipangurupi bani ampa haganup balani; sintakon-Ku do podang hun pudu ni sidea.

¹⁵ Jadi tandaon ni sidea ma, Ahu do Jahowa, anggo domma Huerap sidea hu tongah-tongah ni bangsa-bangsa anjaha mambur sidea Hubahen bani nagori-nagori ai.

¹⁶ Tapi paturuton-Ku do deba tading humbani sidea, na maluah humbani podang, humbani lohei ampa sampar, ase sidea ma na mambaritahon sagala hasamboron ni sidea i tongah-tongah ni sagala bangsa, parmerapan ni sidea ai, ase itanda sidea, Ahu do Jahowa.’’

¹⁷ Dob ai roh ma hata ni Jahowa hu bangku, mangkatahon,

¹⁸ “Ale anak ni jolma, pangan ma rutimu hitir-hitir, anjaha inum ma bahmu ibagas na gobir ampa hasosakan.

¹⁹ Anjaha hatahon ma pasal bangsa na i nagori ai, ‘Sonon do hata ni Tuhan Jahowa, pasal pangisi ni Jerusalem, na i tanoh Israel, maningon hitir-hitir

do panganon ni sidea ruti ni sidea, anjaha gobir inumonni bah ni sidea, ai halong ma tanoh ni sidea anjaha hona rampas sagala na dongni halani hajahaton ni sagala pangisini.

²⁰ Tarulang ma huta-huta na niiankon, anjaha lungun ia tanoh ai; jadi tandaonnima ma, Ahu do Jahowa.”

Pinsang-pinsang bani Halak na Mapas bani Panjahaion

²¹ Dob ai roh ma hata ni Jahowa hu bangku, mangkatahon,

²² “Ale anak ni jolma, sahap aha do in sinahapkonni i tanoh Israel, na mangkatahon, ‘Dokah ope ari ai, anjaha seng tongon na hinatahon ni panjahaion.’

²³ Halani ai hatahon ma bani sidea, sonon do hata ni Tuhan Jahowa, ‘Parontihonon-Ku do sahap-sahap ai, anjaha seng be luarhonon ni sidea umpama ai i Israel.’ Tapi hatahon ma bani sidea, ‘Dohor ma ari ai, anjaha saud ma ganup panjahaion.’

²⁴ Ai seng dong be hu lobeian on panonggoran sipaoto-oto atap panjahaion na pakahouhon i tongah-tongah ni bangsa Israel.

²⁵ Tapi Ahu, Jahowa sandiri ma na marsahap, anjaha hata na Huhatahon, maningon saud do ai. Seng be padokah-dokahon ai, tapi bani

panorangnima ope, ale bangsa sipanlawan, marsahap Ahu anjaha pasaudon-Ku ai,” nini Tuhan Jahowa.

²⁶ Dob ai roh ma hata ni Jahowa hu bangku mangkatahon,

²⁷ “Ale anak ni jolma, tonggor ma, sidea bangsa Israel Mangkatahon, ‘Panonggoran na nididahni ai, dokah ope ai, anjaha manjahai do ia pasal panorang na daoh ope.’

²⁸ Halani ai hatahon ma bani sidea, sonon do hata ni Tuhan Jahowa, ‘Seng be sipadokah-dokahon hatang-Kin; tapi hata na dob huhatahon in pasaudon ma,’” nini Tuhan Jahowa.

Uhum bani Nabi Sipakulah-kulah

13 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, manjahai ma ho dampak nabi ni Israel; manjahai anjaha marsahap ma ho bani sidea, na manjahai humbani pingkiran ni sidea. Tangihon ma hata ni Jahowa!

³ Sonon do hata ni Tuhan Jahowa, Magou ma nabi-nabi na oto ai, na paihut-ihut tonduyni sandiri, na so tongon dong nididahni.

⁴ Songon sorigala, na marianan bani reong-reong, sonai do nabimu, ale Israel.

⁵ Seng ijaga sidea bungbung ni tembok, atap ipajongjong tembok mangondingi ginompar ni

Israel, ase tahan sidea jongjong ibagas paruntolon bani ari ni Jahowa.

⁶ Sipaoto-oto do panonggoran ni sidea, pakahouhon do panjahaionni. Nini sidea, 'Sonon do hata ni Jahowa; hape sedo Jahowa na marsuruh sidea, anjaha mangarap do sidea bani parsaud ni hata ai.'

⁷ Ai lang panonggoran sipaoto-oto do na nididahnima anjaha panjahaion ladung do hinatahonnima, sanggah na hinatahonnima ai: "Hata ni Jahowa", age pe sedo Ahu na mangkatahon ai?'

⁸ Halani ai sonon do hata ni Tuhan Jahowa, 'Halani isahapkon hanima sipaoto-oto anjaha ladung do na nididahnima ai, halani ai, tonggor ma, imbang-Ku ma hanima,' nini Tuhan Jahowa.

⁹ 'Anjaha tangan-Ku ma na mangonai bani nabi na marpanonggoran sipaoto-oto ai, anjaha na manjahai ladung ai; seng masuk be sidea bani humpulan ni bangsang-Ku, atap tarsurat bani register ni bangsa Israel, anjaha seng masuk be sidea hu tanoh ni Israel, jadi botohonnima ma, Ahu do Tuhan Jahowa.'

¹⁰ Halani tongon, halani pinakahou ni sidea ai bangsang-Ku, Nini, 'Damei do!' Hape seng dong damei, anjaha anggo ipauli bangsa ai tembok tanoh, gabe tonggor ma, roh do sidea mangkapur ai,

¹¹ halani ai hatahon ma bani pangkapur ai, paboa maningon marumbak do ai. Roh do udan na mapor, mardabuhan udan sira-sira anjaha mangombus logou na marhaba-haba,

¹² anjaha tonggor ma, marumbak ma tembok ai. Ai lang hatahonon ni halak ma bannima, 'Ija do hapur, na nilapuhonnima hujai?'

¹³ Halani ai sonon do hata ni Tuhan Jahowa, Parohon-Ku do haba-haba ibagas ringis-Ku, anjaha pamasalon-Ku udan na mapor ibagas gilang-Ku ampa udan sira-sira na parah ibagas marah-Ku, laho mamboiskon ai.

¹⁴ Anjaha reongkonon-Ku do tembok na dob hinapurnima ai, padosdoson-Ku do ai pakon tanoh, gabe tidak ma onjolanni; anggo marumbak huta ai, bois ma hanima ibagas, jadi tandaonnima ma, Ahu do Jahowa.

¹⁵ Anjaha pasogopon-Ku ma ringis-Ku bani tembok ai ampa bani sipangkapuri ai, anjaha hatahonon ni halak ma bannima, 'Seng dong be tembok ai, sonai homa sipangkapuri ai,'

¹⁶ ai ma nabi-nabi ni Israel, na manjahai pasal Jerusalem, na mangambilankon damei hubani huta ai, hape seng dong damei," nini Tuhan Jahowa.

Uhum bani Naboru Sipakulah-kulah

¹⁷ "Anggo ho, ale anak ni jolma, dompakkon ma bohimu manlawan boru ni bangsamu, na manjahai

humbani pingkiranni sandiri; manjahai ma ho
dompok sidea,

¹⁸ anjaha hatahon ma, sonon do hata ni Tuhan
Jahowa, 'Bursik ma naboru, na mambahen
balut-balut uti-utian bani pargolongan anjaha na
mambahen tudung-tudung bani ulu ni halak na
maetek ampa na godang, laho manangkap tonduy
ni halak! Ai sihol pamateonnima do tonduy ni halak
humbani bangsang-Ku, anjaha na legan ipagoluh
hanima halani labanima?

¹⁹ Mahiri do Ahu ibahen hanima i tongah-tongah
ni bangsang-Ku halani gandum sannangging
ampa ruti sansayat, marhitei na mamunuh
tonduy na so patut bunuhon, ampa marhitei
na pagoluhkon tonduy na so patut pagoluhon,
marhitei ladungnima bani bangsang-Ku, na ra
patangi-tangi ladung ai.'

²⁰ Halani ai sonon do hata ni Tuhan Jahowa,
'Tonggor ma, Ahu do imbang ni balut-balut
uti-utiannima, na pinakeini ma manangkap tonduy
ni jolma; rotapon-Ku do ai humbani tangannima,
anjaha paluahon-Ku do tonduy na pinarburunima
songon manuk-manuk.

²¹ Tudung-tudungnima ai pe parrigaton-Ku do,
anjaha paluahon-Ku do bangsang-Ku hum bagas
tangannima, anjaha seng be songon sorohan sidea
ibagas tangannima, anjaha tandaonnima ma, Ahu
do Jahowa.

²² Halani ipusoki hanima uhur ni halak parpintor marhitei sipaoto-oto hape anggo Ahu seng onggga Hupusoki sidea, anjaha halani ipargogohi hanima parjahat in, gabe seng surut ia humbani parlahouni na masambor, laho pagoluhkon tonduyni.

²³ halani ai seng be marpanonggoran sipaoto-oto hanima, anjaha seng be manjahai ladung hanima. Paluahon-Ku do bangsang-Kin humbani tangannima, jadi tandaonnima ma, Ahu do Jahowa.’”

Itulak Jahowa do Halak na Marpangajaman bani Naibata na Legan

14 ¹ Dob ai roh ma deba humbani pangintuai ni Israel marayak ahu, anjaha hundul ma sidea i lobeihu.

² Jadi roh ma hata ni Jahowa hu bangku, mangkatahon,

³ “Ale anak ni jolma, ia dalahi-dalahi on, marpangajaman bani gana-gana do uhur ni sidea ibagas, anjaha na mambahen madabuh sidea hubagas hajahaton, dohor do ipajongjong sidea i lambungni; mintor ra ma Ahu panungkunan ni sidea?

⁴ Halani ai marsahap ma ho bani sidea anjaha hatahon ma bani sidea, sonon do hata ni Tuhan Jahowa, ‘Barang ise humbani ginompar ni Israel na marpangajaman bani gana-gana

uhurni ibagas, anjaha ipajongjong i lambungni sibahen pardabuhan bani hubagas hajahaton, age pe sonai iparayak do nabi, jadi Ahu, Jahowa sandiri ma na marbalos bani, halani buei ni sisombah-sombahonni,

⁵ ase mangahap Hubahen uhur ni ginompar ni Israel ibagas, halani na marbalik ai sidea hun Bangku, halani gana-gana ni sidea na buei ai.'

⁶ Halani ai hatahon ma bani ginompar ni Israel, sonon do hata ni Tuhan Jahowa, 'Paubah hanima ma uhurnima, tundalhon hanima ma gana-gananima, anjaha padaoh hanima ma humbani haganup hasamboronima.

⁷ Barang ise humbani ginompar ni Israel atap halak na legan, na manginsolat i tongah-tongah ni halak Israel, na paholangkon dirini hun Bangku, na marpangajaman uhurni ibagas bani gana-ganani, anjaha na pajongjong dohor i lambungni sibahen pardabuhan bani hubagas hajahaton, age pe sonai iparayak do nabi, laho manungkun haporluanni hun Bangku, jadi Ahu, Jahowa sandiri ma na marbalos bani.

⁸ Dompakkonon-Ku ma bohing-Ku mangimbang dalahi ai, bahenon-Ku ma ia gabe tanda ampa umpama, anjaha boiskonon-Ku ma ia hun tongah-tongah ni bangsang-Ku, jadi tandaonnima ma, Ahu do Jahowa.

⁹ Anjaha anggo taroto nabi ai, gabe marpodah ia, Ahu, Jahowa do na mambahen taroto ia, anjaha pagostongon-Ku ma tangan-Ku manlawansi, anjaha boiskonon-Ku ma ia hun tongah-tongah ni bangsang-Ku Israel.

¹⁰ Anjaha porsanon ni sidea ma uhum na bani sidea, dos do uhum bani nabi ai ampa uhum bani sipanungkun ai,

¹¹ ase ulang be kahou ginompar ni Israel manlembang hun Bangku, anjaha ulang be ipabutak dirini marhitei ganup hajahaton ni sidea ai, tapi ase gabe bangsang-Ku ma sidea, anjaha Ahu gabe Naibata ni sidea,” nini Tuhan Jahowa.

Legan do Pambalason ni Naibata bani Dousa ni Bangsa Parbegu Marimbang Jerusalem

¹² Dob ai roh ma hata ni Jahowa hu bangku, mangkatahon,

¹³ “Ale anak ni jolma, anggo mardousa sada nagori dompak Ahu, marhitei na mangelukkon padan, gabe Hupagostong tangan-Ku manlawan nagori ai, anjaha Huparseda parbohalanni, Huparoh lohei, Huboiskon hunjai jolma age pinahan,

¹⁴ anjaha porini pe ijai sitolu halak on, ai ma si Noak, si Daniel pakon si Job, hosah ni sidea sandiri do hansa tarpaluah sidea marhitei hapintoron ni sidea,” nini Tuhan Jahowa.

¹⁵ “Ai anggo Huparoh binatang panoroh mawat-awat i nagori ai, gabe iboiskon pangisini, mambahen tarulang nagori ai, gabe seng dong halak na ra mamontas hunjai halani binatang ai,
¹⁶ anjaha porini ijai pe sitolu halak ai (*songon sintongni Ahu manggoluh, nini Tuhan Jahowa*), seng anjai tarpaluah sidea anak atap boru; tapi pitah sidea do maluah, tapi tarulang do anggo tanoh ai.

¹⁷ Atap anggo Huparoh podang hu nagori ai, anjaha ning-Ku, ‘Podang ma manraseihon i nagori in!’ Gabe ripas Hubahen hunjin jolma age pinahan,
¹⁸ anjaha porini pe ijai sitolu halak ai (*songon sintongni manggoluh Ahu, nini Tuhan Jahowa*), seng anjai tarpaluah sidea anak atap boru, pitah sidea do hansa maluah.

¹⁹ Atap anggo Hutongos sampar hu nagori ai, anjaha Huuseihon ringis-Ku hujai marhitei na manduruskon daroh, laho mamboiskon jolma age pinahan,

²⁰ anjaha porini pe ijai si Noak, si Daniel ampa si Job (*songon sintongni manggoluh Ahu, nini Jahowa*), seng anjai tarpaluah sidea anak atap boru; hosah ni sidea sandiri do hansa tarpaluah sidea marhitei hapintoron ni sidea.”

²¹ Ai sonon do hata ni Tuhan Jahowa, “Age pe Husuruh hu Jerusalem uhum-Hu na ompat in, ai

ma podang, lohei, binatang panoroh ampa sampar, laho mamboiskon hunjai jolma pakon pinahan.

²² tonggor ma, dong do na tading ijai, na maluah, na mamboan anak ampa boru mandarat. Sidea ai ma na roh bannima, idahonnima ma parlahou ampa pambahenan ni sidea, gabe tarapoh uhurnima, age pe Huparoh hamagouan hu Jerusalem ampa haganup na Hupasogop ai hujai.

²³ Jadi tarapoh ma uhurnima halani sidea, anggo ididah hanima parlahou ampa pambahenan ni sidea. Jadi botohonnima ma, paboa sedo na so marhala haganup na Hubahen ai bani Jerusalem,” nini Tuhan Jahowa.

Songon hayu ni hayu anggur na so marguna i lobei ni Jahowa

15 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, aha do hasurungan ni hayu ni hayu anggur marimbang hayu ni hayu na legan atap ranting ni hayu anggur ai i tongah-tongah ni hayu harangan.

³ Ai adong do tarbuat hunjai parhayu? Ai ibuat halak do hunjai sangkotan bahen panangkotan ni ugas-ugas?

⁴ Tonggor ma, ibahen do ai pagara apuy; anggo domma iboiskon apuy tampakanni na dua ai,

anjaha tongah-tongahni ai monsong, ai marguna ope atap bahen aha ai?

⁵ Tonggor ma, gari sanggah dear ope ai, seng ipargunahon atap bahen aha pe; samintolah ma dob monsong, mintor marguna ma ai atap aha pe?”

⁶ Halani ai sonon do hata ni Tuhan Jahowa, “Songon hayu ni hayu anggur i tongah-tongah ni hayu harangan Hubahen gabe sipanganon ni apuy, sonai do ondoskonon-Ku pangisi ni Jerusalem.

⁷ Dompakkonon-Ku do bohing-Ku mangimbang sidea; age pe maluah sidea humbani apuy ai, tapi boiskonon ni apuy do sidea; jadi botohonnima ma, Ahu do Jahowa anggo Hudompakkon ma bohing-Ku mangimbang sidea.

⁸ anjaha tarulang hubahen tanoh ai, halani mangosei padan sidea,” nini Tuhan Jahowa.

Jerusalem Ipausih bani Sada Naboru na So Bujur bani Paramangonni

16 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, pabotohkon ma bani Jerusalem sagala hasamboronni,

³ anjaha hatahon ma, sonon do hata ni Tuhan Jahowa bani Jerusalem, ‘Harohanmu ampa hatubuhanmu tanoh ni halak Kanaan do, bapamu halak Amori do anjaha inangmu boru Het.

⁴ Anjaha partubuhmu sonon do: Bani ari partubuhmu seng irotap pusogmu, anjaha seng iparidi ho bani bah laho paborsihkon ho; seng ilapuhon bam garam, barang ibalutkon bam ampan.

⁵ Ise pe lang dong na maridop ni uhur bam laho mambahen na sonai ai bam, halani holong ni uurni bam, tapi iambungkon do ho hu darat, halani magigi do halak mangidah ho bani partubuhmu.'

⁶ Anjaha sanggah na montas Ahu hun lambungmu, anjaha huidah ho margulu-gulu ibagas darohmu, jadi ningku ma dompak ho na margulu-gulu daroh ai, 'Manggoluh ma ho!' tongon, Huhatahon do bam, ho na margulu-gulu daroh, 'Manggoluh ma ho!

⁷ Anjaha marbanggal ma ho songon suan-suanan na i ladang. Jadi magodang ma ho, matoras anjaha jenges, punar bagod-bagodmu anjaha marganjang jambulanmu, tapi seng marhiou anjaha talanjang do ho.

⁸ Jadi sanggah na montas Ahu hu lambungmu use, anjaha mangkawah Ahu bam, tonggor ma, jumpah ma panorangni boi ma riridon ho. Jadi Hupaherbang ma hiou-Hu bam, laho manrungkub hatalanjangonmu, marbulawan ma Ahu bam, anjaha marpadan ma Ahu pakon ho,' nini Tuhan Jahowa, 'Jadi Ahu ma simada ho.

⁹ Jadi Huparidi ma ho bani bah, anjaha Huusah ganup daroh ai hun bam, Huminaki ma ho bani minak.

¹⁰ Huparhioui ma ho marhitei pakeian na marbagei rupani, anjaha Hubahen ho marsipatu kulit na maharga; Hubahen ma ho marsabing-sabing na alus ampa martudung-tudung sitora.

¹¹ Hubahen ma ugasmu buei; golang Hubahen bani tanganmu anjaha sinongkok bani borgokmu.

¹² Hubahen ma tintin bani igungmu, anting-anting bani pinggolmu, ampa sortali na majenges bani ulumu.

¹³ Jadi jenges ma ho halani omas ampa pirak ai; pakeianmu humbani hiou na alus, humbani sitora ampa hiou na marbagei rupani. Mangan topung na alus ma ho, manisan ampa minak. Gabe jenges tumang ma ho, talup tongon gabe raja.

¹⁴ Jadi sar ma baritamu hu tongah-tongah ni bangsa-bangsa halani hinajengesmu, panjagar na Hubahen bam,' nini Tuhan Jahowa.

¹⁵ 'Tapi martenger ni uhur do ho bani hinajengesmu, anjaha mambahen parriah-riahan do ho halani tarmurmur ipabangkiskon ho do dirimu bani ganup halak na mamontas.

¹⁶ Ibuat ho do deba humbani pakeianmu, laho paulihon bam panumbahan bani buntu-buntu, anjaha ijai idalankon ho do parbangkison; na sonai ai seng onggaa anjaha seng anjai masa be.

¹⁷ Ibuat ho do homa ugasmu na jenges in, na pinauli humbani omas ampa pirakku, na Hubere bam; ipauli ho do hunjai gana-gana dalahi anjaha marbangkis do ho pakonsi.

¹⁸ Ibuat ho do pakeianmu sibagei rupa ai, laho mangkioui ai, anjaha inahkon ho do minak-Ku ampa dahupang-Ku i lobeini.

¹⁹ Anjaha sipanganon, na Hubere bam, ai ma topung na alus, minak ampa manisan, na Hubere bam bahen sipanganonmu, inahkon ho do ai hu lobeini gabe galangan na misbou,' nini Tuhan Jahowa.

²⁰ 'Ambah ni ai ibuat ho do anakmu pakon borumu, na tinubuhkonmu Bangku, anjaha igalangkon ho do sidea bani sidea, gabe sipanganonni. Ai hurang ope parbangkisonmai,

²¹ ase isayati ho ope anak-Ku, anjaha iondoskon ho sidea tutungon ibagas apuy laho manambah sidea?

²² Anjaha bani haganup hasamboronmu ampa parbangkisonmai seng idingat ho panorang haposoonmu, ai ma sanggah na so marhiou ampa na talanjang ai ho, na margulu-gulu daroh ai ho.

²³ Anjaha dob ibahen ho sagala hajahaton ai - 'bursik, bursik ma ho,' nini Tuhan Jahowa -

²⁴ ipauli ho do bam anjapanjap ianan marbangkis, anjaha ibahen ho do bam ianan na pinagijang bani ganup alaman.

²⁵ Tongon, bani ganup sirpang ni dalam ipauli ho do ianan na pinagijang, anjaha ibere ho do maseda hajengesonmu, iondoskon ho do dirimu bani ganup pamontas anjaha buei do parriah-riahan idalankon ho.

²⁶ Marriah-riah do ho homa pakon halak Masir, simbalogmu na garang ai; buei do parriah-riahan idalankon ho, mambahen manringis Ahu.

²⁷ Halani ai tonggor ma, Hupagostong do tangan-Ku manlawan ho, anjaha Huorui tanoh parbagiananmu, huondoskon do ho bani munsumu paruhur haut, ai ma boru Palistim, na maila mangidah parlahou hasamboronmu.

²⁸ Marriah-riah do homa ho pakon halak Assur, halani lape sombuh uhurmu, marriah-riah do ho tene pakon sidea, hape lanjar do seng sombuh uhurmu.

²⁹ Lambin itambahi ho do parriah-riahonmu pakon nagori partiga-tiga ai, ai ma Kasdim, tapi age marhitei ai lanjar do seng sombuh uhurmu.

³⁰ Garang ni ai uhurmu,' nini Tuhan Jahowa, 'gabe ihorjahon ho haganupan ulah ni boru jalang na bolon,

³¹ ipauli ho do anjapanjap ianan marbangkis bani sirpang ni ganup dalam, anjaha ibahen ho do bam ianan na pinagijang bani ganup alaman; tapi sedo boru jalang na somal ho, ai itulak ho do upah.

³² Ale parinangon siparbangkis na manrohop halak na legan gantih ni paramangonni sandiri.

³³ Ibere halak do upah bani boru jalang, tapi anggo ho, ho use marsibere-bere bani hasomanmu marriah-riah, mambere sisip do ho ase roh sidea hunja-hunja mangayaki ho, laho marriah-riah pakon ho.

³⁴ Ase legan do parriah-riahonmu marimbang naboru na legan, sedo halak na mangirik-irik ho, sedo halak na mambere upah bam, tapi ho do na marsibere-bere; halani ai do, ase na legan do ho.'

³⁵ Halani ai, ale boru jalang, tangihon ma hata ni Jahowa.

³⁶ Sonon do hata ni Tuhan Jahowa, 'Halani na dob ipatar ho hailaonmu anjaha ipatidak ho hatalanjangonmu sanggah na marriah-riah ho pakon hasomanmu marriah-riah, ampa pangkorhon ni haganup gana-ganamu hagigi in ampa pangkorhon ni daroh ni anakmu, na ginalangkonmu bani sidea,

³⁷ halani ai, tonggor ma, pahumpulon-Ku ma haganup siholongi ho, hasomanmu marmalasmalas ni uhur, haganup sidea na hinaholonganmu ampa haganup sidea na hinagigihonmu. Patumpuon-Ku do sidea humbani ganup ianan, anjaha patidakon-Ku do hailaonmu bani sidea, ase ididah sidea ganup hailaonmu.

³⁸ Dabuhon-Ku do uhum bam songon na bani boru jalang ampa bani naboru siduruskon daroh; parohon-Ku do bam ringis ampa parsimburuon

³⁹ Anjaha ondoskonon-Ku do ho hubagas tangan ni sidea, parsedaon ni sidea do anjapanjap parriah-riahanmu, reongkonon ni sidea do iananmu na pinagijang ai; tanggalon ni sidea do pakeianmu, buaton ni sidea do ugasmu na majenges in, anjaha paturuton ni sidea do ho talanjang, seng marhiou.

⁴⁰ Suruhon ni sidea do ho dompak sada humpulan, pargijigon ni sidea ma ho bani batu, anjaha tampulonni do ho bani podang ni sidea.

⁴¹ Tutungon ni sidea ma rumahmu, anjaha dalankonon ni sidea ma uhum bam, i lobei ni buei naboru; parontihonon-Ku ma parriah-riahonmai, gabe seng be padalan sibere-bere ho.

⁴² Jadi sombuh ma ringis-Ku dompak ho, anjaha seng be marsimburu Ahu bam, sonang ma Ahu, seng be manringis.

⁴³ Halani seng idingat ho panorang haposoonmu, tapi ipuhoi ho do ringis-Ku marhitei ai haganup, halani ai, tonggor ma, balaskonon-Ku do pambahenanmu bani ulumu,' nini Tuhan Jahowa. 'Ai lang habutakon do ihorjahon ho tambah ni hasamboronmai?'"

Ipatotap Jahowa do Padan-Ni bani Jerusalem

⁴⁴ “Tonggor ma, haganup halak na marumpamahon ho, mangkatahon, ‘Sonai inangni, sonai do boruni.’

⁴⁵ Boru ni inangmu do ho, ai ma na soganan ai bani paramangonni ampa bani anakni; sanina ni saninamu do ho, ai ma sidea na mangambukkon paramangonni ampa anak ni sidea, halani magigi. Boru Het do inangnima anjaha bapanima halak Amori.

⁴⁶ Abangmu do Samaria, ai ma na marianan pakon boruni hampit sambiloumu; anjaha anggimu, na marianan pakon boruni hampit siamunmu, ai ma Sodom.

⁴⁷ Tapi bani mungkahni seng songon parlahou ni sidea parlahoumu, seng ihorjahon ho romban hubani hagigi na hinorjahon ni sidea; tapi lang pala piga dokah, gabe samboran do ho marimbang sidea bani sagala pambahenanmu.

⁴⁸ Songon sintongni manggoluh Ahu,’ nini Tuhan Jahowa, ‘seng dong ihorjahon Sodom, anggimai pakon boruni songon hasamboron na hinorjahonmai ampa borumu.

⁴⁹ Tonggor ma, on do salah ni Sodom ampa boruni: Margijang ni uhur, marmewah-mewah ampa pasonang-sonangkon diri do ia ampa boruni, tapi halak na miskin ampa na masombuh, seng iurupi sidea.

⁵⁰ Margijang ni uhur do sidea, anjaha ihorjahon hasamboron i lobei-Hu, halani ai do ase Huambukkon sidea songon na ididah ho.

⁵¹ Seng ihorjahon Samaria satongah ni dousamu; bahatan do hasamboron ihorjahon ho ase ia; gabe songon na pintor do abangmai pangkorhon ni sagala hasamboron na hinorjahonmai.

⁵² Ho pe, porsan ma habadoronmai, ho na mambahen moru uhum na bani saninamai; halani bajanan do pambahenanmu ase sidea, gabe pintoran do sidea marimbang ho. Patut ma maila ho, anjaha porsan ma habadoronmin, ai gabe songon na pintor do saninamu halani pambahenanmai.

⁵³ Tapi pasuangon-Ku do sidea, ai ma Sodom pakon boruni, sonai Samaria pakon boruni, anjaha pasuangon-Ku do age ho rap pakon sidea,

⁵⁴ ase iporsan ho habadoronmu anjaha maila ho mardingat sagala pambahenanmu, anjaha marhiteihon ni ai do sabou pangahap ni sidea ibahen ho.

⁵⁵ Ia abangmu Sodom ampa boruni mulak suang do, Samaria pe pakon boruni mulak suang do; ho pe ampa borumu mulak suang do songon sapari.

⁵⁶ Ai lang gabe umpama do abangmu Sodom ibagas pamanganmu, bani panorang hagijangon ni uhurmu,

⁵⁷ sanggah lape ipatalar hajahatonmu? Sonari gabe doskonsi do ho, gabe sirisa-risaon bani boru Sodom ampa simbalogni inggot, bani boru Palistim, na inggot mapas mangidah ho.

⁵⁸ Habutakonmai ampa hasamboronmai, maningon porsanonmu do ai,' nini Jahowa.

⁵⁹ Tongon, sonon do nini Tuhan Jahowa, 'Bahenon-Ku do hu bam domu songon na binahenmai, ai ma na mapas ai ho bani bulawan, anjaha iosei ho padan.

⁶⁰ Age pe sonai, ingaton-Ku do padan-Ku bam bani panorang haposoonmu, anjaha pajongjongon-Ku do padan sisadokah ni dokahni pakon ho.

⁶¹ Jadi taringat ma ho bani parlahoumu anjaha bador ho, anggo Huain ma abangmu pakon anggimu, anjaha Hubere sidea gabe boru bam, age pe seng maronjolan ai hubani padan na Hubere bam.

⁶² Anjaha pajongjongon-Ku do padan-Ku hu bam, ase ibotoh ho, Ahu do Jahowa,

⁶³ ase tong idingat ho ai, gabe maila ho, anjaha seng be mungkab pamanganmu halani habadoronmu, anggo Husaloseihon ma ganup binahenmai,'" nini Tuhan Jahowa.

Umpama na Manggambarhon Parbalikon ni Raja Sedekia hun Babel Laho hu Masir

17 ¹ Dob ai roh ma use hata ni Jahowa hu
bangku, mangkatahon,

² “Ale anak ni jolma, marhutinta anjaha
marumpama ma ho bani halak Israel,

³ hatahon ma, sonon do hata ni Tuhan Jahowa,
‘Adong ma sada manuk-manuk nanggordaha na
banggal bolag habongni, ganjang-ganjang lai-laini,
anjaha buei do ambuluni na marrintik-rintik; roh
do ia hu Libanon, anjaha ibuat do ujung ni hayu
ares ai,

⁴ iputiki do dangkah-dangkahni siatasan, iboan ma
ai hu nagori partiga-tigaan, anjaha inahkon ma ai
hu huta ni partiga-tiga.

⁵ Ibuat do homa bonih na i nagori ai, anjaha isuan
ma ai bani tanoh na lambutan, na sungkupan bani
bah; isuankon do ai i topi ni bah.

⁶ Jadi martumbor ma ai gabe hayu anggur na tabun,
toruh pardangkahni, surdung do rantingni hu
bani, anjaha tading i toruhni do uratni. Gabe hayu
anggur ma ai, mardangkahi anjaha marrantingi.

⁷ Tapi adong ma manuk-manuk nanggordaha na
legan anjaha na banggal, bolag habongni anjaha
buei ambuluni; anjaha tonggor ma, iegotkon hayu
anggur ai ma uratni bani manuk-manuk ai, anjaha
surdung ma ranting-rantingni ai hu bani, ase ia ma

mangarbahisi, lobih dearan nini uhurni humbani na bani iananni ai;

⁸ hape bani tanoh na lambutan, na sungkupan bah do ia na isuan ai, ase boi mardangkahi ia, ramos marbuahi anjaha gabe hayu anggur na madear namin.'

⁹ Hatahon ma, sonon do hata ni Tuhan Jahowa, 'Ai boi do saud ai? Ai lang hona dokdok ma uratni, anjaha hona parseda bulungni gabe melus bulungni na martumbor ai. Gabe melus ma ia tongon, anjaha seng pala marhitei kuasa na gogoh atap buei halak hona dokdok ma ia rap pakon uratni.

¹⁰ Tonggor ma, dear do ia hona suan, tapi boi do jadi ai? Ai lang mintor melus tumang ma ai, anggo hona ombus ibahen logou na hun hapoltakan, melus bani ianan hatubuhanni ai?'"

¹¹ Dob ai roh ma hata ni Jahowa hu bangku, mangkatahon,

¹² "Hatahon ma bani bangsa sipanlawan ai, 'Seng ibotoh hanima, aha do arti ni ai?' Hatahon ma, 'Tonggor ma, roh do raja ni Babel hu Jerusalem, anjaha itangkapi do rajani ampa kopala-kopalani, anjaha iboan ma sidea hu Babel.

¹³ Anjaha ipabangkit do sada humbani ginompar ni raja ai, marpadan do ia pakonsi anjaha ipabija do ia; tapi na sangap-sangap ni tanoh ai iboan do,

¹⁴ ase mangunduk harajaon ai ulang manlawan, ase ijolom padanni gabe jonam ia.

¹⁵ Tapi marbalik do ia hun bani, marhitei na marsuruh suruhanni hu Masir, ase ibere hubani huda pakon buei bala. Ai tarpasaudsi do ai? Ai maluah do halak na mambahen sisonai? Siosei padan, boi do maluah?

¹⁶ Songon sintongni manggoluh Ahu,' nini Tuhan Jahowa, 'Tongon, bani ianan ni raja ai, na pabangkitkansi gabe raja, na pabijahonsi, tapi iapasi, na mambere padan bani, tapi iosei, i tongah-tongah ni Babel do ia matei.

¹⁷ Anjaha seng tarurupi Parao ia marhitei buei balani ampa bahat jolma sanggah porang ai, ai ma bani panorang ipadear halak hubuan ampa tembok pangkubu laho manraseihon buei jolma.

¹⁸ Hubani na hampung uhurni bani bijani, anjaha iosei padan ai, halani na dob marjabat tangan ia, tapi idalankon do ganupan ai, seng anjai maluah ia.'

¹⁹ Halani ai sonon do hata ni Tuhan Jahowa, 'Songon sintongni manggoluh Ahu, bija na niapasanni ampa padan-Ku na nioseini ai, maningon mangonai do ai bahenon-Ku bani uluni.

²⁰ Rungkubon-Ku ma puhot-Ku hu atasni anjaha dapot siding-Ku do ia, jadi Huboan ma ia hu Babel anjaha uhumon-Ku ma ia ijai, halani na mangosei ai ia dampak Ahu.

²¹ Anjaha ganup tentara pilihanni maningon rasei do bahenon ni podang, anjaha na tading ai erapon do bani ganup deisa, ase ibotoh hanima, Ahu do Jahowa, na marsahap ai.’

²² Sonon do hata ni Tuhan Jahowa, ‘Ahu sandiri ma na mambuat sada ranting humbani ujung ni hayu ares na gijang ai, anjaha Husuan ma ai; anjaha putikkonon-Ku do sada tumbor humbani dangkahni pardatas ai, anjaha suanon-Ku ma ai bani sada dolog na gijang anjaha na bangga.

²³ Bani dolog ni Israel na gijang ai do suanon-Ku ai, ase mardangkah janah marbuah, gabe sada hayu ares na marmulia; marianan do i toruh ni binatang-binatang anjaha ibagas linggom ni dangkahni marasar do bagei-bagei ni manuk-manuk.

²⁴ Jadi botohon ni sagala hayu na i talun ma, paboa Ahu do Jahowa, na patoruhkon hayu na gijang anjaha na pagijangkon hayu na toruh. Ahu do na mambahen melus hayu na ratah, anjaha na mambahen martunasi hayu na melus. Ahu do Jahowa na manluarhon ai, anjaha Ahu do na pasaudkansi.’”

**Iuhum Naibata do Ganup Jolma domu hubani
Pambahenanni; lojur Jolma Paubahkon Uhuri**

18 ¹ Dob ai roh ma hata ni Jahowa hu bangku, mangkatahon,

² “Aha do halani ase isahap-sahapkon hanima umpama pasal tanoh Israel: Bapa mangankon buah ni anggur na migar, hape ipon ni anakni do ngiluan?

³ Songon sintongni manggoluh Ahu,” nini Tuhan Jahowa, “seng bulih be sahapkononnima umpama on i Israel.

⁴ Tonggor ma, Ahu do simada ganup tonduy ni jolma, tonduy ni bapa age tonduy ni anak, Ahu do simadasi; ise na mardousa, ia do na maningon matei.

⁵ Anggo pintor sada halak, ihorjahon uhum ampa hapintoron,

⁶ anggo seng ipangan na ginalangkon i atas dolog, seng mangkawah ia dompak gana-gana ni ginompar ni Israel, seng ra ia pabutak parinangon ni hasomanni, anjaha seng idohori sada naboru bani panorang mabutak ia,

⁷ seng dong halak na iodoh-odoh, tapi ipaulak do bani siparutang gadeianni, seng ra ia manrampas, ibere do sipanganon bani na loheian, anjaha iparhioui halak na talanjang,

⁸ seng paanakkon duit ia, seng ra mambuat untung na malobihtu, ipadaoh tanganni humbani hagedukon, sintong panguhumni bani halak na marsalisih,

⁹ marparlahou ia ibagas titah-Ku, anjaha jimot ia mandalankon paraturan-Ku, ai ma halak parpintor,

maningon manggoluh do ia tongon,” nini Tuhan Jahowa.

¹⁰ “Tapi anggo adong tubuh anak ni siparjahat, siduruskon daroh atap sihorjahon na masambor,
¹¹ na so marparlahouhon parlahou ni bapani parpintor ai, tapi ipangan do na ginalangkon i atas dolog, ibutaki parinangon ni hasomanni,

¹² iodoh-odoh na masombuh ampa na madoyuk, idalankon panrampason, seng ipaulak gadeian bani, mangkawah matani dompak gana-gana, ihorjahon hagigi,

¹³ ipaanakkon duitni anjaha malobihtu pambuatni bani untung, ai sipagoluhon do jolma sisonai ai? Seng bulih manggoluh ia, tapi halani ihorjahon haganup hagigi nongkan ai, maningon matei do ia, marsapata hubani do darohni.

¹⁴ Porini tubuh anakni sada, anjaha ididah anak ai sagala dousa na hinorjahon ni bapani, gabe mabiar ia anjaha seng ihorjahon ai,

¹⁵ seng ipangan na ginalangkon i atas dolog, seng ikawahkon gana-gana ni ginompar ni Israel, seng ibutaki jolma ni hasomanni,

¹⁶ seng dong na iodoh-odoh, seng ijalo gadeian, seng idalankon panrampason, ibere sipanganon bani na loheian, iparhioui halak na talanjang,

¹⁷ ipadaoh tanganni humbani hagedukon, seng ipaanakkon duitni atap ibuat untung na mabahattu, idalankon aturan-Ku anjaha ihorjahon do titah-Ku,

seng anjai matei ia halani hajahaton ni bapani, sai na manggoluh do ia.

¹⁸ Tapi ia bapani ai, sipangodoh-odoh anjaha siparrampas ai, sihorjahon na so patut i tongah-tongah ni bangsani, tonggor ma, maningon matei do ia halani hajahatonni.

¹⁹ Hape ihatahon hanima, 'Ai mase ma lang mangonai hubani anak dousa ni bapani?' Halani ihorjahon anak ai uhum ampa hapintoron, idalankon haganup titah-Ku, maningon manggoluh do ia.

²⁰ Ise sipardousa, ia do matei! Sedo anak mamorsan hajahaton ni bapani, anjaha sedo bapa mamorsan hajahaton ni anakni. hapintoron ni parpintor hu bani do sogop, anjaha hajahaton ni parjahat sogop hu bani do.

²¹ Tapi anggo itundalhon parjahat ai haganup dousani, na hinorjahonni, anjaha idalankon haganup titah-Ku, anjaha ihorjahon uhum ampa hapintoron, maningon manggoluh do ia, seng matei.

²² Haganup hajahatonni na hinorjahonni ai, seng hiraon be ai bani; manggoluh do ia halani hapintoron na hinorjahonni ai.

²³ Ai marosuh do uhur-Hu nani mangidah hamatean ni parjahat?" nini Tuhan Jahowa, "ai lang marosuh do uhur-Hu bani parmula ni parjahat in humbani dalanni ase manggoluh ia?"

²⁴ Tapi, anggo manlembang parpintor in humbani hapintoronni, idalankon hajahaton anjaha ihorjahon hasamboron, songon na hinorjahon ni parjahat ai, mintor manggoluh ma ia? Haganup hapintoronni na hinorjahonni ai seng hiraon be bani; halani panundalionni ai ampa dousani na hinorjahonni ai, halani ai do ia matei.

²⁵ Tapi hanima mangkatahon, ‘Seng sintong dalan ni Jahowa!’ Tangihon ma, ale ginompar ni Israel: Mintor lang ma sintong dalan-Ku? Ai lang dalannima do na so sintong?

²⁶ Anggo manlembang parpintor humbani hapintoronni anjaha ihorjahon hajahaton, maningon matei do ia halani ai, maningon matei do ia halani hajahaton na hinorjahonni ai.

²⁷ Tapi, anggo itundalhon parjahat hajahaton na hinorjahonni ai, anjaha ihorjahon uhum ampa hapintoron, na pagoluhkon tonduyni do ia ijai.

²⁸ Halani na dob mangahap ai ia, anjaha itundalhon hajahaton na hinorjahonni ai, maningon manggoluh do ia, lang matei.

²⁹ Tapi ihatahon ginompar ni Israel do, ‘Seng sintong dalan ni Jahowa!’ Mintor ma lang sintong dalan-Ku, ale ginompar ni Israel? Ai lang dalannima do na so sintong?

³⁰ Halani ai, ale ginompar ni Israel, uhumon-Ku do hanima ganup, romban hubani parlahounima,” nini Tuhan Jahowa. “Mulak ma, tundalhon ma haganup

hajahatonnima, ase ulang hajahaton ai parohkon hamagouan bannima.

³¹ Ambukkon hanima ma sagala hajahaton na hinorjahonnima ai dampak Ahu, anjaha parayak hanima ma uhur na baru pakon tonduy na baru. Mase rahanan matei hanima, ale ginompar ni Israel?

³² Tongon, seng marosuh Ahu mangidah matei na matei in,” nini Tuhan Jahowa. “Halani ai paubah hanima ma uhurnima, ase manggoluh hanima.”

Doding Tangis-tangis Pasal Raja-raja ni Juda

19 ¹ Tapi anggo ho, bahen ma sada dodong tangis-tangis pasal panrajai i Israel,

² anjaha hatahon ma, “Songon singa boru-boru do inangmu i tongah-tongah ni singa! Manggompang do ia i tongah-tongah ni anak ni singa, laho pabanggal-banggalhon anakni.

³ Ipagodang-godang do sada humbani anakni ai, gabe singa ajar-ajar do ai; iguruhon do naha manoroh, ibondut do jolma.

⁴ Isuruh bangsa parbegu ma na manlawansi; hona tangkap ma ia ibagas godung ni sidea, iboan sidea do ia, ihalihiri hu tanoh Masir.

⁵ Dob ididah inangni hiranana ia anjaha seng saud pangarapanni ai, ibuat ma sada humbani anakni na legan, anjaha iajar ma ai gabe singa ajar-ajar.

⁶ Mardalani do ia i tongah-tongah ni singa, gabe singa ajar-ajar do ia; iguruhon do naha manoroh, ibondut do jolma.

⁷ Iparsea do bentengni anjaha iparreong huta-hutani; tarsonggot do nagori ampa pangisini halani sora ni paraumni.

⁸ Roh ma marurup bangsa-bangsa mandorabsi inggot; ipaherbang sidea do puhotni i babouni; hona tangkap do ia ibagas godung ni sidea.

⁹ Ihalihiri do ia, ipamasuk hubagas harang, anjaha iboan hubani raja ni Babel; dob ai ipamasuk ma ia hubagas tutupan, ase ulang tarbogei be sorani i atas ni dolog ni Israel.

¹⁰ Songon hayu anggur do inangmu ibagas pohon anggur, na sinuan i topi ni bah mardalan; ramos buahni anjaha marrantingi halani buei ni bah.

¹¹ Tarpakei do dangkahni bahen tungkot harajaon halani jengesni, manjurjur do ai hu atas i tongah-tongah ni rantingni; taridah do ai humbani na daoh halani gijangni ampa tabunni.

¹² Tapi hona orbat ma hayu anggur ai ibagas ringis, anjaha igijigkon hu tanoh; melus ma ai ibahen logou hapoltakan, buahni mangkatangtang; ipansuakkon ma

dangkahni na dear ai, gabe sipanganon ni apuy.

¹³ Anjaha sonari tarsuan do ai i halimisan bani tanoh dorging-dorging, na so marbah.

¹⁴ Luar do apuy humbani dangkahni, bois ipangan ranting ampa buahni, gabe seng dong be tading ijai dangkah na jenges, seng dong be tungkot harajaon laho manrajai.” In ma doding tangis-tangis ai, anjaha saud do ai gabe doding tangis-tangis.

**Panlawanon ni Bangsa ai do Tong Mambahen
Hona Uhum Sidea; age pe sonai lidopi
Naibata do Sidea halani Goran-Ni**

20 ¹ Bani tahun papituhon, bani bulan lima, ari sapuluh, roh ma deba humbani pangintuai-pangintuai ni Israel laho manungkun Jahowa, lanjar hundul ma sidea i lobeihu.

² Jadi roh ma hata ni Jahowa hu bangku, mangkatahon,

³ “Ale anak ni jolma, marsahap ma ho dampak pangintuai-pangintuai ni Israel, hatahon ma bani sidea, sonon do hata ni Tuhan Jahowa, ‘Laho manungkun Ahu do hanima na roh on? Songon sintongni manggoluh Ahu,’ nini Tuhan Jahowa, ‘seng ra Ahu sungkunonnima.’

⁴ Sihol uhumonmu sidea, ale anak ni jolma, sihol uhumonmu? Anggo sonai pabotohkon ma bani

sidea hasamboron na hinorjahon ni ompung ni sidea.

⁵ Hatahon ma bani sidea, sonon do hata ni Tuhan Jahowa, 'Bani panorang, sanggah Hupilih Israel, marbija do Ahu marhitei tangan na tarangkat hubani ginompar ni si Jakob, Hupatalar do diring-Ku bani sidea i tanoh Masir, marbija do Ahu bani sidea, ning-Ku, Ahu do Jahowa, Naibat анима.

⁶ Bani panorang ai Hubijahon do bani sidea, paboa paluaron-Ku do sidea hun tanoh Masir hu tanoh na dob Hupilih bani sidea, tanoh habaoran ni dadih ampa manisan, tanoh sijengesan humbani sagala nagori.

⁷ Anjaha Huhatahon do bani sidea, ganup ma hanima mangambukkon gana-ganima, na manarik panonggornima, anjaha ulang ipabutak hanima dirinima marhitei sisombah-sombahon ni Masir, ai Ahu do Jahowa, Naibat анима.'

⁸ Tapi manlawan do sidea dompak Ahu, seng ra manangihon Ahu; seng dong na ra mangambukkon gana-gana sitarik panonggor ni sidea ai, anjaha seng itadingkon sisombah-sombahon ni Masir. Jadi isura uhur-Hu ma manguseihon ringis-Ku bani sidea, anjaha padalankon gilang-Ku bani sidea i tongah-tongah ni tanoh Masir.

⁹ Tapi seng Hupasaud ai halani goran-Ku, ase ulang butak ai ididah bangsa-bangsa panginsolatan ni sidea ai, ai domma Hupatalar diring-Ku bani

sidea ididah parbegu, marhitei na mambagahkon paluaron-Ku sidea hun tanoh Masir.

¹⁰ Jadi Hubobahon ma sidea mandarat hun tanoh Masir, anjaha Huboan ma sidea hu halimisan.

¹¹ Hubere ma bani sidea titah-Ku, anjaha Hupabotohkon aturan-Ku bani sidea, sidalankonon ni jolma, ase manggoluh ia.

¹² Hubere homa ma bani sidea ari Sabat-Ku, gabe tanda hun Bangku bani sidea, ase ibotoh sidea, paboa Ahu do Jahowa sipapansing sidea.

¹³ Tapi manlawan do dompak Ahu ginompar ni Israel i halimisan; seng marparlahou sidea domu hubani titah-Ku, anjaha itulak do aturan-Ku, sidalankonon ni jolma bahen hagoluhanni, ibutaki sidea do Sabat-Ku. Jadi isura uhur-Hu ma manguseihon ringis-Ku bani sidea i halimisan, laho mambahen bois tumang sidea.

¹⁴ Tapi seng Hupasaud ai halani goran-Ku, ase ulang mahiri ai i lobei ni bangsa parbegu, na mangidah Ahu mambobahon sidea mandarat.

¹⁵ Ambahni ai marbija do Ahu bani sidea i halimisan, paboa na so boanon-Ku be sidea bani tanoh na dob Huberehon bani sidea, ai ma tanoh habaoran ni dadih pakon manisan, tanoh sijengesan humbani sagala nagori,

¹⁶ halani ibuangkon sidea titah-Ku, seng idalankon paraturan-Ku, anjaha ipabutak do ari Sabat-Ku;

tongon, sisombah-sombahon ni sidea do ipaihut-ihut uhur ni sidea.

¹⁷ Tapi maidop do matang-Ku mangidah sidea, gabe seng Huboiskon sidea, anjaha seng rasei sidea Hubahen i halimisan.

¹⁸ Jadi ningku ma dompak anak ni sidea i halimisan: Ulang ma marparlahou hanima domu hubani aturan na binahen ni bapanima, anjaha ulang ma paihut-ihut hanima titah-titah ni sidea, anjaha ulang ma butaki hanima dirinima marhitei gana-gana ni sidea.

¹⁹ Ahu do Jahowa, Naibatanimi; domu hubani aturan-Ku ma hanima marparlahou, titah-Ku ma ramotkon anjaha dalankon hanima!

²⁰ Ari Sabat-Kai, papansing hanima ma ai bahen tanda hun Bangku bannima, ase ibotoh hanima, Ahu do Jahowa, Naibatanimi.

²¹ Tapi manlawan do dompak Ahu age anak ai; aturan-Ku seng iparlahouhon sidea, anjaha titah-Ku seng iramotkon sidea, laho mandalankon ai, sidalankonon ni jolma ase manggoluh ia; ibutaki sidea do Sabat-Ku. Jadi isura uhur-Hu ma manguseihon ringis-Ku dompak sidea anjaha padalankon gilang-Ku bani sidea i halimisan.

²² Tapi Hupasurut do tangan-Ku anjaha seng Hupasaud ai halani goran-Ku, ase ulang mahiri ai i lobei ni bangsa parbegu, na mangidah Ahu mambobahon sidea mandarat.

- ²³ Ambahni ai marbija do Ahu bani sidea i halimisan, laho mangerap sidea hu tongah-tongah ni bangsa-bangsa, anjaha mambahen mambur sidea hu nagori-nagori ai,
- ²⁴ halani seng idalankon sidea titah-Ku, ibuangkon aturan-Ku anjaha ipabutak do ari Sabat-Ku; tongon, sisombah-sombahon ni sidea do ipaihut-ihut sidea.
- ²⁵ Halani ai Hubere do bani sidea aturan na so madear ampa titah na so boi manggoluh sidea marhitei ai,
- ²⁶ anjaha Hubahen do sidea butak marhitei galangan ni sidea, marhitei na igalangkon sidea ibagas apuy sagala bunga-tubuh ni sidea; ase gok songgot-songgot sidea, anjaha ase ibotoh sidea, Ahu do Jahowa.
- ²⁷ Halani ai, ho ale anak ni jolma, hatahon ma bani ginompar ni Israel, sahapkon ma bani sidea, sonon do hata ni Tuhan Jahowa, 'Inunut ompungnima ope pahiri Ahu, marhitei pangoseion ni sidea Bangku?'
- ²⁸ Ai dob das sidea Huboan hu tanoh na dob Hubijahon, laho mamberehon ai bani sidea, jadi ija ididah sidea buntu-buntu na gijang atap hayu na tabun, ijai do igalangkon sidea galangan ni sidea anjaha iondoskon galangan ni sidea sipuhoi ringis-Ku; ijai do inahkon sidea dahupa ni sidea na misbou, anjaha ijai do iduruskon sidea galangan siinumon ni sidea.

²⁹ Jadi ningku ma bani sidea, 'Ai aha do buntu-buntu na pinarayaknima in?' Halani ai do ase ibahen goran ni Bamah (*ianan na gijang*) ronsi sadari on.

³⁰ Halani ai hatahon ma bani ginompar ni Israel, sonon do hata ni Tuhan Jahowa, 'Ai sihol pabutakonnima do dirinima marhitei pambahenan ni ompungnima, anjaha kahou hanima mangihutkon hagigi na hinorjahon ni sidea ai?'

³¹ Anggo isombahkon hanima galangannima, anjaha igalangkon hanima anaknima ibagas apuy, ipabutak hanima do dirinima marhitei sagala gana-gananima ronsi sadari on. Jadi ra ma Ahu sungkunonnima, ale ginompar ni Israel? Songon sintongni manggoluh Ahu, nini Tuhan Jahowa. Seng ra Ahu sungkunonnima.

³² Anjaha sura-sura ni uhurnima pe, seng anjai saud ai, ai ma na sinurahonnima. Songon bangsa na legan ai ma hita, songon halak na i nagori-nagori na legan ai, na marsombah bani hayu pakon batu.

³³ Songon sintongni manggoluh Ahu, nini Tuhan Jahowa, 'Ahu do Raja bannima marhitei tangan na gogoh, marhitei tangan na pinagostong ampa marhitei ringis na niuseihon.

³⁴ Anjaha boanon-Ku do hanima mulak humbani bangsa-bangsa in, anjaha patumpuon-Ku do hanima humbani nagori hamerapannima marhitei

tangan na gogoh, marhitei tangan na pinagostong ampa marhitei ringis na niuseihon.

³⁵ Anjaha boanon-Ku do hanima hu halimisan ni bangsa-bangsa, anjaha ijai do padalan uhum Ahu bannima padumpar bohi.

³⁶ Songon panguhuming-Ku ijia bani ompungnima sanggah i halimisan na i tanoh Masir, usih sonai do uhumon-Ku hanima,' nini Tuhan Jahowa.

³⁷ 'Pabontaskonon-Ku do hanima hun toruh ni simambu, anjaha bilangon-Ku do hanima tulimat.

³⁸ Anjaha padaohon-Ku do hun tongah-tongahnima sipanlawan ampa halak siparbalik hun Bangku; padaraton-Ku do sidea hun tanoh panginsolatan ni sidea, tapi seng anjai masukan ni sidea tanoh Israel. Jadi botohonnima ma, Ahu do Jahowa.

³⁹ Tapi hanima, ale ginompar ni Israel, sonon do hata ni Tuhan Jahowa, 'Laho ma ganup hanima marsisombah gana-ganani bei, halani seng ra be hanima manangihon Ahu; tapi anggo goran-Ku Na Mapansing in, seng bulih be pabutakonnima marhitei galangannima ampa gana-gananima.

⁴⁰ Ai i atas dolog-Ku Na Mapansing in, bani dolog ni Israel na gijang in,' nini Tuhan Jahowa, 'ijai ma Ahu balosan ni haganup ginompar ni Israel, haganup sidea na i nagori in; ijai ma jaloon-Ku sidea, ijai ma tungguon-Ku humbennima galangannima ampa limbuahnima ampa haganup sibere-bere na pinapansingnima.'

⁴¹ Jaloon-Ku ma hanima songon uap na misbou na hinarosuhkon, sanggah na Huboan hanima mandarat humbani bangsa-bangsa, anjaha Hupatumpu hanima hun nagori-nagori hamerapannima ai; anjaha patalaron-Ku do hapansingon-Ku i tongah-tongahnima ididah bangsa-bangsa.

⁴² Anjaha hatahononnima ma, Ahu do Jahowa, dob Huboan hanima hu tanoh Israel, tanoh na dob Hubijahon mamberehon ai bani ompungnima.

⁴³ Ijai ma taringat hanima bani parlahounima ampa ganup pambahenannima na mambahen mabutak hanima; jadi magigi ma hanima bani dirinima halani haganup hajahaton na hinorjahonnima.

⁴⁴ Anjaha botohonnima ma, Ahu do Jahowa, marhitei na Hubahen bannima halani goran-Ku, sedo romban hubani parlahounima na jahat in ampa pambahenannima na masambor in, ale ginompar ni Israel,” nini Tuhan Jahowa.

Limbaga Pasal Harangan na Matutung

⁴⁵ (21-1) Dob ai roh ma hata ni Jahowa hu bangku, mangkatahon,

⁴⁶ (21-2) “Ale anak ni jolma, dompakkon ma bohimu hu dangsina, dilo-dilo ma ho dompak dangsina, anjaha manjahai ma ho dompak harangan na i tanoh dangsina.

⁴⁷ (21-3) Hatahon ma bani harangan na i tanoh dangsina, tangar ma hata ni Jahowa, sonon do nini Tuhan Jahowa, tonggor ma, pagaraon-Ku do apuy ibagas ho, panganonni do bois sagala hayu na masak ibagas ho; seng tarintopi gajag ni apuy na marjimbur in, anjaha mosogkononni do sagala bohi hun dangsina das hu utara.

⁴⁸ (21-4) Botohon ni sagala na mardaging ma: Ahu do Jahowa na pagarahon ai; seng intopkonon-Ku be ai.”

⁴⁹ (21-5) Jadi ningku ma, “Ham Tuhan Jahowa, isahapkon sidea do pasal ahu: Ai lang marlimbaga do tong ia marsahap?”

Podang Pambalason bani Jerusalem ampa Amon

21 ¹ (21-6) Dob ai roh ma hata ni Jahowa hu bangku, mangkatahon,

² (21-7) “Ale anak ni jolma, dompakkon ma bohimu hu Jerusalem, marsahap ma ho pasal ianan na susi ai, manjahai ma ho pasal tanoh Israel,

³ (21-8) anjaha hatahon ma hubani tanoh Israel, sonon do hata ni Tuhan Jahowa: Tonggor ma, Ahu do imbangmu, sintakon-Ku do podang-Ku hun sarungni, anjaha raseihonon-Ku do hun tongah-tongahmu parpintor ampa parjahat.

⁴ (21-9) Halani sihol boiskonon-Ku do hun tongah-tongahmu parpintor ampa parjahat, halani

ai do ase mandarat podang-Ku hambani sarungni, manlawan sagala jolma hun dangsina das hu utara,
5 (21-10) anjaha botohon ni sagala na mardaging ma, Ahu do Jahowa, na manintak podang-Ku hambani sarungni; seng sarungkonon-Ku be ai.

6 (21-11) Ale anak ni jolma, marhoih ma ho; gogoh ma ho marhoih, marhoru tumang i lobei ni sidea.

7 (21-12) Anjaha anggo isungkun sidea, 'Mase marhoih ho?' hatahon ma, 'Halani barita ai.' Anggo roh ai, mandatei ma sagala uhur, dabuh sagala tangan, malitonduy sagala jolma anjaha galek sagala towod. Tonggor ma, roh anjaha masa ma ai," nini Tuhan Jahowa.

8 (21-13) Dob ai roh ma hata ni Jahowa hu bangku, mangkatahon,

9 (21-14) "Ale anak ni jolma, manjahai anjaha marsahap ma ho! Sonon do hata ni Jahowa, 'Podang, podang do iasah, ipungga ase marlinang,

10 (21-15) iasah laho manraseihon, ipungga ase marhilap itampulhon.' Naha, marmalas ni uhur ma hita? Ale anak-Ku, mapas do uhurmu bani ganup pukul-pukul ampa bani ganup podah.

11 (21-16) Ibere do podang ai ipapunggahon, ase tarpakei ai; iasah do ai anjaha ipapunggahon, laho mamberehon ai bani tangan ni sipamunuh.

12 (21-17) Tangis anjaha mandoruhi ma, ale anak ni jolma, ai mangimbang bangsang-Ku do podang ai, mangimbang ganup kopala-kopala ni

Israel, iondoskon do sidea bani podang rap pakon bangsang-Ku. Halani ai tompasi ma hae-haemu.

¹³ (21-18) Ai roh do pangujian, ai sonaha ma lang masa ai, halani mapas do uhurmu mangidah pukul-pukul,” nini Tuhan Jahowa.

¹⁴ (21-19) “Tapi ho ale anak ni jolma, anjaha martopap-topap ma ho! Roh ma podang dua hali lompit, tolu hali lompit tene, ai ma podang sipamunuh, podang bani pamunuhon bolon ai, ai do manginggoti sidea,

¹⁵ (21-20) ase malala pusu-pusu ni sidea, anjaha mardabuhan sidea bani sagala horbangan ni sidea. Ahu do na mambere podang na marhilap ai; ibahen do ai marlinang songon hilap, ipungga laho mamunuhi.

¹⁶ (21-21) Marot ma panrotapmu, hu siamun atap hu sambilou, dompak ja matamu itampulhon!

¹⁷ (21-22) Ahu pe martopap-topap tangan do, sihol do pasombuhon-Ku ringis-Ku, Ahu do Jahowa, na mansahapkon ai.”

¹⁸ (21-23) Dob ai roh ma hata ni Jahowa hu bangku, mangkatahon,

¹⁹ (21-24) “Ho ale anak ni jolma, gambarhon ma dua dalan harohan ni podang ni raja Babel, humbani sada nagori do harohan ni ai haduasi. Bahen ma sipatuduh dalan, pajongjong ma ai bani bona ni dalan na manuju dompak sada huta.

²⁰ (21-25) Gambar ma sada dalan bani podang na laho hu Rabba, huta ni halak Amon, ampa na sada nari hu Juda, hu Jerusalem na pinatoguh ai.

²¹ (21-26) Bani sirpang ni dalan ai, bani bona ni dalan na dua ai do jongjong raja ni Babel mandalankon partondungon; ihursuk-hursuk do lingkit, isungkun terapim anjaha ipareksa pangidahan bani atei-atei ni dayok.

²² (21-27) Bani tangan siamunni do pangidahan na dompak Jerusalem ai, gabe ibuha ma pamanganni marsurak-surak, ipamaling sorani, laho padalankon parugas sirongrong horbangan, paulihon tembok sipangkubu, ampa pajongjong manara sipangkubu.

²³ (21-28) Tapi partondungon na so sintong do ai bani sidea, halani dong do bani sidea parbulawanan na toguh nini uhurni. Tapi paingattonni do sidea pasal salah ni sidea, ase mangahap sidea.”

²⁴ (21-29) Halani ai, sonon do hata ni Tuhan Jahowa, “Halani na dob mardingat hanima bani hajahatonnima, marhitei na dob pinatar sagala panlanggaronnima, gabe talar dousanima bani sagala pambahenannima, tongon, halani na dob mardingat ai hanima, sai mangahap ma hanima.

²⁵ (21-30) Ia ho, ale kopala ni Israel, na mabutak anjaha na jahat, na dob jumpah arini, ai ma panorang hagogok ni uhum bam,

²⁶ (21-31) sonon do hata ni Tuhan Jahowa, ‘Padaoh ma gotong in, tanggali sortali in! Seng totap be

songon na sain dokah; sipatoruhon do na gijang, anjaha sipagijangon do na toruh.

²⁷ (21-32) Mareong, mareong, mareong do bahenon-Ku in; seng dong be age bokas-bokasni, paima roh ia siparhak ai; hubani do ondoskonon-Ku ai.'

²⁸ (21-33) Tapi ho, ale anak ni jolma, manjahai ma ho anjaha hatahon ma, sonon do hata ni Tuhan Jahowa pasal Amon ampa pasal pangapasi ni sidea, anjaha hatahon ma, 'Podang, podang do isintak laho manripaskon; ipungga do ai ase marlinang anjaha marhilap,

²⁹ (21-34) ai ma sanggah marpanonggoran na lepak sidea pasal ho anjaha martondung sipaoto-oto sidea dompak ho, laho mannahkon podang ai bani borgok ni parjahat na mabutak ai, na dob jumpah arini, ai ma panorang hagogok ni uhum bani.

³⁰ (21-35) Sarungkon ma podangmu ale Amon! Bani ianan parjadimu, bani tanoh hatubuhanmu, ijai do uhumon-Ku ho.

³¹ (21-36) Duruskonon-Ku do ringis-Ku bam, anjaha sompulhonon-Ku apuy ni gilang-Ku bam; ondoskonon-Ku do ho hu tangan ni halak na mabajan, sihorjahon hasedaon.

³² (21-37) Gabe sipanganon ni apuy ma hanima, durus ma darohnima i nagori in; seng be sidingat-dingaton hanima, tongon, Ahu do Jahowa, na manluarhon in."

**Hasamboron ni Jerusalem
ampa Pangisini Parohkon Uhum Bani**

- 22** ¹ Dob ai roh ma hata ni Jahowa hu bangku, mangkatahon,
- ² “Ale anak ni jolma, sihol uhumonmu do huta siduruskon daroh in? Pabotohkon ma bani sidea haganup hasamboron ni sidea ai,
- ³ anjaha hatahon ma: Sonon do hata ni Tuhan Jahowa: Ale huta siduruskon daroh i tongah-tongahni, na parohkon ajal bani, anjaha na paulihon gana-gana bani, mambahen butak dirini!
- ⁴ Marhitei daroh na niduruskonmai, gabe marutang do ho, anjaha marhitei gana-gana na pinaulimai, gabe butak ho; ipapodas ho do ajalmu, anjaha iparoh ho do ujung ni ari-arimu. Halani ai Hubahen do ho siapason bani bangsa-bangsa, anjaha sipahirion bani ganup nagori.
- ⁵ Halak na dohor age na daoh pahirihon do, ale parbarita na masambor, na gok hageoron.
- ⁶ Tonggor ma, haganup kopala-kopala ni Israel, na marianan ibagas ho, ganup sidea mangunsagakon kuasa laho manduruskon daroh.
- ⁷ Bapa pakon inang hona apasan do ibagas ho, halak panginsolat hona hilang i tongah-tongahmu; na tading maetek ampa na mabalu hona odoh-odoh do.

⁸ Mahiri do ibahen ho ianan-Ku na mapansing in, anjaha ibutaki ho do ari Sabat-Ku.

⁹ Dong do halak sipanukas-nukas ibagas ho laho manduruskon daroh, anjaha adong do halak na mangankon na ginalangkon i atas buntu-buntu; habutakon do ihorjahon halak i tongah-tongahmu.

¹⁰ Ipatidak sidea do hatalanjangon ni bapa ibagas ho, anjaha ibutaki do naboru bani panorang parroh ni pantang ni hiouni.

¹¹ Habutakon do idalankon halak bani jolma ni hasomanni; dong do na mambutaki parumaenni, dong homa na mambutaki botouni, boru ni bapani.

¹² Padalan sisip do halak ibagas ho laho manduruskon daroh; paanakkon duit do ho anjaha mambuat untung na malobihtu; mambuat pansarian do ho humbani hasomanmu marhitei pangilangan; ihalupahon ho do Ahu, nini Tuhan Jahowa.

¹³ Tonggor ma, durdurhonon-Ku do tangan-Ku bani untungmu na so tiba dalanni in, ampa halani daroh na madurus i tongah-tongahmu.

¹⁴ Ai tahan do ho anjaha margogoh do tanganmu bani ari siparohon-Ku bam? Ahu do Jahowa na manluarhon ai anjaha na pasaudkon ai.

¹⁵ Erapon-Ku do ho i tongah-tongah ni bangsa-bangsa anjaha bahenon-Ku do ho mambur merap bani nagori-nagori; bois do bahenon-Ku habutakon na bam ai,

¹⁶ anjaha sipapaan do ho i lobei ni bangsa parbegu, ase itandai ho, Ahu do Jahowa.

Limbaga Pasal Panlalaan na Mangkorhon Uhum, na Mangonai bani Israel

¹⁷ Dob ai roh ma hata ni Jahowa hu bangku, mangkatahon,

¹⁸ Ale anak ni jolma, gabe tasik-tasik do bangsa Israel bangku; haganup do sidea songon tombaga, timah, bosu ampa timah sibirong ibagas panlalaan; tongon, mubah do sidea gabe tasik-tasik.

¹⁹ Halani ai sonon do hata ni Jahowa: Halani ganup hanima mubah gabe tasik-tasik, tonggor ma, patumpuon-Ku do hanima hu tongah-tongah ni Jerusalem.

²⁰ Songon halak na patumpu pirak, tombaga, bosu, timah ampa timah sibirong hubagas panlalaan, anjaha ipagara apuy i toruhni laho manlala, sonai do patumpuon-Ku hanima ibagas ringis-Ku ampa gara ni gilang-Ku, anjaha hunahkon do hanima hubagas, laho manlala hanima.

²¹ Tongon, patumpuon-Ku do hanima anjaha pagaraon-Ku do apuy ni ringis-Ku bannima, anjaha malala ma hanima i tongah-tongahni.

²² Songon pirak malala ibagas panlalaan, sonai do malala hanima ibagas ai, jadi botohonima ma, Ahu do Jahowa, na manduruskon ringis-Ku bannima.

Dousa ni Golongan-golongan na bani Bangsa ai

²³ Dob ai roh ma hata ni Jahowa hu bangku, mangkatahon,

²⁴ Ale anak ni jolma, hatahon ma bani sidea: Ho do sada tanoh na so marudan, na so marbah bani panorang ringis;

²⁵ songon singa na maraum, manoroh sisorohonni do raja-rajani i tongah-tongahni; ibolur sidea do jolma, irampas sidea arta ampa ugas-ugas na maharga, ipabuei sidea do bilangan ni na mabalu i tanoh in.

²⁶ Iparseda malimni do titah-Ku, anjaha ipabutak do ianan-Ku na mapansing in; seng marbolat ibahen sidea na mapansing humbani na mabutak, seng iajarhon parleganan ni na susi pakon na so susi; seng parduli sidea bani ari Sabat-Ku, gabe mabutak do Ahu i tongah-tongah ni sidea.

²⁷ Kopala-kopala i tongah-tongah ni sidea, songon sorigala na manoroh do, laho manduruskon daroh, mangagou goluh ni jolma, laho mambuat pansarian.

²⁸ Anjaha nabi ni sidea mangkapuri hajahaton ni sidea marhitei panonggoran na lepak ampa panjahaion ladung, mangkatahon bani sidea: Sonon do hata ni Tuhan Jahowa! hape sedo Jahowa tongon na mangkatahon.

²⁹ Bangsa parnagori in mandalankon odoh-odoh anjaha manrampasi, iodoh-odoh sidea do halak na madoyuk ampa na miskin, anjaha ipaksa do halak panginsolat marlawananan bani uhum.

³⁰ Hupindahi do halak i tongah-tongah ni sidea, na boi pajongjong tembok atap jongjong bani na maruntas i lobeihu, laho mangkopkop tanoh in, ase ulang huparseda, tapi seng dong jumpah Ahu. tx

³¹ Halani ai Huuseihon do ringis-Ku bani sidea, anjaha Huboiskon do sidea ibagas gara ni gilang-Ku, mangonai hubani ulu ni sidea do Hubahen parlahou ni sidea ai, nini Tuhan Jahowa.”

Limbaga Pasal Habutakon ni Samaria ampa Jerusalem na Marsanina ai

23 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, adong ma dua naboru, sisada inang do sidea.

³ Marriah-riah do sidea i Masir; marriah-riah do sidea sanggah poso; ipaturut do hona pisatan bagod-bagod ni sidea, ipaturut idadapi tontonna bani haposoanni.

⁴ Goran ni naboru sikahanan ai si Ohola, goran ni sianggian ai si Oholiba. Jadi Ahu ma simada sidea haduasi, tubuhan anak tubuhan boru ma sidea. Arti ni goran ni sidea ai: si Ohola, ai ma Samaria, anjaha si Oholiba, ai ma Jerusalem.

⁵ Marriah-riahi do si Ohola sanggah Ahu ope simadasi; oji tumang do uhurni bani na mangkarosuhkonsi, ai ma halak Assur, na mandohorisi ai,

⁶ ai ma na sangap-sangap parhiou sitora, sipanrajai ampa puanglima; haganup sidea poso anjaha majenges, sipangajak huda.

⁷ Iondoskon do dirini marriah-riah pakon sidea, halak Assur jolma pilihan ai; ipabutak do dirini marhitei gana-gana ni ganup halak ojian ni uhurni ai.

⁸ Seng homa itadingkon parriah-riahonni, na dob nidalankonni sanggah i Masir ope, halani bani haposoonni domma modom halak rap pakonsi, ipisati bagod-bagodni, anjaha ipadas rosuhni hu bani.

⁹ Halani ai, Huondoskon do ia hubani halak na mangkarosuhkonsi, ai ma halak Assur, ojian ni uhurni ai.

¹⁰ Ipasalang sidea ma ia, irampas anak pakon boruni, anjaha ia ibunuh marhitei podang; gabe umpama do ia i tongah-tongah ni naboru, sanggah idalankon uhum ai bani.

¹¹ Age pe ididah si Oholiba, anggini ai, na masa ai, garangan ope ia humbani abangni ai, anjaha samboran ope parriah-riahonni marimbang abangni ai.

¹² Oji do uhurni bani halak Assur, raja-raja pakon kopala-kopala ni tentara, na mandohorisi ai, na marpakeian na majenges, siajak huda, haganup sidea poso anjaha majenges.

¹³ Jadi Huidah ma hona butakan ia, dos do ulah ni sidea haduasi.

¹⁴ Tapi inunut do tong parriah-riahonni ai; ididah do dalahi iuhirhon bani tembok, gambaran ni halak Kasdim, na igambar maset sigenger,

¹⁵ margondit bani binongeini, martudung uluni, ganup sidea songon puanglima idahon; ai ma gambaran ni halak Babel, na marhasusuran i tanoh Kasdim.

¹⁶ Anggo ididah sidea, oji ma uhurni mangidah sidea, isuruh ma suruhanni marayak sidea hu nagori Kasdim.

¹⁷ Jadi iparayak halak Babel ma ia, laho rap modom pakonsi, anjaha ibutaki do ia marhitei na marriah-riah; dob ibutaki sidea ia, magigi ma ia mangidah sidea.

¹⁸ Talar do idalankon parriah-riahonni ai, anjaha ipatidak do hailaonni, jadi magigi ma uhur-Hu mangidahsi, songon gigi ni uhurhu dompak abangni ai.

¹⁹ Tapi inunut do tong parriah-riahonni, mardingat do ia bani ari haposoanni, na marriah-riah ai ia i tanoh Masir,

²⁰ na oji ai uhurni mangidah na mangkarosuhkansi, na garang ai songon halode ampa songon huda.

²¹ Tongon masihol do uhurmu bani habutakon ni haposoonmu, sanggah na ipisati halak Masir bagodmu anjaha idadapi tontonmu bani haposoonmu.

²² Halani ai, ale Oholiba, sonon do hata ni Tuhan Jahowa, Tonggor ma, ojuron-Ku do mangimbang ho na mangkarosuhkon ho ai, na dob hinagigihonmai, anjaha humbani ganup ianan do parohon-Ku sidea manlawan ho,

²³ ai ma halak Babel ampa ganup halak Kasdim, halak Pekod, Soa pakon Koa, ampa haganup halak Assur na rap pakon sidea, ai ma halak na maposo anjaha majenges, sipanrajai ampa puanglima do sidea ganup, haganup do sidea siajak huda.

²⁴ Roh do sidea mandorab ho marhasoman gareta porang pakon gareta ampa marhasoman buei bala; hubuon ni sidea ma ho inggot, marhasoman gantar na banggal pakon na etek ampa tangkuluk bosi. Ondoskonon-Ku ma bani sidea panguhumion ai, jadi uhumon ni sidea ma ho domu hubani uhum ni sidea.

²⁵ Dompakkonon-Ku ma bam marah-Ku, jadi padalanon ni sidea ma bam ringis. Sayaton ni sidea ma igungmu ampa pinggolmu, anjaha halak na tading hun bam rasei ibahen podang. Rampason ni

sidea ma anakmu pakon borumu, anjaha sagala na tading bam bois ibahen apuy.

²⁶ Rintakon ni sidea do pakeian-pakeianmu, anjaha rampason ni sidea ugas-ugasmu.

²⁷ Sonai ma parontihonon-Ku habutakonmu ampa parriah-riahonmu, na nidalankonmu hun tanoh Masir nari, ase ulang be kawah matamu dompak sidea anjaha ulang be idingat-dingat ho Masir.”

²⁸ Sonon do hata ni Tuhan Jahowa, “Tonggor ma, ondoskonon-Ku do ho hubagas tangan ni halak sogam ni uhurmu, hubagas tangan ni halak na dob hinagigihonmu,

²⁹ jadi domdoman ni sidea ma ho, anjaha rampason ni sidea sagala na sinarimu; paturuton ni sidea ma ho talanjang seng marhiou, anjaha talar ma hailaon ni parriah-riahonmu.

³⁰ Habutakonmu ampa parriah-riahonmu do na paroh ai bam, halani na marriah-riah ai ho pakon sipajuh begu-begu anjaha ibutaki ho dirimu marhitei gana-gana ni sidea.

³¹ Songon parlahou ni abangmu do parlahoumu, halani ai Hubere do hubam panginuman na niinum ni abangmu.”

³² Sonon do hata ni Tuhan Jahowa, “Maningon inumonmu do panginuman ni abangmu na bagas anjaha na bangga ai, sipartatawaan anjaha mahiri ma ho, ai buei do isini ai;

³³ maningon sirnib do ho ibahen hamabukon
ampa pusok ni uhur. Panginuman songgot-
songgot ampa hagobiron do panginuman ni
abangmu Samaria;

³⁴ maningon inumonmu do ai anjaha
palumeionmu; maningon haratonmu
do posah-posahni, anjaha rarikonmu
tontonmu, tongon, Ahu do mangkatahon
ai,” nini Tuhan Jahowa.

³⁵ Halani ai sonon do hata ni Tuhan Jahowa,
“Halani na dob lupa ho Bangku, anjaha
iambungkon ho Ahu hu pudimu, halani ai
porsan ma upah ni habutakonmu ampa
parriah-riahonmu.”

³⁶ Nini Jahowa ma hu bangku, “Ale anak ni
jolma, sihol do uhumonmu si Ohola pakon si
Oholiba? Anggo sonai, patugah ma hubani sidea
hasamboron ni sidea.

³⁷ Tongon, marbangkis do sidea anjaha sab daroh
do tangan ni sidea; rap pakon gana-gana ni sidea ai
do sidea marbangkis; anjaha igalangkon do anak ni
sidea bahen sipanganon ni gana-gana ni sidea, ai
ma anak na tinubuhkon Bangku.

³⁸ Ambah ni ai, on ope ibahen sidea Bangku:
Ipabutak sidea do ianan-Ku na pansing in bani ari
ai, anjaha ipabutak sidea do ari Sabat-Ku.

³⁹ Ai dob isayati sidea anak ni sidea bahen galangan
hu bani sisombah-sombahon ni sidea ai, bani ari ai

do masuk sidea hubagas ianan-Ku na pansing ai laho pabutakkon ai; tonggor ma, sonai do ibahen sidea ibagas rumah-Ku.

⁴⁰ Isuruh do suruhanni mangalopi halak humbani na daoh, anjaha tonggor ma, dob roh sidea, iparidi ho do dirimu, ipajagar ho matamu, anjaha ipakei ho ugas-ugasmu;

⁴¹ hundul ma ho i atas ni podoman na majenges, meja na dob pinasirsir i lambungni, panampeianmu bani dahupa ampa minak-Ku.

⁴² Lutu do sora ni halak na mabuei i lambungni, ai ma sora ni halak na roh marayaksi hun halimisan; igolangi sidea do tangan ni naboru ai, anjaha inahkon sortali na majenges i atas uluni.

⁴³ Jadi ninuhur-Hu ma: Ai mandalankon parbangkison ope naboru na dob melus in? Ai ra ope halak nani marriah-riah pakonsi?

⁴⁴ Tongon, laho do halak marayaksi, songon marayak boru jalang; sonai ma laho sidea marayak si Ohola pakon si Oholiba, laho mandalankon habutakon.

⁴⁵ Tapi uhumon ni halak parpintor do sidea romban hubani uhum bani siparbangkis ampa uhum bani naboru siduruskon daroh, ai siparbangkis do sidea, anjaha gok daroh do tangan ni sidea.”

⁴⁶ Ai sonon do hata ni Tuhan Jahowa, “Ojur ma simbuei manlawan sidea, anjaha bahen ma sidea gabe siarsik-arsikon anjaha sirampason.

⁴⁷ Pargijigon ni simbuei ai ma sidea bani batu, anjaha tampulon ni sidea bani podang ni sidea; bunuhon ni sidea ma anakni pakon boruni, anjaha tutungonni rumahni bani apuy.

⁴⁸ Sonai ma parontihonon-Ku habutakon i nagori in, ase jora sagala naboru, ulang ihorjahon be habutakon, songon na binahen ni sidea ai.

⁴⁹ Sonai ma honahonon-Ku bannima habutakonnima ai, anjaha porsanonnima uhum halani dousanima na marnaibata na legan ai; jadi botohonnima ma, Ahu do Jahowa.”

Parseda ni Jerusalem ampa Pangisini Ilimbagahon bani Hudon na Martasik

24 ¹ Pasiah-tahunkon, ari sepuluh bulan sepuluh, roh ma hata ni Jahowa hu bangku, mangkatahon,

² “Ale anak ni jolma, suratkon ma goran ni ari on, ari sisadari on, ai sadari on ma ihubu raja Babel huta Jerusalem.

³ Marlimbaga ma ho bani bangsa sipanlawan on, hatahon ma bani sidea, ‘Sonon do hata ni Tuhan Jahowa: Hodohon ma hudon in, tampeihon ma hu atas, anjaha bahen bah hubagas!

⁴ Nahkon ma hubagas gulei na dob tinoktokan in, haganup na madear ni in, tulani pudu

ampa tulan tangan, goki ma in bani holi-holi pilihan.

⁵ Buat ma sada biribiri pilihan, pagara ma soban i toruhni; lompah ma toktokni in, sonai homa holi-holi na ibagas hudon in.'

⁶ Halani ai sonon do hata ni Tuhan Jahowa, 'Magou ma huta na gok daroh in, ai ma na usih bani hudon ma martasik, na so mandarat tasikni hum bagas. Buat ma hum bagas toktokni ai sada-sada, ulang pala papilih-pilih.

⁷ Ai i tongah-tongahni ope daroh na niduruskonni ai; bani dolog batu do ai iduruskon, seng bani tanoh iduruskon ai, ase boi rungkubon ai bani tanoh.

⁸ Ase puho ringis-Ku, ase boi mambalas Ahu, Hupaturut do durus daroh ai bani dolog batu, ase ulang boi irungkub ai.'

⁹ Halani ai sonon do hata ni Tuhan Jahowa: Magou ma huta na gok daroh in! Ahu pe pajunjunon-Ku ma soban panutungini.

¹⁰ Tambahi soban in, pagara apuy, lompah-lompah gulei in, useihon kuahni, anjaha paturut ma monsong holi-holini.

¹¹ Nahkon ma hudon ai lumei hu atas ni narnarni, ase milas ai, gerger tombagani, gabe malala kotoranni na ibagas ai, anjaha magou tasikni ai.

¹² Hape, seng ra tanggal tasikni na hapal ai age ibagas apuy.

¹³ Halani habutakonmu marhitei parriah-riahon, anjaha seng ra ho borsih age pe Hupaborsih ho, halani ai seng anjai borsih be ho paima sombuh ringis-Ku dampak ho.

¹⁴ Ahu do Jahowa na manluarhon ai, sai saud do ai, sai bahenon-Ku do ai; seng surut Ahu, seng maralang-alang Ahu, seng manosal Ahu; domu hubani parlahoumu ampa pambahenanmu uhumon-Ku ho,” nini Tuhan Jahowa.

Maseda Jerusalem, tapi Seng Dong na Marhoru

¹⁵ Dob ai roh ma hata ni Jahowa, hu bangku, mangkatahon,

¹⁶ “Ale anak ni jolma, tonggor ma, buaton-Ku ma sompong humber hinarosuhkon ni matamu; tapi seng bulih ho doruh-doruh, mandoraki atap mariluh-iluh matamu.

¹⁷ Boi do marhoih, tapi ulang gogoh-gogoh, ulang bahen na manangisi na matei ai! Martudung ma ho dear, anjaha marsipatu, ulang rungkub gumismu, anjaha ulang pangan ruti pusok ni uhur!”

¹⁸ Jadi marsahap ma ahu sogod hubani na mabuei ai, anjaha bodarini matei ma parinangonku, anjaha patarni ai hubahen ma songon na hinatahon hu bangku.

¹⁹ Jadi nini na mabuei ai ma hu bangku, “Ai seng ra ho patugahkon bennami, aha do arti ni on bennami, ase sonin ibahen ho?”

²⁰ Jadi ningku ma hubani sidea, “Jahowa do mangkatahon hu bangku sonon”

²¹ Hatahon ma hubani ginompar ni Israel: Sonon do hata ni Tuhan Jahowa: Tonggor ma, palopason-Ku do butakan ianan-Ku na pansing in, ai ma na nienjeng-enjengkonnima in, na hinarosuhkon ni matanima ampa na hinasiholhon ni uhurnima; anjaha anak ampa borunima, na tinadingkonnima ijai, maningon rasei do bahenon ni podang.

²² Bahenonnima ma songon na Hubahen in: seng tutuponnima gumisnima anjaha seng panganonnima ruti pusok ni uhur.

²³ Tapi martudung ma hanima dear anjaha marsipatu; seng doruh-doruh atap mandoraki, tapi mandatei ma hanima halani hajahatonnima, anjaha morong-orong i lobei ni hasomanni bei.

²⁴ Sonai ma si Hesekiel gabe tanda bannima, ase ibahen hanima songon na binahenni ai. Anggo masa ma ai, gabe botohonnima ma, Ahu do Tuhan Jahowa.

²⁵ Ho ale anak ni jolma, bani ari ai, anggo Hubuat ma humbani sidea benteng ni sidea ampa na hinasiholan ni uhur ni sidea ai, sonai homa anak ampa boru ni sidea,

²⁶ tongon, bani ari ai ma roh sahalak na maporus marayak ho, laho pabotohkon barita ai hubam.

²⁷ Bani ari ai, bani parroh ni halak na maporus ai, boi ma marsahap anjaha seng be longah ho. Sonin

ma gabe tanda ho bani sidea, anjaha botohon ni sidea ma, Ahu do Jahowa.”

**Pambalason ni Naibata bani Halak
Amon, Moab, Edom ampa Palistim**

25 ¹Jadi roh ma hata ni Jahowa hu bangku, mangkatahon,

²“Ale anak ni jolma, tujuhon ma bohimu dompak halak Amon, anjaha manjahai ma ho pasal sidea.

³Hatahon ma bani halak Amon: Tangihon ma hata ni Tuhan Jahowa: Sonon do hata ni Tuhan Jahowa: Halani ihatahon hanima: Ha! ha! ha! bani rumah-Ku na mapansing ai, sanggah ibutaki ai, bani tanoh Israel, halani tarulang ai, ampa bani ginompar ni Juda, halani tarbuang sidea.

⁴Halani ai, tonggor ma, ondoskonon-Ku do ho bani halak na i hapoltakan bahen parbagianan ni sidea, pasukan ni sidea do lampolamponi i tongah-tongahmu, anjaha paulionni do ianan ni sidea ibagas ho; panganon ni sidea do gogoh ni tanohmu, anjaha inumon ni sidea do dadih ni pinahanmu.

⁵Bahenon-Ku do huta Rabba gabe sampalan ni unta, anjaha tanoh ni halak Amon gabe parsaranan ni biribiri, ase itanda hanima, Ahu do Jahowa.

⁶Tongon, sonon do hata ni Tuhan Jahowa, Halani martopap-topap ho, anjaha marinjak-injak, anjaha

marmegah-megah ho mangidah hasedaon ni tanoh Israel.

⁷ Halani ai, tonggor ma, Hupagostong do tangan-Ku manlawan ho, anjaha Huondoskon do ho gabe taban-taban ni bangsa-bangsa, anjaha raseihonon-Ku hun tongah-tongah ni nagori-nagori; Huboiskon do ho, ase itanda ho, Ahu do Jahowa.”

⁸ Sonon do hata ni Tuhan Jahowa, “Halani ihatahon Moab ampa Seir: Tonggor ma, doskon haganup bangsa parbegu do halak Juda,

⁹ halani ai, tonggor ma, sae-sae do bahenon-Ku raboyon ni Moab, gabe seng dong be huta ijai, i sab nagori ai, ai ma habanggalon bani nagori ai: Bet-Jesimot, Baal-Meon pakon Kiriataim.

¹⁰ Berehonon-Ku do ai rap pakon tanoh ni halak Amon, bani halak na i hapoltakan, bahen parbagianan bani sidea, ase ulang be taringat halak pasal sidea i tongah-tongah ni bangsa-bangsa.

¹¹ Dabuhon-Ku do uhum bani Moab, ase itanda sidea. Ahu do Jahowa.”

¹² Sonon do hata ni Tuhan Jahowa, “Halani maruhur pambalason Edom bani ginompar ni Juda, gabe marsalah banggal sidea halani pambalason ni sidea ai,”

¹³ halani ai sonon do hata ni Tuhan Jahowa, “Hupagostong do tangan-Ku manlawan Edom, ripaskonon-Ku do hunjai jolma age pinahan, anjaha gabe halimisan do ai bahenon-Ku hun Teman das

hu Dedan; maningon rasei do sidea bahenon ni podang.

¹⁴ Dalankonon-Ku do pambalason dompak Edom marhitei bangsang-Ku halak Israel; bahenon ni sidea do dompak Edom romban hu bani ringis-Ku ampa gilang-Ku; jadi ahapkonon ni sidea ma sonaha pambalas-Ku,” nini Tuhan Jahowa.

¹⁵ Sonon do hata ni Tuhan Jahowa, “Halani maruhur pambalason halak Palistim, anjaha marmegah-megah, marhajahaton sidea mambalas, laho mangagou marhalanohon ni parmunsuhon na dob madokah,

¹⁶ halani ai sonon do hata ni Tuhan Jahowa: Hupagostong do tangan-Ku manlawan halak Palistim, anjaha ripaskonon-Ku do halak Kereti, anjaha boiskononku do halak na tading i topi ni laut ai.

¹⁷ Dalankonon-Ku do pambalason bangga bani sidea marhitei paminsangon na gok ringis, ase ibotoh sidea, Ahu do Jahowa, anggo Hupadalan ma pambalason bani sidea.”

Uhum ni Naibata bani Tirus

26 ¹ Pasapuluhsada-tahunkon bani ari sada bulan sada, roh ma hata ni Jahowa hu bangku, mangkatahon,

² “Ale anak ni jolma halani ihatahon Tirus pasal Jerusalem: Ha! ha! ha! domma maropuk

horbangan ni bangsa-bangsa, marurup hu bangku ma nuan, gok ma ahu, halani na maseda ai ia!

³ Halani ai, sonon do hata ni Tuhan Jahowa: Imbang-Ku ma ho, ale Tirus, arahon-Ku ma buei bangsa mamboan ho, songon laut na parohkon gilumbangni.

⁴ Parsedaon ni sidea ma tembok ni Tirus, anjaha rumbakkononni ma manarani; padaohon-Ku do ronsi tanohni, gabe tading batuni tumang mando Hubahen.

⁵ Gabe panjomuran ni jala mando ai i tongah-tongah ni laut, ai Ahu do na mansahapkon ai, nini Tuhan Jahowa; gabe taban ni bangsa-bangsa ma ia, ⁶ anjaha dusunni na i daratan rasei do bahenon ni podang, ase itanda sidea, Ahu do Jahowa.

⁷ Ai sonon do hata ni Tuhan Jahowa: Tonggor ma, parohon-Ku do dampak Tirus si Nebukadnesar, raja ni Babel, raja ni sagala raja, hun utara, marhasoman buei huda pakon buei gareta porang pakonjolma siajak huda ampa bala buei tumang.

⁸ Raseihononni ma marhitei podang dusunmu na i daratan; paulionni ma hubuan manlawan ho; pajongjongonni homa tembok pangkubu, anjaha padearonni tayub paronding-ondingan dampak ho.

⁹ Tujuhononni do bam parugas sironsang tembokmu, anjaha reongkononni marhitei parugas bosini.

¹⁰ Halani buei ni hudani gabe rungkubon ni orbukni ma ho, dugur ma tembokmu binahen ni lutu ni siajak huda, garetu ampa garetu porang, sanggah imasuki horbanganmu, songon halak na masuk hubagas huta na dob runtas tembokni.

¹¹ Marhitei tambirik ni hudani luntakonni do ganup alamanmu; raseihononni do bangsamu bani podang, anjaha sagala tiang habanggalonmu rumbakkononni do hu tanah.

¹² Rampason ni sidea do arta-artamu, anjaha buatonni boniagamu; parreongon ni sidea do tembokmu, anjaha parsedaonni rumahmu na dear-dear in; sampakkononni do hu laut batu-batumu, parhayumu ampa reong-reongmu.

¹³ Parontihonon-Ku do hariahon ni dodingmu, anjaha sora ni arbapmu pe seng tarbogei be.

¹⁴ Bahenon-Ku do ho tading batu tumang, gabe panjomuran ni jala tumang, seng be paulion, ai Ahu, Jahowa do na mansahapkon ai, nini Tuhan Jahowa.

¹⁵ Sonon do hata ni Tuhan Jahowa pasal Tirus: Ai lang gobir ma nagori partopi laut mambogei pardabuhmu ampa orong-orong ni halak na ugahan ampa pamunuhon marhitei podang i tongah-tongahmu?

¹⁶ Jadi susur ma humbani paratasni ganup raja-raja partopi laut, ipangambungkon baju harajaonni anjaha itanggali pakeianni na marrupa-rupa ai.

Marbaju pusok ni uhur do sidea hundul bani tanoh, hitir-hitir tongtong anjaha tarsonggot halani ho.

¹⁷ Bahenon ni sidea ma sada tangis-tangis pasal ho, anjaha hatahononni ma pasal ho: Aih, naha do parmagoumu hun tongah laut, ale huta na tarbarita, na markuasa i lautan, ho ampa pangisimu, na mambahen gobir sagala na marianan ijai.

¹⁸ Gobir do sonari sagala pulou bani ari pardabuhmu, tongon, tarsonggot do sagala nagori partopi laut halani parmagoumu.

¹⁹ Ai sonon do hata ni Tuhan Jahowa: Bahenon-Ku do ho gabe huta na tarulang, songon huta na so adong mangiankon, anjaha parohon-Ku do laut ai dompak ho, gabe rungkubon ni gilumbang banggal ma ho.

²⁰ Sampakkonon-Ku do ho hu toruh, hubani halak na dob tuad hu lubang ai, ai ma halak humbani sisapari; bahenon-Ku do ho marianan bani nagori partoruh ai, i tongah-tongah ni reong-reong na dob madokah ai, rap pakon halak na dob tuad hu lubang ai, ase ulang dong be na mangiankon ho, anjaha seng dong be iananmu bani tanoh ni halak na manggoluh.

²¹ Sompong do parohon-Ku ajalmu, seng anjai dong be ho, age pe hona pindahan ho, seng anjai jumpah be ho, nini Tuhan Jahowa.”

Doding Tangis-tangis Pasal Tirus

- 27** ¹ Dob ai roh ma hata ni Jahowa hu bangku, mangkatahon,
- ² “Ale anak ni jolma, bahen ma sada dodong tangis-tangis pasal Tirus,
- ³ anjaha hatahon ma bani Tirus, na marianan bani dalan masuk hu laut, partiga-tiga ni bangsa-bangsa bani buei nagori-nagori i topi laut: Sonon do hata ni Tuhan Jahowa: Ale Tirus, ihatahon ho do, kapal na gokan jenges do Ahu.
- ⁴ Tongah-tongah ni laut do gomgomamu, jenges tumang do ho ipauli situhingi ho.
- ⁵ Humbani hayu maranti Senir do ipauli sidea dasormu, hayu ares do ibuat hun Libanon, bahen tiang ni layarmu.
- ⁶ Humbani hayu jati Basan do ibahen holemu, anjaha tayubmu humbani hayu ares na hun pulou Kittim do ibahen sidea, ilapis bani gading.
- ⁷ Humbani hiou linen Masir na marrupa-rupa do layarmu, gabe partanda pasal ho; hiou simahonda ampa sigenger, na hun topi ni laut Elisa do tendamu.
- ⁸ Halak Sidon pakon Arwad do sipanlugai bam; halak na pandei hun Zamar do ibagas ho, sidea do gabe jurumudimu.

- ⁹ Partua-partua na hun Gebal ampa na pentar-pentarni do ibagas ho, padear-dearhon na maseda bam. Haganup kapal na i laut ampa parhorja kapal roh do hu bam, laho mantiga-tigahon boniagamu.
- ¹⁰ Halak Persia, Tud ampa Put do gabe balamu; ipanggantungkon sidea do gantar ampa tangkulukni ibagas ho; sidea do gabe hagijangon bam.
- ¹¹ Halak Arwad do balamu iatas tembokmu inggot, anjaha halak Gamad bani manaramu, ipansangkotkon sidea do gantarni bani tembokmu inggot, sidea do na mambahen gok hajengesonmu.
- ¹² Tarsis do hasomanmu martiga-tiga halani hinabuei ni barang-barangmu; pirak, bosu, timah ampa timah sibirong do ibahen sidea tukar ni barang-barangmu.
- ¹³ Halak Javan, Tubal pakon Mesek martiga-tiga do pakon ho, jolma ampa parugas tombaga do itukarhon sidea bani barang-barangmu.
- ¹⁴ Halak Togarma manukarhon huda, huda porang ampa halode bani tiga-tigamu.
- ¹⁵ Halak Rodus martiga-tiga pakon ho, buei nagori partopi laut mandalankon partiga-tigaon pakon ho, gading ampa hayu birong do ibahen sidea galarni bam.
- ¹⁶ Martiga-tiga do halak Edom pakon ho halani hinabuei ni barangmu; itukarhon sidea do bam

mata intan samarag, hiou hasumba, hiou na marrupa-rupa, hiou linnen, simatah ampa mata intan jaspis.

¹⁷ Juda ampa tanoh Israel martiga-tiga do pakon ho; gandum na hun Minit, buah ara, manisan, minak ampa minak balsem do itukarhon sidea bam.

¹⁸ Martiga-tiga do Damaskus pakon ho halani hinabuei ni boniagamu na marbagei-bagei in, anggur hun Helbun ampa wol hun Zahar itukarhon sidea hu bam.

¹⁹ Hun Usal roh do barang-barang bosi, rompah-rompah ampa kulit manis gantih ni boniagamu.

²⁰ Halak Dedan marboniaga palana pakon ho, sihundulan sanggah marhuda.

²¹ Halak Arab pakon sagala kopala-kopala hun Kedar, ai ma partiga-tiga harosuh ni uhurmu pasal biribiri, biribiri tunggal ampa haming tunggal; ai do tiga-tiga ni sidea pakon ho.

²² Saudagar na hun Seba pakon Raama martiga-tiga do pakon ho; itukarhon do hubani barangmu marbagei-bagei rompah-rompah sijengesan, marbagei-bagei mata intan na maharga ampa omas.

²³ Haran, Kanneh, Eden, Assur ampa Madai martiga-tiga do pakon ho.

- ²⁴ Itiga-tigahon sidea do hubam hiou pilihan, hiou simahonda, hiou na marrupa-rupa, parmadani na marrupa-rupa ampa tali banggal na pinuyuh.
- ²⁵ Kapal-kapal Tarsis do marlayar bam, mamboan tiga-tigamu. Sonai ma gabe gok ho, anjaha marmuatan na borat i tongah laut.
- ²⁶ Halak sipanlugaimu do mamboan ho hu laut bolag, tapi logou na hun hapoltakan do mangkaromkon ho hubagas laut.
- ²⁷ Habayakonmu, barang-barangmu, boniagamu, anak kapalmu, jurumudimu, tukang-tukangmu, partiga-tigamu ampa haganup balamu na ibagas ho ampa haganup halak na i tongah-tongahmu, harom do hubagas laut bani panorang pardabuhmu.
- ²⁸ Mambogei pandoruh ni jurumudimu, hitir-hitir do partopi laut;
- ²⁹ lintun bei ma hun kapalni haganup sijolom hole, anjaha anak kapal ampa haganup jurumudi na i laut turun ma hu darat;
- ³⁰ itangisi sidea do ho, anjaha doruh-doruh do sidea gogoh; inahkon sidea do orbuk bani uluni, margulu do sidea bani abuan.
- ³¹ Ipalpal sidea do uluni halani ho, anjaha marhiou guni do sidea; itangisi sidea do ho humbani uhur na marhoru, gok pusok ni uhur,

- ³² Halani horu ni ai ibahen sidea do tangis-tangis pasal ho, idoruhi sidea do ho: Ai ise ma onggga iparseda doskon Tirus ibagas laut?
- ³³ Sanggah na roh boniagamu hun laut, bosur do buei bangsa-bangsa ibahen ho; marhitei hinabuei ni artamu ampa boniagamu, bayak do raja-raja ni tanoh on ibahen ho.
- ³⁴ Tapi sonari maropuk do ho, harom hubagas laut; boniagamu ampa haganup panumpangmu harom do rap pakon ho.
- ³⁵ Haganup halak partopi laut tarsonggot do pasal ho; raja-rajani mabiar tumang, marposi do bohi ni sidea.
- ³⁶ Manihul-nihul do partiga-tiga ni bangsa-bangsa halani ho; jangin do parroh ni ajalmu, seng anjai dong be ho lalab.”

Uhum pakon Tangis-tangis bani Raja ni Tirus

28 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, hatahon ma bani raja ni Tirus: Sonon do hata ni Tuhan Jahowa: Halani gijang uhurmu, anjaha ihatahon ho: Naibata do Ahu, hundul do Ahu bani hundulan ni Naibata, i tongah-tongah ni laut; hape jolma tumang do ho, sedo Naibata, age pe ninuhurmu pentar ho songon Naibata.

- ³ Tongon, pentaran do ho ase si Daniel, sagala rusia seng dong na ponop humber.
- ⁴ Marhitei habisukonmu pakon hapentaranmu ipatumpu ho do bam habayakon, janah ipahumpul ho do omas pakon pirak ibagas parartaanmu.
- ⁵ Halani buei ni akalumu ibagas partiga-tigaonmu ipabuei ho do artamu, gabe mangenjeng do uhurmu halani habayakonmu.
- ⁶ Halani ai sonon do hata ni Tuhan Jahowa: Halani ninuhurmu dos do ho songon Naibata,
- ⁷ halani ai, tonggor ma, parohon-Ku ma halak na legan mandorab ho, bangsa na tang sibisangan; sintakon ni sidea do podangni mandedahon hajengeson ni hapentaranmu, anjaha butakanni ma sinalsalmu.
- ⁸ Dabuhkonon ni sidea do ho hubagas lubang ai, songon halak na tarbunuh do parmateimu ibagas laut.
- ⁹ Ai hatahononmu ope: Naibata do ahu! i lobei ni halak na mambunuh ho, hape sedo Naibata ho, tapi jolma do ibagas tangan ni halak sitikam ho?
- ¹⁰ Maningon matei do ho songon parmatei ni halak na so marsunat, marhitei tangan ni halak na legan; ai Ahu do na manluarhon ai, nini Tuhan Jahowa.”

¹¹ Dob ai roh ma hata ni Jahowa hu bangku, mangkatahon,

¹² “Ale anak ni jolma, bahen ma sada doding tangis-tangis pasal raja ni Tirus, anjaha hatahon ma hu bani: Sonon do hata ni Tuhan Jahowa: Ho do usihan ni na gokan dear, gok habisukon anjaha gok bani hajengeson.

¹³ I Eden hinan do ho marianan, ibagas pohon ni Naibata; bagei-bagei ni batu intan do na manrungkub ho, ai ma batu intan sardis, topas diamant, tarsis, soham, oniks, sapir, rubin ampa samarag; omas do panlongkotanni ai anjaha ai ma ibahen panjagarmu; bani ari panompaonmu do ipasirsir ai.

¹⁴ Ho do herub sipanrungkub hupabangkit, bani dolog ni Naibata na mapansing ai do ho hunahkon; i tongah-tongah ni batu na marapuy do ho mardalan-dalan.

¹⁵ Seng dong sihataon bam bani haganup dalanmu humbani ari panompaon bam, ronsi jumpah hajahaton bam.

¹⁶ Ibagas partiga-tigaonmu na buei ai gabe gok pangodoh-odohon do ho anjaha gok dousa; halani ai Hupabali do ho humbani dolog ni Naibata, anjaha Huripaskon do ho, ale herub sipanrungkub hun tongah-tongah ni batu na marapuy.

- ¹⁷ Mangenjeng do uhurmu halani hinajengesmu; iagouhon do habisukonmu halani hamuliaonmu. Hu tanoh do ho hugijigkon, anjaha hupatontonkon do ho hu lobei ni raja-raja.
- ¹⁸ Halani hinabuei ni hajahatonmu marhitei hagedukon ni partiga-tigaonmu, ipabutak ho do ianan-Ku na mapansing in; halani ai Huparoh do apuy hun tongah-tongahmu, ai ma na mangankon ho, anjaha gabe abuan do ho Hubahen i atas tanoh in i lobei ni haganup na mangidah ho.
- ¹⁹ Haganup halak na mananda ho i tongah-tongah ni bangsa-bangsa, tarsonggot do mangidah ho; jangin do parroh ni ajalmu, seng anjai dong be ho lalab.”

Uhum bani Sidon

- ²⁰ Dob ai roh ma hata ni Jahowa hu bangku, mangkatahon,
- ²¹ “Ale anak ni jolma, tujuhon ma bohimu dompak Sidon, anjaha manjahai ma ho pasalsi,
- ²² anjaha hatahon ma: Sonon do hata ni Tuhan Jahowa: Tonggor ma, imbang-Ku do ho ale Sidon, patalaron-Ku ma, hasangapon-Ku i tongah-tongahmu, ase ibotoh sidea, Ahu do Jahowa, anggo hudalankon ma uhum-Hu ijai, anjaha hupatuduhkon hapansingon-Ku bani;

²³ ai suruhon-Ku ma sampar hujai ampa pambunuhon bani alamanni; radag ma na tarbunuh i tongah-tongahni, inggot bani, binahen ni podang na mangimbangi; jadi botohon ni sidea ma, Ahu do Jahowa.

Parsuang ni Israel

²⁴ Jadi seng dong be bani ginompar ni Israel suga na manojok atap duri-duri na mangugahi humbani ganup simbalog ni sidea; na marmapas ni uhur mangidah sidea; jadi botohon ni sidea ma, Ahu do Tuhan Jahowa.

²⁵ Sonon do hata ni Tuhan Jahowa: Anggo Hupatumpu ma ginompar ni Israel humbani bangsa hamerapan ni sidea, anjaha Hupatalar hapansingon-Ku marhitei sidea ididah bangsa-bangsa, jadi marianan ma sidea bani tanohni, na huberehon ai hubani juakjuak-Ku si Jakob.

²⁶ Jadi sonang ma sidea marianan ijai, anjaha paulion ni sidea ma rumah, anjaha tombeionni pohon anggur. Tongon, sonang ma sidea marianan ijai, anggo Hudalankon ma uhum bani ganup simbalogni, na mapas bani sidea; jadi botohon ni sidea ma, Ahu do Jahowa, Naibata ni sidea.”

Ilumbahon Uhum dampak Masir

29¹ Pasapuluh-tahunkon ari sapuluh dua, bulan sapuluh, roh ma hata ni Jahowa hu bangku, mangkatahon,

² “Ale anak ni jolma, dampakkon ma bohimu dampak Parao, raja ni Masir, manjahai ma ho pasalsi ampa pasal ganup tanoh Masir,

³ hatahon ma: Sonon do hata ni Tuhan Jahowa: Imbang-Ku do ho, ale Parao, raja ni Masir, naga bolon ai, na gompang i tongah-tongah ni bah bangga ai, na mangkatahon, Ahu do simada Bah Nil, Ahu do sijadihon in!

⁴ Nahkonon-Ku do hait-hait hubagas osang-osangmu, anjaha bahenon-Ku do dengke na ibagas bahmin longkot bani sisikmu; jadi sintakon-Ku ma ho hu darat hun tongah-tongah ni bahmin rap pakon haganup dengke na ibagas bahmin, na longkot bani sisikmu.

⁵ Gijigkonon-Ku do ho hu halimisan, ho ampa haganup dengke na ibagas bahmin; timpal ma ho bani tanoh in, seng dong na mambuat atap na mananom. Bani binatang na i tanoh in ampa bani manuk-manuk na i awang-awang ai do Huberehon ho gabe sipanganon bani;

⁶ jadi botohon ni haganup pangisi ni Masir ma, Ahu do Jahowa. Halani tungkot tolong do ho bani ginompar ni Israel --

⁷ (*anggo ipartungkot sidea ho, maponggol ho, hona tusuk do tangan ni sidea; anggo ipangunsandei sidea ho, maponggol do ho, gabe rebad-rebad do binongei ni sidea*),

⁸ halani ai sonon do hata ni Tuhan Jahowa: Tonggor ma, parohon-Ku do podang mangimbang ho, anjaha raseihonon-Ku do jolma pakon pinahan hun tongah-tongahmu.

⁹ Gabe halimisan anjaha tarulang do tanoh Masir; jadi tandaon ni sidea ma, Ahu do Jahowa. Halani ihatahon ho: Ahu do simada Nil, anjaha ahu do sijadihon ai!

¹⁰ Halani ai, tonggor ma, imbang-Ku do ho, imbang-Ku do age bah banggalmu, anjaha bahenon-Ku do tanoh Masir gabe halimisan botul anjaha tarulang hun Migdol das hu Siene, das hu parbalogan Etiopia.

¹¹ Seng dong be nahei ni jolma na montas hunjai, nahei ni pinahan pe seng dong na montas hunjai, seng be ianonkon ai ompat puluh tahun dokahni.

¹² Anjaha bahenon-Ku do tanoh Masir gabe halimisan i tongah-tongah ni nagori, na dob gabe halimisan, anjaha huta ni sidea pe parsedaon do i tongah-tongah ni huta na dob pinarseda, ompat puluh tahun dokahni. Anjaha erapon-Ku do halak Masir i tongah-tongah ni bangsa-bangsa, anjaha mambur do sidea bahenon-Ku i tongah-tongah ni nagori-nagori.

¹³ Ai sonon do hata ni Tuhan Jahowa: Dob salpu siompat puluh tahun ai, patumpuon-Ku ma halak Masir humbani bangsa-bangsa hamerapan ni sidea ai.

¹⁴ Jadi pasuangon-Ku ma Masir, anjaha boanon-Ku do sidea mulak hu tanoh Patros, tanoh hasusuran ni sidea ai; gabe harajaon na etek ma sidea ijai.

¹⁵ Gabe sietekan do ai marimbang harajaon na legan, anjaha lang be pagijangonni dirini mangatasi bangsa-bangsa; paotikon-Ku do sidea, ase ulang be irajai bangsa na legan.

¹⁶ Anjaha seng marpangajaman bani be ginompar ni Israel; ai taringat ma sidea bani hasalahan ni sidea, anggo iparapat sidea dirini bani Masir. Jadi tandaon ni sidea ma, Ahu do Tuhan Jahowa.

¹⁷ Paduapuluhpitu-tahunkon, ari sada bulan sada, roh ma hata ni Jahowa hu bangku, mangkatahon,

¹⁸ “Ale anak ni jolma, isuruh si Nebukadnesar, raja ni Babel do balani marhorja koras manlawan Tirus; mapalpal do ganup ulu anjaha masapsap sagala abara, tapi age ia, age balani aha pe lang jumpahsi hun Tirus, bahen upah ni halojaonni manlawan huta ai;

¹⁹ Halani ai sonon do hata ni Tuhan Jahowa: Tonggor ma, ondoskonon-Ku do tanoh Masir hu tangan ni si Nebukadnesar, raja ni Babel; buatonni do arta-artani, rampason anjaha samunonni do ai, ai ma gabe upah bani balani.

²⁰ Tanoh Masir do Hubere bani, gabe upah ni halojaonni, ai marguna Bangku do na hinorjahon ni sidea ai.

²¹ Bani panorang ai patubuhon ma sada tanduk bani ginompar ni Israel, anjaha ungkabon-Ku do pamanganmu i tongah-tongah ni sidea, ase ibotoh sidea, Ahu do Jahowa.”

Ilumbahon Use Uhum dampak Masir

30 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, manjahai ma ho hatahon ma: Sonon do hata ni Tuhan Jahowa: Doruhkon ma! Aih, jangin ni ari ai!

³ Tongon, dohor ma ari ai, dohor ma ari ni Jahowa ai, ari na golap do ai, panorang pambalason bani bangsa-bangsa!

⁴ Roh do podang hu Masir, jadi masa ma hagobiron i Etiopia, anggo rasei halak tarbunuh i Masir; iusung halak habayakonni, anjaha iparseda palas-palasni.

⁵ Halak Etiopia pe, Put, Lud, bangsa panginsolat haganup, Libia ampa bangsa siparpadan pakon sidea, maningon rasei do bahenon ni podang.

⁶ Sonon do hata ni Tuhan Jahowa: Maningon rasei do halak na manungkoli Masir, anjaha marumbak do kuasani na timbul in, hun Migdol das hu Siene rasei do sidea ijai ibahen podang, nini Tuhan Jahowa.

⁷ Maseda do ia i tongah-tongah ni nagori-nagori na dob maseda; anjaha huta-hutani pe i tongah-tongah ni huta-huta na dob mareong.

⁸ Jadi tandaon ni sidea ma, Ahu do Jahowa, anggo Hupagara ma apuy i Masir anjaha maropuk ma haganup na mangurupisi.

⁹ Bani ari ai misir ma mangolos suruhan hun lobei marayak Etiopia laho manonggoti ia; hagobiron do sogop bani sidea bani ari parmagou ni Masir. Tonggor ma, roh do ai!

¹⁰ Sonon do hata ni Tuhan Jahowa: Parontihonon-Ku do hariahon ni Masir marhitei tangan ni si Nebukadnesar, raja ni Babel.

¹¹ Ia rap pakon balani, ai ma sibisangan ai humbani bangsa-bangsa, iparoh do hujai parsedahon tanoh ai; sintakon ni sidea do podangni dompak Masir, anjaha gokan ni sidea do tanoh ai bani halak na tarbunuh.

¹² Pahorahon-Ku do Bah Nil ai, anjaha jualon-Ku tanoh ai hu tangan ni halak parjahat; parohon-Ku do hasedaon bani tanoh ai ampa bani haganup na adong ijai, marhitei tangan ni halak sileban; Ahu, Jahowa do na mansahapkon in.

¹³ Sonon do hata ni Tuhan Jahowa: Parsedaon-Ku do sagala gana-gana, anjaha boiskonon sisombah-sombahon hun Wop, seng anjai dong be raja-raja i Masir; pasogopon-Ku do biar i tanoh Masir.

¹⁴ Parsedaon-Ku do Patros, pagaraon-Ku do apuy i Soan, anjaha dabuhon-Ku do uhum i No.

¹⁵ Useihononku do ringisku bani Sin, benteng ni Masir ai, anjaha raseihononku halak simbuei na i No.

¹⁶ Pagaraonku do apuy i Masir, rusak anjaha gobir ma Sin; runtas do tembok ni No, iparreong do tembok ni Nob.

¹⁷ Raseihonon ni podang do garama ni On ampa Pibeset, anjaha tarbuang do anak boru.

¹⁸ Manggolapi do ari i Tahpanhes, anggo Huponggolhon ma ijai tungkot harajaon ni Masir, anjaha marujung kuasani na timbul ai; rungkubon ni hagolapan ma huta ai, anjaha tarbuang pangisi ni dusun-dusunni.

¹⁹ Sonai ma dalankonon-Ku uhum bani Masir, ase itanda sidea, Ahu do Jahowa.

²⁰ Pasapuluhsada-tahunkon, bani ari pitu bulan sada, roh ma hata ni Jahowa hu bangku, mangkatahon,

²¹ Ale anak ni jolma, domma huponggolhon tangan ni Parao, raja ni Masir, anjaha tonggor ma, seng ibaluti ai, seng itambari, seng ililit, ase margogoh namin use manjolom podang.

²² Halani ai sonon do hata ni Tuhan Jahowa: Tonggor ma, imbang-Ku do Parao, raja ni Masir, ponggolhonon-Ku do tanganni haduasi, na

margogoh ai ampa na dob maponggol ai, anjaha dabuhkonon-Ku do podang ai humbani tanganni.

²³ Erapon-Ku do halak Masir hu tongah-tongah ni bangsa-bangsa, anjaha mambur do sidea hu nagori-nagori ai bahenon-Ku.

²⁴ Pargogohon-Ku do tangan ni raja Babel, anjaha nahkonon-Ku podang-Ku hubagas tanganni, tapi ponggolhonon-Ku do tangan ni Parao, gabe doruh-doruh ma ia i lobei-Hu, songon halak na ughan parah.

²⁵ Tongon, pargogohon-Ku do tangan ni raja Babel, tapi galek ma anggo tangan ni Parao; jadi tandaonni ma, Ahu do Jahowa. Berehonon-Ku do podang-Ku hubagas tangan ni raja Babel, tampulhononni do ai dompak tanoh Masir.

²⁶ Erapon-Ku do halak Masir hutongah-tongah ni bangsa-bangsa, anjaha mambur do sidea bahenon-Ku hu nagori-nagori ai; ase itanda sidea, Ahu do Jahowa.”

Ilimbagahon do Parao hubani hayu ares na ganjang bolon, na dob nirumbakkon

31 ¹ Dob ai pasapuluhsada-tahunkon, bani ari sada bulan tolu, roh ma hata ni Jahowa hu bangku, mangkatahon,

² “Ale anak ni jolma, hatahon ma bani Parao, raja ni Masir, pakon hubani rayatni: Ise do usihan bam ibagas habanggalonmin?”

- ³ Tonggor ma, ai ma hayu ares na i Libanon,
pardangkah na jenges, parbulung na tabun,
gijang tumang, punsuni das hu hombun.
- ⁴ Bah do na pabanggal ai, gijang do ai ibahen
bah na marjullak-jullak hun tanoh, na
mambahen marbaoran bah inggot iananni
ai, anjaha binangani laho hubani sagala
hayu na i talun.
- ⁵ Halani ai gijangan do ai marimbang sagala hayu
na i talun, lambin banggalni dangkahni,
anjaha lambin ganjangni ia rantingni, halani
buei ni bah na pabanggalhonsi.
- ⁶ Sagala manuk-manuk na i awang-awang
marasar do bani rantingni, anjaha i toruh
ni dangkahni do manunas sagala binatang
na i talun; bani linggomni marianan do
bangsa-bangsa na banggal.
- ⁷ Jenges do ai halani habanggalonni, halani
ganjang ni dangkahni, ai mangumparpar do
urat na bani bah mabuei.
- ⁸ Hayu ares na i pohon ni Naibata, seng taratasisi
ai, anjaha hayu tusam seng tardosdosi
dangkahni; hayu harangan seng tarimbangsi
jenges ni ranting-rantingni; seng dong hayu
i pohon ni Naibata na usih hujai ibagas
hajengeson.

⁹ Hubahen do ia jenges marhitei hinabuei ni dangkahni, anjaha haganup hayu na i Eden, na ibagas pohon ni Naibata simburu do bani.

¹⁰ Halani ai sonon do hata ni Tuhan Jahowa: Halani na marganjang ai ia, das punsuni hu hambun, anjaha gijang uhurni halani ganjangni ai,

¹¹ halani ai ondoskonon-Ku ma ia hubagas tangan ni sada halak na gogoh i tongah-tongah ni bangsa-bangsa; bahenonni do hubani romban hubani hajahaton na hinorjahonni ai, usironni do ia.

¹² Halak sileban, sibisangan humbani bangsa-bangsa do na manrobohsi lanjar itadingkon. Bani dolog-dolog ampa bani sagala habungan do mangkadabuh dangkahni, anjaha marpongolan ranting-rantingni, kerap bani lombang-lombang ni tanoh in; misiran do sagala bangsa na i tanoh on hun toruh ni linggomni, itadingkon do ai.

¹³ Bani batangni na marumbak ai ma sogop sagala manuk-manuk na i awang-awang, anjaha bani dangkahni ai sagala binatang na i talun,

¹⁴ ase ulang adong be hayu na i topi bah, na mangenjeng halani ganjangni, anjaha na das punsuni hu hambun; anjaha ulang adong be hayu na minum bah das sonai gijangni; ai hubani hamatean do sidea iondoskon, hu nagori partoruh ai, usih songon jolma na legan, marayak jolma na dob susur hu lubang ai.

¹⁵ Sonon do hata ni Tuhan Jahowa: Bani ari parturun-Ni hu nagori toruh, hubahen do marhoru bah bangga ai, Huolat do bah bolonni, anjaha soh mabaor buei binangani; marpakeian pusok ni uhur do Libanon hubahen halani-Si, anjaha sagala hayu na i talun madotei iahap halani-Si.

¹⁶ Hitir do Hubahen sagala bangsa halani pardorob ni parrumbakni, sangah husampakkon ia hu nagori toruh, hubani halak na dob tuad hu lubang ai; sagala hayu na i Eden, ai ma na pinilih ampa sijengesan i Libanon, sagala sionsop bah tarapoh do i nagori toruh.

¹⁷ Ai sidea pe turun do hu nagori toruh rap pakon sidea, mangayaki halak na dob tarbunuh halani podang, ai ma sidea, na marianan i toruh ni linggomni humbani bangsa-bangsa.

¹⁸ Ise do usihanmu ibagas hamuliaon ampa habanggalon humbani hayu na i Eden? Rap pakon hayu na i Eden do ho gijigkonon hu nagori toruh; maningon rap tibal do ho ampa halak na so marsunat, rap pakon halak na binunuh ni podang. Ai ma Parao ampa haganup rayatni, nini Tuhan Jahowa.”

Doding Tangis-tangis Pasal Parao ampa Rayatni

32 ¹ Pasapuluhsada-tahunkon, bani ari sada bulan sapuluh dua, roh ma hata ni Jahowa hu bangku, mangkatahon,

² “Ale anak ni jolma, bahen ma sada doding tangis-tangis pasal Parao, raja ni Masir, hatahon ma hu bani: Ale singa ajar-ajar i tongah-tongah ni bangsa-bangsa, ho na dob pinarseda! Songon naga do ho ibagas laut, unsong-unsong ibagas bah banggalmu; gombur do ibahen ho bahmu marhitei naheimu, anjaha iluntaki ho do bah banggalmu.

³ Sonon do hata ni Tuhan Jahowa: Rungkubkonon-Ku do jalang-Ku hubam, ai ma hulanan ni buei bangsa; dokdokon-Ku do hu atas ibagas jalang-Ku.

⁴ Sampakkonon-Ku do ho hu darat, anjaha hu ladang-ladang in do ho gijigkonon-Ku; parohon-Ku do manuk-manuk na i awang-awang in sogop bam, anjaha bosuran binatang-binatang na i tanoh in halani ho.

⁵ Gijigkonon-Ku do dagingmu i atas ni dolog-dolog, anjaha gokan-Ku habungan-habungan marhitei bangkeimu.

⁶ Pabosuron-Ku do tanoh age dolog-dolog marhitei darohmu na mabaor in, gok do binanga-binanga bahenonni ai.

⁷ Sanggah parboismai, rungkubon-Ku do langit in, anjaha manggolapi hubahen bintang-bintang; rungkubon-Ku do mata ni ari bani hambun, anjaha bulan pe seng marsinalsal.

⁸ Haganup panondang na i langit manggolapi do bahenon-Ku i baboumu, anjaha parohon-Ku do hagolapan hu tanohmu, nini Tuhan Jahowa.

⁹ Gobir do bahenon-Ku uhur ni buei bangsa, anggo Huboan ho tarbuang hu tongah-tongah ni bangsa-bangsa, hu nagori-nagori na so tinandamu.

¹⁰ Songgotan do buei bangsa halani ho, anjaha gobir raja-raja ni sidea pasal ho, anggo Huawas-awaskon ma podang-Ku i lobei ni sidea; rusak do sidea torus, pasal hosahni bei, bani panorang pardabuhmu.

¹¹ Ai sonon do hata ni Tuhan Jahowa: Podang ni raja Babel do na roh mandorab ho!

¹² Rasei do bahenon-Ku balamu marhitei podang ni puanglima, haganup sidea, ai ma sibisangan humbani bangsa-bangsa. Parsedaon ni sidea do hatimbulon ni Masir, anjaha magou do bahenonni rayatni.

¹³ Ripaskonon-Ku do ganup pinahanni na i topi ni bah banggal; seng be gomburon ni nahei ni jolma ai, anjaha tambirik ni pinahan pe seng be luntakonni ai.

¹⁴ Lihou do bahenon-Ku binanga ni sidea, anjaha manjulur songon minak bah banggal ni sidea, nini Tuhan Jahowa,

¹⁵ sanggah na Hubahen Masir gabe halimisan, Huparseda haganup isini, anjaha Huraseihon

sagala na marianan ijai, ase itanda sidea,
Ahu do Jahowa.

¹⁶ Doding tangis-tangis do in, sidodingkononkon;
tongon, dodingkonon ni boru ni bangsa-bangsa
do in, dodingkononni do ai bani Masir ampa bani
rayatni haganup.

¹⁷ Dob ai pasapuluhdua-tahunkon, ari sapuluh
lima bulan sapuluh dua, roh ma hata ni Jahowa hu
bangku, mangkatahon,

¹⁸ Ale anak ni jolma, tangisi ma Parao ampa
rayatni, anjaha suruh ma sidea tuad, ia pakon boru
ni bangsa-bangsa na sangap-sangap in, laho hu
nagori toruh, marayak na dob tuad hu lubang ai.

¹⁹ Ise do na niatasanmu ibagas hajengeson? Tuad
ma ho, ase ipatibal ho rap pakon halak na so
marsunat.

²⁰ I tongah-tongah ni halak binunuh ni podang do
ia tompas, anjaha i lambungni radag sagala rayatni.

²¹ Jadi hatahonon ni puanglima na gogoh-gogoh ai
ma hun tongah ni nagori toruh ai pasalsi ampa na
mangurupisi: Tuad do sidea, radag ijai, halak na so
marsunat ai, hona bunuh ibahen podang.

²² Ijai do Assur, ampa ganup rayatni inggot
tanomanni; haganup sidea tarbunuh, tompas
halani podang;

²³ bani tang parbagas ni lubang ai do tanomanni,
anjaha rayatni inggot bani tanomanni; haganup
sidea tarbunuh, tompas halani podang, ai ma

sibahen songgot-songgot hinan i tanoh ni halak na manggoluh.

²⁴ Ijai do Elam ampa haganup rayatni inggot tanomanni; haganup sidea tarbunuh, tompas binahen ni podang; tuad do sidea, seng marsunat hu nagori toruh; ipausung-usung sidea do habadoronni rap pakon halak na tuad hu lubang ai.

²⁵ Ibahen sidea do podomanni i tongah-tongah ni halak na tarbunuh rap pakon rayatni, inggot tanomanni; haganup sidea seng marsunat, tompas halani podang; sidea do sipasar songgot-songgot i tanoh ni halak na manggoluh, ipausung-usung sidea do habadoron ni sidea rap pakon halak, na tuad hu lubang ai, i tongah-tongah ni halak na tarbunuh ai do sidea radag.

²⁶ Ijai do Mesek ampa Tubal ampa haganup rayatni inggot tanoman ni sidea, haganup do sidea seng marsunat, tompas halani podang, ai ma sibahen songgot-songgot hinan i tanoh ni halak na manggoluh.

²⁷ Seng tibal sidea rap pakon puanglima na dob tarbunuh sapari, na dob tuad hu nagori toruh marpakeian porang, podang ni sidea inahkon i toruh ni uluni, anjaha gantarni irungkubkon bani holi-holini; ai songgot-songgot mangidah puanglima ai do na masa i tanoh ni halak na manggoluh.

²⁸ Tapi anggo ho i tongah-tongah ni na marsunat ai do, marosak anjaha tibal, rap pakon halak na tarbunuh halani podang.

²⁹ Ijai do Edom, raja-rajani ampa na sangap-sangapni, itibalhon ijai, age pe gogoh hinan, rap pakon halak na tarbunuh halani podang; radag do sidea ijai rap pakon halak na so marsunat, rap pakon halak na tuad hu lubang ai.

³⁰ Ijai do raja-raja na hun utara haganup ampa haganup halak Sidon, na tuad rap pakon halak na tarbunuh, na gabe bador ibagas kuasani; tibal do sidea seng marsunat rap pakon halak na tarbunuh halani podang, anjaha ipausung-usung sidea do habadoron rap pakon halak na tuad hu lubang ai.

³¹ Idahon ni Parao ma sidea, gabe tarapoh ma uhurni pasal rayatni; tarbunuh ibahen podang do Parao ampa haganup balani, nini Tuhan Jahowa.

³² Ai ipasar do songgot-songgot i tanoh ni halak na manggoluh; halani ai patibalon do Parao ampa haganup rayatni i tongah-tongah ni halak na so marsunat, rap pakon halak na tarbunuh binahen ni podang, nini Tuhan Jahowa.”

Tanggung jawab ni Nabi Hesekiel songon Siparjaga bani Israel

33 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, parsahapkon ma hasomanmu na sabangsa, anjaha hatahon ma bani sidea: Anggo Huparoh podang hubani sada nagori, jadi roh pangisi ni nagori ai mambuat sada halak hun tengah-tengah ni sidea, anjaha ipabangkit sidea ia gabe siparjaga bani sidea,

³ anjaha anggo ididah roh podang ai dompak nagori ai, gabe isompul tarompit ai, laho palumbahon bangsa ai,

⁴ jadi anggo adong na manangar sora ni tarompit ai, hape seng ra ia palumbaon, gabe roh podang ai anjaha ibunuh ia, marbilang hubani sandiri ma darohni ai.

⁵ Ibogei do sora ni tarompit ai, hape seng ra ia palumbaon, marsapata hubani ma darohni. Tapi halani ipalumba parjaga ai do, jadi maluah ma hosahni.

⁶ Tapi, anggo ididah parjaga ai podang ai roh, hape seng isompul tarompit ai, gabe seng hona palumba bangsa ai, gabe roh podang ai, anjaha dong na tarbunuh humbani sidea: matei do halak ai ibagas dousani, tapi humbani parjaga ai do tungguonku darohni.

⁷ Tapi anggo ho, ale anak ni jolma, domma hupabangkit ho gabe parjaga bani ginompar ni Israel, anggo adong itangar ho sada hata humbani pamangan-Ku, lumbahon ma ai bani sidea ibagas goran-Ku.

⁸ Anggo Huhatahon bani halak parjahat: Maningon matei do ho, ale parjahat tapi seng marsahap ho palumbahon parjahat ai, ase itadingkon dalanni ai, sai na matei do namin parjahat ai ibagas hajahatonni, tapi humbani tanganmu do tungguon-Ku darohni.

⁹ Tapi, anggo ipalumba ho do parjahat ai, ase itadingkon dalanni ai, hape seng ra ia mulak manadingkon dalanni ai, sai na matei do ia ibagas hajahatonni, tapi maluah do anggo hosahmu.

¹⁰ Anjaha ho ale anak ni jolma, hatahon ma hubani ginompar ni Israel: Sonon do sahap-sahapnima: Mangonai bennami do panlanggaronnami pasal dousanami, anjaha lambin masab do hanami ibahen, sonaha ma boi manggoluh ope hanami?

¹¹ Hatahon ma bani sidea: Songon sintongni manggoluh Ahu, nini Tuhan Jahowa, sabonar seng marosuh uhur-Hu mangidah hamatean ni parjahat, tapi ase mulak do parjahat ai manadingkon dalanni, ase manggoluh ia. Mulak, mulak ma hanima humbani dalannima na jahat in; ai mase ma rahanan matei hanima, ale ginompar ni Israel?

¹² Ho ale anak ni jolma, hatahon ma hubani bangsamu: Hapintoron ni halak parpintor seng tarpaluah ia dirini bani panorang panlanggaronni; anjaha pasal hajahaton ni parjahat, seng madabuh ia halani ai, asal itadingkon hajahatonni ai;

halak parpintor seng boi manggoluh ia halani hapintoronni hinan, anggo mardousa ia.

¹³ Age pe domma Huhatahon bani halak parpintor: Maningon manggoluh do ho! Anjaha martenger ni uhur ia bani hapintoronni ai, hape idalankon hajahaton, haganup hapintoronni ai seng be ingaton ai; tapi matei mando ia halani hajahaton na hinorjahonni ai.

¹⁴ Porini domma Huhatahon bani halak parjahat: Maningon matei do ho! Hape itadingkon dousani ai, anjaha idalankon uhum ampa hapintoron,

¹⁵ ai ma, ipaulak parjahat ai sikoram, ipasuang na nirampasni, marparlahou ia ibagas titah hagoluhan, anjaha seng idalankon hagedukon, maningon manggoluh do ia, seng anjai matei ia.

¹⁶ Haganup dousa, na dob hinorjahonni ai, seng be hiraon bani; halani ihorjahon do aturan pakon uhum ampa hapintoron, maningon manggoluh do ia.

¹⁷ Tapi ihatahon bangsamu do: Seng sintong dalam ni Tuhan! Hape dalam ni sidea sandiri do na so sintong.

¹⁸ Anggo manlembang halak parpintor humbani hapintoronni, gabe ihorjahon hajahaton, maningon matei do ia halani ai.

¹⁹ Anjaha anggo itadingkon halak parjahat hajahatonni, anjaha idalankon uhum ampa hapintoron, manggoluh do ia halani ai.

²⁰ Hape ihatahon hanima: Seng sintong dalam ni Tuhan! Ale ginompar ni Israel, domu hubani parlahounima bei do hanima uhumon-Ku.

Barita pasal partalu ni Jerusalem

²¹ Pasapuluhdua-tahunkon, bani ari lima bulan sapuluh, dob tarbuang hanami, roh ma sada halak na maluah hun Jerusalem marayak ahu, mangkatahon, Domma talu huta ai!

²² Ia tangan ni Jahowa domma tampei bangku bodari ni ai, paima roh halak na maporus ai; iungkab do pamanganku bani panorang parroh ni halak ai bangku sogod-sogod; jadi buha ma pamanganku, seng longah be ahu.

²³ Roh ma hata ni Jahowa hu bangku, mangkatahon,

²⁴ Ho ale anak ni jolma, sonon sahap-sahap ni pangisi ni ianan na dob maseda ai i tanoh Israel: Si Abraham, sahalaksi do hansa hape gabe parbagiananni do tanoh in; buei do anggo hita, tontu iberehon do tanoh in gabe parbagiananta.

²⁵ Halani ai hatahon ma bani sidea: Sonon do hata ni Tuhan Jahowa: Ipangan hanima gulei marhasoman daroh, mangkawah do matanima dompak gana-gananima, anjaha manduruskon daroh do hanima; mintor tartean hanima ma tanoh in?

²⁶ Marpangajaman do hanima bani podangnima, ihorjahon hanima do na masambor, anjaha ganup

do hanima pabutak jolma ni hasomanni; mintor tartean hanima ma tanoh in?

²⁷ Hatahon ma sonon bani sidea: Sonon do hata ni Tuhan Jahowa: Songon sintongni manggoluh Ahu, maningon rasei do bahenon ni podang na marianan bani huta na dob maseda ai; anjaha halak na marianan i darat ondoskonon-Ku do gabe sipanganonni binatang; anjaha halak na adong bani dolog batu ampa liang-liang maningon matei do bahenon ni sampar.

²⁸ Bahenon-Ku do tanoh ai gabe halimisan anjaha tarulang, anjaha marujung do sagala pangenjengon ai; gabe lungun ma dolog-dolog ni Israel, seng dong be halak na montas hunjai.

²⁹ Jadi tandaon ni sidea ma, Ahu do Jahowa, anggo gabe halimisan anjaha tarulang tanoh ai Hubahen, halani haganup hasamboron na hinorjahon ni sidea.

Hampung ni uhur ni bangsa ai pasal hata na nilumbahon ni si Hesekiel

³⁰ Ia ho, ale anak ni jolma, bangsamai, na mansahap-sahapkon ho i lambung ni tembok ampa bani labah ni rumah-rumah, nini samah sidea, ganup bani hasomanni: Eta, anjaha tangar hita ma hata aha do ai, na roh humbani Jahowa!

³¹ Jadi roh ma sidea marayak ho, marhulan-hulan, lanjar hundul ma bangsangakai i lobeimu, anjaha

tangihonon ni sidea do hatamu, tapi seng dalankonon ni sidea ai; holong do isahapkon pamangan ni sidea, tapi bani untungni bei do sangkut uhur ni sidea.

³² Tongon, songon sipandoding sipamalas-malas uhur do ho bani sidea, silurlur sora ampa na pandei marhusapi, ai itangihon sidea do na hinatahonmu, tapi seng ihorjahon sidea ai.

³³ Tapi anggo masa ma ai, tonggor ma, maningon saud do ai, jadi botohon ni sidea ma, na adong do nabi i tongah-tongah ni sidea.”

**Pinsang-pinsang dompak Parmahan na So
Mansarihon Hulananni; Bagah-bagah
Pasal Parmahan na Madear**

34 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, manjahai ma ho pasal parmahan ni Israel, manjahai anjaha hatahon ma bani sidea, hubani parmahan ai: Sonon do hata ni Tuhan Jahowa: Bursik ma parmahan ni Israel, na marmahan dirini sandiri! Ai lang biribiri do siparmahanon ni parmahan?

³ Taboh-tabohni ipangan hanima, wolni jadi pakeiannima, na mombur isayat hanima; tapi biribiri ai seng iparmahan hanima.

⁴ Na galek seng ipargogohi hanima, na boritan seng itambari hanima, na ugahan seng ibaluti hanima;

na kahou seng iboan hanima mulak, anjaha na magou seng ipindahi hanima; koras anjaha bisang do panrajainima bani sidea.

⁵ Jadi mampar ma biribiringku, halani lang adong na marmahani; gabe sipanganon ma sidea bani sagala binatang panoroh.

⁶ Maor do biribiringkai i atas ni sagala dolog ampa bani sagala buntu-buntu na gijang; bani sab tanoh in do mambur merap biribiringku, tapi sahalak pe lang adong na sungkun-sungkun pasal ai atap na mangindahi ai.

⁷ Halani ai, ale parmahan, tangihon ma hata ni Jahowa!

⁸ Songon sintongni manggoluh Ahu, nini Tuhan Jahowa: Halani gabe sisorohon biribiring-Ku, anjaha gabe sipanganon bani sagala binatang panoroh biribiringkai, halani seng dong na marmahani, anjaha halani seng ipindahi parmahankai biribiring-Kai, tapi dirini sandiri do iparmahan, hape biribiring-Kai lang,

⁹ halani ai, ale parmahan, tangihon hanima ma hata ni Jahowa:

¹⁰ Sonon do hata ni Tuhan Jahowa: Tonggor ma, imbang-Ku do parmahan in, anjaha tungguon-Ku do biribiri in humbani sidea, anjaha parontihonon-Ku sidea humbani na marmahan biribiri in. Seng be parmahanon ni parmahan in dirini; paluahon-Ku

ma biribiring-Ku humbani pamangan ni sidea, ase ulang ipangan sidea be in.

¹¹ Ai sonon do hata ni Tuhan Jahowa: Tonggor ma, Ahu, Ahu sandiri sungkun-sungkun bani biribiring-Ku, anjaha pindahan-Ku do sidea.

¹² Songon parmahan na mangindahi biribirini, anggo adong na kahou humbani hulananni ai, sonai do pindahan-Ku biribiring-Ku; paluahon-Ku do sidea humbani ganup ianan hamerapan ni sidea ai, sanggah bonog ari anjaha lotir.

¹³ Boanon-Ku do sidea mandarat humbani bangsa-bangsa, anjaha patumpuon-Ku do sidea hun nagori-nagori ai, anjaha paulakon-Ku do sidea hu tanoh ni sidea sandiri; parmahanon-Ku do sidea bani dolog-dolog ni Israel, bani habungan ampa bani haganup ianan, na tariankon i tanoh ai.

¹⁴ Bani sampalan na mombur do parmahanon-Ku sidea, anjaha dolog-dolog ni Israel na gijang ai do parmahanan bani sidea; ijai do sidea manggompang bani tanoh na dear panggagatan, anjaha manggagat do sidea bani sampalan na lambutan bani dolog-dolog ni Israel.

¹⁵ Ahu sandiri ma gabe siparmahan bani biribiring-Ku, anjaha Ahu mambahen marsaran sidea, nini Tuhan Jahowa.

¹⁶ Pindahan-Ku do na magou in, paulakon-Ku ma na kahou in, anjaha balutan-Ku na ugahan; na galek pargogohan-Ku, tapi na mombur anjaha na

gogoh pardiateihonon-Ku; ibagas hasintongan do parmahanon-Ku sidea.

¹⁷ Tapi pasal hanima, ale biribiringku, sonon do hata ni Tuhan Jahowa: Ahu ma manguhum biribiri samah biribiri, biribiri tunggal ampa hambing tunggal.

¹⁸ Ai lang sungkup bannima manggagat bani sompalan na mombur in, ai dogei-dogeionnima ope teba-teba ni sampalan in? Ai lang sungkup ope minum hanima humbani bah na lihou in, sihol luntakonnima ope in?

¹⁹ Ai mintor na nidogei-dogeinima in ma panganon ni biribiring-Ku, anjaha tor ni luntak-luntaknima in ma inumonni?

²⁰ Halani ai, sonon do hata ni Tuhan Jahowa hubani sidea: Tonggor ma, Ahu sandiri ma na manguhum biribiri na mombur ampa na merung.

²¹ Halani ionjar-onjar hanima marhitei badan ampa abaranima, anjaha na galek ai idugui hanima marhitei tanduknima, ronsi na mambur merap sidea,

²² halani ai urupan-Ku ma biribiring-Kin, seng be sisorohon sidea; Ahu ma na manguhum biribiri samah biribiri.

²³ Pabangkiton-Ku ma sada parmahan bani sidea, ai ma juakjuak-Ku si Daud, anjaha parmahanonni ma sidea. Ia ma na marmahan sidea, anjaha ia gabe parmahan bani sidea.

²⁴ Ahu, Jahowa ma gabe Naibata bani sidea, anjaha juakjuak-Ku si Daud gabe panrajai i tongah-tongah ni sidea; Ahu, Jahowa do na manluarhon ai.

²⁵ Bahenon-Ku ma bani sidea padan pardameian, anjaha usiron-Ku ma binatang panoroh hun tanoh ai, gabe boi sonang marianan sidea i halimisan atap modom i harangan.

²⁶ Bahenon-Ku ma sidea ampa haganup na inggot bani dolog-Ku gabe pasu-pasu; parohon-Ku do udan bani musimni, gabe udan pasu-pasu ma ai.

²⁷ Hayu na i talun mambere buahni, anjaha tanoh ai ibere do gogohni, anjaha sonang do sidea i tanoh ni sidea sandiri; jadi tandaon ni sidea ma, Ahu do Jahowa, anggo Huponggolhon pasangan ni sidea ai, anjaha Hupaluah sidea humbagas tangan ni halak na marjabolonkon sidea.

²⁸ Seng be gabe taban-taban sidea bani bangsa-bangsa, anjaha binatang-binatang na i nagori in seng be atahonni sidea, tapi sonang ma sidea marianan, seng dong be na mangkirjati.

²⁹ Pasirsiron-Ku ma bani sidea sada pohon na madear, gabe seng be magou sidea hun nagori in halani gayuran, anjaha seng be taranon ni sidea apas-apas ni bangsa-bangsa.

³⁰ Jadi botohon ni sidea ma, Ahu do Jahowa, Naibata ni sidea, na mangkasomani sidea, anjaha sidea ginompar ni Israel, bangsang-Ku do sidea, nini Tuhan Jahowa.

³¹ Tongon, hanima do biribiring-Ku, biribiri bani sampalan-Ku; Ahu do Naibatanimi, nini Tuhan Jahowa.”

Uhum ni Naibata bani Edom

35 ¹ Dob ai roh ma hata ni Jahowa hu bangku, mangkatahon,

² “Ale anak ni jolma, dompakkon ma bohimu hu Dolog Seir, anjaha manjahai ma ho pasal ai!

³ Hatahon ma hu bani: Sonon do hata ni Tuhan Jahowa: Imbang-Ku do ho, ale Dolok Seir, pagostongon-Ku do tangan-Ku dompak ho, anjaha bahenon-Ku do ho gabe halimisan anjaha tarulang.

⁴ Parreongon-Ku do huta-hutamu, maningon gabe halimisan do ho, ase itanda ho, Ahu do Jahowa.

⁵ Halani humbani sapari mammunsuhi lalab uhurmu, anjaha iondoskon ho halak Israel bani podang, sanggah panorang hasosakanni, bani panorang hagogok ni uhum bani sidea,

⁶ halani ai, songon sintongni manggoluh Ahu, nini Tuhan Jahowa, bahenon-Ku do ho margulu-gulu daroh, seng tarlembangi ho na marlapu-lapu daroh ai; halani marsalah ho marhitei na manduruskon daroh, halani ai maningon durus do darohmu.

⁷ Bahenon-Ku do Dolok Seir gabe halimisan anjaha tarulang, anjaha rotapon-Ku do hunjai sagala na masuk ampa na luar.

⁸ Gok do bahenon-Ku dologmu bani na tarbunuh, radag do halak na tarbunuh bani dolog-dologmu, bani habunganmu ampa bani binanga-binangamu.

⁹ Bahenon-Ku do ho gabe halimisan ronsi sadokah ni dokahni, anjaha hutamu pe lang be ianonkon, ase itanda ho, Ahu do Jahowa.

¹⁰ Halani ihatahon ho: Na dua bangsa on ampa na dua nagori on maningon bangku do ai, maningon ahu do gabe simada ai! (*hape ijai do Jahowa.*)

¹¹ Halani ai, songon sintongni manggoluh Ahu, nini Tuhan Jahowa, maningon bahenon-Ku do bam romban hubani ringismu ampa romban hubani simburumu dampak sidea halani domdommu mangidah sidea; patandahonon-Ku do diring-Ku i tongah-tongahnima marhitei uhum sidabuhon-Ku bannima.

¹² Jadi botohonmu ma, Ahu do Jahowa, na manangar haganup panrisaimu dampak dolog ni Israel, marhitei na mangkatahon, Domma iparseda ai! Sibonduton do ai ibere banta!

¹³ Ipabanggal ho do dirimu dampak Ahu marhitei pamanganmu, ipabuei ho do sahap-sahapmu dampak Ahu; Hubogei do ai.

¹⁴ Sonon do hata ni Tuhan Jahowa: Songon malas ni uhurmu bani tanoh-Ku na tarulang in, sonai do mangonai bam bahenon-Ku.

¹⁵ Songon malas ni uhurmu mangidah parbagianan ni Israel na maseda in, sonai do mangonai bam

bahenon-Ku; maningon gabe halimisan do ho, ale Dolok Seir ampa ho haganup, ale Edom, ase itanda hanima, Ahu do Jahowa.”

Bagah-bagah Pasal Parsuang ni Tanoh Israel

36 ¹ Ho ale anak ni jolma, manjahai ma ho pasal dolog ni Israel, anjaha hatahon ma, “Ale dolog ni Israel, tangihon ma hata ni Jahowa!

² Sonon do hata ni Tuhan Jahowa: Halani na dob ihatahon munsuh pasal hanima: Ha, ha, ha! Buntu-buntu sisadokah ni dokahni ai, domma gabe parbagiananta!

³ Halani ai, manjahai ma ho, hatahon ma: Sonon do hata ni Tuhan Jahowa: Halani tongon, halani na dob pinarseda ni sidea ai hanima, iparreong inggot, anjaha gabe parbagianan ni bangsa-bangsa na tading ai hanima, anjaha gabe sisahap-sahapkononkon ampa sirisa-risaon ni halak hanima,

⁴ halani ai, ale dolog ni Israel, tangar ma hata ni Tuhan Jahowa: Sonon do hata ni Tuhan Jahowa bani sagala dolog ampa buntu-buntu, bani lombang-lombang ampa habungan, bani na mareong ampa huta-huta na dob tinadingkon, na dob gabe taban ampa sirisa-risaon bani bangsa-bangsa inggot,

⁵ halani ai sonon do hata ni Tuhan Jahowa: Tongon, marhitei gajag ni simburung-Ku do marsahap

Ahu dompak bangsa parbegu na tading ai ampa dompak Edom haganup, na mambuat tanoh-Ku gabe parbagianan ni sidea, ibagas gok malas ni uhur ampa risa-risa, laho parsedahon ampa manrampasi ai,

⁶ halani ai, manjahai ma ho pasal tanoh Israel, anjaha hatahon ma bani sagala dolog ampa buntu-buntu, bani lombang-lombang ampa habungan: Sonon do hata ni Tuhan Jahowa: Tonggor ma, marsahap do Ahu ibagas simburung-Ku ampa ibagas ringis-Ku, halani na dob manaron ai hanima binahen ni dorun-dorun ni sipajuh begu-begu.

⁷ Halani ai sonon do hata ni Tuhan Jahowa: Hupagostong do tangan-Ku laho marbija, paboa bangsa-bangsa na inggot bannima ai maningon tarononni do dorun-dorun.

⁸ Tapi anggo hanima, ale dolog ni Israel, mangulaki do mardangkahi anjaha marbuahi bani bangsang-Ku Israel, ai podas ma sidea mulak hu tanohni.

⁹ Tongon, parayakon-Ku anjaha dompakkonon-Ku do hanima, horjahononkon anjaha tidahan do use hanima.

¹⁰ Anjaha pabueion-Ku do jolma i atasnima, ai ma ginompar ni Israel haganup; ianonkon do use huta-huta, anjaha padearon ma na mangkareong.

¹¹ Pabueion-Ku do i atasnima jolma pakon pinahan, martambah-tambah anjaha manggompari do

sidea; marisi do hanima bahenon-Ku songon bani panorangnima sapari; bahenon-Ku do bannima na madear lobih hambani sapari; jadi botohonnima ma, Ahu do Jahowa.

¹² Bahenon-Ku do mardalani jolma i atasnima, ai ma bangsang-Ku Israel; sidea do manean ho, gabe parbagianan ni sidea do ho, anjaha seng be magouan anak sidea bahenonmu.

¹³ Sonon do hata ni Tuhan Jahowa: Halani ihatahon halak bam: Sipangan jolma do ho, anjaha ibahen ho do popor bangsamu,

¹⁴ halani ai, lang be sipangan jolma ho, anjaha lang be popor bahenonmu bangsamu, nini Tuhan Jahowa.

¹⁵ Lang be palopason-Ku ho manangar apas-apas ni bangsa-bangsa, anjaha seng be tarononmu risa-risa ni bangsa parbegu, anjaha seng be popor bahenonmu bangsamu, nini Tuhan Jahowa.

Iuras, Ipabayu Naibata do Uhur ni Israel Sipardousa ai halani Goran-Ni

¹⁶ Dob ai roh ma hata ni Jahowa hu bangku, mangkatahon,

¹⁷ Ale anak ni jolma, sanggah marianan ope ginompar ni Israel i tanoh ni sidea, ipabutak sidea do ai marhitei parlahou ampa pambahenan ni sidea; parlahou ni sidea i lobei-Hu, ai ma songon

habutakon ni naboru sanggah parroh ni pantang ni hiouni.

¹⁸ Jadi Huuseihon ma ringis-Ku hubani sidea halani daroh na niduruskon ni sidea i tanoh in, anjaha ibutaki sidea ai marhitei gana-gana ni sidea.

¹⁹ Huerap do sidea hu tongah-tongah ni bangsa-bangsa, gabe mampar do sidea i nagori-nagori ai; romban hubani parlahou ni sidea ampa pambahenanni do sidea Huuhumi.

²⁰ Jadi das ma sidea hu tongah-tongah ni bangsa-bangsa; tapi huja pe sidea das ipabutak sidea do ijai goran-Ku na pansing in marhitei na hinatahon ni halak pasal sidea: On ma bangsa ni Jahowa ia, hape maningon buhar do sidea hun tanohni!

²¹ Tapi marulak-ulakan do uhur-Hu halani Goranku na pansing in, na pinabutak ni ginompar ni Israel i tongah-tongah ni bangsa-bangsa hadasan ni sidea ai.

²² Halani ai hatahon ma bani ginompar ni Israel: Sonon do hata ni Tuhan Jahowa. Sedo halani hanima, ale ginompar ni Israel, ase sonai hubahen, tapi halani goran-Ku na pansing in do, na pinabutaknima in i tongah-tongah ni bangsa-bangsa hadasannima ai.

²³ Anjaha papansingon-Ku do goran-Ku na timbul in, na dob pinabutak in i tongah-tongah ni bangsa-bangsa anjaha na dob pinabutaknima

i tongah-tongah ni sidea; jadi tandaon ni bangsa-bangsa ma, Ahu do Jahowa, nini Tuhan Jahowa, anggo Hupatalar ma hapansingon-Ku i lobei ni sidea marhitei hanima.

²⁴ Ai padaratonku do hanima hun tongah-tongah ni bangsa-bangsa, patumpuonku do hanima humbani ganup nagori-nagori, anjaha boanon-Ku do hanima mulak hu tanohnima.

²⁵ Anjaha uraskonon-Ku do bannima bah na lihou ase borsih hanima, urason-Ku do hanima humbani ganup habutakonnima ampa humbani gana-gananima.

²⁶ Berehonon-Ku do bannima uhur na bayu, anjaha tonduy na bayu do nahkonon hubagas dirinima; buaton-Ku do uhur batu humbagas angkulanima, anjaha uhur na marpangahapan do berehonon-Ku bannima.

²⁷ Tonduy-Hu do nahkonon-Ku hubagas dirinima, anjaha bahenon-Ku do ase marparlahou hanima ibagas titah-Ku, anjaha bujur idalankon hanima aturan-Ku.

²⁸ Jadi marianan ma hanima bani tanoh na dob Huberehon hubani ompungnima; gabe bangsang-Ku ma hanima, anjaha Ahu gabe Naibatanim.

²⁹ Paluahonku do hanima humbani sagala habutakonnima; marsahap pe Ahu bani gandum

anjaha hubahen pe ai marganda-ganda, anjaha lohei seng sogop bannima.

³⁰ Pabueion-Ku do buah ni sagala hayu ampa gogoh ni tanoh in, ase ulang be mahiri hanima ibahen bangsa-bangsa parbegu halani loheian hanima.

³¹ Jadi taringat ma hanima bani parlahounima na jahat in ampa bani pambahenannima na so madear in; gabe magigi ma hanima bani dirinima, halani hajahaton ampa pambahenan hasamboronnima in.

³² Sedo halani hanima ase sonai hubahen, nini Tuhan Jahowa; sai ibotoh hanima ma in! Maila anjaha mubah ma bohinima halani pambahenannima in, ale ginompar ni Israel!

³³ Sonon do hata ni Tuhan Jahowa: Bani ari ai, sanggah na huuras hanima humbani sagala hajahatonnima, marisi ma use bahenon-Ku sagala huta, anjaha ipauli use sagala na mareong.

³⁴ Horjaonkon do use tanoh na dob tarulang ai, na dob halong na sain dokah ipaidah-idah pamontas.

³⁵ Jadi hatahonon ni halak ma: Tanoh on, na halong hinan, gabe songon pohon Eden do sonari; anjaha huta-huta in, na dob maseda, tarulang anjaha mareong, marisi do sonari anjaha ipatoguh.

³⁶ Jadi tandaon ni bangsa-bangsa, na tading in, na inggot bannima in ma, paboa Ahu do Jahowa, na paulihon use sagala na mareong, anjaha na

manuani use sagala na dob halong. Ahu do Jahowa na manluarhon ai, anjaha pasaudon-Ku do ai.

³⁷ Sonon do hata ni Tuhan Jahowa: Pasal on pe ra do Ahu sungkunon ni ginompar ni Israel, ase Hubahen bani sidea, ai ma pabueihon jolma bani sidea songon hulanan ni biribiri.

³⁸ Songon buei ni biribiri sigalanganonkon, songon buei ni biribiri i Jerusalem sanggah pesta, sonai ma marisi bani hulanan ni jolma huta-huta na dob maseda in. Jadi tandaon ni sidea ma, Ahu do Jahowa.”

Holi-holi na Pinagoluh ni Tonduy ni Naibata, na Martudu-tudu bani Parpuho ni Israel

37 ¹ Dob ai sogop ma bangku tangan ni Jahowa; jadi iarahkon ma ahu hu darat marhitei Tonduy ni, anjaha ipasoh ma ahu i tongah-tongah ni habungan ai, gok holi-holi ni jolma do ai.

² Ipabontaskon ma ahu hunjai inggot, anjaha tonggor ma, buei tumang merap i habungan ai, anjaha tonggor ma, domma horah-horah ganupan ai.

³ Jadi nini ma dompak ahu, “Ale anak ni jolma, boi ope manggoluh holi-holi on? Jadi ningku ma mambalosi: Ale Tuhan Jahowa, Ham do na mambotoh ai!

⁴ Dob ai nini ma hu bangku, Manjahai ma ho pasal holi-holi on, hatahon ma bani sidea: Ale holi-holi na horah-horah, tangar ma hata ni Jahowa!

⁵ Sonon do hata ni Jahowa bani holi-holi on: Tonggor ma, Ahu mambere Tonduyhu hu bannima, ase manggoluh hanima.

⁶ Anjaha Ahu mannahkon urat-urat bannima ampa patubuh daging bannima ampa mambahen marhuling-kuling hanima ampa mambahen marhosah, ase manggoluh hanima; jadi tandaonnima ma, Ahu do Jahowa.

⁷ Jadi manjahai ma ahuh songon na pinarentahkon ai bangku, anjaha sanggah na manjahai ai ahuh, tonggor ma, masa ma sora na mardongos, gabe marsitohuan ma holi-holi samah holi-holi.

⁸ Jadi sanggah na mangkawah ahuh, tonggor ma, domma dong urat-urat bani sidea, tubuh daging bani sidea, anjaha marhulingkuling sidea; tapi seng dong ope tonduy bani sidea.

⁹ Dob ai nini ma dompak ahuh: Manjahai ma ho pasal tonduy ai, manjahai ma, ale anak ni jolma, anjaha hatahon ma bani tonduy ai: Sonon do hata ni Tuhan Jahowa: Roh ma ale tonduy humbani deisa na ompat in, manompul ma ho hubani halak na binunuh on, ase manggoluh sidea!

¹⁰ Anjaha manjahai ma ahuh songon na pinarentahkon ai hu bangku, gabe roh ma tonduy ai hubagas sidea, jadi manggoluh ma sidea anjaha

jongjong bei bani naheini; hulanan banggal tumang do ai.

¹¹ Dob ai nini ma hu bangku, “Ale anak ni jolma, ia holi-holi on, ginompar ni Israel do in ganup. Tonggor ma, nini sidea: Domma masak holi-holinami, seng dong be pangarapannami, bois do hanami.

¹² Halani ai manjahai ma ho, anjaha hatahon ma bani sidea: Sonon do hata ni Tuhan Jahowa: Tonggor ma, untkabon-Ku do tanomannima, anjaha paluaron-Ku do hanima hum bagas tanomannima, ale bangsang-Ku; anjaha boanon-Ku do hanima mulak hu tanoh Israel.

¹³ Jadi tandaonnima ma, Ahu do Jahowa, anggo Huungkab ma tanomannima, anjaha Hupaluar hanima Humbagas tanomannima, ale bangsang-Ku.

¹⁴ Anjaha nahkonon-Ku do Tonduyhu hubagas dirinima, ase manggoluh hanima, anjaha bahenon-Ku do hanima marianan bani tanohnima; jadi tandaonnima ma, Ahu do Jahowa, na marsahap ai, anjaha pasaudon-Ku do ai, nini Tuhan Jahowa.

**Dua Tungkot Ipadomu Gabe Sada
Manggambarhon Parmulak ni Juda ampa
Israel Gabe Sada Harajaon**

¹⁵ Dob ai roh ma hata ni Jahowa hu bangku, mangkatahon,

¹⁶ Ale anak ni jolma, buat ma bam sada tungkot, anjaha suratkon ijai: Juda ampa ginompar ni Israel na sapadan pakonsi. Dob ai buat ma tungkot na legan, anjaha suratkon ma ijai: Josep, tungkot ni Efraim ampa haganup ginompar ni Israel na sapadan pakonsi.

¹⁷ Padomu ma ai gabe sada tungkot, gabe sada ma ai ibagas tanganmu.

¹⁸ Jadi anggo adong hasomanmu sabangsa mangkatahon bam: Ai seng ra ham patugahkon bennami atap aha do tujuanmu marhitei in?

¹⁹ Jadi hatahon ma bani sidea: Sonon do hata ni Tuhan Jahowa: Tonggor ma, Hubuat do tungkot ni si Josep ampa marga ni Israel hasomanni sapadan ai, na ibagas tangan ni Efraim; anjaha Hupadomu ma hujai tungkot ni Juda, anjaha hubahen ma ai gabe sada tungkot, ase gabe sada ai ibagas tanganku.

²⁰ Sanggah ijolom ho tungkot na dob sinuratan ai ididah sidea,

²¹ hatahon ma bani sidea: Sonon do hata ni Tuhan Jahowa: Tonggor ma, arahkonon-Ku do halak Israel hun tongah-tongah ni bangsa-bangsa hadasan ni sidea ai, anjaha patumpuon-Ku do sidea humbani ganup ianan; anjaha boanon-Ku do sidea mulak hu tanoh ni sidea.

²² Bahenon-Ku do sidea gabe sada bangsa i tanoh ai, bani dolog-dolog ni Israel; anjaha sada do raja

manggomgom sidea ganup, seng be dua bangsa sidea, anjaha seng be marbagi gabe dua harajaon.

²³ Seng be pabutakon ni sidea dirini marhitei gana-gana ni sidea, marhitei sisombah-sombahon ni sidea ai, atap marhitei ganup panlanggaron ni sidea; anjaha paluahon-Ku do sidea humbani ganup parbalikon ni sidea ai, na mambahen sidea mardousa; urason-Ku do sidea, gabe bangsang-Ku do sidea, anjaha Ahu gabe Naibata bani sidea.

²⁴ Anjaha juakjuak-Ku si Daud do manggomgomi sidea, sada do hansa parmahan bani sidea haganup; marparlahou do sidea ibagas aturan-Ku, anjaha pongkut ma sidea manramotkon titah-Ku.

²⁵ Iankonon ni sidea do tanoh na dob huberehon bani juakjuak-Ku si Jakob, bani tanoh na dob niiankon ni ompung ni sidea; ijai ma sidea marianan, anak ni sidea ampa pahompu ni sidea ronsi sadokah ni dokahni; anjaha juakjuak-Ku si Daud ma lalab panggomgom bani sidea.

²⁶ Bahenon-Ku do bani sidea padan pardameian, padan sisadokah ni dokahni ma ai bani sidea; pasu-pasuon-Ku do sidea anjaha pabueion-Ku; anjaha pajongjongon-Ku do ianan-Ku na mapansing in i tongah-tongah ni sidea ronsi sadokah ni dokahni.

²⁷ I tongah-tongah ni sidea do Ahu marianan; Ahu do gabe Naibata bani sidea anjaha sidea gabe bangsangku.

²⁸ Jadi botohon ni bangsa-bangsa ma, Ahu do Jahowa, na papansingkon Israel, anggo i tongah-tongah ni sidea ma iananku na pansing in ronsi sadokah ni dokahni.”

**Panjahaion Pasal Parroh ni Gog hun Magog
Mandorab Tanoh na Mapansing ai; Hona Uhum ia**

38 ¹ Dob ai roh ma hata ni Jahowa hu bangku, mangkatahon,
² “Ale anak ni jolma, dampakkon ma bohimu hubani Gog, na i tanoh Magog, ai ma raja ni Ros, Mesek ampa Tubal, manjahai ma ho dampaksi,
³ anjaha hatahon ma: Sonon do hata ni Tuhan Jahowa: Tonggor ma, roh ma Ahu mangimbang ho, ale Gog, raja ni Ros, Mesek ampa Tubal.
⁴ Ahu do na manogu-nogu ho, bahenon-Ku do hait-hait bani osang-osangmu; pabingkaton-Ku do ho ampa haganup balamu, huda ampa siajak huda, haganup sidea marpakeian sinjata na gopas, ai ma sada hulanan bangga, haganup sidea margantar na bolag atap na etek, anjaha manintak podang;
⁵ halak Persia, Kus ampa Put do hasomanmu, haganup do sidea margantar anjaha martangkuluk;
⁶ sonai homa Gomer ampa haganup balani, ambahni ai ginompar ni si Togarma, na hun nagori tang parutara ampa haganup balani, buei do bangsa-bangsa mangkasomani ho.

⁷ Marugas ma, sirsir bei ma, ho pakon haganup bala na martumpu hubam, anjaha ho ma gabe pambobai bani sidea.

⁸ Bani dokah-dokah ni ari arahkonon ma ho; bani ujung ni jaman das ma ho bani sada nagori, na dob maluah humbani podang, bani sada bangsa na ipatumpu hun tongah-tongah ni buei bangsa-bangsa, bani dolog-dolog ni Israel, na dob dokah halong ai, tongon na pinadarat do ai hun tongah-tongah ni buei bangsa, anjaha na sonang sonari marianan sidea haganup.

⁹ Roh do tangkog songon haba-haba, roh songon hombun manrungkub tanoh in, ho pakon haganup balamu anjaha buei bangsa-bangsa mangkasomani ho.

¹⁰ Sonon do hata ni Tuhan Jahowa: Bani panorang ai, tubuh do pingkiran ibagas uhurmu, anjaha hajahaton do iranggihon ho,

¹¹ nim: Bingkat ma ahu mamorang tanoh na so marbenteng; hudorab ma halak na sonang marianan anjaha na mardamei-damei ai, ai ma haganup sidea na marhuta seng martembok, seng marpating-pating atap marhorbangan,

¹² laho manrampas ampa manaban, laho mardas tangan bani ianan na dob maseda ai, tapi sonari iiankon, ampa bani bangsa na dob ipatumpu ai humbani bangsa-bangsa, na dob marpinahan

ampa mararta nuan, marianan i tongah-tongah ni tanoh on.

¹³ Hatahonon ni Seba, Dedan, Tarsis ampa partiga-tigani do hubam: Ai laho martaban do ham ase roh? Ai laho manrampas do ham, ase ipatumpu ham tentaramu? Laho mambuat pirak ampa omas, laho mambuat pinahan ampa arta-arta, laho mambuat buei taban-taban?

¹⁴ Halani ai, manjahai ma ho, ale anak ni jolma, hatahon ma bani Gog: Sonon do hata ni Tuhan Jahowa: Ai lang sonon do? Bani panorang ai, sanggah na marsonang-sonang bangsangku Israel marianan, marugas do ho,

¹⁵ anjaha roh ho humbani iananmu, hun utara tumang, ho pakon bangsa na mangkasomani ho, haganup sidea mangajak huda, sada hulanan bangga, sada bala na gogoh;

¹⁶ roh do ho mamorang bangsang-Ku Israel, songon hambun, laho manrungkub tanoh ai. Bani ujung ni jaman, arahkonon-Ku do ho mamorang tanoh-Ku, ase itanda bangsa-bangsa Ahu, anggo Hupatalar ma hapansingon-Ku i lobei ni sidea marhitei ho, ale Gog.

¹⁷ Sonon do hata ni Tuhan Jahowa: Ai lang ho do ai na Husahapkon ai sapari marhitei juakjuakku, ai ma nabi-nabi ni Israel, na manjahai ijia martahun-tahun, paboa suruhon-Ku do ho mandorab sidea?

¹⁸ Bani panorang ai, sanggah roh Gog manlawan tanoh Israel, nini Tuhan Naibata ma, manggila tumang do Ahu.

¹⁹ Ibagas simburu ampa gajag ni ringis-Ku do Huhatahon on: Tongon, bani panorang ai masa do lalou bangga i tanoh Israel;

²⁰ jadi hitir ma i lobei-Hu dengke na i laut, manuk-manuk na i awang-awang, binatang na i talun, sagala na manggulmit, na manjukur bani tanoh ampa haganup jolma na i sisik ni tanoh on; mangkatornoh ma dolog-dolog, mangkabolah dolog batu, anjaha mangkatompas sagala tembok hu tanoh.

²¹ Diloonku do sagala songgot-songgot dompak Gog, nini Tuhan Jahowa, marsitampulan ma samah sidea.

²² Uhumon-Ku do ia marhitei sampar ampa daroh na madurus; parohon-Ku do udan doras, sira-sira, apuy ampa hirtah hu bani, hubani tentarani ampa hubani bangsa na buei ai, na mangkasomanisi.

²³ Sonai ma patalaron-Ku hatimbulon-Ku ampa hapansingon-Ku, anjaha Hupataridahkon diring-Ku i lobei ni buei bangsa, ase itanda sidea, Ahu do Jahowa.”

Hona Uhum Gog, Timbul Goran ni Jahowa Ididah Bangsa-bangsa

39¹ “Ale anak ni jolma, manjahai ma ho
dompok Gog, hatahon ma: Sonon do
hata ni Tuhan Jahowa: Tonggor ma, roh ma Ahu
mangimbang ho, ale Gog, raja ni Ros, Mesek ampa
Tubal!

² Ahu do na manogu-nogu ho ampa na
mangarahkon ho hun nagori tang parutara, anjaha
boanon-Ku do ho hu dolog ni Israel;

³ jadi poyutkononku ma siormu hun tangan
sambiloumu, ampa lingkitmu hun tangan
siamunmu.

⁴ I atas ni dolog Israel do ho rasei, ho ampa balamu
haganup ronsi sagala bangsa na niarahkonmu;
ondoskonon-Ku do ho bani manuk-manuk panoroh
ampa haganup siparhabong ampa bani binatang
na i talun gabe sibonduton ni sidea.

⁵ I ladang do ho tompas; tongon, Ahu do na
mangkatahon ai, nini Tuhan Jahowa.

⁶ Tongoskonon-Ku do apuy bani Magog ampa bani
halak na marianan marsonang-sonang i topi laut,
jadi tandaon ni sidea ma, Ahu do Jahowa.

⁷ Pabotohkonon-Ku do goran-Ku na pansing in
i tongah-tongah ni bangsang-Ku Israel, seng be
mahiri paturuton-Ku goran-Ku na pansing in, gabe

botohon ni sagala bangsa ma, Ahu do Jahowa, na panging i tongah-tongah ni Israel.

⁸ Tonggor ma, na roh ma ai, anjaha saud ma ai, nini Tuhan Jahowa; “ai ma ari, na dob Hulumbahon hinan.

⁹ Jadi luar ma halak pangisi ni huta-huta ni Israel, pagaraonni ma apuy anjaha tutungon ni sidea ma sinjata-sinjata, gantar na etek ampa na bangga, sior ampa lingkit, pukul-pukul ampa tanja; tutungon ni sidea ma ai pala pitu tahun dokahni, ¹⁰ seng pala porlu be alopon ni sidea soban hun juma, atap manroboh hayu sidea i harangan, ai sinjata ai ma gabe soban bani sidea; sidea ma partaban bani halak na dob manaban sidea, anjaha rampason ni sidea ma halak na dob manrampas sidea,” nini Tuhan Jahowa.

¹¹ “Bani panorang ai pasirsiron-Ku do tanoman bani Gog i Israel, ai ma lombang pamontasan hampit hapoltakan ni Laut Matei, gabe tarolat do halak mamontas hunjai. Ijai do itanom Gog ampa haganup balani, anjaha igoran ma ai: Lombang bala ni Gog.

¹² Pala do pitu bulan dokahni ginompar ni Israel mananom sidea, laho manguras tanoh ai.

¹³ Haganup do bangsa na i nagori ai mananom sidea; gabe tarbarita do sidea, bani panorang ai, sanggah na Hupataridahkon ai hamuliaon-Ku,” nini Tuhan Jahowa.

¹⁴ “Papuligon ni sidea do halak sidalani tanoh ai torus, laho mananom bangkei na tading i nagori ai, ase taruras tanoh ai; dob salpu pe sipitu bulan ai, ase idalankon sidea pamareksaan ai.

¹⁵ Jadi isiar halak sipamareksa ai ma tanoh ai, anjaha anggo adong na mangidah holi-holi ni jolma, gabe ibahen ma ijai partanda, das ronsi Lombang Bala ni Gog itanom sipananom ai.

¹⁶ Sonai ma itanom sidea ganup balani ai ijai; sonai ma panguras ni sidea tanoh ai.

¹⁷ Tapi anggo ho, ale anak ni jolma, sonon do hata ni Tuhan Jahowa: Hatahon ma bani manuk-manuk, haganup siparhabong ampa hubani haganup binatang na i talun: Martumpu ma anjaha roh ma, marurup ma hanima roh humbani ganup ianan hubani pesta panggalangan na Hupasirsir bannima, ai ma sada pesta panggalangon banggal bani dolog ni Israel; pangan hanima ma gulei anjaha inum ma daroh!

¹⁸ Daging ni puanglima do panganonnima, anjaha daroh ni raja-raja ni tanoh on do inumonnima; songon biribiri tunggal ampa anak ni biribiri, hambing tunggal ampa lembu jonggi, pinahan na pinamombur i Basan do sidea haganup bannima.

¹⁹ Panganonnima do taboh-tabohni ronsi bosur hanima, anjaha inumonnima do darohni ronsi mabuk hanima bani pesta panggalangan ai, na Hupasirsir bannima.

²⁰ Bosur do hanima idangan-Ku mangankon huda ampa siajak huda, puanglima ampa buei bala, nini Tuhan Jahowa.

²¹ Patimbulon-Ku do hamuliaon-Ku i tongah-tongah ni bangsa-bangsa; idahon ni sagala bangsa do uhum na Hudabuh bani sidea, ampa kuasa ni tangan-Ku na Hupadalan bani sidea.

²² Botohon ni ginompar ni Israel ma, Ahu do Jahowa, Naibata ni sidea, humbani panorang ai nari.

²³ Botohon ni sagala bangsa ma, ase tarbuang pe halak Israel, ai ma halani hajahaton ni sidea. Halani marbalik do sidea hun Bangku, ase Huponopkon bohing-Ku humbani sidea, anjaha Huondoskon sidea hubagas tangan ni munsuh ni sidea, anjaha rasei sidea haganup ibahen podang.

²⁴ Hubahen do bani sidea domu hubani habutakon ni sidea ampa panlanggaronni, anjaha Huponopkon bohing-Ku humbani sidea.”

²⁵ Halani ai, sonon do hata ni Tuhan Jahowa, “Bahenon-Ku do suang sonari Jakob, anjaha maidop uhur-Hu bani haganup ginompar ni Israel; marah do Ahu mangkopkop goran-Ku na pansing in.

²⁶ Lang be taringat sidea bani habadoronni ampa bani pangoseion ni sidea Bangku, anggo marsonang-sonang ma sidea marianan i tanoh ni sidea, anjaha seng dong be panonggoti bani sidea,

²⁷ anggo Hupaulak ma sidea humbani bangsa-bangsa, anjaha Hupatumpu sidea humbani nagori ni munsuh ni sidea, anjaha Hupapansing diring-Ku i lobei ni bangsa-bangsa marhitei sidea.

²⁸ Jadi tandaon ni sidea ma, Ahu do Jahowa, Naibata ni sidea, na dob mambuankon sidea hu tongah-tongah ni bangsa-bangsa, tapi na patumpu sidea use hu tanoh ni sidea, anjaha sahalak pe lang humbani sidea na tading Hupaturut i jai.

²⁹ Seng be ponopkonon-Ku bohing-Ku humbani sidea, anggo Huuseihon ma Tonduyhubani ginompar ni Israel, nini Tuhan Jahowa.”

Panonggoran Pasal Rumah Panumbahan ai

40 ¹ Paduapuluhlima-tahunkon dob tarbuang hanami, bani bona ni tahun ai, bani ari sapuluh, ai ma pasapuluhompat-tahunkon dob tartaban huta ai, bani ari ai ma sogop bangku tangan ni Jahowa,

² anjaha iboan ma ahu ibagas pangungkabon na humbani Naibata hu tanoh Israel, lanjar ipatuad ma ahu i atas sada dolog na gijang tumang; adong do ijai na songon rumang ni huta patontang pakon ahu.

³ Sanggah na iboan ahu hujai, tonggor ma, adong ma sada dalahi na marrupa songon tombaga; adong do tali ampa tungkot sibar-sibar ibagas tanganni, bani horbangan ai do ia ipajongjong.

⁴ Anjaha nini dalahi ai ma hu bangku, “Ale anak ni jolma, tonggor ma marhitei matamu, anjaha bogei marhitei pinggolmu, anjaha paruhurhon ma haganup sipatidakonku on bam, ai tarboan pe ho hujon laho patuduhkon on do bam, baritahon ma na nididahmu haganup bani ginompar ni Israel.”

⁵ Tonggor ma, adong do sada tembok i darat ni rumah panambahan ai inggot; ia tungkot sibar-sibar na ibagas tangan ni dalahi ai, onom asta do ganjangni, ganup asta ai saparapan do ganjangan humbani asta na somal, jadi isibar ma hapal ni tembok ai; ansa tungkot sibar-sibar ai hapalni ampa gijangni.

⁶ Dob ai laho ma ia hu horbangan na hampit hapoltakan, itangkogi ma tangga-tanggani ai, anjaha isibar ma molmolan ni horbangan ai, ai ma sada tungkot sibar-sibar bolagni.

⁷ Anjaha ganup kamar sada tungkot sibar-sibar do bolagni pakon ganjangni, anjaha tiangni ai lima asta do; ia molmolan ni horbangan ai bani surambih ni horbangan ai hampit bagas, sada tungkot sibar-sibar do.

⁸ Dob ai isibar ma surambih ni horbangan ai, ualuh asta,

⁹ anjaha tiangni ai, dua asta; hampit bagas do surambih ni horbangan ai.

¹⁰ Ia kamar ni horbangan na hampit hapoltakan ai tolu bei do palopah-lopah; haganup ai dos do

sibaranni, anjaha tiangni na palopah-lopah ai dos do homa sibaranni.

¹¹ Dob ai isibar ma bolag ni horbangan ai, sapuluh asta, anjaha ganjangni sapuluh tolu asta.

¹² Adong do hondor-hondor i lobei ni kamar-kamar ai, ganup sada asta, na dua lopah ai; kamar-kamar ai onom asta bei do, na dua lopah ai.

¹³ Dob ai isibar ma use horbangan ai humbani pudi ni kamar na sada das hupudi ni kamar na sada nari, dua puluh lima asta do bolagni, patontang do labahni.

¹⁴ Isibar ma homa surambih ai, dua puluh asta; das bani tiang-tiang ni horbangan ai do alaman na inggot ai.

¹⁵ Anjaha humbani dalam masuk hu horbangan ai das hu ujung ni surambih parbagas ai, lima puluh asta do.

¹⁶ Adong do jandela na marjaring-jaring bani kamar-kamar ai dampak bagas, bani dalam na i horbangan ai, hadua lopahsi; sonai homa adong do jandela bani surambih ai dampak bagas hadua lopahsi, anjaha bani tiangni ai iuhirhon do dangkah ni palem.

¹⁷ Dob ai ibobai ma ahu hu alaman pardarat, tonggor ma, adong do ijai kamar-kamar ampa dalam na ibatui inggot; tolu puluh kamar mandompakon dalam na ibatui ai.

¹⁸ Dalan na ibatui ai adong do homa i lambung ni horbangan ai, mangihutkon ganjang ni horbangan ai, ai ma dalan batu partoruh.

¹⁹ Dob ai isibar ma bolag ni alaman ai hun lobei-lobei parbagas ni horbangan partoruh ai das hu lobei-lobei pardarat ni horbangan parbagas ai, ai ma saratus asta.

²⁰ Dob ai mardalan ma ia i lobeihu dampak utara, anjaha tonggor ma, adong do ijai sada horbangan bani alaman pardarat ai, mandompakkon utara. Isibar ma ganjangni ampa bolagni.

²¹ Kamar-kamarni ai pe, tolu palopah-lopah, tiangni ampa surambihni dos do sibaranni songon horbangan na parlobei ai, lima puluh asta ganjangni ampa dua puluh lima asta bolagni.

²² Jandelani, surambihni ampa dangkah ni palemni dos do sibaranni songon na bani horbangan hapoltakan ai; pitu do tangga-tanggani laho tangkog hujai; anjaha hampit bagas do surambihni.

²³ Anjaha tontang ni horbangan parutara ai adong do horbangan laho hu alaman parbagas ai, songon na bani horbangan parhapoltakan; jadi isibar ma horbangan hu horbangan, saratus asta do ai.

²⁴ Dob ai ibobai ma ahu dampak dangsina, anjaha tonggor ma, adong do ijai horbangan dampak dangsina; jadi isibar ma kamar-kamarni, tiangni ampa surambihni; anjaha dos do sibaranni songon na parlobei ai.

²⁵ Adong do jandela bani horbangan ai ampa bani surambih ai inggot, sarupa bani jandela na legan-legan ai; ganjangni ai lima puluh asta do anjaha bolagni dua puluh lima asta.

²⁶ Pitu do tangga-tanggani laho tangkog hujai, anjaha hampit bagas do surambihni; iuhirhon do hayu palem bani tiangni, sada bani ganup lopah.

²⁷ Adong do horbangan dampak dangsina bani alaman parbagas ai, anjaha isibar ma horbangan hu horbangan, saratus asta do ai.

²⁸ Dob ai ibobai ma ahu hu alaman parbagas ai, masuk hun horbangan pardangsina ai, anjaha isibar ma horbangan pardangsina ai, dos do sibaranni songon na legan-legan ai.

²⁹ Kamar-kamarni pe, tiangni ampa surambihni dos do sibaranni ampa na legan ai; adong do jandela bani horbangan ampa bani surambihni ai inggot. Ia ganjangni ai lima puluh asta do, anjaha bolagni dua puluh lima asta.

³⁰ Anjaha adong do surambih-surambih inggot, dua puluh lima asta ganjangni anjaha lima asta bolagni.

³¹ Dampak alaman pardarat ai do surambihni, anjaha tiangni margorga hayu palem do; anjaha ualuh do tangga-tanggani laho hu atas.

³² Dob ai ibobai ma ahu hu alaman parbagas ai hampit hapoltakan, anjaha isibar ma horbangan ai; dos do sibaranni ai songon na legan ai.

³³ Kamar-kamarni pe, tiangni ampa surambihni dos do sibaranni songon na legan ai, anjaha adong do jandela bani horbangan ai ampa bani surambihni inggot, ia ganjangni lima puluh asta do, anjaha bolagni dua puluh lima asta.

³⁴ Dompok alaman pardarat ai do surambihni, anjaha tiangni margorga hayu palem do, hadua lopahsi; ualuh do tangga-tangga laho hu atas.

³⁵ Dob ai ibobai ma ahu hu horbangan parutara, anjaha isibar ma ai; dos do sibaranni songon na legan ai.

³⁶ Kamar-kamarni pe, tiangni ampa surambihni dos do sibaranni songon na legan ai; anjaha adong do jandela bani horbangan ai ampa bani surambihni inggot; ia ganjang ni ai lima puluh asta do anjaha bolagni dua puluh lima asta.

³⁷ Dompok alaman pardarat ai do surambihni, anjaha margorga hayu palem do tiang ni ai hadua lopahsi, ualuh do tangga-tanggani laho hu atas.

³⁸ Anjaha adong do sada kamar bani horbangan parhapoltakan ai, anjaha labah ni kamar ai bani surambih ai do; ijai do pamurihan ni galangan situtungon.

³⁹ Bani surambih ni horbangan ai adong do dua meja bani hadua lopahsi; ijai do isayat galangan situtungon, galangan pardousaon ampa galangan parsalahan.

⁴⁰ Anjaha i darat, i lambung ni tembok ai, hampit utara ni halak na tangkog hu horbangan ai, adong do dua meja; anjaha bani lopah na sada nari ni tembok ai adong do homa dua meja.

⁴¹ Ase ompat meja hampit bagas anjaha ompat meja hampit darat i lambung ni tembok ai; haganup ualuh meja, panayatan ni galangan.

⁴² Anjaha adong do ijai homa ompat meja humbani batu na ibarbar, ganjangni sada satongah asta, bolagni sada satongah asta anjaha gijangni sada asta, ai ma hatibalan ni parugas manayat galangan situtungon ampa galangan sisayaton.

⁴³ Adong do topini inggot, saparapan bolagni, tar seder dompak bagas; martayub do meja ai laho manlinggomi gulei galangan humbani udan ampa milas ni ari.

⁴⁴ Jadi ibobai ma ahu hu alaman parbagas ai, anjaha tonggor ma, adong do dua kamar i alaman parbagas ai, sada i lambung ni horbangan parutara mandompakkon dangsina, na sada nari i lambung ni horbangan pardangsina mandompakkon utara.

⁴⁵ Jadi nini ma hu bangku, “Ia kamar on, na dompak dangsina on, bani malim siparugas i Rumah Panumbahan do ai;

⁴⁶ anjaha kamar on, na dompak utara, bani malim siparugas bani anjapanjap do in, ai ma anak ni si Sadok; sidea tumang do humbani ginompar ni si Lepi, na boi roh marugas i lobei ni Jahowa.”

⁴⁷ Jadi isibar ma alaman ai, saratus asta ganjangni anjaha saratus asta bolagni, marompat suhi; i lobei ni Rumah Panumbahan ai do anjapanjap ai.

⁴⁸ Jadi ibobai ma ahu hu surambih ni Rumah Panumbahan ai, anjaha isibar ma tiang ni surambih ai, lima asta ganup lopah; bolag ni horbangan ai sapuluh ompat asta, anjaha tembok parlambung ni horbangan ai tolu asta ganup lopah.

⁴⁹ Ganjang ni surambih ai dua puluh asta do, anjaha bolagni sapuluh sada asta; sapuluh do tangga-tanggani laho hu atas; adong do tiang banggal manrombani tiang-tiang ai, hadua lopahsi.

Pasal Rumah na Mapansing ai ampa Rumah Parlambungni

41 ¹ Dob ai iboan ma ahu hubagas kamar bolag ni Rumah na Mapansing ai; anjaha isibar ma tiang-tiangni, onom asta hapalni ganup lopah.

² Bolag ni dalan masuk ai sapuluh asta, anjaha tembok parlambung ni dalan masuk ai lima asta do ganup lopah. Isibar ma ganjang ni kamar bolag ai, ompat puluh asta, anjaha bolagni dua puluh asta.

³ Dob ai masuk ma ia hubagas kamar tang parbagas ai, anjaha isibar ma tiang-tiang ni dalan masuk hujai, dua asta hapalni; bolag ni dalan masuk ai, onom asta, anjaha tembok parlambung ni dalan masuk ai, pitu asta bei do.

⁴ Dob ai isibar ma ganjang ni kamar ai, dua puluh asta ganjangni, anjaha bolagni dua puluh asta, ansa bolag ni kamar bolag ai, anjaha nini ma hu bangku, “On ma kamar tang na mapansing ai.”

⁵ Dob ai isibar ma tembok ni Rumah na Mapansing ai, onom asta hapalni; anjaha bolag ni kamar parlambungni, ompat asta, inggot rumah ai do ai.

⁶ Martolu tingkat do kamar parlambung ai, tolu puluh kamar satingkat. Adong do tembok panahan inggot kamar parlambung ai laho manungkol kamar parlambung ai, ase ulang be tembok ni Rumah na Mapansing ai, na manahan ai.

⁷ Ia kamar parlambung na martingkat ai, roh lubangni do hu atas, domu hubani parlambin rampis ni dingding panahan ai bani ganup tingkat inggot Rumah na Mapansing ai; boi do naikan hun tingkat partoruh hu partongah-tongah, laho hu pardatas marhitei tangga.

⁸ Adong do huidah pamispisan na pinagijang inggot Rumah na Mapansing ai. Ia onjolan ni kamar parlambung ai sada tungkot sibar-sibar do, ai ma onom asta.

⁹ Hapal ni tembok pardarat ni kamar parlambung ai lima asta do, anjaha pamispisan ai lima asta.

¹⁰ Holangkolang ni pamispisan ni rumah na mapansing ai ampa kamar-kamar na bani alaman ai, dua puluh asta do inggot rumah na mapansing ai.

¹¹ Adong do labah ni kamar parlambung ai mandompakkon pamispisan ai, sada dompak utara, sada dompak dangsina, anjaha bolag ni pamispisan ai lima asta do inggot.

¹² Ia rumah na bani alaman hampit pudi, hampit hasundutan, pitu puluh asta do bolagni; anjaha hapal ni tembokni inggot lima asta do, anjaha ganjangni siah puluh asta.

¹³ Isibar ma ganjang ni Rumah na Mapansing ai, saratus asta ganjangni; anjaha alaman ai ampa rumah parhasundutan ai pakon tembokni saratus asta do homa.

¹⁴ Bolag ni lobei-lobei ni Rumah Panumbahan ai ampa alaman na hampit hapoltakan ai, saratus asta do.

¹⁵ Dob ai isibar ma ganjang ni rumah parhasundutan na bani alaman pudi-pudi ai, ampa tembokni angkup lopah, saratus asta. Ia kamar bolag ni rumah na mapansing ai ampa kamar tang parbagas ai ampa surambih pardarat ai

¹⁶ ilampis do, anjaha hatolusi ai marjandela na marjaring-jaring do inggot. Bani hayu do ilampis tembok ai ibagas inggot, hun dasorni das hu jandelani (*itirei do jandelani ai*),

¹⁷ das hu atas ni labah ai, ronsi hu kamar tang parbagas ai ampa hampit daratni. Bani dingding ai haganup, i darat ampa ibagas, sonai homa bani kamar bolag ai,

¹⁸ iuhirhon do hujai suman-suman ni herub ampa hayu palem, sada hayu palem i holangkolang ni herub hu herub. Ganup herub dua do bohini.

¹⁹ Bohi ni jolma dampak hayu palem na sada, bohi ni singa dampak hayu palem na sada nari. Sonai do iuhirhon inggot Rumah Panumbahan ai.

²⁰ Humbani dasorni das hu atas ni labah iuhirhon do herub ampa hayu palem bani dingding ai.

²¹ Marompat suhi do tiang ni labah ni kamar bolag ai, anjaha i lobei ni kamar tang na mapansing ai adong do na mangusihi

²² anjapanjap hayu; tolu asta gijangni, dua asta ganjangni anjaha dua asta bolagni; marsuhi-suhi do ai, anjaha hayu do naheini ampa dingdingni. Jadi nini hu bangku, On ma meja, na i lobei ni Jahowa.

²³ Ia labah ni kamar bolag ampa kamar tang na mapansing ai dua bei do.

²⁴ Anjaha ganup dua do bulungni, haduasi boi do marputor.

²⁵ Iuhirhon do herub ampa hayu palem bani labah ni kamar bolag ai, songon na bani dingding ai. Adong do hondor-hondor hayu i lobei ni surambih ai hampit darat.

²⁶ Adong do jandela na marjaring-jaring ampa gambaran ni hayu palem bani dingding ni surambihni hadua lopahsi.

Kamar-kamar ni Malim-malim

42¹ Dob ai ibobai ma ahu hu darat, hu alaman parbagas ai, mardalan dampak utara, lanjar iarahkon ma ahu hu kamar-kamar tontang ni alaman ni Rumah na Mapansing ai, tontang ni Rumah na Mapansing hampit utara.

² Ganjang ni rumah na hampit utara ai, saratus asta, anjaha bolagni lima puluh asta.

³ I holangkolang ni alaman sidua puluh asta ai bolagni ampa pardarat na ibatui ai, adong do surambih palopah-lopah tolu tingkat.

⁴ I lobei ni kamar-kamar ai adong do sada gang (*dalan*) sapuluh asta bolagni anjaha saratus asta ganjangni, dampak utara do labahni ai.

⁵ Sompitan do kamar pardatas humbani kamar partongah-tongah ampa partoruh halani surambihni ai.

⁶ Ai tolu tingkat do kamar-kamar ai; seng dong tiangni ai songon tiang-tiang na i alaman pardarat ai; halani ai tar hu pudi do ibahen ai marimbang kamar partongah-tongah ampa partoruh.

⁷ Anjaha adong do sada tembok i darat patontang ampa kamar-kamar ai, hampit alaman pardarat, lima puluh asta ganjangni.

⁸ Ia ganjang ni ganup kamar ai, na mandompakon alaman pardarat ai, lima puluh asta do, tapi na

patontang ampa Rumah na Mapansing ai, saratus asta do.

⁹ I toruh ni kamar-kamar ai adong do sada dalam masuk hun lopah parhapoltakan, anggo masuk halak hujai hun alaman pardarat ai,

¹⁰ ai ma bani bona ni tembok na i darat ai. Hampit dangsina pe, tontang ni alaman ni Rumah na Mapansing ai, tontang ni Rumah na Mapansing ai, adong do kamar-kamar,

¹¹ anjaha adong do sada gang (*dalan*) i lobei ni ai, dos do ai ampa kamar-kamar parutara, dos ganjangni ampa bolagni, dos dalam kaluarni, popouni ampa labah-labahni.

¹² Ia labah ni kamar-kamar pardangsina ai, dompak dangsina do; i toruh ni kamar-kamar ai adong do sada dalam masuk hun lopah parhapoltakan, laho masuk hu gang (*dalan*) ai, na i lobei ni kamar-kamar ai.

¹³ Dob ai nini ma dompak ahu, “Ia kamar parutara ampa kamar pardangsina ai, na patontang pakon alaman ai, kamar-kamar na mapansing do ai: ijai ma panganon ni malim na bulih mandohori Jahowa, galangan tang na mapansing ai; ijai ma patibalon ni sidea galangan tang na mapansing ai; Galangan sipanganon, galangan pardousaon ampa galangan parsalahan, ai na mapansing do ianan ai.

¹⁴ Anggo domma imasuki malim-malim ai ianan na mapansing ai, seng bulih be sidea luar hunjai hu

alaman pardarat ai, anggo lape palobei itanggali sidea ijai pakeian marugas ni sidea ai, ai pansing do ai; maningon pakeian na legan do pakeion ni sidea, ase boi hundohor bani halak na mabuei ai.”

¹⁵ Jadi dob siap isibar parbagasan ni rumah panumbahan ai, ibobai ma ahu hu darat hun horbangan parhapoltakan ai, anjaha isibar ma pardarat ni Rumah Panumbahan ai inggot.

¹⁶ Isibar ma lopah parhapoltakan ai marhitei tungkot sibar-sibar ai, lima ratus asta mangihutkon tungkot sibar-sibar ai.

¹⁷ Dob ai marhusor ma ia, isibar ma lopah parutara ai, lima ratus asta mangihutkon tungkot sibar-sibar ai.

¹⁸ Dob ai marhusor ma ia, isibar ma lopah pardangsina ai, lima ratus asta mangihutkon tungkot sibar-sibar ai.

¹⁹ Dob ai marhusor ma ia use dompak hasundutan, anjaha isibar ma, lima ratus asta mangihutkon tungkot sibar-sibar ai.

²⁰ Isibari do ai mangihutkon lopah na ompat ai. Adong do tembok inggot ni ai, lima ratus asta ganjangni anjaha lima ratus asta bolagni, ai ma na manirang ianan na mapansing ai humbani na so pansing ai.

Hamuliaon ni Jahowa Manggoki Rumah Panumbahan

- 43** ¹ Dob ai ibobai ma ahu hu horbangan ai, ai ma horbangan parhapoltakan ai.
- ² Tonggor ma, roh do hamuliaon ni Naibata ni Israel hun hapoltakan, anjaha sora ni parrohni ai songon parhasak ni bah marbanggal do; jadi lihar do tanoh ai halani hamuliaon-Ni ai,
- ³ Ia pangungkabon na huidah ai, usih do ai bani pangungkabon na huidah ijia, sanggah roh Jahowa laho mangagou huta ai, anjaha usih bani pangungkabon na huidah i lambung ni Bah Kebar; jadi manrogop ma ahu.
- ⁴ Masuk ma hamuliaon ni Jahowa hubagas Rumah na Mapansing ai hun horbangan parhapoltakan ai;
- ⁵ jadi iangkat Tonduy ai ma ahu, lanjar iboan ma ahu hu alaman parbagas ai. Tonggor ma, hamuliaon ni Jahowa do manggoki Rumah na Mapansing ai.
- ⁶ Sanggah na jonjong ai dalahi ai i lambungku, hutangar ma adong na marsahap hu bangku hun Rumah na Mapansing ai,
- ⁷ nini ma hu bangku, Ale anak ni jolma, ianan on do hajongjongan ni paratas-Ku ampa sidogeian ni jampal ni nahei-Hu; ijon do Ahu marianan i tongah-tongah ni halak Israel ronsi sadokah ni dokahni. Anjaha seng be pabutakon ni ginompar

ni Israel goran-Ku na Mapansing in, sidea age raja-raja ni sidea marhitei parnaibata silebanon ni sidea, atap marhitei bangkei ni raja-raja ni sidea, bani parmateri ni sidea,

⁸ marhitei na pajongjong molmolanni i lambung ni molmolan-Ku, labahni bani labah-Ku, pitah tembok mando holangkolang-Ku humbani sidea. Ibutaki sidea do goran-Ku na pansing in marhitei hasamboron na hinorjahon ni sidea ai, gabe Huboiskon sidea ibagas ringis-Ku.

⁹ Tapi sonari, ipadaoh sidea ma parnaibata silebanon ni sidea ai ampa bangkei ni raja-raja ni sidea hun Bangku, ase marianan Ahu i tongah-tongah ni sidea ronsi sadokah ni dokahni.

¹⁰ Ai pe, ale anak ni jolma, patorang ma bani ginompar ni Israel pasal Rumah Panumbahan on, rupani ampa popouni, ase maila sidea halani hajahaton ni sidea ai.

¹¹ Anggo domma maila sidea halani haganup pambahenan ni sidea ai, patorang ma bani sidea pasal rupa ampa poupou ni Rumah Panumbahan ai, pasal dalan kaluar ampa dalan masuk ampa rumang ni haganupan ai; pabotohkon ma bani sidea haganup pasal aturanni ampa titahni; suratkon ma ai i lobei ni sidea, ase iparuhurhon anjaha idalankon sidea haganup titah ampa aturan-aturanni.

¹² On ma titah pasal Rumah Panumbahan ai: haganup ianan inggot bani pakpak ni dolog ai pansing tumang do ai. Tonggor ma, ai ma titah pasal Rumah Panumbahan ai.

Pasal Anjapanjap ampa Pangurasionni

¹³ On do sibaran ni anjapanjap ai, mangihutkon asta na ganjangan santopap humbani asta na somal: Onjolanni saasta gijangni anjaha saasta bolagni, anjaha marbibir inggot, sanjongkal gijangni.

¹⁴ On ma gijang ni anjapanjap ai; humbani onjolanni na bani tanoh das bani tangga partoruh dua asta anjaha bolagni sada asta; humbani tangga sietekan ai hubani tangga sibolagan ai ompat asta do anjaha saasta bolagni.

¹⁵ Tataring panggalangan ai ompat asta do gijangni; humbani tataring ai adong do jurjur hu atas ompat tanduk, saasta gijangni.

¹⁶ Ia tataring ai marompat suhi do, sapuluh dua asta ganjangni anjaha sapuluh dua asta bolagni.

¹⁷ Ia tangga-tangga sibolagan ai sapuluh ompat asta do ganjangni anjaha sapuluh ompat asta do bolagni, ase marompat suhi do. Marbibir inggot satongah asta bolagni, anjaha onjolanni sada asta do inggot. Mandompakon hapoltakan do tanggani.

¹⁸ Dob ai nini ma dompak ahu, “Ale anak ni jolma, sonon do hata ni Tuhan Jahowa: On ma aturan pasal anjapanjap ai: Bani ari ai, siapkonsi ai, laho manggalangkon galangan situtungon i atas ni ai, anjaha laho mamispiskon daroh hujai,

¹⁹ bere ma sada anak ni lembu bahen galangan pardousaon bani malim-malim halak Levi ai, ginompar ni si Sadok, na bulih roh mandohori Ahu, laho marugas Bangku, nini Tuhan Jahowa.

²⁰ Anjaha buat ma deba humbani darohni ai, anjaha nahkon ma ai bani tanduk na ompat ai ampa bani haompatsi suhi-suhi ni tangga-tangga ai, ampa bani bibirni inggot; sonai ma urasonmu anjapanjap ai, laho mambahen pardearan pasal ai.

²¹ Ningon buatonmu do homa anak ni lembu galangan pardousaon ai, anjaha itutung ma ai bani ianan na tinontuhon hujai, i darat ni ianan na mapansing ai.

²² Anjaha padua-arihon maningon galangkononmu do sada hambing tunggal, na so martikas bahen galangan pardousaon, ase hona uras anjapanjap ai, songon na dob huuras ai marhitei anak ni lembu.

²³ Dob siap iuras ho anjapanjap ai, maningon galangkononmu do sada anak ni lembu na so martikas ampa sada biribiri tunggal na so martikas humbani hulanan ai.

²⁴ Haduasi do ai galangkononmu i lobei ni Jahowa, anjaha maningon tirtirhonon ni malim do garam

hu atasni, anjaha igalangkon ai songon galangan situtungon bani Jahowa.

²⁵ Pitu ari dokahni maningon pasirsironmu do ganup ari sada hambing tunggal bahen galangan pardousaon; sonai homa sada anak ni lembu ampa sada biribiri tunggal na so martikas humbani hulanan ai maningon pasirsiron do.

²⁶ Pitu ari dokahni maningon bahenon ni sidea pardearan pasal anjapanjap ai anjaha urasonni ai, sonai ma ipapansing ai.

²⁷ Anjaha dob salpu ari ai, jadi pauuluh-arihon ampa torus i pudini ai maningon galangkonon ni malim do bani anjapanjap ai galangan situtungonnima ampa galangan pardameiannima; jadi marosuh ma uhurhu mangidah hanima, nini Jahowa.”

Pasal Halak Siparugas i Rumah Panumbahan

44 ¹ Dob ai ibobai ma ahu mulak hu horbangan ni ianan na mapansing ai, na mandompakkon hapoltakan; tapi tutup do ai.

² Jadi nini Jahowa ma hu bangku, “Maningon totap do tutup horbangan on; seng bulih buhaon on, ise pe lang bulih masuk hunjon, halani na dob masuk Jahowa, Naibata ni Israel hunjon; halani ai do ase totap tutup on.

³ Pitah raja in do, halani raja ia, bulih hundul ijon, laho mangankon na ginalangkon i lobei ni Jahowa;

humbani surambih ni horbangan ai ma ia masuk anjaha humbani dalan na sada ai ma kaluar.

⁴ Dob ai ibobai ma ahu hun horbangan parutara ai hu lobei-lobei ni Rumah na Mapansing ai; mangkawah ma ahu, anjaha tonggor ma, hamuliaon ni Jahowa do manggoki rumah ai; jadi manrogop ma ahu.”

⁵ Tapi nini Jahowa ma hu bangku, “Ale anak ni jolma, parimbagaskon ma, kawah ma ho marhitei matamu, anjaha tangi ma ho marhitei pinggolmu pasal haganup sipatugahon-Ku bam mangonai haganup aturan-aturan ni rumah ni Jahowa, ampa haganup titah-Ni; parimbagaskon ma pasal parmasuk hubagas Rumah Panumbahan in ampa pasal parluar hun jin.

⁶ Anjaha hatahon ma hubani ginompar ni Israel sipanlawan in: Sonon do hata ni Tuhan Jahowa: Sungkup ma in, hanima na mangkorjahon ganup hasamboronnima in, ale ginompar ni Israel.

⁷ Ai ipaturut hanima do masuk halak na legan, na so marsunat uhurni ampa dagingni, bani ianan-Ku na pansing in, laho pabutakkon rumah-Ku, sanggah na manggalangkon ruti, taboh-taboh ampa daroh hanima Bangku; iosei hanima do padan-Ku marhitei haganup pambahenannima na masambor in.

⁸ Seng iramotkon hanima horja ibagas ianan-Ku na mapansing in, tapi halak na legan do ipabangkit

hanima mandalankon horjang-Ku bani ianan-Ku na pansing in.

⁹ Sonon do hata ni Tuhan Jahowa: Haganup halak na legan, na so marsunat uhurni pakon dagingni, lang malo masuk hubagas ianan-Ku na pansing in, ai ma ganup halak na legan, na manginsolat i tongah-tongah ni halak Israel.

¹⁰ Tapi halak Levi, na paganggang dirini hun Bangku, sanggah na kahou ai Israel manundalhon Ahu laho mangihutkon gana-gana ni sidea, maningon porsanon ni sidea do hajahaton ni sidea.

¹¹ Gabe siparugas mando sidea bani ianan-Ku na mapansing in, ai ma gabe parjaga bani horbangan ni Rumah Panumbahan, gabe sipangidangi i Rumah Panumbahan; sidea ma na manayat galangan situtungon pakon galangan sisayaton bani halak simbuei, maningon jongjong do sidea ilambung ni halak na mabuei, laho mangidangi sidea.

¹² Halani ra sidea marugas bani simbuei ai i lobei ni gana-gana ni sidea, gabe sidea parhiteian ni ginompar ni Israel marhajahaton, halani ai do ase Hupagostong tangan-Ku marbija dompak sidea, nini Tuhan Jahowa, paboa maningon porsanon ni sidea hajahaton ni sidea.

¹³ Lang bulih be sidea roh dohor hu Bangku laho mandalankon jabatan hamalimon barang roh hundohor bani na mapansing-mapansing atap bani galangan tang na susi; maningon do porsanon ni

sidea habadoron ni sidea ai, halani parbalikon ni sidea ai.

¹⁴ Hubahen do sidea siparjaga bani Rumah Panumbahan, sidalankon horja atap aha silahoan ijai.

¹⁵ Tapi anggo malim-malim, halak Levi ai, ai ma anak ni si Sadok, na totap mandalankon horja ibagas ianan-Ku na mapansing in, sanggah na kahou ai Israel hun Bangku, bulih do sidea roh mandohori Ahu, marugas bangku; bulih do sidea jongjong i lobeihu, laho manggalankon hu Bangku taboh-taboh ampa daroh, nini Tuhan Jahowa.

¹⁶ Bulih do sidea masuk hubagas ianan-Ku na mapansing in anjaha bulih do sidea mandohori mejang-Ku, laho marugas i lobei-Hu, anjaha laho mandalankon horjang-Ku.

¹⁷ Anggo sihol masukan ni sidea horbangan ni alaman parbagas in, maningon pakeion ni sidea do pakeian linnen, seng bulih pakeionni sidea pakeian wol, sadokah marugas sidea bani horbangan ni alaman parbagas in atap ibagas Rumah na Mapansing in.

¹⁸ Maningon margotong linnen sidea, anjaha marsaluar linnen bani binongeini; seng bulih sidea marbontingkon atap aha pe, na mambahen hadogasan sidea.

¹⁹ Anggo laho sidea hu darat, hu alaman pardarat ai, hubani halak simbuei ai, maningon tanggalon

ni sidea do pakeian ni sidea sanggah marugas ai, anjaha tibalhononni ai i kamar na mapansing ai; pakeian na legan ma ipakei, ase ulang mandipar na mapansing ai marhitei pakeian ni sidea ai bani halak na mabuei ai.

²⁰ Seng bulih suhuron ni sidea ulu ni sidea, atap paturuton ni sidea ganjang jambulan ni sidea, tapi maningon pangkason do inggot ulu ni sidea.

²¹ Seng bulih minum anggur malim, anggo laho masuk ia hu alaman parbagas ai.

²² Lang bulih ompoanni naboru na mabalu atap naboru na sinirangkon; maningon anak boru do humbani ginompar ni Israel, atap na mabalu na hinabaluhon ni malim ompoanni.

²³ Maningon ajarhonon ni sidea do bani bangsang-Ku parleganan ni na mapansing humbani na so pansing, anjaha pabotohkononni bani sidea legan ni na susi humbani na mabutak.

²⁴ Bani parsalisihan sidea ma gabe panguhum, anjaha iuhumi ma ai romban hubani uhum na hum Bangku. Maningon ramotkonon ni sidea do homa aturan-Ku ampa titah-Ku bani haganup pestang-Ku na dob Hutontuhon, anjaha maningon papansingon ni sidea do Sabat-Ku.

²⁵ Seng bulih pabutakon ni sidea dirini marhitei na mandohori na matei; tapi bulih do butak sidea halani bangkei ni bapa atap inang, anak atap boru, sanina atap botou na so laho ope.

²⁶ Dob gabe butak ia, hiraon ma bani pitu ari, ai pe ase pansing ia use.

²⁷ Anjaha bani ari parmasukni ai use hu ianan na mapansing ai, ai ma hu alaman parbagas ai, laho marugas bani ianan na mapansing ai, maningon galangkononni do galangan pardousaonni, nini Tuhan Jahowa.

²⁸ Seng dong parbagianan bani sidea, Ahu do parbagianan bani sidea; seng marrupepei sidea bahenonnima bani tanoh ni Israel, Ahu do rupei bani sidea.

²⁹ Ia galangan sipanganon, galangan pardousaon ampa galangan parsalahan maningon sidea do mangankon ai; anjaha sagala na pinapulig ni Israel, sidea do simadasi.

³⁰ Anjaha limbuah ni haganup gogoh ni tanoh ampa haganup guguan na ginalangkon, malim do simada ai; maningon bereonnima do homa bani malim limbuah ni nitaknima, ase marianan pasu-pasu bani rumahnima.

³¹ Sagala na matei-matei atap na hona soroh, manuk-manuk atap binatang pe ai, seng bulih panganon ni malim.”

Tanoh Sipapuligon Gabe Tanoh na Mapansing

45 ¹ Anggo domma ibagihon hanima tanoh in marhitei ruji-ruji, papulig hanima ma sabagian ni nagori in bani Jahowa gabe tanoh na

mapansing, ganjangni dua puluh lima ribu asta, anjaha bolagni dua puluh ribu asta; pansing do haganup tanoh in inggot.

² Hunjon do buaton sanlambar tanoh na marompat suhi; lima ratus asta ganjangni sonai homa bolagni, bahen ianan ni Rumah na Mapansing ai; ambahni ai lima puluh asta tanoh porei inggotni ai.

³ Humbani tanoh na dob sinibar ai, sibar ma sabagian dua puluh lima ribu asta ganjangni anjaha sapuluh ribu asta bolagni, ai ma ianan bani rumah na mapansing ai ampa ianan tang na mapansing ai.

⁴ Bagian na mapansing do in humbani tanoh in, parbagianan bani malim, na marugas bani ianan na mapansing in anjaha na mandohori Jahowa, laho marugas bani; gabe ianan ni rumah-rumah ni sidea ma in ampa partapakan na mapansing bani Rumah na Mapansing in.

⁵ Bagian na legan, dua puluh lima ribu asta ganjangni anjaha sapuluh ribu asta bolagni, bani halak Levi ma ai, na marugas i Rumah Panumbahan, bahen parbagianan bani sidea, bahen ianan ni huta-huta siiankonon ni sidea.

⁶ Anjaha parbagianan bani huta ai, bahen hanima ma sanlambar tanoh, dua puluh lima ribu asta ganjangni, anjaha lima ribu asta bolagni, na saganjang ni tanoh na mapansing, na pinapulig ai, haganup ma ginompar ni Israel simada ai.

⁷ Anjaha bani raja, bere hanima ma tanoh parbagianan angkup lopah ni tanoh na mapansing ai ampa parbagianan bani huta ai romban hubani tanoh na mapansing ai ampa parbagianan bani huta ai, hampit hapoltakan ampa hampit hasundutan dos ganjangni ampa parbagianan ni sada marga, marganjang hun balog parhasundutan das hu balog parhapoltakan ni nagori ai.

⁸ Ai ma gabe tanoh parbagianan bani raja i Israel, ase ulang iodoh-odoh raja na Hupabangkit in be bangsang-Ku; tapi ase ipaturut ginompar ni Israel marnah tanoh domu hubani parbagianan ni margani bei.

Hawajiban ampa Horja ni Raja

⁹ Sonon do hata ni Tuhan Jahowa, “Sungkup ma in, ale raja-raja ni Israel: Padaoh ma hajahaton ampa odoh-odoh, dalankon uhum ampa hasintongan! Parontihon ma na mangusir-usir bangsang-Kin! nini Tuhan Jahowa.

¹⁰ Pakei hanima ma timbangan na sintong, epa na sintong ampa bat na sintong.

¹¹ Maningon dos suhatan ni epa ampa bat, ai ma sada bat saparsapuluh homer, anjaha sada epa saparsapuluh homer; homer ai ma onjolan ni suhat-suhat.

¹² Ia sikal ai, dua puluh gera ma ai; lima sikal hot ma ai lima sikal, na sapuluh sikal totap sapuluh; anjaha sada mina bannima lima puluh sikal ma ai.

¹³ On do guguan sibereonnima; saparonom epa humbani ganup homer gandum, anjaha saparonom epa humbani ganup homer andolei.

¹⁴ Ia guguan minak, ai ma saparsapuluh bat humbani ganup kor, sada kor marisi sapuluh bat.

¹⁵ Ambahni ai sada biribiri humbani dua ratus biribiri sibereon ni ganup marga ni Israel; haganupan ai, ai ma bahen galangan sipanganon, galangan situtungon ampa galangan pardameian, laho mambahen pardearan bani sidea, nini Tuhan Jahowa.

¹⁶ Maningon ondoskonon ni haganup bangsa in do guguan on bani raja i Israel.

¹⁷ Horja ni raja ai do mamboan galangan situtungon, galangan sipanganon ampa galangan siinumon sanggah pesta, sanggah poltak ni bulan ari Sabat, ai ma haganup pesta na dob tinontuhon bani ginompar ni Israel. Ia do sibohan galangan pardousaon, galangan sipanganon, galangan situtungon ampa galangan pardameian, laho mambahen pardearan bani ginompar ni Israel.”

Aturan Pasal Pesta ampa Galangan

¹⁸ Sonon do hata ni Tuhan Jahowa, “Bani bulan sada, ari sada bulan ai, maningon buatonnima do

sada anak ni lombu na so martikas, laho manguras ianan na mapansing in.

¹⁹ Ibuat malim ma deba humbani daroh galangan pardousaon ai, anjaha inahkon ma ai bani tiang ni labah ni Rumah Panumbahan ai, bani haompatsi suhi-suhi ni tangga-tangga ni anjapanjap ai ampa bani tiang ni horbangan ni alaman parbagas ai.

²⁰ Sonai ma homa bahen hanima bani ari sada bulan pitu, bani halak na mardousa na so tinuntun atap halani haotoon, sonai ma bahenonnima manguras Rumah Panumbahan ai.

²¹ Bani bulan sada ari sapuluh ompat maningon pestahononnima do Paskah ai; pitu ari dokahni maningon panganonnima ruti na so niigaran ijai.

²² Ipasirsir raja ma bani ari ai sada anak ni lombu bahen galangan pardousaon, mangkopkop dirini sandiri pakon mangkopkop bangsa na i tanoh in.

²³ Torus bani mata ni pesta na pitu ari ai maningon pasirsiron do siap arian galangan situtungon bani Jahowa, ai ma pitu anak ni lombu ampa pitu biribiri tunggal na so martikas; anjaha sada hambing tunggal bahen galangan pardousaon siap arian.

²⁴ Anjaha maningon pasirsironni do galangan sipanganon, ai ma sada epa pangkasomani ni sada anak ni lombu, anjaha sada epa pangkasomani ni sada biribiri tunggal, anjaha sada hin minak bani ganup epa.

²⁵ Bani bulan pitu, ari sapuluh lima ni bulan ai, torus bani mata ni pesta sipitu ari ai maningon pasirsironni do homa sonai, dos bueini bani galangan pardousaon, galangan situtungon, galangan sipanganon ampa minak.”

Pasal Galangan Sigalangonkon ni Raja

46 ¹ Sonon do hata ni Tuhan Jahowa, “Ia horbangan parhapoltakan ni alaman parbagas ai maningon itutup do ibagas sionom ari parhorjaonkon; tapi bani ari Sabat ampa bani bona ni bulan maningon ibuka do.

² Masuk ma raja ai hun darat humbani surambih ni horbangan ai, anjaha jongjong ma ia i lambung ni tiang ni horbangan ai. Dob ai roh ma malim manggalangkon galangan situtungon ampa galangan pardameian, tapi anggo raja ai manrogop ma bani molmolan ni horbangan ai. Dob ai luar ma ia, tapi horbangan ai seng bulih ai tutupon ronsi bodari.

³ Ia bangsa na i tanoh in maningon manrogop do homa bani dalan masuk humbani horbangan ai i lobei ni Jahowa sanggah ari Sabat ampa bani poltak ni bulan.

⁴ Ia galangan situtungon, sigalangkonon ni raja ai bani Jahowa bani ari Sabat, ai ma onom anak ni biribiri na so martikas ampa sada biribiri tunggal na so martikas,

⁵ anjaha galangan sipanganon pangkasomani ni biribiri tunggal ai sada epa do, anjaha galangan sipanganon pangkasomani ni anak ni biribiri ai haganup, ai ma sadiha na boi tarberesi, ambah ni ai sada hin minak hasoman ni ganup epa.

⁶ Bani poltak ni bulan maningon galangkononni do sada anak ni lombu na so martikas, onom anak ni biribiri ampa sada biribiri tunggal na so martikas.

⁷ Anjaha pasirsironni do galangan sipanganon pangkasomani ni anak ni lombu ai, sada epa; pangkasomani ni biribiri tunggal ai sada epa do homa, anjaha pangkasomani ni anak ni biribiri ai haganup, ai ma sadiha na boi tarberesi, ambah ni ai sada hin minak hasoman ni ganup epa.

⁸ Anggo masuk raja ai, humbani surambih ni horbangan ai ma ia masuk, anjaha kaluar pe humbani dalan na sada ai ma.

⁹ Anggo roh bangsa parnagori ai hu lobei ni Jahowa bani ari pesta na dob tinontuhon, ise na masuk hun horbangan parutara laho marsombah, hun horbangan pardangsina ma ia luar; anjaha ise na masuk hun horbangan pardangsina hun horbangan parutara ma ia luar; ulang ma adong na mulak hun horbangan hamasukanni ai, tapi ganup ma kaluar torus dampak lobei.

¹⁰ Sanggah na masuk ai sidea, masuk ma homa raja ai; anjaha anggo kaluar sidea, ia pe kaluar ma.

¹¹ Bani pesta-pesta ampa bani ari raya, galangan sipanganon pangkasomani ni anak ni lembu ai, ai ma sada epa; pangkasomani ni biribiri tunggal ai, sada epa homa; tapi pangkasomani ni anak biribiri ai haganup, ai ma sadiha na tarberesi, ambah ni ai sada hin minak hasoman ni sada epa.

¹² Anggo sihol boanon ni raja ai galangan banggal ni uhur bani Jahowa, ai ma galangan situtungon atap galangan pardameian, humbani banggal ni uhumni, maningon bukaon ma horbangan parhapoltakan ai bani; igalangkon ma galangan situtungonni ai atap galangan pardameianni ai, songon na binahenni bani ari Sabat. Dob ai luar ma ia, anjaha dob luar ia, tutupon ma horbangan ai.

¹³ Maningon pasirsironni do sada anak ni biribiri, na marumur satahun anjaha na so martikas, bahen galangan situtungon ari-ari bani Jahowa; siap sogod do ai pasirsironni.

¹⁴ Anjaha maningon pasirsironni do galangan sipanganon pangkasomani ni ai ganup sogod, ai ma saparonom epa anjaha minak sapartolu hin pangarbahni ni nitak bahen galangan sipanganon bani Jahowa; ai ma aturan na totap sadokah ni dokahni bani galangan siganup ari ai.

¹⁵ Sonai ma pasirsiron anak ni biribiri ai, galangan sipanganon ai ampa minak ai siap sogod bahen galangan situtungon marturut-turut.”

Aturan Pasal Tanoh Parbagianan ni Raja

¹⁶ Sonon do hata ni Tuhan Jahowa, “Anggo sihol marsibere-bere raja ai humbani parbagiananni hubani anakni, gabe anakni ai ma simada ai, gabe tean-teananni ma ai.

¹⁷ Tapi anggo marsibere-bere ia humbani parbagiananni hubani juakjuakni, gabe ia ma simada ai ronsi tahun haluahon hansa; dob ai paulakon do ai bani raja ai; pitah anakni do na boi totap marbagian bani tean-teanan.

¹⁸ Seng bulih buaton ni raja humbani parbagianan ni rayat marhitei na mangusir sidea humbani parbagiananni; humbani bagianni ma ibere hubani anakni, ase ulang adong humbani bangsang-Ku na hona usir humbani parbagiananni.”

Pasal Dapur Panlompahan

¹⁹ Dob ai ibobai ma ahu humbani dalan hamasukan ai, ai ma na bani lambung ni horbangan ai, dompak kamar-kamar ni malim na mapansing ai, ai ma na hampit utara ai; anjaha tonggor ma, adong do sada ianan ijai tang hampit ujung parhasundutan.

²⁰ Jadi nini ma dompak ahu, “On ma ianan bani malim manlompah galangan parsalahan ampa galangan pardousaon, anjaha ianan ni sidea pamasak galangan sipanganon, ase ulang iboan

sidea ai hu alaman pardarat ai, gabe marhitei ai mandipar na mapansing bani halak na mabuei ai.”

²¹ Dob ai ibobai ma ahu hu alaman pardarat ai, anjaha ibobai ma ahu hubani haompatsi suhi-suhi ni alaman ai; anjaha tonggor ma, bani ganup suhi-suhi ni alaman ai adong do sada alaman;

²² etek do alaman na bani na ompat suhi-suhi ni alaman ai, ompat puluh asta ganjangni, anjaha tolu puluh asta bolagni; haompatsi ai dos do sibaranni.

²³ Adong do tembok na etek-etek bani na ompat alaman ai inggot, anjaha i toruh ni tembok ai inggot ipauli do tataring.

²⁴ Jadi nini ma hu bangku, “On ma dapur ianan ni siparugas i Rumah Panumbahan manlompah galangan sisayaton ni halak simbuei.”

Bah Hagoluhan na Luar hun Rumah na Mapansing ai

47 ¹ Dob ai ibobai ma ahu use hu labah ni Rumah na Mapansing ai, anjaha tonggor ma, luar do bah hun toruh ni molmolan ni rumah ai dompak hapoltakan, ai mandompakon hapoltakan do Rumah na Mapansing ai. Mabaor do bah ai hun toruh ni tembok pardangsina ni rumah ai hampit dangsina ni anjapanjap ai.

² Dob ai ibobai ma ahu luar hun horbangan parutara ai, anjaha iarahkon ma ahu mardalan maringgot hampit darat hu horbangan parhapoltakan ai,

anjaha tonggor ma, marsual-sual do bah ai roh hun lopah pardangsina ai.

³ Sanggah laho dalahi ai dompak hapoltakan, manjolom tali sibar-sibar ibagas tanganni, isibar ma saribu asta, anjaha itogu ma ahu mandipari bah ai; singgan mata ni ari ni nahei do bagasni ai.

⁴ Dob ai isibar ma use saribu asta, anjaha itogu ma ahu mandipari bah ai, sibar towod do bagasni ai. Isibar use ma saribu asta, anjaha itogu ahu mandipari bah ai; sibar binongei do bagasni ai.

⁵ Dob ai isibar use ma saribu asta, bah bangga do ai, na so boi tardipari ahu; ai bagas do bah ai, silanguyon mando, sada bah bangga na so tardipari.

⁶ Dob ai nini ma hu bangku, “Ale anak ni jolma, domma ididah ho in? Dob ai itogu ma ahu mulak manopi-nopi bah ai.

⁷ Sanggah na mulak ai ahu, tonggor ma, adong do buei hayu bani topi ni bah ai, angkup lopah.

⁸ Jadi nini ma dompak ahu: la bah on mabaor do dompak tanoh hampit hapoltakan, dob ai tuad hu pamah ai; dob masuk ai hu laut Matei, hu bah na margaram ai, ibahen ma ai gabe tawar.

⁹ Atap huja pe das bah ai, manggoluh ma ijai sagala na marhosah ampa na manggulmit, anjaha dengke pe buei tumang ma; ai anggo das ma bah on hujai gabe tawar ma bah ni laut ai. Atap huja pe das bah on, manggoluh ma ganup ijai.

¹⁰ Parjala pe jongjong bei ma i topini ai hun En-Gedi das hu En-Eglaim, panjomuran ni jala ma ai; ai buei do dengke, marbagei-bagei songon na ibagas laut bolag.

¹¹ Tapi anggo paya-payani ampa rawang-rawangni seng gabe dear ai, pambuatan ni garam do ai.

¹² Anjaha i topi ni bah ai, angkup lopah ni bah ai, tubuh do ijai bagei-bagei ni hayu bahen sipanganon. Seng ra melus bulungni ai anjaha seng maronti marbuah, tapi marbuah do ai siap bulan halani bahni ai, roh hun ianan na mapansing ai. Gabe sipanganon do buahni anjaha bulungni gabe tambar.

Parbalogan ampa Parbagi bani Tanoh ai

¹³ Sonon do hata ni Tuhan Jahowa, “On ma parbalogan sibahenonnima laho marbagi tanoh ai bahen parbagianan bani halak Israel sisapuluh dua marga ai. Bani si Josep dua bagian.

¹⁴ Dos ma parbagianannima bani tanoh ai; Hupagostong do tangan-Ku marbulawan laho mamberehon on bani ompungnima; halani ai bannima do tanoh on bahen parbagianannima.

¹⁵ On ma parbalogan ni tanoh in: Hampit utara, ai ma hun laut bolag ai, manlopusi Hetlon laho hu Sedad,

¹⁶ hu Hamat, Berota, Sibrayim, na bani parbalogan ai, i holangkolang ni Damaskus ampa Hamat, das hu Hazar-Enon, na bani parbalogan ni Hauran.

¹⁷ Ase parbalogan ai gistang do ai hun laut das hu Hazar-Enon, na bani balog parutara ampa Damaskus, das hu parbalogan ampa Hamat i utara. Ai ma parbalogan hampit utara.

¹⁸ Parbalogan hampit hapoltakan, ai ma hun Hazar-Enon na i holangkolang ni Hauran ampa Damaskus, dob ai Bah Jordan na i holangkolang ni Gilead ampa tanoh Israel das hu laut parhapoltakan hu Tamar. Ai ma parbalogan hampit hapoltakan.

¹⁹ Parbalogan hampit dangsina, ai ma hun Tamar das hu bah partinggilan na i Kades ai, hunjai manopi-nopi bah Masir laho hu laut bolag. Ai ma parbalogan hampit dangsina.

²⁰ Parbalogan hampit hasundutan, ai ma laut bolag ai das hu tontang ni Hamat. Ai ma parbalogan hampit hasundutan.

²¹ Ase bagi hanima ma tanoh in bannima mangihutkon marga ni Israel.

²² Marjomput na sinurat ma hanima laho marbagi tanoh in, bahen parbagianan bannima ampa bani halak na manginsolat i tongah-tongahnima, na dob tubuhan anak i tongah-tongahnima. Maningon songon halak Israel do sidea hiraonnima; maningon dapotan parbagianan do sidea songon hanima

marhitei na manjomput na sinurat i tongah-tongah ni marga ni Israel.

²³ I tongah-tongah ni marga ja panginsolat ai marianan, ijai ma bere hanima bani parbagiananni,” nini Tuhan Jahowa.

Parbagi bani Tanoh ai

48 ¹ “On ma goran ni marga ai: Mulai hun parbalogan tang parutara, hun laut manlopusi Hetlon laho hu Hamat, das hu Hazar-Enon, ai ma na bani parbalogan parutara ampa Damaskus patontang pakon Hamat, gistang hun hapoltakan hu hasundutan, ai ma parbagianan ni Dan.

² Anjaha sabalog pakon Dan, hun hapoltakan das hu hasundutan, ai ma parbagianan ni Asser.

³ Anjaha sabalog pakon Asser, hun hapoltakan das hu hasundutan, ai ma parbagianan ni Naptali.

⁴ Anjaha sabalog pakon Naptali, hun hapoltakan das hu hasundutan, ai ma parbagianan ni Manase.

⁵ Anjaha sabalog pakon Manase, hun hapoltakan das hu hasundutan, ai ma parbagianan ni Efraim.

⁶ Anjaha sabalog pakon Efraim, hun hapoltakan das hu hasundutan, ai ma parbagianan ni Ruben.

⁷ Anjaha sabalog pakon Ruben, hun hapoltakan das hu hasundutan, ai ma parbagianan ni Juda.

⁸ Anjaha sabalog pakon Juda, hun hapoltakan das hu hasundutan, ai ma tanoh na mapansing

sipapuligonnima ai, bolagni dua puluh ribu asta, anjaha ganjangni dos ampa parbagianan ni sada marga, hun hapoltakan das hu hasundutan, anjaha i tongah-tongah ni ai ma ianan na mapansing ai.

⁹ Ase tanoh na mapansing sipaleganonnima ai bani Jahowa dua puluh lima ribu asta do ganjangni, anjaha dua puluh ribu asta bolagni.

¹⁰ Sonon ma parbagi bani tanoh na mapansing ai: Parbagianan bani malim, dua puluh lima ribu asta ganjangni hampit utara, sapuluh ribu asta bolagni hampit hasundutan, sapuluh ribu asta bolagni hampit hapoltakan, anjaha dua puluh lima ribu asta ganjangni hampit dangsina; i tongah-tongah ni ai ma rumah ni Jahowa.

¹¹ Ai ma rupei ni malim, na pinapansing ai, anak ni si Sadok, sidalankon horjang-Ku, ai ma na so dihut kahou rap pakon halak Israel songon halak Levi na kahou ijia.

¹² Ai ma parbagianan bani sidea, parbagianan na pinalegan humbani tanoh na mapansing ai, sabalog pakon halak Levi.

¹³ Anjaha sabalog pakon parbagianan ni malim, ai ma parbagianan ni halak Levi, dua puluh lima ribu asta ganjangni anjaha sapuluh ribu asta bolagni. Haganupan ai dua puluh lima ribu asta ganjangni anjaha dua puluh ribu asta bolagni.

¹⁴ Seng bulih jualon atap tukaron ni sidea ai, ase ulang madabuh ai bani tangan ni halak na legan, ai na mapansing do ai bani Jahowa.

¹⁵ Ia na tading ai, lima ribu asta bolagni anjaha dua puluh lima asta ganjangni, seng pansing ai, sipakeion ma ai bani huta ai, bani rumah-rumah ampa bahen sampalan. I tongah-tongah ni ai ma huta ai.

¹⁶ On do sibaranni: Hampit utara ompat ribu lima ratus asta, sonai age hampit dangsina, hampit hapoltakan ampa hampit hasundutan.

¹⁷ Maningon adong do tanoh porei bani huta ai. Hampit utara dua ratus lima puluh asta, hampit dangsina dua ratus lima puluh, hampit hapoltakan dua ratus lima puluh anjaha hampit hasundutan dua ratus lima puluh asta do.

¹⁸ Na tading ai, humbani ganjangni ai, na romban hubani tanoh na mapansing ai, ai ma sapuluh ribu asta hampit hapoltakan anjaha sapuluh ribu asta hampit hasundutan; ia gogohni ai bahen sipanganon ni sipangkorja i huta ai ma ai.

¹⁹ Anjaha siparhorja na i huta ai, ai ma humbani ganup marga ni Israel, sidea do na mangkorjahon ai.

²⁰ Ase haganup tanoh sipapuligonnima ai, ai ma dua puluh lima ribu asta ganjangni sonai homa bolagni, ase marompat suhi do ai, ai ma tanoh na mapansing ai ampa tanoh na bani huta ai.

²¹ Na tading ai ope, angkup lopah bani tanoh na mapansing ai ampa parbagianan na bani huta ai, raja ma simada ai, ai ma tanoh na ampar idarat ni sidua puluh lima ribu asta ai das hu parbalogan parhapoltakan, sonai homa tanoh na ampar idarat ni sidua puluh lima ribu asta ai das hu parbalogan parhasundutan, na paromban ampa parbagianan ni marga-marga ai; raja do simada ai. I tongah-tongah ni ai ma tanoh na pinalegan ai, ampa Rumah na Mapansing ai.

²² Sobali ni parbagianan ni halak Levi ampa parbagianan na bani huta ai, ai ma na i tongah-tongah ni parbagianan ni raja ai; ia tanoh na i holangkolang ni parbagianan ni Juda ampa Benjamin, raja do simada ai.

²³ Pasal marga na legan ai: Hun hapoltakan das hu hasundutan, ai ma parbagianan ni Benjamin.

²⁴ Anjaha sabalog pakon Benjamin, hun hapoltakan das hu hasundutan, ai ma parbagianan ni Simeon.

²⁵ Anjaha sabalog pakon Simeon, hun hapoltakan das hu hasundutan, ai ma parbagianan ni Isasar.

²⁶ Anjaha sabalog pakon Isasar, hun hapoltakan das hu hasundutan, ai ma parbagianan ni Sebulon.

²⁷ Anjaha sabalog pakon Sebulon, hun hapoltakan das hu hasundutan, ai ma parbagianan ni Gad.

²⁸ Anjaha balog ni Gad hampit dangsina, gistang do ai hun Tamar das hu bah partinggilan na i Kades, hunjai manopi-nopi bah Masir hu laut bolag.

²⁹ Ai ma tanoh sibagihononnima marhitei manjompot na sinurat bahen parbagianan bani marga ni Israel, anjaha ai ma parbagianan bani sidea,” nini Tuhan Jahowa.

Pasal Horbangan ni Huta ai

³⁰ “On ma dalan kaluar humbani huta ai: Hampit lopah parutara, siompat ribu lima ratus asta ai, ³¹ adong do tolu horbangan, ai ma horbangan Ruben, horbangan Juda ampa horbangan Levi; mangihutkon goran ni marga ni Israel do ibahen goran ni horbangan ai.

³² Hampit lopah parhapoltakan, siompat ribu lima ratus asta ai, tolu horbangan homa, ai ma horbangan Josep, horbangan Benjamin, ampa horbangan Dan.

³³ Hampit lopah pardangsina, siompat ribu lima ratus asta ai, tolu horbangan homa, ai ma horbangan Simeon, horbangan Isasar, ampa horbangan Sebulon.

³⁴ Hampit lopah parhasundutan, siompat ribu lima ratus asta ai, tolu horbangan homa, ai ma horbangan Gad, horbangan Asser, ampa horbangan Naptali.

³⁵ Ia lilit ni huta ai inggot sapuluh ualuh ribu asta do. Anjaha goran ni huta ai hu lobeian on, ai ma: Jahowa do ijai.”

Daniel

Parbangkit ni si Daniel ampa Hasomanni Gabe Siparugas i Lobei ni Raja Nebukadnesar

1 ¹ Patolu-tahunkon dob gabe raja si Joyakim i Juda, roh ma si Nebukadnesar, raja ni Babel, hu Jerusalem, anjaha ihubu ma huta ai.

² Jadi ipadas Tuhan ma hubani tangan ni si Joyakim raja ni Juda, ampa deba humbani parugas na humbani rumah ni Naibata; iboan do ai hu tanoh Sinear, hu rumah ni naibatani, anjaha inahkon ma parugas ai hu rumah parartaan ni naibatani.

³ Dob ai isuruh raja ai ma si Aspenas, ai ma kopala ni juakjuakni ai, ase iboan deba humbani halak Israel, ai ma ginompar ni raja pakon na sangap-sangap.

⁴ na poso, na so marsining, na majenges, na pandei bani haganup hapentaran, na marpambotoh, na maruhur anjaha na talup marugas i rumah bolon, laho mangajari sidea pasal surat pakon hata ni halak Kasdim.

⁵ Jadi itotapkon raja ai ma sipanganon siganup ari bani sidea humbani sipanganon ni raja ai ampa humbani anggur siinumomni. Maningon ajaran do

sidea tolu tahun dokahni, anjaha dob salpu pe ai, ase boi sidea marugas i lobei ni raja ai.

⁶ Adong do i tongah-tongah ni sidea ai, na humbani halak Juda, ai ma si Daniel, si Hananya, si Misael ampa si Asarya.

⁷ Jadi igantih kopala ni juakjuak ai ma goran ni sidea: Si Daniel igoran si Beltsasar, si Hananya igoran si Sadrak, si Misael igoran si Mesak, anjaha si Asarya igoran si Abednego.

⁸ Tapi anggo si Daniel domma iputuskon ibagas uhurni, na so ra ia pabutak dirini marhitei sipanganon ni raja ai ampa marhitei anggur siinumoni ai; halani ai ipindohon ma bani kopala ni juakjuak ai, ase ipalopas ia mamantangkon ai, ase ulang butak ia.

⁹ Jadi ibahen Naibata ma si Daniel dapotan idop ampa holong ni uhur humbani kopala ni juakjuak ai.

¹⁰ Nini kopala ni juakjuak ai ma dompak si Daniel, “Mabiar do ahu, anggo ididah tuanku raja ai, na dob manotapkon sipanganon ampa siinumon nasiam, merungan nasiam marimbang garama na legan, hasoman nasiam magodang ai, gabe marutang hosah holi ahu halani pambahenan nasiam.”

¹¹ Jadi nini si Daniel ma hubani siparugas, na dob pinabangkit ni kopala ni juakjuak ai marugas bani si Daniel, si Hananya, si Misael ampa si Asarya,

¹² “Lajou ham ma lobei hanami juakjuakmu on sapuluh ari on; bere ham ma bennami lowoh bahen sipanganon ampa bah bahen siinumon.

¹³ Dob ai pardiateri ham ma rupanami sonai rupa ni garama na mangankon sipanganon ni raja ai; jadi bahen ham ma bennami juakjuakmu on romban hubani na nididahmu.”

¹⁴ Jadi ibalosi ma sidea pasal ai, gabe iuji ma sidea sapuluh ari dokahni.

¹⁵ Dob ai marujung ma na sapuluh ari ai, dearan do rupa ni sidea idahon anjaha momburan marimbang haganup garama, na mangankon sipanganon ni raja ai,

¹⁶ gabe ipadaoh siparugas ai ma sipanganon ampa anggur na dob tinontuhon ai bani sidea, anjaha ibere ma bani sidea lowoh.

¹⁷ Jadi ibere Naibata ma bani garama na ompat ai habotohon pakon pangarusion pasal haganup surat ampa hapentaran. Ia si Daniel adong do homa hapandeianni pasal panonggoran ampa nipi.

¹⁸ Anjaha dob salpu panorang na dob tinontuhon ni raja ai, ase iboan sidea hu lobeini, gabe iboan kopala ni juakjuak ai ma sidea hu lobei ni Raja Nebukadnesar.

¹⁹ Iparsahapkon raja ai ma sidea, anjaha seng dong jumpah i tongah-tongah ni sidea na dos pakon si Daniel, si Hananya, si Misael pakon si Asarya; halani ai sidea ma gabe siparugas i lobei ni raja ai.

²⁰ Pasal haganup hapentaran pakon pangarusion, na sinungkun ni raja ai humbani sidea, sapuluh hali lompit do pentaran sidea jumpahsi marimbang haganup siparpambotoh ampa sipartondung na bani haganup gomgomanni ai.

²¹ Lanjar ijai do si Daniel das hubani tahun parlobei ni raja Kores.

Nipi ni Raja Nebukadnesar Pasal Harajaon Dunia na Ompat ai

2 ¹ Bani tahun paduahon, dob gabe raja si Nebukadnesar, marnipi ma si Nebukadnesar; rusak tumang do uhurni, gabe lang ra tarpodom be ia.

² Jadi ihatahon raja ai ma mandilo sagala na pentar-pentar, sipartondung, datu-datu ampa halak Kasdim, laho patugahkon bani raja ai pasal nipini ai. Ase roh ma sidea anjaha jongjong i lobei ni raja ai.

³ Nini raja ai ma dampak sidea, “Marnipi do ahu, tarsonggot tumang uhurhu, sihol do botohonku pasal nipi ai.”

⁴ Jadi nini halak Kasdim ai ma dampak raja ai, “Sai manggoluh ma ham rajanami. Pajojor ham ma nipi ai bani juakjuakmu, ase ipatugah hanami aha artini ai.”

⁵ Nini raja ai ma mambalosi halak Kasdim ai, “On do hatangku bannima, anggo seng ipatugah hanima

bangku nipi ai pakon artini, maningon toktokon do hanima, anjaha rumahnima ai gabe ianan ni tompoh-tompoh do bahenon.

⁶ Tapi anggo ipatugah hanima nipi ai pakon artini, jaloonnima do humbangku sibere-bere, upah ampa hasangapon bangga. Halani ai patugah hanima ma bangku nipi ai pakon artini.”

⁷ Ibalosi sidea ma ia paduahalihon, “Ipatugah raja in ma nipi ai bani juakjuakni, ase ipatugah hanami artini ai.”

⁸ Nini raja ai ma mambalosi, “Torang do hubotoh, na paganjang-ganjang panorang do hanima, halani domma ibotoh hanima haputusan na dob hubahen.

⁹ Ai ma anggo seng tarpatugah hanima bangku nipi ai, sada mando uhuman sipadalanon bannima. Marsada ni uhur do hanima laho mangkatahon hata ladung ampa sipaoto-oto bangku, paima marubah panorang. Patugah hanima ma bangku nipi ai, ase hubotoh atap na boi do tarpatorang hanima bangku arti ni nipi ai.”

¹⁰ Nini halak Kasdim ai ma mambalosi raja ai, “Seng dongjolma i atas ni tanoh on, na tarbahen pasaudkon pangindoan ni raja in, anjaha seng onggga adong raja, na timbul atap na markuasa pe, na mangindo sisonai ai humbani na pentar-pentar, sipartondung atap humbani halak Kasdim pe.

¹¹ Pangindoan ni raja in na maholtu do in, anjaha ise pe lang na boi patorangkon in bani raja in sobali naibata-naibata, na so marianan i tongah-tongah ni jolma.”

¹² Gabe manggila tumang ma raja ai marhalanohon ni ai, isuruh ma bunuhon sagala na pentar na i huta Babel.

¹³ Jadi mardalan ma parentah ai, maningon bunuhon sagala halak na pentar; ipindahi sidea ma homa si Daniel pakon hasoman-hasomanni ai laho mambunuh sidea.

¹⁴ Jadi marbalos ma si Daniel ibagas torang ni uhur ampa hapentaran hubani si Ariok, kopala ni pangawal ni raja ai, na dob luar, laho mamunuh sagala halak na pentar, na adong i Babel,

¹⁵ nini ma hubani si Ariok, puanglima ni raja ai, “Mase ma sonin koras ni parentah ni raja in?” Jadi ipatugah si Ariok ma pasal ai hubani si Daniel.

¹⁶ Jadi masuk ma si Daniel, ielek-elek ma raja ai, ase ibere panorang bani, andohar boi ia patugahkon arti ni nipi ai bani raja ai.

¹⁷ Dob ai mulak ma si Daniel hu rumahni, anjaha ipatugah ma na masa ai bani hasomanni si Hananya, si Misael, ampa si Asarya,

¹⁸ anjaha ihatahon ma sidea mangindo idop ni uhur humbani Naibata na i surga pasal rusia ai, andohar ulang hona bunuh si Daniel pakon hasomanni ai rap ampa halak na pentar ai, na adong i Babel.

¹⁹ Jadi talar ma rusia ai bani si Daniel marhitei panonggoran sanggah borngin. Jadi ipuji si Daniel ma Naibata na i surga.

²⁰ Nini si Daniel ma, “Pinuji ma goran ni Naibata sadokah ni dokahni, ai la do simada hapentaran pakon hagogohon.

²¹ Ia do na paubah panorang ampa musim; la do na paturun raja-raja ampa na pabangkitkon; la do sibere hapentaran bani halak na pentar ampa habotohon hubani halak na maruhur.

²² Ia do na patalarhon na bagas pakon na ponop; ibotoh do atap aha ibagas na golap, anjaha Bani do marianan na lihar ai.

²³ Bamu do, Ham, Naibata ni ompungku, hupadas tarima kasih ampa puji-pujian; ai ibere Ham do bangku hapentaran ampa hagogohon, anjaha ipatugah Ham do bangku nuan, aha na ipindo hanami hun Bamu, ai ipabotohkon Ham do bennami na pinindo ni raja ai.”

²⁴ Dob ai laho ma si Daniel marayak si Ariok, na dob pinarentahkon ni raja ai, laho mamunuh sagala na pentar na i Babel, nini ma dompaksi, “Ulang ma bunuh ham sagala na pentar na adong i Babel; boan ham ma ahu hu lobei ni raja in, ase hupatugah arti ni nipi ai bani raja in.”

²⁵ Jadi tarolos ma si Ariok mamboan si Daniel hu lobei ni raja ai, nini ma hu bani, “Domma jumpah

ahu sada halak humbani halak Jahudi na tarbuang in, na boi patugahkon arti ni nipi ai hu bani raja in.”

²⁶ Nini raja ai ma dompak si Daniel, na margoran homa si Beltsasar, “Boi do tongon patugahonmu bangku nipi na huidah ai pakon arti ni ai?”

²⁷ Nini si Daniel ma mambalosi raja ai, “la rusia, na sinungkun ni raja in, seng dong na boi patorangkon ai bani raja in, age halak na pentar, age datu-datu, age partondung atap sibotoh parhalaan pe.

²⁸ Tapi adong do Naibata i surga, Sipatarlar rusia; la do na patugahkon bani Raja Nebukadnesar atap aha na sihol masa. la nipi ampa panonggoran, na nididahmu bani podomanmu, on do ai:

²⁹ Roh do bamu ale rajanami, sanggah na modom ham bani podomanmu, pingkiran pasal atap aha do na sihol masa; jadi roh ma Sipatarlar rusia ai pabotohkon bamu, atap aha na sihol masa.

³⁰ Jadi hu bangku ma ipatarlar rusia ai, sedo halani na pentaran ahu marimbang sagala halak na manggoluh, tapi ase talar do bani raja in pasal artini ai, anjaha ase ibotoh ham pingkiran na marhusor ibagas uhurmu.

³¹ Marpanonggoran do ham, ale rajanami, anjaha ididah ham do sada gana-gana. la gana-gana ai, bangga sahalian do anjaha marsinalsal tumang, jongjong do ai i lobeimu anjaha majangin do idahon.

³² Ulu ni gana-gana ai humbani omas pitah do, tontonni pakon botokanni humbani pirak, boltokni pakon binongeini humbani tombaga,

³³ hae-haeni humbani bosì, anjaha naheini deba humbani bosì, deba humbani tanoh liat.

³⁴ Sanggah ikawahkon ham ope ia, ididah ham ma mungkit sada batu hun babou, na so niungkit ni tangan ni jolma, jadi ijombai ma gana-gana ai tontang ni naheini na humbani bosì ampa tanoh liat ai, lanjar maropuk do ai ibahen.

³⁵ Ia bosì, tanoh liat, tombaga, pirak ampa omas ai, maropuk do ai haganup, gabe doskon lamlam hinabangkon ni logou hun pardogeian; seng dong jumpah be iananni. Tapi batu na manjombai gana-gana ai, gabe dolog batu na banggal do ai, anjaha igoki do sab dunia on.

³⁶ Ai ma nipi ai, sonari patugahonnami ma bani raja in artini ai.

³⁷ Ham rajanami, raja ni raja-raja, haondosan ni harajaon, hagogohon, kuasa ampa hamuliaon ibahen Naibata na i surga,

³⁸ anjaha hadasan ni jolma manisia ipabangkit Naibata, binatang na i talun ampa manuk-manuk na i awang-awang, atap ija pe ai marianan, ham na niangkatni manrajai haganup, ham do ulu omas ai.

³⁹ Dob salpu ham roh ma sada harajaon na legan, toruhan marimbang ham; dob ai harajaon na

patoluhon, na humbani tombaga, na manggomgom haganup tanoh on.

⁴⁰ Ia harajaon na paompatkon ai, toguh do songon bosì; songon bosì, na manropuki anjaha na manrosaki haganup, sonai do ropukonni anjaha rosakanni haganupan ai.

⁴¹ Ia nahei pakon jari-jari ni nahei na nididahmu ai, deba humbani tanoh liat, deba nari humbani bosì, tugah-tugah ni harajaon na binagi do ai; tapi deba humbani hatoguhon ni bosì ai tading do ibagas ai, usih songon na nididahmu bosì marsaor pakon tanoh liat ai.

⁴² Songon jari-jari ni nahei ai, deba humbani bosì, deba nari humbani tanoh liat, sonai do harajaon ai, deba togap, deba rampok.

⁴³ Songon na nididahmu ai bosì marsaor tanoh liat, sonai do marsipadomuan sidea marhitei na marsibuatan boru, tapi seng anjai marsada sidea, usih songon bosì na so boi sada pakon tanoh liat ai.

⁴⁴ Tapi bani panorang ni raja-raja ai, pajongjongon ni Naibata na i surga ai ma sada harajaon, na so tarpatunduk ronsi sadokah ni dokahni, anjaha kuasa-Ni ai pe seng padason ai bani bangsa na legan; ropukan-Ni do sagala harajaon ai anjaha boiskonon-Ni do ai, tapi totap do anggo ai ronsi sadokah ni dokahni,

⁴⁵ ai ma usih songon nididahmu ai, mabungkar batu ai hun dolog ai, na so niungkit ni tangan ni

jolma, gabe iropuki bosu, tombaga, tanoh liat, pirak pakon omas ai. Naibata na bangga ai do na pabotohkon bani raja in, atap aha na sihol masa. Ia nipi ai sintong do ai, anjaha sintong do homa artini ai.”

⁴⁶ Dob ai manrogop ma Raja Nebukadnesar, marsombah hubani si Daniel, anjaha iparentahkon ma mamboan galangan ampa na misbou bani.

⁴⁷ Nini raja ai ma hubani si Daniel, “Tongon, Naibatamu do Naibata ni sagala naibata, anjaha Tuhan ni sagala raja-raja, Sipatar sagala rusia; ai ham do na boi patalar rusia on.”

⁴⁸ Jadi ipatimbul raja ai ma si Daniel, ibere do hubani buei sibere-bere na bangga-banggal, anjaha ipabangkit do ia gabe panrajai i propinsi Babel ampa gabe kopala ni sagala halak na pentar na adong i Babel.

⁴⁹ Anjaha ipabangkit raja ai do homa si Sadrak, si Mesak ampa si Abednego halani panginduan ni si Daniel, gabe wakilni manggomgom propinsi Babel. Totap do anggo si Daniel i rumah bolon ai.

Tolu Halak Ibagas Pamurunan

3¹ Isuruh Raja Nebukadnesar ma na pauli sada gana-gana omas, gijangni onom puluh asta anjaha bolagni onom asta; ipajongjong ma ai i pamah Dura, na i Propinsi Babel.

² Dob ai isuruh Raja Nebukadnesar ma na patumpuhon raja-raja, wakil raja, kopala-kopala, puanglima, sijolom parduiton, panguhum, gamot-gamot ni ugama ampa sagala siparpangkat na bani ganup propinsi, ase roh bei hu pesta gana-gana, na pinajongjong ni Raja Nebukadnesar ai.

³ Jadi martumpu ma sagala raja-raja, wakil raja-raja, kopala-kopala, puanglima, sijolom parduiton, panguhum, gamot-gamot ni ugama ampa sagala siparpangkat na bani ganup propinsi, laho mamestahon gana-gana, na dob pinajongjong ni raja Nebukadnesar ai, jadi jongjong ma sidea i lobei ni gana-gana, pinajongjong ni si Nebukadnesar ai.

⁴ Jadi ipamaling sipartingting ai ma sorani maningtingkon: “Nasiam sagala bangsa, marga pakon siparsahap na marbagei-bagei, tangihon nasiam ma tingting on.

⁵ Anggo ibogei nasiam sora ni tarompit, tulila, husapi, arbap, sordam, gonrang ampa parugas musik na marbagei in, maningon manrogop do nasiam laho marsombah bani gana-gana omas in, na dob pinajongjong ni Raja Nebukadnesar.

⁶ Barang ise na so ra manrogop anjaha marsombah, maningon sampakononkon do ia hubagas pamurunan na gajag ai.”

⁷ Halani ai, dob ibogei sagala bangsa-bangsa ai sora ni tarompit, tulila, husapi, arbap ampa

parugas musik na marbagei ai, jadi manrogop bei ma sagala bangsa, marga pakon siparsahap na marbagei-bagei ai, marsombah hubani gana-gana omas na dob pinajongjong ni Raja Nebukadnesar ai.

⁸ Bani panorang ai roh ma deba halak Kasdim mangaduhon halak Jahudi,

⁹ nini sidea ma dompak Raja Nebukadnesar, “Sai manggoluh ma ham tongtong rajanami.

¹⁰ Ale rajanami, domma iparentahkon ham, ase sagala jolma na mambogei sora ni tarompit, tulila, husapi, arbap, sordam, gonrang ampa parugas musik na marbagei in, maningon manrogop anjaha marsombah bani gana-gana omas in;

¹¹ barang ise na so ra manrogop anjaha marsombah, maningon sampakkononkon do bani pamurunan na gajag ai.

¹² Adong do nuan piga-piga halak Jahudi, na dob pinabangkitmu manrajai i Propinsi Babel, ai ma si Sadrak, si Mesak pakon si Abednego; ia dalahi-dalahi ai seng parduli sidea bani parentahmu ale rajanami, seng ra sidea manggalang bani sisombahonmu anjaha seng ra sidea marsombah bani gana-gana, na pinajongjong ai.

¹³ Jadi manggila anjaha manringis ma Nebukadnesar, anjaha iparentahkon ma na mamboan si Sadrak, si Mesak pakon si Abednego

hu lobeini. Iboan sidea ma tongon na tolu halak ai hu lobei ni raja ai.

¹⁴ Nini si Nebukadnesar ma dompak sidea, “Ai tongon do, ale Sadrak, Mesak pakon ho ale Abednego, na so ra hanima manggalang bani naibatanku, anjaha na so ra hanima marsombah bani gana-gana omas na dob hupajongjong ai?”

¹⁵ Ai pe anggo ibogei hanima holi sora ni tarompit, tulila, husapi, arbap, sordam, gonrang pakon parugas musik na marbagei in, manrogop anjaha marsombah ma hanima bani gana-gana na dob hupaturei ai; tapi anggo seng ra hanima marsombah, mintor do sampakkononkon hanima hubagas pamurunan na gajag ai; dob ai idahon ma tongon atap naibata ja do na boi paluahkon hanima humbagas tanganku.”

¹⁶ Jadi ibalosi si Sadrak, si Mesak pakon si Abednego ma raja ai, “Ale Raja Nebukadnesar, seng pala marbalos hanami bamu pasal ai.

¹⁷ Anggo marosuh Naibata, na binalosannami ai, boi do tarpaluahsi hanami humbagas pamurunan na gajag ai ampa humbani tanganmu, ale rajanami.

¹⁸ Tapi porini pe lang marosuh la, botoh ham ma, ale rajanami, na so ra do hanami manggalang bani naibatamu atap marsombah bani gana-gana omas, na dob pinajongjongmu ai.”

¹⁹ Jadi manggila tumang ma Raja Nebukadnesar, pala do mubah bohini mangidah si Sadrak, si

Mesak pakon si Abednego. Ihatahon ma pamilason pamurunan ai pitu hali lompit humbani na somal.

²⁰ Ihatahon ma humbani piga-piga halak tentarani sigogohan manangkut si Sadrak, si Mesak pakon si Abednego, laho manampakkon sidea hubagas pamurunan na gajag ai.

²¹ Jadi isangkut ma na tolu halak ai marmantel, marsaluar, martangkuluk, sirsir marpakeian tene, lanjar isampakkon ma sidea hubagas pamurunan na gajag ai.

²² Halani koras ni parentah ni raja ai ampa milas ni pamurunan ai, jadi ibunuh gara ni pamurunan ai ma dalahi-dalahi ai, na manampeihon si Sadrak, si Mesak ampa si Abednego hu atasni ai.

²³ Ia sitolu halak ai, si Sadrak, si Mesak pakon si Abednego, sangkut do madabuh hubagas pamurunan na gajag ai.

²⁴ Jadi tarsonggot ma uhur ni Raja Nebukadnesar, tarolos ma ia jongjong, anjaha nini ma dompak juakjuakni, “Ai lang tolu halak do tarsangkut isampakkon hita hubagas apuy ai?” nini sidea ma mambalosi raja ai, “Sonai do tongon, ale rajanami!”

²⁵ Balosni, “Tapi tonggor ma, ompat halak do huidah, lang tarsangkut, mardalan-dalan ibagas apuy ai, anjaha seng mahua sidea; rupa ni na paompatkon ai usih do hubani anak ni naibata.”

²⁶ Idohori si Nebukadnesar ma labah ni pamuruanan na gajag ai, anjaha nini ma, “Ale Sadrak, Mesak pakon ho ale Abednego, juakjuak ni Naibata Na Tang Sitimbulan in, mandarat ma nasiam, roh ma hujon!” Jadi mandarat ma si Sadrak, si Mesak pakon si Abednego humbagas apuy ai.

²⁷ Jadi martumpu ma raja-raja, wakil raja, kopala-kopala ampa sipanuturi ni raja ai, gabe ididah sidea ma, na so margogoh apuy ai mangkahua angkula ni dalahi-dalahi ai; seng mosog jambulan na bani ulu ni sidea, seng mahua mantel ni sidea, anjaha bau ni apuy pe seng dong taranggoh bani sidea.

²⁸ Jadi nini si Nebukadnesar ma, “Na puji ma Naibata ni si Sadrak, si Mesak pakon si Abednego, na marsuruh malekat-Ni laho paluahkon juakjuak-Ni, na martenger ni uhur Bani, na pag manjua parentah ni raja, na pag mangajamkon dirini, asal ma ulang mambalosi atap marsombah bani naibata na legan sobali Naibatani.

²⁹ Halani ai huparentahkon ma, barang ise humbani bangsa, marga, parsahap na marbagei-bagei in, na mangkatahon risa-risa dompak Naibata ni si Sadrak, si Mesak pakon si Abednego maningon toktokan do ai anjaha parreongon rumahni; ai seng dong Naibata, na boi paluahkon songon-Si ai.”

³⁰ Jadi naik pangkat ma si Sadrak, si Mesak pakon si Abednego i Propinsi Babel ibahen raja ai.

Nipi ni si Nebukadnesar Patugahkon Pardabuhni

4¹ Humbani Raja Nebukadnesar hubani sagala bangsa, halak parsahap na marbagei-bagei in i sab dunia on. “Lambin tambah ma damei bani nasiam ganupan!

² Tanda pakon halongangan na binahen ni Naibata Na Timbul in hu bangku, ipindo uhurhu do sihol patugahonku bani nasiam.

³ Banggal ni ai tanda binahen-Ni ai, jombut ni ai halongangan na pinamasa-Ni ai! Harajaon sisadokah ni dokahni do harajaon-Ni, anjaha marsundut-sundut do panrajaion-Ni.

⁴ Ahu, Nebukadnesar, marsonang-sonang do ibagas rumahku, anjaha mardohar ibagas rumah bolonku.

⁵ Jadi dong ma nippingku, na mambahen tarsonggot ahu; sanggah na tibal ahu i podomanku, gobir do ahu ibahen pingkiran ampa panonggoran na roh hu bangku.

⁶ Dob ai huparentahkon ma ase iboan hu lobeihu sagala halak na pentar na adong i nagori Babel, ase ipatugah sidea hu bangku arti ni nipi ai.

⁷ Jadi roh ma halak na pentar-pentar, sipartondung, halak Kasdim ampa sibotoh parhalaan, hupajojor ma bani sidea nippingku, tapi seng tarpatugah sidea bangku arti ni ai.

- ⁸ Parpudi roh ma si Daniel hu bangku ai ma na margoran si Beltsasar mangihutkon goran ni naibatanku, anjaha ibagas dirini do tonduy ni naibata-naibata na pansing in, gabe hupajojor ma nipi ai bani, ningku ma,
- ⁹ 'Ale Beltsasar, kopala ni halak na pentar-pentar, hubotoh do, marianan do ibagas ho tonduy ni naibata-naibata na pansing in, anjaha seng onggajut uhurmu pasal rusia; on do panonggoran na huidah ai ibagas nipingku, sai patugah ma artini ai.
- ¹⁰ Ia panonggoran na huidah sanggah tibal ahu bani podomanku, ai ma: Mangkawah ma ahu, anjaha tonggor ma, sada hayu jongjong i parsitongahan ni tanoh on, anjaha gijang tumang do ai.
- ¹¹ Lambin bangga ma hayu ai anjaha lambin toguh, ujungni das hu langit, anjaha taridah do ai hun tampakan ni ganup tanoh on.
- ¹² Jenges do bulungni, anjaha buahni ramos, boi mambere sipanganon bani haganup. Dapotan parlinggoman do sagala binatang na i talun i toruhni, anjaha marasar manuk-manuk na i awang-awang bani dangkahni, anjaha sagala na manggoluh mangan hunjai.
- ¹³ Huidah do sanggah na marpanonggoran ai ahu i podomanku, sada siparjaga, sada halak na mapansing susur hun nagori atas.
- ¹⁴ Marsora na maling do ia mangkatahon, Roboh ma hayu in anjaha tagili dangkahni, rurus ma

bulungni anjaha erap ma sagala buahni! Bahen ma maporus sagala binatang hun toruhni ampa manuk-manuk ai hun dangkah-dangkahni.

¹⁵ Tapi anggo tutuho ni uratni ai paturut ma ibagas tanoh, irantei bani bosu pakon tombaga, i tongah-tongah ni poyon-poyon na i sampalan. Paturut ma ai marudan marmilas ni ari, mangan poyon-poyon songon binatang na i sampalan.

¹⁶ Buaton do humbani uhur jolma, anjaha bereon bani uhur binatang, paima salpu bani pitu panorang.

¹⁷ Ia uhum on humbani riah ni siparjaga ai do, anjaha haputusan on marhitei hata ni na pansing ai, ase ibotoh sagala na manggoluh, paboa Na Tang Sitimbulan ai do sirajai sagala harajaon ni jolma manisia. Ibere do ai bani ise harosuh ni uhur-Ni, anjaha ipabangkit do hujai halak sisombuhan humbani jolma.”

¹⁸ Ai ma nipi na huidah, ahu, Raja Nebukadnesar. Ai pe ale Beltsasar, patugah ma arti ni ai bangku, halani haganup halak na pentar, na adong ibagas harajaonku, seng tarpatorang sidea ai hu bangku, tapi anggo ho boi do, ai Tonduy ni naibata-naibata na pansing ai do marianan bam.”

¹⁹ Jadi hundokah do tarsonggot si Daniel, na margoran si Beltsasar ai, pingkiranni do mambahen mabiar ia. Nini raja ai ma, “Ale Beltsasar, ulang ma pala mabiar ho pasal nipi ai pakon artini.” Nini

si Beltsasar ma mambalosi, “Ham tuannami, sai mangonai bani munsumu ma nipi ai, sonai homa artini ai bani imbangmu!

²⁰ Ia hayu nididahmu ai, na lambin banggal anjaha na lambin toguh ai, na sundol hu langit anjaha taridah ronsi hun ujung ni tanoh on,

²¹ na jenges mardangkahi, ramos buahni, sibere sipanganon bani haganup, parlinggoman ni binatang na i talun, anjaha dangkahni parsaranan ni manuk-manuk na i awang-awang,

²² ham do hayu ai, ale rajanami. Lambin banggalni do ham anjaha lambin margogoh; lambin ganda do kuasamu, sundol hu langit, anjaha gomgomanmu das ronsi tampakan ni tanoh on.

²³ Ia na nididah ni raja in, ai ma siparjaga, halak na mapansing ai, na susur hun nagori atas, na mangkatahon, ‘Roboh ma hayu in anjaha parseda ma ai, tapi anggo tutuhoni paturut ma ibagas tanoh, irantei bani bosu pakon tombaga itongah-tongah ni poyon-poyon ni sampalan in; anjaha paturut ma ai marudan marmilas ni ari, marulah songon binatang na i talun, paima salpu bani pitu panorang.’

²⁴ On do arti ni ai ale rajanami: Haputusan ni Na Tang Sitimbulan ai do na mangonai bani tuannami, raja in.

²⁵ Usiron ma ham hun tongah-tongah ni jolma, anjaha rap marianan ma ham pakon binatang na

i talun; mangan poyon ma ham songon lombu, anjaha marudan marmilas ni ari. Pitu panorang do silopusanmu, paima ibotoh ham, paboa Na Tang Sitimbulan ai do sigomgom harajaon ni jolma manisia, anjaha ibere do ai hu bani halak harosuh ni uhur-Ni.

²⁶ Anjaha pasal na hinatahon ni ai, paturuton do tutuho ni urat ni hayu ai, arti ni ai: Maningon totap do use harajaon ai bamu, dob iparhatongon uhurmu, paboa nagori atas do sipanrajai.

²⁷ Halani ai, ale rajanami, sai ra ma ham manjalo sipaingatku; paholang ham ma dirimu humbani dousamu marhitei na mangkorjahon hapintoron, sonai homa humbani hajahatonmu marhitei na maridop ni uhur bani halak na masombuh, andohar boi lambin dokahni mardohar ham.”

²⁸ Haganupan ai mangonai do bani Raja Nebukadnesar.

²⁹ Dob salpu sapuluh dua bulan, mardalan-dalan do raja ai bani tayub ni rumah bolon na i huta Babel,

³⁰ anjaha nini raja ai ma, “Ai lang on do huta Babel na bangga in, na dob hupadear bahen pamatang ni harajaonku marhitei kuasanku na bangga in, bahen hamuliaon ni hasangaponku?”

³¹ Sanggah na sinahapkon ni raja ai ope hata ai, roh ma sada sora hun nagori atas, “On do tugah-tugah

bam, ale Raja Nebukadnesar: Mosor ma harajaon in hun bamu.

³² Iusir ma ho hun tongah-tongah ni jolma, rap saianan ma ho pakon binatang na i talun; mangan poyon-poyon ma ho songon lombu; pitu panorang do lopusanmu, paima iparhatongon uhurmu, paboa Na Tang Sitimbulan ai do sipanggomgom bani harajaon ni jolma manisia, anjaha iberehon do ai bani halak harosuh ni uhur-Ni.”

³³ Mintor bani panorang ai do saud hata ai bani si Nebukadnesar. Iusir halak ma ia hun tongah-tongah ni jolma, anjaha mangan poyon-poyon ma ia songon lombu; marudan marmilas ni ari ma ia, ronsi na marganjang jambulanni songon ambulu ni manuk-manuk nanggordaha, anjaha sisilonni gabe songon sisilon ni manuk-manuk ganjangni.

³⁴ Bani ujung ni panorang ai mangkawah ma ahu, Nebukadnesar, dampak babou, gabe mulak ma ahu maruhur. Hupasangap ma Na Tang Sitimbulan ai, hupuji anjaha hupatunggung ma la na manggoluh sadokah ni dokahni; ai ronsi sadokah ni dokahni do panggomgomion-Ni anjaha harajaon-Ni marsundut-sundut.

³⁵ Haganup pangisi ni tanoh on doskon na lang do hiraon; domu hubani rosuh-Ni do ibahen bani bala na i nagori atas ampa bani pangisi ni tanoh on; sahalak pe seng dong na mangasup manulak

tangan-Ni atap na mangkatahon Bani, “Aha dong na binahen-Mu in?”

³⁶ Bani panorang ai mulak maruhur ma ahu, anjaha mulak ma homa hu bangku hasangapon ni harajaonku, hatunggungan ku ampa hamuliaonku. Ipindah i juakjuakku ampa na sangap-sangap ma ahu, ipabangkit ma use ahu i harajaonku, anjaha itambahi ope habanggalonku.

³⁷ Halani ai, ahu Nebukadnesar, mamuji anjaha pasangapkon anjaha patimbulhon Raja na i nagori atas ai; ai sintong do sagala pambahenan-Ni anjaha pintor sagala dalan-Ni, anjaha margogoh do la patoruhkon sigijang maruhur.”

Surat Tangan bani Tembok na Patugahkon Pardabuh ni si Beltsasar

5 ¹ Ibahen Raja Beltsasar ma pesta mangan-mangan bani saribu halak na sangap-sangap, anjaha minum-minum anggur ma ia rap pakon sisaribu halak ai.

² Sanggah na mabuk ai si Beltsasar ibahen anggur ai, ihatahon ma alopon panginuman omas pakon pirak, na binoan ni bapa ni si Nebukadnesar hun rumah panumbahan na i Jerusalem, ase minum hunjai raja ai ampa na sangap-sangap ai, puangbolon ampa nasipuang.

³ Jadi ialop sidea ma panginuman omas ampa pirak ai, na ibuat hinan hun rumah panumbahan na i

Jerusalem, gabe minum ma hunjai raja ai ampa na sangap-sangap, puangbolon ampa nasipuang.

⁴ Sanggah na minum anggur ai sidea, ipapuji-puji sidea ma naibata-naibata omas, pirak, tombaga, bosu, hayu, pakon batu.

⁵ Lanjar bani na satongkin ai taridah ma jari-jari ni tangan ni jolma manurat bani tembok na hinapur, tontang parsuluhan banggal ai, ibagas rumah bolon ai; ididah raja ai do tangan na manurat ai.

⁶ Jadi marposi ma bohi ni raja ai, anjaha gobir ipambibiari uhurni; galek ma binongei ni anjaha hitir-hitir towodni.

⁷ Ipamaling raja ai ma sorani mangkatahon ase ialop na pentar-pentar, halak Kasdim ampa sipartondung. Nini raja ai ma hubani halak na pentar-pentar na i Babel ai, “Barang ise na mambotoh mambasa surat on pakon patugahkon artini ai hu bangku, marbaju saholat ma ia bahenon, marsinongkok omas bani borgokni anjaha gabe raja paitolu ibagas harajaonku.”

⁸ Jadi roh ma haganup halak na pentar-pentar ai bani raja ai, tapi seng tarbasa sidea surat ai, atap tarpatugah sidea arti ni ai hubani raja ai.

⁹ Gobir tumang ma raja ai, anjaha marposi bohini; bajoraon do homa na sangap-sangap ai.

¹⁰ Masuk ma inang ni raja ai hu kamar parpestaan ai halani parsahapan ni raja ai pakon na sangap-sangap ai, nini ma, “Dokah ma manggoluh raja in!

Ulang ma ipambibiari uhurmu ham anjaha ulang ma marposi bohimu.

¹¹ Adong do ibagas harajaonmu sada halak na niianan ni tonduy ni naibata-naibata na pansing ai. Sanggah panorang ni bapamu jumpah do bani haliharon, habotohon ampa hauhuron, songon na adong bani naibata-naibata, gabe ipabangkit Raja Nebukadnesar, bapamu ondi do ia gabe kopala ni halak na pentar-pentar, sipartondung, halak Kasdim ampa sibotoh parhalaan,

¹² halani na jumpah ai bani tonduy na tarsulur, habotohon ampa hapantason laho manjujur nipi, laho patorangkon hutinta ampa pajoreihon na rundut, ai ma si Daniel, na ginoran ni raja ondi si Beltsasar. Ai pe dear ma idilo si Daniel, ase ipatugah arti ni ai.”

¹³ Jadi iboan ma si Daniel hu lobei ni raja ai. Nini raja ai ma dompak si Daniel, “Atene, ho do si Daniel, sada humbani halak Jahudi na tarbuang ai, na binoan ni bapa ondi hun Juda?

¹⁴ Hubogei do pasal ho, ai ma na niianan ni Tonduy ni naibata-naibata na pansing ai do ho, anjaha jumpah do bam haliharon, habotohon ampa hapentaran na tarsulur.

¹⁵ Domma iboan hu lobeihu halak na pentar-pentar ampa sipartondung, laho mambasa surat ai ampa laho patugahkon bangku pasal arti ni ai, tapi seng tarpatugah sidea arti ni ai.

¹⁶ Tapi hubogei do boi do ho mambere panorangion ampa pajoreihon na rundut. Ai pe anggo tarbasa ho do surat in anjaha tarpatorang ho arti ni ai hu bangku, marbaju saholat ma ho bahenonku, anjaha marsinongkok omas bani borgokmu, anjaha gabe raja paitolu ma ho bahenonku ibagas harajaonku.”

¹⁷ Jadi nini si Daniel ma mambalosi raja ai, “Soh bamu ma sibere-bere ai, anjaha bani halak na legan ma bere ham pamuji-mujianmu ai; hubasa pe surat ai bani raja in, anjaha artini ai hupatorang pe bamu.

¹⁸ Ham rajanami, ibere Naibata Sitimbulan ai do bani bapamu si Nebukadnesar harajaon, habanggalon, hasangapon ampa hatunggungan.

¹⁹ Anjaha halani kuasa na binere ai bani, hitir anjaha mabiar do sagala bangsa ampa halak siparsahap na marbagei-bagei ai i lobeini, ai saguru bani uhurni do mamunuh jolma atap pagoluhkon, patimbulhon jolma atap mandabuhkon.

²⁰ Tapi dob na ipagijang ai dirini, mangenjeng anjaha hengkenng uhurni, ipaturun ma ia humbani paratasni, anjaha hona buat humbani hasangaponni ai.

²¹ Hona usir do ia hun tongah-tongah ni jolma manisia, anjaha gabe maruhur songon binatang do ia, anjaha saianan do ia pakon halode harangan. Mangan poyon-poyon do ia songon lombu, marudan marmilas ni ari, paima iparhatongon

uhurni, paboa Naibata Na Tang Sitimbulan ai do sigomgom harajaon ni jolma manisia, anjaha ipabangkit sipanrajai atap ise harosuh ni uhur-Ni.

²² Tapi ham, ale Beltsasar, anakni, seng ra ham patoruhkon uhurmu, age pe ibotoh ham haganupan ai,

²³ tapi tene lambin ipagijang ham do dirimu mangimbang Tuhan ni nagori atas. Tarboan do hu lobeimu parugas na hun Rumah-Ni ai, anjaha minum anggur do hunjai ham, halak na sangap-sangap, jolmamu ampa binuatmu na legan. Ipapuji-puji ham do naibata-naibata pirak, omas, tombaga, bosu, hayu pakon batu, na so marpangidah, marpanangar, atap marpambotoh, tapi anggo Naibata simada hosahmu anjaha siatur sagala dalanmu, seng ipasangap ham.

²⁴ Ia do na manongos tangan ondi ampa na manuratkon surat ai.

²⁵ Anjaha on do surat na tarsurat ijai, 'Mene, Mene, Tekel, Uparsin.'

²⁶ On do arti ni hata ai, Mene: Domma ibilang Naibata panorang ni harajaonmu anjaha domma itontuhon ujungni ai.

²⁷ Tekel: Domma itimbang ham ibagas timbangan, tapi mahampungtu do ham dapot.

²⁸ Peres: Domma ibagi harajaonmu anjaha iberehon hubani halak Madai pakon Persia."

²⁹ Dob ai iparentahkon si Beltsasar ma, ase isorongkon baju saholat bani si Daniel, isinongkokkon sinongkok omas bani borgokni, anjaha itingtingkon ia ma raja paitolu ibagas harajaonni.

³⁰ Lanjar bani bornginni ai do matei tarbunuh si Beltsasar, raja ni halak Kasdim ai.

³¹ (6-1) Anjaha si Darius, halak Madai, ai ma gabe raja, sanggah na marumur ia onom puluh dua tahun.

Si Daniel Ibagas Liang ni Singa

6 ¹ (6-2) Ihadearhon si Darius do mangangkat saratus dua puluh gubernur, ai ma na pinabangkitni bani haganup harajaon ai,

² (6-3) anjaha na mangopalai ai tolu menteri do, si Daniel ma sada hunjai; bani sidea ma mambere partanggungjawaban gubernur ai, ase ulang maborattu urusan ni raja ai.

³ (6-4) Tapi atasan do si Daniel marimbang menteri ampa gubernur ai, ai adong do bani tonduy na tarsulur; jadi isurahon raja ai ma pabangkitkoni gabe haondosan ni ganup harajaon ai.

⁴ (6-5) Jadi ipindahni menteri ampa gubernur ai ma dalan laho mangaduhon si Daniel pasal na mardomu hubani harajaon ai; tapi seng adong jumpah sidea dalan laho mangaduhonsi atap

hasalahan aha pe; ai bujur do ia, anjaha seng dong jumpah bani halepakon atap na salah pe.

⁵ (6-6) Jadi nini halak ai ma, “Seng anjai jumpah hita dalam laho mangaduhon si Daniel, anggo seng dapot hita ai humbani na marpardomuan bani titah ni Naibatani.”

⁶ (6-7) Jadi sariah ma roh menteri ampa gubernur ai bani raja ai, nini sidea ma, “Ham Raja Darius, sai manggoluh ma ham lalab!

⁷ (6-8) Haganup menteri bani harajaon in, na sangap-sangap, gubernur, sipanuturi ampa puanglima domma mambahen haputusan, ase ibahen raja in paraturan ampa undang-undang, ase anggo adong halak na mambahen pangaduanni hubani naibata atap jolma ja pe, ibagas tolu puluh ari on, sobali hu bamu, ale rajanami, maningon timpalhohonkon do ai hubagas liang ni singa.

⁸ (6-9) Halani ai ale rajanami, bahen ham ma paraturan anjaha totapkon ham ma surat, anjaha ulang mubah be ai domu hu bani undang-undang ni halak Madai pakon Persia.”

⁹ (6-10) Jadi itotapkon Raja Darius ma paraturan ampa surat ai.

¹⁰ (6-11) Ia si Daniel, dob ibogei pasal paraturan na dob tinotapkon ai, laho ma ia hu rumahni; adong do bani kamar pardatas ni rumahni, jandelani buha dompak Jerusalem; manrogop ma ia ijai tolu hali sadari, laho martonggo ampa mangkatahon tarima

kasih bani Naibata, songon na somal ibahen na saindokah.

¹¹ (6-12) Jadi roh ma halak ai sariah hu rumah ni si Daniel, gabe dapot sidea ma ia martonggo anjaha marsombah i lobei ni Naibata.

¹² (6-13) Dob ai roh ma sidea hu lobei ni raja ai, anjaha isahapkon sidea ma hubani pasal paraturan ondi, nini sidea ma, “Ale rajanami, ai lang domma itotapkon ham sada paraturan, paboa anggo adong atap ise na mambahen pangindoanni ibagas sitolu puluh ari on hu bani naibata atap jolma ja pe sobali hu bamu, ale rajanami, ai lang timpalhonoronkon do ai hubagas liang ni singa?” Nini raja ai ma mambalosi, “Totap do hata ai romban hubani undang-undang ni halak Madai pakon Persia, na so malo ubahon.”

¹³ (6-14) Jadi nini sidea ma i lobei ni raja ai, “Ia si Daniel, ai ma sada halak humbani halak Jahudi na tarbuang ai, seng parduli ia bamu ale rajanami age bani surat larangan na dob tinotapkonmu ai; sai martonggo do tong ia tolu hali sadari.”

¹⁴ (6-15) Dob ibogei raja ai pasal ai, pusok ma uhurni, anjaha ipingkiri ma dalan laho paluahkon si Daniel; marpala-pala do ia ronsi sundut mata ni ari mangindahi dalan laho paluahkonsi.

¹⁵ (6-16) Jadi sariah ma halak ai roh bani raja ai, nini ma hu bani, “Botoh ham ma, ale rajanami, on do undang-undang bani halak Madai pakon

Persia, paboa anggo paraturan atap larangan, na dob pinatotap ni raja, seng malo be paubahon ai.”

¹⁶ (6-17) Jadi ipadalan raja ai ma parentah, iboan ma si Daniel anjaha itimpalhon hubagas liang ni singa. Ihatahon raja ai do bani si Daniel, “Naibatamu, na binalosanmu tongtong, la ma paluahkon ho!”

¹⁷ (6-18) Ambahni ai iboan halak ma sada batu anjaha ipajongjong ma ai bani labah ni liang ai, anjaha isap raja ai ma ai bani tintin sapni ampa marhitei tintin sap ni na sangap-sangap ai, ase ulang adong be atap aha marubah pasal si Daniel.

¹⁸ (6-19) Mulak ma raja ai hu rumahni, anjaha marpuasa do ia layur sabornginni ai; seng ipalopas roh hubani halak sibahen halilian, lanjar do seng tarpodom matani.

¹⁹ (6-20) Jadi girah sogod patar ni ai, puho ma raja ai, anjaha tarolos ma ia laho hu liang ni singa ai.

²⁰ (6-21) Dob roh ia hundohor bani liang ai, dilo-dilo ma ia marhasoman sora na marhoru hubani si Daniel, nini ma hu bani, “Ale Daniel, juakjuak ni Naibata na manggoluh in, ai maluah do ho ibahen Naibata, na binalosanmu tongtong, humbani singa in?”

²¹ (6-22) Dob ai nini si Daniel ma mambalosi raja ai, “Sai manggoluh ma ham lalab, ale rajanami!

²² (6-23) Isuruh Naibatanku do malekat-Ni mangkuntam babah ni singa on, gabe seng ikahua

sidea ahu, ai seng marsalah ahu i lobei-Ni, anjaha i lobeimu pe, ale rajanami, seng dong hubahen na salah.”

²³ (6-24) Jadi malas tumang ma uhur ni raja ai, gabe iparentahkon ma na padaratkon si Daniel humbagas liang ai. Ipadarat ma tongon si Daniel humbagas liang ai, anjaha aha pe seng dong na mahua jumpah bani, halani hatengeran ia bani Naibata.

²⁴ (6-25) Ipadalan raja ai ma parentah, jadi ialop ma haganup halak na mangaduhon si Daniel ai, anjaha itimpalhon ma hubagas liang ni singa ai, sidea, niombah ni sidea ampa jolma ni sidea. Lape das sidea bani dasor ni liang ai, domma itangkap singa ai sidea anjaha iparripuk holiholini.

²⁵ (6-26) Dob ai manongos surat ma raja Darius bani haganup bangsa ampa halak parsahap na marbagei-bagei ai, na marianan i sab tanoh ai, “Sai lambin martambah ma damei bani nasiam!

²⁶ (6-27) Huparentahkon ma bani nasiam, ase bani haganup gomgomanku gobir anjaha marhabiaran halak i lobei ni Naibata ni si Daniel, ai la do Naibata na manggoluh, na manongtong ronsi sadokah ni dokahni. Harajaon-Ni pe seng anjai maseda ai, anjaha panggomgomion-Ni seng dong ujungni.

²⁷ (6-28) Ia do na paluahkon pakon na mangurupi, ibahen do tanda ampa halongangan, i nagori atas

pakon i tanoh on. Ia do na paluahkon si Daniel humbani kuasa ni singa.”

²⁸ (6-29) Jadi lambin mardohar ma si Daniel sadokah panrajaion ni si Darius ampa sadokah panrajaion ni si Kores, halak Persia ai.

Pangungkabon bani si Daniel Pasal Binatang na Ompat ai ampa Pasal Anak ni Jolma in

7 ¹ Bani tahun parlobei dob gabe raja si Beltsasar, raja ni Babel ai, marnipi ma si Daniel anjaha marpanonggoran bani Podomanni. Jadi isuratkon ma nipi ai, anjaha ipatugah pasal rimpunni.

² Nini si Daniel ma, “Huidah do ibagas panonggoranku borngin-borngin, tonggor ma, lutu do laut bolag ai ibahen logou ni langit na ompat in.

³ Anjaha luar ma ompat binatang hun laut ai, palem-anlegan bei do rupani.

⁴ Na parlobei songon singa anjaha marhabong do songon manuk-manuk nanggordaha. Hukawahkon ma ai, hona putputan ma habongni, tarangkat ma ai hun tanoh, anjaha ipajongjong bani dua naheini songon jolma; anjaha ibere do hubani uhur jolma.

⁵ Anjaha tonggor ma, binatang na legan, na paduahon, usih songon gipul, hundul bani nahei pudini do ia, anjaha adong do tolu rusuk ibagas babahni, i holangkolang ni iponni. Iparentahkon ma hu bani, ‘Bingkat ma, pampangani ma buei daging!’

⁶ Dob ai mangkawah ma ahu, tonggor ma binatang na legan, usih songon begu; adong do ompat habong ni manuk-manuk bani gurungni, anjaha ompat do ulu ni binatang ai, anjaha ibere do kuasa bani.

⁷ Dob ai huidah ma bani panonggoran bornginni ai, tonggor ma, binatang na paompatkon, bajan anjaha majangin anjaha gogoh tumang; adong do bani ipon bosu na banggal, mambonduti anjaha manropropi do ia, anjaha na tading ai iluntak do bani naheini. Legan do ai humbani binatang na parlobei ai, anjaha sapuluh do tandukni.

⁸ Hupardiatei ma tanduk ai, anjaha tonggor ma, tubuh ma tanduk na legan, na etek-etek i holangkolang ni ai; gabe mumpat ma i lobeini tolu tanduk humbani na parlobei ai, anjaha tonggor ma, adong do bani tanduk ai songon mata ni jolma ampa babah na mansahapkon pangenjengon.

⁹ Mangkawah ma ahu, gabe ipajongjong ma paratas, anjaha hundul ma hujai sada Na Adong Hun Bani Sapari; pakeian-Ni lopak do songon salju, anjaha jambulan bani ulu-Ni putih do songon ambulu ni biribiri; paratas-Ni apuy na marjimbur-jimbur, anjaha galapangni apuy na gajag.

¹⁰ Luar do sada bah apuy, marharorohan hun lobei-Ni. Marribu-ribu do na marugas i lobei-Ni,

anjaha marlaksa-laksa jongjong i lobei-Ni. Ipungkah ma paruhuman anjaha ibuka ma sagala buku.

¹¹ Jadi mangkawah ma ahu halani hata pangenjengon na hinatahon ni tanduk ai. Anjaha huidah ma hona bunuh binatang ai, iboiskon bangkeini anjaha iondoskon ase itutungi bani apuy.

¹² Ia binatang na legan ai, ibuat ma kuasani, anjaha ibuhul panorang ampa jam ni goluh ni sidea.

¹³ Huidah do bani pangungkabon borngin ai, tonggor ma, marhitei hombun ni langit roh do sada na songon anak ni jolma, das do ia hubani Na Adong Hun Bani Sapari, anjaha iboan do ia hu lobei-Ni.

¹⁴ Ibere ma hubani kuasa, hasangapon ampa harajaon, ase ia ma sibalosan ni sagala bangsa ampa halak siparsahap na marbagei-bagei in; sisadokah ni dokahni do kuasani, seng ra salpu ai, anjaha harajaonni, na so ra seda do ai.

¹⁵ Ia ahu, si Daniel, rusak do uhurhu ibagas, anjaha songgotan halani pangungkabon na huidah ai.

¹⁶ Hudohori ma sada halak na jongjong ijai, anjaha husungkun ma ia pasal arti ni haganupan ai. Jadi marsahap ma ia hu bangku, anjaha ipatugah ma bangku artini ai, nini ma,

¹⁷ 'Ia binatang bangga na ompat ai, ompat harajaon do ai, na sihol jongjong i tanoh on.

¹⁸ Tapi halak Na Mapansing ni Sitimbulan ai do sijalo harajaon ai, anjaha sidea do simada ai tongtong ronsi sadokah ni dokahni.'

¹⁹ Dob ai ipindo uhurhu do sihol mambotoh hasintongan pasal binatang na paompatkon ai, na lain humbani na legan ai, majangin tumang, maripon bosi ampa marsisilon tombaga, na mamonduti anjaha na manropropi anjaha na manluntak-luntak na tading ai bani naheini.

²⁰ Sonai homa pasal tanduk na sapuluh ai, na i atas uluni ai, ampa tanduk na legan, na dob tubuh ai, na mambahen mumpat tolu tanduk ai i lobeini; ai ma tanduk na marmata ai ampa na marbabah, na mansahapkon pangenjengon, na banggalan idahon humbani na legan ai.

²¹ Huidah do tanduk ai mangadongkon porang dompak halak na pansing ai, anjaha italuhon do sidea,

²² paima roh Ia Na Adong Hun Bani Sapari, laho mandalankon uhum mangkopkop halak na mapansing ni Sitimbulan ai, anjaha das ma panorangni jaloon ni halak na mapansing ai harajaon ai.

²³ Nini ma mambalosi, 'Arti ni binatang na paompatkon ai, ai ma, sihol roh do harajaon na paompatkon i tanoh on, na lain humbani haganup harajaon na legan ai, anjaha bondutonni

do haganup tanoh on, luntakonni do ai, anjaha ropukonni.

²⁴ Arti ni tanduk na sapuluh ai: Humbani harajaon ai timbul do sapuluh raja, anjaha na legan do use jongjong i pudi ni sidea; legan do ia humbani na parlobei ai, anjaha madabuh do bahenonni tolu raja.

²⁵ Hatahononni do hata risa-risa dompak Sitimbulan in, anjaha arsik-arsikkononni do halak na mapansing ni Sitimbulan in, anjaha sihol do ubahonni panorang ni pesta ampa titah ai; anjaha ondoskononkon do sidea hubagas tanganni sada panorang, dua panorang ampa satongah panorang.

²⁶ Tapi padalanon ma paruhuman anjaha ibuat ma kuasani ai hun bani, imasabkon anjaha iparseda ma ai tongon.

²⁷ Ia harajaon ai ampa panggomgomion ai ampa kuasa ni harajaon-harajaon na i toruh ni langit in, ondoskononkon do ai bani bangsa ni halak na mapansing ni Sitimbulan in, harajaon sisadokah ni dokahni do harajaon ni sidea ai, anjaha sagala kuasa maningon tunduk anjaha pambalosi do bani sidea.'

²⁸ Sibar sonai ma parsahapan ai. Ia ahu, si Daniel, rusak do ahu ibahen pingkiranku, anjaha marposi do bohingku; tapi huparimbagaskon do na masa ai."

Pangungkabon Pasal Biribiri Tunggal, Hambing Tunggal ampa Tandukni ai

8¹ Patolu-tahunkon dob raja si Beltsasar, taridah ma bangku, si Daniel, sada pangungkabon ipudi ni pangungkabon na parlobei ondi.

² Jadi huidah ma ibagas pangungkabon ai (Ia ahu, sanggah na huidah ai, i huta pamatang Susan do, na i nagori Elam, i topi ni Bah Ulai),

³ mangkawah ma ahu, tonggor ma, huidah ma sada biribiri tunggal jongjong i topi ni bah ai, dua do tandukni; gijang do haduasi tanduk ai, tapi gijangan do na sada marimbang na sada nari, anjaha parpudi do sigijangan ai tubuh.

⁴ Huidah do biribiri tunggal ai mandugu dampak hasundutan, dampak utara pakon dangsina; seng dong binatang na tahan jongjong i lobeini, anjaha seng dong na boi paluahkon humbani kuasani; uhur-uhurni do ibahen, anjaha ipabanggal do dirini.

⁵ Sanggah na hupardiatei ai, tonggor ma, roh ma sada hambing tunggal hun hasundutan mamontas sab tanoh on, seng pala dais naheini hu tanoh; adong do tanduk na matunggung i holankolang ni mata ni hambing tunggal ai.

⁶ Das ma ia bani biribiri tunggal sidua tanduk ai, na huidah jongjong i topi ni bah ai, jadi idorab ma ai marbois gogoh.

⁷ Huidah ma ia roh mandohori biribiri tunggal ai, marah do ia hu bani, gabe itanduk ma biribiri tunggal ai anjaha iropukkon tandukni na dua ai; seng margogoh biribiri tunggal ai mangimbangi; itompaskon ma ia hu tanoh, anjaha ilotloti; anjaha sada pe lang na boi paluahkon biribiri tunggal ai humbani kuasani.

⁸ Jadi lambin timbul ma hambing tunggal ai, tapi dob markuasa tumang ia, ponggol ma tandukni na bangga ai, anjaha gantih ni ai tubuh ma use ompat tanduk na matunggung dampak deisa na ompat ai.

⁹ Jadi humbani sada tanduk ondi tubuh do sada tanduk na etek, na podas tumang marbanggal dampak dangsina, dampak hapoltakan ampa dampak tanoh na majenges ai.

¹⁰ Lambin timbul do ai, pala do das hu bala na i langit, deba humbani bala ai ampa bintang-bintang ai isampakkon do hu tanoh, anjaha idogei-dogei ma sidea.

¹¹ Ipatimbul do dirini, pala das hu bani Kopala ni bala ai; ibuat do hun Bani galangan ari-ari ai, anjaha iparreong do ianan-Ni na mapansing ai.

¹² Gantih ni galangan ari-ari ai igalangkon do galangan hagian; isampakkon do hasintongan hu tanoh, anjaha manjadi do sagala horja ni tanduk ai.

¹³ Dob ai hubogei ma marsahap sada halak na pansing, anjaha nini sada halak na pansing na legan ma dampak na dob marsahap ai, “Sadiha dokah on

do pangungkabon pasal galangan ari-ari ai, pasal panlanggaron na parsedahon ai, ampa dokah ni ianan na mapansing ai iondoskon gabe silotlotan?”

¹⁴ Jadi nini ma mambalosi, “Ai ma dua ribu tolu ratus ari; dob salpu pe ai ase mulak suang ianan na mapansing ai.”

¹⁵ Sanggah ahu, si Daniel, mangidah pangungkabon ai anjaha sihol uhurhu mangarusi ai, tonggor ma, jongjong ma i lobeihu sada songon dalahi rupani.

¹⁶ Anjaha hubogei ma sora ni jolma hun dipar ni Bah Ulai ai, na dilo-dilo mangkatahon, “Ale Gabriel, pajojor ma arti ni pangungkabon ai bani halak in!”

¹⁷ Jadi roh ma ia jongjong hu lambungku; sanggah na roh ia tarhirjat ma ahu lanjar manrogop hu tanoh. Tapi nini ma dampak ahu, “Botoh ma, ale anak ni jolma, ia pangungkabon ai pasal ari parpudi do ai.”

¹⁸ Sanggah na marsahap ai ia hu bangku, tompas ma ahu anjaha tarhatos, bohingku dampak tanoh; tapi ijamah ma ahu lanjar ipajongjong.

¹⁹ Nini ma, “Tonggor ma, hupatoguh ma bam, aha na sihol masa bani panorang pangujungi ni ringis ai, ai martuduh-tuduh dampak ari parpudi do pangungkabon ai.

²⁰ Ia biribiri tunggal, na nididahmai, sidua tanduk ai, ai ma raja-raja ni Madai pakon Persia.

²¹ Anjaha hambing tunggal ai, ai ma harajaon Gorik, anjaha tanduk na banggal ai, na i holangkolang ni matani na dua ai, ai ma raja na parlobei.

²² Ia tanduk na maponggol ai, tubuh do use ompat tanduk manggantih ai, ai ma ompat harajaon na sihol tubuh, humbani bangsa ai, tapi seng songon gogoh ni na parlobei ai.

²³ Tapi marayak ujung ni panrajaion ni sidea ai, anggo tarlobih ma hajahaton ni sidea ai, timbul ma sada raja, parbohi na koras, na pandei marakal-akal.

²⁴ Timbul tumang do gogohni, tapi sedo humbani gogohni sandiri, anjaha jangin tumang do pansedaini; monang do ia bani sagala pambahenanni, iboiskon do jolma siparkuasa ampa halak na mapansing ai.

²⁵ Marhitei akal-akal manjadi do pangoto-otoion na niranggihonni ai, marsura-sura habanggalon do ia ibagas uhurni. Buei do halak parsedaonni na so pamotohan; jongjong do ia manlawan Raja ni sagala raja, tapi maropuk do ia, seng pala marhitei tangan ni jolma.

²⁶ Ia pangungkabon bodari sogod ai, na dob tinarsingatan ai, sintong do ai; ponopkon ma pangungkabon ai, ai marhahonaan bani ari magira do ai.”

²⁷ Ia ahu, si Daniel, mandatei anjaha boritan do ahu piga-piga ari. Dob ai jongjong ma ahu laho

mangkorjahon horja ni raja ai. Tapi songgotan do ahu pasal pangungkabon ai, anjaha seng dong na boi patorangkon.

Tonggo Mansopotkon Dousa hambani si Daniel ampa Rusia ni Sipitu Puluh Tahun Minggu ai

9¹ Bani tahun parlobei dob raja si Darius, anak ni si Ahasveros, hambani ginompar ni halak Madai, na bangkit gabe raja manggomgom halak Kasdim,

² bani tahun parlobei ni panrajaionni ai, ahu si Daniel, dapot uhurhu ma ibagas surat-surat in bilangan ni tahun domu hu bani hata na nilumbahon ni Jahowa hubani Nabi Jeremia, ai ma pasal Jerusalem, na maningon tarulang pitu puluh tahun dokahni.

³ Dob ai hudompakkon ma Tuhan Naibata, marsombah marhitei tonggo, elek-elek, puasa, marhiou guni ampa margulu abuan.

⁴ Martonggo ma ahu bani Jahowa Naibatanku, hubahen ma panopotion dousa, ningku ma, “Ham Tuhan, Naibata na timbul anjaha na majombut, siramotkon padan ampa idop ni uhur dampak halak na mangkaholongi Ham ampa na mandalankon parentah-Mu.

⁵ Domma mardousa hanami anjaha marsalah, manjahati anjaha manlawan; manambil do hanami hambani parentah-Mu ampa hambani titah-Mu.

⁶ Seng itangihon hanami juakjuak-Mu, nabi-nabi ai, na marsahap ibagas goran-Mu hubani raja-rajanami, kopala-kopalanami, ompungnami ampa hubani haganup bangsa na i nagori in.

⁷ Bamu do Tuhan hapintoron in, tapi maila do anggo hanami nuan, hanami halak na hun Juda, pangisi ni Jerusalem ampa haganup halak Israel, ai ma na dohor ampa na daoh marianan bani haganup nagori pambuangan-Mu bani sidea, halani pangoseion ni sidea Bamu.

⁸ Ham Jahowa, patut do hanami tarbador, age raja-rajanami, kopala-kopalanami ampa ompungnami, ai mardousa do hanami dompak Ham.

⁹ Tapi Bamu do Tuhan, Ham Naibatanami, idop ni uhur ampa hasasapan ni dousa. Tongon, sipanlawan do hanami,

¹⁰ anjaha seng itangihon hanami sora ni Jahowa Naibatanami marhitei na mambalosi titah-Ni, ai ma na pinadas-Ni bennami marhitei juakjuak-Ni nabi-nabi ai.

¹¹ Haganup do Israel manlanggar titah-Mu anjaha marbalik, manjua manangihon sora-Mu. Jadi mangonai ma bennami bura-bura pakon bija na tarsurat bani buku titah ni si Musa, juakjuak ni Naibata, halani na mardousa ai hanami dompak Naibata.

¹² Ipasaud ma hata-Ni, na dob niluarhon-Ni ai bennami ampa bani sipanrajai, na manguhum hanami, marhitei na parohkon hamagouan banggal bennami, ai ma na seng onggama masa i toruh ni langit, songon na masa bani Jerusalem ai.

¹³ Romban hubani na tarsurat bani titah ni si Musa, sogop do haganup hasedaon on bennami, tapi lanjar do seng isubut hanami uhur ni Jahowa, Naibatanami, marhitei na paubahkon uhur humbani hajahatonnami ampa na mardiateihon hasintongan-Mu.

¹⁴ Halani ai do ase isurahon Jahowa hamagouan on anjaha ipamasa bennami, ai pintor do Jahowa Naibatanami bani haganup pambahenan-Ni, na binahen-Ni ai, tapi lanjar do seng itangihon hanami sora-Ni.

¹⁵ Ai pe, Ham Tuhan Naibatanami, na dob mambobahon bangsa-Mu luar hun Masir marhitei tangan na gogoh ampa na pajongjong goran Bamu ronsi sadari on, sipardousa do hanami anjaha siparjahat.

¹⁶ Ham Tuhan, domu hubani haganup hapintoron-Mu, sai pasurut Ham ma ringis-Mu pakon gajag ni gila-Mu hun Jerusalem, dolog-Mu na pansing ai; tongon halani dousanami ampa halani hajahaton ni ompungnami do, ase gabe umpama Jerusalem ampa bangsa-Mu bani bangsa na inggot hanami.

¹⁷ Ai pe, Ham Naibatanami, tangihon Ham ma tonggo ni juakjuak-Mu pakon pangindoanni, anjaha halani goran-Mu, Ham Tuhan, sondangkon Ham ma bohi-Mu bani ianan na mapansing in, na dob tarulang in.

¹⁸ Ham Naibatanku, sai pateleng Ham ma pinggol-Mu, anjaha tangar Ham ma; mangkawah ma Ham, tonggor Ham ma hasedaonnami on ampa huta in na dob targoran bani goran-Mu! Tongon sedo halani hapintoronami ase isombahkon hanami pangindoannami on Bamu, tapi halani idop ni uhur-Mu na banggal in do.

¹⁹ Ham Tuhan, tangihon Ham ma! Ham Tuhan, maidop ma uhur-Mu! Ham Tuhan, pardiatei anjaha pasaud Ham ma in! Ulang ma padokah-dokah Ham marhalanohon ni Ham, ale Naibatanku! Ai huta-Mu ai ampa bangsa-Mu in, marpanggorani hu Bamu do.”

²⁰ Jadi sanggah na marsahapi ai ope ahu anjaha martonggo, mansopotkon dousangku pakon dousa ni bangsangku halak Israel, anjaha hupadas pangindoankai hu lobei ni Jahowa, Naibatanku, ai ma pasal dolog ni Naibatanku na mapansing ai.

²¹ Sanggah na marsahapi ai ope ahu ibagas tonggo, roh ma si Gabriel, ai ma halak na dob huidah ibagas pangungkabon, habang doras manjumpahkon ahu, ai ma bani panorang panggalangonkon bodari.

²² Roh ma ia, nini ma hu bangku, “Ale Daniel, na roh do ahu laho patugahkon bam hatorangan ampa pangarusion.

²³ Bani pamungkah ni tonggomu, luar do sada hata, anjaha roh do ahu laho pabotohkon ai bam, ai haholongan ni uhur ni Naibata do ho; halani ai parimbagaskon ma hata in anjaha artihon pangungkabon in.

²⁴ Pitu puluh tahun minggu do itotapkon pasal bangsamu ampa hutamu na pansing in, ase marujung hajahaton ai, salosei dousa ai, ase ibahen pardearan pasal hasalahan ai, iparoh hapintoron sisadokah ni dokahni, ipasaud pangungkabon ampa panjahaion ai, anjaha iminaki ianan na tang pansing ai.

²⁵ Ase botoh anjaha paruhurhon ma: Humbani panorang dob luar hata ai, ase ipasuang anjaha ipauli use Jerusalem ronsi panorang parroh ni na mininakan ai, raja ai, pitu tahun minggu ampa onom puluh dua tahun minggu do; ulakan do paulihon huta ai, maralaman ampa marpasar, age pe panorang hasosakan ai.

²⁶ Anjaha dob salpu na onom puluh dua tahun minggu ai, ibunuh ma sada halak na mininakan seng pala mardalan uhum, anjaha iparseda bala ni raja na sihol roh ai ma huta ampa ianan na pansing ai. Roh do ujungni ai marhitei bah bangga, anjaha

sai masa do ronsi ujungni hasedaon, songon na dob tinontuhon hinan.

²⁷ Anjaha ibahen ia ma padan na toguh hubani buei halak, sada tahun minggu dokahni; satongah tahun minggu parontihononni do galangan sisayaton ampa galangan sipanganon; anjaha masa do bani ianan ma mapansing ai hagigi na mabajan, paima iuseihon hasedaon ampa hamagouan bani sipangagou ai.”

**Tugah-tugah ni Sada Malekat hubani si Daniel
Pasal Hasosakan na Sihol Masa bani Bangsani**

10 ¹ Patolu-tahunkon dob raja si Kores, raja ni Persia, roh ma sada hata pangungkabon hubani si Daniel, na margoran homa si Beltsasar. Sintong do hata ai, anjaha pasal hasunsahan bangga do ai. Iparuhurhon si Daniel ma ai, gabe iarusi ma pangungkabon ai.

² Bani panorang ai, ahu si Daniel, marhoru do tolu minggu dokahni.

³ Seng mangan sipanganon na mantin ahu, gulei atap anggur pe seng montas hun pamanganku, anjaha tongon seng huminaki diringku paima salpu na tolu minggu ai.

⁴ Bani ari dua puluh ompat bulan sada, sanggah bani topi ni bah bangga ai ahu, ai ma Bah Hidekel,

⁵ mangkawah ma ahu, anjaha tonggor ma, huidah do sada dalahi na marpakeian linnen, anjaha margondit omas do ia bani binongeini.

⁶ Ia badanni songon batu intan Tarsis do, bohini songon rupa ni hilap, matani songon rigapan na gara, tanganni pakon naheini marsinalsal songon tombaga na niogos, anjaha sora ni hatani songon sora ni jolma na mabuei.

⁷ Pitah ahu do, si Daniel, na mangidah pangungkabon ai; ia dalahi na i lambungku seng ididah sidea pangungkabon ai; tapi tarsonggot tumang do sidea, gabe maporus ma sidea laho marponop.

⁸ Jadi tading ma sahalak ahu, anjaha huidah do pangungkabon banggal ai: Seng dong be gogoh tading ibagas ahu, mubah do minar ni bohingku gabe marposi, anjaha seng be margolle ahu.

⁹ Dob ai hubogei ma sora ni hatani; anjaha dob hubogei sora ni hatani ai, gabe tarhatos ma ahu, dabuh tangkob hu tanoh.

¹⁰ Jadi tonggor ma, roh ma sada tangan manjamah ahu, gabe iurupi ma ahu manungkol diringku marhitei towod ampa tanganku.

¹¹ Nini ma hu bangku, "Ale Daniel, na hinaholongan ni Naibata, paruhurhon ma hata na sihol hatahononku bam; jongjong ma, ai na sinuruh do ahu sonari marayak ho." Sanggah na hinatahonni ai hata ai bangku jongjong ma ahu, hitir-hitir.

¹² Dob ai nini ma hu bangku, “Ulang ho mabiar, ale Daniel, ai humbani ari na parlobei sanggah na isurahon ho sihol arusanmu ai anjaha ipaunduk ho uhurmu i lobei ni Naibatamu, domma itangihon hatamai, anjaha halani hatamai do ase roh ahu.

¹³ Roh do malekat ni harajaon Persia manlawan ahu dua puluh sada ari dokahni; tapi tonggor ma, roh ma si Mikael, sada humbani kopala ni malekat ai, mangurupi ahu, jadi hupaturut ma ia manlawan malekat ni harajaon Persia ai.

¹⁴ Roh do ahu sonari hubam laho pabotohkon bam pasal aha na sihol masa bani bangsamu bani ujung ni panorang; ai marhahonaan bani ari magira do pangungkabon ai.”

¹⁵ Sanggah na hinatahonni ai hata ai bangku, hupaunduk ma bohingku dompak tanoh, anjaha sip do ahu.

¹⁶ Jadi tonggor ma, roh ma sada na usih bani rupa ni jolma manjamah bibirhu. Jadi hubuha ma pamanganku anjaha huhatahon ma bani na jongjong i lobeihu, “Ham Tuan, boritan do ahu halani pangungkabon na roh bangku ai, anjaha seng be margogoh ahu.

¹⁷ Sonaha ma pambahen ni juakjuak ni Tuanku marsahap pakon Tuanku; ai seng be margogoh ahu sonari, anjaha seng dong be hosah bangku?”

¹⁸ Jadi ijamah parrupa na songon jolma ai ma ahu, anjaha ipargogohi ma ahu.

¹⁹ Nini ma, “Ulang ho mabiar, ale hinaholongan ni Naibata! Damei ma bam, tenger ma uhurmu anjaha margogoh ma!” Jadi sanggah na marsahap ai ia bangku, margogoh ma ahu anjaha ningku ma, “Marsahap ma Tuanku, ai domma ipargogohi ham ahu.”

²⁰ Jadi nini ma, “Ai ibotoh ho ma aha halani ase roh ahu bam? Sonari sihol mulak ma ahu laho marporang dampak malekat ni Persia; anjaha dob salosei ai roh ma malekat ni Tanoh Gorik.

²¹ Anjaha ise pe lang adong hasomanku laho mangimbang sidea ai, sobali si Mikael, malekatnima ai.”

Sambatni

11 ¹ Ia ahu, sanggah tahun parlobei dob raja si Darius, halak Madai ai, jongjong do ahu i lambungni mangurupi anjaha mampargogohisi.

² Sonari pe patugahonku ma bam na tarsurat ibagas buku hasintongan ai, “Tonggor ma, bangkit do use tolu halak raja i Persia, tapi na paompatkon ai bayakan do ai marimbang haganup sidea ai. Dob gabe margogoh ia halani habayakonni, iharah ma haganup laho mangimbang harajaon Gorik.”

³ Jadi timbul ma sada raja na markuasa, na manrajai sada harajaon na bolag, na mandalankon rosuh-rosuhni.

⁴ Tapi anggo timbul tumang ma ia, mabolah ma harajaonni ai anjaha hona bagi mangihutkon deisa na ompat in; seng bani ginomparni ondos ai, anjaha seng songon gomgoman na ginomgomanni hinan be ai, ai maningon parsedaon do harajaonni ai anjaha halak na legan ma gabe simada ai.

⁵ Dob ai lambin margogoh ma raja na i dangsina ai, tapi sada humbani puanglimani gabe gogohan do hun bani, anjaha gabe bangga do harajaonni ai.

⁶ Dob piga-piga tahun mambahen parpadanan ma sidea; roh ma boru ni raja na hun dangsina ai mangayaki raja na i utara ai mambahen pardameian, tapi seng tarjolomisi kuasani, anjaha ginomparni pe seng manahan; hona ondoskon do ia, sonai homa na pataruhkoni, anakni sada ampa na mambuatsi.

⁷ Bani panorang ai ipabangkit raja do sada halak humbani sindohor ni boru ni raja ondi manggantih bapani; roh ma ia mamorang bala ai anjaha imasuki ma benteng ni harajaon parutara ai, ipatuduhkon ma gogohni bani sidea lanjar ipatunduk.

⁸ Iboan ma hu Masir naibata-naibata ni sidea rap pakon gana-gana tinuang ni sidea, ugas-ugas pirak ampa omas na maharga gabe taban-taban; anjaha seng be iporang raja parutara ai ibagas piga-piga dokah.

⁹ Dob ai roh ma raja parutara ai mammasuk i harajaon pardangsina ai, tapi mulak sonin do ia hu tanohni.

¹⁰ Dob ai roh ma anakni marugas laho marporang, ipatumpu ma balani marhulan-hulan; laho ma ia, irungkub ma ai songon bah banggal anjaha ilontas; iulaki ma use mamorang ai das bani benteng-bentengni.

¹¹ Marah ma raja pardangsina ai, bingkat ma ia laho marporang dompak raja na i utara ai. Jadi ipatumpu ma balani marhulan-hulan, tapi talu anjaha ripas do balani ai.

¹² Dob hona taluhon na marhulan-hulan ai, gijang ma uhurni; marlaksa-laksa do ibunuh, tapi seng torus monang ia.

¹³ Ai iulaki raja parutara ai do pajongjong bala, bueinan marimbang na parlobei ai; dob salpu piga-piga tahun roh ma ia marhasoman bala na banggal ampa buei parsadiaan.

¹⁴ Bani panorang ai buei ma na marbalik manlawan raja pardangsina ai; halak na jungkat pe humbani bangsamu manlawan do laho manggoki pangungkabon ai, tapi ipatunduk do sidea.

¹⁵ Anjaha roh ma raja parutara ai, ipajongjong ma hubuan anjaha italuhon ma sada huta na pinatoguh. Ia bala pardangsina ai seng manahan sidea, age bala pilihanni ai; tongon, seng adong kuasa na manahan jongjong.

¹⁶ Jadi ibahen na roh mangimbangani ai ma domu hu bani rosuh-rosuhni anjaha seng dong na tahan jongjong i lobeini; imasuki ma tanoh na majenges in, anjaha tunduk ma in hutoruh ni tanganni.

¹⁷ Dob ai isurahon uhurni ma sihol pajonamkon kuasani bani haganup gomgomanni; ibahen ma pardearan hu bani, ibere ma boruni gabe jolmani, laho mansedahonsi; tapi seng saud anjaha seng jadi sura-surani ai.

¹⁸ Dob salpu ai idompakkon ma hubani nagori-nagori na i topi ni laut, anjaha patundukonni do buei hunjai; tapi roh ma sada puanglima parontihon asup-asupni ai, hubani tene mangonai bahenonni asup-asupni ai.

¹⁹ Dob ai itujuhon ma bohini dampak benteng-bentengni na i tanohni sandiri, tapi jomba ma ia anjaha dabuh, anjaha lanjar seng jumpah be.

²⁰ Dob ai bangkit ma gantihni sada halak, na marsuruh sada halak sipatumpu guguan hu nagori na majenges ai; tapi seng pala piga dokah bois ma ia, sedo binahen ni ringis atap porang.

²¹ Bangkit ma na manggantihsi sada halak na mahiri, na so patut namin haondosan ni harajaon ai; na so niagak ni uhur do ia roh, gabe ibuat ma harajaon ai bani marhitei akal-akal.

²² Talu do i lobeini sagala bala na roh marhulan-hulan ai mandorabsi, sonai homa kopala ni parpadanan ai.

²³ Anjaha dob ibahen parjanjian pakonsi idalankon ma sipaoto-oto; jadi lambin margogoh ma ia marhitei jolma na otik.

²⁴ Na so panagaman masuk ma ia hu nagori na tang sibayakan, idalankon do na so binahen ni bapani atap ompungni; ibagihon do i tongah-tongah ni sidea rampasan, taban-taban ampa ugas-ugas. Ibahen ranggian mambuat benteng-benteng, tapi tongkin hansa.

²⁵ Jadi ipabulat ma gogohni pakon uhurni mamorang dompak raja na i dangsina marhasoman bala na buei; raja na hun dangsina pe roh ma marporang marhasoman bala na buei anjaha na gogoh, tapi seng tahan ia, halani partahi-tahian na binahen hu bani.

²⁶ Gari halak na tong rap mangan pakonsi parsedahonsi, gabe hona pardakdak ma balani, anjaha buei tumang rasei.

²⁷ Ia raja na dua ai, na masambor do ipingkiri sidea bei; rap mangan pe sidea marsioto-otoan do, tapi seng manjadi; ai ujung ni ai, sihol masa ope ai bani panorang na dob binuhul.

²⁸ Anjaha mulak ma ia hu nagorini mamboan buei arta, tapi uhurni sihol manlawan parpadanan na mapansing ai do. Ipasaud ma ai, dob ai mulak ma ia hu tanohni sandiri.

²⁹ Bani panorang na binuhul mulak ma ia, anjaha imasuki ma tanoh dangsina ai, tapi anggo sahali on seng songon na parlobei ondi be.

³⁰ Ai roh ma kapal hun Kittim manlawansi, gabe mabiar ma ia lanjar mulak; manringis ma ia gabe ipapuas ma ai dompak parpadanan na pansing in, anjaha manriah ma ia pakon halak na dob manadingkon parpadanan na pansing in.

³¹ Roh ma balani pabutakkon ianan na pansing in ampa bentengni, anjaha iparontihon ma galangan ari-ari. Ipajongjong sidea ma gana-gana hagigi, na majangin ai.

³² Ibahen ma marbalik halak silanggar parpadanan ai marhitei hata lemes-lemes; tapi anggo bangsa na mananda Naibata, totap do jongjong anjaha marsijoloman.

³³ Anjaha halak na pentar i tongah-tongah ni bangsa ai mambahen buei halak maruhur, age pe rasei sidea ibahen podang, apuy, tutupan ampa na hona rampas, ibagas piga-piga dokah.

³⁴ Sanggah laho talu sidea dapot partolongan do sidea otik, tapi buei do halak na marsipakulah-kulah mangihutkon sidea.

³⁵ Deba humbani halak na pentar ai rasei do, laho papitahkon sidea, paborsihkon ampa paputihkon, das bani panorang parujungan; ai maningon masa ope na sonai das bani panorang na dob binuhul.

³⁶ Ibaheh raja ai do domu hubani rosuh ni uhurni, ipagijang anjaha ipatimbul do dirini i atas ni sagala naibata, anjaha jungkat do parsahapni dompak Naibata Sitimbulan in. Sai monang do ia, paima gok ringis ai, ai barang aha na dob tinontuhon maningon saud do.

³⁷ Seng parduli ia bani naibata ni ompungni, atap naibata na hinaholongan ni naboru; seng parduli ia bani naibata na legan, ai ipagijang do dirini i atas ni haganupan ai.

³⁸ Tapi gantih ni ai, ipasangap do naibata ni benteng-benteng; ipasangap do sada naibata na so tinanda ni ompungni, marhitei omas, pirak, batu intan ampa sibere-bere na maharga.

³⁹ Ibaheh ma naibata na legan ai gabe parondosan ni benteng-benteng na toguh ai; halak na mambalosisi ipasangap do ai; ipabangkit do sidea manrajai buei halak, anjaha ibagihon do bani sidea nagori ai bahen upah.

⁴⁰ Bani panorang marayak ujungni marsidoraban ma ia pakon raja na i dangsina; roh ma raja na hun utara ai mandorabsi songon halisungsung, marhitei gareta porang ampa siparhuda ampa buei kapal, roh ma ia mammasuku nagori-nagori, irungkub anjaha ilontas ma ai.

⁴¹ Das do ia hu tanoh na marmulia ai. Marlaksa-laksa do halak na rasei bahenonni, tapi maluah do

hun tanganni anggo on: Edom pakon Moab ampa sabagian banggal humbani halak Amon.

⁴² Ipagostong do tanganni manlawan nagori-nagori ai, anjaha seng maluah tanoh Masir hun bani.

⁴³ Gok bani do sagala arta omas, pirak ampa haganup arta na maharga i Masir; Libia pakon Etiopia pe mangihut do hu bani.

⁴⁴ Tapi tarsonggot ma ia bahenon ni barita na hun hapoltakan ampa na hun utara, jadi bingkat ma ia ibagas gila laho manraseihon ampa mamboiskon buei halak.

⁴⁵ Jadi ipasuk ma lampolampo harajaonni ai i holangkolang ni laut ai ampa dolog na mapansing na marmulia ai; tapi jumpah ma ajalni, sahalak pe lang dong na mangurupisi.”

Haluahon ni Bangsa ni Naibata dob Salpu Panorang Hasosakan Banggal

12 ¹ “Bani panorang ai jongjong ma si Mikael, kopala ni malekat na banggal ai, sijagai bangsamu. Jadi masa ma panorang hasosakan, na so onggama masa humbani dob dong bangsa-bangsa das bani panorang ai; tapi bani panorang ai maluah ma bangsamu, sagala na tarsurat goranni bani buku ai.

² Anjaha buei do halak na dob modom ibagas orbuk ni tanoh in puho magira, deba hu hagoluhan

sisadokah ni dokahni, deba huhabadoron ampa hadorsaon sisadokah ni dokahni.

³ Halak siparuhur marsinondang do songon sondang ni langit, anjaha sidea na manogu-nogu buei halak hu hapintoron marsinondang do songon bintang ronsi sadokah ni dokahni.

⁴ Tapi anggo ho ale Daniel, ponopkon ma hata in, anjaha bahen ma sap bani pustaha in, paima dapot panorang parujungan ai; buei do halak na manangkasi hata ai, gabe tambah ma habotohon.”

⁵ Jadi mangkawah ma ahu, si Daniel, anjaha tonggor ma, jongjong do dua halak nari malekat, sada hampit dipar on, na sada nari hampit dipar ni bah ai,

⁶ anjaha ihatahon sahalak humbani sidea ma hubani dalahi na marpakeian linnen ai, na jongjong i atas ni bah mardalan ai, nini ma, “Andigan pe masa panorang parujungan, na gok halongangan ai?”

⁷ Ia dalahi na marpakeian linnen ai, na jongjong i atas ni bah mardalan ai, ipagostong ma tanganni siamun pakon sambilou dompak nagori atas, anjaha marbulawan ma ia hubani Na Manggoluh ai ronsi sadokah ni dokahni: Maningon salpu do lobei sada panorang, dua panorang pakon satongah panorang; anggo marujung ma kuasa ni siparseda bangsa na mapansing in, ai pe ase saud haganupan ai.

⁸ Hubogei do namin hata ai, tapi seng huarusi, gabe ningku ma, “Ham Tuanku, sonaha do ujungni ai?”

⁹ Jadi nini ma, “Laho ma ho, ale Daniel, ai maningon ponop do anjaha hona sap do hata ai das bani panorang parujungan.

¹⁰ Buei do halak na pauraskon dirini, na paborsihkon anjaha na papitahkon dirini; tapi anggo halak parjahat sai inunut do manjahati; seng dong halak parjahat ai na marpangarusion, tapi anggo halak na maruhur iartihon do in.

¹¹ Humbani panorang iparontihon galangan ari-ari ai anjaha ipajongjong gana-gana hagigi na majangin ai, ai ma saribu dua ratus siah puluh ari do.

¹² Martuah ma halak na tahan ronsi saribu tolu ratus tolu puluh lima ari.

¹³ Tapi anggo ho, tuju ma ujungni ai, marsaran ma ho; puho do ho use laho manjalo rupeimu bani ujung ni panorang.”

Hosea

Parrumahtanggaon ni si Hosea ampa Goran ni Anakni laho Patidakkon Uhur ni Naibata dampak Bangsaani

1 ¹ On ma hata ni Jahowa na roh hubani si Hosea, anak ni si Beri, bani panorang ni si Usia, si Jotam, si Ahas pakon si Hiskia, ai ma raja-raja ni Juda, ampa bani panorang ni si Jerobeam, anak ni si Joas, raja ni Israel.

² Sanggah na ipungkah Jahowa marsahap marhitei si Hosea, nini ma hubani si Hosea, “Laho ma ho, buat ma bam sada boru jalang, ase tubuh bam anak humbani boru jalang ai, ai sai inunut nagori in do marbangkisi, marbalik humbani Jahowa.”

³ Jadi laho ma ia anjaha ibuat ma si Gomer, boru ni si Diblaim; boratan rumah ma ia anjaha itubuhkon ma sada anak.

⁴ Jadi nini Jahowa ma hu bani, “Bahen ma goranni si Jesreel; ai tongkin nari mando luluhonon-Ku ma daroh ni Jesreel hubani ginompar ni si Jehu, anjaha parontihonon-Ku ma Harajaon Israel.

⁵ Anjaha bani panorang ai, ponggolhonon-Ku ma sior ni Israel i pamah Jesreel.

⁶ Boratan rumah ma use ia anjaha itubuhkan ma sada boru. Dob ai ihatahon Jahowa ma hu bani, “Bahen ma goranni si Lo-Ruhama (*Na so hinaholongan*); ai seng holong be uhur-Hu bani ginompar ni Israel, anjaha seng be marulak-ulakan uhur-Hu mangidah sidea.

⁷ Tapi marulak-ulakan do uhur-Hu anggo bani ginompar ni Juda, anjaha paluahon-Ku do sidea marhitei Jahowa, Naibata ni sidea; seng paluahon-Ku sidea marhitei sior atap podang atap porang atap huda atap jolma siajak huda pe.”

⁸ Jadi dob sirang minum si Lo-Ruhama, boratan rumah ma use parinangon ai, anjaha itubuhkan ma sada anak.

⁹ Dob ai nini Jahowa ma, “Bahen ma goranni si Lo-Ammi (*Seng bangsang-Ku*), ai seng be bangsang-Ku hanima, anjaha Ahu pe seng be Naibatanimas.

¹⁰ Tapi ia bilangan ni bangsa Israel magira, maningon songon buei ni horsik na i topi ni laut do, seng tarsuhati atap tarbilangi. Anjaha gantih ni hata na dompak sidea ai, “Sedo bangsang-Ku hanima”, hatahononkon ma bani sidea, “Anak ni Naibata na manggoluh in!”

¹¹ Jadi mardomu ma magira halak Juda rap pakon halak Israel, pabangkiton ni sidea ma bani sidea sada kopala, anjaha tangkog ma sidea hun nagori in, ai bangga do ari Jesreel ai.

2¹ (1-12) Hatahon ma hubani saninamu, 'Ammi' (Bangsangku), ampa hubani botoumu, 'Ruhama' (Na hihaholongan).

**Israel Marbalik humbani Naibata, Tapi
Ijalo Naibata do Sidea Use**

- ² (2-1) "Gilai ma inangnima, gilai ma! ai seng be parinangon-Ku ia, anjaha Ahu pe seng be paramangonni, ase ipadaoh hun lobeini parriah-riahonni ai ampa parbangkisonni ai humbani bagod-bagodni.
- ³ (2-2) Anggo lang Hupasalang ma ia, Hubahen ma ia songon sanggah tubuh ia, Hubahen ma ia songon tanoh halimisan, songon tanoh dorging-dorging, anjaha Hubahen ma ia matei horahan.
- ⁴ (2-3) Bani anakni pe seng holong uhurmu, ai anak salong-salongan do ai.
- ⁵ (2-4) Ai boru jalang do inang ni sidea, situbuhkon sidea ai butak do parlahouni. Nini do, 'Huihut-ihut ma na mangkaholongi ahu, na mambere bangku sipanganonku pakon siinumonku, wol ampa bonang, minak ampa siinum-inumon.'
- ⁶ (2-5) Halani ai runngaon-Ku do dalanni bani duri-duri, anjaha pajongjongon-Ku tembok mangolatsi, ase ulang be ibotoh dalanni.

- ⁷ (2-6) Iparayak do na mangkaholongisi, tapi seng dapotsi, Pindah-pindah do ia bani sidea, tapi seng jumpahsi. Jadi nini ma, 'Laho ma ahu, mulak hubani paramangonku hinan, ai sonangan do ahu ijia ase sonari.'
- ⁸ (2-7) Seng dong ibotoh, paboa Ahu do ai, na mambere bani gandum, anggur ampa minak, anjaha na manlayak-layakkon bani buei pirak ampa omas, ai ma na pinakei ni sidea paulihon Baal.
- ⁹ (2-8) Halani ai buaton-Ku ma mulak gandum-Hu bani panorangni ampa anggur-Hu bani musimni; anjaha wol-Hu ampa hiou pe sontapkonon-Ku do, ai ma na manrungkub hatalanjangonni hinan.
- ¹⁰ (2-9) Anjaha patalagon-Ku do hailaonni i lobei ni na mangkaholongisi, anjaha seng dong na boi paluahkonsi humbani tangan-Ku.
- ¹¹ (2-10) Parontihonon-Ku do haganup malas ni uhurni, pesta-pestani, poltak ni bulanni, ari Sabatni ampa haganup ari rayani.
- ¹² (2-11) Parsedaon-Ku do hayu anggurni ampa hayu arani, ai ma na hinatahonni ai, 'On do upah bangku, na binere ni na mangkaholongi ahu bangku.' Gabe harangan do ai bahenon-Ku, anjaha binatang na i talun ai do manggagati ai.

- ¹³ (2-12) Marlulu do Ahu bani halani pesta-pesta bani Baal, ai ma na manutung dahupa ia bani Baal, ipajagar dirini marhitei tintinni ampa omas-omasni, iirik-irik na mangkaholongisi, tapi Ahu ihalupahon do,” nini Jahowa.
- ¹⁴ (2-13) “Tapi huajar-ajari ma ia anjaha huboan ma ia hu halimisan, anjaha lamlam do parsahap-Ku bani.
- ¹⁵ (2-14) Ijai berehonon-Ku ma bani pohon anggurni, anjaha bahenon-Ku do habungan Ahor gabe horbangan pangarapan. Anjaha ijai tangihononni ma Ahu, songon bani panorang haposoonni, songon sanggah na tangkog ai ia hun Masir.”
- ¹⁶ (2-15) “Bani ari ai,” nini Jahowa, “goranonmu ma Ahu, ‘Paramangonku,’ lang be ‘Baalhu.’
- ¹⁷ (2-16) Padaohon-Ku do goran Baal humbani pamanganmu, ase ulang be isobut-sobut halak goranni ai.
- ¹⁸ (2-17) Bahenon-Ku do bannima bani ari ai padan pakon binatang harangan ampa manuk-manuk na i awang-awang ampa sagala na manjulur i tanoh in; masabkonon-Ku do sior, podang ampa porang hun tanoh in, anjaha Bahenon-Ku do hanima sonang marianan.
- ¹⁹ (2-18) Riridon-Ku do ho gabe tunangan Bangku sadokah ni dokahni; riridon-Ku do ho

marhitei hapintoron, uhur, idop ampa holong ni uhur.

²⁰ (2-19) Riridon-Ku do ho Bangku ibagas habujuron, gabe tandaonmu ma Jahowa.

²¹ (2-20) Bani panorang ai,” nini Jahowa, “tangihonon-Ku ma langit, tangihonon ni langit ma tanoh on,

²² (2-21) anjaha tangihonon ni tanoh on ma gandum, anggur ampa minak, anjaha ganup ai manangihon Jesreel,

²³ (2-22) anjaha tidahkonon-Ku ma ia Bangku i tanoh in. Marholong ni uhur ma Ahu bani si Lo-Ruhama (*Na so hinaholongan*) anjaha hatahonon-Ku ma hubani si Lo-Ammi (*Seng bangsanku*), ‘Bangsang-Ku do ho,’ anjaha ia mangkatahon, ‘Ham do Naibatanku.’”

Holong ni Uhur ni si Hosea bani Naboru Siparbangkis

3¹ Dob ai nini Jahowa ma hu bangku, “Laho ma use, haholongi ma sada naboru, na mangkaholongi dalahi na legan, siparbangkis, usih songon Jahowa na mangkaholongi bangsa Israel, age pe marbalik sidea bani Naibata na legan anjaha rosuh bani ruti na maragu buah anggur.”

² Jadi huboli ma ia bangku arga sapuluh lima sikal pirak ampa sada satongah homer andolei.

³ Jadi ningku ma hu bani, “Maningon dokah do ho marianan rap pakon ahu, ulang marbangkis, ulang mardalahii, ahu pe sonai ma bam.

⁴ Ai maningon dokah do halak Israel marianan, seng marraja atap markopala, seng manggalang atap martugu, seng marepod atap marterapim.

⁵ Dob ai mulak ma use halak Israel, anjaha pindahan ni sidea ma Jahowa, Naibata ni sidea, ampa si Daud, raja ni sidea ai, anjaha roh sidea marhabiaran mangayaki Jahowa ampa hatuahonni ai bani panorang parpudi.”

Hata Pinsang-pinsang Dompok Malim ampa Bangsa Siparbalik ai

4 ¹ Tangihon ma hata ni Jahowa, ale ginompar ni Israel, ai adong do paringoran ni Jahowa ampa pangisi ni tanoh in, “Ai seng dong hasintongan, seng dong haholongan, anjaha seng dong habotohon pasal Naibata i tanoh in,

² tapi bija do, ladung, pambunuhon, panangkoon ampa parbangkison; masa do odoh-odoh anjaha marompot mardurusan daroh.

³ Halani ai marhoru do tanoh in, anjaha sagala pangisini hurleh, sonai homa binatang na i talun ampa manuk-manuk na i awang-awang; anjaha dengke na ibagas laut ai pe rasei do.

- ⁴ Tapi ulang ma pala adong atap ise na maminsang, anjaha ulang ma pala adong na mangaduhon, ai ho do imbang-Ku martinggil, ale malim!
- ⁵ Maningon tartolsu do ho arian, nabi pe tompas do rap pakon ho borngin; anjaha inangmu pe bois do bahenon-Ku.
- ⁶ Seda do bangsang-Ku halani hurang ni habotohon; halani itulakkon ho habotohon, tulakkonon-Ku do ho, ase ulang be ho malim Bangku. Halani lupa ho bani titah ni Naibatamu, lupa ma homa Ahu bani anakmu.
- ⁷ Lambin martambah-tambah sidea, lambin mardousai do sidea dompak Ahu. Ubahon-Ku do hasangapon ni sidea ai gabe habadoron.
- ⁸ Manggoluh do sidea humbani dousa ni bangsang-Ku, anjaha marosuh do sidea bani hajahatonni.”
- ⁹ Dos do na sihol masa bani malim ampa bani halak simbuei, “Marlulu ma Ahu bani sidea romban hubani parlahou ni sidea; anjaha mambalas do Ahu bani sidea halani pambahenan ni sidea.
- ¹⁰ Mangan pe sidea, tapi seng bosur, marbangkis pe sidea, tapi seng manggargar, halani

itadingkon sidea Jahowa laho mandalankon parbangkison.

- ¹¹ Anggur ampa minuman koras, ai do na parseda uhur.
- ¹² Marpanungkun bani hayu-hayu do bangsang-Ku, anjaha tungkot ni sidea mambere bani sidea pangungkabon. Tongon, tonduy parbangkison do na pakahou sidea, marbalik do sidea humbani Naibata ni sidea, laho mangkorjahon parbangkison.
- ¹³ Bani pakpak ni dolog do sidea manggalang anjaha bani buntu-buntu manutung dahupa, sonai homa i toruh ni hayu buah, jajabi pakon baringin halani dear ni linggomni ai. Halani ai marriah-riahi do borunima anjaha marbangkisi parumaennima.
- ¹⁴ Tapi seng uhumon-Ku borunima halani na marriah-riahi atap parumaennima halani na marbangkisi ai, ai dalahi-dalahi pe mardomu-domu do rap pakon boru jalang, anjaha rap manggalang ampa boru jalang na i rumah-rumah panumbahan; anjaha bangsa na so maruhur ai maningon seda do.
- ¹⁵ Age pe marriah-riah ho ale Israel, ulang namin dihut Juda marsalah! Ulang ma laho hanima hu Gilgal, ulang ma tangkog hu Bet-Awen, anjaha ulang ma marbija, mangkatahon, 'Songon sintongni manggoluh Jahowa!'

- ¹⁶ Tongon, songon lombu jalang na hengken, sonai do hengken ni Israel; mintor tarparmahan Jahowa ma sidea songon biribiri bani sampalan na bolag?
- ¹⁷ Marpardomuan bani gana-gana do Efraim, paturut ma ia hujin.
- ¹⁸ Siparmabuk-mabuk do sidea, sidalankon parriah-riahon, holongan do uhur ni sidea bani habadoron, ase humbani na boi gabe hasangapon bani sidea.
- ¹⁹ Logou do na manaluhon sidea marhitei habongni, anjaha gabe bador do sidea halani panggalangon ni sidea.”

Hona Uhum Bangsa Halani Hasalahan ni Sipambobai

- 5** ¹ “Tangar ma on, ale malim! Parimbagaskon ma, ale halak Israel! Tangihon ma, ale sipanrajai! Ai mangonai bannima do uhum in, ai gabe siding do hanima i Mispa, gabe puhot na tinaon i Tabor,
- ² anjaha ipabagas hanima do godung hamagouan na i Sittim, halani ai uhumon-Ku do hanima.
- ³ Hutanda do Efraim, anjaha Israel seng ponop hun Bangku; tongon, sonari marriah-riah do Efraim anjaha hona butakan Israel.
- ⁴ Pambahenan ni sidea do mambahen lang boi be sidea mulak bani Naibata ni sidea. Ai

- tonduy parriah-riahon do ibagas uhur ni sidea, anjaha seng itandai sidea Jahowa.
- ⁵ Gijang ni uhur ni Israel do saksi na mangimbangi; maningon tompas do Efraim halani hajahatonni. Juda pe tompas do rap pakonsi.
- ⁶ Roh do sidea mamboan biribiri ampa lumbu ni sidea mangindahi Jahowa, tapi seng jumpah sidea la; domma surut la humbani sidea.
- ⁷ Mangosei do sidea dampak Jahowa, tongon anak salong-salongan do tinubuhkon ni sidea; halani ai boiskonon ni pesta poltak ni bulan do sidea ampa juma ni sidea.
- ⁸ Sompul ma tanduk i Gibea, tarompit ai i Rama. Pahata ma tingting i Bet-Awen, hirjati ma Benjamin!
- ⁹ Gabe halimisan do Efraim bani panorang uhum ai; na sintong do na Hupabotohkon ai bani marga ni Israel.
- ¹⁰ Gabe songon halak siosor parbalogan do kopala-kopala ni Juda; duruskonon-Ku do ringis-Ku bani sidea songon bah.
- ¹¹ Hona odoh-odoh do Efraim, maropuk bani paruhuman, halani marosuh ia mangihutkon gana-gana na lang ai.
- ¹² Halani ai gabe doskon ngitngit do Ahu bani Efraim, anjaha songon burbur na parsedahon bani ginompar ni Juda.

- ¹³ Dob ididah Efraim naboritni anjaha ididah Juda ugahni, laho do Efraim hu Assur, isuruh do suruhanni bani raja bolon ai. Tapi seng tarbahensi pamalum hanima atap tartambarisi ugahnima.
- ¹⁴ Ai gabe songon singa do Ahu bani Efraim janah songon anak ni singa bani ginompar ni Juda. Ahu, Ahu tongon manoroh, dob ai lintun hunjai. Ahu do na manaluhon, seng dong na boi paluahkon.
- ¹⁵ Mulak ma Ahu use bani ianan-Ku, paima itanda sidea salahni gabe ipindahi sidea bohing-Ku, anjaha ibagas hasosakan ni sidea ai pindahan ni sidea ma Ahu.”

Ojur-ojur ase Sintong Mubah Uhur

- 6** ¹ “Eta, mulak ma hita bani Jahowa! Tongon, la do na mamparsilbak, tapi la do na pamalum hita; la do na mangugahi, tapi la do na manambari hita.
- ² Dob dua ari pagoluhon-Ni do hita, patolu-arihon ipapuhon do hita, ase manggoluh hita i lobei-Ni.
- ³ Botoh hita ma anjaha haringgaskon hita ma na manandai Jahowa; sai na poltak do la songon buha siang ari, sai na roh do la banta songon udan, songon udan mula-mula na mangarbahi tanoh.”

- ⁴ “Aha do tarbahen Ahu bam, ale Efraim? Aha do tarbahen Ahu bam, ale Juda Ai songon hambun sogod-sogod do holongnima, songon namur na podas habang.
- ⁵ Halani ai Hubogbog do sidea marhitei nabi-nabi, Hubunuh marhitei hata na humbani pamangan-Ku ase poltak uhur-Hu songon haliharon.
- ⁶ Ai idop ni uhur do na Huharosuhkon, sedo galangan, panandaion pasal Naibata, sedo galangan situtungon.
- ⁷ Igalat sidea do padan i huta Adam; mangosei do sidea ijai hu Bangku.
- ⁸ Gilead ai ma huta ni halak sihorjahon hajahaton, gok bokas ni daroh.
- ⁹ Songon panamun na manggompangi halak, sonai do hulanan ni malim-malim; mamunuhi do sidea bani dalan na laho hu Sikem, tongon, mangkorjahon hasamboron do sidea.
- ¹⁰ I Betel Huidah do na majangin ijai, ijai do parriah-riahon bani Efraim, hona butakan do Israel.
- ¹¹ Ho pe ale Juda, sisabion ma!”

Pasal Efraim na So Ra Mubah

7 ¹ “Sangghah sihol pasuangon-Ku bangsang-Ku, anjaha sihol pamalumon-Ku Israel, gabe

- talar ma dousa ni Efraim ampa hajahaton ni Samaria, ai ihorjahon sidea do panipuon, panangko mambongkari rumah, anjaha panrampok manrampasi i dalan-dalan.
- ² Seng ipingkirhon sidea, na mardingat do Ahu bani ganup hajahaton ni sidea. Sonari iinggoti pambahenanni do sidea, i lobei ni bohing-Ku do ai.
- ³ Marhitei hajahaton ni sidea ipamalas sidea uhur ni raja, anjaha marhitei sipakulah-kulah ni sidea ipamegah kopala-kopala.
- ⁴ Haganup sidea unsong-unsong do usih do sidea songon parmasakan ruti na dob pinamalas, tapi na so ginaraan ni tukang ruti lobei paima siap iagu topung anjaha kambang ai marhitei ubat ruti.
- ⁵ Nini sidea, "Ari bosar ni rajanta!" Marmabuk-mabuk ma kopala-kopala minum anggur; iawas-awaskon raja ai do tanganni rap pakon sipanggeori ai.
- ⁶ Gajag do uhur ni sidea songon pamurunan laho manggeori; borngin songon na modom do ringis ni sidea, tapi patarni marjimbur ma ai songon gara ni apuy.
- ⁷ Haganup sidea milas do songon pamurunan, ibonduti sidea do panggomgomini. Haganup do raja ni sidea madabuh, anjaha ise pe lang humbani sidea na dilo-dilo Bangku.

- ⁸ Ipasaor Efraim do dirini hubani bangsa-bangsa; songon roti na so pinagoling do Efraim.
- ⁹ Halak na legan do mamangani gogohni, tapi seng mangahap ia ijai; uban ma bani uluni, tapi seng ibotoh ai.
- ¹⁰ Gijang ni uhur ni Israel do saksi bani na mangimbangsi; tapi seng mulak sidea bani Jahowa, Naibata ni sidea, anjaha seng ipindahi la, age pe sonai haganupan ai.
- ¹¹ Songon asas do Efraim, oto anjaha seng maruhur; dilo-dilo bani Masir, sai laho hu Assur.
- ¹² Sanggah na laho sidea, Huhaltupkon do puhot-Ku manangkap sidea; Hutarik do sidea hu toruh songon manuk-manuk na i awang-awang; Huajar do sidea halani hajahaton ni sidea ai.
- ¹³ Bursik ma sidea, ai lintun do sidea hun Bangku; magou ma sidea, ai marbalik do sidea hun Bangku; sihol do namin Ahu paluahkon sidea, tapi ladung do ihatahon sidea Bangku.
- ¹⁴ Seng dilo-dilo sidea hu Bangku humbani uhur ni sidea, tapi bani podoman i panumbahan-panumbahan do sidea doruh-doruh; irariki sidea do dirini halani gandum ampa anggur, manlawan do sidea hu Bangku.

- ¹⁵ Ahu do na mampargogohi tangan ni sidea, hape na jahat do ipingkiri sidea dompak Ahu.
- ¹⁶ Dompok Baal do sidea laho, gabe songon sior sipangoto-otoi do sidea. Rasei do kopala-kopala ni sidea marhitei podang, halani hajungkaton ni dilah ni sidea. Ai ma na mambahen bador sidea i tanoh Masir.”

Maseda do Israel Halani Parbalikonni

- 8** ¹ “Bahen ma tarompit in hu pamanganmu! Ai adong do songon manuk-manuk sipanoroh i babou ni rumah ni Jahowa; ai iosei sidea do padan-Ku, anjaha ilaosi titah-Ku.
- ² Dilo-dilo sidea hu Bangku, ‘Ham Naibatanku, hanami halak Israel, itanda hanami do Ham!’
- ³ Itulak Israel do na madear, halani ai pardakdakon ni munsuh do sidea.
- ⁴ Ipabangkit sidea do raja, tapi seng marhitei Ahu. langkat kopala-kopala, tapi seng ibagas botoh-Ku. Humbani pirak pakon omas ni sidea ipauli do gana-gana bahen hamagouan ni sidea sandiri.
- ⁵ Sogam do uhur-Hu bani anak ni lombumu, ale Samaria. Gara do ringis-Ku dompak sidea. Piga dokah nari nani, ase pitah sidea i Israel?

- ⁶ Tukang omas do mambahen anak ni lembu ai, sedo Naibata ai. Tongon, anak ni lembu ni Samaria ai, maningon ropukon do ai.
- ⁷ Logou do itidahkon sidea, jadi habahaba ma sabionni. Gandum na i juma seng marbuyur, seng dong dapot topung hunjai. Anggo mambere gogoh ai, halak na legan do mamangani ai.
- ⁸ Hona bondut do Israel, domma songon hudon na so marguna sidea bani bangsa-bangsa.
- ⁹ Ai laho do sidea hu Assur, sasadasi songon halode liar, igaji-gaji do na mangkaholongisi.
- ¹⁰ Age pe iboli hasoman sariah i tongah-tongah ni bangsa-bangsa, podas ma erapon-Ku sidea. Maronti ma sidea lobei pabangkit raja ampa kopala-kopala.
- ¹¹ Tongon ipabuei Efraim do anjapanjap bani, gabe mambahen mardousai ai bani sidea.
- ¹² Marlaksa-laksa pe titah-Ku Husuratkon bani, ihira sidea do ai songon podah na ganjil.
- ¹³ Marosuh do sidea manggalang; igalangkon sidea do gulei, anjaha ipangan do ai, tapi seng marosuh Jahowa mangidah ai. Idingat do sonari hajahaton ni sidea, anjaha ibalaskon do dousa ni sidea; sai mulak do sidea hu Masir.
- ¹⁴ Lupa do Israel bani na manompasi, anjaha ipauli do panumbahan-panumbahan;

ipabuei Juda huta na pinatoguh, tapi tongoson-Ku do apuy bani huta-hutani, jadi bois ma panganonni benteng-bentengni.”

Magou do Malas ni Uhur hun Israel Halani Uhum na Mangonai Bani

- 9**¹ “Ulang ma marmegah-megah, ale Israel!
Ulang ma marolob-olob songon bangsa-bangsa na legan, ai marriah-riahi do ho, marbalik humbani Naibatamu. Marosuh do ho manjalo upah parriah-riahon bani sagala pardogeian.
- ² Seng be parmudu-muduon ni pardogeian atap kilang anggur sidea, anjaha anggur pe manipu sidea do.
- ³ Lang be i tanoh ni Jahowa sidea marianan, tapi maningon mulak do Efraim hu Masir, anjaha panganon ni sidea do na mabutak i Assur.
- ⁴ Seng be mambere galangan anggur sidea bani Jahowa, anjaha seng be pasirsirhon galangan sisayaton sidea Bani; ruti ni sidea ai gabe ruti pusok ni uhur ma, sagala na mangankon ai gabe butak ma; ai bani sidea sandiri mando rutini ai, seng masuk be ai hu rumah ni Jahowa.
- ⁵ Aha ma sibahenonnima bani ari pesta ampa bani ari raya ni Jahowa?

- ⁶ Ai tonggor ma, na laho ma sidea hu Assur; patumpu-tumpuon ni Masir ma sidea, anjaha Mempis do na mananom sidea. Duri-duri do na manrungkub arta pirak ni sidea ai, anjaha suga-suga do na martubuhan i lampolampo ni sidea.
- ⁷ Roh ma ari uhum, roh ma ari pambalason; ahapkonon ni Israel ma ai. Nimu ma, 'Na oto do nabi ai, na podoan do dalahi sipartonduy ai, halani buei ni hajahatonmu ampa panlawanomu.'
- ⁸ Manggompangi do Efraim bani lampolampo ni nabi ai; siding do itaon bani sagala dalanni; ilawan do ia age i rumah ni Naibatani."

**Hona Uhum Israel Halani Manlembang la
humbani Pandiloon na Bani Hinan**

- ⁹ Bagas tumang do ipabutak sidea dirini, songon na masa i Gibeai; halani ai ingaton-Ni do hajahaton ni sidea ai, balaskonon-Ni do dousa ni sidea ai.
- ¹⁰ "Songon buah ni anggur i halimisan, sonai do jumpah Ahu Israel; songon buah mula-mula bani hayu ara, sonai do Huidah ompungnima. Hape laho do sidea hu Baal-Peor, anjaha iondoskon dirini bani Baal, anjaha gabe hagigi do sidea songon sisombahon na hinarosuhkon ni sidea ai.

- ¹¹ Hamuliaon ni Efraim maningon habang do ai songon manuk-manuk; seng tubuhan tuah, seng boratan rumah anjaha seng solat be.
- ¹² Age pe pagodang-godangkon anak sidea, popor do sidea bahenon-Ku, gabe seng dong be jolma. Tongon, magou ma sidea, anggo surut Ahu humbani sidea.”
- ¹³ Sanggah na huidah Efraim, usih do ai bani Tirus, sangap isuan; tapi sonari maningon boanon ni Efraim ma anakni hu panayatan.
- ¹⁴ Bere Ham ma bani sidea, ale Jahowa! Aha do na sihol bereon-Mu? Bere Ham ma bani sidea harambuyan na lambang ampa bagod-bagod na horah!
- ¹⁵ I Gilgal do junjun sagala hajahaton ni sidea, tongon, ijai do mulai Ahu magigi mangidah sidea. Halani jahat ni pambahen ni sidea usiron-Ku do sidea hun rumah-Ku. Seng be holong uhur-Hu mangidah sidea, panggeori do sagala panrajai ni sidea.
- ¹⁶ Hona bogbog do Efraim, melus do uratni, seng marbuah be. Porini pe tubuhan anak sidea bunuhon-Ku do boras ni boltok ni sidea na pinarsinta ni sidea ai.
- ¹⁷ Ambukkonon ni Naibatanku do sidea, ai seng itangihon sidea la; gabe madou-adou mando sidea i tongah-tongah ni bangsa-bangsa.

**Parseda ni Harajaon Israel
ampa Parnaibataon na Legan**

- 10** ¹ Hayu anggur na tabun do Israel, na mambere buahni. Lambin tambah buahni, lambin ipabuei sidea do anjapanjap; lambin dearni tanohni, lambin ipauli sidea do tuguni.
- ² Seng bulat uhur ni sidea, sonari manginsonoh ma ai bani sidea. Parsedaon ni Jahowa ma anjapanjap ni sidea, anjaha parreongon-Ni tuguni.
- ³ Tongon, ihatahon sidea do sonari, “Seng marraja hita, halani lang ihabiari hita Jahowa; ia sah raja, aha ma na boi bahenonni banta?”
- ⁴ Isahapkon sidea do hata lumei, marhitei bulawan sipakulahkulah ibahen sidea parpadanan; gabe martumbor ma uhum songon suan-suanan na manrasun bani juma na tininggala.
- ⁵ Gobir do pangisi ni Samaria bani gana-gana lombu na i Bet-Awen. Tongon marhoru do bangsani halani ai, anjaha doruh-doruh do malim-malimni, halani hasangaponni na minsah hunjai.
- ⁶ Tongon, anak ni lombu ai pe tarboan do hu Assur bahen parsombahon bani raja bolon

- ai. Maningon bador do Efraim anjaha maila Israel halani hapandeionni ai.
- ⁷ Maningon magou do Samaria, rajani ai mayub songon pangotaman i atas ni bah.
- ⁸ Maningon bois do buntu-buntu panombahan na i Awen, pardousaon bani Israel. Suga-suga pakon duri-duri do tubuh bani anjapanjap ni sidea. Hatahonon ni sidea ma bani dolog-dolog, “Rungkub hanami!” Anjaha bani buntu-buntu, “Robrobi hanami!”
- ⁹ “Humbani panorang na i Gibea nari, sai mardousai do ho, ale Israel. ijai do sidea jongjong manlawan Ahu. Ai lang hona porang do sidea i Gibea?”
- ¹⁰ Sai roh do Ahu manjumpahkon anak na jahat ai laho mangajar sidea. Martumpu do roh bangsa-bangsa laho mandorab sidea, anggo ajaron ma sidea halani hajahaton ni sidea sidua lompit ai.
- ¹¹ Lumbu poso na niajar do Efraim, na marosuh mardogei, anjaha Hunahkon do pasangan bani borgokni na jenges ai, anjaha Hupasang ma Efraim; maningon maninggala do Israel anjaha manisir ia Jakob.”
- ¹² Tidahkon ma bannima hapintoron, pariamai ma dear layak! pungkah ma juma na baru, ai panorangni ma mangindahi Jahowa, ase roh la anjaha ibere bannima hapintoron.

- ¹³ Tapi hajahaton do itinggalahon hanima, gabe hamagouan isabi hanima, anjaha buah ni ladungnima ipangan hanima. Halani martenger ni uhur ho bani dalanmu, bani hinabuei ni puanglimamu,
- ¹⁴ jadi masa ma hageoron ni parporangan i tongah-tongah ni bangsamu, anjaha haganup benteng-bentengmu maseda do songon si Salman na parseda Bet-Arbel bani panorang porang; marsorak do parinangon rap pakon anakni.
- ¹⁵ Sonai ma bahenon bannima, ale ginompar ni Israel, halani banggal ni hajahatonnima. Girah sogod bois ma raja ni Israel.

**Holong ni Atei ni Naibata
bani Bangsa-Ni Sipardousa**

- 11** ¹ “Sanggah danak Israel, holong do atei-Hu hu bani; hun Masir do Hudilo anak-Ku.
- ² Lambin Hudilo sidea, lambin daohni do sidea laho hun Bangku. Sai manggalang do sidea bani Baal, anjaha manutung dahupa bani gana-gana.
- ³ Ahu do na mangajar Efraim mardalan, Huabing do sidea bani tangan-Ku, tapi seng ibotoh sidea, Ahu do na pamalum sidea.
- ⁴ Hutogu-togu do sidea marhitei tali idop ni uhur, marhitei panrahut holong; Ahu do na

pahampungkon pasangan bani tangkuhuk ni sidea, Hupaunduk do diringku bani sidea, anjaha Hubere do sidea mangan.

⁵ Maningon mulak do sidea hu tanoh Masir, anjaha Assur do gabe raja bani sidea, halani lang ra sidea mulak hu Bangku.

⁶ Halani ai roh ma podang mandorab huta-huta ni sidea, iparseda ma pating-pating ni horbangan ni sidea, anjaha iboiskon sidea ibagas benteng-bentengni.

⁷ Mandatei do bangsang-Ku mulak hu Bangku. Age pe adong na dilo-dilo bani sidea, seng tarjongjongkoni be.

⁸ Sonaha ma panadingkon-Ku bam, ale Efraim? Sonaha ma parpaturut-Ku bam, ale Israel? Ija ma ra Ahu mambahen bam songon na bani Adma? Ija ma ra Ahu mambahen bam songon na bani Seboim? Marulak-ulakan do uhur-Hu ibagas, nahit do holong ni atei-Hu.

⁹ Seng dalankonon-Ku ringis-Ku na gajag in, seng be parsedaon-Ku Efraim. Ai Naibata do Ahu, sedo jolma, ai ma Na Mapansing ai i tongah-tongahnima, seng roh be Ahu mamboiskon.

¹⁰ Irikkonon ni sidea do Jahowa, maraum do la songon singa; tongon, maraum do la, anjaha marrohan ma anakni hitir-hitir hun hasundutan.

- ¹¹ Marrohan do sidea meper-eper songon manuk-manuk hun Masir, anjaha songon asas hun Assur; paulakon-Ku do sidea marianan bani rumah ni sidea,” nini Jahowa.
- ¹² (12-1) “Ilioti Efraim do Ahu marhitei ladung anjaha ginompar ni Israel marhitei pangoto-otoion. Anjaha Juda pe marbalik do humbani Naibata ampa humbani Na Mapansing in, hatengeran ni uhur in.

**Usih do Efraim bani Pargoluhon
ni Ompung ni si Jakob**

- 12** ¹ (12-2) Logou do iparmahan Efraim, anjaha logou hapoltakan do iayak-ayak ari-ari; ipabuei sidea do ladung ampa odoh-odoh. Mambahen parpadanan do sidea pakon Assur, anjaha iboan do minak hu Masir.
- ² (12-3) Anjaha adong do paringoran ni Jahowa pakon Juda; marlulu do la dompak Jakob romban hubani dalanni, anjaha balaskonon-Ni do bani domu hubani pambahenanni.
- ³ (12-4) Bani partapaan ope domma ioto-otoi abangni, anjaha sanggah bani hagogohonni margulgul do ia pakon Naibata.
- ⁴ (12-5) Margumpul do ia pakon malekat anjaha monang do, tangis do ia mangelek-elek idop

- ni uhurni. I Betel pajumpah do Naibata pakonsi, anjaha ijai iparsahapkon do ia.
- ⁵ (12-6) Jahowa, Naibata Zebaot, Jahowa do goran-Ni.
- ⁶ (12-7) Ai pe, mulak ma ho bani Naibatamu, dalankon ma idop ni uhur ampa uhum, anjaha tongtong martenger ni uhur bani Naibatamu.
- ⁷ (12-8) Songon partiga-tiga halak Kanaan ijolom Efraim do kilo palsu ibagas tanganni, marosuh do ia manipu.
- ⁸ (12-9) Nini, 'Tongon, bayak do ahu, dapotan pansarian do ahu. Bani haganup pansariankai seng dong jumpah bangku salah, ai ma dousa.'
- ⁹ (12-10) Ahu do Jahowa Naibatamu hun tanoh Masir nari, bahenon-Ku do use ho marianan bani lampolampo, songon sanggah panorang na i halimisan.
- ¹⁰ (12-11) Marsahap do Ahu bani nabi, Ahu do pabuei pangungkabon, anjaha marhitei nabi-nabi marsahap do Ahu marhasoman limbaga.
- ¹¹ (12-12) Masa do hajahaton i Gilead, gabe bois do sidea; manggalang do sidea bani lombu jonggi i Gilgal, gabe songon timbunan batu ma homa anjapanjap ni sidea i juma na tininggalaan.

- ¹² (12-13) Hu tanoh Aram do maporus si Jakob, marhorja do si Israel ijai halani boru, marmahan biribiri do ia laho mambuat parinangon bani.
- ¹³ (12-14) Marhitei sada nabi iboan Jahowa do Israel mandarat hun Masir, anjaha iparmahan do sidea marhitei sada nabi.
- ¹⁴ (12-15) Sipuhoi ringis do pambahenan ni Efraim, halani ai marsapata hubani do bahenon ni Jahowa utang darohni ai, anjaha balaskononni bani hasamboron na hinorjahonni ai.”

**Efraim Ningon Hona Uhum Halani
Dousani; Ibagahkon Naibata Haluahon
humbani Hamatean Bani**

- 13** ¹ Anggo marsahap Efraim, mabiar do halak, timbul do ia i Israel; tapi halani mardousa ia marhitei Baal, gabe matei ma ia.
- ² Sonari pe, sai inunut sidea do mardousa, ipauli sidea do bani sidea gana-gana tinuang humbani pirak ni sidea, tubuh-tubuh ni uhur ni sidea, jadi-jadian ni tukang do ganupan ai. Nini sidea pasal ai, ‘Manggalang ma hujai! Anak ni lembu do isummah jolma.’
- ³ Halani ai gabe songon hambun sogod-sogod ma sidea, atap songon namur na podas habang; tongon, songon lamlam na hinabangkon ni

logou humbani pardogeian, atap songon timus na luar humbani jandela.

- ⁴ Ahu do Jahowa Naibatamu hun tanoh Masir nari; seng dong Naibata sobali Ahu itanda ho, anjaha sobali Ahu seng dong Sipaluah.
- ⁵ Ahu do na mananda ho i halimisan, bani tanoh na horah-horah;
- ⁶ Dob dapotan panggagatan sidea Hubahen, jadi bosur ma sidea; dob bosur sidea, gijang ma uhurni, gabe lupa ma sidea Bangku.
- ⁷ Halani ai, songon singa ma Ahu dompak sidea, songon begu na manggompangi i dalan.
- ⁸ Songon gipul na magouan anak do Ahu manoroh bani sidea, parribakon-Ku do tonton ni sidea; anjaha songon singa boru-boru do Ahu mamondut sidea ijai, binatang panoroh na i talun do mamparsilbak sidea.
- ⁹ Anggo Ahu sipangagou bam, ale Israel, ise ma na boi paluahkon ho?
- ¹⁰ Ija do nuan rajamu, na boi mangurupi ho? Ija do nuan kopala-kopalamu na mamintori ho? Hubani sidea do ihatahon ho, 'Bere bangku raja pakon kopala-kopala!'
- ¹¹ Hubere do bam sada raja ibagas ringis-Ku, anjaha Hubuat use ibagas gilang-Ku.
- ¹² Domma hona lak hajahaton ni Efraim, domma hona simpan dousani.

- ¹³ Pangarouon ni na sihol tubuhan anak do na roh hu bani, tapi anak na so maruhur do ia, age pe roh panorangni seng ra luar ia hun partapaan.
- ¹⁴ Tapi paluahon-Ku do sidea humbani kuasa ni nagori toruh, anjaha tobuson-Ku do sidea humbani hamatean. Ale hamatean, ija do sorodmu? Ale nagori toruh, ija do pangarsik-arsikonmu? Pambalason ponop do humbani matang-Ku.
- ¹⁵ Age marbuahi Efraim i tongah-tongah ni saninani, roh ma logou hapoltakan, ai ma logou humbani Jahowa, naik hun halimisan; gabe horah ma parigini anjaha marsik bah tubuhni; rampason ni ai ma arta-artani, sagala ugas-ugasni na maharga.
- ¹⁶ Maningon manaron do Samaria halani salahni, ai manlawan do ia dampak Naibata. Rasei do sidea bahenon ni podang, hona ropukan na etek-etek ni sidea, anjaha ibolahi boltok ni na boratan rumah.”

Ojur-ojur Bani Hamubahon ni Uhur

14 ¹ Sai mulak ma, ale Israel hubani Jahowa Naibatamu, ai targompang pe ho, halani salahmu do.

² Boan hanima ma hata sihatahononnima anjaha mulak ma bani Jahowa! Hatahon hanima

- ma hu Bani, “Sasap Ham ma haganup hajahatonnami, anjaha bahen Ham ma na madear bennami, ase iboan hanami galangan Bamu, ai ma buah ni bibirnami.
- ³ Sedo Assur sipangurupi bennami, seng be ra hanami mangajak huda; seng be ra hanami mangkatahon bani jadi-jadian ni tangannami: Ham Naibatanami! Bamu do dapotan idop ni uhur na tading maetek.”
- ⁴ “Pamalumon-Ku do parbalikon ni sidea. Sihol do Ahu mangkaholongi sidea, tongon, domma surut ringis-Ku humbani sidea.
- ⁵ Songon namur do Ahu bani Israel; marbunga do ia songon silundat, anjaha marurat songon hayu na i Libanon.
- ⁶ Mangerbang do dangkahni; hajengesonni songon hayu Jetun, anjaha hamisbouonni songon Libanon.
- ⁷ Sai mulak do sidea, anjaha marianan i toruh ni linggom-Hu, gabe songon pohon do sidea, marbunga songon hayu anggur, anjaha tarbarita songon anggur na hun Libanon.
- ⁸ Ale Efraim, bahen aha be bam gana-gana in? Ahu do na manangihon ampa na manatap ho; Ahu do songon hayu bolon, Ahu do harohan ni buahmu.
- ⁹ Barang ise na maruhur, iparuhurhon ma in! Barang ise na marpangidah, ididah ma in!

Tongon, pintor do dalan ni Jahowa anjaha halak parpintor mardalan ijai, tapi anggo halak parjahat tompas do ijai.”

Joel

Sitaronon Halani Balang Martuduh-tuduh bani Ari ni Tuhan

- 1** ¹ Hata ni Jahowa na roh hubani si Joel, anak ni si Petuel.
- ² Tangihon ma on, nasiam na matua, anjaha pardiateihon ma, nasiam ganup pangisi ni tanoh on! Ongga ma sonon masa bani ari nasiam, atap bani ari ni ompung nasiam?
- ³ Baritahon nasiam ma pasal in hubani anak nasiam, anak nasiam hubani anak ni sidea, anjaha anak ni sidea use hubani sundut na i pudini.
- ⁴ Aha na tinebahon ni tatadu igagat balang, aha na tinebahon ni balang igagat tamponok, anjaha aha na tinebahon ni tamponok igagat hirik.
- ⁵ Puho ma nasiam parmabuk, anjaha tangis ma; mandoraki ma nasiam ganup sisobur anggur, marhalanohon anggur na mantin, ai domma irotap in humbani pamangan nasiam.
- ⁶ Ai domma tangkog dompak tanoh-Ku sada bangsa na gogoh anjaha na so tarhira

bueini; iponni songon ipon ni singa, anjaha
saitni songon sait ni singa boru-boru.

- ⁷ Domma iparseda hayu anggur-Hu, anjaha
ituhtuhi hayu arang-Ku; domma iorlak
anjaha ipanrumbakkon, domma lopak
sagala rantingni.
- ⁸ Tangis ma songon boru laho, na marhiou guni
halani tunangan bani haposoonni.
- ⁹ Domma irotap galangan sipanganon pakon
galangan siinumon humbani rumah ni
Jahowa; marhoru do sagala malim, juakjuak
ni Jahowa.
- ¹⁰ Domma seda juma, marhoru tanoh, halani
seda omei, horah bah ni anggur anjaha
melus hayu Jetun.
- ¹¹ Rusak parjuma-juma, mandoraki parpohon
anggur halani gandum pakon bajaurei; ai
magou do partahunan.
- ¹² Domma melus hayu anggur, anjaha ranggasan
hayu ara; age dalima, kurma, untei ampa
ganup hayu na i talun domma melus;
domma mandaoh homa malas ni uhur
humbani anak ni jolma.

Ojur-ojur Paundukkon Uhur bani Naibata

- ¹³ Margondit anjaha tangis ma nasiam alo
sagala malim; mandoraki ma nasiam,
nasiam siparugas bani anjapanjap! Roh

ma marborngin, marsabing hiou guni ma nasiam alo juakjuak ni Naibatanku! Ai domma irotap galangan sipanganon pakon galangan siinumon hun rumah ni Naibata nasiam.

¹⁴ Papansing ma sada ari parpuasaon, tingtingkon ma sada ari partumpuan na majombut! Patumpu ma na matua-matua pakon haganup pangisi ni nagori on hu rumah ni Jahowa, Naibata nasiam; anjaha mandoruh ma nasiam bani Jahowa.

¹⁵ Aih, sonaha ma bani ari ai! Ai domma dohor ari ni Jahowa, anjaha songon hasedaon humbani Pargogoh Na So Tarimbang parrohni ai.

¹⁶ Ai lang domma irotap sipanganon hun lobei ni matanta, malas ni uhur ampa olob-olob hun rumah ni Naibatanta?

¹⁷ Domma masik bonih i toruh ni olbakni, domma halong rumah parugasan, mareong tuangan, halani masak omei.

¹⁸ Aih, pangarou ni pinahan in! Humationg do hulanan ni lombu, halani seng dong panggagatan bani sidea; sonai homa hulanan ni biribiri holte-holtean do.

¹⁹ Hu Bamu do ahu, ale Jahowa dilo-dilo. Ai domma bois ipangan apuy sampalan na i

halimisan, anjaha mosog sagala hayu na i talun ibahen gajag ni apuy.

- ²⁰ Sonai homa binatang harangan dilo-dilo do hu Bamu, ai domma horah sagala bah, anjaha domma bois ipangan apuy sampalan na i halimisan.

Domma Lambin Dohor Ari Uhum Banggal

- 2** ¹ Sompul nasiam ma tarompit i Sion, anjaha mardilo-dilo ma nasiam i atas dolog hapansingon-Ku! Hitir ma ganup pangisi ni tanoh on, ai na roh ma ari ni Jahowa, ai domma dohor.
- ² Sada ari na golap marimpot-impot, sada ari na marhombun pakon turun sabun. Songon simarikkuning sogod merap ma i atas dolog in sada bangsa na banggal anjaha na gogoh; seng onggga ope masa sisonin humbani na basaia, anjaha dob ai pe seng dong be masa torus marsundut-sundut.
- ³ Apuy na mangankon i lobeini, anjaha dilah ni apuy na gara i pudini. Songon pohon Eden do tanoh in i lobeini, tapi gabe halimisan na lungun i pudini, anjaha seng dong na maluah humbani sidea.
- ⁴ Songon rumang ni huda do rumang ni sidea, anjaha songon huda porang paranjak ni sidea.

- ⁵ Songon pardorom ni garet a porang panlumpat ni sidea i atas dolog, songon sora ni gajag ni apuy na mangankon anggala, songon bangsa na gogoh, na gopas marsinjata hu hamunsuhon.
- ⁶ Gobir do sagala bangsa i lobeini, marposi bei ganup bohi.
- ⁷ Marlinton sidea songon puanglima, songon parmunsuh manangkihi tembok. Ganup sidea marsitohu dalanni, anjaha seng manlembang sidea humbani dalam ni sidea bei.
- ⁸ Seng marsisosak-sosakan sidea, marsitohu dalanni bei do, iusung sidea do sinjata, seng marnarotap odoran ni sidea.
- ⁹ Marhujai-hujon do sidea ibagas huta, marlintuni i atas tembok; ipanangkihi sidea rumah-rumah, masuk hun jandela songon panangko.
- ¹⁰ Dugur do tanoh on i lobei ni sidea, langit mangkutur, manggolapi do mata ni ari pakon bulan, anjaha bintang-bintang manjolomi sinalsalni.
- ¹¹ Jadi ipamaling Jahowa ma sora-Ni i lobei ni bala-Ni; buei tumang do bala-Ni, margogoh tumang do la pasaudkon hata-Ni. Ai bangga do ari ni Jahowa anjaha majangin tumang, ise ma na tolak manahan ai?

Tingting Mangkatahon Paubahkon Uhur

- ¹² Tapi sonari pe nini Jahowa do, “Sai mulak ma nasiam hu Bangku humbani gok ni uhur nasiam marhitei parpuasaon, marhitei partangison pakon marhitei doruh-doruh;
- ¹³ anjaha rigati nasiam ma uhur nasiam, ulang hiou nasiam.” Mulak ma nasiam bani Jahowa, Naibata nasiam, ai pardear layak anjaha paridop uhur do la, parlumbang ni uhur anjaha parholong atei bangga, anjaha marpangulaki do uhur-Ni mangidah hamagouan.
- ¹⁴ Ise mambotoh atap mulak anjaha isolsoli uhurni, anjaha itebai sada pasu-pasu i pudini bahen galangan sipanganon pakon siinumon bani Jahowa, Naibata nasiam.
- ¹⁵ Sompul ma tarompit i Sion, papansing ma sada parpuasaon, tingtingkon ma sada partumpuan na majombut.
- ¹⁶ Patumpu ma bangsa in, papansing kuria in; pahumpul ma na matua-matua, patumpu dakdanak pakon na inumon; kaluar ma siparunjuk hun iananni, pakon tunangan hun kamarni.
- ¹⁷ Tangis-tangis ma i holangkolang ni surambih ampa anjapanjap malim pakon juakjuak ni Jahowa anjaha ihatahon sidea ma, “Ramoti

ham ma bangsamu ale Jahowa, anjaha ulang ma ondskon bangsa na tinean-Mu gabe sirisaon, gabe umpama ni bangsa sipajuh begu-begu.” Mase ma ihata-hatahon halak i tengah-tengah ni sagala bangsa, “Ija do Naibata ni sidea in?”

Marpangulaki do Uhur ni Jahowa bani Bangsa-Ni

- ¹⁸ Jadi marsimburu ma Jahowa mangkopkop tanoh-Ni, anjaha marpangulaki uhur-Ni mangidah bangsa-Ni.
- ¹⁹ Dob ai nini Jahowa ma mambalosi bangsa-Ni, “Torih ma, tongoson-Ku ma bani nasiam gandum, anggur pakon minak ase bosur nasiam, anjaha seng be bahenon-Ku nasiam sirisaon i tengah-tengah ni sagala bangsa.
- ²⁰ Padaohon-Ku do humbani nasiam munsuh na hun utara, anjaha usiron-Ku do ia hu sada tanoh na horah anjaha na lungun, odoran parpudi hu laut parhasundutan, odoran parlobei hu laut parhapoltakan, maningon masuk anjaha marbau ia halani pambahenan hagijangonni.
- ²¹ Ulang ma mabiar ho ale tanoh, marolob-olob anjaha marmalas ni uhur ma ho, ai banggal do pambahenan ni Jahowa.
- ²² Ulang ma mabiar hanima, ale pinahan na i talun, halani martumbor ma use

parmahanan na i halimisan, marbuah ma use hayu, anjaha bereon ni hayu ara pakon hayu anggur ma use gogoh ni sidea.

- ²³ Nasiam anak ni Sion, marolob-olob anjaha marmalas ni uhur ma nasiam ibagas Jahowa, Naibata nasiam; ai ibere do bani nasiam guru bahen hapintoron nasiam, iparoh do udan na doras bani nasiam, udan partidahonkon ampa udan parpariamaonkon songon sapari.
- ²⁴ Jadi junjun ma omei i pardogeian, anjaha sampur ma anggur pakon minak hun pangilangan.
- ²⁵ Pasuangon-Ku ma bani nasiam partahunan na ginagat ni balang, tamponok pakon hirik, tentarang-Ku na buei in, na Hupabingkat dompak nasiam.
- ²⁶ Anjaha bosuran ma nasiam mangan, anjaha pujion nasiam ma goran ni Jahowa, Naibata nasiam, na mambahen halongangan i tongah-tongah nasiam; seng be bador bangsang-Ku sadokah ni dokahni.
- ²⁷ Botohon nasiam ma, na i tongah-tongah ni Israel do Ahu, anjaha Ahu do Jahowa, Naibata nasiam seng dong na legan; anjaha seng be marhabadoron bangsang-Ku sadokah ni dokahni.”

²⁸ [[EMPTY]]

29 [[EMPTY]]

30 [[EMPTY]]

31 [[EMPTY]]

32 [[EMPTY]]

Uhum bani Bangsa Sipajuh Begu-begu i Pamah Josapat

- 3** ¹ “Ai tonggor ma, bani ari ai pakon bani panorang ai, anggo mulak Hubobahon ma na tarbuang hun Juda pakon Jerusalem,
- ² patumpuon-Ku ma haganup bangsa parbegu anjaha patuadon-Ku ma sidea hu habungan Josapat, jadi uhumon-Ku ma sidea ijai, halani bangsang-Ku pakon tean-teanan-Ku Israel, na nierap ni sidea hu tongah-tongah ni bangsa sipajuh begu-begu, anjaha na binagini ai tanoh-Ku,
- ³ halani marsijomput na sinurat sidea pasal bangsang-Ku, ibere sada dakdanak dalahi libei ni sada boru jalang, anjaha ijual sada dakdanak naboru libei ni anggur, anjaha isobur ma ai. (Nah. 3:10)
- ⁴ Anjaha hanima pe, ale Tirus, Sidon ronsi haganup jajahan ni Pilistea, ahanima do Ahu? Sihol dong paulakonnima hu Bangku, atap sihol dong balaskononnima hu Bangku? Podas anjaha barah ma balaskonon-Ku pambahenannima hubani ulunima.

- ⁵ Ai ibuat hanima do pirak pakon omas-Ku, anjaha iboan hanima arta hasudungan ni uhur-Hu hubagas rumah panumbahannima.
- ⁶ Ijual hanima do anak ni Juda pakon Jerusalem hubani halak Gorik laho paganggangkon sidea daoh hun tanoh ni sidea.
- ⁷ Torih ma, parohon-Ku ma sidea hun tanoh panjualannima bani sidea anjaha balaskonon-Ku ma pambahenannima hubani ulunima.
- ⁸ Jualon-Ku ma anaknima pakon borunima hu tangan ni halak Juda, anjaha sidea manjual ai hubani halak Seba, hubani sada bangsa na daoh;" ai Jahowa do na mangkatahon ai.

Pasu-pasu ni Jahowa bani Bangsa-Ni

- ⁹ "Tingtingkon nasiam ma in i tongah-tongah ni bangsa sipajuh begu-begu. Marugas ma nasiam hu parporangan, puhoi nasiam ma sagala puanglima, roh ma marporang sagala dalahi siparporang.
- ¹⁰ Patopahon nasiam ma hudali nasiam bahen podang, ampa sasabi nasiam bahen tanja; hatahonon ni na galek in ma, 'Puanglima do ahu.'
- ¹¹ Papodas anjaha roh ma nasiam sagala bangsa na inggot, martumpu ma nasiam

hujai.” Ham ale Jahowa, patuad ma hujai puanglima.

- 12 “Misir anjaha tangkog ma sagala sipajuh begu-begu hu pamah Josapat, ai ijai do sihol marparatas Ahu laho manguhum sagala bangsa sipajuh begu-begu na inggot in. (ay. 2)
- 13 Sabihon ma sasabi in, ai domma toras sisabion. Roh ma nasiam manluntak, ai domma gok pangilangan. Domma sampur homa sagala tong, ai buei do hajahaton ni sidea.
- 14 Marhulan-hulan sidea i habungan pamutusan; ai dohor ma ari ni Jahowa i pamah pamutusan.
- 15 Manggolapi do mata ni ari pakon bulan, anjaha ijolomi sagala bintang do sinalsalni.”
- 16 Morom ma Jahowa hun Sion, anjaha ipagogoh sora-Ni hun Jerusalem, gabe dugur ma langit pakon tanoh on. Tapi Jahowa do haporusan bani bangsa-Ni ampa batar-batar bani halak Israel.
- 17 “Gabe tandaon nasiam ma, Ahu do Jahowa, Naibata nasiam, na marianan i Sion, dolog hapansingon-Kin. Gabe pansing ma Jerusalem, anjaha seng bontason ni halak na legan be in.
- 18 Bani ari ai manekteki ma anggur hun sagala dolog, mabaor dadih hun buntu-buntu,

anjaha mardalan bah humbani sagala bah ni Juda. Kaluar ma sada bah tubuh hun rumah ni Jahowa mangarbahi habungan Sittim.

¹⁹ Gabe tanoh dorging ma Masir anjaha gabe halimisan na lungun Edom halani hajahaton na binahen ni sidea hubani halak Juda, na manduruskon daroh ni na so marpipot i tanoh ni sidea.

²⁰ Tapi siianonkon do Juda ronsi sadokah ni dokahni, anjaha Jerusalem marsundut-sundut.

²¹ Anjaha balaskonon-Ku do daroh ni sidea, na so Hubalaskon ope. Jadi marianan ma Jahowa i Sion.”

Amos

Uhum ni Naibata bani Bangsa-bangsa, Sonai Homa bani Juda ampa Israel

1 ¹ Hata ni si Amos, sada halak humbani parmahan na hun Tekoa, ai ma na nididahni pasal Israel bani panorang ni si Usia, raja ni Juda, ampa bani panorang ni si Jerobeam, anak ni si Joas, raja ni Israel, dua tahun i lobei ni lalou ai.

² Jadi nini ma, “Martaur do Jahowa hun Sion, anjaha ipagogoh sora-Ni hun Jerusalem. Jadi marhoru ma sampalan ni parmahan, anjaha melus ma pakpak ni Karmel.”

³ Sonon do hata ni Jahowa, “Halani na tolu panlanggaron ni Damaskus ampa halani na ompat ai seng pasuruton-Ku uhum ai, halani na dob idogei sidea Gilead marhitei pambogbog bosi ni omei.

⁴ Halani ai tongoskonon-Ku ma apuy hubani rumah ni si Hasael, anjaha siapkononni ma benteng-benteng ni si Benhadad.

⁵ Ropukan-Ku ma pating-pating ni Damaskus, anjaha siapkonon-Ku pangisi ni Bikat-Awen ampa sijolom tungkot harajaon na hun

Bet-Eden; anjaha halak Aram tarbuang hu Kir," nini Jahowa.

- ⁶ Sonon do hata ni Jahowa, "Halani na tolu panlanggaron ni Gasa ampa halani na ompat ai seng pasuruton-Ku uhum ai, ai ibuangkon sidea do hibul pangisi ni sada nagori, iondoskon hu Edom.
- ⁷ Halani ai tongoson-Ku do apuy bani tembok ni Gasa, anjaha siapkononni ma benteng-bentengni.
- ⁸ Anjaha siapkonon-Ku ma pangisi ni Asdod ampa sijolom tungkot harajaon hun Askalon, patoltolon-Ku ma tangan-Ku dompak Ekron, anjaha magou ma simasima ni Palistim," nini Tuhan Jahowa.
- ⁹ Sonon do hata ni Jahowa, "Halani na tolu panlanggaron ni Tirus ampa halani na ompat ai seng pasuruton-Ku uhum ai, ai iondoskon sidea do hibul pangisi ni sada nagori hu Edom, anjaha seng idingat padan parsaninaon.
- ¹⁰ Halani ai tongoson-Ku do apuy bani tembok ni Tirus, anjaha siapkononni ma benteng-bentengni."
- ¹¹ Sonon do hata ni Jahowa, "Halani na tolu panlanggaron ni Edom ampa halani na ompat ai seng pasuruton-Ku uhum ai, ai ipardakdak do saninani marhitei podang,

anjaha iintopi holongni, gabe torus marsiraki ringisni, anjaha tongtong isimpan gilani.

¹² Halani ai tongoson-Ku ma apuy hu Teman, anjaha siapkononni ma benteng-benteng ni Borsa.”

¹³ Sonon do hata ni Jahowa, “Halani na tolu panlanggaron ni halak Amon ampa halani na ompat ai seng pasuruton-Ku uhum ai, ai ilapahi sidea do na boratan rumah i Gilead, laho pabolakkon parbalogan ni sidea.

¹⁴ Halani ai pagaraon-Ku ma apuy bani tembok ni Rabba, gabe bois panganonni benteng-bentengni marhasoman surak-surak bani mata ni parporangan, marhasoman habahaba bani panorang hamamasa ni halisungsung.

¹⁵ Anjaha raja ni sidea tarboan hu habuangan, ia rap pakon raja-raja na i toruhni,” nini Jahowa.

2 ¹ Sonon do hata ni Jahowa, “Halani na tolu panlanggaron ni Moab ampa halani na ompat ai seng pasuruton-Ku uhum ai, halani na tinutunganni ai holiholi ni raja Edom bahen hapur.

² Jadi tongoson-Ku ma apuy hubani Moab, gabe panganonni ma bois benteng-benteng ni Keriot, anjaha Moab matei ma ibagas hageoron, i tongah-tongah ni surak-surak ampa sora ni tarompit.

- ³ Anjaha siapkonon-Ku ma panrajai hun
tongah-tongahni, anjaha bunuhon-Ku ma
kopala-kopalani rap pakonsi,” nini Jahowa.
- ⁴ Sonon do hata ni Jahowa, “Halani na tolu
panlanggaron ni Juda ampa halani na
ompat ai seng pasuruton-Ku uhum ai, ai
iambungkon sidea do titah ni Jahowa,
anjaha seng idalankon aturan-Ni, tapi
sisombahon parladung ni sidea ai do
pakahouhon sidea, ai ma na niirikkon ni
ompung ni sidea homa;
- ⁵ halani ai tongoson-Ku do apuy hubani Juda,
gabe panganonni ma bois benteng-benteng
ni Jerusalem.”
- ⁶ Sonon do hata ni Jahowa, “Halani na tolu
panlanggaron ni Israel ampa halani na
ompat ai seng pasuruton-Ku uhum ai, ai
ijualhon sidea do parpintor marhalanihon
pirak, ampa halak na miskin marhalanihon
sipatu sapasang.
- ⁷ Idogei-dogei sidea do ulu ni halak na maetek
ibagas orbuk ni tanoh, anjaha iusir do halak
na masombuh. Rap laho do anak ampa
bapani marayak boru jalang, gabe butak
goran-Ku na mapansing in.
- ⁸ Ipatibal sidea do dirini i lambung ni sagala
anjapanjap, i atas ni hiou gadeian, anjaha

isobur anggur ni halak na hona donda ibagas rumah ni naibata ni sidea.

- ⁹ Ahu do namin na maniapkon halak Amori i lobei ni sidea, na songon gijang ni hayu ares gijangni anjaha songon jajabi Gogohni, Ahu do parsedahon buahni i atas ampa uratni i toruh.
- ¹⁰ Ahu do homa na mangarahkon hanima luar hun tanoh Masir, anjaha Huring-iring do hanima ompat puluh tahun i halimisan, laho manean tanoh ni halak Amori.
- ¹¹ Anjaha Ahu do na pabangkitkon deba humbani anaknima gabe nabi, anjaha deba humbani parananima gabe halak Nasir. Ai lang tongon do sonai, alo nasiam halak Israel?" nini Jahowa.
- ¹² "Hape ipainumkon hanima do anggur bani halak Nasir, anjaha iparentahkon hanima bani nabi, 'Seng bulih hanima manjahai.'
- ¹³ Tonggor ma, odohkonon-Ku ma hanima bani ianannima, songon pangodohkon ni garet, na gok radean.
- ¹⁴ Seng marguna ijai halintunon bani halak na lingkat, seng tarunsagakon halak pargogoh gogohni, anjaha seng tarpaluah halak na borani hosahni;
- ¹⁵ halak parsior pe seng tahan jongjong, anjaha halak na lingkat mardalan seng tarpaluahisi

dirini, anjaha sonai homa siajak huda seng tarpaluahisi hosahni.

¹⁶ Age paruhur na pag i tongah-tongah ni halak na borani, maningon talanjang maporus bani ari ai,” nini Jahowa.

Humbani Naibata do Hata Panjahaion

3 ¹ Tangar nasiam ma hata on na hinatahon ni Jahowa pasal nasiam, alo nasiam halak Israel, pasal ganup bangsa in, na huarahkon luar hun tanoh Masir,

² “Pitah hanima do na Hutandai humbani sagala bangsa na i tanoh on, halani ai balaskonon-Ku ma bannima sagala hajahatonnima ai.

³ Mintor tumaram ma odor dua halak mardalan anggo seng parlobei mardos ni uhur sidea?

⁴ Mintor tumaram ma maraum singa ibagas harangan anggo seng dong sorohanni? Mintor tumaram ma pamalingon ni anak ni singa sorani humbagas liangni, anggo seng dong na jumpahsi?

⁵ Mintor tumaram ma madabuh manuk-manuk bani tirangkap i tanoh, anggo seng dong sigiutini? Mintor tumaram ma tolkas siding ai hun tanoh, anggo seng dong dapotsi?

⁶ Mintor tumaram ma hona sompul tarompit ibagas huta, lang gobir halak? Mintor

tumaram ma masa parmaraan ibagas huta,
na so binahen ni Jahowa?

⁷ Tongon tene, seng dong ipamasa Tuhan Jahowa,
anggo lang palobei ipatar rusia-Ni bani
nabi, juakjuak-Ni ai.

⁸ Maraum singa, ise na so mabiar? Marsahap
Tuhan Jahowa, ise ma na so manjahai?

Uhum Halani Hagedukon ni Israel

⁹ Pabogeihon nasiam ma hubani benteng-
benteng na i Assur ampa hubani
benteng-benteng na i tanoh Masir, anjaha
hatahon ma, “Martumpu ma nasiam hu
atas dolog ni Samaria, anjaha idah nasiam
ma hageoron bolon na ibagas ai, ampa
pandorunon na i tongah-tongahni.

¹⁰ Seng ibotoh sidea be mambahen na
pintor,” nini Jahowa; “Ipajunjun sidea
do panamunon ampa hagedukon ibagas
benteng-benteng ni sidea.”

¹¹ Halani ai sonon do nini Tuhan Jahowa,
“Munsuh ma manginggoti tanoh on, anjaha
patoruhonni ma humbam partahananmu,
anjaha ayobonni ma benteng-bentengmu.”

¹² Sonon do hata ni Jahowa, “Songon parpaluah
ni parmahan hun babah ni singa dua
hae-hae barang sangkibul pinggol, sonai do
paluahon halak Israel, na hundul i suhi-suhi

ni podoman ampa i atas ni tutup podoman na lambut.

¹³ Tangar anjaha saksihon hanima ma in dompak rumah ni si Jakob,” nini Tuhan Jahowa, Naibata Zebaot.

¹⁴ “Bani ari panguhum-Hu bani Israel halani hajahaton ni sidea ai, uhumon-Ku ma anjapanjap ni Betel, ponggolhonon-Ku ma ijai tanduk ni anjapanjap ai anjaha dabuh hu tanoh.

¹⁵ Parsedaon-Ku ma rumah musim borgoh ampa rumah musim milas, magou ma rumah gading, anjaha masabkonon-Ku ma rumah-rumah bolon ai,” nini Jahowa.

Lumba-lumba Dompok Naboru na Sangap i Samaria

4 ¹ “Tangar nasiam ma hata on, nasiam lembu na hun Basan, na i Dolog Samaria, na mandondon halak na musil, na mandogei-dogei halak na maetek, na mangkatahon hubani paramangonni, Boan, ase minum-minum hanami!”

² Domma marbulawan Tuhan Jahowa bani hapansingon-Ni. Tongon, tonggor ma, na roh ma ari bannima, saradon ni sidea ma hanima marhitei hait-kait anjaha simasimanima marhitei hail.

³ Jadi luar ma hanima hun bungbung ni tembok, ganup marsidompakkon dalanni bei i lobeini, anjaha saradon ma hanima hu Dolog Hermon,” nini Jahowa.

Pasal Parugamaon ni Halak Israel

⁴ “Roh ma hanima hu Betel anjaha manjahati ma; hu Gilgal anjaha tambahi ma panlanggaron. Boan ma galangan sisayatonnima ganup sogod, ampa parsapuluhannima ganup patolu-ariankon.

⁵ Tutung hanima ma galangan hatarimakasihon humbani ruti niigaran, anjaha tingtingkon hanima ma galangan niojur ni uhur, baritahon hanima ma ai. Ai lang sonai do rosuhnima sibahenonnima, alo halak Israel?” nini Tuhan Jahowa.

Paruhuron ni Israel na So Ra Mubah

⁶ “Age pe domma Hubahen seng dong sihilhilon ni ipon ibagas ganup hutanima ampa hahurangan bani ruti bani ganup ianannima, tapi lanjar seng ra hanima mulak hu Bangku,” nini Tuhan Jahowa.

⁷ “Sonai homa Hupalogou do udan hun bannima tolu bulan nari paima pariama. Hutongos do udan bani huta na sada, bani na sada nari lang, marudan do juma na sada, anjaha

juma na sada nari na so dapotan udan,
horah ma.

⁸ Jadi madou-adou ma dua barang tolu huta laho hu huta na legan laho minum bah, tapi seng sombuh horahni. Tapi, lanjar do seng ra hanima mulak hu Bangku,” nini Tuhan Jahowa.

⁹ “Domma Hulibas hanima marhitei antinganou ampa hameluson, Huparseda pohonnima ampa pohon anggurnima, anjaha hayu jambunima ampa hayu jetunnima bois igagati balang; tapi lanjar do hanima seng ra mulak hu Bangku,” nini Jahowa.

¹⁰ “Domma Huparoh sampar hu tongah-tongahnima songon na dompak Masir, Huraseihon garamanima marhitei podang, Huluahon ganup hudanima, anjaha Hupaanggohkon bau ni parsaranannima hubagas igungnima, tapi lanjar do seng mulak hanima hu Bangku,” nini Jahowa.

¹¹ “Hupamasa do hasedaon i tongah-tongahnima, songon na dob pinarseda ni Naibata Sodom pakon Gomora, gabe songon sipu-sipu na tinarik hanima humbani apuy, tapi lanjar do seng ra hanima mulak hu Bangku,” nini Jahowa.

¹² “Halani ai sonon do na sihol bahenon-Ku bannima, alo Israel! Halani sonon ma na

sihol bahenon-Ku bam, marugas ma ho manjumphakon Naibatamu, alo Israel!

¹³ Ai tonggor ma, la na manjadihon dolog, na manompa logou, na pabotohkon bani jolma aha pingkiran-Ni, na manjadihon sibalikkuning gabe hagolapan, anjaha na mardalan i atas ni buntu-buntu ni tanoh on, Jahowa, Naibata Zebaot do goran-Ni.”

Tangis-tangis Pasal Halak Israel

5 ¹ “Tangar hanima ma hata on, na Hutangiskon pasal hanima, ale ginompar ni Israel.

² Domma dabuh boru Israel, seng tarjongjongkansi be; jorgong tibal ia i tanohni, seng dong na pajongjongkansi.

³ Ai sonon do hata ni Tuhan Jahowa, ‘Huta na pabingkatkon saribu, tading hunjai saratus, na pabingkatkon saratus, tading hunjai sapuluh bani ginompar ni Israel.’”

Dalan hu Hagoluhan

⁴ Ai sonon do hata ni Jahowa bani ginompar ni Israel, “Pindahi Ahu, ase manggoluh hanima!

⁵ Tapi ulang ma pindahi Betel, anjaha ulang ma laho hu Gilgal barang mandipar hanima hu Berseba; ai maningon buangkononkon do Gilgal, anjaha gabe na lang do Betel.

- ⁶ Pindahi nasiam ma Jahowa, ase manggoluh nasiam, ase ulang idorab rumah ni si Josep marhasoman apuy, bois ipangan, anjaha sahalak pe lang adong na mangintopi i Betel.
- ⁷ E nasiam na pagolingkon uhum gabe pogu, anjaha na mangambukkon hapintonon hu tanoh!
- ⁸ Ia, sijadihon bintang pariama ampa bintang sidongdong, na paubahkon na lotir gabe sogod ni ari, na pagolapkon ari gabe borngin, na mandilo bah ni laut laho manguseihon ai hu atas tanoh, Jahowa do goran-Ni.
- ⁹ Ia do na parohkon hasedaon bani halak na gogoh, gabe sogop hasiapon bani benteng.”

Pinsang-pinsang Pasal Hajungkaton ni Israel

- ¹⁰ Ihasogamkon sidea do sidalankon uhum i horbangan, anjaha magigi sidea mangidah halak sihatahon na sintong.
- ¹¹ Halani ai, ibahen na idogei-dogei hanima halak na musil, anjaha iporoh hanima humbani sidea sibere-bere gandum, age pe ipauli hanima rumah humbani batu na binarbar seng anjai ianannima ai; sonai homa, age pe isuani hanima pohon anggur na dear-dear, seng inumonima anggurni.
- ¹² Ai Hubotoh do buei ni panlanggaronnima, ampa sonaha bangga ni dousanima

manosak halak parpintor, manjalo sisip,
anjaha mangodohkon halak na musil i
paruhuman.

- ¹³ Halani ai sip ma halak paruhur bani panorang
on; ai panorang na jahat do on.

Ojur-ojur hu Hamubahon ni Uhur

- ¹⁴ Pindahi nasiam ma na madear, ulang ma na
jahat, ase manggoluh nasiam; ase tongon
ma Jahowa, Naibata Zebaot hasoman
nasiam, songon na hinatahon nasiam.

- ¹⁵ Hagigihon nasiam ma na jahat, haholongi
nasiam ma na madear, anjaha pajongjong
nasiam ma uhum i horbangan, andohar
marpangulaki uhur ni Jahowa, Naibata
Zebaot mangidah simasima ni si Josep.

Lumba-lumba Pasal Ari ni Jahowa

- ¹⁶ Halani ai sonon do hata ni Jahowa, Naibata
Zebaot, Tuhan In, “Bani haganup alaman
masa tangis-tangis; anjaha bani haganup
dalan hatahonon ni sidea, ‘Aih, aih!’ Diloon
ni sidea do parjuma-juma laho manangisi,
ampa na pandei tangis laho manjojori.
- ¹⁷ Anjaha bani haganup pohon anggur masa
doruh-doruh, anggo montas Ahu hun
tongah-tongahnima,” nini Jahowa!

- 18 “Bursik ma hanima na mangkasiholi ari ni Jahowa! Ai aha do ari ai bannima? Hagolapan do ai, seng haliharon.
- 19 Songon sada halak na bansah humbani singa, hape roh gipul manjumpahkansi; barang masuk hu rumah anjaha itungkolhon tanganni bani dingding, hape roh ulog mamagutsi.
- 20 Ai halotiron do tongon ari ni Jahowa, sedo haliharon, hagolapon do, seng dong haliharon ibagas.”

**Gigi ni Uhur ni Naibata Mangidah
Ugama Pardarat Tumang**

- 21 “Sogam anjaha magigi do uhur-Hu mangidah ari rayanima, anjaha seng iharosuhkon uhur-Hu tumpuannima.
- 22 Age pe igalangkon hanima Bangku galangan situtungon ampa galangan sipanganon, seng marosuh Ahu bani ai, anjaha galangan pardearan humbani pinahan na pinamombur pe, seng ra Ahu mangkawahkon ai.
- 23 Padaoh hun Bangku hageoron ni dodingnima, anjaha logu ni husapinima pe seng marosuh Ahu manangar ai.

²⁴ Tapi mabaor ma bahen hanima uhum songon bah, anjaha hapintoron songon bah na totap marbanggal.

²⁵ Ai adong do iboan hanima galangan sisayaton ampa sibere-bere Bangku i halimisan sadokah siompat puluh tahun ai, ale ginompar ni Israel?

²⁶ Halani ai usungonnima ma Sakut, rajanima ai, ampa Kiwun, bintang ni naibatanimai ai, gana-gananimai, na binahennimai bannimai.

²⁷ Jadi toguon-Ku ma hanima tarbuang, daoh hu dipar ni Damaskus,” nini Jahowa, na margoran Naibata Zebaot.

Pangarapan Palsu ampa Pangkorhonni

6 ¹ Bursik ma halak na so marpanarian i Sion, ampa halak na mangahapkon aman i Dolog Samaria, ai ma halak na sangap i tongah-tongah ni bangsa sibetengan, tuan-tuan ni ginompar ni Israel.

² Mandipar ma nasiam manorih hu Kalne, dob ai laho ma nasiam hu Hamat, huta na bolon ai; dob ai tuad ma nasiam hu Gat, huta ni halak Palistim. Mintor dearan ma sidea ase harajaon on? Atap bolagan ma tanoh ni sidea ase tanoh nasiam?

³ E nasiam na mangagan daoh ari hamagouan ai, hape lambin ipadohor nasiam do tahun hasedaon ai;

- ⁴ nasiam na martibalan i atas ni podoman gading, na patordangkon diri i atas ni podoman-podomanni, na mangankon biribiri humbani hulanan ampa anak ni lombu humbani harang;
- ⁵ nasiam na mandoding-doding pairik-irik sora ni husapi ampa na padomu-domu doding songon si Daud;
- ⁶ nasiam na manginum anggur simantinan ampa na mamminaki diri marhitei minak sidearan, tapi na so mangkaruhon hasedaon ni si Josep.
- ⁷ Halani ai maningon sidea ma na parlobei tarbuang humbani na tarbuang, anjaha maronti ma surak-surak ni halak na pasonang-sonangkon dirini.

Lumba-lumba Pasal Uhum na Sihol Roh

- ⁸ Domma pala marbulawan Jahowa bani diri-Ni, nini Jahowa Naibata Zebaot do, “Magigi do Ahu mangidah gijang ni uhur ni Jakob, anjaha sogam do uhur-Hu bani benteng-bentengni, anjaha palopason-Ku ma tarulang huta ai ampa ganup pangisini.
- ⁹ Anjaha porini tading ope sapuluh halak ibagas rumah, maningon matei do sidea.
- ¹⁰ Jadi anggo dong sindohorni atap na mananomsi sihol mambuatsi, laho padaratkon holiholi ai hun

rumah ai, jadi hatahononni ma hubani halak na i kamar parbagas ni rumah ai, ‘Adong ope atap ise rapkon ho?’ Jadi hatahononni ma, ‘Ise pe lang!’ Tapi hatahononni ma, ‘Sip! Seng bulih diloon goran ni Jahowa.’

¹¹ Ai tonggor ma, Jahowa do na mamarentahkon, gabe iropuki halak rumah na bolon, anjaha itahai rumah na etek-etek.

¹² Mintor mardingkal ma huda i atas dolog batu, barang adong ma na maninggala laut marhitei lombu? Tapi ipaubah hanima do hasintongan gabe rasun ampa buah ni hapintoron gabe pogu.

¹³ Hanima na mangkamalaskon Lodebar, na mangkatahon, ‘Ai lang domma italuhon hita banta Karnaim marhitei gogohta?’

¹⁴ Tonggor ma, puhoan-Ku ma sada bangsa ase iimbang hanima, alo ginompar ni Israel,” nini Jahowa, Naibata Zebaot, “jadi sosakonni ma hanima olat ni dalan laho hu Hamat das hu bah na i Araba.”

Panonggoran na Parlobei: Balang

7 ¹ Sonon do ipataridahkon Tuhan Jahowa bangku, “Tonggor ma, manjadihon balang do la bani mulani martumbor poyon-poyon, anjaha tonggor ma, sagak ni panabian ni raja in do ai.”

² Jadi dob bois igagati suan-suanan ni tanoh ai, ningku ma, “Ham Tuhan Jahowa, marpangulaki ma uhur-Mu! Sonaha ma partahan ni Jakob jongjong? Etek tumang do ia.”

³ Jadi marpangulaki ma uhur ni Jahowa pasal ai. “Seng pala saud be in,” nini Jahowa.

Panonggoran na Paduahon: Apuy na Mangankon

⁴ Sonon do ipataridahkon Jahowa bangku: Tonggor ma, idilo Tuhan Jahowa do apuy laho manguhum, domma pala iboiskon luhung bagas ai, anjaha ipangan homa tanoh ai.

⁵ Jadi ningku ma, Ham Tuhan Jahowa, “Mahua parontihon Ham ma in! Sonaha ma partahan ni Jakob jongjong! Etek tumang do ia.”

⁶ Jadi marpangulaki ma uhur ni Jahowa pasal ai. “On pe seng pala saud be,” nini Tuhan Naibata.

Panonggoran na Patoluhon

⁷ Sonon do ipataridahkon Jahowa bangku: Tonggor ma, jongjong do Tuhan in i atas ni sada tembok, manjolom batu baragu ibagas tanganni.

⁸ Dob ai nini Jahowa ma hu bangku, “Aha do na nididahmin Amos?” Ningku ma, “Sada batu baragu.” Dob ai nini Tuhan ma, “Tonggor ma, Hupagistang do batu baragu i tongah-tongah

ni bangsang-Ku, Israel. Seng marpangulaki be uhur-Hu mangidahsi.

⁹ Maningon tarulang ma paturuton tanoh dolog ni si Isak, anjaha sedaonkon rumah panumbahan ni Israel, anjaha Ahu jongjong mangimbang ginompar ni si Jerobeam marhitei podang.”

Hona Usir si Amos

¹⁰ Jadi isuruh si Amasia, malim ni Betel ma suruhanni hu bani si Jerobeam, raja ni Israel, nini ma, “Martahi-tahi do si Amos dampak ham i tongah-tongah ni ginompar ni Israel, seng tartaron tanoh in hata-hatani ganup.

¹¹ Ai sonon do nini si Amos, ‘Maningon matei si Jerobeam marhitei podang, anjaha maningon tarbuang Israel daoh hun tanohni.’”

¹² Dob ai nini si Amasia ma dampak si Amos, “E, parpanonggoran, laho ma ho, maporus hu tanoh Juda, anjaha ijai ma ho mangan ruti, anjaha ijai ma ho manjahai!

¹³ Ulang ma nunuti manjahai anggo i Betel, ai huta hapansingon ni raja in do in, anjaha rumah panumbahan harajaon.”

¹⁴ Dob ai ibalosi si Amos ma si Amasia, “Seng nabi namin ahu barang anak ni nabi, tapi parmahan do ahu anjaha sipaturei-turei hayu ara.

¹⁵ Tapi ibuat Jahowa do ahu humbani na mangalai biribiri, anjaha ihatahon Jahowa hu bangku, ‘Laho ne, manjahai dampak bangsang-Ku Israel!’

¹⁶ On pe, tangihon ma hata ni Jahowa. Nimu, ‘Ulang ho manjahai dampak Israel, anjaha ulang hatahon hatamu dampak ginompar ni si Isak.’

¹⁷ Halani ai, sonon do hata ni Jahowa, ‘Gabe boru jalang ma parinangonmu ibagas huta, anjaha anakmu pakon borumu rasei ma ibahen podang, anjaha bagion tanohmu marhitei tali sibar-sibar; anjaha ho sandiri matei i tanoh na mabutak, anjaha Israel maningon tarbuang daoh hun tanohni.’”

Panonggoran Pasal Buah na Mabei bani Anjapanjap

8 ¹ Sonon do ipataridahkon Jahowa hu bangku: Tonggor ma, sada hirang marisi buah na dob mabei.

² Dob ai nini ma, “Aha do na nididahmu Amos?” Jadi ningku ma, “Sada tapongan marisi buah na dob mabei.” Dob ai nini Jahowa ma dampak ahu, “Domma jumpah ujung ni bangsang-Ku, Israel, seng marpangulaki be uhur-Hu mangidahsi.

³ Gabe tangis-tangis ma pandoding naboru na i rumah panumbahan bani panorang ai,” nini Tuhan Jahowa, “radag ma holi bangkei

bani ganup ianan, panggijingknononkon ma ai sip-sip.”

Pinsang-pinsang Halani Pamoyaton

- ⁴ Tangar ma on, nasiam na mandogei-dogei na musil anjaha na mangodoh-odoh halak na masombuh i tanoh on,
- ⁵ na mangkatahon, “Antigan pe salpu poltak ni bulan, ase manjual omei hita? Antigan salpu homa ari Sabat, ase boi aruhononta omeita laho manjual ai, ase boi paetek-etekonta tumba anjaha panaikonta harga, anjaha boi hita mandalankon sipaoto-oto marhitei timbangan palsu,
- ⁶ ase boi bolionta halak na musil marhitei pirak ampa halak na masombuh marhitei sapaasang sipatu, sonai homa manjualhon lapung ni gandum?”

Isurahon Jahowa Mansiapkon Bangsa-Ni

- ⁷ Domma pala marbulawan Jahowa bani hamuliaon ni si Jakob, “Tongon, seng anjai halupahonon-Ku be pambahenan ni sidea ai ganup.
- ⁸ Mintor lang ma dugur tanoh on halani ai, anjaha marpusok ni uhur sagala pangisini? Mintor lang ma sampur ganupan ai songon Bah Nil

anjaha ipalindak-lindak, dob ai surut use songon Bah Masir?

- ⁹ Bani panorang ai,” nini Tuhan Jahowa,
“bahenon-Ku ma mata ni ari sundut tongah ari, anjaha manggolapi tanoh on arian.
- ¹⁰ Paubahon-Ku ma ari rayanima gabe pusok ni uhur, anjaha ganup doding-dodingnima gabe tangis-tangis. Nahkonon-Ku ma guni bani binongeinima ampa hapalpalon bani ganup ulu. Bahenon-Ku ma ai songon pusok ni uhur bani parmatei ni anak sasada, anjaha ujung ni ai songon ari na gok hapaeton.”
- ¹¹ “Tonggor ma, na roh ma arini,” nini Tuhan Jahowa, “tongoson-Ku ma lohei hu tanoh on, sedo lohei bani ruti barang horah bani bah, tapi bani hata ni Jahowa do, sihol tangaronni namin.
- ¹² Jadi madou-adou ma sidea hun laut na sada hu laut na sada nari, anjaha hun utara hu hapoltakan; mardalani sidea hujai-hujon, laho mangindahi hata ni Jahowa, tapi seng anjai jumpah sidea ai.
- ¹³ Bani ari na sada ai mandatei ma anak boru na majenges ampa anak parana halani horahan.
- ¹⁴ Sidea na marbulawan bani Asera ni Samaria, anjaha na mangkatahon, ‘Songon sintongni manggoluh naibatamu, ale Dan, anjaha

songon naibata, parlingodanmu manggoluh do, ale Barseba, maningon ragei do sidea holi, anjaha seng be tarjongjongkorsi.”

Panonggoran Pasal Uhum na Maningon Roh

- 9**¹ Huidah do Tuhan in jongjong i atas anjapanjap, jadi nini ma, “Palu ma ulu ni tiang in, ase dugur molmolan. Ropukan-Ku ma ulu ni sidea ganup, anjaha bunuhon-Ku do simasima ni sidea marhitei podang, sada pe lang humbani sidea na maluah, sada pe lang humbani sidea na maporus, na boi pabansah dirini.
- ² Porini pe manrutas sidea das hu nagori toruh, alopon ni tangan-Ku do sidea hunjai; anjaha porini pe manangkih sidea das hu nagori atas, paturunon-Ku do sidea hunjai.
- ³ Porini pe marponop sidea i pakpak ni Karmel, pindahan-Ku do sidea hujai, anjaha boanon-Ku sidea mulak hunjai; porini pe marponop sidea hun lobei-Hu ibagas luhung ni laut, parentahkonon-Ku do ijai naga mangkarat sidea.
- ⁴ Porini pe laho sidea hu habungan i lobei ni munsuh ni sidea, parentahkonon-Ku do ijai podang mamunuhi sidea, anjaha dompakkonon-Ku do matang-Ku bani sidea laho mangagou, seng laho padearhon.”

- ⁵ Tuhan Naibata Zebaot na manjamah tanoh on gabe malala, anjaha marhoru ganup pangisini, gabe sampur songon Bah Nil ganup tanoh in, anjaha surut use songon Bah Masir;
- ⁶ Ia na paulihon kamar pardatasni i nagori atas anjaha na pajongjongkon langit-langitni i atas tanoh on, ia na mandilo bah ni laut, anjaha iuseihon use hu atas tanoh on, Jahowa do Goran-Ni.

Parpapitah ampa Haluahon

- ⁷ “Ai lang songon halak Etiopia do hanima Bangku, ale halak Israel?” nini Jahowa. “Ai lang Ahu do na mangarahkon halak Israel luar hun tanoh Masir, anjaha halak Palistim hun Kaptor, anjaha halak Aram hun Kir?”
- ⁸ Tonggor ma, sai kawah do mata ni Tuhan Jahowa mangimbang harajaon sipardousa in, anjaha siapkonon-Ku do in hun datas tanoh on; tapi seng siap tumang bahenon-Ku anggo ginompar ni si Jakob,” nini Jahowa.
- ⁹ “Tonggor ma, Ahu mamarentahkon anjaha manogu ginompar ni Israel i tongah-tongah ni ganup bangsa, songon halak na marsege marhitei anduri, tapi sangkamata pe lang dong na porngis maperper hu tanoh.

- 10 Maningon matei do marhitei podang sagala pardousa hun tongah-tongah ni bangsang-Ku, sagala na mangkatahon, 'Seng tumaram das barang mangonai banta hamagouan ai.'
- 11 Bani ari ai pajongjongon-Ku ma use lampolampo ni si Daud na dob mareong in, paulion-Ku ma tembokni na mangkabungbung, anjaha umbanon-Ku sagala na mangkareong, paulion-Ku do use usih songon na bani mula-mulani, ase sidea manean simasima ni Edom
- 12 ampa haganup bangsa na targoran bani goran-Ku," nini Jahowa, na mandalankon sonai.
- 13 "Tonggor ma, na roh ma arini," nini Jahowa, "marsijaloan ma paninggala pakon siparpariama, parkilang pakon sipanuan, mantektekkan anggur sagala dolog, anjaha linir dolog-dolog ganupan.
- 14 Pasuangon-Ku ma use hadearon ni bangsang-Ku halak Israel, ase ipauli use huta na dob maseda ai lanjar iiiani, ase ipungkah use pohon anggur lanjar inumonni anggurni, anjaha ibahen jumanii lanjar daionni gogohni.
- 15 Suankonon-Ku ma sidea i tanoh ni sidea, anjaha seng be orbaton-Ku sidea hun tanoh

ni sidea, na dob hubere bani sidea,” nini
Jahowa, Naibatamu.

Obaja

Uhum bani Edom Halani Hajungkatonni Dompok Israel

(Pausih Jer. 49:7-22)

- 1** ¹ Panonggoran ni si Obaja. Sonon do hata ni Tuhan Jahowa pasal Edom, domma ibogei hanami sada barita humbani Jahowa, anjaha domma isuruh sada utusan hu tongah-tongah ni bangsa-bangsa, eta, bingkat ma hita marmunsuh dompaksi.
- ² “Tonggor ma, paetekon-Ku ma ho i tongah-tongah ni bangsa-bangsa, mahiri tumang ma ho.
- ³ Gijang ni uhur do na paoto-otohon ho, ho na marianan ibagas liang ni batu, na gijang pariananmu, ho na mangkatahon ibagas uhurmu, ‘Ise ma na boi manjombahon ahu hu tanoh?’
- ⁴ Age pe gijang ho mayap-ayap songon haluhuy, anjaha asarmu ibahen ho i holangkolang ni bintang, sai dabuhonon-Ku do ho hunjai,” nini Jahowa.
- ⁵ “Anggo roh panangko bam, barang sipanrampok borngin-borngin tontu siap ma ho! Ai lang

- ansa na sungkup bani sidea do tangkoonni?
Anggo roh sitangko anggur marayak ho, ai
lang tading ope turiang bahenon ni sidea?
- ⁶ Tapi sonaha do in parsursar ni Esau, hona
sungkapan do arta ponopanni!
- ⁷ Das hu parbalogan ijuar-juar ganup halak
sisapanriahanmu do ho, ioto-otoi anjaha
ipatuduk hasomanmu do ho, hasoman
hatengeran ni uhurmu do manaon tirangkap
bam. Seng dong pangarusion bani.
- ⁸ Nai ma, bani ari ai," nini Jahowa, "siapkonon-Ku
ma halak na pentar hun Edom ampa
pangarusion hun dolog ni si Esau.
- ⁹ Bajoraon ma puanglimamu ale Teman, ase bois
ganup hona bunuh dalahi hun dolog ni si
Esau.
- ¹⁰ Halani hajahatonmu bani anggimu si Jakob,
maningon rungkubon ni habadoron ma ho,
anjaha siapkononkon ho ronsi sadokah ni
dokahni.
- ¹¹ Ijia, sanggah na jongjong ai ho dohor hujai,
sanggah na itangkapi halak na legan ai
balani, anjaha imasuki parnagori na legan
ai horbanganni, anjaha mandabuh ruji-ruji
sidea pasal Jerusalem, dihut do ho ijai sada
humbani sidea ai.
- ¹² Tapi seng patut namin marpuas-puas ho pasal
ari ni anggimu bani ari hamagouanni; seng

patut namin marmalas ni uhur ho mangidah halak Juda bani parbois ni sidea, anjaha seng patut namin mangoga-oga ho bani ari hasosakan ni sidea.

¹³ Seng patut namin masukanmu horbangan ni bangsang-Ku bani ari parbois ni sidea; seng patut namin marpuas-puas ho bani ari hamagouanni; anjaha seng bulih namin padurduronmu tanganmu mambuat ugas-ugasni bani ari parsiapni.

¹⁴ Seng bulih namin jongjong ho bani sirpang ni dalan, laho manraseihon na maporus humbani sidea; seng bulih namin tahihononmu sagala na maluah humbani sidea bani ari hasosakanni.

¹⁵ Dohor mando ari ni Jahowa bani ganup bangsa-bangsa. Songon na dob binahenmu, sonai ma bahenon-Ku bam, mulak bani ulumu ma pambahenanmai.

¹⁶ Ai songon parminumnia i atas dolog hapansingon-Ku, sonai ma bangsa-bangsa inggot minum, minum ma tongon sidea anjaha munjei-unjei; anjaha adong pe sidea, hira na so adong hinan do.

Bagah-bagah Pasal Haluahon ni Sion

¹⁷ Tapi anggo i atas ni Dolog Sion, adong do holi haluahon anjaha gabe pansing do ai,

anjaha teanon ni ginompar ni si Jakob do use parbagianan ni sidea ai.

- ¹⁸ Dob ai gabe apuy ma ginompar ni si Jakob, anjaha gabe dilah ni apuy ginompar ni si Josep, tapi gabe anggala ma ginompar ni si Esau; jadi nahitan ni sidea ma ai anjaha monsongkononni, anjaha seng dong be simasima ni ginompar ni si Esau, ai Jahowa do mangkatahon ai.
- ¹⁹ Jadi teanon ni sidea ma tanoh dangsina, ai ma dolog ni si Esau ampa pamah ni halak Palistim; teanon ni sidea do homa tanoh ni Efraim ampa tanoh ni Samaria; tapi si Benjamin do manean Gilead.
- ²⁰ Anjaha na tarbuang humbani halak Israel do manean tanoh ni halak Kanaan das hu Sarpas, anjaha halak na tarbuang hun Jerusalem, na marianan i Separat, sidea do manean huta na i tanoh dangsina.
- ²¹ Anjaha tangkog ma sipaluah hu Dolog Sion, laho manguhum dolog ni si Esau, jadi ondos bani Jahowa ma harajaon ai.

Jona

Pandiloon bani si Jona ampa Parporusni

1 ¹ Dob ai roh ma hata ni Jahowa hubani si Jona, anak ni si Amitai, nini,

² “Bingkat ma ho laho hu Ninive, huta na banggal ai, anjaha martingting ma ho dampak huta ai; ai domma das Bangku pasal hajahaton ni sidea.”

³ Jadi bingkat ma si Jona laho maporus hu Tarsis hun lobei ni Jahowa. Tuad ma ia hu Joppe, anjaha jumpahsi ma ijai kapal na sihol laho hu Tarsis, igalar ma ongkosni, dob ai masuk ma ia hubagas, laho marlayar pakon sidea hu Tarsis, maporus hun lobei ni Jahowa.

⁴ Tapi iparoh Jahowa ma logou na gogoh hu laut ai, gabe margilumbang ampa marampilaos ma laut ai, gabe laho-laho maripuk ma kapal ai.

⁵ Jadi mabiar ma parkapal ai, anjaha ganup ma marsidilo naibatani bei; ipanggijigkon sidea ma parugas-parugas na adong i kapal ai hubagas laut laho pahampungkon namin. Tapi anggo si Jona domma tuad hu kamar partoruh ni kapal, domma ipapodom bani anjaha sinok tumang.

⁶ Dob ai roh ma kapiten ni kapal ai bani, nini ma dampaksi, “Aha do na masa bam, ase

modom-modom ho? Puho ho, dilo Naibatamu, andohar marulak-ulakan uhur-Ni mangidah hita, ase ulang magou hita.”

⁷ Dob ai nini sidea ma samah sidea, “Baen, marruji-ruji ma hita ase ibotoh hita atap halani ise do ase sogop parmaraan on banta.” Jadi marruji-ruji ma sidea, gabe hona ma si Jona.

⁸ Dob ai nini sidea ma hu bani, “Patugah ma bennami, ise do siparsalah ase sogop parmaraan on banta? Aha do horjamu? Roh hunja do ho? Partanoh ja do ho? Anjaha halak aha do ho?”

⁹ Jadi nini ma dompak sidea, “Halak Heber do ahu, anjaha Jahowa sitompa langit do huhabiari, la do sitompa laut ampa darat.”

¹⁰ Mabiari tumang ma halak ai, jadi nini sidea ma dompaksi, “Ai aha adong ibahen ham?” Ai ibotoh halak ai ma, na maporus do hape ia hun lobei ni Jahowa, humbani na dob pinatugahni ai.

¹¹ Nini sidea ma hu bani, “Aha ma sibahenonnami bamu, ase minop laut in i lobeita?” Ai lambin parahni do laut ai.

¹² Nini ma dompak sidea, “Angkat nasiam ma ahu lanjar gijigkon nasiam hubagas laut in, ase minop laut in i lobei nasiam. Ai hubotoh, halani ahu do ase roh logou na parah on bani nasiam.”

¹³ Dob ai igogohkon halak ai ma namin manlugahon kapal ai hu pasir, tapi seng tolapi; ai lambin jobuni do laut ai dompak sidea.

¹⁴ Jadi dilo-dilo ma sidea dompak Jahowa, nini ma, “Ale Jahowa, ulang ma lopas Ham hanami magou halani hosah ni halak on, anjaha ulang ma marsapata bahen Ham bennami daroh na so marpipot, ai ibahen Ham do ale Jahowa, domu hubani harosuh ni uhur-Mu.”

¹⁵ Dob ai iangkat sidea ma si Jona lanjar igijigkon hubagas laut ai. Jadi soh ma laut ai humbani na gunsang ai.

¹⁶ Jadi mabiar tumang ma halak ai mangidah Jahowa; manggalang ma sidea bani Jahowa, anjaha marbagah-bagah bei Bani.

¹⁷ (2-1) Dob ai iparoh Jahowa ma sada dengke na banggal laho mamondut si Jona, jadi ibagas bituha ni dengke ai ma si Jona, tolu ari tolu borngin.

Tonggo ni si Jona ampa Parluahni

2 ¹ (2-2) Dob ai martonggo ma si Jona hubani Jahowa Naibata, humbani bituha ni dengke ai,

² (2-3) nini ma, “Dilo-dilo do ahu ibagas hasosakanku hubani Jahowa, jadi ibalosi do ahu; humbani bituha ni nagori toruh do dilo-dilo ahu, itangihon Ham do sorangku.

³ (2-4) Igijigkon Ham do ahu hu na bagas, hu tongah-tongah ni laut, gabe iinggoti bah do ahu; ganup umbakmu ampa gilumbangmu mardalan i babouhu.

- ⁴ (2-5) Anggo ahu, domma huhatahon, domma pinabali ahu hun lobei ni panonggor-Mu. Sonaha ma boi ahu use mangkawah dompak rumah hapansingon-Mu?
- ⁵ (2-6) Bah do rungkub i babouhu, iinggoti bah na bagas do ahu, anjaha limut maralit-alit bani ulungku.
- ⁶ (2-7) Tuad do ahu ronsi bona ni dolog, anjaha pating-pating ni tanoh pe domma tutup i pudingku lalab. Ijia ma ipatangkog Ham goluhku humbagas godung, ale Jahowa Naibatangku.
- ⁷ (2-8) Sanggah mandatei hosahku ibagas, hudingat ma Jahowa; jadi das ma tonggongku Bamu, hu rumah hapansingon-Mu.
- ⁸ (2-9) Tapi halak na mambalosi sisombahon sisoya-soya, na manadingkon haporusanni do sidea ai.
- ⁹ (2-10) Tapi anggo ahu marhasoman sora puji-pujian do ahu manggalang Bamu, galaronku do na dob hubagakon. Bani Jahowa do haluahon.”
- ¹⁰ (2-11) Dob ai marsahap ma Jahowa hubani sengke ai; jadi iutahkon ma si Jona bani na horah.

Ambilan ni si Jona i Ninive ampa Pangkorhonni

- 3**¹ Dob ai roh ma use hata ni Jahowa paduahalihon hubani si Jona sonon,
² “Bingkat ma ho laho hu huta Ninive, huta na bolon ai, anjaha dilohon ma ijai hata sipatugahon-Ku hubam.”
- ³ Jadi bingkat ma si Jona laho hu Ninive domu hubani hata ni Jahowa. Huta na bolon tumang do Ninive ai, tolu ari mardalan bolagni.
- ⁴ Dob ai ipungkah si Jona ma mardalan ibagas huta ai parsadarian. Idilohon ma, “Ompat puluh ari nari mando, jadi marongrong ma Ninive!”
- ⁵ Jadi porsaya ma halak na i Ninive bani Naibata; itingtingkon sidea ma ase marpuasa, jadi marhiouguni bei ma sidea, humbani halak na magodang ronsi na etek-etek.
- ⁶ Dob ai das ma barita ai bani raja ni Ninive. Jongjong ma ia humbani paratasni, itanggali ma pakeianni, isorongkon ma baju guni anjaha hundul ma ia bani abuan.
- ⁷ Dob ai isuruh raja ai ma na martingting paboahon i Ninive, “Songon na pinarentahkon ni raja in ampa hasomanni na sangap-sangap: Jolma barang pinahan, lembu barang biribiri pe, seng bulih mandai atap aha pe, seng bulih manggagat, bah pe seng bulih inumonni.

⁸ Maningon marhiou guni haganup, jolma atap pinahan pe, anjaha gogoh bei dilo-dilo bani Jahowa; anjaha ganup jolma maningon mulak do humbani dalanni na bajan ai ampa humbani hagedukon na hinorjahon ni tanganni.

⁹ Ise mambotoh, andohar marpangulaki uhur ni Jahowa anjaha isolsoli diri-Ni, isalpuhon pargajag ni ringis-Ni, gabe seng magou hita.”

¹⁰ Jadi dob ididah Jahowa pambahenan ni sidea ai, ai ma na mulak ai sidea humbani dalam ni sidea na bajan ai, gabe isolsoli Naibata ma diri-Ni pasal hamagouan, na nilumbahon-Ni sibahenon-Ni bani sidea; jadi seng be saud ibahen.

Ipodahi Naibata si Jona

4 ¹ Tapi sogam do uhur ni si Jona pasal ai, jadi manringis ma ia.

² Jadi martonggo ma ia bani Jahowa, nini ma, “Ale Jahowa, ai lang on do na huhatahon sanggah i tanohku ope ahu? Halani ai do ase tarolos ahu maporus hu Tarsis, ai hubotoh do, Naibata paridop ni uhur ampa pardear layak do Ham, nanget manringis anjaha parholong atei banggal anjaha na ra manolsoli diri-Ni pasal hamagouan.

³ Ai pe ale Jahowa, buat Ham ma rahanan hosahku humbangku, ai dearan ma ahu matei humbani na manggoluh.”

⁴ Nini Jahowa ma mambalosi, “Ai patut ma manggila ho?”

⁵ Dob ai luar ma si Jona hun huta ai, jadi ipahundul ma dirini hampit hapoltakan ni huta ai. Ipauli ma bani ijai sopo-sopo anjaha hundul ma ia ijai marlinggom-linggom, paima ididah barang aha do na sihol masa bani huta ai.

⁶ Jadi iadongkon Jahowa ma sada hayu na dulas ganjang ibabou ni si Jona bahen linggom ni uluni, laho paluahkansi humbani paruhuranni na seda ai. Malas tumang do uhur ni si Jona mangidah hayu ai.

⁷ Tapi bani parnaik ni sibalikkuning patarni ai, iadongkon Jahowa ma sada gilok-gilok; iruangi ma hayu ai gabe melus ma.

⁸ Bani parpoltak ni mata ni ari iparoh Jahowa ma logou na milas hun hapoltakan. Idoit mata ni ari ai ma ulu ni si Jona pala mandatei iahap. Iparsinta uhurni ma matei, nini ma, “Dearan ma ahu matei ase manggoluh!”

⁹ Dob ai nini Jahowa ma dompak si Jona, “Ai patut ma ho manggila halani hayu in?” Nini ma mambalosi, “Patut do ahu manggila das ronsi na matei.”

¹⁰ Jadi nini Jahowa ma, “Gari ho pusok do uhurmu halani hayu in, na so hinangalutkonmu anjaha na so pinabanggal-banggalmu, tubuh ibagas saborngin anjaha magou ibagas saborngin.

¹¹ Samintolah ma Ahu, mintor lang ma idop uhur-Hu mangidah Ninive, huta na banggal in, na marisi lobih saratus dua puluh ribu jolma, na so mambotoh parleganan ni siamun barang sambilou, ambahni ai pinahan na sain bueini?”

Mika

Uhum ni Naibata bani Israel pakon Juda

1 ¹ Hata ni Jahowa, na roh bani si Mika, par Moreset ai, bani panorang ni si Jotam, si Ahas pakon si Hiskia, raja ni Juda, ai ma na niidahni pasal Samaria ampa Jerusalem.

² Tangar ma, nasiam ganup bangsa! Paruhurhon nasiam ma tanoh ampa pangisini, paboa Tuhan Jahowa do manaksihon mangimbang nasiam, Tuhan in, hun rumah hapansingon-Ni ai.

³ Tonggor ma, luar do Jahowa humbani ianan-Ni, tuad do la, mardalan i atas buntu-buntu ni tanoh on.

⁴ Malala do dolog i toruhni, anjaha mabolah habungan songon pantis i lambung apuy, songon bah madurus bani raboyon.

⁵ Halani panlanggaron ni Jakob do ganupan ai anjaha halani dousa ni Israel. Hunja do hasalahan ni Jakob? Ai lang hun Samaria do ai? Anjaha hunja do dousa ni ginompar ni Juda? Ai lang hun Jerusalem do ai?

⁶ Jadi bahenon-Ku ma Samaria gabe gugunan batu i tongah ladang, gabe pohon panuanan

ni anggur mando; gulangknon-Ku ma batuni hu habungan, anjaha patidakon-Ku onjolanni.

- ⁷ Ganup gana-ganani ropukonkon do, anjaha ganup upah parriah-riahonni mosogkonon do, anjaha ganup sisombahonni sedahonon-Ku do; ai humbani upah ni boru jalang do ai ipatumpu sidea, anjaha maningon mulak do ai gabe upah ni boru jalang.

Tangis-tangis ni Nabi ai

- ⁸ Halani ai do ase tangis anjaha doruh-doruh ahu, mardalan seng marsipatu anjaha talanjang do ahu; dokik-dokik do ahu songon baliang harangan anjaha doruh-doruh songon manuk-manuk unta,
- ⁹ ai seng hatambaran ugah ni panlonsingan ni Jahowa, anjaha torus do ai hu Juda, das hu horbangan ni bangsangku, das hu Jerusalem.
- ¹⁰ Ulang patugah nasiam ai i Gat, ulang tangis nasiam i Akko; i Betleapra ma nasiam margulu i abuan.
- ¹¹ Bingkat ma nasiam pangisi ni Sapir, talanjang marhahirion; borani luar ia pangisi ni Saanan. Tangis-tangis ni Bet-Ezel manlanglangi nasiam marianan ijai.

- ¹² Hitir do pangisi ni Marot paima-imahon na madear, halani domma turun hamagouan humbani Jahowa age bani horbangan ni Jerusalem.
- ¹³ Pasang nasiam ma huda bani gareta, nasiam pangisi ni Lakis; in do parmulaan ni dousa bani boru Sion, ai bamu do jumpah panlanggaron ni Israel.
- ¹⁴ Halani ai bere ma surat sirang bani Moreset-Gat. Rumah-rumah ni Aksib do gabe sipangoto-otoi bani raja ni Israel.
- ¹⁵ Ambahni ai parohon-Ku ope sipartaban bam, ale pangisi ni Maresa, das ronsi Adullam roh na sangap-sangap ni Israel.
- ¹⁶ Palpali dirimu, marsuhur ma ho halani anak haudungan ni uhurmu; pabolag palpalmu songon haluhuy, ai boanon ma sidea humbam hu habuangan.

Lumba-lumba Hamagouan

- 2** ¹ Bursik ma halak na manguhur-uhurhon hajahaton ampa na manranggi-ranggi hamagouan bani podomanni anjaha na mandalankon ai siangkonsi ari, halani ibagas tangan ni sidea kuasa.
- ² Impol uhur ni sidea bani juma, irampas ma ai; impol bani rumah, jadi ibuat sidea ma ai; bani jolma ampa parbagiananni.

- ³ Halani ai sonon do hata ni Jahowa, “Tonggor ma, Ahu pe domma Hupingkir-pingkir hamagouan dompak bangsa on; seng tumaram maluah borgoknima hunjai, anjaha seng be padirgk-dirgak ulu hanima mardalan, ai panorang hamagouan do ai.
- ⁴ Bani ari ai doding-dodingkonon ni halak ma pasal hanima, anjaha tangis-tangiskononni ma, nini, ‘Domma siap botul hanami; iparbagi do parbagianan ni bangsangku, ise pe lang na paulakkon ai bangku; ibagihon do jumanta bani halak sitaban hita.’”
- ⁵ Halani ai seng dong halak na hampit ho, na pagistangkon tali sibar-sibar bani tanoh sirujihononkon, bani kuria ni Jahowa.
- ⁶ “Ulang marambilani! Nini sidea bani ambilanni. Seng ambilankonon na sonai. Seng anjai mangonai bennami hadorunon si sonin.
- ⁷ Bulih ma sonai hatahononkon, alo ginompar ni Jakob? Ai na dob hurang sabar do Jahowa? Ai sonon do pambahenan-Ni? Ai lang dear do hata-Ni bani halak na pintor marpangabak?”
- ⁸ Tapi domma girah hinan bangsang-Ku gabe imbang; irampas hanima do mantel ampa baju-baju ni halak pamolus na nalom maruhur, na so parporang.

- ⁹ Iusir hanima do puang-puang ni bangsang-Ku
hun rumah ni sidea marsonang-sonang;
humbani dakdanak ni sidea ibuat hanima do
hasangapon-Ku ronsi sadokah ni dokahni.
- ¹⁰ Jongjong anjaha laho ma hanima! Ai seng
ianan hasonangan on; halani habutakon
maningon siap tumang ai.
- ¹¹ Nai ma, anggo roh sada halak, na mangkatahon
logou ampa ladung: “Ambilankononku ma
bamu pasal anggur ampa minuman koras”!
parambilan na sonai ma harosuh ni bangsa
on.

Bagah-bagah Haluahon

- ¹² “Sai na patumpuon-Ku do ganup hanima,
ale Jakob, sai na patumpuon-Ku do sidea
simasima ni Israel; bahenon-Ku do sidea
sada, songon biribiri ibagas harang, songon
sada hulanan i sampalan, sada hulanan ni
jolma na buei.
- ¹³ Sitotas dalan mardalan i lobei ni sidea;
bontason anjaha lopusan ni sidea ma
horbangan, laho luar hunjai. Raja ni sidea
mardalan i lobei ni sidea, anjaha Jahowa do
parlobei ni sidea.”

Lumba-lumba bani Pambobai ni Bangsa ai

- 3**¹ Dob ai ningku ma, “Tangihon ma, nasiam kopala-kopala ni Israel, ampa nasiam sigomgom ginompar ni Israel! Ai lang talup do botohon nasiam uhum?
- ² Nasiam na magigi bani na madear, na marosuh bani na masambor, na manlikliki hulingkuling ni angkula ni sidea, anjaha na mambuati sibuk-sibuk ni sidea humbani holi-holini,
- ³ na mamangani sibuk-sibuk ni bangsangu, na manlikliki hulingkuling ampa na manropuki holi-holi ni sidea, na manggatgati sidea songon gulei ibagas hudon, songon toktokni ibagas balanga.
- ⁴ Dob ai dilo-dilo ma sidea bani Jahowa, tapi seng anjai balosan-Ni sidea lingodkonon-Ni ma bohi-Ni dampak sidea bani panorang ai, halani na jahat ai pambahenan ni sidea.

Lumba-lumba dampak Nabi-nabi

- ⁵ Sonon do hata ni Jahowa dampak nabi, na pakahouhon bangsangu, na mandilo-dilohon “damei”, anggo dong sihilhilon ni ipon ni sidea, tapi na maningtingkon porang dampak halak na so mannahkon atap aha bani pamanganni?

- ⁶ Halani ai roh ma borngin bannima, na so marpanonggoran, ampa hagolapan na so marpanjahaion. Sundut ma mata ni ari bani nabi-nabi on, anjaha gabe halotiron ma arian bani sidea.
- ⁷ Mela ma halak na marpanonggoran, anjaha bador ma halak sipanjahai; haganup sidea manrungkub gumisni, ai seng dong roh balos humbani Naibata.
- ⁸ Tapi anggo ahu gok do bangku kuasa. Tonduy ni Jahowa, uhum ampa hagogohon, laho patugahkon panlanggaronni hubani Jakob ampa dousani hubani Israel.

Hagedukon ni Pambobai i Jerusalem

- ⁹ Tangihon ma on, nasiam kopala-kopala ni ginompar ni Jakob ampa nasiam pambobai ni ginompar ni Israel, na mangkagigihon uhum, tapi na papeolhon sagala na pintor,
- ¹⁰ na paulihon Sion marhitei daroh ampa huta Jerusalem marhitei hagedukon.
- ¹¹ Manjalo sisip do kopala ni sidea mandabuh uhum, malim ni sidea manjalo upah mamodahi, anjaha nabi ni sidea manjalo pirak do manjahai, lanjar mangunsagah ope sidea marhitei Jahowa, nini, "Ai lang Jahowa do i tongah-tongahta? Seng tumaram sogop banta hamagouan!"

¹² Ai pe, halani nasiam maningon tinggalaon do Sion songon juma, Jerusalem maningon gabe gugunan batu, anjaha dolog onjolan ni rumah panumbahan ai gabe harangan.

Harajaon Hadameion na Sihol Roh

(ay. 1-3: pausih Jes. 2:2-4)

4 ¹ Jadi masa do holi bani ari parpudi: Jonam ma dolog ianan ni rumah ni Jahowa gijangan humbani dolog-dolog, anjaha atasan humbani raboyon. Jadi marurup ma hujai bangsa-bangsa,

² anjaha buei bangsa sipajuh begu-begu laho hujai, nini, “Eta, laho ma hita tangkog hu dolog ni Jahowa, hu rumah ni Naibata ni si Jakob, ase iajarhon banta dalan-Ni, anjaha mardalan hita bani dalan-Ni. Ai hun Sion do roh titah anjaha hata ni Jahowa hun Jerusalem.”

³ Jadi manguhum ma la itongah-tongah ni buei bangsa, anjaha bahenon-Ni ma haputusan mangonai bangsa-bangsa na bolon das hubani na daoh, jadi patopahonon ni sidea ma podang ni sidea gabe tinggala, anjaha tanja ni sidea gabe sasabi. Seng be sintakon ni bangsa dompak bangsa podang, anjaha seng be guruhonon ni sidea parmunsuhon.

- ⁴ Hundul bei ma sidea i toruh ni hayu anggurni
ampa i toruh ni hayu arani, anjaha seng
dong be na manonggoti sidea, ai pamangan
ni Jahowa Zebaot do mangkatahon in.
- ⁵ Ai ganupan bangsa mardalan ibagas goran ni
naibatani bei, tapi anggo hita ibagas goran
ni Jahowa Naibatanta do mardalan ronsi
sadokah ni dokahni.
- ⁶ “Bani ari ai,” nini Jahowa, “patumpu-
tumpuon-Ku ma halak na tempang, anjaha
pahumpulon-Ku ma halak na dob nierapkon
ampa na dob Hupasipal hinan.
- ⁷ Pagoluhon-Ku ma na mengkat-engkat ai gabe
simasima, anjaha bangsa na dob nierapkon
ai gabe bangsa na gogoh, anjaha Jahowa
raja ni sidea i Dolok Sion olat ni on ronsi
sadokah ni dokahni.
- ⁸ Tapi anggo ho, ale Migdal-Eder, buntu-buntu
ni boru Sion, roh do bam, mulak do bam
panggomgomion sapari, ai ma panrajaion ni
boru Jerusalem.
- ⁹ Tapi nuan, mase sonai gogoh ni pandoruhmu?
Seng dong be raja i tongah-tongahmu?
Ai na dob matei do sipanuturi bam, ase
mangarou ho songon puang-puang na laho
mangintubuh?
- ¹⁰ Odonkon anjaha guaskon ma, ale boru Sion,
songon puang-puang na laho mangintubuh.

Ai maningon luar do ho nuan hun huta in, anjaha marianan i ladang, maningon laho do ho hu Babel. Ijai ma ho paluahon, ijai ma ho tobuson ni Jahowa hun tangan ni munsuhmu.

¹¹ Tapi nuan, martumpu do buei bangsa sipajuh begu-begu dompak ho, na mangkatahon, “Nibutakan ma in, ase marsombuh-sombuh matanta mangidah Sion.”

¹² Seng ibotoh sidea pingkiran ni Jahowa anjaha seng iarusi sidea sura-sura-Ni, ai ma na patumpuhon sidea songon radean hu pardogeian.

¹³ “Jongjong ma ho anjaha mardogei ma, ale boru Sion, ai bahenon-Ku ma tandukmin gabe bosu anjaha sisilonmu gabe tombaga, gabe marosak ma bahenonmu buei bangsa, anjaha papuligonmu ma bani Jahowa pansarian ni sidea ai, habayakon ni sidea ai bani Tuhan sigomgom ganup tanoh on.”

5 ¹ (4-14) Ai pe roh ma hanima marhulan-hulan, ale boru siparmunsuh! Domma hona hubu hita, anjaha marhitei tungkot ilibas huyum ni siuhum Israel.

Tugah-tugah pasal Mesias ampa Harajaon-Ni

² (4-1) “Tapi anggo ho, ale Betlehem Eprata, age pe etek ho i tongah-tongah ni

marga Juda, humber do roh Bangku na gabe panggomomi bani Israel, anjaha harorohanni humberi nahinan, humberi ari na basaia.”

- ³ (4-2) Halani ai ondoskonon do sidea bani munsuh das bani panorangni, paima tubuhan tuah na mantubuhkon ai; dob ai mulak ma simasima ni saninani ai hubani halak Israel.
- ⁴ (4-3) Dob ai jongjong ma la marmahan sidea marhitei gogoh ni Jahowa, marhitei hamuliaon ni goran ni Jahowa Naibatani ai. Dob ai sonang ma sidea marianan, ai timbul ma la ronsi ujung ni tanoh on,
- ⁵ (4-4) anjaha la ma gabe hadameion. Anggo roh Assur hu tanohta anjaha imasuki rumah bolonta, jadi bahenonta ma mangimbangsi pitu parmahan ampa ualuh raja humberi jolma.
- ⁶ (4-5) Jadi gomgoman ni sidea ma Assur marhitei podang ampa tanoh ni si Nimrod marhitei sinjata na sinintak. Anjaha paluahon-Ni ma hita humberi Assur, anggo roh ia hu tanohta anjaha imasuki nagorinta.
- ⁷ (4-6) Jadi songon namur humberi Jahowa ma simasima ni Jakob i tongah-tongah ni buei bangsa-bangsa, songon udan bani

poyon-poyon, na so bani jolma, barang marpangajaman bani anak ni jolma.

⁸ (4-7) Ambahni ai, ia simasima ni si Jakob i tongah-tongah ni bangsa sipajuh begu-begu, i tongah-tongah ni buei bangsa, gabe songon singa ma i tongah-tongah ni binatang harangan, songon singa poso-poso i tongah-tongah ni hulanan ni biribiri, anggo roh ia mandorab ampa mamparsilbak, tapi ise pe lang na paluahkon.

⁹ (4-8) Jadi marhamonangan ma tanganmu dompak na mangimbang ho, anjaha siap ma ganup munsuhmu.

¹⁰ (4-9) “Bani ari ai masa ma,” nini Jahowa, “raseihonon-Ku ma hudamu hun tongah-tongahmin, anjaha siapkonon-Ku ma gareta porangmu.

¹¹ (4-10) Parsedaon-Ku ma huta bolon na i tanohmu anjaha reongkonon-Ku sagala benteng-bentengmu.

¹² (4-11) Sonai homa tabas-tabas masabkonon-Ku ma hun tanganmu, anjaha seng dong be sipartondung bam.

¹³ (4-12) Anjaha siapkonon-Ku ma homa ganaganima ampa batu sisombahonnima hun tongah-tongahnima, anjaha seng be marsombah ho bani jadi-jadian ni tanganmu.

- ¹⁴ (4-13) Orbaton-Ku ma homa Aseramu hun tongah-tongahmu, anjaha siapkonon-Ku ma homa sisombahonmu.
- ¹⁵ (4-14) Anjaha bahenon-Ku ma pambalason ibagas gila ampa ringis dompak bangsa sipajuh begu-begu na so ra mambalosi.”

Pasal na Pinindo ni Naibata humbani Jolma

- 6** ¹ Tangihon nasiam ma na hinatahon ni Jahowa. Jongjong ma Ham, bahen Ham ma panguhumon dompak dolog-dolog, anjaha pabogeihon ma sora-Mu dompak buntu-buntu.
- ² Tangihon nasiam ma dolog-dolog, pangaduan ni Jahowa ampa nasiam onjolan ni tanoh na jonam, ai adong do pangaduan ni Jahowa dompak bangsa-Ni, sihol marturiak la pakon Israel.
- ³ “Ale bangsang-Ku, aha do pambahenan-Ku na lepak bam? Marhitei aha Hulojai ho? Balosi Ahu!
- ⁴ Halani na Huarahkon ho luar hun tanoh Masir, anjaha Hupaluah ho hun rumah parjabolonanmu, anjaha Husuruh si Musa, si Aron ampa si Miryam mambobahon ho?
- ⁵ Ale bangsang-Ku, sai ingat ma tahi-tahi ni si Balas, raja ni Moab ampa balos ni si Bileam, anak ni si Beor ai bani, sonai homa na masa

hun Sittim nari das hu Gilgal, ase itanda ho habujuron ni Jahowa.”

- ⁶ Marhitei aha tarbahen ahu manjumpahkon Jahowa, laho marsombah i lobei ni Naibata na i babou? Marhitei galangan situtungon do gakni tarjumpahkon ahu la, atap marhitei anak ni lombu na marumur satahun?
- ⁷ Marosuh do gakni uhur ni Jahowa mangidah hambing tunggal na marribu-ribu barang mangidah habaoran ni minak na marloksa-loksa? Berehononku ma nani bunga tubuhku halani panlanggaronku, boras ni boltokku halani pardearan ni tonduyhu?
- ⁸ Domma ipabotohkon bam ale jolma, barang aha na madear ampa barang aha na pinindahan ni Jahowa humbam, ai ma na mangkorjahon hasintongan ampa na mandalankon halayakon anjaha marparlahou ibagas toruh ni uhur i lobei ni Naibatamu.

Dousa ni Jerusalem ampa Uhum ni Naibata

- ⁹ Dilo-dilo do sora ni Jahowa hu huta ai, anjaha hapentaran do ai mangkabiari goran-Ni.
“Bogei hanima ma bangsa na marianan i ladang ampa na i huta!
- ¹⁰ Mintor tarhalupahon Ahu ma arta hajahaton na i rumah ni parjahat ampa suhat-suhata na etektu, sihagigihononkon?

- ¹¹ Mintor tarhadeathon Ahu ma simada
timbangan na lepak ampa parranjut-ranjut
na marisi batu timbangan na palsu?
- ¹² Gok hakorason do halak na bayak na i
kota, parladung do pangisini, anjaha
pangoto-otoion do i toruh ni dilah ni sidea.
- ¹³ Ahu pe pungkahon-Ku ma manguhum ho,
siapkonon-Ku ma ho halani dousamu.
- ¹⁴ Mangan pe ho seng anjai bosur, loheian
do ho tong ibagas; aha na niluahkonmu,
seng maluah, anjaha aha na pinaluahmu,
ondoskonon-Ku do ai bani podang.
- ¹⁵ Martidah pe ho, hape seng marpariama,
mardogei buah ni hayu jetun pe ho, tapi
seng bulih minakanmu dirimu bani minak ai;
age pe mangkilang buah ni anggur ho, seng
bulih inumonmu anggur ai.
- ¹⁶ Ai idalankon hanima do aturan ni si Omri ampa
horja-horja ni ginompar ni si Ahab, anjaha
mardalan hanima ibagas sura-sura ni sidea.
Halani ai bahenon-Ku ma hanima tarulang
ampa pangisini gabe sisurak-surakon;
sonai ma hanima mangusung pandorun ni
bangsa-bangsa.

Tangis-tangis Pasal Uhur Magou ni Bangsa ai

7 ¹ Ngalutni in bangku, ai usih do ahui bani na
patumpuhon buah ni hayu, songon na

marturiang buah ni anggur, seng dong be buah ni anggur panganon, seng dong be buah ni hayu ara sidingaton ni uhurhu.

- ² Domma siap halak na daulat hun tanoh on, anjaha seng dong be halak parpintor i tongah-tongah ni jolma. Ganup sidea mambahen paronggopan laho manduruskon daroh; ganup marsitaon tirangkapni bei dompak hasomanni.
- ³ Hinsah do tangan ni sidea mangkorjahon na masambor; igil do halak na sangap-sangap, panguhum manjalo sisip anjaha halak na markuasa uhur-uhurni do ibahen; sonai do pandalankon ni sidea.
- ⁴ Halak sidearan humbani sidea, songon suga do, anjaha sipintoran songon tatada. Domma roh ari parkahapon bam, ari pambalason bam, dohor ma hasonggoton bani sidea.
- ⁵ Ulang ma dong na porsaya bani kawanni; ulang ma marhatengeran bani hasomanni; jaga homa bibir ni pamanganmu age dompak naboru na modom bani abinganmu.
- ⁶ Ai anak pe seng ipasangap bapani, anjaha boru jongjong manlawan inangni, parumaen dompak simatuani, ase munsuh ni halak ma hasomanni sarumah.

Haluahon ni Sion Use

- ⁷ Tapi anggo ahu mangkawah bani Jahowa do, anjaha mangarap do ahu bani Naibata ni haluahonku; sai tangihonon ni Naibatanku do ahu.
- ⁸ Ulang ma ho marmalas ni uhur, alo munsuhku, mangidah ahu; ai jomba pe ahu, sai na jongjong do use, ai hundul pe nuan ahu ibagas hagolapan, Jahowa do panondang bangku.
- ⁹ Usungonku do ringis ni Jahowa, ai hu Bani do ahu mardousa, paima iapiti ahu anjaha ipintori, itogu ahu hu haliharon, gabe huidah hapintoron-Ni.
- ¹⁰ Jadi idahon ni munsuhku ma ai, gabe rongkobon ni habadoron ma ia, ai ma na mangkatahon hu bangku, “Ija do Jahowa Naibatamu?” Marpuas-puas do matanku mangidahsi; idogei-dogei do ia nuan songon hubang i alaman.
- ¹¹ Na roh ma sada ari, paulion ma use ijai tembokmu. Bani ari ai palumbangon ma parbaloganmu.
- ¹² Bani ari ai roh ma sidea bam, hun Assur das hu Masir, hun Masir das hu Bah Eprat, hun laut na sada das hu laut na sada nari ampa hun dolog na sada das hu dolog na sada nari.

- ¹³ Tapi gabe halimisan ma tanoh ai halani pangisini, marhalanihon ni pambahenan ni sidea.
- ¹⁴ Parmahani Ham ma bangsa-Mu marhitei simambu-Mu, biribiri parbagianan-Mu, na marianan pulou i harangan, i tongah-tongah ni tanoh na lambutan; lopas Ham ma sidea manampal i Basan ampa i Gilead songon sapari.
- ¹⁵ Songon bani panorang parpadarat-Mu hun Masir, pataridahkon Ham ma bennami halongangan.
- ¹⁶ Idahon ni bangsa sipajuh begu-begu ma ai, gabe bador ma sidea marhalanihon ni ganup hagogohon ni sidea ai; tutupon ni sidea ma pamanganni bani tanganni, anjaha nengel ma pinggol ni sidea.
- ¹⁷ Dilaton ni sidea ma tanoh songon ulog, songon sagala na manjuluk i tanoh; gobir-gobir ma sidea roh humbagas bentengni, hitir-hitir manjumpahkon Jahowa Naibatanta, anjaha marhabiaran ma sidea bam.
- ¹⁸ Ise ma Naibata usih songon Ham, na manasap dousa anjaha na manalpuhon panlanggaron ni simasima ni parbagiananni? Seng lalab itahan-tahan ringis-Ni, ai marharosuh do la bani idop ni uhur.

- ¹⁹ Sai marpangulaki do uhur-Ni maridop ni uhur banta, anjaha dogei-dogeion-Ni do hajahatonta. Nai ma tongon, gijigkonon-Mu do ganup dousanami hubagas laut.
- ²⁰ Sai patidakon-Mu do habujuron bani si Jakob, idop ni uhur bani si Abraham, na dob binulawankon-Mu bani ompungnami humbani sapari nari.

Nahum

Pambalason ni Naibata bani Munsuh-Ni

- 1** ¹ Panjahaion Pasal Ninive. Buku Pangungkabon ni si Nahum, halak Elkos ai.
- ² Naibata parsimburu anjaha pambalas do Jahowa; sipambalas do Jahowa anjaha parringis tumang. Sipambalas do Jahowa dampak imbang-Ni, anjaha totap manggila dampak munsuh-Ni.
- ³ Tongon nanget do Jahowa manringis anjaha paridop ni uhur bangga, tapi sai na marlulu do la. Marhasoman habahaba ampa halisungsung do la mardalan. anjaha hambun do orbuk ni nahei-Ni.
- ⁴ Mangonai hata la bani laut, gabe horah do, anjaha ipahorah do ganup bah mardalan. Horah do Basan ampa Karmel, anjaha melus bunga ni Libanon.
- ⁵ Dugur do dolog i lobei-Ni anjaha malala buntu-buntu; gobir do tanoh on i lobei-Ni, dunia on ampa haganup isini.
- ⁶ Ise ma na tahan jongjong mandompakkon gajag ni gila-Ni? Ise ma na pag manjumpahkon gara ni ringis-Ni? Marjimbur-jimbur do

songon apuy gila-Ni, anjaha mangkatorban
dolog batu i lobei-Ni.

- ⁷ Pardear layak do Jahowa, benteng bani
panorang hasosakan; anjaha itanda do na
marhaporusan Bani.
- ⁸ Tapi marhitei bah na sumbang siap tumang do
ibahen na mangimbang-Si anjaha idakdaki
do munsuh-Ni hubagas na golap.
- ⁹ Aha do na tinahi ni uhurnima dampak Jahowa?
Siap tumang do ai bahenon-Ni, seng pala
dua hali timbul hasosakan.
- ¹⁰ Songon suga-suga na itagili bois sidea, songon
anggala na horah tene mosog sidea.
- ¹¹ Ai lang hun tongah-tongahmu do luar halak na
manguhurhon hajahaton dampak Jahowa,
halak na manranggihon na masambor
tumang?
- ¹² Sonon do hata ni Jahowa, "Age pe gogoh
anjaha buei sidea, maningon sabion do
sidea ase masab sidea. Age pe domma
Hupatoruh ho, seng be patoruhon-Ku ho.
- ¹³ Sonari pe buaton anjaha ponggolhonon-Ku ma
pasanganmu humbam, anjaha rotapon-Ku
ma garimu.
- ¹⁴ Tapi dampak ho iparentahkon Jahowa do,
'Seng be patotapon goranmu; hun rumah
ni naibatamu siapkonon-Ku ma gana-gana
na niuhir ampa gana-gana na tinuang:

Ahu do na pasirsirhon tanomanmu, ai siambukkonon do ho.”

Haluahon ni Israel ampa Parseda ni Ninive

¹⁵ (2-1) Tonggor ma, i atas ni dolog nahei ni siboan Ambilan Na Madear, na maningtingkon damei! Pestahon pestamu ale Juda, galari bagah-bagahmu, ai seng anjai roh be parjahat mangimbang ho, domma siap botul ia.

Tartaban Huta Ninive anjaha Iparseda

2 ¹ (2-2) Domma tangkog dompak ho pamerapkon! Jaga ma benteng ai! Marjaga-jaga ma i dalan, mamonting bei ma, pakei ma gogohmu!

² (2-3) Ai Jahowa do pasuangkon hayu anggur ni Jakob songon hayu anggur ni Israel; ai domma irampok panrampok sidea, anjaha iparseda rantingni.

³ (2-4) Gerger do gantar-gantar ni puanglimani, marbaju hasumba do balani. Marlinang songon apuy garet-garetani bani ari parbingkatni, anjaha iawas-awaskon tanja.

⁴ (2-5) Marpojong garet-garet i dalan, marhujai-hujon i tanoh lapang; rupani songon rigapan, anjaha songon hilap pardetesni.

- ⁵ (2-6) Idingat raja ai ma puanglimani, hape marsijombaan do sidea bani nilangkahkonni bei; tarolos sidea marayak tembok, hape domma sonson onding-onding partahanan.
- ⁶ (2-7) Mungkab ma horbangan na bani bah bangga ai, jadi gobir ma istana ai.
- ⁷ (2-8) Ipasalang ma raja naboru ai anjaha iboan hu habuangan; gabe songon parturtu ni kuhuy ma partangis ni jabolonni naboru, anjaha ibogbogi bei tontonni.
- ⁸ (2-9) Songon bongbongan ma Ninive, na mabaor bahni. "Soh! Soh!" Nini sidea, tapi sahalak pe lang adong be na ra mulak.
- ⁹ (2-10) Buati ma pirak in, buati ma omas in! Ai lang marnabois arta ai, sumbang tumang bagei-bagei ni na maharga.
- ¹⁰ (2-11) Lumei! Halumeion ampa hasiapon! Atei-atei na madotei ampa towod na hitir-hitir! Gobir sagala binongei, anjaha marposi sagala bohi.
- ¹¹ (2-12) Ija do nuan ianan ni singa ondi ampa liang ni singa, ai ma parponopanni, anjaha aha pe lang na mangganggusi ijai?
- ¹² (2-13) Ija do nuan singa ai, na manoroh ase sungkupan anakni, anjaha na mamongkiki sisorohanni bani boru-boruni, na manggoki liangni bani sorohanni ampa iananni bani na pinarsirakni?

¹³ (2-14) “Tonggor ma, marlulu do Ahu dompak ho,” nini Jahowa Zebaot; “martimpul ma bahenon-Ku timus ni garetamu, anjaha bois ma bahenon singa poso-posomu marhitei podang. Siapkonon-Ku ma sorohanmin hun tanoh on, anjaha seng be tarbogei sora ni suruhanmu.”

Panguhumion na Legan bani Ninive

- 3** ¹ “Papa ma bani huta sisopsop daroh, na gok ladung ampa paksa, lang maronti panrampokon!
- ² Bogei! Parlisik ni lonsing-lonsing, pargurojob ni galapang! Bogei! Huda na marangkat dua ampa garetu na marpojong.
- ³ Siajak huda na rongom roh, podang na marjilam-jilam ampa tanja na mirlak; buei ni halak na tinampul, marjunjun anjaha lang tarhira bangkei, lang marnarotap bangkei gabe mangkatargompang sidea bani bangkei ai.
- ⁴ Anjaha ganupan ai binahen ni hinabuei ni ulah ni boru jalang do, na jenges-jenges na pandei mandari-dari, na manjualhon bangsa-bangsa marhitei parbangkisonni ai ampa marga marhitei uti-utianni ai.
- ⁵ Tonggor ma, marlulu do Ahu dompak ho,” nini Jahowa Zebaot. “Sintakon-Ku

ma hioumin das bani bohimu, anjaha patidakon-Ku ma hatalanjangonmin bani bangsa-bangsa ampa habadoronmu bani harajaon-harajaon.

⁶ Gijigkonon-Ku ma bam na mabutak, pabadoron-Ku ma ho, anjaha bahenon-Ku ma ho gabe sitontonan.

⁷ Anjaha sagala na mangidah ho, maporus ma humbam, anjaha nini ma, 'Domma hansur Ninive, ise ma na manangisi?' Hunja ma pindahan-Ku na mangapohi ai?

⁸ Mintor dearan ma ho hun bani, na marianan bani topi ni Bah Nil, na niinggotan ni bah, na marbatar-batarhon laut anjaha na martembokkon bah?

⁹ Etiopia do hagogohon bani ampa Masir na so marpispis ai: Put ampa Libia sipangurupi bani.

¹⁰ Tapi sidea pe domma hu habuangan, maningon laho hu tahanan; dakdanakni irosaki i suhi-suhi ni ganup dalan. Marruji-ruji do halak pasal na sangap ni sidea, anjaha ganup pambosarni isangkut do bani gari.

¹¹ Ho pe maningon mabuk do, maningon mirdong do, maningon pindahanmu do haporusan i lobei ni munsumu.

¹² Sagala bentengmu usih do bani hayu ara na marboras mula-mula; anggo idugur mintor

mardabuhan ma bani pamangan ni na mangankon.

- ¹³ Tonggor ma, doskon naboru do balamu i tongah-tongahmu. Mungkab do horbangan ni tanohmu jumpahon ni munshumu, anjaha panganon ni apuy do pating-patingmu.
- ¹⁴ Tahui ma bah managam pangkubu, anjaha patoguh bentengmu! Masuk ma hu tanoh parhalampungan, luntak ma tanoh halampung ai, anjaha buat ma panuangan ni batu!
- ¹⁵ Sai na bois do ho panganon ni apuy ijai, siapkonon ni podang ma ho. Bondutonni ma ho songon balang. Pabuei ma dirimu songon tamponok, pabuei songon balang!
- ¹⁶ Bahatan do partiga-tigamu ibahen ho humbani bintang na i langit; ipaherbang balang ai ma habongni anjaha habang ma ia lintun.
- ¹⁷ Songon balang do gamot-gamotmu, anjaha jurutulismu songon balang na marhulanan, na sogop bani tembok sanggah borgoh ni ari; tapi poltakkonsi mata ni ari habang ma; seng dong na mambotoh, ija hinan iananni.
- ¹⁸ Munduk-unduk do parmahanmu, ale raja ni Assur, tarpodom na sangap-sangapmu. Merap do bangsamu i dolog-dolog, ise pe lang na patumpuhon.

¹⁹ Seng hatambaran luhamu, parah do ugahmu.
Sagala na mambogei baritamu martopap
do halani ho. Ai ise ma na so ihonai
hajahatonmu na so marhinggaan ai?”

Habakuk

Tangis-tangis ni Nabi Pasal Hasosakan ni Bangsa ni

1 ¹ Pangungkabon na nididah ni Nabi Habakuk.

² “Sadia dokah on, ale Jahowa, dilo-dilo ahu, hape seng ra Ham manangihon? Atap hudilohon Bamu pasal odoh-odoh, tapi seng ra Ham paluahkon?”

³ Mase ma pataridahkonon-Mu bangku hagedukon, gabe paidah-idahonku hasunsahan? Pandorunion ampa pambahenan hajahaton do i lobeihu, masa do parsalisihan ampa paringoran.

⁴ Halani ai lambin galekni do titah, anjaha seng mardalan uhum. Ai halak parjahat do mardalan manginggoti parpintor, gabe peol ma mardalan uhum.”

⁵ “Kawahkon nasiam ma hu tongah-tongah ni bangsa sipajuh begu-begu anjaha papangkei ma, ase longang anjaha songgotan nasiam. Ai sihol bahenon-Ku do sada horja bani ari nasiam, lang porsaya nasiam, porini pe ibaritahon ai.

⁶ Tonggor ma, papuhoon-Ku ma halak Kasdim, bangsa na garang anjaha na lingkai, manlontas deisa na ompat ni tanoh on, laho manoluk ianan na so sidea simadasi.

⁷ Sihabiaran anjaha jangin do sidea; luar humbani sidea do uhum ampa hatimbulonni.

⁸ Lingkatan do huda ni sidea humbani begu, garangan humbani sorigala sanggah bodari-bodari; roh do siajak hudani humbani na daoh habang songon haluhuy, mangolos laho mamondut.

⁹ Roh do sidea ganup laho mandalankon paksa; seng tarolat pangonjarni, ipatumpu sidea do na tartangkap songon horsik bueini.

¹⁰ Irehei sidea do raja-raja anjaha sipartatawaan ibahen sipambobai. Ipartatawai sidea do ganup benteng; tanoh do ipajunjun sidea laho manaban ai.

¹¹ Dob ai mangolos ma sidea bingkat mannunuti dalanni songon logou; sidea halak siparsalah, na mambahen gogohni gabe naibatani.”

¹² “Ai lang Ham do humbani nabasaia nari, ale Jahowa. Naibatanku na mapansing bangku? Seng anjai matei hanami. Ale Jahowa, bahen uhum do, ase ipabangkit Ham ia; Ham Batu ginggingku, bahen panjoraan do, ase ipajonam Ham ai.

¹³ Ham, parmata na pitah, gabe seng tarpaidah-idah Ham na masambor, anjaha seng tahan Ham mangkawahkon na so sintong, mase ma ipaidah-idah Ham halak sipangosei hape sip do Ham, ai ma sanggah na binondut ni halak parjahat jolma sipintoran hun bani,

¹⁴ gabe songon dengke na i laut ai ipaturut Ham
jolma in, usih songon gilok-gilok, na so marraja?

¹⁵ Ganup do isintak marhitei hail hu atas, itarik
marhitei jalani, anjaha ipatumpu sidea hubagas
durungni; marmalas ni uhur do ia halani ai anjaha
marolob-olob.

¹⁶ Halani ai do ase manggalang ia bani jalani anjaha
manutung dahupa ia bani durungni, ai halani ai do
buei parbagiananni anjaha mantin sipanganonni.

¹⁷ Sintakonni ope nani podangni torus, anjaha
nunutonni mamunuhi bangsa-bangsa lang
maralang-alang?”

Balos ni Naibata; Uhum bani Halak Kasdim

2 ¹ “Bani manara parjagaanku do ahu sihol
jongjong, bani tembok ai hupajongjong bangku,
laho mangidah atap aha na sihol hatahonon-Ni
bangku, anjaha aha balos-Ni pasal adu-aduankai.”

² Jadi nini Jahowa ma mambalosi ahu, “Suratkon
ma pangungkabon on, anjaha uhirhon ai torang-
torang bani batu panuratan, ase boi ai basaon ni
halak age sanggah montas.

³ Ai mangonai panorang na sihol roh ope
pangungkabon ai; tapi mangolos ma ai mangayaki
ujungni, anjaha seng marladung ai. Porini pe
hunlambat, paima-ima ma ai, ai maningon roh do
ai; seng tumaram lang saud.

⁴ Tonggor ma, halak na so pintor uhurni ibagas, sai na hurleh do, tapi halak parpintor, manggoluh do halani haporsayaonni.

⁵ Jaga ma pangapasi sipangosei-osei, halak na jungkat maruhur, na so onggga marnasungkup, na pangangangkon tolonanni songon nagori toruh, na so ra bosur songon hamatean, na patumpuhon sagala bangsa bani anjaha na pasadahon sagala marga bani.

⁶ Ai lang parumpamahonon ni sidea ma ia, doding-dodingkononni salig-salig bani anjaha hatahononni, 'Mulih ma ia, na patumpuhon bani na so ia simadasi (*sadiha dokah nari tumaran?*), anjaha na pajunjun bani dirini buei utang!'

⁷ Ai lang sompong ma tumaram jongjong sidea na maridou bam, anjaha hehe sidea sihol mangarsik ho, anjaha gabe taban ma ho bani sidea?

⁸ Halani na dob tinabanmu buei bangsa, gabe tabanon ni bangsa-bangsa na tading ai ma ho, halani sapata ni daroh ni jolma ampa odoh-odoh bani nagori, bani huta-huta ampa na marianan ibagas ai.

⁹ Magou ma halak na mambuat pansarian na so tiba dalanni hubagas rumahni, sihol mambahen asarni bani na gijang, bahen haluahonni humbani parmaraan!

¹⁰ Na manranggihon habadoron do ho bani rumahmu, marhitei na isiapkon ho buei bangsa; na mambahen tonduymu do ai mardousa.

¹¹ Ai dilo-dilo do age batu ibagas tembok ai, anjaha tiang-tiang ni rumah ai pe mambalosi do.

¹² Magou ma halak na paulihon huta marhitei daroh, anjaha na pajonamkon benteng marhitei hagedukon.

¹³ Tonggor ma, ai lang marharorohan humbani Jahowa do ai? Marhangaluton pe bangsa-bangsa bahen panganon ni apuy do, anjaha ilojai bangsa-bangsa pe dirini, laho mangkopkop na lang do!

¹⁴ Ai maningon gokan do tanoh on bani parbinotohan pasal hasangapon ni Jahowa, songon bah na manrungkub dasar ni laut.

¹⁵ Magou ma halak na painumkon hasomanni humbani panginuman ni ringisni, anjaha na pamabukkonsi laho mangidah hatalanjangonni.

¹⁶ Ho pe maningon pabosuron ma bani habadoron gantih ni hasangapon. Ho pe minum ma ase rebad-rebad ho. Bam ma nuan roh panginuman na bani tangan siamun ni Jahowa, anjaha habadoron ma sogop bani hasangaponmu.

¹⁷ Hajahaton na binahenmu hubani Libanon maningon rungkubonni do ho, anjaha pansedai ni binatang mangkirjati ho, halani sapata ni daroh

ampa hajahaton na bani nagori ai, bani huta-huta
 ampa na marianan ibagas ai.

¹⁸ Ai aha ma guna ni gana-gana na pinaulini
 ai, gana-gana na tinuang ampa sipartondung
 sipangoto-otoi, ase marhatengeran hujai tukang ai,
 anjaha itukangi sisombahon na longah?

¹⁹ Magou ma halak na mangkatahon bani
 hayu, “Puho ma”! Ampa bani sada batu na
 longah, “Jongjong ma”! Boi ma ai mambere
 pangungkabon? Tonggor ma, ilampis do ai bani
 omas ampa pirak, tapi otik pe seng dong hosah
 ibagas.

²⁰ Tapi ibagas rumah hapansingon-Ni do Jahowa,
 sip ma ganup tanoh on i lobei-Ni.”

Sada Psalm: Uhum ampa Haluahon

3 ¹ Tonggo ni si Habakuk, nabi ai,
² “Ale Jahowa, domma hubogei barita-Mu,
 gabe gok biar do ahu halani horja-Mu
 ai. Pabayu Ham ma ai bani partongahan
 ni tahun, bani partongahan ni tahun ma
 tongon pabotohkon Ham ai; ingat Ham ma
 maridop ni uhur, age ibagas ringis.

³ Roh do Naibata hun Teman, anjaha Na
 Mapansing sahalian ai hun Dolog Paran
 (*Sela*). Irungkub hamuliaon-Ni do langit,
 anjaha gok tanoh on puji-pujian-Ni.

- ⁴ Parsinalsal-Ni songon sinalsal ni mata ni ari do,
sondang luar hun lambung-Ni; ai do ibahen
panrungkub ni hasangapon-Ni.
- ⁵ Mardalan do sampar i lobei-Ni, anjaha irik do i
pudi-Ni mangihut bunrung.
- ⁶ Jongjong ma la anjaha ibahen ma dugur
tanoh on; mangkawah ma la inggot, gabe
ibahen ma mangkalumpat bangsa halani
hirjatni; masarsar ma dolog-dolog na jonam
hinan anjaha marongrong buntu-buntu
sisadokah-dokahni. Dalam humbani nabasaia
la do simadasi.
- ⁷ Huidah do lampolampo ni Kusan hona tipa,
anjaha dugur-dugur tirei ni lampolampo ni
tanoh Midian.
- ⁸ Ai dampak bah bangga, dampak bah bangga
do Ham manringis, ale Jahowa, barang
dampak laut do Ham manggila, ase
ipahundul Ham diri-Mu bani huda-Mu, bani
gareta hamonangan-Mu?
- ⁹ Domma pasang sior-Mu anjaha domma gok
lingkit Bamu. Sela. Ibolah Ham do tanoh on,
gabe marbanggal ma bah.
- ¹⁰ Ididah dolog-dolog Ham, gabe hitir-hitir ma;
bah bangga pe manraja ma; ipabogei hon
luhung ni lautan ma sorani anjaha iangkat
ma tanganni hu atas.

- ¹¹ Soh do mata ni ari ampa bulan bani iananni,
halani sondang ni lingkit-Mu na tolkas
ai, halani mirlak ni lombing-Mu na
marlinang-linang ai.
- ¹² Ilangkahi Ham do tanoh on ibagas ringis-Mu,
anjaha idogei-dogei Ham do bangsa-bangsa
ibagas gila-Mu.
- ¹³ Bingkat do Ham laho mangurupi bangsa-Mu,
laho mangurupi na mininakan-Mu. Irosaki
Ham do tayub humbani rumah ni parjahat,
anjaha iparseda Ham do onjolanni das bani
batu onjolan partoruh. Sela.
- ¹⁴ Itolpus Ham do marhitei panah-Mu ulu ni
pambobaini, na roh songon halisungsong
laho mangerap ahu, na marolob-olob
songon halak na laho mangankon na
masombuh bani na ponop.
- ¹⁵ Ibontas Ham do laut ai marhitei huda-Mu,
margilumbang ma laut na bolag.
- ¹⁶ Dob hubogei ai, gabe hitir ma angkulanku,
bibirhu pe hitir do halani sora ai; masuk
do na masik hubagas holiholingu, anjaha
rebad-rebad panlangkahku. Sip ma ahu
paima-imahon ari hasunsahan, na sihol roh
bani bangsa na manosak hanami.
- ¹⁷ Age pe seng marbunga ijai hayu ara, anjaha
seng marbuah hayu anggur, lambang ia
hayu jetun anjaha seng mambere gogoh age

juma, rasei biribiri humbani iananni, anjaha
seng dong be lombu ibagas harang,

¹⁸ age sonai, marolob-olob do ahu ibagas Jahowa,
anjaha malas do uhurhu ibagas Naibata ni
haluahonku.

¹⁹ Naibata Jahowa do hagogohon bangku, ibahen
do naheihu usih songon nahei ni ursa; Ia
do manogu ahu manlangkah bani ianan na
gijang." (*Bani sibobahon koor, marhasoman
parugas*).

Sepanya

Uhum bani Bangsa-bangsa Sonai Homa bani Juda

1 ¹ Hata ni Jahowa, na roh hubani si Sepanya, anak ni si Husi, anak ni si Gedalya, anak ni si Amarya, anak ni si Hiskia, sanggah panorang ni si Josia, anak ni si Amon, raja ni Juda.

² “Siapkonon-Ku do haganup hun datas ni tanoh on,” nini Jahowa.

³ “Siapkonon-Ku do jolma ampa pinahan; siapkonon-Ku do manuk-manuk na i langit ampa dengke na ibagas laut. Jombahonon-Ku do halak parjahat, siap do bahenon-Ku jolma hun datas tanoh on,” nini Jahowa.

⁴ “Pagostongon-Ku do tangan-Ku mangimbang Juda, ampa mangimbang ganup pangisi ni Jerusalem, siapkonon-Ku do humbani ianan on goran ni Baal ampa goran ni malim-malim ni naibata na legan,

⁵ ronsi halak na marsombah bani bala na i langit i atas tayub, ampa halak na marsombah bani Jahowa, tapi na marbija homa bani Milkom;

⁶ sonai homa halak na marbalik humbani Jahowa, na so mangindahi Jahowa anjaha na so marpanungkun be Bani.

⁷ Sip ma nasiam i lobei ni Jahowa! Ai dohor mando ari ni Jahowa. Domma ipasirsir Jahowa sada galangan sisayaton, anjaha iuras na niontang-Ni.

⁸ Jadi bani ari ni panggangan sisayaton ni Jahowa ai, marlulu ma Ahu dampak kopala-kopala ampa anak ni raja ampa haganup halak na mamakei pakeian ni nagori na legan.

⁹ Marlulu do Ahu homa bani ari ai dampak haganup halak na manlumpati molmolan, na manggoki rumah ni tuanni bani buah ni paksa ampa panipuon.

¹⁰ Bani ari ai," nini Jahowa, "Tarbogei ma sora ni na tangis hun Horbangan Dengke, ampa doruh-doruh hun huta baru ai ampa pardobur na gogoh humbani buntu-buntu ai.

¹¹ Tangis ma nasiam, na marianan i huta pandudaan! Ai seng dong be partiga-tiga, haganup sitimbang pirak domma bois.

¹² Bani panorang ai Ahu sandiri ma mamareksai Jerusalem marhitei lampu, anjaha marlulu ma Ahu bani halak, na gabe mombur i atas parat ni sidea, halak na mangkatahon ibagas uhurni, 'Seng anjai bahenon ni Jahowa na madear atap na masambor pe.'

¹³ Sirampason ma ugas-ugas ni sidea, anjaha siparsedaon ia rumahni. Age pe ipauli sidea rumah, seng sidea mangiankon ai; age pe ipungkah sidea

pohon anggur, seng anjai inumon ni sidea anggur hunjai.

¹⁴ Dohor mando ari ni Jahowa na bolon ai, dohor mando anjaha mangolos roh. Bogeï ma ari ni Jahowa na mapaet ai! Age puanglima mandoruh do ijai.

¹⁵ Ari panringisan do ari ai, ari hasosakan ampa habiaran, ari hasedaon ampa hasiapon, ari hagolapan ampa halotiron, ari na gok hombun ampa na lotir tumang,

¹⁶ ari parsora ni tarompit ampa surak-surak na mandorab huta na pinatoguh ampa manara na gijang.

¹⁷ Tarsosak ma bahenon-Ku jolma, gabe dadapdadap ma sidea songon halak na mapitung, halani mardousa sidea dompak Jahowa; duruskononkon do daroh ni sidea songon orbuk ampa bituha ni sidea songon hubang.

¹⁸ Seng anjai tarbahen pirak barang omas ni sidea paluahkon diri ni sidea bani ari panringison ni Jahowa. Marhitei apuy ni parsimburuonni ai siapkononkon do tanoh on; hasiapon, nai ma tongon, haboison na manompong do bahenon-Ni bani ganup na marianan i tanoh on.”

Golpa-golpa Patoruh Uhur Paima Roh Ari Uhum

2¹ Roh ma nasiam martumpu anjaha bahen nasiam ma partumpuan, ham bangsa na so mambotoh na maila,

² paima hona usir nasiam songon dogdog na hinabangkon, paima sogop bani nasiam ari panringison ni Jahowa.

³ Pindahi nasiam ma Jahowa, nasiam ganup na toruh maruhur i tanoh on, nasiam na mangkorjahon parentah-Ni; pindahhi nasiam ma hapintoron, pindahhi ma toruh ni uhur, andohar iondingi nasiam bani ari panringison ni Jahowa.

Uhum Dompok Halak Palistim

⁴ “Ai maningon tarulang do Gasa, anjaha Askalon gabe halimisan. Maningon usiron ni halak do par Asdod sanggah tongah ari, anjaha iurati ia Ekron.

⁵ Magou ma hanima na marianan i tanoh na martopihon laut, hanima bangsa Kereta. Mangonai ma hata ni Jahowa bam, ale Kanaan, tanoh ni halak Palistim; agouhonon-Ku ma ho, ase ulang be dong na mangindahi ho.

⁶ Gabe sampalan ma tanoh na martopihon laut, parmahanan bani parmahan ampa harang bani hulanan ni biribiri.

⁷ Jadi simasima ni bangsa Juda ma simada tanoh ai, sidea ma marmahan ijai, anjaha i rumah

na i Askalon sidea marsaran bodari. Ai anjaha pasuangonni do haadongon ni sidea.”

Uhum Dompok Halak Moab ampa Amon

⁸ “Domma Hubogei pangapasion ni Moab ampa panrisaon ni halak Amon, sonaha pangapasi ni sidea bani bangsang-Ku, anjaha mangenjeng sidea pasal tanoh ni sidea.

⁹ Halani ai, songon sintongni manggoluh Ahu,” nini Jahowa Zebaot. “Naibata ni Israel, maningon songon Sodom do Moab anjaha halak Amon songon Gomora, hatubuhan ni latong ampa pambuatan ni garam ampa halimisan lalab, anjaha tabanon ni simasima ni bangsang-Ku do sidea, anjaha na tading humbani bangsang-Ku do manean sidea.

¹⁰ Ai maningon bani sidea do on halani gijang ni uhur ni sidea, halani mangapasi sidea anjaha mangenjeng sidea dompok bangsa ni Jahowa Zebaot.

¹¹ Jombut ma Jahowa bani sidea; ai siapkonon-Ni do sagala naibata na legan i atas tanoh on, gabe marsombah ma hubani ganup halak humbani iananni, ganup tanoh ni bangsa sipajuh begu-begu.”

Uhum bani Etiopia pakon Assur

¹² “Hanima pe halak Etiopia, maningon bunuhon ni podang-Ku do hanima.

¹³ Dob ai pagostongon-Ni ma tangan-Ni dompak utara, anjaha agouon-Ni ma Assur, anjaha tarulang bahenon-Ni Ninive, horah songon halimisan.

¹⁴ Marsaran ma i tongah-tongahni hulanan ni pinahan, bagei-bagei ni binatang na i talun; gabe parbornginan ni sipauk ampa tanggiling ma galapang ni rumah ni sidea; mandoding ma kiung bani jendela anjaha kawak bani molmolan, ai domma iparseda halak parhayu ares ai.

¹⁵ Sonai ma kota na ramei ai, na marsonang-sonang marianan, na mangkatahon ibagas uhurni, ‘Ahu ma da in, sobali ahu seng dong!’ Sonaha do parjadini ai gabe halimisan, ianan ni binatang panoroh! Sagala halak na mamontas hunjai mapas ma anjaha iangkat tanganni manrehei.”

Dousa ni Jerusalem ampa Uhum Halani ai

3 ¹ Bursik ma huta sipanlawan, na butak ampa siunsagakon gogoh!

² Seng itangihon be hata sipasingat anjaha seng ijalo pangajaran. Seng tenger uhurni bani Jahowa anjaha seng ipadohor dirini bani Naibatani.

³ Songon singa na maraum do pambobaini i tongah-tongahni; songon sorigala borngin do panguhum ni sidea, na so mansarihon ari patar.

⁴ Parladung do nabi ni sidea, halak sipangoto-otoi; ipabutak malim ni sidea do na mapansing ai, uhur-uhur ni sidea do ibahen bani titah ai.

⁵ Pintor do Jahowa i tongah-tongah ni sidea, seng dong ibahen na salah; ganup sogod ipatuduhkan do aturan-Ni, seng onga holang haliharonni; tapi seng ibotoh pargeduk na maila.

⁶ “Domma siap Hubahen bangsa sipajuh begu-begu; domma mareong manara ni sidea; domma Huparseda dalan-dalan ni sidea, gabe sahalak pe lang boi be mardalan hunjai; domma mareong huta ni sidea, seng dongjolma be ijai, seng dong be pangisini.

⁷ Ningku, tontu mabiar ma ia Bangku, tangihononni ma pangajaran; gabe seng siapkononkon rumah ni sidea domu bani haganup na dob Hulumbahon ai bani sidea. Tapi lambin hinsahni do sidea pasambor-sambor pambahenan ni sidea.

⁸ Halani ai managam ma hanima,” nini Jahowa, “Bani ari parjongjong-Ku gabe saksi. Ai domma Huputuskon patumpuhon bangsa-bangsa, patumpuhon harajaon, laho manguseihon ringis-Hu bani sidea, ganup pargajag ni gilang-Ku; ai maningon boiskononkon do ganup tanoh on, marhitei apuy ni parsimburuon-Ku.”

Bagah-bagah Hatuahon

⁹ Tapi berehonon-Ku ma hubani bangsa-bangsa bibir na legan anjaha na pitah, ase ganup sidea boi mandilo goran ni Jahowa, anjaha sauhur sidea mambalosi-Si.

¹⁰ Hun dipar ni bah Etiopia das hu utara parujung boanon ni sidea ma Bangku galangan sipanganon.

¹¹ Bani ari ai seng be bador ho halani haganup pambahenanmu, na hinorjahonmu manlawan Ahu; ai padaohon-Ku ma hun tongah-tongahmin hatoalon ni pangenjengmu, anjaha seng be pagijang-gijang diri ho i atas dolog-Ku na pansing in.

¹² Ai tebahonon-Ku do i tongah-tongahmin sada bangsa na toruh maruhur anjaha na masombuh, na marhatengeran bani goran ni Jahowa.

¹³ Ia simasima ni Israel, seng be horjahononni hagedukon barang hatahononni ladung; seng jumpah be bani pamangan ni sidea dilah sipaoto-oto, tapi sonang ma sidea manampal ampa manggompang, seng dong halak na manonggoti.

¹⁴ Marolob-olob ma ho, ale boru Sion, marsurak ma, ale Israel! Marmalas ni uhur ma ho anjaha marmegah-megah humbani gokni uhurmu, ale boru Jerusalem!

¹⁵ Domma ipadaoh Jahowa uhum-Ni dompak ho, domma isiapkon munsumu. Raja ni Israel,

ai ma Jahowa, la do i tongah-tongahmu, seng be habiaranmu hamagouan.

¹⁶ Bani ari ai hatahonon ni halak ma bani Jerusalem, 'Ulang ho mabiar, ale Sion! Ulang palopas tanganmu lambin galek!

¹⁷ Jahowa, Naibatamu do i tongah-tongahmu, puanglima, sibere hamonangan. Marpangulaki do uhur-Ni marholong ni uhur bam.' Malas tumang do uhur-Ni mangidah ho anjaha marolob-olob,

¹⁸ songon bani ari parjumpahan. Padaohon-Ku do hun bam parmaraan anjaha paholangon-Ku do habadoron na mandondoni ho.

¹⁹ Tonggor ma, bani panorang ai marlulu ma Ahu bani na mangodoh-odoh ho. Tapi paluahon-Ku ma na mengkat-engkat, anjaha patumpuon-Ku ma na merap anjaha paubahon-Ku ma habadoron ni sidea gabe puji-pujian ampa hasangapon i sab tanoh on.

²⁰ Bani panorang ai boanon-Ku ma hanima mulak hu tanohnima, bani panorang ai patumpu-tumpuon-Ku ma hanima. Ai bahenon-Ku ma hanima tarbarita anjaha marsangap i tongah-tongah ni sagala bangsa na i tanoh on, sanggah Hupasuang haadongonnima i lobei ni panonggornima," nini Jahowa.

Haggai

Ojur-ojur Laho Pajongjong Rumah Panumbahan Use

1 ¹ Padua-tahunkon dob bangkit raja si Darius, ari sada bulan paonomkon, roh ma hata ni Jahowa marhitei Nabi Haggai bani si Serubabel, anak ni si Sealtiel, panrajai i Juda, ampa hubani Sintua ni Malim Josua, anak ni si Josadak, sonon:

² Sonon do hata ni Jahowa Zebaot, “Bangsa on mangkatahon, ‘Seng roh ope panorangni ase paulion use rumah ni Jahowa.’

³ Halani ai roh ma hata ni Jahowa marhitei Nabi Haggai, sonon,

⁴ ‘Tapi domma roh gakni panorangni bannima mangiani rumahnima na niuhir, tapi anggo Rumah Panumbahan ai mareong ipaturut hanima?’

⁵ Ai pe, sonon do hata ni Jahowa, ‘Paruhurhon hanima ma sonaha na dob iahapkon hanima.

⁶ Buei do itidahkon hanima, tapi otik do ipahuta hanima; mangan do namin hanima, tapi seng bosur; minum do namin hanima, tapi seng sombuh horahnima; marsabing do namin hanima, tapi seng malas angkulanima anjaha ise na marombou, marombou bani parduiton na matolpus do.’

⁷ Sonon do hata ni Jahowa Zebaot, 'Paruhurhon hanima ma, sonaha na dob iahapkon hanima.

⁸ Tangkog ma hanima hu dolog, tarui hanima ma parhayu, anjaha pauli hanima ma Rumah Panumbahan, ase marrosuh ni uhur Ahu ijai, anjaha marsangap Ahu,' nini Jahowa.

⁹ 'Buei do namin iparkirahon hanima, hape tonggor ma, lambin otikni do ai, anjaha ijin ipahuta hanima ai, Hupurpurhon do ai. Mase?' nini Jahowa Zebaot. 'Halani rumah-Ku na mareong ai, hape ganup hanima marsioloskon rumahni bei.

¹⁰ Halani ai do ase ijolomi langit ai namur i atasnima, anjaha ijolomi tanoh in gogohni,

¹¹ anjaha domma Huhatahon roh logou ni ari hu tanoh on ampa hu dolog-dolog, bani gandum, anggur na bayu, minak, bani ganup na tinubuhkon ni tanoh in, bani jolma ampa pinahan ampa bani haganup na hinorjahon ni tangan.'"

¹² Jadi itangihon si Serubabel anak ni si Sealtiel, pakon sintua ni Malim Josua anak ni si Josadak, ampa haganup simasima ni bangsa ai ma sora ni Jahowa, Naibata ni sidea ai, ampa hata ni si Haggai nabi ai, domu hubani parsuruh ni Jahowa, Naibata ni sidea ai bani, jadi marhabiaran ma bangsa ai i lobei ni Jahowa.

¹³ Dob ai ihatahon si Haggai, suruhan ni Jahowa ai ma bani bangsa ai, domu hubani tonah ni Jahowa, sonon, "Ahu do hasomannima," nini Jahowa.

¹⁴ Jadi ipuhoi Jahowa ma tonduy ni si Serubabel, anak ni si Sealtiel, panrajai ni Juda, ampa tonduy ni si Josua, anak ni si Josadak, sintua ni malim ai, ampa tonduy ni haganup simasima ni bangsa ai, gabe roh bei ma sidea mangkorjai horja bani rumah ni Jahowa Zebaot, Naibata ni sidea ai,
¹⁵ ai ma bani ari dua puluh ompat bulan onom.

Hamuliaon ni Rumah Panumbahan na Bayu

2 ¹ Padua-tahunkon dob bangkit raja si Darius, bani ari dua puluh sada bulan pitu, roh ma hata ni Jahowa marhitei si Haggai, nabi ai, sonon,
² “Hatahon ma bani si Serubabel, anak ni si Sealtiel, panrajai ni Juda ampa hubani si Josua, anak ni si Josadak, sintua ni malim ai, ampa hubani haganup simasima ni bangsa ai,
³ ‘Adong ope i tongah-tongahnima na manggoluh, mangidah rumah on ibagas hamuliaonni na parlobei ai? Sonaha ididah hanima sonari? Ai seng songon na lang do in bani pangidahnama?’
⁴ Tapi tenger ma uhurmu, ale Serubabel,” nini Jahowa; “tenger ma homa uhurmu, ale Sintua ni Malim Josua, anak ni si Josadak; tenger ma homa uhurmu, ale bangsa na i tanoh in,” nini Jahowa, “nunut marhorja, ai Ahu do hasomannima,” nini Jahowa Zebaot;
⁵ “romban hubani bagah-bagah, na Huhatahon bannima sanggah na luar hanima hun Masir,

‘Marianan do tonduy-Hu i tongah-tongahnima, ulang mabiar!’

⁶ Ai sonon do hata ni Jahowa Zebaot, ‘Sahali nari, seng sadiha dokahni be, duguron-Ku ma langit pakon tanoh pakon laut ampa darat;

⁷ duguron-Ku ma ganup bangsa sipajuh begu-begu, gabe roh ma na maharga ni ganup bangsa sipajuh begu-begu, gabe gokan-Ku ma rumah on bani hamuliaon,’ nini Jahowa Zebaot.

⁸ ‘Ahu do simada pirak anjaha Ahu do simada omas,’ nini Jahowa Zebaot.

⁹ ‘Jadi bueinan ma hamuliaon ni Rumah Panumbahan na parpudi on, ase na parlobei ondi,’ nini Jahowa Zebaot; ‘anjaha bani ianan on bereon-Ku do hatuahon,’ nini Jahowa Zebaot.”

Bagah-bagah Pasal Pasu-pasu

¹⁰ Paduapuluhompat-arihon, bani bulan siah, padua-tahunkon dob manrajai si Darius, roh ma hata ni Jahowa marhitei si Haggai, nabi ai sonon:

¹¹ Sonon do hata ni Jahowa Zebaot, “Sungkun ma malim naha nini titah pasal on,

¹² ‘Anggo porini iboan sada halak gulei na mapansing ibagas suhi-suhi ni hiouni, anjaha igiut marhitei hiouni ai ruti atap lowoh atap anggur atap minak atap sipanganon na ija pe, gabe pansing do ai?’” Balosan ni malim ai ma, “Lang.”

¹³ Dob ai nini si Haggai ma, “Anggo adong sada halak na mabutak, halani dais bani sada bangkei, manggiut sada humbani nongkan ai, naha, gabe butak do ai?” Balosan ni malim ai ma, “Gabe butak ma ai tongon.”

¹⁴ Dob ai nini si Haggai ma, “Sonai ma halak on, bangsa on i lobei-Hu,” nini Jahowa, ‘lanjar sonai do homa ganup jadi-jadian ni tangan ni sidea, anjaha atap aha pe ginalangkon ni sidea ijai, butak do ai.

¹⁵ Ai pe, paruhurhon hanima ma olat ni ari on hu atas! Sanggah lape iatur batu bani rumah ni Jahowa,

¹⁶ sonaha do na masa bannima? Anggo roh halak bani luhutan pardua puluh sumpitan, hape pitah sapuluh do; anggo roh halak bani parnahan ni anggur, laho manahui lima puluh gusi hunjai, hape pitah dua puluh gusi hansa.

¹⁷ Domma Hulibas hanima marhitei antinganou, hameluson ampa sira-sira, laho mansedahon ganup na hinorjahon ni tangannima, hape lanjar do seng mulak hanima hu Bangku,’ nini Jahowa.

¹⁸ ‘Paruhurhon hanima ma olat ni ari on hu atas, olat ni ari dua puluh ompat, bulan siah on, olat ni ari dob ipasuk onjolan ni rumah ni Jahowa: ‘Paruhurhon hanima ma!

¹⁹ Atap moru do bonih ibagas sopou, atap seng marbuah hayu anggur pakon hayu ara

pakon dalima ampa hayu jetun. Olat ni ari on pasu-pasuon-Ku ma.’”

Bagah-bagah bani si Serubabel

²⁰ Dob ai roh ma hata ni Jahowa paduahalihan hubani si Haggai bani ari dua puluh ompat bani bulan ai, sonon,

²¹ “Hatahon ma bani si Serubabel, panrajai ni Juda, sonon, ‘Sihol do duguron-Ku langit pakon tanoh on,

²² sihol do tunggalingkonon-Ku paratas ni harajaon, anjaha siapkonon-Ku hagogohon ni bangsa sipajuh begu-begu, tunggalingkonon-Ku gareta ampa jolma na mangajak ai, gabe mardabuhan ma huda ampa jolma na mangajak ai, ganup marhitei podang ni hasomanni.

²³ Bani ari ai,” nini Jahowa Zebaot, “buatan-Ku ma ho, ale Serubabel, anak ni si Sealtiel, juakjuak-Kin,” nini Jahowa, “anjaha bahenon-Ku ma ho gabe tintin tokan, ai domma Hupilih ho,” nini Jahowa Zebaot.

Sakaria

Ojur-ojur bani Hamubahon ni Uhur

1 ¹ Bani bulan ualuh, padua-tahunkon dob manrajai si Darius, roh ma hata ni Jahowa bani Nabi Sakaria, anak ni si Berekia, anak ni si Iddo, sonon,

² “Manringis tumang do Jahowa bani ompungnima.

³ Tapi hatahon ma bani sidea, sonon do hata ni Jahowa, ‘Sai mulak ma hanima hu Bangku, ase marpangulaki uhur-Hu dampak hanima,’ nini Jahowa Zebaot.

⁴ ‘Ulang ma hanima songon ompungnima, na niambilanan ni nabi na parlobei in.’ Sonon do hata ni Jahowa Zebaot, ‘Sai mulak ma hanima humbani dalannima na jahat in ampa humbani pambahennima na bajan in.’ Tapi seng itangihon anjaha seng ipardulihon sidea Ahu,” nini Jahowa.

⁵ “Ompungnima, ija do sidea nuan? Anjaha nabi-nabi ai, lalab do sidea manggoluh?

⁶ Tapi anggo hatang-Kin ampa titah-Kin na Hutonahkon bani juakjuak-Ku, nabi-nabi ai, ai lang mangonai do bani ompungnima?” Gabe mubah do uhur ni sidea anjaha ihatahon, “Songon na sinurahon ni Jahowa Zebaot mambahen hu banta,

romban hubani dalanta ampa pambahenanta,
sonai do tongon ibahen hu banta.”

Panonggoran na Parlobei: Siajak Huda

⁷ Bani ari dua puluh ompat bulan sapuluh sada, ai ma bulan Sebat, padua-tahunkon dob manrajai si Darius, roh ma hata ni Jahowa hubani Nabi Sakaria, anak ni si Berekia, anak ni si Iddo sonon,

⁸ “Marpanonggoran do ahu borngin ai, anjaha tonggor ma, sada halak mangajak huda sigerger. Jongjong do ia i holangkolang ni hayu mirtus ibagas sada lombang, anjaha i pudini huda na gerger, na mahuning ampa silopak.

⁹ Dob ai ningku ma, ‘Ai aha do artini in, tuan?’ jadi nini malekat hasomanku marsahap ai ma bangku, ‘Hupatuduhkon pe bamu aha do artini in.’

¹⁰ Dob ai nini dalahi na jongjong i holangkolang ni hayu mirtus ai ma mambalosi, ‘In ma na sinuruh ni Jahowa maniar tanoh on.’

¹¹ Dob ai nini sidea ma mambalosi malekat ni Jahowa na jongjong i holangkolang ni hayu mirtus ai, ‘Domma isiari hanami tanoh on, anjaha tonggor ma, sonang anjaha damei do ganup tanoh on.’

¹² Jadi nini malekat ni Jahowa ai ma mambalosi, ‘Ale Jahowa Zebaot, sadiha dokah nari lang marpangulaki uhur-Mu mangidah Jerusalem ampa mangidah huta ni Juda, na niringisan-Mu ibagas na pitu puluh tahun on?’

¹³ Jadi ibalosi Jahowa ma malekat, na marsahap pakon ahu marhasoman hata na madear ampa hata apoh-apoh.

¹⁴ Dob ai nini malekat hasomanku marsahap ai ma hu bangku: Ambilankon ma: Sonon do hata ni Jahowa Zebaot, 'Gara tumang do uhur-Hu ibagas mangkopkop Jerusalem ampa Sion,

¹⁵ tapi gajag tumang do ringis-Hu dompak bangsa sipajuh begu-begu, na jungkat ai, ai sanggah manggila Ahu otik, gabe inunut sidea manambahi hamagouan ai.'

¹⁶ Halani ai, sonon do hata ni Jahowa, 'Domma marpangulaki uhur-Hu mangidah Jerusalem, maningon paulion do use rumah-Ku ibagas huta ai,' nini Jahowa Zebaot, anjaha pagistangon do tali sibar-sibar bani Jerusalem.

¹⁷ Ambilankon ope: Sonon do hata ni Jahowa Zebaot, 'Sirnip ope sagala huta na dong Bangku bahenon-Ku bani na madear, anjaha ulakan ni Jahowa ope mangapohi Sion, anjaha pilihon-Ni use Jerusalem.'"

Panonggoran na Paduahon: Ompat Tanduk ampa Ompat Panopa

¹⁸ (1-1) Dob ai hukawahkon ma dompak datas, anjaha tonggor ma, adong ma ompat tanduk.

¹⁹ (2-2) Jadi ningku ma dompak malekat na marsahap pakon ahu, "Ai aha do arti ni on?"

Nini ma mambalosi ahu, “In ma da tanduk na paerapkon Juda, Israel ampa Jerusalem.”

²⁰ (2-3) Dob ai ipataridahkon Jahowa ma bangku ompat panopa.

²¹ (2-4) Jadi ningku ma, “Aha do na sihol bahenon ni sidea ase roh?” Nini ma mambalosi, “Ai ma da tanduk na paerapkon Juda, gabe seng dong na boi padirgak uluni; na roh do sidea on laho manonggoti sidea, laho mamunukkon tanduk ni bangsa-bangsa, na pagijang tandukni dompak tanoh Juda, laho pamerapkon ai.”

Panonggoran na Patoluhon: Halak Sijolom Tali Sibar-sibar

2¹ (2-5) Dob ai mangkawah ma use ahu dompak datas, anjaha tonggor ma; sada dalahi jolom bani tali sibar-sibar ibagas tanganni.

² (2-6) Dob ai ningku ma, “Laho huja ham?” Nini ma mambalosi ahu, “Laho manibar Jerusalem, laho mangidah barang sadiha do bolagni anjaha sadiha do ganjangni.”

³ (2-7) Jadi tonggor ma, roh ma malekat na marsahap pakon ahu hinan, anjaha roh ma homa sada malekat na legan manjumpahkonsi,

⁴ (2-8) anjaha nini ma dompaksi, “Ne ma, hatahon ma hubani anak garama na ijai ai. Gabe ianan na buha ma Jerusalem halani hinabuei ni jolma ampa pinahan na i tongah-tongahni.

⁵ (2-9) Ai Ahu do,” nini Jahowa, “gabe tembok apuy inggot huta ai, anjaha Ahu do gabe hamuliaon i tongah-tongahni.”

Naibata i Tongah-tongah ni Bangsa-Ni

⁶ (2-10) “Podas! Podas! Lintun ma hanima hun tanoh par Utara,” nini Jahowa, “ai humbani deisa na ompat in do sihol patumpuon-Ku hanima,” nini Jahowa.

⁷ (2-11) “Podas, maporus ma hu Sion, hanima na marianan rap pakon boru Babel.”

⁸ (2-12) Ai sonon do hata ni Jahowa Zebaot pasal bangsa-bangsa na mangayob hanima, “Barang ise na manjamah hanima, anak ni matani do na jinamahni ijai.

⁹ (2-13) Tonggor ma, mardas tangan ma Ahu bani sidea, ase gabe taban-taban sidea bani halak na pinarjabolon ni sidea na sain dokah,” ase ibotoh hanima, paboa Jahowa Zebaot do na marsuruh ahu.

¹⁰ (2-14) “Marolob-olob anjaha marmalas ni uhur ma ho, ale boru Sion, ai tonggor ma, na roh ma Ahu marianan i tongah-tongahmin,” nini Jahowa.

¹¹ (2-15) Jadi buei ma bangsa na pasadahon dirini bani Jahowa bani ari ai, gabe bangsa-Ni ma sidea, anjaha marianan ma sidea i tongah-tongahmin, ase ibotoh ho, paboa Jahowa Zebaot do na manuruh ahu marayak ho.

¹² (2-16) Jadi ainon ni Jahowa ma use Juda bahen parbagianan-Ni i tanoh na mapansing in, anjaha pilihon-Ni ma use Jerusalem.

¹³ (2-17) Sip ma ganup dunia on i lobei ni Jahowa! Ai domma hehe la humbani ianan hapansingon-Ni ai.

Panonggoran na Paompatkon: Sintua ni Malim Josua

3 ¹ Dob ai ipataridahkon ma hu bangku si Josua, sintua ni malim ai, jongjong i lobei ni malekat ni Jahowa, anjaha setan ai jongjong i siamunni, manukas-nukasisi.

² Tapi nini Jahowa ma dampak setan ai, “Papaan ni Jahowa ma ho, ale Setan! Jahowa, na manodoh Jerusalem ma na mamapai ho! Ai lang sipu-sipu do ia on, na nidokdok humbani apuy?”

³ Tapi marhiou na mabutak do si Josua jongjong i lobei ni malekat ai.

⁴ Jadi nini malekat ai ma dampak halak na jongjong i lobeini ai, “Tanggali ma baju na butak ai hun bani.” Tapi hubani sandiri, nini ma, “Tonggor ma, domma hupadaoh hun bamu panlanggaronmu, anjaha sorungknonku ma bamu pakeian pesta.”

⁵ Jadi ningku ma, “Mahua inahkon sidea ma sada gotong-gotong bani uluni ai.” Jadi inahkon sidea ma sada gotong-gotong na borsih hu atas uluni,

anjaha isorongkon ma homa hiou bani; anjaha malekat ni Jahowa ai jongjong i lambungni.

⁶ Dob ai nini malekat ni Jahowa ai ma palumbahon si Josua,

⁷ “Sonon do hata ni Jahowa Zebaot, ‘Anggo mardalan ho bani dalan-Ku, anjaha idalankon ho horja na Huondoskon in bam, jadi ho ma na manggomgom rumah-Ku ampa na manjagai alaman-Ku, anjaha lopason-Ku ma ho marparsaoran ampa sidea na jongjong on ijon.’

⁸ Tangihon ma, ale Sintua ni Malim Josua, ho ampa hasomanmu na jongjong i lobeimin, ai tanda pasal na sihol roh do hanima, ‘Tonggor ma, parohon-Ku ma juakjuak-Ku, si Tumbor.

⁹ Ai tonggor ma, bani batu na dob Hutibalhon ai i lobei ni si Josua (bani batu na sasada ai adong pitu mata), hujai ma uhirhonon-Ku suratni ai,’ nini Jahowa Zebaot, ‘anjaha Ahu manasap hajahaton ni tanoh in ibagas na sadari.

¹⁰ Bani ari ai,’ nini Jahowa Zebaot, ‘ganup hanima marsiontangan ma marlinggom hu toruh ni hayu anggurni ampa hu toruh ni hayu arani.’”

Panonggoran na Palimahon: Parsuluhan Omas ampa Dua Hayu Jetun

4 ¹ Dob mulak malekat, hasomanku marsahap ai, ipuhoi ma ahu, songon sada halak na pinuhoan humbani na modom.

² Ihatahon ma hu bangku: Aha dong ididah ham?" Hubalosi ma, "Huidah do sada parsuluhan, pitah humbani omas, parminakanni i atasni; pitu do lampu i atasni ampa pitu pipa bani lampu na i atasni ai.

³ Anjaha adong do dua hayu jetun jongjong i lambungni, sada hampit siamun ni parsuluhan ai anjaha na sada nari ai hampit sambilou.

⁴ Dob ai ningku ma dompak malekat, na marsahap pakon ahu ai, "Ai aha do artini on, ale tuannami?"

⁵ Dob ai nini malekat hasomanku marsahap ai ma mambalosi ahu, "Ai seng ibotoh ham aha do artini in?" Jadi ningku ma, "Lang, tuanku."

⁶ Dob ai nini ma dompak ahu, "On ma hata ni Jahowa hubani si Serubabel, 'Seng marhitei bala barang marhitei gogoh, tapi marhitei Tonduy-Hu do ase saud,' nini Jahowa Zebaot.

⁷ Ai aha do ho, ale dolog na bolon? Maningon gabe pamah do ho i lobei ni si Serubabel. Angkatonni ma hu atas batu parsuhi ai marhasoman surak-surak, 'Jengesni in, dearni in!'"

⁸ Ambahni ai roh do hata ni Jahowa hu bangku sonon,

⁹ "Tangan ni si Serubabel do na dob mambahen onjolan ni rumah on, tanganni do homa na sihol mandobkon on. Jadi botohon nasiam ma, Jahowa Zebaot do marsuruh ahu bani nasiam.

¹⁰ Ai barang ise na mapas bani ari pamungkah na etek ai, maningon marolob-olob sidea mangidah batu parsuhi, na ibagas tangan ni si Serubabel. Ia na pitu ai, ai ma Tonduy ni Jahowa, ai ma maniar ganup tanoh on.”

¹¹ Dob ai ningku ma hu bani, “Ai aha do arti ni na dua hayu jetun na hampit siamun ampa sambilou ni parsuluhan ai?”

¹² Ningku ma paduahalihon hu bani, “Ai aha do arti ni ranting ni hayu jetun na dua ai, na i lambung ni pipa omas na dua ai panguseian ni minak ai?”

¹³ Dob ai nini ma hu bangku, “Seng ibotoh ham, aha do artini ai?” Balosku, “Lang, tuannami.”

¹⁴ Jadi nini ma, “Sidea ma sidua halak na mininakan ai, na jongjong i lobei ni Jahowa, sigomgom ganup tanoh on.”

Panonggoran na Paonomkon: Buku Ginulung na Habang

5 ¹ Dob ai mangkawah ma ahu use dompak datas, jadi tonggor ma, sada buku ginulung na habang.

² Jadi nini ma hu bangku, “Aha dong ididah ham?” Ningku ma mambalosi, “Huidah do sada buku ginulung na habang; ganjangni dua puluh asta anjaha bolagni sapuluh asta.”

³ Dob ai nini ma hu bangku, “In ma papa na maniar sab tanoh on; ai sagala panangko siapkononkon

do domu hujai, hunjon-hujan, anjaha sagala sibijahon na tongon, siapkononkon do domu hujai, hunjon-hujan.

⁴ Domma Hupaturut laho papa ai,” nini Jahowa Zebaot, “jadi masukanni ma rumah ni panangko ampa rumah ni halak sibijahon na tongon marhitei goran-Ku; marianan ma ai i rumahni anjaha boiskononni ma parhayuni ampa batu-batuni.”

Panonggoran na Papituhon: Naboru na Ibagas Tapongan

⁵ Dob ai roh ma hundohor malekat hasomanku marsahap ai, anjaha nini ma hu bangku, “Kawahkon ma dampak datas, anjaha tonggor ma atap aha do na roh hundohor ai!”

⁶ Jadi ningku ma, “Ai aha do ai tongon?” Nini ma, “Tapongan do na roh hundohor ai.” Anjaha nini ope, “Ai ma hajahaton ni sidea i sab tanoh in.”

⁷ Anjaha tonggor ma, tarangkat ma tutupni humbani simbora ai, anjaha adong do sada naboru hundul ibagas tapongan ai.

⁸ Dob ai nini ma, “In ma hajahaton ai.” Jadi ionjarhon ma naboru ai hubagas tapongan ai, anjaha inahkon ma simbora na sangkimpal ai hu babou ni ai.

⁹ Dob ai mangkawah ma ahu dampak datas, gabe tonggor ma, dua naboru roh hundohor anjaha logou do ibagas habong ni sidea, songon habong

ni sitindaalog do habong ni sidea, anjaha iusung sidea ma tapongan ai i holangkolang ni tanoh pakon langit.

¹⁰ Jadi ningku ma bani malekat hasomanku marsahap ai, “Huja do boanon ni sidea tapongan ai?”

¹¹ Nini ma hu bangku, “Hu tanoh Sinear, laho paulihon sada rumah bani ijai;” siapkansi ai inahkon sidea ma tapongan ai bani iananni.

Panonggoran na Pauluhkon: Gareta na Ompat

6 ¹ Dob ai mangkawah ma use ahu dompak datas, anjaha tonggor ma, ompat gareta roh hun holangkolang ni dua dolog; ia dolog ai humbani tombaga do.

² Bani gareta na parlobei adong do huda sigenger, bani gareta na paduahon huda sibirong,

³ bani gareta na patoluhon huda silopak, bani gareta na paompatkon huda sibolang.

⁴ Dob ai ningku ma bani malekat na marsahap pakon ahu ai, “Ai aha do arti ni ai, ale tuanku?”

⁵ Jadi nini malekat ai ma mambalosi ahu, “Na bingkat do sidea hu deisa ni langit na ompat in, dob mangadap sidea hu lobei ni Tuhan sigomgom ganup tanoh on.”

⁶ Gareta na marhuda sibirong ai laho dompak tanoh na hampit utara, na lopak ai laho dompak

tanoh na hampit hapoltakan, sibolang ai dompak tanoh na hampit dangsina,
7 anjaha sigerger ai laho dompak tanoh na hampit hasundutan. Sanggah na roh ai huda ai laho maniaro tanoh on, nini ma, “Laho ma, lioti hanima ma tanoh on!” Jadi ilioti sidea ma tanoh on.
8 Dob ai idilohon ma hu bangku, “Tonggor ma, na laho dompak tanoh na hampit utara ai, ai ma na pahombun ringis-Ku i tanoh na hampit utara ai.”

Sortali na Bani si Josua; Tugah-tugah Pasal Tumbor

9 Dob ai roh ma hata ni Jahowa hu bangku, sonon,
10 “Jalo ma sibere-bere humbani halak na tarbuang, humbani si Heldai, si Tobia ampa humbani si Jedaya na dob mulak hun Babel; lanjar laho ma ho bani ari ai hu rumah ni si Josia, anak ni si Sepanya.
11 Jalo ma humbani sidea pirak ampa omas, anjaha pauli ma sada sortali anjaha nahkon ma ai bani ulu ni si Josua, anak ni si Josadak, sintua ni malim ai,
12 anjaha hatahon ma hu bani, ‘Sonon do hata ni Jahowa Zebaot, “Tonggor ma, sada dalahi na margoran si Tumbor. Bani iananni do martumbor anjaha ia do na paulihon rumah ni Jahowa.”
13 Ia do tongon na paulihon rumah ni Jahowa; anjaha ia do sijujung hamuliaon; hundul anjaha manrajai do ia bani paratasni. Adong do sada malim i lambung ni paratasni; anjaha masa do

pangarusion na mardamei-damei i tongah-tongah ni sidea na dua ai.

¹⁴ Ia sortali ai tading do ai i rumah ni Jahowa, bahen pardingatan bani si Heldai, si Tobia, si Jedaya ampa si Josia anak ni si Sepanya.

¹⁵ Roh do homa halak humbani tanoh na daoh mangurupi laho paulihon rumah ni Jahowa, ase ibotoh nasiam, Jahowa Zebaot do na marsuruh ahu bani nasiam. Maningon jadi do on, anggo sintong itangihon nasiam sora ni Jahowa, Naibata nasiam.”

Parugamaon na Sintong: Seng Parpuasaon, Tapi Pambalosion do

7 ¹ Paompat-tahunkon dob manrajai raja Darius, roh ma hata ni Jahowa hubani si Sakaria, bani ari ompat bulan siah, ai ma bulan Kislev, ² sanggah na isuruh si Betel-Sareser pakon si Regem-Melek suruhanni, laho manungkun Jahowa, ³ lanjar manungkun malim-malim na i rumah ni Jahowa Zebaot ampa nabi-nabi, “Naha, nunutonnami ope tangis-tangis ampa marpuasa bani bulan lima, songon na somal binahennami, domma pala martahun-tahun?”

⁴ Jadi roh ma hata ni Jahowa Zebaot hu bangku sonon,

⁵ “Hatahon ma hubani ganup halak na i tanoh on ampa hubani malim, ‘Ia marpuasa pe hanima anjaha tangis-tangis bani bulan lima ampa bulan

pitu ibagas na pitu puluh tahun on, ai Bangku do hanima na marpuasa ai?

⁶ Anjaha anggo mangan ampa minum hanima, ai lang bannima sandiri do hanima na mangan ampa na minum ai?’

⁷ Ai lang sonai hinan do hata na ipatugah Jahowa marhitei pamangan ni nabi na ijia, sanggah niiankon ope Jerusalem anjaha marsonang-sonang rap pakon huta-huta inggotni ai, anjaha adong ope na mangiankon tanoh dangsina ampa tanoh bornoh ai?”

⁸ Dob ai roh ma hata ni Jahowa hubani si Sakaria sonon,

⁹ “Sonon do hata ni Jahowa Zebaot, dalankon ma uhum na sintong, patuduhkon ma dear layak ampa idop ni uhur bani ganup hasomanni.

¹⁰ Ulang odoh-odoh na mabalu, na so marinang, na so marbapa panginsolat atap na musil; anjaha ulang ma adong hun bannima na mamingkirhon na jahat dampak hasomanni ibagas uhurni.”

¹¹ Tapi manjua do sidea manangihon ai, hengkeng do sidea anjaha itutup pinggolni ulang ibogei.

¹² Ipamampir do uhurni songon batu intan, ase ulang ibogei sidea titah ampa hata na tinongos ni Jahowa Zebaot marhitei Tonduy-Ni ampa marhitei nabi na parlobei ai. Halani ai do ase gajag ringis ni Jahowa Zebaot.

¹³ “Songon Ahu na dilo-dilo, hape seng itangihon sidea, sonai ma sidea dilo-dilo, tapi seng tangihonon-Ku,” nini Jahowa Zebaot.

¹⁴ “Halani ai domma Hupurpurhon sidea hu tongah-tongah ni sagala bangsa, na so tinanda ni sidea hinan, gabe tarulang tanoh ai dob itadingkon sidea, seng dong be na marhujai-hujon. Sonai ma tanoh na madear ai gabe halimisan ibahen sidea.”

Bagah-bagah Hatuahon

8 ¹ Dob ai roh ma hata ni Jahowa Zebaot hu bangku,

² “Sonon do hata ni Jahowa Zebaot, ‘Simburu tumang do Ahu mangkompok Sion, anjaha gila tumang do uhur-Hu mangkompok sidea.’

³ Sonon do hata ni Jahowa, ‘Mulak ma Ahu use hu Sion anjaha marianan i tongah-tongah ni Jerusalem, anjaha targoran ma Jerusalem: Huta na bujur, anjaha dolog ni Jahowa Zebaot: Dolog Na Pansing.’

⁴ Sonon do hata ni Jahowa Zebaot, ‘Maningon hundul do use dalahi na matua ampa naboru na matua i alaman ni Jerusalem, ganup marsijolom tungkotni bei ibagas tanganni halani tuani.

⁵ Anjaha alaman ni huta ai gok dakdanak dalahi ampa dakdanak naboru na marguro-guro i alaman ai.’

⁶ Sonon do hata ni Jahowa Zebaot, 'Anggo halongangan ai bani pangidah ni simasima ni bangsa on bani panorang on, mintor halongangan ma gakni ai Bangku?' Nini Jahowa Zebaot.

⁷ Sonon do hata ni Jahowa Zebaot, 'Tonggor ma, Ahu ma paluahkon bangsang-Ku hun tanoh na hampit hapoltakan ampa hun tanoh na hampit hasundutan,

⁸ anjaha Ahu mamboan sidea mulak marianan i tongah-tongah ni Jerusalem; jadi gabe bangsang-Ku ma sidea anjaha gabe Naibata ni sidea ma Ahu ibagas hasintongan ampa hapintoron.'

⁹ Sonon do hata ni Jahowa Zebaot, 'Pahinsah hanima ma tangannima, hanima na mambogei hata on, bani panorang on humbani pamangan ni nabi-nabi, bani ari ipasukkon onjolan ni rumah ni Jahowa Zebaot, ase boi ipauli rumah ai.

¹⁰ Ai i lobei ni ari on seng dong manjalo upah halak atap upah aha pe humbani pinahan; sonai homa bani halak na marhujai-hujon seng dong hahorason i lobei ni munsuh ai; ai marsilawanan do jolma samah jolma Hubahen.

¹¹ Tapi anggo sonari seng be bahenon-Ku hubani simasima ni bangsa on, songon sapari,' nini Jahowa Zebaot,

¹² 'Ai suankonon-Ku ma damei: Bereon ni hayu anggur ma buahni, tanoh on mambere gogohni, anjaha langit ai mambere namurni; bereon-Ku

ma ganupan ai bani simasima ni bangsa on gabe parbagiananni.

¹³ Hanima ginompar ni Juda ampa Israel, songon hanima na dob gabe bangsa sibura-buraonkon na saindokah i tongah-tongah ni bangsa-bangsa, sonai ma hanima gabe pasu-pasu tumpakon-Ku. Ulang mabiar, tapi pahinsah hanima ma tangannima.'

¹⁴ Ai sonon do hata ni Jahowa Zebaot, 'Songon na dob Husurahon mambahen roh hamagouan bannima, sanggah na pinaroh ni ompungnima ringis-Hu,' nini Jahowa Zebaot, 'anjaha seng marpangulaki uhur-Hu,

¹⁵ sonai do sura-surang-Ku bani panorang on laho mambahen na madear bani Jerusalem ampa bani ginompar ni Juda; ulang mabiar.

¹⁶ Tapi on ma na maningon sibahenonnima: Ganup ma mangkatahon hata hasintongan bani hasomanni anjaha idalankon uhum na bonar bani horbangannima.

¹⁷ Ulang ma ipingkiri atap ise ibagas uhumni hamagouan bani hasomanni, anjaha ulang ma iharosuhkon hanima na so sintong, ai magigi do uhur-Hu mangidah na sonai ai ganup,'" nini Jahowa.

¹⁸ Dob ai roh ma hata ni Jahowa Zebaot hu bangku,

¹⁹ "Sonon do hata ni Jahowa Zebaot, 'Parpuasaan bani bulan ompat, bani bulan lima, bani bulan pitu, bani bulan sapuluh gabe malas ni uhur do ai ampa

hasonangan bani ginompar ni Juda, nai ma tongon, gabe pesta parolob-oloban. Halani ai haholongi hanima ma hasintongan ampa damei!’

²⁰ Sonon do hata ni Jahowa Zebaot, ‘Na roh ope bangsa-bangsa ampa pangisi ni huta-huta na bolon,

²¹ pangisi ni huta na sada laho bani na sada nari, mangkatahon: Laho ma hita marsombah bani Jahowa, mangindahi Jahowa Zebaot!’ Ahu pe laho do hujai.”

²² Tongon tene, roh do magira buei bangsa sonai homa bangsa na gogoh mangindahi Jahowa Zebaot i Jerusalem anjaha marsombah i lobei ni Jahowa.’

²³ Sonon do hata ni Jahowa Zebaot, ‘Bani ari ai tangkapon ni sapuluh halak humbani bangsa na marbagei-bagei sahap ai ma sada halak Jahudi bani sisi ni hiuni anjaha ihatahon, “Rap ma hita laho, ai domma ibogei hanami, Naibata do hasoman nasiam.” ’

Hamonangan Marimbang Munsuh

9 ¹ Pangungkabon: Roh do hata ni Jahowa dompak tanoh Hadrah anjaha sogop i Damaskus. Ai Jahowa do simada huta-huta na i Aram ampa ganup marga ni Israel,

² sonai homa Hamat, na marbalog hujai, Tirus ampa Sidon, age pe pentar tumang sidea.

³ Tongon, ipauli Tirus do bani sada benteng anjaha ipajunjun bani pirak songon orbuk ampa omas songon hubang na i alaman;

⁴ tapi tangar ma, tabanon ni Jahowa ma huta ai, sampakkonon-Ni ma bentengni ai hu laut, anjaha bois ma huta ai panganon ni apuy.

⁵ Idahon ni Askalon ma ai, gabe mabiar; age Gasa, jadi hitir ma; Ekron pe maningon bador do ia pasal siarapkononni ai. Maningon masab do raja hun Gasa, anjaha seng marpangisi ia Askalon.

⁶ Anak salong-salongan mando marianan i Asdod, anjaha masabkonon-Ku ma pangenjengon ni halak Palistim.

⁷ Buaton-Ku ma daroh ai hun pamanganni ampa hasamboron na hinorjahon ni sidea ai hun holangkolang ni iponni; gabe simasima do age sidea bani Naibatanta, gabe songon sada marga do sidea i Juda, anjaha Ekron gabe songon halak Jebusi.

⁸ Ahu sandiri mangawal bani rumah-Ku dompak halak na marhujai-hujon; seng dong be sipanosak-nosak na mandorab sidea, ai matang-Ku sandiri do nuan mangidah ai.

Raja ni Sion

⁹ Marmalas ni uhur tumang ma ho, ale boru Sion, marolob-olob ma ho, ale boru Jerusalem! Tonggor ma, na roh do Rajamin marayak ho; parpintor

anjaha siparmonang do la. Toruh do uhur-Ni anjaha mangajak halode, anak ni halode boru-boru.

¹⁰ Siapkonon-Ni do gareta porang hun Efraim ampa huda porang hun Jerusalem, siapkonon-Ni do homa sior na pinakei marporang. Dob ai ambilankonon-Ni ma damei bani bangsa-bangsa, anjaha gomgoman-Ni hun laut hu laut, hun Eprat das ronsi ujung ni tanoh on.

Haluahon ampa Olob-olob

¹¹ Marhalanohon ni daroh parpadananmu paluahon-Ku do homa halak na tarbuang hun bam, humbani godung, na so marisi bah.

¹² Mulak ma hanima hu bentengnima, hanima na tartangkap, lompit dua do pasuangon-Ku bannima.

¹³ Ai Husintak do Juda Bangku songon sior, anjaha Efraim do Hubahen gabe lingkitni. Diloon-Ku do anakmu, ale Sion, manlawan anakmu ale Tanoh Gorik, anjaha bahenon-Ku ma ho songon podang ni puanglima.

¹⁴ Jadi talar ma Jahowa ibabou ni sidea, anjaha luar lingkit-Ni songon hilap; sompulon ni Naibata Jahowa ma tarompit anjaha bingkat ma la.

¹⁵ Jahowa Zebaot do na mangondingi sidea, jadi monang ma sidea anjaha bois idogei batu ni umbalang; jadi inumon ni sidea ma daroh ni sidea songon anggur, gabe gok ma songon batil panggalangan, songon suhi-suhi ni anjapanjap.

¹⁶ Bani ari ai urupan ni Jahowa Naibata ni sidea ma sidea, ai hulanan ni bangsa-Ni do sidea; ai songon batu intan ni sortali, sonai do maningon marsinondang sidea i tanohni.

¹⁷ Tongon, dearni in anjaha jengesni in ai! Gandum ampa anggur martumbor ibahen, sonai homa anak parana ampa anak boru.

Jahowa Tumang do Sibere Haluahon

10 ¹ “Pangindo nasiam ma udan humbani Jahowa bani panorang mungkah ni parudan; Jahowa do sibahen hambun ampa habahaba, la do sibere udan bani nasiam ampa udan hubani sagala suan-suanan na i juma.

² Ai ladung do isahapkon terapim, anjaha sipartondung manondungi sipaoto-oto; nipi na so tongon do ihatahon sidea, anjaha apoh-apoh na lumei iberehon. Halani ai kahou do sidea songon hulanan ni biribiri, anjaha masombuh do sidea, halani lang adong parmahan.

³ Manringis do Ahu bani parmahan anjaha uhumon-Ku do sipambobai; ai isarihon Jahowa Zebaot do hulanan-Ni, ai ma ginompar ni Juda, anjaha bahenon-Ni do sidea songon huda pinajagar i parporangan.

⁴ Humbani sidea do rohni batu parsuhi, humbani sidea do homa paku ni lampolampo; humbani

sidea do rohni panah sipakeion i parporangan, humbani sidea do rohni haganup tene siparkuasa.

⁵ Doskon puanglima do sidea i parporangan, na mandogei munsuhni ibagas hubang na i alaman; nai ma, marporang do sidea, anjaha bador do ibahen sidea bala siparhuda, ai Jahowa do hasoman ni sidea.

⁶ Margogoh do bahenon-Ku ginompar ni Juda anjaha paluahon-Ku ginompar ni si Josep. Boanon-Ku do sidea mulak, ai marpangulaki do uhur-Hu mangidah sidea, anjaha gabe songon na so onggga Huambukkon do sidea holi idahon, ai Ahu do Jahowa Naibata ni sidea, anjaha tangihonon-Ku do sidea.

⁷ Gabe doskon puanglima do ia Efraim, anjaha malas uhur ni sidea songon binahen ni anggur. Idahon ni anak ni sidea ma ai gabe marmegah-megah, anjaha marolob-olob uhur ni sidea ibagas Jahowa.

⁸ Bahenon-Ku ma tanda bani sidea laho patumpuhon sidea; ai domma Hutobus sidea, anjaha pabueion-Ku do sidea songon sapari.

⁹ Age pe Hupamerap sidea i tongah-tongah ni bangsa-bangsa, dingaton ni sidea do Ahu i nagori na madaoh, jadi manggoluh ma sidea rap pakon dakdanak ni sidea anjaha mulak use.

¹⁰ Boanon-Ku do sidea mulak hun tanoh Masir, anjaha patumpuon-Ku sidea hun tanoh Assur; jadi

boanon-Ku ma sidea mulak hu tanoh Gilead ampa hu Libanon, pala seng dong be hasiatan bani sidea ijai.

¹¹ Diparan ni sidea ma Laut Masir; bogbogan ma gilumbang ni laut ai, anjaha pahorahon ganup na bagas i Bah Nil. Reongkonon ma gijang ni uhur ni Assur, anjaha paereton tungkot harajaon ni Masir.

¹² Pargogohon-Ku ma sidea marhitei Jahowa, anjaha mamuji-muji sidea ibagas goran-Ni,” nini Jahowa.

Parseda ni Libanon ampa Basan

11 ¹ Buka ma labahmu ale Libanon, ase iboiskon apuy ni hayu aresmin!

² Mandoruhi ma ho, ale hayu sipres, ai domma maroboh hayu ares, anjaha siap na banggal-banggal ai! Mandoruhi ma, ale jajabi na i Basan, ai domma itobas harangan toras ai!

³ Tangar, doruh-doruh ni parmahan, ai domma siap hasangapon ni sidea! Tangar, paraum ni singa, ai domma siap hamuliaon ni Jordan!

Iondoskon Bangsa ai bani Parmahan na Jahat

⁴ Sonon do hata ni Jahowa Naibatanku, “Parmahani ma biribiri sisayaton in!

⁵ Halak na mamboli sidea manayati sidea anjaha seng marsalah sidea iahap, anjaha sidea na manjualsi mangkatahon, ‘Pinuji ma Jahowa, ai

domma gabe bayak ahu.’ Seng harga sidea bani parmahan ni sidea.

⁶ “Ahu pe, seng be hargaan-Ku pangisi ni tanoh on,” nini Jahowa. “Tonggor ma, Ahu sandiri padaskon jolma in sada-sada hubagas kuasa ni hasomanni ampa hubagas kuasa ni rajani; jadi parsedaon ni sidea ma tanoh on anjaha sahalak pe lang paluahon-Ku humbani tangan ni sidea.

⁷ Anjaha Ahu do na marmahan biribiri sisayaton in bani sipartiga-tiga biribiri. Hubuat ma Bangku dua simambu: Sada Hugoran Haholongan, na sada nari Pardomuan; anjaha Huparmahan ma biribiri in.

⁸ Ibagas sabulan Husiapkon ma parmahan sitolu halak ai. Dob ai lang sabar be Ahu mangidah sidea, sidea pe sobalan ma Bangku.

⁹ Jadi ningku ma, ‘Seng marosuh be Ahu marmahan hanima. Matei hujin na matei in; bois hujin na bois in, anjaha paturut hujin na tading in marsipangan daging ni hasomanni.’

¹⁰ Dob ai Hubuat ma simambu-Hu Haholongan ai, Huponggolhon ma ai, laho manlangkon padan na Hubahen ai bani ganup bangsa-bangsa,

¹¹ masab ma padan ai bani na sadari ai. Jadi mangahap ma sipartiga-tiga biribiri ai, na mardiateihon Ahu ai, paboa hata ni Jahowa do ai hape.”

¹² Dob ai ningku ma bani sidea, “Anggo dear ninuhur nasiam, bere nasiam ma bangku upahku,

anggo lang, paturut nasiam ma hujin. Jadi itimbang sidea ma upahku tolu puluh rupiah.”

¹³ Tapi nini Jahowa ma hu bangku, “Gijigkon ma in hu poti parartaan ai, ai ma harga na jagar, na tinaksir ni sidea Bangku.” Jadi hubuat ma sitolu puluh rupiah ai, anjaha hugijigkon ma ai hu poti parartaan ai, na ibagas rumah ni Jahowa.

¹⁴ Dob ai huponggolhon ma simambuhu na paduahon ai, ai ma Pardomuan ni Juda ampa Israel.

¹⁵ Dob ai nini Jahowa ma hu bangku, “Buat ma sahali nari bam parugas ni sada parmahan na jahat.

¹⁶ Ai tonggor ma, Ahu pabangkit sada parmahan i tanoh on, na so manarohon na laho magou in, na so mangindahi na kahou in, na so mangindahi na ugahan in, na so marmuduhon na jorgit in, tapi na mamboiskon daging ni na mombur anjaha na mangkiskisi ronsi holiholini.

¹⁷ Magou ma parmahan-Ku na so margagan, na manadingkon biribiri in! Podang do mangonai bani tanganni ampa bani matani siamun. Sai na laho melus do tanganni, anjaha na laho golap do mata siamunni.”

Hasosakan ni Jerusalem ampa Haluahonni

12 ¹ Pangungkabon humbani Naibata. Hata ni Jahowa pasal Israel. Sonon do hata ni

Jahowa, sipaherbang langit, sipajonam tanoh on anjaha na manjadihon tonduy ibagas jolma in,
² “Tonggor ma, Ahu mambahen Jerusalem gabe panginuman hamabukon bani haganup bangsa inggot; das do ai homa hu Juda sanggah pangkubun ni Jerusalem.

³ Bani ari ai bahenon-Ku ma Jerusalem gabe batu pangujian gogoh bani haganup bangsa; anjaha sagala na sihol mangangkat ai luha ma ia bahenonni; anjaha sagala bangsa na i tanoh on martumpu-tumpu sihol mangimbang huta ai.”

⁴ Bani ari ai nini Jahowa, “Hirjat ma bahenon-Ku sagala huda, anjaha ratou na mangkundulisi. Tapi anggo mangidah ginompar ni Juda kawah do matang-Ku; huda ni sagala bangsa ai, pitung do ganupan bahenon-Ku.

⁵ Dob ai hatahonon ni kopala-kopala ni Juda ma ibagas uhur ni sidea, ‘Marhagohon do Jerusalem marhitei Jahowa Zebaot, Naibata ni sidea ai.’

⁶ Bani ari ai Ahu mambahen kopala-kopala ni Juda songon hudon parapuyan i tongah-tongah ni soban, songon rigapan i tongah-tongah ni radean; jadi boiskononni ma sagala bangsa inggot hampir siamun ampa hampir sambilou, tapi anggo Jerusalem totap do jongjong bani iananni hinan.

⁷ Jadi parlobei ma bereon ni Jahowa hamonangan bani lampolampo ni Juda ase ulang mangenjeng

habanggalon ni rumah ni si Daud ampa
habanggalon ni pangisi ni Jerusalem dompak Juda.

⁸ Bani ari ai ondingan ni Jahowa do pangisi ni
Jerusalem, gabe doskon si Daud ma sigalekan
humbani sidea bani ari ai, anjaha ginompar ni si
Daud, songon Naibata, songon malekat ni Naibata
i lobei ni sidea.

⁹ Bani ari ai siapkonon-Ku ma sagala bangsa-bangsa
na roh mamorang Jerusalem.”

Tangis Panolsolion Mardingat na Tarpantom ai

¹⁰ “Anjaha useihonon-Ku ma bani ginompar ni
si Daud ampa bani pangisi ni Jerusalem tonduy
paridop ni uhuran ampa partonggoon, gabe
patonggor-tonggoron ni sidea ma ia, na dob
pinantom ni sidea ai; anjaha tangisan ni sidea ma ia
songon panangisi bani anak sasada, anjaha pusok
tumang uhur ni sidea manangisi songon panangisi
bani anak bunga tubuh.

¹¹ Bani ari ai masa ma partangison bolon i
Jerusalem songon partangison pasal Hadad Rimon
i habungan Megiddo.

¹² Tangis ma pangisi ni tanoh on, pulig mar
sasaompung; ginompar ni si Daud, na saompung
pulig, parinangon ni sidea homa pulig; ginompar
ni si Natan, na saompung pulig, parinangonni pe
pulig;

¹³ ginompar ni si Levi, na saompung pulig, parinangon ni sidea pe pulig; ginompar ni si Simei, na saompung pulig, parinangon ni sidea pe pulig, ¹⁴ sonai homa ginompar ni marga na legan ai ganup pangku pulig bei, anjaha parinangon ni sidea pe pulig bei.

Paniapkon bani Parnaibataon na Legan ampa Nabi Sipakulah-kulah

13 ¹ Bani ari ai adong ma sada bah tubuh ibuha bani ginompar ni si Daud ampa bani pangisi ni Jerusalem laho mamurihi sidea humbani dousa ampa habutakon.

² Bani ari ai, nini Jahowa Zebaot, “Siapkonon-Ku ma goran-goran ni naibata na legan hun tanoh on, ase ulang be taringat halak hujai; sonai homa nabi-nabi ampa tonduy na mabutak usiron-Ku do hun tanoh on.

³ Anggo adong ope atap ise na manjahai songon nabi, hatahonon ni bapa atap inangni na manubuhkon ai ma bani, ‘Seng bulih be ho manggoluh, ai ihatahon ho do ladung marhitei goran ni Jahowa;’ anjaha bapani ampa inangni na manubuhkon ai ma na mamantomsia anggo manjahai ia.

⁴ Bani ari ai maila ma sagala nabi marhitei panonggoranni sanggah na manjahai ia, seng be pakeionni baju na marambulu laho paoto-otohon,

⁵ tapi hatahononni ma, ‘Seng nabi ahu, parjuma-juma do ahu, ai simada juma do ahu humbani haposoonku ope.’

⁶ Porini adong na manungkunsi, ‘Ugah aha do na bani tontonmu in?’ Hatahononni ma, ‘Na hona bogbogan do ahu i rumah ni hasomanku.’”

Hona Bogbog Parmahan Gabe Merap ma Biribiri

⁷ “Misir ma, ale podang, dompak parmahan-Ku, dompak dalahi tang sindohor-Hu,” nini Jahowa Zebaot. “Hubogbog ma parmahan in, ase merap biribiri in, durdurhonon-Ku do tangan-Ku laho manogu halak na maetek.

⁸ Masa ma bani ganup tanoh in,” nini Jahowa, “Siapkonon anjaha agouon-Ku ma dua partolu pangisini, tapi tebahonon-Ku do manggoluh na saptolu nari.

⁹ Na saptolu ai pe nahkonon-Ku do hubagas apuy, laho papitahkon songon pirak; anjaha ujion do sidea songon panguji bani omas. Diloon ni sidea ma goran-Ku anjaha balosan-Ku ma sidea. Hatahonon-Ku ma, ‘Bangsang-Ku do in;’ anjaha sidea pe hatahononni do, ‘Jahowa do Naibatanku.’”

Partalar ni Jahowa i Dolog Jetun

14 ¹Tonggor ma, na roh ma ari ni Jahowa, gabe bagion ma taban-tabanmu i tongah-tongahmin.

²Ai patumpuon-Ku ma ganup bangsa dompak Jerusalem laho marporang, gabe tartaban ma huta ai, rumah-rumah hona ayob, anjaha puang-puang hona butakan. Satongah huta ai tarboan hu habuangan, tapi simasima ni bangsa ai, seng siapkonon-Ku hun huta ai.

³Dob ai bingkat ma Jahowa mangimbang bangsa-bangsa ai, songon na somal la marporang bani ari parporangan.

⁴Jadi onjolhonon-Ni ma nahei-Ni bani ari ai i atas ni Dolog Jetun, tontang ni Jerusalem, hampit hapoltakan, anjaha bolah dua ma Dolog Jetun ai hun hapoltakan hu hasundutan, gabe jadi ma sada habungan na lumbang tumang; morot do satongah ni dolog ai dompak utara, anjaha na satongah nari dompak dangsina.

⁵Itutup ma habungan ni dolog-dolog-Kai; das do ronsi Asel habungan ni dolog-dolog ai; anjaha maningon maporus ma hanima songon parporusnima sanggah lalou bani panorang ni si Usia, raja ni Juda. Dob ai roh ma Jahowa Naibatangku, odor pakon-Si sagala halak na mapansing.

⁶ Bani ari ai seng dong na milas barang na borgoh anjaha bah na himpang pe seng dong;

⁷ anjaha layur ari ai, Jahowa do sibotoh ai, seng songon arian, seng songon borngin; tapi marayak bodari lihar ma use.

Panrajaion ni Jahowa

⁸ Bani ari ai luar ma bah hagoluhan hun Jerusalem, satongah dampak laut hampir hapoltakan, satongah dampak laut hampir hasundutan, torus do sonai age sanggah logou ni ari atap musim udan pe.

⁹ Anjaha Jahowa ma gabe Raja i sab tanoh on; bani ari ai Jahowa tumang mando, anjaha goran-Ni tumang mando.

¹⁰ Mubah ma ganup tanoh ai gabe pamah hun Geba das hu Rimon hampir dangsina ni Jerusalem. Tapi gijang do ia huta ai anjaha totap bani iananni hun horbangan Benjamin das hu horbangan na parlobei ai das hu horbangan parsuhi-suhi, anjaha hun manara Hananel das hu kilang anggur ni raja ai.

¹¹ Jadi marianan ma halak ijai, anjaha seng dong be masa papa ijai, anjaha totap ma sonang Jerusalem.

¹² Tapi on do papa sipamasaon ni Jahowa bani haganup bangsa na roh marporang dampak Jerusalem. Masik do bahenon-Ni daging ni sidea, sanggah jongjong ope sidea bani naheini, mata ni

sidea masak do ibagas liangni, sonai homa dilah ni sidea ibagas pamangan ni sidea.

¹³ Bani ari ai masa ma hageoron bolon humbani Jahowa i tongah-tongah ni sidea, gabe ganup ma marsitangkap tangan ni hasomanni, anjaha tangan ni na sada mangimbang tangan ni na sada nari.

¹⁴ Juda pe dihut do marporang mangkopkop Jerusalem, anjaha hona ayob ma habayakon ni bangsa-bangsa inggot, omas, pirak ampa hiou buei tumang.

¹⁵ Papa-papa na sonai ai pe mangonai do homa bani huda, pirah ni halode, unta, halode, bani sagala pinahan na adong bani hulanan ai, usih hubani papa nongkan.

¹⁶ Anjaha ganup na tading humbani ganup bangsa-bangsa ai, na bingkat mangimbang Jerusalem, bingkat ma sidea ai ganup tahun laho marsombah hubani Raja in, Jahowa Zebaot, ampa marpesta lampolampo.

¹⁷ Tapi barang ise humbani bangsa na i tanoh on, na so tangkog hu Jerusalem laho marsombah hubani Raja in, Jahowa Zebaot, seng anjai roh be udan bani sidea.

¹⁸ Porini bangsa Masir na so tangkog ai laho pataridahkon dirini, jadi sogop ma bani sidea papa, na nihonahon ni Jahowa bani bangsa na so tangkog laho mamestahon pesta parlampolampoan ai.

¹⁹ Ai ma na gabe uhum bani Masir ampa uhum bani bangsa-bangsa, na so bingkat marpesta parlampolampoan hu Jerusalem.

²⁰ Bani ari ai tarsurat do age bani giring-giring ni huda: Pinapansing bani Jahowa. Anjaha hudon i rumah ni Jahowa gabe songon pinggan bolag panggalangan ma ai i lobei ni anjapanjap.

²¹ Anjaha sagala hudon i Jerusalem ampa Juda maningon papansingon do ai bani Jahowa, ase sagala na manggalang boi roh, anjaha ibuat hunjai bahen panlompahanni. Anjaha seng dong be halak partiga-tiga bani ari ai i rumah ni Jahowa Zebaot.

Maleaki

Holong ni Naibata bani Israel

1 ¹ Hata pangungkabon ni Jahowa bani Israel marhitei si Maleaki.

² “Holong do uhur-Hu bannima,” nini Jahowa. Tapi ihatahon hanima, “Sonaha ma pangkaholongi-Mu bennami? Ai lang si Esau do namin abang ni si Jakob,” nini Jahowa, “hape si Jakob do Huhaholongi,

³ tapi sogam do uhur-Hu bani si Esau. Halani ai do ase gabe halimisan Hubahen dolog-dologni, anjaha Huondoskon parbagiananni gabe ianan ni sorigala, na somal marianan i halimisan.”

⁴ Porini nini Edom, ‘Domma tongon iparseda hanami, tapi ulakkononnami do paulihon na mareong ai,’ hatahonon ni Jahowa Zebaot ma, ‘Sidea paulihon, tapi Ahu use manreongkon; goranon ni halak ma sidea, “Tanoh hajahaton, bangsa siringisan ni Jahowa sadokah ni dokahni.”

⁵ Idahon ni matanima ope ai, gabe hatahononnima ma, “Banggal do Jahowa, age i darat ni parbalogan ni Israel.” ’

Sipanggalang na So Talup

⁶ Nini Jahowa Zebaot, “Ipasangap anak do bapani, anjaha ihabiari juakjuak tuanni. Anggo bapa do Ahu, ija do hasangapon-Ku? Anggo Tuhan Ahu, ija do biar dampak Ahu? Hanima malim-malim sipahiri goran-Ku. Hape nini hanima ope, ‘Sonaha, hanami pahiri goran-Mu?’

⁷ Iboan hanima do bani anjapanjap-Ku ruti na mabutak. Anjaha ihatahon hanima do, ‘Sonaha ibahen hanami pabutak ai?’ Marhitei na ipinghiri hanima, ‘Boi do pahirion meja ni Jahowa.’

⁸ Anggo iboan hanima pinahan na mapitung bahen galangan, ai lang na sambor ma ai? Anggo igalangkon hanima na oyangon atap na boritan, ai lang na sambor ma ai? Parsiluah hanima ma ai bani panggomgominima, mintor tumaram ma rosuh uhurni mangidah ho barang layak ia bam?” nini Jahowa Zebaot.

⁹ “Ai pe buat hanima ma uhur ni Naibata marhitei galangan sisonai ai, ase idop uhur-Ni banta! Sonai do pambahenannima, mintor tarbahen ma rosuh uhur-Ni mangidah hanima?” nini Jahowa Zebaot.

¹⁰ “Ambit adong ma namin sada halak hun tongah-tongahnima na ra manutup labah ni Rumah Panumbahan in, ase ulang sisoya-soya pannahitinima apuy bani anjapanjap-Kin. Seng marosuh uhur-Hu mangidah hanima,” nini Jahowa

Zebaot, “anjaha seng tarharosuhkon Ahu galangan hun tangannima.

¹¹ Ai hun hapoltakan das hu hasundutan timbul do goran-Ku i tongah-tongah ni bangsa-bangsa anjaha bani ganup ianan igalangkon do dahupa bani goran-Ku ampa galangan sipanganon na pitah; ai timbul do goran-Ku i tongah-tongah ni bangsa-bangsa,” nini Jahowa Zebaot.

¹² “Tapi anggo hanima ipabutak hanima do in, marhitei na hinatahonnima, ‘Boi do butak bahenon meja ni Jahowa, anjaha mapas uhur bani sipanganon na ijai ai.’

¹³ Nini hanima, ‘Tonggor ma, loja ni in!’ Anjaha mapas do uhurnima Bangku,” nini Jahowa Zebaot. “Iboan hanima do na nirampok, na oyangon ampa na boritan, iboan hanima do ai gabe galangannima. Mintor tarharosuhkon Ahu ma manjalo ai hun tangannima?” nini Jahowa.

¹⁴ “Sai hona papa ma sipangoto-otoi, na marnah pinahan tunggal namin bani hulananni, na dob binagahkonni, hape na martikas do saudni igalangkon bani Tuhan in! Ai Raja na bolon do Ahu,” nini Jahowa Zebaot, “anjaha sihabiaran do goran-Ku i tongah-tongah ni bangsa-bangsa.”

Lumba-lumba bani Malim na So Talup

2 ¹ “Ai pe, hanima malim-malim, mangonai do bannima hata lumba-lumba on.

² Anggo seng ra hanima manangihon, anjaha anggo seng ra hanima marimbagaskon, laho pasangapkon goran-Ku,” nini Jahowa Zebaot, “tongoson-Ku ma papa hu tongah-tongahnima, anjaha gabe papa bahenon-Ku pasu-pasu na bannima in; domma tongon hona papang-Ku ai, halani na so ra hanima marparimbagaskon ai.

³ Tonggor ma, rotapon-Ku do tangannima, anjaha lapuhonon-Ku do kotoran bani bohinima, ai ma kotoran ni galangannima, anjaha saradon do hanima hunjai.

⁴ Jadi botohonnima ma, Ahu do na manongos haputusan on bannima, laho patotapkon padan-Ku na bani halak Levi,” nini Jahowa Zebaot.

⁵ “Ia padan na Hubahen ai bani, ai ma padan hagoluhan ampa hadameion, anjaha Hubere do ai bani, ase unduk ia marhabiaran bani goran-Ku.

⁶ Titah na sintong do bani pamanganni, anjaha seng jumpah hagedukon bani bibirni, ibagas damei ampa hasintongon do ia marparlahou i lobei-Hu, anjaha buei do halak ipaulak humbani hajahaton.

⁷ Ai maningon ramotkonon ni malim do habotohon, anjaha humbani pamanganni pindahan pangajarion, ai suruhan ni Jahowa Zebaot do ia.

⁸ Tapi anggo hanima domma manlembang humbani dalan ai, anjaha buei halak jomba ibahen hanima marhitei pangajarionnima, iparseda

hanima do padan na bani halak Levi,” nini Jahowa Zebaot.

⁹ “Halani ai do ase hiri anjaha dorun hanima Hubahen i lobei ni ganup bangsa in, halani na so nidalanannima dalan-Kai, tapi martonggor jumbak do hanima bani pangajarion.”

Pinsang-pinsang Halani Pangoseion bani Partongahjabuan

¹⁰ Ai lang sada do bapa ni hita on ganup? Ai lang sada do Naibata na manompa hita? Mase ma marsioseian hita samah hita, anjaha ibutaki hita padan na bani ompungta?

¹¹ Mosei do halak Juda, anjaha masa do sihagigihononkon i Israel ampa i Jerusalem; ai ibutaki halak Juda do rumah hapansingon ni Jahowa, na hinaholonganni ai, anjaha iompoi do boru ni naibata na legan.

¹² Sai siapkonon ni Jahowa do halak na mangkorjahon na sonai ai, sipangadu ampa sipangapiti, hun lampolampo ni si Jakob, age humbani halak na mamboan galangan bani Jahowa Zebaot.

¹³ Anjaha on do na binahennima. Irungkub hanima do anjapanjap ni Jahowa marhitei iluh-iluh, partangison ampa hoih-hoih, halani na so pinardiateihon-Ni ai be galangan ai, anjaha

na so rosuh ai be uhur-Ni manjalo ai humbani tangannima.

¹⁴ Nini hanima sungkun-sungkun, “Mase sonai?” Halani Jahowa do saksi ni parpadanan na binahenmu ampa naboru bani haposoonmu, na dob nioseimu age pe ia do huanmu ampa parinangonmu mangihutkon padan.

¹⁵ Ai lang Naibata na sasada in do manjadihon ampa patotapkon banta tonduy hagoluhan? Anjaha aha do na pinarsinta-Ni? Bonih ni Naibata. Halani ai marjaga-jaga ma hanima ibagas tonduynima, ulang ma adong na mosei humbani naboru hinaholonganni sanggah poso.

¹⁶ “Ai Huhagigihon do parsirang-sirangon,” nini Jahowa Naibata ni Israel, “ampna na manrungkubkon hiouni bani hajahaton,” nini Jahowa Zebaot. “Halani ai jaga hanima ma dirinima, anjaha ulang be mosei.”

Naibata Roh Mamboan Uhum

¹⁷ Ilojai nasiam do Jahowa marhitei sahap-sahap nasiam. Tapi nini nasiam, “Marhitei aha ilojai hanami la?” Marhitei na mangkatahon, “Sagala sihorjahon hajahaton, dear do uhur ni Jahowa mangidah ai, anjaha rosuh do uhur-Ni bani sidea.” Barang marhitei na manungkun, “Ija do Naibata, sidabuh uhum?”

3¹ “Tonggor ma, suruhon-Ku ma suruhan-Ku, ase ipasirsir dalam i lobei-Hu, jadi sompong ma roh Tuhan, na pinindahannima ai, marayak rumah-Ni; suruhan ni parpadanan, na hinasiholhonnima ai, tonggor ma, na roh ma la,” nini Jahowa Zebaot.

² “Tapi ise ma na boi manahankon ari parroh-Ni ai, anjaha ise ma na boi jongjong, anggo talar ma la? Ai songon apuy ni panopa do la anjaha songon sabun ni panabun.

³ Hundul ma la songon sipanlala ampa sipapitah pirak, jadi urasan-Ni ma halak Levi, anjaha papitahon-Ni ma sidea songon omas ampa pirak, ase boi sidea mamboban galangan na sintong bani Jahowa.

⁴ Anjaha rosuh uhur ni Jahowa bani galangan ni Juda ampa Jerusalem songon sapari ampa bani tahun-tahun na salpu.

⁵ Jadi dohoran-Ku ma hanima laho manguhum, gabe saksi na sihap ma Ahu bani parsibalik mata, bani siparbangkis, bani sibijahon na tongon, bani halak na mangodohkon siparombou ibagas gajini, na mabalu ampa na tading maetek, bani halak na manulak panginsolat, na so mabiar Bangku,” nini Jahowa Zebaot.

Dilo-dilo bani Hamubahon

⁶ “Seng mubah-ubah anggo Ahu, Jahowa, tapi anggo hanima tong pe songon anak ni si Jakob.

⁷ Humbani panorang ni ompungnima, sai manlembang do hanima humbani titah-Ku, anjaha seng iramotkon hanima ai. Mulak ma hanima hu Bangku, ase mulak Ahu bannima,” nini Jahowa Zebaot. “Tapi nini hanima, ‘Sonaha ma hanami mulak?’

⁸ Ai onggga do jolma paoto-otohon Naibata, ase paoto-otoonnima Ahu? Tapi nini hanima, ‘Marhitei aha ma ioto-otoi hanami Ham?’ Marhitei parsapuluhan ai ampa galangan ai!

⁹ Mangonai do papa bannima, halani ioto-otoi hanima Ahu, ganup bangsa in tene.

¹⁰ Boan hanima ma parsapuluhan in, gok, hu rumah parartaan, ase adong bohal i rumah-Ku; dob ai lajou hanima ma Ahu marhitei ai,” nini Jahowa Zebaot, “atap na so buhaon-Ku do bannima jendela ni langit, laho manguseihon bannima pasu-pasu na marlobih-lobih.

¹¹ Jadi tulakon-Ku ma, halani hanima, sipangatah (*balang*) ai, ase ulang be isiapkan gogoh ni tanoh in, anjaha ase ulang mangolang hayu anggur na i juma ai marbuah bannima,” nini Jahowa Zebaot.

¹² “Jadi parhatuahon ni haganup bangsa ma hanima, ai maningon gabe tanoh haudungan ni uhur do hanima,” nini Jahowa Zebaot.

Legan ni Parpintor ampa Parjahat

¹³ “Ipabanggal hanima do hata-hatanima dompak Ahu,” nini Jahowa. “Lanjar nini hanima ope, ‘Sonaha ma parsahapnami dompak Ham?’

¹⁴ Ihatahon hanima, ‘Seng dong gunani balosan Naibata. Aha ma untungnami, halani ihorjahon hanami parentah-Ni, atap na marhoru ai hanami mardalan i lobei ni Jahowa Zebaot?’

¹⁵ Halani ai iparhatuah hanima do halak na jungkat maruhur: Halak parjahat seng pitah mardoхар, tapi age pe ilajou sidea Naibata, maluah do sidea.

¹⁶ Tapi marsipasingatan do halak na mangkabiari Jahowa samah sidea, pardiateihon anjaha itangar Naibata do ai. Anjaha tarsurat do i lobei-Ni sada buku pardingatan bani halak na mangkabiari Jahowa ampa na mangkargahon goran-Ni.

¹⁷ Jadi Ahu ma simada sidea,” nini Jahowa Zebaot, “bani ari na sihol marlulu ai Ahu, anjaha idopan-Ku ma sidea, songon sada halak na mangidopi anakni, na mambalosisi.

¹⁸ Ijai use idahonnima ma parleganan ni parpintor humbani parjahat, na mambalosi Naibata humbani na so mambalosi Naibata.”

Ari ni Jahowa

4 ¹ “Tonggor ma, na roh ma ari ai, gara songon pamurunan, jadi gabe doskon anggala ma

ganup halak na jungkat maruhur ampa halak parjahat; tutungon ni ari na sihol roh ai ma sidea,” nini Jahowa Zebaot, “anjaha seng dong tading bani sidea bahenon-Ni urat atap ranting pe.

² Tapi poltak ma anggo bannima, sagala na marhabiaran bani goran-Ku, mata ni ari ni hapintoron, marhasoman hamalumon i toruh ni habongni, songon anak ni lembu na manlumpat-lumpat humbagas harang.


³ Jadi dogeionnima ma halak parjahat, ai maningon gabe abuan do sidea i toruh ni tapak ni naheinima bani na marlulu ai Ahu,” nini Jahowa Zebaot.

⁴ Sai padingat-dingat hanima ma titah ni si Musa, juakjuak-Kai, titah ampa aturan, na Huondoskon ai bani i Dolog Horeb, sipadason bani haganup Israel.

⁵ Tonggor ma, suruhon-Ku ma bannima Nabi Elias, parlobei ni parroh ni ari ni Jahowa na bolon anjaha na majombut ai.

⁶ Anjaha ia ma na paulakkon uhur ni bapa bani anakni, anjaha uhur ni anak bani bapani, use ulang roh Ahu mangkonahon papa bani tanoh on.

Alkitab



Bahasa Batak Simalungun

LAI - 2007 Edition

Website:

www.bible.com

© 2007 LAI

<https://www.bible.com/versions/34>